


Lerérún Búngiu To
Lánina Iséri Darádu



New Testament in Garifuna (HO:cab:Garifuna)

Lerérun Búngiu To Lánina Iséri Darádu New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
df8e4807-f4f9-5f4a-ab14-d1f7ffe98b0a

Contents

SAN MATEO	1
SAN MARCOS	66
SAN LUCAS	107
SAN JUAN	175
HECHOS	225
ROMANOS	285
1 CORINTIOS	312
2 CORINTIOS	340
GÁLATAS	358
EFESIOS	368
FILIPENSES	377
COLOSENSES	384
1 TESALONICENSES	390
2 TESALONICENSES	396
1 TIMOTEO	399
2 TIMOTEO	406
TITO	411
FILEMÓN	414
HEBREOS	416
SANTIAGO	436
1 PEDRO	443
2 PEDRO	451
1 JUAN	456
2 JUAN	463
3 JUAN	464
JUDAS	465
APOCALIPSIS	467

UGÁNU BUÍTI LE LABÜRÜJABEI MATÉO LUÁGU JESÚSU

*Linébaanfaangu Jesúsu
(Lc 3.23-38)*

1 Niján jíri linébaanfaangu Jesucrístu le jádaangiñebei meja ladügawagun Davíd lúma Abrahám.

2 Abrahám lúguchibei Isáac, Isáac lúguchi Jacób, Jacób lúguchi Judá jáu lamúlenu,

3 Judá lúguchi Fáres lúma Zára, Támar tugúya jáguchu, Fáres lúguchi Esróm, Esróm lúguchi Arám,

4 Arám lúguchi Aminadáb, Aminadáb lúguchi Naasón, Naasón lúguchi Salmón,

5 Salmón lúguchi Booz, Raháb lúguchu, Booz lúguchi Óbed, Rut lúguchu, Óbed lúguchi Isái,

6 Isái lúguchi urúei Davíd, urúei Davíd túma tó meja lúmari Uriás, jagía lagübüri gubaña Salomón.

7 Salomón lúguchibei Roboám, Roboám lúguchi Abías, Abías lúguchi Ása,

8 Ása lúguchi Josafát, Josafát lúguchi Jorám, Jorám lúguchi Uzías,

9 Uzías lúguchi Jótam, Jótam lúguchi Ácaz, Ácaz lúguchi Ezequías,

10 Ezequías lúguchi Manasés, Manasés lúguchi Amón, Amón lúguchi Josías,

11 Josías lúguchi Jeconías jáu lamúlenu lídan dan le janáanwagunbei Israelítagu adáürawagua Babilónia.

12 Láriigiñe le, Jeconías lúguchibei Salatiél, Salatiél lúguchi Zorobabél,

13 Zorobabél lúguchi Abiúd, Abiúd lúguchi Eliaquím, Eliaquím lúguchi Azór,

14 Azór lúguchi Sadóc, Sadóc lúguchi Aquím, Aquím lúguchi Eliúd,

15 Eliúd lúguchi Eleázar, Eleázar lúguchi Matán, Matán lúguchi Jacób,

16 Jacób lúguchi José le túmari María, tugúyati lúguchuboun Jesúsu le gíribei Crístu.

17 Catoúrusuñanu lubeíti linébaanfaangu Jesúsu lúmagiñe Abrahám lúmoun Davíd, catoúrusu lúmagiñe Davíd lúmoun janáanwagúniwa Israelítagu Babilónioun, catoúrusu lúmagiñe dan ligía lúmoun lagüriajóun Crístu.

*Lagüriajóun Crístu
(Lc 2.1-7)*

18 Ítara líña ligáburi lagüriajóun Jesucrístu. María to lúguchu, gadáraduñoun lúma José lun tamárieidun lúma, lubáragiñeti jaganóun jámagua, lubáragiñe lasúbudirunun quei würi, ába tadáriragun túngua láu dagáñu tíña lan láu lubáfu Sífri Sándu.

19 Quei ában lubeí wügüri buídu tigáburi José le tadári, májati lasúbudirúniwa le asúeredubei tun María, busénrügüti lígirunun, míchugunga tidúnrun.

20 Dan le niján lubeí arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwénedi, ába laríñagun lun.

—José, ladügawagun Davíd, manúfudebá lun berésibirunun María queísi búmari, ladüga irájü le lúnbei tagáraüduni, lúmagiñe Sífri Sándu liábin.

²¹ Tagáraüduba ában irájü, ábame bíchuguni líri Jesúsu. Ítara lúba líri ladüga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulumugugiñe proféta.

²³ Tadágeinaduba ában irájü, ábame tagáraüdü dun ában irájü, Emanuél, ligíaba líri, líla íri ligía, “Búngiu wáma”.

²⁴ Dan le lagágudunbei José lídaangiñe uwénedi ligía, ába ladügüni le lubeíbei ánjeli ligía lun, ába lerésibirunun María queísi lúmari,

²⁵ masúbudirúngalóun queísi würi darí tagüriajani furúmiñeti tiraü, ába líchuguni líri Jesúsu.

2

Jachülrün chu táu aríjei Jesúsu

¹ Lídan fulásu le gíribei Belén, lumúanrugu Judéa, ñi lagüriajouá Jesúsu dán meja le Heródes lan urúeíbei lídan jageíra juríu. Ábati jachülrün fiú wügüriña chu táu ubúrugun Jerusalén luegiñe oubaü le ñígiñe lubeí laboucha wéyu.

² Ába jálügüdajan.

—¿Jageísan jarúeite juríu le agüriajoubei? Aríja wamáaru luwáruguman le ñígiñe lubeí láfuara wéyu, wayabiñati lun wájuduragun lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna.

⁴ Ábati lagúarun joun sun jábutigu fádirigu lídan jafiñen juríu, jáma ja arúfudajabalin lilúrudun Moisés joun gürigia, ába lálügüdaguniña jalábei lan libítí fulásu lagüriajouá Crístu.

⁵ Ába jaríñagun lun.

—Belén, le lumúanrugubei Judéa, ladüga ítara líña labürüdüni proféta.

⁶ Amürü Belén, lumúanruguna Judéa,

amürü ában lídaangiñe ubúrugu weírigutimaati lídan múa le, láu sun biñúraü, ladüga láfuriduba ában ábuti bídaangiñe le lúnbei louñigiruniña numútuniña ja Israelítagu.

⁷ Ábati lagúarun Heródes joun chu táu arámudaguarügü, ába lálügüdüniña luágutima dan le tarúfudaguagüle warúguma túngua joun.

⁸ Ábati louñajaniña Belén, laríñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñüdüñ námuga giñe ájuduragua lun.

⁹ Lárigiñe jagáambuni chu táu lerérun urúei, ába jouúdin. Warúguma bugáti to jaríjuboun le ñígiñe lubeí láfuara wéyu, ába tídin jabá jabá, darí taráramun lougiñe fulásu le ñí lubei irájü le.

¹⁰ Dan le jaríjinun chu táu ja warúguma, ába jagúndaaragun sarágu.

¹¹ Dánti le jebélurun tídouñ múna, ába jaríjini irájü le túma lúguchu to María. Ábati jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífti.

¹² Lárigiñe, ába jawísarúniwa lídan jawénedi lun magíribudun jamá ñígiñe lubeí Heródes, ába jagíribudun jageíroun lídaangiñe ámu úma.

Anúrājani lun Ejíptoun

¹³ Lárigiñe jouúdin chu táu jagía, ába larúfudagun ába láni Búngiu ánjeli lúngua lun José lídan luwénedi, ába laríñagun lun.

—Sarába, barübei irájü le táu sun lúguchu, anúrabá Ejíptoun, ábame beréderun ñi daríme nawísarunibu, ladüga láluajaali Heródes irájü le lun láfaruni jilágubei.

¹⁴ Ábati lásaarun José, ába lanügüni irájü táu sun lúguchu árieibu ligía, ába lídin jáu Ejíptoun.

¹⁵ Ába jeréderun ñi darí loúnwen Heródes. Lasúseredunbei sun le lun lagúnfulirun le lariñagubei Búngiu liyúmulugugiñe proféta. “Sagá numuti Niraü Ejíptogiñe.”

Láfaraguágüdüniña Heródes irájüñü

¹⁶ Dan le ladáriragun Heródes lúngua luágu yéegua jamá lan chu táu, ába lagañidun, ába loúnajan áfaraguaña sun irájüñü ja biáma tíña irúmu jáu lun únabun, ja aganoúbaña Belén lúma sun fulásu geyégua láu, según dan le jariñagubei chu táu luágu lagüriajóuniwa irájü ligía.

¹⁷ Ítara líña lagúnfulirun le labürüjabei proféta Jeremías.

¹⁸ Agaambúati lagúarajan ában umálali Ramá láu oúnwenbun igárigu, umálali ligía tumálali Raquéel, to ayájuboun járigi tirájüñü, mabúseeruntu lun támalijoún ladüga jilágua jamá.

¹⁹ Láriigiñe loúnwen Heródes, ába liábin ába láni Búngiu ánjeli lun José lídan luwénedi yágüta Ejípto, ába lariñagun lun.

²⁰ —Sarába, barübei irájü le táu sun lúguchu, giríbu jumá jageíroun Israelítagu ladüga jilágua ja abúseerubaña meja jáfaruni irájü le.

²¹ Ába lásaarun José, ába lanügüni irájü táu sun lúguchu jageíroun Israelítagu.

²² Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñijin, ába lariñawagúniwa lun lídan uwénedi lun lídin Galiléoun.

²³ Lachúlürün ñi, ába lídin agánawa lídan fulásu le giríbei Nazarét, le lumúanrugubei Galiléa. Lasúseredunbei sun cátei le lun lagúnfulirun le jariñagubei profétagu luágu Nazarétna lan Jesúsu.

3

Lapúrichijan Juan le abásteragüdjabei lídan fulásu mageírawati (Mr 1.1-8; Lc 3.1-9, 15-17; Jn 1.19-28)

¹ Lídoun dan ligía, ába liábin Juan le abásteragüdjabei apúrichija lídan fulásu mageírawati, Judéa,

² ába lariñagun lídan lapúrichijan.

—Sáansi jumei jóuserun, ladüga yaráfaali larúeijan Búngiu.

³ Juan le, ligía le uágubei meja labürüja proféta Isaías ítara.

Agaambúati lumálali ában gürgía agúaraja lídan fulásu mageírawati ítara.

“Aráanse jumóun janígi lubá liábin Wabúreme, queísi ladárarúniwa üma surúti.”

⁴ Lanáangun Juan, láutu lúra caméyu, liábin lagürüga liránaagua, guéru, chigángaru leígubaña lúma síruudu le áraabuna.

⁵ Ábaja jayábin ubürugugiñe Jerusalén, lúma Judéagiñe, lúma lubádugiñe dúna Jordán agáambeí lapúrichijan,

⁶ dántija le jagúfeseruni jafígoun, ába labásteragüdüniña lídan dúna le giríbei Jordán.

7 Dan le laríjin Juan luágu sarágu jáña lan gürígia lídaangiñetiña jadámurin fariséogu jáma saduséogu ñübintiña lun jabásterun, ába laríñagun joun.

—Íjarásan jéwe jugúya le! ¿Ca awisarubadün lun janúrajan lueí lanárime afáyeiragülei luágu figou le lúnbei liábin?

8 Oúsera jumá buídu, arijúa lámuga furáangu luágu sáansigua lan ligáburi jouserun.

9 Mapántajan jugúyame, aríñaga jídaangua. “Linébaanfaangu Abrahám wagía”, ladüga nariñajare jun luágu gayára lan ladügün Búngiu linébaanfaangu Abrahám lídaangiñe dübü le.

10 Madíseeli lagúnfulirun le laríñagubei Búngiu, luágu yaráfaali lan lidáni abeichúni luágu figou, aráanseeru jaráwa lun lánchuajouñ wéwe, áni sun wéwe le mabuídunti lin, chaünwati, ába lagudún.

11 Áu, láu dúna nabásteragüdaün, arúfudei luágu sáansi jumáli lan ligáburi jouserun, ánjeinti le lúnbei liábin nárigi, labásteragüdbadün láu Sífiri Sándu, áni lafáyeiragüdbadün luágu figou queisi láu wátu geméti. Gabáfuti nueí darí lun madüna nan ni lun narágachunun ligeidin.

12 Nújeinjaru lichóbulin lújaburugu, larúmadagüdübei türígu, ábame lanúadiruni lídaangiñe sagádi mábejjali. Ábame larefduni türígu, ábame láguduni sagádi le mábejjali lídan wátu geméti le méñeguchadibeí.

Labásterun Jesúsu

(Mr 1.9-11; Lc 3.21-22)

13 Dan le liábin Jesúsu Galiléagiñe, ába lachülürün luágun dúna le gíribei Jordán le ñi lubei Juan lun labásteragüdüni.

14 Májati yebéti Juan labásteragüdüni, ába laríñagun lun Jesúsu.

—Nugúya lúnbei babásteragüdünina, ¿amürü lubeí ñübin nun lun nabásteragüdünibu?

15 Ába laríñagun Jesúsu lun.

—Ítara lúba guetó, ladüga lúnti wadügüni le lubeíbei Búngiu.

Ába labásteragüdüni Juan Jesúsu,

16 lárigiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun.

17 Ába lagaambún ába umálali siélugiñe le aríñagubei.

—Niraü le jínsiñebei nun le, le áubei oúnwenbun lan nugúndan.

4

Louçhaguni Máfia Jesúsu

(Mr 1.12-13; Lc 4.1-13)

1 Ába lanügüni Sífiri Sándu Jesúsu lídoun fulásu mageírawati lun louçhaguni Máfia.

2 Lárigiñe leréderun Jesúsu bián-wein wéyu lúma bián-wein áriebu meíginga, ába lalámachun.

3 Ábati liábin Máfia lubádun, ába laríñagun lun lun louçhaguni.

—Ánjein liraü bubei Búngiu, salíguagüdbabeí dübü le feínme.

4 Ába louñabun Jesúsu.

—Tariñajare Lerérun Búngiu. “Mámarügübei táu feín labágarida gürígia, labágariduba giñe láu sun dimúrei le laríñagubei Búngiu.”

⁵ Ábati lanügüni Máfia Jesúsu Jerusaléoun, ubúru gu le sándubei joun juríu, ába laweínragüdüni tábulugun témpulu,

⁶ ába lariñagun lun.

—Ánjein liraü bubei Búngiu, chubába yágiñe lun únabun, ladüga tariñajare Lerérun Búngiu.

Lariñaguba Búngiu joun láni ánjeligu lun joúnigirunibu.

Janügübadibu jájaburugu lun machúgeragun lan bugüdi luágu dübü.

⁷ Ába loúnabuni Jesúsu.

—Ariñagatu giñe Lerérun Búngiu. “Mouçaguabeí Babúreme Búngiu.”

⁸ Ába lanügüni Máfia Jesúsu luágun ában wübü íñuti, ába larúfuduni sun arúejani le ubouágubei lun, lúma buri luweírigun,

⁹ ába lariñagun lun.

—Níchugubei sun le bun ánjabu ájuduragua nun.

¹⁰ Ábati lariñagun Jesúsu lun.

—¡Beíba nuei, Máfia! ladüga tariñajare Lerérun Búngiu. “Lúnrügüba Babúreme Búngiu bájuduragua, lúnrügüba giñe besériwida.”

¹¹ Ábati ladisedun Máfia lueí, ába jayábin ánjeligu esériwidei.

Lagúmeseruni Jesúsu luwádigimari, Galiléa

(Mr 1.14-15; Lc 4.14-15)

¹² Dan le lagáambunbei Jesúsu luágu níjein lan Juan furísunrugu, ába lídin lárigoún Galiléoun.

¹³ Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabolón lúma Neftalí.

¹⁴ Lasúseredunbei sun le lun lagúnfulirun le labürüjabeí meja Isaías, lé meja proféta.

¹⁵ Lageíra Zabolón lúma Neftalí,

lídan úma lubádu barána, lueígiñe oubaü le ñígiñe lubeí láfuara wéyu libíti Jordán,

Galiléa le ñí lubei jagánawa ja mámabaña juríu.

¹⁶ Jugúya lé meja lídaanbei lubúriga aríjaadün ában oúnwenbun larúgounga,

jugúya lé meja lídaanbei lamúñounga le lánina ouweni,

jarúgoungagüdawaali jáu.

¹⁷ Lúmagiñe dan ligía, ába lagúmeserun Jesúsu apúrichija ñi ítara.

—Sáansi jumeí jigáburu, ladüga yaráfaali larúejan Búngiu.

Lagúarun Jesúsu joun gádürü esénjatiña lun lánime disípulugu

(Mr 1.16-20; Lc 5.1-11)

¹⁸ Eíbugeina líña Jesúsu láru láru dúna Galiléa, ligía laríjin bián gamúlenuguátiña, ában jádaangiñe, Simón le méme giríbei Pédro, le ában, Andrés. Esénjani jabágaríbei, jáguruñati.

¹⁹ Ábati lariñagun Jesúsu joun.

—Falá jumana, ábame mesénijanjadün lan úduraü, anájarügaadünme güri gía nun lun nánigume.

²⁰ Furése furése ába jígirunun jasénin, ába joúdin lúma.

²¹ Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi arámada joun jasénin. Ába lagúarun Jesúsu joun lun lánime disípulugu,

²² lídan óra ligía ába jígirunun ugúnein, ígira jáguchi, ába joúdin lúma Jesúsu.

Larúfudajan Jesúsu joun sarágu gürígia
(Lc 6.17-19)

²³ Ábajei leibuguni Jesúsu sun Galiléa arúfudajeina tídan buri jalígilisin juríu to lídaanboun ságü fulásu. Ábaja lapúrichijani ugánu buíti luágu larúeijan Búngiu, areídaguagüda ligía sun luwúyeri sándi le jawáguti gürígia.

²⁴ Ába lagaambúniwa luágu Jesúsu lídan sun Síria, ába janügüniña sun ja asúfurirubaña láu ámuñegueinarügü sándi, igárigu, ja gawágubaña lagübüri espíritu, ja góuwejadibaña, jáma ja derégüdaaña úgubu, ába lareídaguagüdüniña.

²⁵ Sarágu jáña gürígia afálaruti Galiléagiñe, lídaangiñé buri fulásu Decápolisna, Jerusaléngiñe, loúbawagugiñe Judéa, lúma lueígiñe oúbaü le ñígiñe lubei laboucha wéyu libíti Jordán.

5

Lapúrichijan Jesúsu wübüwaügügiñe

¹ Dan le laríjinbaliña Jesúsu sun gürígia jagía, ába laweínrun luágun ában wübü, ába lañúurun ñi. Ábati jóundaragun láni disípulugu geyégu láu,

² ába lagúmeserun arúfudaja joun ítara.

³ —Fuleíseiwatün jugúya le asúbudirubalin luágu mégei jumáni lídejan Búngiu lun jadügüni le labúseerubei, ladüga méreengunbei jun lun jebélurun lídoun larúeijan Búngiu siélu.

⁴ Fuleíseiwatün jugúya le jírupei, ladüga líchuguba Búngiu gurásu jun.

⁵ Fuleíseiwatün jugúya le ünabugubei, ladüga jerésibirubei le uágubei laríñaga Búngiu luágu líchugubei lan jun.

⁶ Fuleíseiwatün jugúya le weírubei jabúseerun lúaradagun jabágaridun, ladüga líderagubadün Búngiu lun jadügüni.

⁷ Fuleíseiwatün jugúya le gudémebabubei, ladüga gudémebadün giñe lun Búngiu.

⁸ Fuleíseiwatün jugúya le jarúmabei anígi, ladüga jaríjubei Búngiu.

⁹ Fuleíseiwatün jugúya le áfaagubei lun jámalijan sun cátei, ladüga lagúarubadün Búngiu queísi lirájüñü.

¹⁰ Fuleíseiwatün jugúya le asúfurirubei eíbaajoüni luágu lúaragun jibágari, ladüga jebéluruba lídoun larúeijan Búngiu siélu.

¹¹ Fuleíseiwatün dan le janábagonün gürígia, eíbaaja jamaün, aríñaga jagía sun luwúyeri iyéeni juágu, nueígiñe.

¹² Gúndaañu jumá, ladüga jerésibiruba ában oúnwenbun fáyeiti siélu, ítara líñá meja giñe jeíbaajoüniwa profétagu ja ñübinbaña jubáragiñe.

Ítara jíña queísi sálu lúma lámpu lun ubou
(Mr 9.50; Lc 14.34-35)

¹³ Ába lasígirun Jesúsu aríñaga.

—Ítara jíña quei sálu joun lílana ubou le lun jeréderuniña luei jagádeirun, ánjein leferídura sálu lubásuan, ¿cábagi un ju lan? Úalime ju lan ni ca un lueídügüya lun lágurúniwa, ábame jadügüraguni gürígia.

¹⁴ Ítara jíña quei lámpu joun lílana ubou le. Ában ubúругu le luáguti ában wübü siñáti larámudagun, furáanguti larijóuniwa.

¹⁵ Mebedúnti giñe ában lámpu lun líchugúniwa tábugiñe ában gáfu, luágu dábula líchugúa lun larúgoungadágüdün jáu sun ja múnadabaña.

16 Ítara jumá gíñe, durúnguagüda jumei jilámpun jádan güriquia, lun dánme lan jarijini buíti le jadügübei, ábame gíñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

17 ‘Marítagua jumátia luágu niábiña lan agídarei lilúrudun Moisés, ni le jarúfudajabei profétagu, máma niábiña agídarei, niábiña arúfudei líla le tímtimaati.

18 Ninárün lubeíti jáu luágu njeingua rügáali ligía lan siélu lúma ubotú, magídarúnwabei ni ában púntu, ni ában létúra lídaangiñe lilúrudun Moisés daríme suséreele le lúnbei lasúseredun.

19 Ligía, le lubei íchuguti mebereseni luágu furúmierügü gumádi lídaangiñe lúru, íbini le lan ñúraütimaabei lídaangiñe, arúfudaja ligía joun güriquia lun jadügüni líbe le ladügübei, ñúraüraübei lanügüniwa yágüta siélu lídan larúejan Búngiu. Ánjeinti le ñüdünbei láu sún buri gumádi lídan lúaragun, ítara gíñe larúfudajan, weíríbei lanügüniwa yágüta siélu.

20 Nariñajare jun luágu ánjein lan mabuídun ligáburí jóuserun sarágu weíyaasu jawei arúfudajatiña lilúrudun Moisés, jáma fariséogu, mebelubadün lídoun larúejan Búngiu siélu.

Larúfudajan Jesúsu luágu igáñi

(Lc 12.57-59)

21 ‘Agáamba jumáli luágu aríñawagúa lán meja joun binádu jagübürigu lun máfarajan jamá, ladüga furúmiegurügü lan le áfarajati, lagúseragüdúwaba.

22 Wel, nariñajare jun luágu furúmiegurügü lan le agáñiduti lúma güriquia líledi lagúseragüdúwaba. Le anábuti güriquia líledi lagúseragüdübei luweírín-ágei lúru, le aríñaguti lun güriquia líledi, “íbídiougua táu”, luáguñein úma lun máfiougatin.

23 Ítara líña lubeíti, ánjein banüga bedéweejan luágun láni Búngiu latárü, báu ñi ába barítaguni luágu njein lan cátei lídan furúmiegurügü güriquia bubá,

24 Ígirabei le lúnbei bedéweejani ñi ligíbugiñe latárü, ábame bídin aráandara lúma güriquia ligía. Lárigiñemeti, gayáraajalíme bagíríbudun luágun latárü íchigei bedéweejan.

25 ‘Ánjein abúseera ában güriquia lanügünibu ligíbugiñoun lúru, belúba lídoun úarani lúma luágu jeíbuguniwagu luei ledéregerunibu lun agúseragüdüti, ledéregerabume agúseragüdüti lun polisía, ábame badaürün.

26 Ninárün báu, máfuridunbadibu ñígiñe darí bafáyeiruni lagúmujoún gáwanün.

Larúfudajan Jesúsu luágu adultériu

27 ‘Agáambaadün luágu aríñawagúa lán meja. “Magámarida jumá jámari ámu, adultériu líra.”

28 Au nariñajare jun luágu furúmiegurügü lan le awámadirutu ában würi, adügaali adultériu túma tídan lanígi.

29 ‘Ánjabu lubeíti lafígoungüda bágu le lueígiñebei boúnwenren, sagábei, fíbei díse, buítimaati lun beféridirün ában lídaangiñe umégeguni le buágubei sügü láu bídin láu sun búgubu máfiougatin.

30 Ánjein bújabu lubei le boúnwenren afígoungüdúbadibu, dürübei, fíbei díse, buítimaati lun leféridirün ában lídaangiñe umégeguni le buágubei sügü láu bídin láu sun búgubu máfiougatin.

Larúfudajan Jesúsu luágu ígiraguni
(Mt 19.9; Mr 10.11-12; Lc 16.18)

³¹ 'Aríñawagúati meja gíñe luágu furúmieguaugü lan le ígirutu lúmari lúnti líchugun gárada lánina ígiraguni tun.

³² Áu naríñajare jun luágu furúmieguaugü lan wügüri ígirutu lúmari, ánjein máma lubei ladüga tagámaridun ligibuagun, ába taganoún luma ámu wügüri, adüga güda lumútu furúmiñeti wügüri adultériu. Le gíñe agámaridutu würi ígiraguaaru ladügüña gíñe adultériu.

Larúfudajan Jesúsu luágu áfiñuruni

³³ 'Agáambaadün gíñe luágu aríñawagúa lán meja joun binádu agübürigu lun jagúnfulirun láu le jaríñagubei láu áfiñuruni ligíbugiñe Búngiu.

³⁴ Áu naríñajare jun luágu moún lumuti lan jáfiñurun ni ca uágu—ni luágu siélu ladüga ñi lan lañúra Búngiu,

³⁵ ni luágu múa ladüga ñi lan líchigei Búngiu lugúdi, ni luágu Jerusalén ladüga ligía lubúrugutebei Warúeite Búngiu le weirigubei,

³⁶ ni luágu jichügü ladüga siñáti ni jájarudagüdün ni jáuridagüdün ában ídiburi.

³⁷ Aríñagarügü jumá “ánja” o “uá”, máfiñurunga ni ca uágu, ámu cátei luei líra lúmagiñeti Máfia.

Larúfudajan Jesúsu luágu láguyugüdüniwa wuríbani
(Lc 6.29-30)

³⁸ 'Agáambaadün luágu aríñawagúa lán meja. “Águu luágu águu, ári luágu ári.”

³⁹ Áu naríñajare jun lun máguyugüdün jumá wuríbani luágu wuríbani, lubáragiñe líra, ánjein íchiga mútu agúfudein luágu ában louba jigíbu, rúya jumei le ában oúbaü lun.

⁴⁰ Le áluguti lanügünün ligíbugiñoun lúrudu tueígiñe jisímisin, ígira jumei lun gíñe lanügünun jabíte.

⁴¹ Ánjaün lafósura ában gürígia lun janügün ában anügüni ában máili, barüjumei bián máili.

⁴² Furúmieguaugü le amúriajati ában cátei júma, rújumei lun, míchiga jumei gíñe janágan luágun le afúredeijati júma.

Ísiñejabuni joun áganiñu
(Lc 6.27-28, 32-36)

⁴³ 'Agáambaadün gíñe luágu aríñawagúa lán meja. “Jínsiñelá bumáda bun, liyéreegudame bágani bun.”

⁴⁴ Áu naríñajare jun. Jínsiñe jamá jáganiñu jun, buidulá jayúmajan jabá ja wuríbabei jayúmajan jubá, adüga jumá buíti joun ja iyéreejabúbaña jun, ayúmuragua jumá lun Búngiu jawágu ja anábagubadün, ja wuríbabei oúserunün.

⁴⁵ Ítara lúba jagáburiduña lan queisi lirájüñü Júguchi Búngiu le siélubei, ligía oúnaja lumúti wéyu joun buítiña jáma wuríbatíña, oúnajalei júya dándu joun múaraantiña queisi joun úaratiña.

⁴⁶ Ánjein já rügübaña lubei jínsiñejabúbaña jun ínsiñeda jun, ¿cábagi fáyeiti jerésibira luágu líra? Adüga jamúti gíñe ja agúburajabalin liseínsuna gumádi ítara.

⁴⁷ Ánjein jóun rügüñein lubei jumádagu jayoúragua, ¿ca buíti jadügübei láu líra? Íbini ja ibidiñejabubána lun Búngiu adüga jamúti líra.

⁴⁸ Úaragua jumá le gumúti queisi úaragua lan Júguchi Búngiu le siélubei.

6

Larúfudajan Jesúsu luágu ladügün cátei buíti

¹ Ába lasígirun Jesúsu arúfudaja joun gürígia wübüwaügügiñe, laríñaga.

—Toúnigi jumá luei jadügün cátei buíti jagíbugiñe gürígia lúnrgü jarjijnün. Ánjein jadüga ítara, míchubei Júguchi Búngiu le siélubei fáyeiti buíti jun.

² Ligía, dánme lubei jíderagun ában gudémeti, masúbudiragüda jumei lun sun ubou quei jadüga ja biánguabaña igíbu ligílisirugu lúma úmadarugu. Jagía, jadügüni líra lúnrgü jadímurejan gürígia buídu jawágu. Ninárün jáu luágu láu lan jadügüni líra, ibíja jamáali jafáyeiruája.

³ Dan le jíchugun ában cátei lun gudémeti, masúbudiralei ni lubuidun-ágei jumáda,

⁴ adüga jumei lábugiñe libídiñewa. Júguchi Búngiu le aríjubalin le jadügübei lábugiñe libídiñewa, líchuguba jafáyeiruája.

*Larúfudajan Jesúsu luágu ligáburi ayúmuraguni lun Búngiu**(Lc 11.2-4)*

⁵ ‘Dan gíñe le jayúmuragun lun Búngiu, mítaran jumá quei ja biánguabaña igíbu ja jínsiñebei joun lun jayúmuragun rára tídan jalígilisin juríu lúma lídan legéyedun úma lun jarjiniña gürígia. Ninárün jáu luágu láu lan jadügüni líra ibíja jamáali jafáyeiruája.

⁶ Dan le jayúmuragun lun Búngiu, belújuma jirúmuragun, darú jumeíme jubeneri, ábame jayúmuragun lun Júguchi Búngiu le lábuguabei júma ñi. Júguchimeti Búngiu, le aríjubalin le jadügübei lídan límanin, líchuguba jafáyeiruája.

⁷ Lídan le jayúmuragun, máguyuaguagüda jumá luágu dimúrei le málati quei jadüga ja ibídiñejabubaña lun Búngiu, jarítaguatiñati luágu lagáambubaña lan Búngiu ladüga líbe jadímurejan.

⁸ Mítaran jumá lubeiti quei jagía, ladüga lubárugiñe jayúmuragun lun Búngiu subúdi láali ca lan jabúserubei.

⁹ Ítara lúba lubeiti jayúmuragun.

Wáguchi Búngiu le siélubei, inébewalá bíri.

¹⁰ Nübinlá bidáani lun barúeijan ya ubouágu,

adügüwalá bugúndan ubouágu quei ladügüniwa bugúndan siélu.

¹¹ Rúba fein buidurügütu woun lun wéyu le ugúñebei,

¹² ferúdunabeí wuríbati le adüga wamáalibeí quei ferúduna wamániña ja adügübaña wuríbati woun.

¹³ Mígira báwa lun wáburujan lídoun wuríbani,

dísegúdarügü báwa luei,

ladüga amürü le arúejabei, amürü le Súntibeí Gabáfu, amürü le weírígubei lun sun dan. Ítaralá.

¹⁴ ‘Ítara líña lubeiti, ánjaña ferúduna jumá ámu luágu wuríbati le adüga jamáalibeí jun, ferúduna lubádün gíñe Júguchi Búngiu le siélubei,

¹⁵ ánjein úa ferúduna jumá ámu, úabei gíñe ferúduna láani Júguchi Búngiu jifígoun.

Larúfudajan Jesúsu luágu ayúnaruni

¹⁶ Ába laríñagun Jesúsu.

—Jugúya, dánme le jayúnarun, marúfuda jumá lírun igíbu quei jadüga biángua tigíbu, jagía jadügünbalin ítara lun jaríjini gürígia luágu jayúnaruña lan. Ninárün jáu luágu láu lan jadügüni líra íbija jamáali jafáyeiruája.

¹⁷ Ánjein jugúya, dan le jayúnarun, amúriga jumeí jidiburi, chibá jumeíme jigíbu,

¹⁸ meféen jamámuga gürígia luágu jayúnaruña lan. Júguchirügüba Búngiu le júmabei ñi geféen luágu jayúnaruña lan, ábamei líchugun jafáyeiruája.

Irisini siélu

(Lc 12.33-34)

¹⁹ ‘Moúndaragua jumá irisini ya ubouágu le ñí lubei gayára lan jájüchün jamútiri áni gayára ligía lagájüdüñ ámu luwúyeri irisini, le gíñe ñíjin lubei gayára lan jebélurun jíwerutiña lun jíwerujan.

²⁰ Oúndaragua jumá irisini siélu, le ñí lubei siña lan jájüchün jamútiri, magájüdadí ní cáta, mebélú jagía jíwerutiña íweruja ñí.

²¹ Le ñí lumuti jírisin, ñíñoun gíñe janígi.

Lilámpun úgubu

(Lc 11.34-36)

²² Ítara líña bágu quei ában lámpu lun búgubu, ánjein lubeíti buídu lubei bágu, aríja ligía luágun irisini siélu, camá jamuga jarúgoungabei gíñe láu sun búgubu, áni buídubei gíñe sun bigáburi.

²³ Ánjein sándi lubei bágu, aríja ligía luágun irisini ya ubouágu, camá jamuga lídaanbei lubúriga sun búgubu, áni wuríbabei gíñe bigáburi. Ánjein ñúbin larúgounga le bídaanbei lun lubúrigame, ¡luweírín mefuna líwurin lubúriga ligía!

Búngiu lúma seínsu

(Lc 16.13)

²⁴ ‘Úati ní ában gayáraati lesériwidun joun biáma iyúbudirigu, ladüga lísiñeduba ában jádaangiñe lun, liyéreegudáme le ában lun, úraguabei lúma ában jádaangiñe, líchigame mebéreseni luágu le ában. Siñáti lesériwidúniwa lun Búngiu lúma lun seínsu.

Toúnigi lumútiña Búngiu lirájüñü

(Lc 12.22-31)

²⁵ ‘Nariñajare lubeíti jun, madíjeri jumá luágu cába lan jeíga o cába lan játa lun jabágaridun, ní tuágu anáanguni to lúnboun jadáürunun. ¿Máfunagi gebégitimaati íbágari sügü láu eígini, gebégi úgubu sügü táu anáanguni?

²⁶ Aríja jumá joun dunúru ja ájamajabaña garábalirugu. mábunagun jáña, malúbajan, mareídun jamei alúbajani lídan lágei, láu sun líra, rúti Júguchi le siélubei eígini joun. ¡Sarágu gebégitima jumá sügü jáu dunúru!

²⁷ ¿Cáteigi jádaangiñe gayáraabei líchugun bián ugúdi lánwoun lúgubu, ca lan lanárimabei láfaagun luágu?

²⁸ ¿Ca uágu jadíjerida tuágu anáanguni? Aríja jumá ída líña lan laweínamudun fulúri. láu sun mawádigimari lan, madügün ligía gamísa,

²⁹ ní méja urúei Salomón láu sun luwéndegun, mawéndentí meja ladáüragun quei fulúri.

³⁰ Ánjeinti daüguagüda lubálin Búngiu jídurú ítara le ugúñebei lájücha, jarúgabei yebe lagudúña, ¿gúbumesan líderaguajün lougua tafíñen jugúya le?

³¹ Madíjerida jumá lubeíti aríñaga. “¿Cába weíga?” o “¿Cába wáta?” o “¿Cába wadáura?”

³² Gürigia ja lánigu ubou le, luágu rügüñeín buri cátei le jarítagua, ánjein jugúya, níjein júguchi Búngiu siélu le subúdíjabúbei cátei lan jemegeirubei.

³³ Seríwi jumá lun Búngiu furúmiñe, áluaja jumei íbágarí surúti le áubei lagúndaara, ábame líchuguni sun le jemegeirubei jun.

³⁴ Madíjerida jumá lubeíti luágu jarúga, ladüga barü lumuti giñe jarúga lidíjeridüna lúmagua. Ságu ában wéyu gibeti cátei lun.

7

Míchiga jumá jadúnrun ámu

(Lc 6.37-38, 41-42)

¹ Ába lasígirun Jesúsu aríñaga joun gürigia wúbüwaügügiñe.

—Míchiga jumá jadúnrun ámu, míchuga lámuga giñe Búngiu jidúnrun,

² ladüga quei ligáburi jíchugun jadúnrun ámu, ítara lúba giñe líchugun Búngiu jidúnrun, le áubei jamísuraja, láuba giñe lamísurajaün Búngiu.

³ ¿Ída lubásan gayára lan jaríjini liraúraü ífei le lídaanbei lágu jamúlen áni masándi jumúti durúsu le lídaanbei jágu?

⁴ ¿O ída lúba gayára lan jaríñagun lun jamúlen. “Sagáneí liraúraü ífei le lídaanbei bágu,” áni níjein ában durúsu lídan jágu?

⁵ ¡Biángua tigíbu jugúya le! Sagájumei durúsu le lídaanbei jágu furúmiñe, ítara lúba gayára lan jaríjin buídu lun jaságaruni liraúraü ífei le lídaanbei lágu jamúlen.

⁶ ‘Míchiga jumei arúfudajani luáguti asálbaruni joun gürigia ja gáñitiña, garábagua jáñein juágun quei oúnli lun jágürünün. Míchiga jumei giñe arúfudajani ligía le gebégíbei sarágu joun gürigia ja búirujuduátiña, dügúgua jañálin.

Agáamba lumúti Búngiu wamúriajan lúma

(Lc 11.9-13, 6.31)

⁷ ‘Jamúriaja lúma Búngiu, ábame líchugun jun, jáluaja, ábame jadárirun, daúnjuma luágu béna, ábame lánjunrenchún jun.

⁸ Ladüga le amúriajati, abíjati, le áluguti, daríti, le adaúnjati luágu béna, jurénwati lun.

⁹ ¿Níjein funági ában jídaangiñe gayáraati líchugun ában dübü lun lisáani dan le lamúriajan feín lúma?

¹⁰ ¿o líchugun lan ában jéwe lun dan le lamúriajan úduraü lúma?

¹¹ Ánjein lubeíti láu lubei sun wuríba jumá, gíchigaditün cátei buíti joun jisáanigu, ígúbuméti líchiga Júguchi Búngiu le siélubei cátei buíti joun ja amúriajatiña lúma!

¹² ‘Súnwandanlá lubeíti jadügün joun ámu quei le jabúseerubei lun jadügüni jun, ladüga ligía laríñagubei lilúrudun Moisés túma jalíburun profétagu.

Bürúraüti lubéneri siélu

(Lc 13.24)

¹³ ‘Belújuma lídaangiñe béna le бүрүрәүbei. Béna lúma üma le anügübei gürigia lídoun féridi, tuléburí líña, gabáranouga ñi, áni sarágu jáña ebélurutiña lídaangiñe.

¹⁴ Ánjeinti béna lúma üma le anügübei gürigia lídoun íbágarí le magúmuhaditi, бүрүрәү líña, murúgua, míbetiñati adáriruti.

*Luágu cátei le wadügübei lasúbudirúa cátawa lan
(Lc 6.43-44)*

¹⁵ “Touñigi jumá jawéi yéetiña ja aríñagubaña luágu lerérun lan Búngiu jadímureja. Jayábin jun quei mudún bougudigiñe jabíti, ánjein múnadagiñe, ítara jáña quei anímaalu gáñitiña.

¹⁶ Jugúya, gayáraabei jasúbudiruniña luágu le jadügübei, malúbajoúntu beíbei lídaangiñe jíyu, ni ígo lídaangiñe guríbiyuwa.

¹⁷ Sun lubeíti wéwe le buíti, buíti lin, wéwe le wuríbati, wuríbati lin.

¹⁸ Wéwe le buíti, siñáti wuríba lan lin, wéwe le wuríbati, siñáti giñe buídu lan lin.

¹⁹ Sun wéwe le mabuídunti lin, chaúnwati, ába lágudúniwa.

²⁰ Jasúbudirubaña lubeíti yéetiña jagía luágu le jadügübei.

*Másubaña ebélura lídoun arúejani le siélubei
(Lc 13.25-27)*

²¹ ‘Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei; líña Jesúsu. ‘Ja rügübaña adügübalin lugúndan Núguchi Búngiu le siélubei ebélura.

²² Dánme lachülürün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijatiwa mejátia luágu bíri, sagá wagía espíritugu wuríbatiña lídan bíri, adúga wagía sarágu miláguuru lídan bíri.”

²³ Ábamei nariñagun joun. “Íbidiñegubeiñadün nun, díse jumá nueí, jugúya le adúga jumáalibeí le wuríbabei.”

*Jawúyeri gürígia ja agáambubalin lerérun Búngiu
(Lc 6.47-49; Mr 1.22)*

²⁴ ‘Le agáambutina, adügaleí le nubeíbei, ítara líña quei ában wügüri gunfaráandati le adügübei lúban ligíbuagu dúbü.

²⁵ Ába liábingua júya, ába liñúrún dúna, fúgua garábali tuágun múna tugúya, meíguaduntu ladúga luáguñein lan dúbü tuágaburi.

²⁶ Ánjeinti le agáambutina, madügün lumúti le nubeíbei, ában wügüri ibídiougua táu ligía, le ábunagubei ligíbuagu ságoun.

²⁷ Ába liábingua júya, iñúra dúna, fúgua garábali tuágun múna tugúya, ¡ma lanárime táburujan!

²⁸ Dan lásurun ladímurejan Jesúsu, ¡ma luweírin janígi gürígia láu le larúfudajabei!

²⁹ Ladúga láu lan ubáfu larúfudaja, máma quei arúfudajatiña lilúruden Moisés.

8

*Lareídagugüdün Jesúsu ában gawáguti gumeín le mareídaguadibeí
(Mr 1.40-45; Lc 5.12-16)*

¹ Dan le larárirunbei Jesúsu lueígiñe wübü, sarágu jáña gürígia afálaruti.

² Ába liábin ában wügüri gawáguti gumeín le mareídaguadibeí, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguágüdünina.

³ Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídagun sánditi ligía.

⁴ Ába laríñagun Jesúsu lun.

—Maríñaga beítia ni ca un, ñüdünrügübá arúfudagua búngua lun fádiri, rúbeíme edéweejani le uágubei lariñaga Moisés, lun jaríjini gürígia luágu areídaguadibu lan.

*Lareídaguagüdüni Jesúsu lumúsun ában gumándan Rómana
(Lc 7.1-10)*

⁵ Dan le lebélorun Jesúsu lídoun fulásu le gíribei Capernaúm, ába liábin ában gumándan Rómana lubároun,

⁶ ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágu gáriti luágu.

⁷ Ába lariñagun Jesúsu lun.

—Neíbuga agáranija lun.

⁸ Ába loúnabun gumándan.

—Nabúreme, madúnatina lun bebélorun núbiñoun, aríñagarügübeí dimúrei, ábame lareídagun numúsun.

⁹ Nariñagubaalin líra ladüga nugúya lábugiñeñadina gíñe gumádi le íñutimaati, áni añájein gíñe súdaara lábugiñe nagúmadijan. Dan le nariñagun lun ában jádaangiñe lun lídin, ñüdünti, dan le nariñagun lun ában lun liábin, ñübinti, dan le nariñagun lun numúsun lun ladügün furúmieguarügü cátei, adüga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le lariñagubei gumándan ligía ába laweíridun lanígi, ába lariñagun joun ja afálarubalin.

—Ninárün jáu luágu madárigidina lan wügüri weíri tafíñen ni jádan numútuniña Israelítagu quei wügüri le.

¹¹ Nariñajare jun luágu sarágujaba lan já meja ibídiñejabubaña lun Búngiu ñübintiña lueígiñe oúbaü le ñígiñe lubeí laboucha wéyu, jáma le ñígiñe lubeí lálüda, ábame jañúurun eíga lúma Abrahám, Isáac lúma Jacób lídan arúejani le lánina síélu.

¹² Anjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírín-ágei lubúriga, ábame jayájuajan, ábame lacúnrinjan jári le luweírín jagárigu.

¹³ Ába lariñagun Jesúsu lun gumándan ligía.

—Beíba búbiñoun, le uágubei bafíñera, ladügüba bun.

Ába lareídagun músu ligía lídan óra ligía.

*Lareídaguagüdünun Jesúsu límenidi Pédro
(Mr 1.29-31; Lc 4.38-39)*

¹⁴ Ába lídin Jesúsu lúbiñe Pédro, ába ladárirunun límenidi Pédro roun láu abíruaü.

¹⁵ Ába lagúurun luágu tújabu, ába lagídarun abíruaü tueí, ába tásaarun, ába tagúmeserun esériwidaña.

*Lareídaguagüdünn Jesúsu sarágu sánditiña
(Mr 1.32-34; Lc 4.40-41)*

¹⁶ Dan le lagúñedunbei, ába janügün sarágu gürígia ja gawágutiña espíritugu wuribatiña lun Jesúsu, ába laságajaniña espíritugu wuribatiña jagía jaweí láurügü ában dimúrei, areídaguagüda láña sun ja sándibaña.

¹⁷ Lasúseredunbei sun le lun lagúnfulirun lé meja uágubei ladímureja proféta Isaías dan le lariñagunbei luágu Jesúsu. “Barü lumuti wadébilin, gidálei wasándigu.”

*Já yebe abúseerubaña jafálaruni Jesúsu
(Lc 9.57-62)*

¹⁸ Dan le lariñin Jesúsu luágu sarágu jáña lan gürigia geyégu láu, ába líchugun dimúrei lun jájiñuragun ligía jáma láni disípulugu loubáfurugun dúna.

¹⁹ Ába layárafadun ában arúfudajati lilúrudun Moisés lun Jesúsu, ába lariñagun lun.

—Maésturu, buséntina nafálarunibu le ñiñin lumúti bídin.

²⁰ Ába loúnabuni Jesúsu.

—Darítiña gasígamu júyu lun jaganouñ ñi, gádibutiña gíñe dunúru, ánjeinti áu le Wügüri Garaúwarügüti, madáritina ni jalába lan nabálachagüdei nichügü.

²¹ Lariñaga ában jádaangiñe láni disípulugu lun.

—Nabúreme, buséntina nafálarunibu, lárigiñeme loúnwen nüguchi, buná neíme, ábame nafálarunibu.

²² Ába loúnabuni Jesúsu.

—Falábana guetó, ígira baña ja jiláñubaña lun cátei le lánina larúeijan Búngiu lun jábununiña jegéburi.

*Lagálumaruni Jesúsu garábali lúma lugúdi barána
(Mr 4.35-41; Lc 8.22-25)*

²³ Ába ládinun Jesúsu tídoun ugúnein, ába jóudin láni disípulugu lúma.

²⁴ Sódini ába láfuragun ában garábali jéreti, ába lebélujan lugúdi barána tídoun ugúnein. Larúmuguñati Jesúsu.

²⁵ Ába jagágudajani láni disípulugu, ába jariñagun lun.

—¡Wabúreme, séfu báwa! ¡Wadíbiragua!

²⁶ Ába loúnabuniña.

—¿Cásan uágu janúfudeda? ¡Lougua tafiñen jugúya le!

Ába lásaarun, ába ladeínjan lun garábali lúma barána, ába lagálumadun.

²⁷ Ába laweíridun janígi, ába jariñagun.

—¿Cáteisán wügüri le, agáamba lubálin garábali lúma barána?

*Laságarun Jesúsu espíritugu wuríbatíña jádaangiñe bián wügüriña Gadárana
(Mr 5.1-20; Lc 8.26-39)*

²⁸ Dan le lachülürün Jesúsu loubáfurugu dúna, jageíroun Gadárana, ába jáfuridun bián wügüriña lídaangiñe buri umúajaü achigiti luágu dúbü, ába jayábin luágun. Biángubei jagía, jáuñanu espíritugu wuríbatíña áni janárimetiti jagáñi dari lun siña lan jáségürün gürigia lídaangiñe úma ligía.

²⁹ Ábati jagúarajan ítara.

—¿Cásan uágu bemétera wámoun, Jesúsu Liraü Búngiu? ¿Biábiña asúfuriragüdawa lubáragiñe dan le lánina asúfuriruni?

³⁰ Ñiñanu sarágu büíruju eíga madíse ñígiñe,

³¹ ába jayúmuragun espíritugu wuríbatíña ja lun Jesúsu, jariñaga lun.

—Ánjawa baságara, ígirabá lun webélurun jádoun büíruju ja.

³² Ába lariñagun Jesúsu joun.

—¡Jeíbati jádoun!

Ába jáfuridun espíritugu wuríbatíña jagía jádaangiñe wügüríña jagía, ába jebélurun jádoun búiruju, ába jáguragun búiruju jagía jóungua luegiñe ában gudúngu, ába jáburujan dúnarugun, ába jañáradagun.

³³ Ába janúfudedagun ja oúnigirubaliña búiruju, ába jeíbaagun, jachúlun aúdübü, ába jabájüdaguni le asúseredubei joun búiruju lúma joun wügüríña já buga jáubaña espíritugu wuríbatíña.

³⁴ Ábati jayábin sun lílana fulásu ligía lúmoun Jesúsu, ába jayúmuragun lun lun láfuridun jageíragiñe.

9

Lareídaguagüdüñ Jesúsu ában wügüri derégüdaali (Mr 2.1-12; Lc 5.17-26)

¹ Ábati ládinun Jesúsu tidoun ugúnein tugúya, ába lánjiñuragun loubáfurugun dúna, ába lachúlürün lageíroun.

² Ába janügün ában wügüri derégüdaali lun, roun tidan lubárari. Dan le laríjínbalin Jesúsu luweírin jafiñen, ába laríñagun lun sánditi ligía.

—Ragüba gurásu, niraü, ferúdunawati bifiğoun.

³ Níñanuti jádaangiñe arúfudajatiña lilürudun Moisés, aríñagutiña jóunguarügü. “Lanábaguñeigan wügüri le Búngiu láu dimúrei le laríñagubei.”

⁴ Queíti subúdi lubálin Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara?

⁵ ¿Cátimasan ménreengúnbei laríñawagúniwa. “Ferúdunawati bifiğoun”, ódi “Sarába, beíbuga”?

⁶ Narúfudaaliti jun luágu gabáfu nan, áu le Wügüri Garaüwarügüti, lun ferúduna nan figóu.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷ Ába lásaarun sánditi ligía, ába lídin lúbiñoun.

⁸ Dan le jaríjinbaalin gürígia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügüríña.

Lagúarun Jesúsu lun Matéo lun lánime disípulu (Mr 2.13-17; Lc 5.27-32)

⁹ Ába lídin Jesúsu nígiñe, ába laríjinina, áu le gíribei Matéo, le abürüjabarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu nígiñe. Ába laríñagun nun.

—Falábana, queímoun núma queisi náni disípulu.

Ába násaarun, ába nafálaruni.

¹⁰ Lárígiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gafíğountiña eíga lúma úara jáma láni disípulugu.

¹¹ Dánti le jaríjini fariséogu cátei le, ába jaríñagun joun láni Jesúsu disípulugu.

—¿Ída líñásan leíginbei jumáesturun jáma agúburajatiña liseínsuna gumádi lúma jáma ámu gafíğountiña?

¹² Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia.

¹³ Furéndeí jumeí ca lan laníchigubei le uágubei laríñaga Búngiu tidan Lerérun. “Buséntina lun gudémejabu jumá, máma lun jadágaragüdüñ anímaalu nun.”

Máma niábiña áluajaña ja magádiebaña ligíbugiñe Búngiu, niábiña áluajaña gafígonuntiña lun jasáansiruni ligáburu jóuserun.

Jálügüdüni Jesúsu libügürü ayúnaruni
(Mr 2.18-22; Lc 5.33-39)

¹⁴ Ábati jayábin ja láni Juan le abásteragüdjabei disípulugu, ába jaríñagun lun Jesúsu.

—¿Ánsan wagía jáma fariséogu ayúnara wabeí sarágu, ánjaña báni disípulugu mayúnaruntiña?

¹⁵ Ába líchuguni Jesúsu jémpulu le joun luágu iséri larúfudajan lúma binádu, laríñaga.

—¿Gayáraati funági jíruñu jamá ja amísurajoúbaña lídoun ában maríei dan le niján lan adári jáma ñi? Lachúlürüba wéyu lun lúadun adári jáma, ligiaalime jayúnarun.

¹⁶ ‘Siñáti táfadajoún gamísa ñulújaru táu murúsun to derégiru ladüga dánme le tacháwaragun to derégiruboun ábame tajeíridagun to ñulújaruboun, ábatimámeti laweíridun jeíríti.

¹⁷ Siñáti giñe léserúniwa bínu le isérigili lídoun guéru le binádujali, ánjein adügüwa ítara, ábame lafaünchün guéru dánme le liñúrún bínu, féridiwa ligíameti guéru, féridiwa bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

Lirail Jáiro túma würi to agúurubarun lanáangun Jesúsu
(Mr 5.21-43; Lc 8.40-56)

¹⁸ Dan ñiñein lan Jesúsu arúfudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

—Sun líña toúnwen nisáani, ánjabu ñüdün lun bíchuguni bújabu tuágu, tágyuguba.

¹⁹ Ába lásaarun Jesúsu, ába lídin lúma ñi jáma láni disípulugu.

²⁰ Ñiñounti ában würi ümada sánditu, dúusu irúmu táu láu lésejan jítaü tidaangiñe, ába tayárafadun lun Jesúsu lanágangiñe, ába tagúurun luágu táru lanáangun,

²¹ taríñaga túnguarügü. “Láurügü nagúurun tuágu lanáangun nareídaguba.”

²² Ába lagáraragun Jesúsu, ába laríjinun, ába laríñagun tun.

—Ragüba gurásu niraü, areídaguadibu ladüga bafiñen.

Lúmagiñe óra ligía ába tareídagun.

²³ Dan le lachúlürün Jesúsu lúbiñoun buga ábuti ligía, dan le laríjiniña íñaajatiña aráanseña lun ábunajani, añája gürígia areíncha,

²⁴ ába laríñagun joun.

—Furíjuma yágiñe, moúnwengiru irájü to, tarúmugüña.

Ába jéjerajan láu.

²⁵ Dan le furígüda láaña sun gürígia, ába lebelúrún, ába lárügüdüni tújabu irájü tugúya, ába tásaarun.

²⁶ Ába labúruchagun luágu le asúseredubei lídan sun fulásu ligía.

Lareídaguagüdüni Jesúsu bián maríjintiña

²⁷ Dan láfuridun Jesúsu ñígiñe, ába jóúdin bián wügüríña maríjintiña lárigi, agúarajaina ítara.

—¡Gudéme wamá bun, amürü le ladügewagun David!

28 Dan lebélorun Jesúsu múnadoun, ába jachülürün maríjintiña jagía lúmoun, ába lariñagun joun.

—¿Afiñetün luágu gayára lan nareidaguagüdünün?

Ába jariñagun.

—Ánja, afiñetiwa, Wabúreme.

29 Ába lagúuruni Jesúsu jágu, ába lariñagun joun.

—Ítaralá quei ligáburi jaffiñen.

30 Ába léfegechun jágu, ába léredun Jesúsu jawágu lun jóuchun lun masúbudirúniwa lan luágu ligía lan agáranijabei joun.

31 Quei jáfuridun ñígiñe, ába jabájüdaguni le ladügübei Jesúsu lídan sun fulásu geyégua láu.

Lareidaguagüdün Jesúsu ában meréngaditi

32 Dan le áfurideina jamá, ligía jayábin fiú gürígia láu ában wügüri meréngaditi, gawáguti ában espíritu wuríbati, ába jayábin láu lun Jesúsu.

33 Lárigiñe laságaruni Jesúsu espíritu wuríbati ligía lueí meréngaditi ligía, ába lagúmeserun adímureja. Ába laweíridun janígi gürígia, ába jariñagun.

—Maríjinajágidiwa líbe le jageíra Israelítagu.

34 Jariñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun gürígia

35 Eibuga lumúti meja Jesúsu sun fulásu arúfudajeina tídan jalígílisin juríu, apúrichijeí ugánu buíti luáguti arúejiani le lánina siélu, areidaguagüdeina sun luwúyeri sándi lúma gáriti.

36 Dan laríjiniña gürígia, ába jagúdemedagun lun, ladüga nidíjeri jamá, magúraasun jagía, camá mudún ja mouñiritiña.

37 Ába lariñagun joun láni disípulugu jabügürü gürígia jagía.

—Sarágu jáña gürígia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni louguatiña ñadágimeintiña.

38 Lúnti lubeíti jamúriajan lúma Labúreme nádü lun louñajan ñadágimeintiña lun japúrichijan joun.

10

Láni Jesúsu dúusu disípulugu

(Mr 3.13-19; Lc 6.12-16)

1 Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritugu wuríbatiña jaweí gürígia lúma lun jareidaguagüdün sun luwúyeri sándi lúma gáriti.

2 Niján jiri dúusu láni Jesúsu disípulugu jagía. Furúmiñeti, Simón le méme gíribei Pédro, lúma Andrés le lamúlen, Jacóbo lúma Juan le lamúlen—lirájúñü Zebedéo,

3 Felípe, Bartolomé, Tomás, núma, áu Matéo le agúburajabei meja liseínsuna gumádi, Jacóbo le liraü Álfeo, Lébeo, le méme gíribei Tadéo,

4 Simón—ában meja wügüri áfaaguti lun jawáanserun juríu, lúma Júdas Iscarióte, le alúgurubalin Jesúsu.

Louñajaniña Jesúsu disípulugu apúrichija

(Mr 6.7-13; Lc 9.1-6)

⁵ Dan loúnajabaliña Jesúsu dúusu ja apúrichija, ába laríñagun joun ítara.

—Mídin jumá le ñi jamuti ja mámabaña juríu, mebélu jugúyame lídoun buri fulásu le láni Samária,

⁶ jabügürülá gürígia féridijaña ja Israelítagu jídin.

⁷ Jeiba, apúrichijeina luágu yaráfaali lan larúeijan Búngiu.

⁸ Areídaguáda jumáña ja gawágutiña gumein luágu jára, jáma ja gawágutiña ámu luwúyeri sándi, sarágüda jumá jiláaña, sagá jumaña espíritugu wuríbatíña. Mafáyeijántün lun jibíjini ubáfu le, magúburaja jumá gíñe luágu.

⁹ Manüga jumá seínsu,

¹⁰ manügün jugúyame lágei ni cáta. Ábanrügütá simísi janüga, manügün jugúyame sabádu ni bádu, ladüga le ñadágimeinbei garíchatí lun leigin lídaangiñe luwádigimari.

¹¹ Dánme le jachülürün lídoun ában ubúruğu o ában lan liraüräü fulásu, ábame jálugun gürígia ja ánjatíña lun jerésibirunün ñi, ábame jeréderun jáma jábiñe darí jídin.

¹² Dánme jebélurun tídoun ában múna, ábame jabúsurun, ayúmuragueina magádiei jawágu tılana múna tugúya.

¹³ Ánjaün jerésibira tılana múna tugúya, ígira jumei jabúsurun jáma, ánjaün merésibirun jamá, giríbugüda jumei busúguaü ligía lun úa lan magádiei joun.

¹⁴ Ánjaünti merésibirun jamá, mája jagía jagáambunün, ábame jáfuridun tídaangiñe múna tugúya o lídaangiñe lan fulásu ligía, ábame jáfuruduni calíqui lueígiñe jugúdi lun jarúfuduni luágu mabuídun lan jagáburi gürígia jagía, ígira jumáña quei jadáriragun jóungua.

¹⁵ Ninárün jáu luágu dánme lan le lachülürün wéyu lánina agúseruni, weíritimaabei jasúfurirun lílana fulásu ligía sügü láu jasúfurirun lílana Sodóma lúma Gomórra.

Eíbaajoüni le lúnbei jasúfuriruni láni Jesúsu disípulugu

¹⁶ Nounajaadüntia quei mudún jagánaguóun anímaalu gáñitíña. Aráanseñu jumá lubeíti ítara quei jéwe, áni ítara jumá quei únjun madügünga wuríbani.

¹⁷ Toúnigi jumá ladüga j juríu.

¹⁸ Janügüwaba jagíbugiñoun gumádimatíña lúma jagíbugiñoun urúeigu lueígiñe jesériwidun nun, ítara lúba gayára lan jadímurejan nuágu jagíbugiñe, lúma jagíbugiñe ja mámabaña juríu.

¹⁹ Dánme le jedéregerúniwa joun lúrudugu, májüchúra jumá luágu cába lan jaríñaga o ída lúba lan jaríñaguni, ladüga dánme lachülürün óra lun jadímurejan, líchugubei Búngiu le lúnbei jaríñaguni jun.

²⁰ Mámaba jugúya adímureja, láni Júguchi Búngiu Espíritu, ligíaba adímureja jídaangiñe.

²¹ Jalúgurubaña wügüríña jabíriña guánarü lun jafarún jilágubei, alúgura jamáñame agübürigu jasáanigu, garábagua jagíame isáanigu jawágun jagübürigu lun jáfaragüdüniña.

²² Jeyéregudúba lun sun ubou nueígiñe, áni le derégüdaguti darí lúmoun lagúmunchun libágari, lebéuruba siélun.

²³ Dánme le jeíbaajoün lídan ában fulásu, ábame janúrajan lídoun ámu, ninárün jáu, niábinyaba, áu le Wügüri Garaüwarügüti, lubáragiñe jeíbuguni sún buri jabúrugute Israelítagu.

²⁴ Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti gíñe jasúfurirun.

25 Lúnti gúndan lan disípulu láu lachülürün ítarada quei lumáesturun, lúma músu quei liyúbudiri. Ánjein aríñawagúa lubei nuágu luágu jábutiná máfianu, gúbume janábawagua ja afálarubalina.

*Cába lan uei lanífudedúa
(Lc 12.2-9)*

26 'Ligía manífudeda jumá lubei jawei gürígia,' líña Jesúsu joun láni disípulugu lubáragiñe loúnajaniña apúrichija. 'Úati cátei darúguati láu lun machúlaagunbei lan, úa ni cáta le arámudagúati lun masúbudirúnwabei lan.

27 Le naríñagubei jun lídan lubúriga aríñaga jumei lídan larúgounga, le naríñagubei jun ibidíñoun joun ámu, wágu jumei íñugiñe tibíti múna.

28 Manífudeda jumá jawei ja gayáraabei jáfaruni úgubu jilágubei áni siñáti jáfarunun uwáni, Búngiu le gayáraabei lasúfuriragúdúni úgubu túma uwáni máfiougati lun sun dan, ligía lúnbei janífudedun luei.

29 '¿Malúgurúntiña funági bián jarájúñü dunúru luágu ában liraúraü seínsu? Áni máburujantu ni ában jádaangiñe múarugun ánjein mabúseerun lubei Júguchi Búngiu.

30 Ásta ídiburi le jábulugubei, abájüdúwati ában ában.

31 Manífude jumá lubeíti, gebégitün sügü jáu dunúru.

*Ja mayéedagúnbaña láu Jesúsu jagíbugiñe gürígia
(Lc 12.8-9)*

32 'Sun ja arúfudagutiña jóungua jagíbugiñe gürígia luágu númagiñeñánu lan, naríñaguba giñe ligíbugiñe Núguchi Búngiu le siélubei luágu nánigu jamá.

33 Ja ayéedagutiña náu jagíbugiñe gürígia, nayéedaguba giñe jáu ligíbugiñe Núguchi Búngiu le siélubei.

*Le busénbei lun lafálaruni Jesúsu
(Lc 12.51-53, 14.26-27)*

34 'Marítagua jumátia luágu niábiña lan lúnrgüü níchugun gáluma ubouágu, máma niábiña íchiga gáluma, niábiña íchiga wuribu.

35 Láu niábin, jafánreinraguba ja mafiñebaña nuágu jáma ja afiñebaña nuágu, lawúribujaba wügüri lúma lúguchi, isáani túma tóguchu, ídiñu túma tágürü,

36 lagáganiraguba cáda ában jáma lidújeñu.

37 'Le jínsiñejabuti lun lúguchi o lúguchu sügü láu nísíñe lun, madüna lumúti nánigu lan, le jínsiñejabuti joun lirájúñü sügü láu nísíñe lun, madüna lumúti giñe nánigu lan.

38 Le mawándunti asúfuriruni líbe lasúfurirúniwa luágu gurúwa lun lafálarunina, madüna lumúti nánigu lan.

39 Le busénbei leséfuragun lúngua ya ubouágu leféri-dirubei íbágarí le magúmuchadibei siélu, ánjein le ánjabei leféri-diragun lúngua ya ubouágu nueígiñe, libíjubei íbágarí magúmuchaditi siélu.

*Ja lúnbaña jerésibiruni jafáyeirua ja lúmagiñe Búngiu
(Mr 9.41)*

40 'Le erésibirutün resíbi lumúti, le erésibirutina resíbi lumúti le oúnajabalina.

41 Le erésibiruti ában proféta ladüga liábin láu líri Búngiu, lerésibirubei afáyeirua ja le libíjubei ában proféta, le erésibiruti ában wügüri buíti ladüga lubuidun, lerésibirubei afáyeirua ja le lerésibirubei ában wügüri buíti.

42 Furúmieguarügü le íchuguti ában wéru dúna dilíti lun ában jádaangiñe ünabugutiña ja ladüga nánigu jamá, libíjuba lafáyeiruaja lúmagiñe Búngiu.

11

Ja loúnajabaña Juan le abásteragüdajabei adímureja lúma Jesúsu

(Lc 7.18-35)

1 Dan le lásurunbei lariñaguni Jesúsu le lúnbei jadügüni láni disípulugu, ába lídin ñigiñe lun larúfudajan, apúrichija ligíame lídan buri fulásu geyégua láu ubúruyu le Capernaúm.

2 Dan ligía, furisunruguein Juan, ába lagáambun luágu sun le ladügübei Crístu.

3 Ába loúnajan biáma jádaangiñe láni disípulugu aríjei Jesúsu lun jálügüdüni ítara.

—¿Amürü Crístubei le lúnbei liábin ódi lúnti wagúrabajan ámu?

4 Ába lariñagun Jesúsu joun.

—Jeiba jariñageime le jarijubei lúma le jagáambubei lun Juan.

5 Jabájüdagúame lun luágu aríjaaña lan já meja maríjinbaña, eíbuga já meja meíbugunbaña, areídagua jagía já meja gawágubaña gumeín luágu jára, agáamba já meja magáambubaña, sará jagía jiláaña, apúrichijouá luágu ugánu buíti le lákina asálbaruni joun gudémetiña.

6 Áni fuleiseiwati le meféridirunbalin lafiñen nuágu.

7 Dan le jóudin, ába lagúmeserun Jesúsu adímureja joun güriúa luágu Juan, ába lariñagun.

—¿Cásan jídinbei meja aríja lídan fulásu le mageírawati? ¿Ában wügüri le medéraguagüdünti laritagun queísi ában mabúru le lánjingichun garábali?

8 Ánjein máma lubei líña, ¿cáti jídinbei aríja? ¿Ában wügüri wéndeti ladáuragun? Subúsiti jun luágu ja lan wéndebaña adáuragun, tídaañanu lan jában urúeigu.

9 ¿Cáteiti jídinbei aríja? ¿Ában proféta? Ánja, ligía, áni ában wügüri weíriguti sügü láu ában proféta Juan.

10 Ligía le uágubei tariñaga Lerérun Búngiu.

Nóunajañein nóunagüle bubáragiñe, lun laráansejani úma bubá.

11 Ninárün jáu, jádan sun güriúa, úagili ni ában weíriguti lueí Juan le abásteragüdajabei, láu sun líra, le ünabutimaabei lídan arúejiani le siélubei weíritimaati lueí le anúgarügübalin ugánu luágu arúejiani ligía.

12 ‘Lúmagiñe dan le liábinbei Juan le abásteragüdajabei darí lúmoun dan le, murúgu jáña güriúa áluga jebélurun lídoun larúejian Búngiu. Ja ebélurubaña, ragü jamuti jabára ñi queísi ában cáte le gebégiti sarágu.

13 Lilúrudun Moisés jáma sun proféta, adímurejatiñá meja luágu larúejian Búngiu, láu liábin Juan, ába lagúmeserun jerérun proféta jagía luágu larúejian Búngiu agúnfulira.

14 Ánjeinti busén jubei jafiñerun, Juan ligía proféta Elías lé meja lúnbei liábin lubáragiñe liábin arúejiani ligía.

15 Ja garígeirugubaña lun jagáambun, agáamba jamá.

16 ‘¿Cábasan úma núradaguágüdaña güriúa ja lánina dan le? Magúndaatiña ni ca áu, ítara jáña quei irájüñü ja añúurubaña adibirija mágídirugu, ába jagúarajan joun jíbirigu ítara.

17 “Íñaajatiwa fídu jun, mabínajantün, erémuja wagía urému jírtu jun, mayájuntün.”

18 Ladüga liábin Juan meígin líña buídu quei leígin furúmieguarügü, mátun, ába jaríñagun luágu níjein lan espíritu wuríbati lídan.

19 Láriگیڤه, ába niábin, áu le Wügüri Garaúwarügüti, jou áu quei leígin furúmieguarügü, gurá, ába jaríñagun luágu gegáidi nan, gátadi, jamáda áu gafígountíña jáma agúburajatiña liseínsuna gumádi. Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

*Lílana buri fulásu ja magáambadibaña
(Lc 10.13-15)*

20 Ábati lagúmeserun Jesúsu adeínja joun gürígia lídan fulásu buri le ñi lubei meja ladügei líbe-ágei láni miláguru, ladüga masáansirun jamágili lan jóuserun. Ába lariñagun.

21 —¡Fugiábu jugúya Corazínna! ¡Fugiábu jugúya Betsáidana! Lun jamúga lídan lan ubúruge le gíríbei Tíro lúma Sidón ladügüwa miláguru buri le adügübei jagánagua, binárü jamúga lasáansiragua jagáburí lílana, ába jamúga jarúfuduni láu jadáüragun lúdu lúma balígi.

22 Nariñajare jun luágu dánme lan lachülürün wéyu lánina agúseraguni, weíritimaabei jabeichún sügü jáu ja Tírobaña jáma ja Sidónbaña.

23 Amürüti ubúruge le Capernaúm, çjarítaguatibu luágu weírígubadibu lan queísi siélu? Maweírígünbadibu ítara quei maweírígun lan máfiougati. Ladüga lun jamúga lídan lan ubúruge Sodóma ladügüwa miláguru le adügübei bídan, níjeingua jamúga fulásu ligía lúmoun dan le.

24 Nariñajare jun luágu lídan lánme wéyu lánina agúseraguni, weíritimaabei jabeichún sügü jáu Sodómana.

*Jigóugu lun Jesúsu, eméraqua jumámuga
(Lc 10.21-22)*

25 Lídan dan ligía, ába lariñagun Jesúsu lun Búngiu.

—Adímurejatina buíti buágu, Núguchi le Labúremebei siélu lúma ubou, ladüga barámuduni buri cátei le jaweí chu táu jáma gunfaráandatiña, ába barúfuduni joun ja mafúnrendeirungiñábaña queísi irájüñü.

26 Ánja, Núguchi, ladüga ítara líña lan babúseeruni.

27 ‘Derége láali Núguchi sun cátei nun. Ibídiñeti Búngiu Irájü ni ca un buídu buídu lueídügüya lun Búngiu Úguchili, ibídiñeti gíñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni.

28 Jigóugu númoun, sun jugúya ja bucháañabaña uágu lárígi juwádigimari lúma lijürü janügün, eméraquagüda námugaün.

29 Resíbi jumei narúfudajan, furéndeí jugúyame númagiñe, láu gagúraasun nan, ñulú tugúya nanígi, ábame jadárirun eméraquni tun juwáni.

30 Ménreengunti lun jeseríwidun nun, juáliti gíñe anügüni le níchugubei jun lun janügüni.

12

*Játünjan disípulugu tírígü lídan wéyu le eméraquagülei
(Mr 2.23-28; Lc 6.1-5)*

¹ Luágu ában wéyu le eméraaguagülei eĩbugeina líña Jesúsu jáma láni disípulugu labádinagua nádü. Ába jalámachun láni disípulugu, ába jätünjan lílewe türígu, ába jeígini líla.

² Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adüga wadágimanu le mouñ lumuti ladügün lídan wéyu le eméraaguagülei.

³ Ába lariñagun joun.

—¿Malíjangidün luágu lé meja ladügübei Davíd luágu ában dan, dan le lálámachunbei, ligía jáma ja úarabaña lúma?

⁴ Ába lebélorun tídon lúban Búngiu, ába leígin tídaangiñe fein to sagraúboun to moun lubouñ yebe leíginun, ni ligía ni ja úarabaña lúma, fádirigu rügüñanu lun jeíginun fein tugúya según lilúrudun Moisés, áni mámati figou le ladügübei Davíd ligíbugiñe Búngiu.

⁵ ¿Ódi malíjangidün lídan lilúrudun Moisés luágu ñadágimein jamá fádirigu tídan lúban Búngiu lídan wéyu le eméraaguagülei áni máma figou?

⁶ Naríñajare jun luágu njein lan ában weiriguti sügü táu lúban Búngiu ya, áu.

⁷ Jugúya, úagili gunfaráanda jumáni le lariñagubei Búngiu tídan Lerérun. “Jímein numúti lun gudémejabu jumá sügü láu jadágaragüdün anímaalu nun.” Lun jamúga gunfaráanda jumáni, madímurejaantün jamúga wuríbati jawágu gürígia ja madügünbaña ni cáta wuríbati.

⁸ Gabáfutina giñe, áu le Wügüri Garaúwarügüti, lun naríñagun cába lan gayára ladügüniwa lídan wéyu le eméraaguagülei.

*Wügüri le jiláalibeí ában lújabu
(Mr 3.1-6; Lc 6.6-11)*

⁹ Ába lídin Jesúsu ñígiñe, ába lebélorun tídon jalígilisin juríu.

¹⁰ Ñíñein ában wügüri jiláali ában lújabu, queíti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáraatísan lagáranijouñ lun ában sánditi lídan wéyu le eméraaguagülei?

¹¹ Ába lariñagun Jesúsu joun.

—¿Ca jídaangiñe, ánjein galügün lubeí ában mudún, ába teíguadun lídoun ában wélu wéyu le eméraaguagülei, lun mídinbei lan aságaroun?

¹² ¡Ma gebégitimaati ában wügüri sügü táu ában mudún! Gayáraati lubeíti ladügün buíti lídan wéyu le eméraaguagülei.

¹³ Ába lariñagun lun wügüri ligía.

—Tulébei bújabu.

Dan le látuleruni, ába lareídagun quei le ában.

¹⁴ Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja lariñagubei Isaías luágu Jesúsu

¹⁵ Dan lasúbudirunbalin Jesúsu cátei le, ába lídin ñígiñe, ába jafálaruni sarágu gürígia, ába lareídaguagüdúniña sun sánditiña.

¹⁶ Ábaja lariñagun joun lun maríñagun jamáni cáteiñein lan.

¹⁷ Lasúseredunbei líra lun lagúnfulirun lé meja lariñagubei proféta Isaías.

¹⁸ Niján numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.

Níchugubei náni Espíritu luágu,

ábame larúfudajani joun ja mámabaña juríu ída lúba lan gayára lan júaradun nigíbugiñe.

¹⁹ Mageíndagunbei, magúaragun, mareínjabei úmada.

²⁰ Gudémejabubei joun gürígia ja gudémebaña queísi ában mabúru le barúguaali, lúma joun ja débilibaña lídan jafiñen queísi ában lámpu le ñegúmemeeli.

Ítara méme lúba daríme adúga láali larúejan le úaraguabei.

²¹ Ábame jíchuguni ja mámabaña juríu jeménigi luágu.

*Laríñawagún luágu lubáfu lan Máfia lúmabei Jesúsu
(Mr 3.19-30; Lc 11.14-23, 12.10)*

²² Ábati lanügüniwa ában wügüri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía.

²³ Ába laweíridun janígi sun ja ñíbaña, ába jariñagun.

—¿Níján funásan ladügawagunbei David?

²⁴ Dan le jagáambunbalin fariséogu cátei le, ába jariñagun.

—Wügüri le, láu lubáfu Beelzebú, le Máfia, le jábuti espíritugu wuríbatíña laságajaña.

²⁵ Quei subúdi láani Jesúsu le jarítagebei, ába lariñagun joun.

—Furúmieguaarügü arúejani le afánreinraguti lun jageíndagun jámagua, lagünrinchaguba, ánjaña giñe afáreinragua lílana ában ubúru o ában lan familia ladüga wuríbu, siñábei jadúrarun.

²⁶ Ítara líña giñéti, ánjein laságara Máfia máfia guánarügü, ligía guánarügü afánreinragubei, áni ¿ída lubáti ladúrarun lubáfu ítara?

²⁷ Jugúya, aríñagatún luágu láu lan lubáfu Beelzebú, o Máfia, naságaja espíritugu wuríbatíña, ánjein ítara líña lubeí, ¿cáti íchugubei ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulíeigua jumá.

²⁸ Áu, láu lubáfu láni Búngiu Espíritu naságaja espíritugu wuríbatíña. Arúfuda lumúti líra luágu chülújali lan larúejan Búngiu jídoun.

²⁹ ¿Ída lubági gayára lan lebélorun ában gürígia lúbiñoun ában wügüri jéreti lun lanügüni lílaga ánjein magúragun lan furúmiñe? Ítara rügüñein lun gayára lan lanügüni lílaga.

³⁰ Le mámabei númagiñe, náganiñein, le míderagun lumútina, güríngua lumúti le nadügübei.

³¹ Jugúya aríñagatún luágu láu lan lubáfu Máfia naságaja espíritugu wuríbatíña, áni láu lubáfu Sífiri Sándu naságajaña. Ligía nariñagunbei jun luágu gayára lan ferúdunawa lan sun figou lúma sun wuríbati le jariñagubei gürígia, ánjein lun jadímurejan wuríbati luágu Sífiri Sándu, siñábei ferúdunawa lan figou líra.

³² Furúmieguaarügü giñe le aríñaguti furúmieguaarügü cátei wuríbati nuágu, áu le Wügüri Garaúwarügüti, gayáraati ferúdunawa lan, ánjeinti le adímurejati wuríbati luágu lubáfu Sífiri Sándu le nídaanbei, úabei ferúdunawa lan ni lídan ubou le, ni lídan le ában.

*Luágu lin ídibu lasúbudirúa ca lan luwúyeribei
(Lc 6.43-45)*

33 ‘Anjein buídu lubeí ídibu, buídubei giñe lin, ánjein mabuídun lubeí ídibu, mabuídunbei giñe lin. Luágu lin ídibu lasúbudirúa ca lan luwúyeribeí.

34 ¡Jarásan jéwe jugúya le! Siñáti jadímurejan cátei buíti, wuríbatüngan. Cátei le buínbei tidan anígi, ligía laríñagubei iyúmaü.

35 Wügüri le buídubei, cátei buíti laríñagubei ladüga tídaañein lan lanígi ubuíduni, wügüri le wuríbabeí, cátei wuríbati laríñagubei ladüga tídaañein lanígi wuríbani.

36 Naríñajare jun luágu dánme lan lachülürün luwéyuri agúseruni, sun güri-gia geféenbaña luágu sun dimúrei málati le jaríñagubei,

37 ladüga luáguba le baríñagubei bagúseragüdüwa, ligíaba arúfudei ánjein gadúnrun bubeí lúmoun madúnrun ban.

*Jamúriajan güri-gia wuríbatíña seíni láuti miláguru
(Mr 8.12; Lc 11.29-32)*

38 Ába jaríñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badügün ában seíni le láuti miláguru luágu lúmagiñe lan Búngiu biábin.

39 Ába laríñagun Jesúsu joun.

—Güri-gia wuríbatíña áni magúnfuliruntiña amúriajatiña seíni láuti miláguru, míchugúnbei ámu seíni joun lueí le asúseredubei lun proféta Jonás.

40 Ladüga queí leréderun Jonás ürüwa wéyu ürüwa áriebu lurágeirugu údu, ítara lúba giñe neréderun, áu le Wügüri Garaüwarügüti, lídan numúaja ürüwa wéyu, ürüwa áriebu, según ligáburi jabájüdüni juríu dan.

41 Já meja aganoúbaña Nínive jásaaruba lídan luwéyuri agúseruni dánme jagúseragüdüniwa güri-gia ja lánina dan le, ábame jíchugun jadúnrun ladüga säänsiguati jagáburi Nínivena dan le lapúrichijanbalin Jonás lugánute Búngiu joun, áni anája áu, ában weíriguti sügü láu Jonás, áni májatün jagáambunina.

42 Tásaaruba giñe lurúeitena Súru lídan luwéyuri agúseruni dánme le jagúseragüdüniwa güri-gia ja lánina dan le, ábame tíchugun jadúnrun, ladüga ñübintu lídaangiñe lidíse-ágei ubou lun tagáambuni lichú láu Salomón, áni anája áu, ában weíriguti sügü láu Salomón, áni májatün jagáambunina.

*Espíritu wuríbati le agríbuduti
(Lc 11.24-26)*

43 ‘Dan le láfuridun ában espíritu wuríbati lídaangiñe ában güri-gia, ába eíbugañaja lan lídan fulásu mábeiti áluaja leméraagun, dan madári láani, ába laríñagun lúnguarügü.

44 “Nagríbuda tídoun núban to ñigiñe lubeí náfurida.” Dan le lagríbudun, ába ladáriruni güri-gia buga ligía queísi ában múná to málatu, abuídajouáaru, aráanserúa.

45 Ábati lídin, ába liábin jáu sédü espíritugu wuríbatimaatiña sügü láu, ába jebélurun sun jagía agánawa lídan güri-gia ligía, wuríbatimájali le gádaanbalin sügü láu meja furúmiñe. Ítara lúba giñéti lasúseredun joun güri-gia wuríbatíña ja lánina dan le.

*Lúguchu Jesúsu jáma lamúlen
(Mr 3.31-35; Lc 8.19-21)*

46 Ñígili Jesúsu adímureja joun güri-gia, ligía tiábin lúguchu jáu lamúlenu. Ába jeréderun bougudi, buséntiña yébe jadímurejan lúma.

47 Ába laríñawagún lun Jesúsu.

—Nuján búguchu jáma bamúlenu ya bougudi, buséntiña jadímurejan búma.

48 Ába laríñagun Jesúsu lun le awíсарubalin.

—¿Ca nóguchuboun, ca namúlenubaña?

49 Ába larúfudun jawágun láni disípulugu, ába laríñagun.

—Añája nóguchubaña, jagía giñe namúlenubaña,

50 ladüga furúmieguarügü le adügüti lugúndan Nóguchi le siélubei, ligía namúlenbei, nítu, nóguchu.

13

Jémpulu luáguti ábunaguti
(Mr 4.1-9; Lc 8.4-8)

1 Wéyu ligía, ába láfuridun Jesúsu múnadagiñe, ába lañúurun láru dúna.

2 Quei jagíbedagun güriía le ñí lubei, ába ládinun tídon ában ugúnein, ába lañúurun, ába jeréderun sun güriía láru dúna.

3 Ába larúfudajan sarágu cátei joun láu jémpulu, ába laríñagun.

—Ñiñein ában ábunaguti, ába láfuridun ábunagua.

4 Lídan afúrujeina láani líla nádü, ába láburujan lídaangiñe luágun üma, ába jayábin dunúru, ába jeígini.

5 Líbiri, ába láburujan labádinaguóun dübü le ñí lumuti úa lan sarágu múa, ába labouchun furése ladüga majúlilin lan múa.

6 Dan le lásüdün wéyu, ába lásaürün queíti málagüle lan, ába louñwen.

7 Líbiri ílaü, ába láburujan labádinaguóun jíyu, ába laweínamudun jíyu úara lúma, ába láfaruni.

8 Ñiñein lídaangiñe, áburujati lídoun múa buíti, alúbajoúati buídu, níjein lídaangiñe, íchuguti san águu luágu cáda ában águu, líbiri rúti ürüwa-wein, líbiri darándi.

9 Jugúya le garígeirugubei lun jagáambun, agáamba jumána.

Ca lan laníchigubei jémpulu le
(Mr 4.10-12; Lc 8.9-10)

10 Ábati jayábin disípulugu, ába jaríñagun lun Jesúsu.

—¿Cásan uágu badímureja joun güriía láu jémpulu?

11 Ába laríñagun joun.

—Jugúya, subúdigüda láali Búngiu sun cátei arámudaguati le lánina larúeijan jun, ánjein jagía, siñáti jasúbudiruni.

12 Le agúnfuliruti lúma inárüni le lagáambubei, líchugúba lánwoun lun, ánjein le maténiruntun lun, gidáwarügübei murúsun larúgounga le lúmabei lueí.

13 Ligía nadímurejanbei joun láu jémpulu ladüga aríja jamáni le nadügübei, ába jeréderun camá maríjintiña, agáamba jamei le naríñagubei, ába jeréderun úaga gunfaráanda jamá camá jamuga magáambuntiña.

14 Jawágu lagúnfulira lé meja laríñagubei proféta Isaías dan laríñagunbei.

Jugúya, jagáambuba, úabei gunfaráanda jumá,
jaríjuba, ibídiñebei jun ca lan lílabei le jaríjubei,

15 ladüga deréeru janígi,
wuríbaaliti jagáambun,
murúñu líña jágu,
lun maríjin jumá láu,

magáambun láu jarígeirugu,
 úa gunfaráanda jumá táu janígi,
 magáragun jugúyame nun lun nareidaguagüdünün.

¹⁶ ‘Anjeinti jugúya le nánigubei, fuleiseiwatün ladüga aríjatün láu jágu, agáamba jugúya láu jarígeirugu.

¹⁷ Ninárün jáu, sarágu jaña meja profétagu jáma ámu gürígia gúnfulitiña lúma Búngiu abúseerutiña jamúga jaríjinina quei jaríjinina jugúya guetó, maríjin jamútina, buséntiña jamúga meja jagáambuni le jagáambubei jugúya, magáambun jamúti.

Lafúnraanguagüdüni Jesúsu jémpulu luáguti ábunaguti
 (Mr 4.13-20; Lc 8.11-15)

¹⁸ ‘Agáamba jumeiti le lílabei jémpulu luáguti ábunaguti.

¹⁹ Ja agáambubalin ugánu luáguti arúejiani le lánina siélu áni úati gunfaráanda jamáni, itara jáña quei úma le ídounbei láburuja lídaangiñe líla nádü, ába líabin Máfia, ába laságaruni ugánu buíti le ábunúbei tídaangiñe janígi.

²⁰ Dübü le ñíjin lubei láburuja ílaü, itara líña quei gürígia ja agáambubalin ugánu, ába jerésibiruni láu ugúndani,

²¹ quei márügüdün lubei buídu tídan janígi, madúrati jádan. Dánti le lachülürün dan lun jóuchawagún lúma jeíbaajoún lueígiñe ugánu ligía, ába leíguadun jarúna.

²² Jíyu le ñíjin lubei láburuja ílaü, itara líña quei gürígia ja agáambubalin ugánu, weírिताmaati jafúudun luágu cáte le lánina íbágari le, ába leyéeduniña írisini. Sun le, ába láfaruni ugánu tídaangiñe janígi, mígiruntiti lun lalúbajoún jádan gürígia jagía.

²³ Múa buíti le ñíjin lubei láburuja ílaü, itara líña quei gürígia ja agáambubalin ugánu, ába gunfaráanda jamáni, ába jíchugun ában alúbajoúni buíti. Añájein, itara jáña quei ílaü le íchugubei san águu luágu ában, jíbiri quei le íchugubei ürüwa-wein, jíbiri quei le íchugubei darándi.

Jémpulu luáguti jíduru wuríbati labádinagua türígu

²⁴ Ábaya íchuguni Jesúsu jémpulu le joun.

—Arúejiani le lánina siélu, itara líña quei ában wügüri le ábunagubei ílaü buíti lídan lufúlasun,

²⁵ dan añája lan sun ja ñíbaña arúmuga, ába lebélorun ában lágani labúreme fulásu ligía, ába lábunun jíduru wuríbati labádinagua türígu, ába lídin.

²⁶ Dan le laweínamudun türígu ába legélewejan, ába giñe lachúlaagun jíduru wuríbati.

²⁷ Ába jóudin músu, ába jaríñagun lun jayúbudiri. “Wayúbudiri, ánjein buídu lubei ílaü le bábunagubei bumúanrugu, ¿jalíagiñésan lasálira jíduru wuríbati le?”

²⁸ Ába laríñagun iyúbudiri joun. “Ladüga ában ágani le.” Ábati jaríñagun músu lun. “¿Buséntibu lun wájulajani jíduru wuríbati le?”

²⁹ Ába laríñagun joun. “Uá, ladüga dánme jájulajani jíduru wuríbati, julá jíñein lin giñe türígu úara lúma.

³⁰ Ígiragubei jumei lun laweínamudun úara daríme lídáani alúbajani, ábame nariñagun joun ñadágimeintiña lun jájulajani jíduru wuríbati furúmiñe, ábame jagúraguni lun lágudúniwa, lárigiñeme, ábame jareíduni türígu tidan lágei.”

Jémpulu luáguti tíla mostása
 (Mr 4.30-32; Lc 13.18-19)

³¹ Rúlumuti giñe Jesúsu jémpulu le joun.

—Ítara líña arúejani lánina siélu quei ában tíla mostása le lábunubei ában wügüri lufúlasunrugú.

³² Tíla mostása, ligía ílaü ñúraütimaabei lídaangiñe sun ílaü, áni dan laboučhun, ligía weírítimaabei lídaangiñe sun nádü, ába liábin lun ábanbei lan wéwe weíríti darí lun jayábin dunúru adüga jádibu luágu lilímun.

Jémpulu luáguti ísi

(Lc 13.20-21)

³³ Rúlumuti giñe jémpulu le joun.

—Ítara líña arúejani le lánina siélu quei ísi le tagúbudubei ában würi tídan ürüwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le

(Mr 4.33-34)

³⁴ Láu jémpulu lariñagei Jesúsu sun cátei le joun güriá, mariñagunti ni cáta joun mayúsurunga jémpulu.

³⁵ Sun cátei le, lun lagúnfulirun le lariñagubei meja Búngiu liyúmulugugiñe proféta.

Nadímurejaba láu jémpulu jun,

nafúnraanguagüdübei cátei lé buri meja arámudaguabei jun lúmagiñe nadügüni ubou.

Lafúnraanguagüdüni Jesúsu jémpulu le luáguti jiduru wuríbati labádinagua türígu

³⁶ Ába louñajaniña Jesúsu güriá jábiñoun, ába lebéllurun múnadoun, ába jayábin láni disípulugu, ába jariñagun lun.

—Furáanguagüdübei jémpulu le luáguti jiduru wuríbati woun.

³⁷ Ába lariñagun Jesúsu joun.

—Áu le Wügüri Garaüwarügüti, áu le ábunagubalin ílaü buíti,

³⁸ múa, ligía uboubei, ílaü buíti, jagía güriá ja lílana larúejan Búngiu, jiduru wuríbati, jagía güriá ja lánigu Máfia,

³⁹ áganiti le ábunubalin jiduru wuríbati, Máfia méme, alúbajani, ligía lagúmunchunbei ubou, ja alúbajabaña, ánjeligu.

⁴⁰ Ítara quei labúdajouñiwa jiduru wuríbati ába lágurún wáturugun lun lágudun, ítara lúba giñe lasúseredun dánme lagúmunchun ubou,

⁴¹ áu le Wügüri Garaüwarügüti, nouñajabaña náni ánjeligu aságaraña sun ja affígonügüdübaña ámu, jáma ja adügübaña wuríbati, lídaangiñe narúejan,

⁴² ábame jácharaguniña lídoun wátu geméti lánina máfiougati. Ábame jayájuañan ñi, ábame lacünrinjan jári.

⁴³ Jámeti adügübalin le lubeíbei Búngiu, ábame jámiridun quei wéyu lídan larúejan Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irísini le arámudúañubei

⁴⁴ Ítara líña arúejani le lánina siélu quei irísini le arámudúañubei lábugiñe múa. Ladárierei ában wügüri irísini ligía, ábaya larámuduni ñi méme, le luweirin lugúndan, ába lídin, ába lalúguruni sun le lúmabei, ába lagañijani fulásu ligía.

Jémpulu luáguti pérla le weíríbei ebégi

⁴⁵ Ítara líña giñe arúejani le lánina siélu quei ában alúgurajati le eíbugañajabei áluaja pérla finuti,

⁴⁶ dánti ladárirun ában le weíríti lebégi, ába lídin, ába lalúguruni sun le lúmabei, ába lagáñijani pérla ligía.

Jémpulu tuáguti séni

⁴⁷ Ítara líña gíñe arúejiani le lánina siélu quei ában séni to agurúboun baránaja, ába tañúgun sun jawúyeri úduraü.

⁴⁸ Dan tabuíunchun, ába jacháwarunun esénijatiña lárún béya, ába jañúurun ñi anúadajaña úduraü, ába jareiduniña ja buídubaña, ába jachágaruniña ja wuríbabaña.

⁴⁹ Ítara lúba dánme lagúmunchun uboú, jayábiba ánjeligu lun jafánreinruniña ja buídubaña jádaangiñe ja wuríbabaña.

⁵⁰ Ábame jádaruniña ja wuríbabaña lídoun wátu geméti lánina máfiougati, ñíba lubei jayájuaja, acúnrijame jári.

Irisini buri iséri lúma binádu

⁵¹ Ábati lálügüdüniña Jesúsu, laríñaga joun.

—¿Gunfaráanda jumútisan sun cátei le?

Ába jariñagun.

—Ánja, Wabúreme.

⁵² Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejiani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirisin lun líchuguni joun tílana lúban dan le jemégeiruni, queígubeirügü, gayáraati larúfudajan joun gürígia luágu lilúrudun Moisés lúma gíñe luágu cátei le narúfudajabei, áu le Jesúsu.

Jesúsu lidan fulásu le gíríbei Nazarét

(Mr 6.1-6; Lc 4.16-30)

⁵³ Dan lagúmunchunbei líchuguni Jesúsu jémpulu buri le, ába lídin ñígíñe,

⁵⁴ ába lachülürün lageíroun. Ába lagúmeserun arúfudaja tídan jalígílisin juríu to lídaanboun fulásu ligía, ába laweíridun janígi gürígia, ába jariñagun.

—¿Jalíasan lafúnrendeirei wügüri le sun lichú áu le? ¿Ída liñásan gayára láani miláguru buri le adúga?

⁵⁵ Liraüga saráfangei le, María lúguchuboun, líbugaña Jacóbo, José, Simón lúma Júdas,

⁵⁶ ya gíñe jagánawa lamúlenu jáma lítunu wádan. ¿Jalíagiñeti lasúbudirei sun le?

⁵⁷ Ába jamájarun lun jerésibiruni. Ába laríñagun Jesúsu joun.

—Sun gürígia jínsiñeti ában proféta joun, mámarügaali ligía lídaangiñeti fulásu le ñi jabei o tílana lan jában.

⁵⁸ Madügüntiti sarágu miláguru ñi ladüga mafíñen jamá luágu.

Loúnwen Juan le abásteragüdajabei

(Mr 6.14-29; Lc 9.7-9)

14

¹ Lídan dan ligía, ába lagáambun Heródes, le gumándan lídan fulásu le gíríbei Galiléa, luágu Jesúsu,

² ába laríñagun joun ja lúmabaña.

—Juan le abásteragüdajabei le, sará jádaangiñe jílaaña, ligía gabáfu lubei lun ladágun miláguru.

³ Lé meja suséreelibe, daüllumuti meja Heródes Juan, ába lagüraguágüdüni láu güringüri tueigiñe Heródiás tó meja lúmarí Felipe, le lamúlen.

⁴ Aríñagaalí meja Juan lun Heródes luágu moun láni lagámaridunun lúmarí lamúlen, madügünti Heródes gásu láu.

⁵ Busénti yebéti Heródes láfaruni Juan jilágubei, ladüga lanúfude jaweí güriá, madügun lumúti ladüga sun lan güriá affñetiña luágu proféta lan Juan.

⁶ Dánti le efédujani luágu lagúnfulirun Heródes irúmu, ába tiábin tiraü Heródiás, ába tabínajan jagíbugiñe amísurajóutiña, léti línsiñe tabínajan lun Heródes,

⁷ ába laríñagun tun láu fiñún luágu líchugubei lan furúmieguarügü cátei le tamúriajan lúma tun.

⁸ Ábati taríñagun tóguchu tun lun tamúriajani lábulugu Juan le abáste jilágubei, ladüga, lun jíchuguni tun lídan ában asíedu, ába tamúriajani lúma ítara.

⁹ Ába lírudagun Heródes lueigiñe cátei le, quei aríñaga láali lan láu fiñún, agáamba jameí amísurajóutiña, ába laríñagun lun líchugúniwa tun.

¹⁰ Ábati laríñagun lun ladürürüniwa lábulugu Juan furísunrugu,

¹¹ ába janügüni lídan ában asíedu, ába líchugúniwa tun irájü tugúya, ába tíchuguni tun tóguchu.

¹² Ábati jayábin l-íñagun tun láu fiñún luágu lanigu Juan, ába janügüni lúgubu, ába jábununi, lárigiñe, ába jóudin awísarei Jesúsu.

Líchugun Jesúsu eíginí joun seíngü mílu wügüriña

(Mr 6.30-44; Lc 9.10-17; Jn 6.1-14)

¹³ Dan lagáambuni Jesúsu cátei le, ába lídin nígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni güriá, ába jáfuridun lídaangiñe buri aüdü, ába jóudin lárigi, eíbu.

¹⁴ Dan larárirun Jesúsu tídaangiñe ugúnein, ába laríjin luágu sarágu jaña lan güriá jagía, ába jagúdemedagun lun, ába lareídaguagüdüniña ja sándibaña jádan.

¹⁵ Queiti agúñedeinaali lubeí, ába jaríñagun láni Jesúsu disípulugu lun.

—Dárüjalitia áni úatiña güriá aganoútiña lídan fulásu le. Oúnaja báña güriá ja, ñüdün jamámuga lídoun buri lirájüñü fulásu yaráfa agáñija eíginí lun jeígin.

¹⁶ Ába laríñagun Jesúsu joun.

—Mídinbaña, rújuma eíginí joun.

¹⁷ Ába jaríñagun lun.

—Seíngü rügüñoun fein wáma ya, jáma bián úduraü.

¹⁸ Ába laríñagun Jesúsu joun.

—Barüjumoun nun ñájoun.

¹⁹ Ába laríñagun joun güriá lun jañúurun luágu jíduru. Ába lanügünun seíngü fein jáma bián úduraü jagía lújaburugu, ába laríjin siélun, ába leteíngiruni Búngü tuágu. Ábati lagúbachagunun fein, ába líchugunun joun láni irun Jesúsu tídaangiñe ugúneidisípulugu, ába jafánreinjanun jádan güriá.

²⁰ Sun jagía jóutiña quimúle, lárigiñe, ába jabuínchagüdüñ dúusu faníñe táu to ígiragutu.

²¹ Seíngüñanu mílu wügüriña eígitiña, mabájüdünga würiña jáma irájüñü.

Leibugun Jesúsu ligíbuagu dúna

(Mr 6.45-52; Jn 6.16-21)

22 Ába loúnajaniña Jesúsu láni disípulugu lubá tídan ugúnein tugúya lun jánjiñuragun loubáfurugun sun niján lan oúnajaña gürígia águyu.

23 Lásun loúnajaniña, ába laweinrun lábugua luágun wübü ayúmuragua lun Búngiu. Dan le lagúñedunbei, ñíñein Jesúsu lábugua,

24 sun núnguran tan ugúnein lamídan dúna. Ába láfarajan lugúdi barána tuágu ugúnein ladüga tubárouñein lan garábali.

25 Ába liábin Jesúsu jawágun lubá larúgan, eíbugeina ligíbuagu dúna.

26 Dan jaríjini láni disípulugu eíbugeina ligíbuagu dúna, ába janúfudedagun, ába jagúaragun láu anúfudei.

—¡Úfiaü!

27 Ába ladímurejan Jesúsu joun, ába lariñagun joun.

—¡Ragüjuma anígi, áu le, manúfueda jumá!

28 Ába lariñagun Pédro lun.

—Nabúreme, ánjein amürü lubeí, eíbugagüda bána gíñe ligíbuagu dúna chülü le ñi hubei.

29 Ába lariñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna.

30 Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—¡Séfu bána Nabúreme!

31 Ába lárügüdüni Jesúsu lújabu, ába lariñagun lun.

—¡Loúguati gíñe baffíñen! ¿Ca uágu lalouguada baffíñen?

32 Dan jádinun tídoun ugúnein, ába lagálumadun garábali.

33 Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraü ban Búngiu.

Lareídagugüdüniña Jesúsu sánditiña Genésaret

(Mr 6.53-56)

34 Ába jánjiñuraguni dúna, ába jachülürün Genésaret.

35 Dan le jíchugunbei lílana fulásu fe luágu Jesúsu lan, ába jabúruchaguagüdüni lídan sun fulásu ligía, ába janügüniña sun sánditiña le ñíjin lubeí.

36 Ába jayúmuragun lun lun lígirun lúnrügü jagúuruni táru lanáangun, sun ja agúurubarun, areídaguátiña.

15

Cátei le marúmadagüdünbaliña gürígia ligíbugiñe Búngiu

(Mr 7.1-23)

1 Ába jayábin fiú fariséogu jáma arúfudajatiña lilúruden Moisés, ñübintiña ubúrugiñe Jerusalén lúmoun Jesúsu, ába jaríñagun lun.

2 —¿Ánsan jájalachagunbalin báni disípulugu binádu jagáburi weíyaaña mútu? Magúnfuliruntíña láu lachibúniwa újabu lubá eígini, según wagáburi.

3 Ába lariñagun Jesúsu joun.

—¿Ánti gíñe jájalachagunbalin lerérun Búngiu lun jafálaruni binádu jigáburi?

4 Lariñajare Búngiu. “Inébe jamá bagübürigu bun, le anábagubaliña lagübürigu, jilála.”

⁵ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Siñáti níderagunibu ladüga sun le nómabei, aríñagaadina luágu lun lan níchuguni lun Búngiu”,

⁶ luágu furúmieguarügü lan le aríñaguti ítara, mámaali lan lúnti líderaguniña lagübürigu. Láu líra mebégigüda jumáli lagúmadijan Búngiu lun jafálaruni binádu jigáburu.

⁷ ¡Biángua tigíbu jugúya le! Linárün proféta Isaías laríñagunbei juágu ítara.

⁸ Jayumárurügü gürígia ja jíchiga inébesei nun, líña Búngiu, ánjein tídan janígi, mebéresentiña náu.

⁹ Málati jájuduragun nun, ladüga le rügüñein jagúmadijan wügüríña jarúfudaja.

¹⁰ Ábati lagúarun joun gürígia, ába laríñagun joun.

—Agáamba jumá, gunfaráanda jugúyame.

¹¹ Máma eigini le leígubei gürígia adügübalin lun marúman lan ligíbugiñe Búngiu, dimúrei wuríbati le laríñagubei wügüri, ligía adügübalin lun marúman lan.

¹² Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggu wuríba lan láburuan dimúrei le bariñagubei joun fariséogu?

¹³ Ába laríñagun joun.

—Furúmieguarügü nádü to máma lábunun Núguchi Búngiu le siélubei, lálulúba láu sun lílagüle.

¹⁴ Ígira jumáña, maríjintiña ja adúndejetiña maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

¹⁵ Ábati laríñagun Pédro lun Jesúsu.

—Furáangugüdabei jémpulu le woun.

¹⁶ Ába laríñagun Jesúsu.

—¿Úati giñe gunfaráanda jumá?

¹⁷ ¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu?

¹⁸ Ánjein dimúrei le áfuridubei lídaangiñe iyúmaü, tídaangiñe anígi liábin, ligiati adügübalin wügüri lun marúman lan ligíbugiñe Búngiu,

¹⁹ ladüga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu.

²⁰ Ligía buri cátei le adügübalin wügüri lun marúman lan, ánjeinti leigíniwa machibúnga újabu según jagáburu juríu marúmadagüdün lumúti ligíbugiñe Búngiu.

Ában würi teréncha to afñeruboun luágu Jesúsu

(Mr 7.24-30)

²¹ Ába láfuridun Jesúsu ñigiñe, ába lídin lídoun buri fulásu geyégua láu fulásu le Tíro lúma Sidón.

²² Níñoun ában würi jádaangiñetu Cananítagu aganoúti lídan fulásu ligía, ába tiábin luágun Jesúsu agúarajeina.

—¡Nabúreme, ladügawagun David, gudémená bun! Níjein ában espíritu wuríbati tuágu nisáani, weíruti tasúfurirun lurúma.

23 Moúnabun lumútu Jesúsu. Ábati jayábin disípulugu, ába jayúmuragun lun, ába jariñagun.

—Adügabei le tamúriajabei búma, ladüga nuteíntia agúarajaina wárigi.

24 Ába lariñagun Jesúsu.

—Joun rügüñein gürígia féridijaña ja Israelítagu loúnajana Búngiu lun níderaguniña.

25 Ába tiábin würi tugúya, ába tájuduragun ligíbugiñe, ába tariñagun.

—¡Nabúreme, íderagua bána!

26 Ába lariñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jawei isáanigu lun tíchugúniwa joun ouñli.

27 Ába tariñagun.

—Ánja, Nabúreme, láu sun líra, gayáraati jeígini ouñli ífei le áburujati lueígiñe jadábulan jabúriña.

28 Ábati lariñagun Jesúsu tun.

—Würi, ¡weiriti giñe bafiñen! Susérelá le babúseerubei.

Lúmagiñe óra ligía, ába tareídagun tisáani.

Lareídagugüdüin Jesúsu sarágu sánditiña

29 Ába láfuridun Jesúsu ñígiñe, ába lachülürün lárun dúna Galiléa, lárigiñe, ába laweínrun luágun ában wübü, ába lañúurun ñi.

30 Ába jayábin sarágu gürígia le ñíjin lubei barúina jagía meíbuguntiña, mariñintiña, mariñaguntiña, danímaati jarúna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídagugüdüniña.

31 Ába laweíridun janígi gürígia láu jariñin adímurejaña jamá já meja mariñagadibaña, areídagua ja danímaabaña arúna, eíbuga ja meíbuguñajabaña, aríja ja mariñiñajabaña. Ába jagúmeserun adímureja weírigu luágu Jabúngiute Israelítagu.

Líchugun Jesúsu eígini joun gádürü mílu wügüríña

(Mr 8.1-10)

32 Ábati lagúarun Jesúsu joun láni disípulugu, ába lariñagun joun.

—Gudémetiña gürígia ja nun ladüga ürúwaali wéyu jáu núma ya áni úaali ni cáta jáma lun jeígin. Mabúseeruntina noúnajaniña jábiñoun meíginga, dagá líñein falálaü jawágu úmada.

33 Ábati jariñagun láni disípulugu lun.

—¿Ída lubáti wadárirun eígini joun sarágu gürígia ya lídan fulásu le ñi lumuti úa jamá aganouñtiña?

34 Ába lálügüdüniña Jesúsu.

—¿Átiriñoun fein júma?

Ába jariñagun.

—Sédü, jáma biánraü úduraü.

35 Ába lariñagun joun gürígia lun jañúurun múarugu,

36 ába lanügünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun gürígia.

37 Joutiña súngubei quimúle, buíngüda giñe sédü faniñe táu to ígiraguboun.

³⁸ ¡Gádürüñanu mílu wügüríña eígitíña, mabájüdünga würíña jáma irájüñü!

³⁹ Lárígiñe, ába loúnajaniña Jesúsu gürígia águyu, ába ládinun tídon ugúnein, ába lídin loúbawagun Mágdala.

16

Jamúriajan fariséogu jáma saduséogu ában seíni le láuti miláguru
(Mr 8.11-13; Lc 12.54-56)

¹ Ába jóudin fariséogu jáma saduséogu aríjei Jesúsu. Lun jáburugüdüni tídon sádara, ába jaríñagun lun lun larúfudun ában seíni láuti miláguru le siélugíñeti joun, afíñe jamámuga luágu lúmagíñe lan Búngiu liábin.

² Ába laríñagun joun.

—Rábounwéyu, ába jaríñagun. “Buídubei dan ladüga funáti siélu.”

³ Bináafin, ába jaríñagun. “Wuríbabei dan ugúñe ladüga funáñu líña siélu áni jamúñounga.” ¡Biángua tígibu jugúya le! Subúdiiti luáguti ligáburi dan jun, áni ibídiñeti jun luágu chülújali lan lidáani asálbaruni.

⁴ Gürígia wuríbatiña, múaraantiña ja, amúriajatiña seíni láuti miláguru lun jafíñerun luágu áu lan anügübei asálbaruni joun gürígia. Wel, marúfudúnbei ámu seíni joun luei liseíni Jonás.

Ába lígiriñe, ába lídin.

Ítara líña jarúfudajan fariséogu quei ísi
(Mr 8.14-21)

⁵ Dan le jájiñuragunbei disípulugu lúma Jesúsu loubáfurugun dúna, bulíei jamúti janügün fein.

⁶ Ábati laríñagun Jesúsu joun.

—Toúnigigua jumátia júngua luei jísite fariséogu jáma saduséogu.

⁷ Ába jagúmeserun disípulugu aríñaga jámagua.

—Ladügatia manügün wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¡Louguati gíñe jafíñen!

⁹ ¿Úagili gunfaráanda jumá, marítangun jugúya tuágu seíngü fein to nafánreinjaboun jádan seíngü mílu wügüríña lúma átiriñein lan faníñe táu ígiragutu?

¹⁰ ¿Bulíeiguatün funásan tuágu sédü fein to nafánreinjaboun jádan gádürü mílu wügüríña lúma átiriñein lan faníñe táu ígiragutu?

¹¹ ¿Ída líñági meféen jubei luágu máma lan tuágu fein nadímureja dan le naríñagunbei jun lun jóunigiragun júngua luei jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, luei lan arúfudajani le jáni fariséogu jáma saduséogu lawéridiraña.

Laríñaguni Pédro luágu Jesúsu lan Crístubei
(Mr 8.27-30; Lc 9.18-21)

¹³ Dan le lachülürün Jesúsu ubúrugu Cesaréa le Filípo ába lálügüdüniña láni disípulugu.

—¿Cátanasan lídan jarítangun gürígia, áu le Wügüri Garaüwarügüti?

¹⁴ Ába jaríñagun.

—Añájein aríñagutiña luágu Juan lan lé meja abásteragüdajabei amürü, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵ Ábati laríñagun joun.

—Ánti jugúya, ¿cátanati lídan jarítangun?

¹⁶ Ába laríñagun Simón Pédro lun.

—Cristu le Liraü Búngiu le wínwanbei amürü, le ñübinbei asálbaraña gürígia ubouágu.

¹⁷ Ába laríñagun Jesúsu lun.

—Fuleiseiwatibu Simón, liraü Jonás, ladüga máma lasúbudirágüdün ni ába gürígia cátei le bun, lasúbudirágüdün Nüguchi Búngiu le siélubei bun.

¹⁸ Naríñajare bun luágu Pédro lan amürü, líla íri ligía, “dübü”, luáguba ébuu le nábuaguoun nilígílisin, áni ni íbini ouweni mabáfubei tuágu.

¹⁹ Níchugubei ligélen arúejiani le lánina siélu bun, le cátei le uáguti baríñaga luágu moun lan jadügüni affíñetiña, ligía gíñe uágubei laríñaga Búngiu luágu siñá lan ladügüniwa, le cátei le uáguti baríñaga luágu gayára lan ladügüniwa, ligía gíñe le uágubei laríñaga Búngiu luágu gayára lan ladügüniwa.

²⁰ Ábati laríñagun Jesúsu joun láni disípulugu lun maríñagun jamá ni ca un luágu ligía lan Crístubei.

Ladímurejan Jesúsu luágu louñwen

(Mr 8.31-9.1; Lc 9.22-27)

²¹ Lúmagiñe dan ligía, ába lagúmeserun Jesúsu aríñaga joun láni disípulugu furáangu luágu lúnti lan lídin Jerusalén, luágu gíñe jasúfuriragüdübei lan wügüríña weirigutiña lídan jaffíñen juríu, jáma jábutigu jafádirigun juríu, jáma arúfudajatiña lilúruden Moisés. Aríñagati joun luágu láfarúba lan jilágubei, áni lásaaruba lan luágu lürüwan wéyu.

²² Ába ladíñurun Pédro láu Jesúsu ñígiñe murúsun, ába laríñagun lun táu sun lanígi.

—¡Mabúseeraléi Búngiu líra, Nabúreme! ¡Siñátí lasúseredun cátei le bun!

²³ Ába lagáragun Jesúsu, ába laríñagun lun Pédro.

—¡Dísebá nuei, Máfia! Babúseerúña beréderuni ladügüniwa lugúndan Búngiu. Masáminaruntibu quei Búngiu, basáminarun quei wügüri.

²⁴ Ábati laríñagun Jesúsu joun láni disípulugu.

—Le busénti lafálarunina, bulíeilei cáteíñein lan, awándalei sun luwúyeri asúfuriruni le lúnbei liábin lun nueígiñe queísi lanügüni ában wügüri lugúruwan, falálana.

²⁵ Ladüga le abúseeruti leséfuragun lúngua ya ubouágu leféridirubei íbágarí le magúmchaditi, ánjein le ánjabei leféridiruni libágarí ya ubouágu nueígiñe, libíjubei íbágarí le magúmchaditi siélu.

²⁶ ¿Cági ju lan lun gürígia lagáñeiruni sun le lánina ubou le, leféridireime lubára siélu? Útati ni cáta lánina ubou le áuti gayára lan lagáñijan gürígia ubáraü siélu.

²⁷ Nagríbuduba, áu le Wügüri Garaüwarügüti, úara jáma nání ánjeligu, niábinba láu uweiriguni le meme láni Nüguchi. Ábameti nafáyeiruniña gürígia quei ligáburi le adüga jamáalibei.

²⁸ Ninárün jáu luágu añájein lan jádaangiñe ja yábaña guetó, mouñwenbaña daríme jaríjini liábin narúejian, áu le Wügüri Garaüwarügüti.

17

*Lámuñedagun larijín Jesúsu
(Mr 9.2-13; Lc 9.28-36)*

¹ Sísi wéyu lárigiñe, ába lanügüniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wübü íñuti, jagía rügüñanu ñi.

² Ába lámuñedagun larijín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga.

³ Sódini ába jarijini Moisés lúma Elías (já meja abágaridubaña lídan dan le sügüjalibe) ayánuja lúma Jesúsu.

⁴ Ába lariñagun Pédro lun Jesúsu.

—Nabúreme, ¡lídan dan awánja lan ya! Ánjabu busén, adüga wagíame ürüwa dibásein ya, ában bun, ában lun Moisés, ában lun Elías.

⁵ Dan niján lan Pédro adímureja, ába liábin ában juánriñu miríti, ába lóuburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraü le jínsiñebei nun, le aúbei oúnwenbun lan nugúndan, adüga jumei le lubei.

⁶ Dan jagáambuni disípulugu, ába jabúluchagun láu jagíbu múarugu le luweírin janúfude.

⁷ Ába liábin Jesúsu jawágun, ába lagúrurun jawágu, ába lariñagun joun.

—Sarájuma, manúfudeda jumá.

⁸ Dan le jarijínbei, maríjinjaña ámu lueídügü Jesúsu.

⁹ Dan le aráreireina jamáni wübü, ába lariñagun Jesúsu joun.

—Mabájudagua jumeítia cátei le aríja jumáalibe lun ni ában daríme saráadina, áu le Wügüri Garaüwarügüti, lídaangiñe ouweni lúnya nabágaridun.

¹⁰ Ábati jariñagun disípulugu lun Jesúsu.

—Guetó subúdi wamáali luágu amürü lan Crístubei. Quei ítara líña lubei, ¿cáti uágu jariñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹ Ába lariñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu,

¹² áni naríñajare jun luágu ñübinjali lan Elías, masúbudirun jamúti güriña, adügarügü jamúti sun le jabúseerubei láu. Ítara lúba gíñe jasúfuriragüdünina, áu le Wügüri Garaüwarügüti.

¹³ Ábati jasúbudiruni disípulugu luágu Juan lan lé meja abásteragüdjabe, ligía lan Elíasbei le uágubei ladímureja Jesúsu.

*Lareídaguagüdüñ Jesúsu ában irájü góuwejaditi
(Mr 9.14-29; Lc 9.37-43)*

¹⁴ Dan le jachúlürünbei le ñíjin jabeí güriña, ába liábin ában wügüri lúmoun Jesúsu, ába lájuduragun ligíbugiñe, ába lariñagun lun.

¹⁵ —Nabúreme, gudémelá nisáani bun, góuwejaditi, weírititi lasúfurirun, níjein dan jeiguati wáturugun, níjein dan dúnarugun.

¹⁶ Barü numuti ñájoun joun báni disípulugu, siñá jamuti areídaguagüda.

¹⁷ Ába louñabun Jesúsu.

—¡Güriña mafiñeraditiña, güriña wuríbatiña! ¿Átiribeísan dan lun neréderuni júma lubá gayára lan jafiñerun nuágu? ¿Ídame lagúmucha mafiñeni le jídaanbei? Barüjumei irájü ligía ñájoun.

18 Ábati ladeínjan Jesúsu lun espíritu wuríbati ligía, ába láfuridagüdüni lídaangiñe lúmangiñe óra ligía, ába lareídagun irájü le.

19 Lárigiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbati ligía aságara?

20 Ába laríñagun Jesúsu joun.

—Ladüga lilouguan jafiñen. Ninárün jáu luágu ánjein lan ibíja jubei fe íbini ñúrauráu lan quei ában tágu mostása, jaríñaguba lun wübü le. “Gidába yágiñe, beíba lídoun ámu fulásu”, ábame lagídarun wübü ligía. Úabei ni cáta jásiñerun ánjein ibíja jubei fe le tímatisaati.

21 Ánjeinti jíbe espíritugu ja, láu rügüñein ayúmuraguni lun Búngiu lúma ayúnaruni gayára lan jaságarúniwa.

Ladímurejaanya Jesúsu luágu louñwen

(Mr 9.30-32; Lc 9.43-45)

22 Dan le eíbugeina jamá úara louábawagu Galiléa, ába laríñagun Jesúsu joun luágu ledéregurába lan, ligía le Wügüri Garaúwarügüti, jájaburugun wügüriña wuríbatiña,

23 ábame jáfaruni jílagubei, áni lásaaruba lan lídaangiñe ouweni luágu lürüwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

24 Dan lachülürün Jesúsu jáma láni disípulugu Capernaúm, ába jóudin ja agúburajabalin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

25 Ába louñabun Pédro, ába laríñagun lun.

—Afáyeijati.

Dánti lebélorun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina ubou le, jásan lílana fulásu ódi ja teréncha?

26 Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi moún lumuti lubeíti jafáyeijan, áu le Liraü Búngiu, moún lumuti nafáyeijan tiseínsuna lúban Nüguchi.

27 Lun magáñidagüdün wamá ni ában, beíba, ábame bachúrurun bürünjüre dúnarugun, ábame badígini furúmiñeti úduraü le eígiti bun. Badáriruba ában seínsu liyúmulugu úduraü ligía, buídurügübei lun bafáyeijan wawougua láu, ábame bafáyeiruni.

18

¿Cáteisán weírigutimaabei lídan larúeijan Búngiu?

(Mr 9.33-37; Lc 9.46-48)

1 Lídan dan ligía, ába jayábin disípulugu lúmoun Jesúsu, ába jálügüdüni.

—¿Cáteisán weírigutimaabei lídan larúeijan Búngiu?

2 Ába lanügün Jesúsu ában irájü, ába líchuguni jamídan jámagua,

3 ába laríñagun.

—Nínárün jáu luágu ánjaün lan mayábin lun jítaradun quei irájüñü, mebélubadün lídoun larúeijan Búngiu.

⁴ Ítara líña lubeí, le ñúraüti lanáangun lúngua, ñübin ligía lun ítarabei lan quei ában irájü, ligía weirigutimaabei lídan arúejani le lánina siélu.

⁵ Gürígia gíñe le erésibiruti ában irájü lídan níri resíbi lumúтина gíñe.

Luriban lafigoungüdüniwa ában gürígia

(Mr 9.42-48; Lc 17.1-2)

⁶ ‘Furúmieguarügü le afigoungüdüti ában jádaangiñe ja isérigiñabaña lídan jafiñen nuágu, buitimaati jamúga lun lun lagurúniwa baránajoün láu ában oúnwenbun dübü le amúligüle güráñu luágu ligína sügü láu ladügüni cátei líra.

⁷ ¡Wuríbati lun ubou, níjein lán buri cátei le afigoungüdübaliña gürígia! Súnwandan ñübei lan, áni ¡fugiábu le wügüri le lébunabei!

⁸ ‘Ligía ánjein lubei lafigoungüdübadibu lubei bújabu o bugúdi lan, dürübei, fíbei díse buáriua, buitimaati lun bebélurun siélun májbuga o magúdiga, sügü láu badarún láu biángubei bújabu lúma biángubei bugúdi máfiougatin le ní lubei wátu le méñeguchadibei.

⁹ Ánjein bágu lubei afigoungüdübadibu, sagábei, fíbei díse buáriua, buitimaati lun bebélurun siélun máguga sügü láu badarún láu biángubei bágu máfiougatin.

Jémpulu tuáguti mudún to eféridiruboun

(Lc 15.3-7)

¹⁰ ‘Manúga jumá ni ában jádaangiñe ja ünabugububaña ja quei ni cáta. Naríñajare jun luágu ligíbugiñeñanu lan Núguchi Búngiu le siélubei ánjeligu ja aríjubaña jáu afíñetiña ja súnwandan.

¹¹ Ladúga asálbarei le féridjalibei yebe niábin, áu le Wügüri Garaüwarügüti.

¹² ¿Ída líña jaríjin lun? Ánjein añájein lubei san mudún lúma ában wügüri, teféridira ában jádaangiñe, ¿ma lígirubaña jíbiri luágu wübü, ábame lídin áluajoun to ayúridaguboun?

¹³ Ánjounti ladárra, chouuruti luágu gúndaabei lan táu sügü jáu ja mayúridagunbaña.

¹⁴ Ítara líña gíñeti, mabúseerunti Júguchi Búngiu le siélubei lun lefédirun ni ában jádaangiñe ünabugutiña ja.

Ligáburi ferúdonawa jamá idújeñu lueígiñe Jesucrístu

(Lc 17.3)

¹⁵ ‘Ánjein adúga bidúje ában wuríbani bun, badímureja lúma jábuguarügü, ábame basúbudiragüdüni lidúnrun lun. Ánjein adúga gásu báu, gamádaguayáadün.

¹⁶ Ánjein madügün gásu báu, ábame banügün ában o bián gürígia jánwoun lun sun lan le aríñawagüti, añájein jamámuga ámu geféentiña luágu.

¹⁷ Ánjein madügün gásu jáu, ábame baríñaguni lun jadámurin afíñetiña, ánjein madügün gásu láu adámurini, ábame banügüni quei ában mafíñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburi.

¹⁸ ‘Nínárün jáu luágu le lan cátei le uáguti jaríñaga jugúya díspulugu luágu moun lan jadügüni afíñetiña, ligía gíñe uágubei laríñaga Búngiu luágu siñá lan ladügüniwa, le cátei le uágubei jaríñaga luágu gayára lan ladügüniwa, ligía gíñe le uágubei laríñaga Búngiu luágu gayára lan ladügüniwa.

19 ‘Nariñajare giñe jun luágu ánjaña lan úrada biáma jídaangiñe ya ubouágu lun jamúriajan ában cátei lúma Búngiu le siélubei, líchugubei jun,

20 ladüga le ñi jamuti biáma o úruwa oundaragu lídan níri, anájein ñi jamídaangua.

21 Ába layárafadun Pédro lun Jesúsu, ába lariñagun lun.

—Nabúreme, ¿átiribeísan weíyaasu ladügün nibíri ában wuríbani nun lun ferúduna méme náani? Darí sédú weíyaasu?

22 Ába lariñagun Jesúsu lun.

—Maríñaguntina bun luágu darí lan sédú weíyaasu lúnti ferúduna báani, darí úruwa-wein-díisi weíyaasu sédú.

Jémpulu luáguti músu le májabei ferúduna lan

23 ‘Ligía ítara líña lubei arúejiani le lánina siélu quei ában urúei le ñübinbei lun laráansejan luágu seínsu jáma lumúsuniña.

24 Lagúmesera adúgei, ába janügün ában le adúweirubalin sarágu míñun fiádürü,

25 quei maseínsun lan lun lafáyeijan, ába lariñagun urúei lun lalúgurúniwa idámunime táu sun lúmari, lirájüñü, lúma sun le lúmabei lun lafáyeiruni ladúweijan.

26 Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.”

27 Ába lagúdemedagun lun urúei, ába ferúduna láani ladúweiruni, ába ligiragüdüni.

28 Quei láfuridun músu ligía ñigiñe, ítara ladúnragun lúma ában músu líledi le adúweirubalin átiri fiádürü. Ába lárügüdüni lueigiñe ligína, ába lagúmeserun achócurei, ába lariñagun lun. “Fáyeibeí le badúweirubalina.”

29 Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.”

30 Májati le ában, ñüdünrügü ligía ába ládaruni furísunrugun darí lafáyeiruni ladúweijan.

31 Dan le jaríjinbaalin ja jíbiri músu cátei le, ába lagáridun joun sarágu, ába jóúdin, ába jabájüdaguni lun urúei.

32 Ába louñajan urúei ougei, ába lariñagun lun. “¡Músu wuríbati! Ferúduna numúti sun badúweijan ladüga bayúmuragun nun.

33 Lúnti yebe giñe gudéme lan bouba bun quei bagúdemedun nun.”

34 Ába lagañidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

35 Ába lásurun Jesúsu aríñageina.

—Ítara lúba giñe ladüga Núguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

19

Larúfadajan Jesúsu libügürü ígiraguni

(Mr 10.1-12; Lc 16.18)

1 Lárigiñe lariñaguni Jesúsu sun cátei le, ába lídin Galiléagiñe lun loubawagun Judéa le lueigiñebei oubaü le ñigiñe lubei laboucha wéyu libíti Jordán.

2 Sarágu jáña gürígia afálaruti, ába lareidagugüdüniña sánditiña ñi.

³ Ábati jayábin fiú fariséogu lúmoun Jesúsu áluga jáburugüdüni tídoun sádara, ába jálügüdüni.

—¿Según barítagun, gayáraatísan lígirunun gürígia lúmari lueígiñe furúmieguaügü cátei?

⁴ Ába loúnabun Jesúsu.

—¿Malíjangidün tídan Lerérun Búngiu luágu lúmagiñe lan furúmiñeti dan, dan le ladügünbaliña Búngiu gürígia, adüga lumúti wügüri, adüga würi?

⁵ Aríñagati giñe. “Ligía lígirubei lubei wügüri lúguchi túma lúguchu lun laganóuniwa túma lúmari, ábame jeréderun quei ábanrügü.”

⁶ Mámaaña lubeiti biáma, ábanrügaaña. Ligía moún lubei lafánreinraguni wügüri le ladúnraguaügüdübei Búngiu.

⁷ Ábati jálügüdüni.

—¿Cáti uágu laríñaga lilúrudun Moisés lun lan tíchugúniwa gárada lánina ígiraguni tun würi lun tigrún?

⁸ Ába laríñagun Jesúsu joun.

—Ladüga tidére janígi lánjarunbei Búngiu lun jígiragun jáma júmarigu, máma líña meja furúmiñe.

⁹ Nariñajare jun luágu furúmieguaügü lan le ígirutu lúmari ába lagámaridun ámu, ladügüña adultériu, mámarügaali ligía ladüga tagámaridun ligibuagun, le giñe agámariduti würi to ígiraguaaru, ladügüña giñe adultériu.

¹⁰ Ábati jaríñagun láni disípulugu lun.

—Ánjein itara líña lubei luáguti wügüri túma lúmari, buítimaati lubei lun magámaridun jamá gürígia.

¹¹ Ába laríñagun Jesúsu joun.

—Másutiña gayára jabágaridun mámariga, ja rügüñanu únbaña rújali lan Búngiu ubáfu.

¹² Ámuñegueinarügüti lébuna magámaridun jamá wügüriña, añañein, ítaragubeñanu lúmagiñe jagüriajoún, jíbiri, adügüwarügüti joun, jíbiri, reídeitiña magámaridunga lun jedéregeregun jóungua le gumúti lun jesériwidun lun Búngiu. Le gabáfubei lun magámaridun lan, magámaridalá.

Labíniruniña Jesúsu irájüñü

(Mr 10.13-16; Lc 18.15-17)

¹³ Ába janügüniwa irájüñü lun Jesúsu lun líchuguni lújabu jawágu lúma lun layúmragun lun Búngiu jawágu, ába jagúmeserun disípulugu adeñja joun ja anájabaliña.

¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladüga ja jarúmabaña affiñe quei irájüñü, jagía lílana arúejani le lánina siélu.

¹⁵ Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

Ladímurejan ában wügüri ñütraügili lúma Jesúsu

(Mr 10.17-31; Lc 18.18-30)

¹⁶ Ába lídin ában wügüri ñütraügili aríjei Jesúsu, ába laríñagun lun.

—Maésturu buíti, ¿cásan cátei buíti lúnbei nadügüni lun nibíjini ibágari le magúmchaditi?

¹⁷ Ába laríñagun Jesúsu lun.

—¿Ca uágu bariñaga nun “buíti”? Ában rügüñein buíti, Búngiu. Ánjein busén bubei bibíjini ibágari magúmuchaditi, gúnfulibá lúma gumádi.

18 Ába lariñagun wügüri ligía lun.

—¿Cáteigi buri?

Ába lariñagun Jesúsu lun.

—Máfarajabá, magámaridabá würi gámaritu, míwerujabá, madímurejabá iyéeni luágu ni ában,

19 inébe jamá bagübürigu bun, jínsiñe jagíame gürígia bíledigu bun quei bínsiñegua búngua.

20 Ába lariñagun lun.

—Gúnfuli numúti sun le lúmagiñe ñúraügidina, ¿cági ámu nemégeirubei?

21 Ába lariñagun Jesúsu lun.

—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibíjin irisini siélu, ábameti bíábin, ábame bafálarunina.

22 Dan lagáambunbalin wügüri ligía cátei le, májati, ladüga weíribalin Jesúsu cába lan ladügti lírisin, ába lídin láu íruni.

23 Ábati lariñagun Jesúsu joun láni disípulugu.

—Nínárün jáu luágu jénreengu lan lun lebéllurun ában rísiti lídoun arúejiani le lánina siélu.

24 Ariñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügü láu lebéllurun ában rísiti lídoun arúejiani le lánina siélu.

25 Dan jagáambuni disípulugu cátei le, ába laweíridun jan-balin Jesúsu cába lan ladügi sarágu, ába jálügüdagun jámagua.

—¿Cáteiti gayáraabei lasálbarun?

26 Ába lariñaguniña Jesúsu, ába lariñagun joun.

—Siñáti jasálbaragun gürígia jóüngua, ánjein Búngiu, gayára lumúti sun cátei adüga.

27 Ábati lariñagun Pédro lun.

—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

28 Ába lariñagun Jesúsu joun.

—Nínárün jáu luágu lídan lánme dan ligía dánme iséri lan sun cátei, dánme le nañúurun, áu le Wügüri Garaúwarügüti luágu nála yágüta siélu lun narúejian láu sun nuweírigun, jugúya le afálarubalina jañúuruba gíñe luágu dúusu jalaü lun jagúseragüdüniña dúusugubei láni Israél türíbu.

29 Súnti ja ígiraañábaña jában, o jamúleno, o játunu, o jagübürigu, o jasáanigu, o jamúan, nuágu, jerésibiruba san weíyaasu lánwoun, resíbi Jameime ibágari magúmuchaditi.

30 Áni sarágu jáña ja furúmiñetiñábaña guetó, jagíaba agúmujóuni, sarágu ja agúmujóunibaña guetó, jagíaba furúmiñe.

20

Jémpulu jawáguti ñadágimeintiña

1 Ába lariñagun Jesúsu.

—Ítara líña arúejani le lánina siélu quei ában labúreme ichári le áfuridubei bináafingua áluaja ñadágimeintiña lun talúbajoún linádirigu.

² Ába ladügün darádu jáma ñadágimeintiña lun líchugun fiádürü joun luágu wéyu, ába loúnajaniña ñadágimein lichárirugu.

³ Lárigiñe, ábaya láfuridun quei buri ladaünrún néfu bináafin, ábaya ladárirun ámu wügüríña mafísiutetiña, mágidirugu.

⁴ Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” Ába jóudin.

⁵ Ábaya láfuridun amídirugu, furí ligía ladaünrún ürüwa rábounwéyu, ligía méme ladüga.

⁶ Quei buri ladaünrún seíngü rábounwéyu, ábaya lídin mágidirugu, ábaya ladárirun wügüríña mafísiutetiña ñi, ába laríñagun joun. “¿Cásan uágu yá jubei sun wéyu mawádigimariga?”

⁷ Ába jariñagun lun. “Úagili ni ában álugutiwa.” Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.”

⁸ Dan le lagüñedunbei, ába laríñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujoúni, bagúmuchame jáma ja atátirubaña furúmiñe.”

⁹ Ábati jayábin ja atátirubaña ñadágimein quei buri ladaünrún seíngü rábounwéyu, ába jibíjin fiádürü cáda ában.

¹⁰ Lárigiñe, dan le lachülürün jadáani ja atátirubaña furúmiñe, ába jarítangun luágu gibetimaabei lan jabíjin. Ába gíñe jabíjin fiádürü cáda ában.

¹¹ Dan le jerésibiruni jaseínsun, ába magúndan jamá lúma labúreme ichári,

¹² ába jariñagun. “Ja ñubinbaña agúmujoúni, ában rügüñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísuga sun wéyu.”

¹³ Ába loúnabun labúreme ichári, ába laríñagun lun ában jádaangiñe. “Numáda, máma nadügüña ni murúsun marichaü jun. ¿Ma funági luágu ában fiádürü jadüga darádu núma?”

¹⁴ Barújumei jiseínsun, jeíba. Nafáyeiruñanu ja atátirubaña agúmujoúni quei nafáyeirunün ladüga ítara líña lan nabúseerun.

¹⁵ ¿Maríchatina funági lun nadügüni le nabúseerun láu niseínsun? ¿Ódi gimúgatün ladüga nubúidun?”

¹⁶ Ítara líña lubeiti, sarágu jáña ja agúmujoúnibaña guetó, jagíaba furúmiñetiña, sarágu jáña gíñe ja furúmiñetiñañaña guetó, jagíaba agúmujoúni. Ladüga sarágu jáña agúarútiña áni míbetiña anúadirútiña.

*Ladímurejaanya Jesúsu luágu loúnwen
(Mr 10.32-34; Lc 18.31-34)*

¹⁷ Dan le niján lan Jesúsu luágu úma lun Jerusaléoun, ába ladíñurun jáu lání dúusu disípulugu jawei ja jíbiri gürígia ja luágubaña úma úara jáma, ába laríñagun joun.

¹⁸ —Quei lubei jaríjini, aweínreina wáña Jerusaléoun le ñíba lubei nedéregerúa, áu le Wügürí Garaüwarügüti, joun jábutigu jafádirigun juríu lúma joun arúfudajatiña lilúruden Moisés, ja lúnbaña jasiadirunína lun noúnwen.

19 Ábame jederegerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lídaangiñe ouweni luágu lürüwan wéyu.

*Le tamúriajabei jáguchu Jacóbo láu Juan lúma Jesúsu
(Mr 10.35-45)*

20 Ábati tiábin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleísei lúma.

21 Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe bouñwenren, ában lueígiñe bubaúna yágüta lídan barúejan.

22 Ába laríñagun Jesúsu joun.

—Íbidiñeti jun ca lan jamúriajabei. ¿Gayáraati jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

Ába jariñagun.

—Gayára wabeí.

23 Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun lueígiñe nouñwenren lúma lueígiñe nubaúna, máma áu lúnbei níchuguni, líchugúaba joun ja ubáabaña laráanserei Búngiu.

24 Dan le jagáambunbalin jíbiri díisi disípulugu cátei le, ába jagáñidun jáma bián amúlenugu jagía.

25 Ába lagúarun Jesúsu joun, ába laríñagun joun.

—Queisi jasúbudiruni, ja agúmadijabaña jádan ja mámabaña juríu arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu.

26 Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri.

27 Furúmieguaügü jádaangiñe le abúseeruti lun ligíaba lan furúmiñeti, lúnti idámuni lan joun jíbiri

28 Ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégime jasálbarun sarágu.

*Lareídaguaügüdin Jesúsu bián maríjintiña
(Mr 10.46-52; Lc 18.35-43)*

29 Dan le áfurideina jabeí Jesúsu jáma láni disípulugu Jericógiñe, sarágu jáña gürígia afálaruti Jesúsu.

30 Níñanu bián maríjintiña ñun láru üma, dan le jagáambun luágu Jesúsu lan le ásügürübei, ába jagúaragun.

—¡Wabúreme, ladúgawagun David, gudéme wamá bun!

31 Ába jadeínjan gürígia joun lun jámanichun, ligiatima jagúaragun.

—¡Wabúreme, ladúgawagun David, gudéme wamá bun!

32 Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadügün jun?

33 Ába jariñagun lun.

—Wabúreme, buséntiwa waríjin.

³⁴ Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

21

Lebélurun Jesúsu Jerusaléoun (Mr 11.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachúlürün ligibugiñe fulásu le gírubei Betfajé, le únabubei libíti wúbü le Olívos,

² ába lariñagun Jesúsu joun biáma jádaangiñe láni disípulugu.

—Jeiba lídan liraúraü fulásu le wagíbugiñebei, jádáriruba ában burígü güráñu ñi láu ában liraúraü burígü túma, ábame jafáragaduniña, ábame janügüñiña nun.

³ Ánjein ñi adímurejati jun lueigiñe jadügüni, ábame jaríñagun lun luágu busén lániña Jesúsu, luágu láguyugüdübaña lan.

⁴ Lasúseredunbei líra lun lagúnfulirun lé meja lariñagubei proféta dan le labürüjanbei itara.

⁵ Aríñaga jumá lun ubúругu Sión.

“Niteín Burúeite bun láu únabuni,

wariñu lanágawagu ában burígü,

wariñu luágu ában liraúraü burígü, anímaalu anájati íläü.”

⁶ Ába jóúdin disípulugu, ába jadügüni quei lariñaguni Jesúsu joun.

⁷ Ába janügünun burígü tugúya láu sun tiraü, ába jíchugunun janáangun jawágu, ába lawárirun Jesúsu.

⁸ Sarágu jañáti gürígia, ába jábudunun janáangun luágu úma, jíbiri, ába jáchuajan tilímun wéwe, ába jíchaajani luágu úma.

⁹ Dándu gürígia ja ubáraübaña quei ja árigibaña, ába jagúmeserun agúaraja.

—¡Uweiriguni lun ladügawagun urúei Davíd! ¡Biníwati wügüri le ñübinbei lídan líri Wabúreme Búngiu! ¡Uweiriguni lun Búngiu!

¹⁰ Dan lebélurun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisán gürígia le?

¹¹ Ába jaríñagun gürígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünnun Jesúsu témpulu (Mr 11.15-19; Lc 19.45-48; Jn 2.13-22)

¹² Láriigiñe, ába lebélurun Jesúsu tídoun láni Búngiu témpulu, ába labúgaguniña sun alúgurajatiña jáma agáñijatiña ja ñíbaña. Ába lagáragaguni dábula buri le jadábulan asáansijabaña seínsu ñi joun gürígia, lúma jála ja alúgurajabaña únjun.

¹³ Ába lariñagun joun.

—Lariñajare Búngiu tídan Lerérun. “Núban fulásu le ñi lubei gayára lan jayúmragun gürígia nun”, ánjein jugúya, barü jumaaru quei jában jíwerutiña.

¹⁴ Ába jayábin fiú maríjintiña jáma danímaatiña lúmoun Jesúsu ñi témpulurugu, ába la Reidaguagüdüniña.

¹⁵ Dan le jaríjinbaalin jábutigu fádirigu jáma arúfudajatiña lilúruden Moisés miláguru buri le ladáagubei, lúma dan le jagáambuni jagúarajan irájüñü témpulurugu. “¡Uweiriguni lun ladügawagun urúei Davíd!”, ába jagáñidun.

¹⁶ Ába jaríñagun lun Jesúsu.

—¿Agáamba bumútisan le jaríñagubei ja?

Ába lariñagun Jesúsu joun.

—Ánja, agáamba numúti. ¿Malíijan jumágili tídan Lerérun Búngiu le ní lubei lariñawagüa lun Búngiu.

Adügaadibu lun jerémujan ñübürigiña jáma irájüñü ja machülaagiña, cátei buíti buágu?

¹⁷ Ába lígiruniña, ába lídin ubúrugugiñe lun Betánioun, ába lásügürüni árieibu ñi.

Líñaragunun Jesúsu tídibu ígo to múnbound

(Mr 11.12-14, 20-26)

¹⁸ Larúgan bináafin, dan le lagíribudun Jesúsu ubúrugun, ába lalámachun.

¹⁹ Ába larijin ában tídibu ígo lárú üma, ába lídin tuágun, madáriti ni cáta tuágu lueídügüya ubánaü. Ába lariñagun tun tídibu ígo tugüya.

—¡Magíindadügüyabá!

Lídan óra ligía ába tásaürün.

²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñásan tásaürübei tídibu ígo to ítara ófun?

²¹ Ába lariñagun Jesúsu joun.

—Ninárün jáu, ánjaün afiñe le gumúti, mámarügübei líbe le nadügübei tun tídibu ígo to gayára jumá adüga, gayáraabei jaríñagun lun wübü le. “Gidába yágiñe, dabúba baránajoun”, ábame lasúseredun.

²² Súnme giñe cátei le jamúriaian lúma Búngiu, ánjein afiñe jubei, jibíjubei.

Lubáfu Jesúsu

(Mr 11.27-33; Lc 20.1-8)

²³ Ábati lebélorun Jesúsu témpulurugun, dan niján lan arúfudaja ñi, ába jayábin jábutigu fádirigu jáma wügüríña ábutigu lídan jaffñen juríu, ába jaríñagun lun.

—¿Ariñagabei woun ca lan biríchabei lun badügüni cátei le? ¿Ca íchugubalin ubáfu le bun?

²⁴ Ába lariñagun Jesúsu joun.

—Nálügüdaadün giñe ában cátei, ánjein jóunaba nun, ábame naríñaguni jun ca lan áu ubáfu nadügei buri cátei le.

²⁵ ¿Ca óunajabalin Juan abásteragüdaja? ¿Búngiu, ódi wügüríña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, lariñaguba woun ca lan uágu mafíñerun wabei lun.

²⁶ Ánjawa aríñaga luágu jóunajan lan wügüríña, jóuserubadiwa gürígia wuríba ladüga súngebubei afíñetiña luágu proféta lán.

²⁷ Ábati jaríñagun lun Jesúsu.

—Ibídíñeti woun.

Ába giñeti lariñagun joun.

—Maríñagun nubei giñeti jun ca lan áu ubáfu nadügei buri cátei le.

Jémpulu jawáguti bián isáanigu

²⁸ Ába lariñagun Jesúsu joun.

—Nabájüdaguá ában cátei jun, jaríñageime nun ída líña lan jaríjin lun. Ñíñein ában wügüri, biámañanu lisáanigu. Ába lariñagun lun ában jádaangiñe. “Niraü, beíba ñadágimein ugúñe lídan talúbajoún ninádirigu.”

²⁹ Ába lariñagun lisáani lun. “Mabúseeruntina nídin.” Lárigiñe, ába lasáansiragun laritagun, ába lídin ñadágimein.

³⁰ Lárigiñe, ába lídin úguchili aríjei le ában, aríñageinaleí le méme lariñagubeí buga lun le furúmiñeti lun. Ába loúnabun le. “Ánja, nídiba.” Mídinti.

³¹ Aríñaga jumeí nun, ¿cági jádaangiñe biángubei adügübalin le labúseerubei úguchili?

Ába jaríñagun.

—Le furúmiñebei.

Ábati lariñagun Jesúsu joun.

—Nínarün jáu luágu chóurutima lan jebélurun agúburajatiña liseínsuna gumádi jáma jórgu lídoun larúeijan Búngiu sügü jáu,

³² ladüga ñübinti Juan le abásteragüdejabei arúfudaja jun ída lúba lan ligáburí jabágaridun, mafiñeruntün lun, ánjañati ja agúburajabaña liseínsuna gumádi jáma jórgu, afíñeratiña lun. Jugúya, láu sun aríja jumáni sun líra, masáansiragunti jigáburí lun jafíñerun lun.

*Jémpulu jawáguti ñadágimeintiña ja wuríbabaña
(Mr 12.1-12; Lc 20.9-19)*

³³ ‘Agáamba jumeí ábaya jémpulu le. Luáguti ában wügüri labúreme ában ichári, ában lábunagun tídibu beíbei lichárirugu, ába ladügün barieru láu, adüga ligía ában ágei lun laríbachawagún tíra beíbei lídoun lúma ában wáyelesi lun gayára lan loúnigiruni sun cátei.

‘Ába lájayajani ichári joun ñadágimeintiña, ába lídin adüga weíyaasu.

³⁴ Dan le lachülürün dan lun alúbajani, ába loúnajan jádaangiñe lumúsuniña amúriajei lufánran jámagiñe ñadágimeintiña.

³⁵ Ábarüga járügdüniña ñadágimeintiña músu jagía, buleísei jameí ában, áfara jameí ában jilágubei, rúgua jagía dübü luágu le ában.

³⁶ Ábaya loúnajan labúreme ichári gíbetimaaña sügü jáu ja loúnajabaña furúmiñe, ligía méme jadüga ñadágimeintiña joun.

³⁷ ‘Agúmujóuni, ába loúnajani liraü, ába lariñagun lúnguarügü. “Inébebei niraü joun.”

³⁸ Dan le jaríjinbaalin ñadágimeintiña liraü, ába jaríñagun jámagua. “Nijánba le erésibirei alágan, wáfaraali jilágubei, reídei wamámuga láu alágan.”

³⁹ Ábati járügdüni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdajan Jesúsu.

—Dánmeti liábin labúreme ichári, ¿cábagi ladüga jáu ñadágimeintiña ja?

⁴¹ Ába jaríñagun lun.

—Láfaragubaña wuríbatiña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntiña jedéreggeruni lufánran lun lídaangiñe alúbajani lídan dan.

⁴² Ábati lariñagun Jesúsu joun.

—¿Malíjaña ja jumágiru Lerérun Búngiu? Taríñajare nuágu.

Le meja dübü le mabúseerun jabeí ábunagutiña, ligíaali furúmiñeti.

Wabúreme Búngiu adügübalin lun furúmiñebei lan,

áni aríja wamúti quei ában cátei weírigitu.

⁴³ Ligía nariñagunbei jun luágu lagídarúaba lan larúeijan Búngiu jueí, jugúya le weírigubei lídan jafíñen juríu, ábame líchugúniwa joun gürígia ja edéregeruti alúbajani le láni larúeijan Búngiu.

⁴⁴ Ánjeinti áu, le dübü ligía, furúmieguarügü le eíguaduti nuágun lañaürudagúba, léti uáguti leíguada nigáñi, lagúmuchaguagüdübei. Ligíaba asúsereda joun gürígia ja májabaña nun.

⁴⁵ Dan le jagáambunbalin jábutigu fádirigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja.

⁴⁶ Ábati jabúseerún yebe járügüdüni, madügün jamúti ladüga janúfude jawei gürígia, ladüga affíne jamá gürígia luágu proféta lan.

22

Jémpulu luáguti maríei

¹ Ábaya lagúmeserun Jesúsu adímureja joun láu jémpulu, ába laríñagun joun.

² —Nijánya ában jémpulu luáguti arúeijani le lánina siélu. Níñfein ában urúei adügüti ában fédu lubá lamárieidun lisáni.

³ Ába louñajaniña lumúsuniña ougaña amísurajoútiña, májatiña amísurajoútiña jayábin.

⁴ Ábaya louñajan ámu músu, ába laríñagun joun. “Aríñaga jumá joun amísurajoútiña luágu aráanseeli lan eíginí. Áfaragüda náaña bágasu jáma nilügüniña anímaalugu dibúnetiña, aráanseeli sun cátei, lun jayábin maríeirugu.”

⁵ Madügüntiña amísurajoútiña gásu. Ába lídin ában jádaangiñe lichárigu, ñüdüñ ában adüga ámu wadágimanu,

⁶ ja jíbiri, ába járügüdüniña lumúsuniña urúei, ába jóuseruniña wuríba, ába jáfaraguniña jilágubei.

⁷ Ábati lagáñidun urúei sarágu, ába louñajaniña lisúdaaranigu áfaraguaña gáfarajatiña jagía jilágubei lúma águdei jageíra.

⁸ Ába laríñagun joun lumúsuniña. “Aráanseeli sun cátei lun maríei, áni amísurajoútiña jagúra madúnamatiña lun jamísurajoúniwa.

⁹ Jeíba lubeíti luágu buri larígei úma, ábame jamísurajaniña sun ja úmatiña jadúnragua.”

¹⁰ Ába jóudin músu luágu buri úma, ába jóúndaruniña sun ja úmabaña jadúnragua, buítiña jáma wuríbatiña, ába tabuínchun múna jáu gürígia.

¹¹ ‘Ábati lebéllurun urúei aríjaña amísurajoútiña, ába laríjin ában wügüri le madáuragunti quei lun ában maríei ñi.

¹² Ába laríñagun lun. “Numáda, ¿ída liñági bebéllurunbei ñájoun madáuragunga quei lun ában maríei?” Maní ligía.

¹³ Ába laríñagun urúei joun ja eténirubaña lún buri dábula. “Gürágua jumeí lugúdi lúma lújabu, fíjumei lídoun lubúriga le bougudibeí, le ñíba lubeí layájua, acúnrijame lári.”

¹⁴ Ába laríñagun Jesúsu joun ja agáambubalin.

—Gíbetiña agúarútiña lun jebéllurun lídoun larúeijan Búngiu, míbetiña anúadiruña.

*Luáguti lafáyeirun liseínsuna gumádi
(Mr 12.13-17; Lc 20.20-26)*

15 Ába jóudin fariséogu, ába júaradun aríja cába lan gayára lan jadügün lun jariñagagüdüni Jesúsu cátei le uáguti gayára lan jadárirun lidúnrun.

16 Ábati jóunajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan bariñagubei, luágu giñe arúfuda báani lémeri Búngiu láu inárüni, manúfudeiga luei ni ában, ladüga ni cáta lan luewirigun gürigia bun.

17 Rúbei lubeiti bariñagun woun. ¿Búitisan lun lafáyeirúniwa seínsu lun urúei Rómána ódi mabuíduntí?

18 Ariágu líña Jesúsu lun luríba jayúmajan, ába lariñagun joun.

—¿Biángua tigíbu jugúya le! ¿Ca uágu jíchaaja sádara nubá?

19 Arúfuda jumei seínsu le áubei lafáyeijoúa liseínsuna gumádi nun.

Ába janügün ában seínsu le denáriu lun.

20 Dan larijini, ába lálügüdüniña.

—¿Ca iyáwa le luágubei seínsu le, lúma íri le bürüwañubei luágu?

21 Ába jariñagun lun.

—Láni urúei Rómána.

Ábati lariñagun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

22 Dan jagáambunbalin le, ába laweíridun janígi, ába jígiruni, ába jóudin.

Álügüdajani libügürü ásaaruni lídaangiñe oúweni

(Mr 12.18-27; Lc 20.27-40)

23 Wéyu méme ligía, ába jóudin fiú saduséogu aríjei Jesúsu. Jariñajare saduséogu luágu úa lan ásaaruni lídaangiñe oúweni. Ábati jariñagun lun Jesúsu.

24 —Maésturu, aríñagati meja Moisés luágu ánjein lan oúwe ában wügüri le maríeiti masáaniguga táu lúmari, lúnti lan lamárieidun lamúlen túma würi to ueíbouton louwe, lun gasáanigu lan táu lun líbugaña le oúwebei.

25 Wel, ñíñanu méjati sédü gamúlenuguátiña ya wádan, ába lamárieidun le furúmiñeti, ába louñwen. Quei masáanigu lubei táu lúmari, ába lígirunun lun lamúlen.

26 Ligía méme suséreti lun jabíaman, lárigiñe lun jürüwan darí lúmoun jasédün.

27 Lárigiñe, ába giñe toúnwen würi.

28 Dánmeti jásaarun lídaangiñe oúweni, ¿cábati úmari würi tugúya jádaangiñe sédü gamúlenuguátiña ja, lárigiñe maríei jamá sun jagía túma?

29 Ába lariñagun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu.

30 Dánme le jásaarun jiláaña lúnya jabágaridun, ámulalime jabágari, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

31 Ánjeinti luágu sará jamá jiláaña lúnya jabágaridun, ¿malíjan jumágili le lariñagubei Búngiu gúanarü jun? Ítara líña lariñagun.

32 “Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeiti, ánjein jamúga jiláañu jáña lubei wügüriña jagía lun sun dan, mariñagunti jamúgati Búngiu luágu Jabúngiute lan, ladüga máma Jabúngiute jiláguaaña Búngiu, Jabúngiute wíñwangiña.

33 Dan jagáambunbalin güriǵia cátei le, ába laweíridun janíǵi láu le larúfudajabei.

*Gumádi le weírigutimaabei
(Mr 12.28-34)*

34 Dan le jasúbudirunbalin fariséogu luágu maníǵüda láaña lan Jesúsu saduséogu, ába jóúndaragun,

35 níñein ában jádaangiñe le arúfudajati lilúrudun Moisés, abúseeruti laríǵin lábun Jesúsu, ába laríñagun lun.

36 —Maésturu, ¿cásan gumádi weírigutimaabei lídan lilúrudun Búngiu?

37 Ába laríñagun Jesúsu lun.

—“Jínsiñelá Babúreme Búngiu bun táu sun baníǵi, táu sun buwáni, láu sun bisáminan.”

38 Niján gumádi weírigutimaabei, furúmiñeti gíñe lídaangiñe sun lugúmadin Búngiu.

39 Áni le libíaman lídan uweíriguni lenége le, ítara líña. “Jínsiñe jamá bíbirigu bun quei bínsiñegua búngua.”

40 Bián gumádi le, ligía ébuubei lun sun lilúrudun Moisés lúma jarúfudajan profétagu.

*¿Ca adüǵawagun Crístu?
(Mr 12.35-37; Lc 20.41-44)*

41 Sun añája lan fariséogu oúndaragu,

42 ába laríñagun Jesúsu joun.

—¿Cásan jaritagubei libüǵürü Crístu le lanúadirubei Búngiu lun lasálbaruniña güriǵia? ¿Cásan adüǵawagun?

Ába jariñagun lun.

—Ladüǵawagun Davíd.

43 Ábati laríñagun Jesúsu joun.

—¿Ída líñáti lagúarunbalin Davíd quei Abúremein, láu lubáfu Sífiri Sándu? Aríñagatiga Davíd.

44 Laríñajare Búngiu lun Nabúreme.

“Ñurúba núma lueíǵiñe noúnwenren daríme níchuguniña báganiñu bújaburugun.”

45 ¿Ída lubáti ladüǵawagun lan Davíd Crístu ánjein wá lubali Davíd guánarü Crístu Nabúreme?

46 Úati ni ában gayáraati loúnabun ni ában dimúrei, lúmagiñeti wéyu ligía, manígiti ni ában lun liábin álüǵüdaguei.

23

*Líchugun Jesúsu jadúnrun fariséogu jáma arúfudajatiña lilúrudun Moisés
(Mr 12.38-40; Lc 11.37-54, 20.45-47)*

1 Ábati laríñagun Jesúsu joun láni disípulugu jáma jíbiri güriǵia ja níbaña.

2 —Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés.

3 Agáamba jumáña lubeíti, adüǵa jumeíme sun le jariñagunbei jun, le jadüǵübei, mafálara jumei ladüǵa aríñagatiña ában cátei, jadüǵa ámu.

4 Rújamuti gumádi joun gürígia queísi anügüni jürüti le siñábei lanügüniwa, ánjein jagía, madügüntiña ni cáta lun jíderaguniña gürígia luágu buri anügüni lánina lúrudu le jichugubei jawágu.

5 Jadügüni sun cátei lun jaríjiña gürígia. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarüna, lúma lun jadáuragun anáanguni to durúrutu.

6 Buséntiña jarügüdüni lubuidun-ágei ubáraü lídan eíginí lúma jalaü le jala weírigutiña tídan jalígílisin.

7 Buséntiña lun jabúsurun gürígia joun láu sarágu inébesei úmada, lun gíñe lagúarúniwa joun, “maésturugu”.

8 ‘Ánjein jugúya, migira jumá lun laríñawagúniwa jun, “maésturugu”, ladüga sun jugúya ában jáu, áni ában rügüñein gíñe Jumaésturun, áu le Crístubei.

9 Maríñaga jumá gíñe “núguchi” lun ni ában wügüri ubouágu lídan ligáburi jagúaruni Búngiu le siélubei “Núguchi”.

10 Mígirun jugúyame lun laríñawagúniwa jun “ábutigu” ladüga Crístu rügüñein Jábuti.

11 Le esériwidubei joun jíbiri, ligía weírigutimaabei jídan,

12 ladüga le anáanguti lúngua weíri, lünabudagüdúwaba, ánjein le anáanguti lúngua únabu, laweíridagüdúwaba.

13 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu!, ladüga darú jumuti lubéneri arúejani le lánina siélu lueí jebélurun ámu, mebélú jugúyati, mígirun lun jebélurun ja busénbaña jebélurun.

14 ‘¡Fugiábugu jugúya, arúfudajatiña lilúrudun Moisés jáma fariséogu! ¡Biángua tigíbu! Gídá jumutu jában wúríña ja jiláañña úmari jaweí, lúnti ibídiñewa lan, ába jadáagun ayúmuraguni lun Búngiu le migínaguti. Ligía weíritimaabei lubeí jasúfurirun lueígiñe.

15 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Eíbuga jumúti múa, áfayaja jumeí barána áluaja gürígia lun jánigume, dánti le ibíja jumáli le jabúseerubei, ába jadügüniña gürígia jagía bián weíyaasu lúntima jóudin máfiougati sügü jáu.

16 ‘¡Fugiábugu jugúya, adúndejatiña maríjintiña! Aríñagatün luágu le lan gürígia ichuguti dimúrei, ánjein áfiñura tuágu témpulu mála lan líra, áni ánjein lan áfiñura luágu tigóluna témpulu, aná lan líra, lúnti lan lagúnfulirun.

17 ¡Ibídíougua líña jáu, maríjin! ¿Cági weírigutimaabei, gólu ódi témpulu to adügúboun lun sagraubei lan gólu?

18 Aríñagatün gíñe luágu ánjein lan íchiga gürígia dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragüdúwabei luágu latárü, aná lan líra, lúnti lan lagúnfulirun.

19 ¡Ibídíougua líña jáu, maríjin! ¿Cági weírigutimaabei, cátei le luágubei latárü ódi latárü le adügúbalin cátei ligía lun sagraubei lan?

20 Le áfiñurubei luágu latárü, máma rügüñein luágu latárü láfiñurun, láfiñuruña gíñe luágu sun le ligíbuagubei latárü.

21 Le gíñe áfiñurubei tuágu témpulu, máma rügüñein gíñe tuágu témpulu láfiñura, láfiñuruña gíñe luágu Búngiu le aganoúbei tídan.

22 Le gíñe áfiñurubei luágu siélu, láfiñuruña gíñe luágu lála Búngiu, lúma gíñe luágu Búngiu le añúurubei luágu jalaü ligía.

23 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün dísi fáreinti láu jíduru le ménta, anísi, lúma comíno

lun jíchugun ában fáreinti lun Búngiu, áni mebéresentün láu arúfudajani le weírigutimaabei lídan lilúrudun Búngiu, quei buri lun jadügüni sun cátei láu úraguni, lúma lun jagúdemedun gürígia jun, lúma lun jagúnfulirun lúma Búngiu. Ligía buri cátei le lúnbei jadügüni, mígirunga jumeíme jadügüni le líbiri.

24 ¡Jugúya, adúndejetiña marijintiña jugúya le, áseija jumúti ában minímini áni julútün ában caméyu!

25 ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün lun jarítagnun gürígia luágu buídu lan jigáburu. Ítara jíña quei wéru lúma asíedu le jachíbubei bougudigiñe libíti, ánjein múnadagiñe jibíti, buin jíña láu buri luweínamu-águu lúma íweruni.

26 Fariséogu marijintiña. jarúmáguđa jumei wéru lúma asíedu lurágeirugugiñe furúmiñe, ábame giñe larúmadun bougudigiñe libíti.

27 ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíña quei umúajaü le afeíndijoúti láu jarúti bougudigiñe libíti, buídumeraüti larijín, ánjein lurágeirugugiñe, buín líña láu jábu jiláaña lúma sun luwúyeri iwíyei.

28 Ítara jíña, bougudigiñe jibíti, ma lubuídun jarijiniwa jagíbugiñe gürígia, ánjein múnadagiñe, buín jíña láu iyéerejabuni lúma wuríbanu.

29 ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dübü arítaguagüleme luágu jamúaja profétagu, wédegüđa jumei umúajaü le jáni gürígia já meja buídubaña.

30 Ábati jariñagnun. “Lun jamúga meja awánjeinjadiwa lan le jadáani binádu wagübüriagu, míderagnun wamútiña jamúga áfaraguaña profétagu.”

31 Láu líra, subúdiagnatün júngua luágu jádaangiñetün lan ja áfaragubaliña profétagu jagía.

32 ¡Gumújumeiti jadügüni lé meja jagúmeserubei binádu jagübüriagu adüga!

33 ¡Jéwegu! ¡Jarásan jéwegu! ¿Ída lubásan jeséfurun luei asúfuriruni le lánina máfiougati?

34 Ligía nouñajaba lubei profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe, dágua jumáñame jíbiri luágu gurúwa, bei jumáñame jíbiri tídan jalígilisin juríu, eíbaaja jumáñame lídan sun fulásu.

35 Ítara lúba láburujan dúru juágun luágu sun jítaü le áwiyurubei jádaangiñe sun wügüríña buítiña ja jáfarawagúbaña, lúmagiñe meja Abél le richáguabei dari lúmoun Zacarías, líraü Berequíás lé meja jáfarubei tabádinagua témpulu lúma latárü.

36 Ninárün jáu luágu láburujaba lan dúru jawágun gürígia ja lánina dan le luágu buri sun cátei le.

*Layájun Jesúsu jawágu lílana Jerusalén
(Lc 13.34-35)*

37 ¡O jugúya Jerusalénna! ¡Áfaragua jumáaña profétagu, chügua jugúya dübü jawágun ja louñajabaña Búngiu láu ugánu buíti jun! ¡Sarágu weíyaasu nálugun natouñigirunün quei tatoñigiruniña gáyu tirájñü lábugiñe tarúna, májatün!

38 Ígira láadün Búngiu,

39 áni naríñajare jun luágu marijindügüya jumáadina lan queisi jasálbaragüle daríme lachülürün dan lun jariñagnun. “Biníwati le ñübinbei lídan líri Wabúreme Búngiu.”

24

Laríñagun Jesúsu luágu tagünrinchawagúba lan témpulu
(Mr 13.1-2; Lc 21.5-6)

¹ Dan le láfuridun Jesúsu témpulurugugiñe, leibuga yebe, ligía jayábin láni disípulugu lúmoun, ába jaráfudun tuágun témpulu lun.

² Ába laríñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dübü ligíbuagu dübü, tagünrinchawagúba sun to.

Seíni buri lubáragiñe lagúmuchun ubou
(Mr 13.3-23; Lc 21.7-24, 17.22-24)

³ Ábati jóudin luágu wübü Olívos, dánti ñun lan Jesúsu ñi, ába jóudin láni disípulugu agülülüja lúma, ába jaríñagun lun.

—Buséntiwa lun baríñaguni woun ídaba lan tagünrinchawagúa témpulu. ¿Cába liseíni bagíribudun ubouágun, lúma lagúmuchagüle?

⁴ Ába laríñagun Jesúsu joun.

—Toúnigi jumá lun úa lan ayéedutün,

⁵ ladüga sarágujaba ñübintiña aríñageina. “Áu Crístubei”, áni sarágujaba jayéedun.

⁶ Jugúya jagáambuba lamúri wuribu yaráfa jun lúma ugánu luáguti buri wuribu díseti jueí, manúfudedagua jumá. Lúnti ítara lan, mámagilíme lagúmuchagüle ubou líra.

⁷ Lageíndaguba ában ageíraü lúma ában, lawúribujaba ában fulásu lúma ában, ñíbei ilámaü, sándi, járabaganáli lídan sarágu fulásu.

⁸ Sun líra lagúmesejarügügili le lúnbei lasúfurirúniwa.

⁹ ‘Jugúyati, jedéregerúaba lun lúruđu lun jasúfurirawagüdü, lun giñe jáfarawagúniwa jilágubei, jiyéeregudúba lun sun ubou nueígiñe.

¹⁰ Lídaanme dan ligía, sarágujaba eféridiruti jajíñen nuágu, ábame jeyéeregudün jóuniwagua, ábame jalúguragun jóuniwagua.

¹¹ Jachülaaguba sarágu yéetiña aríñaga luágu profétagu jamá áni sarágujaba gürija jayéedun.

¹² Ñíbei sarágu wuríbani daríme lun jeféridiruni sarágu jádaangiñe lánigu Búngiu ínsiñejabuni jádaangua.

¹³ Le asígiruti derégüdagu darí lúmoun lagúmujoún, lasálbarúba.

¹⁴ Lapúrichijoúba ugánu buíti le luáguti larúeijan Búngiu lídan sun ubou lun lasúbudirúniwa lídan sun fulásu, ligíaalímeti lagúmuchun ubou.

¹⁵ ‘Abürüjatí meja proféta Daniél luágu cátei iyéereguti le gagünrinchaguagüdadíbei, dánme le jaríjin chülüjali lan cátei le lídoun fulásu le sánduti—le alíjabei, gunfaráandalá—,

¹⁶ jámeti Judéabaña, lúntime janúrajan luágun buri wübü.

¹⁷ Léme tábulugubei lúban wéyu ligía, marárialá aságara ni cáta múnadagiñe,

¹⁸ le áraabubei, magíribudalá ni abúdon lanáangun.

¹⁹ ¡Fugiábugume würiña ja dageínatiña o ja lan gasáanigutiña ja gurágiña lídounme wéyu ligía!

²⁰ Anúriaja jumá lúma Búngiu lun máma lan lídan lídíliga ni lídan luwéyuri eméraaguni janúraja.

²¹ Ladüga ñíbei sarágu súfuri le úagili líbe lúmagiñe lagúmeserun ubou, úabei giñe lárigiñe.

²² Lun jamúga madúraagun lubei lan Búngiu dan ligía, úati jamúga ni ában asálbaruti, ladúraagubei jawágurügü ja lanúadirubaña lun lánigu jamá.

²³ ‘Ánjein lubeiti aríñawagua jun. “Niján Crístu” o “Ningitán lan”, mafiñera jumá,

²⁴ ladúga jayábinba ayéjatiña lun jarúfudagun jóungua camá Crístu, camá buri profétagu, áni jadáaguba oúnwenbun buri seini lúma miláguru lun jeyédaguniña ja anúadira láañabaña Búngiu ánjaña gayára.

²⁵ Aríñaga náali le jun lubáragiñe lasúseredun,

²⁶ ligía lubeiti, ánjein aríñawagua jun. “Níjein Crístu yára lídan fulásu le mageírawati”, mídin jumá ñi, ánjaña aríñaga jun. “Niján ya rúmurugu”, mafiñera jumá.

²⁷ Quei larijiniwa labírichagun luegiñe ában oúbaü libíti siélu lun luágun le ában, ítara lúba dánme le niábin, aú le Wügüri Garaúwarügüti.

²⁸ Ábame lábujurjan ligáñi Búngiu jawágun gafígountiña quei wadúbi luágun úgubu jiláali.

Seini buri lubáragiñe lagíribudun Crístu ubouágun

(Mr 13.24-37; Lc 21.25-33, 17.26-30, 34-36)

²⁹ Lárigiñerügüme lásügürün wéyu buri lánina súfuri ligía, ábame labúrigadun wéyu, marúnjalime játi, ábame jeíguadúnga warúguma ja siélubaña, ábame ladádagarun sun siélu.

³⁰ Ábameti jarijini niseini siélu, súnme gürígia wuríbatíña ubouágu, jayájuajaba láu jarijini niábinya, áu le Wügüri Garaúwarügüti, lídan juánriñu siélugiñe láu oúnwenbun ubáfu lúma uweíríguni.

³¹ Dánme línwírúniwa fídu rein, ábame nouñajaniña náni ánjeligu ja siélubaña lun jóundaruniña nánigu ja anúadira náañabaña lídaangiñe gádürü larigei ubou.

³² ‘Furéndei jumei jémpulu le tuáguti tídibu ígo. Dan le ñulúgili tilímun, ába labouçhun tubána, subúdi jumúti luágu yaráfaali lan lubáchouga.

³³ Ítara méme, dánme giñe jarijini sún buri cátei le, subúdi jumei luágu yaráfaali lan niábin.

³⁴ Ninárün jáu, luágu lagünrinchawagúba lan sun ubúru le Jerusalén lubáragiñe jóúwegun gürígia ja lánina dan le.

³⁵ Lagúmuchaguba siélu lúma ubou, ánjein nerérun, merédebei magúnfulirúnga.

³⁶ ‘Ánjeinti luágu wéyu lúma óra le lúnbei nagíribudun ubouágun, ibídiñeti ni ca un, ni joun ánjeligu ja siélubaña, ni nun, áu le Liraü Búngiu, Búngiu rügüñein Úguchili asúbudirei.

³⁷ ‘Ítara quei meja lasúseredun lídan meja lidáani Noé, ítara lúba giñe dánme le niábin, áu le Wügüri Garaúwarügüti.

³⁸ Lídan meja dan ligía, lubáragiñe ladíbirun ubou, jerédera meja gürígia eíga, áta, amárieidagua, íchaajaña jasáanigu lun maríei, darí wéyu le lebélorunbei Noé tídoun ugúnein.

³⁹ Meféentiña, darí ladíbirun ubou, ába jañáradagun súngebui. Ítara lúba giñe dánme niábinya, áu le Wügüri Garaúwarügüti ubouágun.

⁴⁰ Lídaanme dan ligía, ñibaña bián wügüriña áraabu, lanügüba ában, igrúame le ában según jafiñen nuágu.

⁴¹ Ñibaña bián würiña amúlíja, tanügüba ában, igrúame to ában.

⁴² ‘Agágudúña jumá, ladúga ibídiñeti jun cába lan óra niábin, áu le Jabúreme.

⁴³ Subúdi jumeí le, luágu ánjein lan jamúga lasúbudira tabúreme ában múna cába lan óra liábin jíweruti áriebu, leréderuña jamúga marúmugunga, mígirunti jamúga lun lebélurúniwa íweruja lúbiñe.

⁴⁴ Ligía aráanseñu jumá lubeí, ladüga léme óra magáradajan jumá, ligíame niábin, áu le Wügüri Garaüwarügüti.

Músu le úaraguabei, lúma le múaragúnbei
(Lc 12.41-48)

⁴⁵ Ítara jumá queísi músu úaraguati, gunfaráanda ligía, le lígirubei liyúbudiri lun larjín jáu ja lúbiñebaña lun líchugun eíginí joun lídan dan.

⁴⁶ Gúndaabei músu le dánme le liábin liyúbudiri ánjein ladárra agúnfulira lúma lifisiute.

⁴⁷ Ninárün jáu luágu líchugubei lan liyúbudiri lun larjín láu sun lumégen.

⁴⁸ Ánjein ában lubeí wügüri wuríbati músu ligía, ábame larítagn luágu lügili lan liábin liyúbudiri,

⁴⁹ ábame lagúmeserun ouseraña jíbiri músu wuríba, reídei ligíame eíga lúma áta jáma bacháruatiña,

⁵⁰ ábame liábin liyúbudiri lídan wéyu le magúraban láani, lídan óra le ibídiñeti lun.

⁵¹ Ábame líchuguni luweírin-ágei abeichúni luágu, lasíadireime lun máfiougatin úara jáma biángua tigíbu, ábame layájun, acünrijame lári.

25

Jémpulu jawáguati díisi würiña irájüñü

¹ Ába laríñagn Jesúsu.

—Ítara lubáti arúejani le lánina siélu quei díisi würiña irájüñü ja anügübaña jalámpun le gálati gási, ába jáfuridun lun jadúnragun lúma adári, ñüdün jamámuga úara lúma maríeurugun.

² Seíngü jádaangiñe, maráanseruntiña, seíngü aráansetiña.

³ Ja maráanserunbaña, dan le janügünbalin jalámpun, manügüntiña ámu gási lueí le lídaanbei jalámpun,

⁴ ánjañati ja aráansebaña, barütiña jabúdein láu gási bougudin lueí le lídaanbei jalámpun.

⁵ Queísiti ladárasarun adári, ába ladábudunga jágu súngubei, ába jarúmugun.

⁶ Queí buri luágu amídi áriebu, ligía lagaambúniwa agúaraguni. “Niteín adári, furíjuma adúnraguei.”

⁷ Sun würiña irájüñü jagía, ába jásaarunga, ába jagúmeserun aráansejei jalámpun.

⁸ Ába jaríñagn ja maráanserunbaña joun ja aráansebaña. “Rújuma murúsun lídaangiñe jigásin woun, ladüga léñeguchuña walámpun.”

⁹ Ába jaríñagn ja aráansebaña joun. “Siñáti, ladüga louguabei woun, louguame jun. Jeíbagubei le ñí lubei lalúgurajoúa agáñija jumámuga júngua.”

¹⁰ Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélurun lúma maríeurugun, ába ladaurúniwa béna.

¹¹ Lárigiñe, ligía jachülürün jíbiri würiña irájüñü jagía, ába jaríñagn. “¡Wabúreme, wabúreme, darábei béna wabá!

¹² Ába laríñagn joun. “Ninárün jáu, ibídiñetün nun.”

¹³ Ábati laríñagn Jesúsu joun.

—Agágudúañu jumá, ladüga ibídiñeti jun cába lan wéyu, ni cába lan óra nagíribudun, áu le Wügüri Garaüwarügüti, ubouágun.

Jémpulu luáguti seínsu

14 Ítara líña arúejiani le lánina siélu quei ában wügüri le dan lébei laráansejan lun ladügün weíyaasu lídoun ámu fulásu, ába lagúarun joun lumúsuníña, ába líchuguni liseínsun lábugiñoun jaríajaan.

15 ‘Lun ában jádaangiñe, rúti quei buri seíngü-mílu fiádürü, quei buri bián-mílu lun ában, quei buri mílu lun ában. Lafánreinjani joun quei jabáfu lun jawádigimariduni. Ábati lídin luágu luweíyasun.

16 Le músu le erésibirubei seíngü-mílu fiádürü, ába luwádigimariduni, ába lagáñeirun seíngü-mílu fiádürü ligíbuagun.

17 Ítara méme le erésibirubei bián-mílu, gáñeiti bián-mílu lánwoun.

18 Ánjeinti le erésibirubei mílu, ába lídin, ába lachigin ában júyu, ába larámuduni liseínsun liyúbudiri ñi.

19 ‘Sarágu dan lárigiñe, ába lagíribudun iyúbudiri, ába lagúmeserun aráanseja jáma luágu seínsu.

20 Furúmiñe, ába liábin le erésibirubei seíngü-mílu fiádürü, ába ledéregeruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.”

21 Ába laríñagun iyúbudiri lun. “Buíti, ában músu buíti amürü, úaragua, quei úaragua bubei lídan le murúsunrügüti, níchiga gíbetimaati lábugiñe baríajaan. Queímoun, gúnda amürüme úara núma.”

22 Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, bíamañein-mílu fiádürü bíchugun nun, niján bián-mílu nagáñeirun ligíbuagun.”

23 Ába laríñagun liyúbudiri lun. “Buíti, ában músu buíti amürü, úaragua, quei úaragua bubei lídan le murúsunrügüti, níchiga gíbeti lábugiñe baríajaan. Queímoun, gúnda amürüme úara núma.”

24 Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügüri ban jéreguti, alúbaja ban le ñí lumuti mábunagun ban, abúdaja amürü le ñí lumuti machágarun ban ni cáta.

25 Ligía nanúfudedunbei, ába nídin arámudei biseínsun lábugiñe múa. Niján le báni.”

26 Ába laríñagun iyúbudiri lun. “Músu wuríbati, moúnti. Subúdigubei bíñein luágu alúbaja nan le ñí lubei mábunagun nan, abúdaja áu le ñí lubei machágajan nan ni cáta.

27 Ligía lúnti lubei jamúga bíchuguni niseínsun báncürugun lun dan lan jamúga nagíribudun, nerésibiruni le náni láu agáñeiruni.”

28 Ába laríñagun joun ja ñibaña. “Gidájumei seínsu le lúmabei lueí, rújumei lun le láubei díisi-mílu,

29 ladüga le adügübei buíti láu le lúmabei, líchugúba lánwoun lun, ábanme lígiragun lun, ánjein le madügübei buíti láu murúsun le lúmabei, lagídarúaba lueí.

30 Músuti moúnti le, fijumei lídoun lubúriga le bougudibeí, le ñíba lubeí layájuaja, acúnrijame lári.”

Jagúseragüdüniwa sun gürgia

31 ‘Dánme nagíribudun, áu le Wügüri Garaüwarügüti, ubouágun, niábinba quei urúei geyégu ánjeligu náu, ábame nañúurun luágu nála láu uweíriguni lun nagúseragüdüniña sun güri-gia.

32 Ábame jóundaragun güri-gia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña jóúniri mudún, mudún jádaangiñe gábara.

33 Ja richáguabaña ligíbugiñe Búngiu, ábame níchuguniña lueígiñe noúnwenren, ja wuríbabaña ligíbugiñe Búngiu, lueígiñebaña nubaúna.

34 Nariñagame joun ja lueígiñebaña noúnwenren. “Jigoúgu, jugúya le biní laalíbei Nóguchi, resíbi jumeí arúejani le aráanserúbei jubá lúmagiñe ladügüni Búngiu ubou.

35 Ladüga dan le nalámachunbei, rúntün eí-gini nun, dan le namágürabudunbei, rúntün dúna nun, dan le eíbugañaja nubeí quei chülüdügüti, rúntün múna nun.

36 Dagáti manáanguni nuágu, rúntün anáanguni nun, dan le nasándirunbei, ñüdüntün aríjana, dan le nadaürünbei, ñüdüntün aríjana.”

37 Ábamei jariñagun richáguatiña jagía nun. “Wabúreme, ¿ida bugagí waríjabu láu ilámaü, ába wíchugun eí-gini bun? ¿ida bugagí waríjabu láu mágürabu, ába wíchugun dúna bun?

38 ¿ida bugagí waríjabu quei chülüdügüti, ába wíchugun múna bun? ¿o manáangunga, ába wíchugun anáanguni bun?

39 ¿ida bugagí waríjabu láu sándi o furísunrugu, ába wouúdin aríjabu?”

40 Ábame nariñagun joun. “Ninárün jáu, furúmieguarügü cátei le jadügübei lun ában jádaangiñe namúleno, ca lan lúnabunbei, nun méme jadügei.”

41 ‘Nariñagamei joun ja lueígiñebaña nubaúna. “Díse jumá nueí, jugúya le lúnbei jasúfurirun lun sun dan, jeiba lídoun wátu geméti le méñeguchadíbei, le aráanserúbei lubá Máfia jáu lánigu.

42 Ladüga dan le nalámachunbei, míchutün eí-gini nun, dan le namágürabudunbei, míchutün dúna nun.

43 Eíbugatina quei chülüdügüti, míchutün múna nun, mégeitina anáanguni, míchutün nun, sánditina, daüwa áu, mídintün aríjana.”

44 Ábame jariñagun wuríbatiña jagía nun. “Wabúreme, ¿ida bugagí waríjabu láu ilámaü o mágürabu, o quei chülüdügüti, o manáangunga, o láu sándi, o furísunrugu, míderagun wamútibu?”

45 Nariñagame joun. “Ninárün jáu, luágu furúmieguarügü lan cátei le madügün jubeí joun güri-gia, ca lan lúnabunbei, madügün jumúti gíñe nun.”

46 Ábamei jóúdin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame jóúdin siélun lun jagúndaarun ñi lun sun dan.

26

*Aráansejani lun lárügüdüniwa Jesúsu
(Mr 14.1-2; Lc 22.1-2; Jn 11.45-53)*

1 Dan aríñaga láali Jesúsu sun cátei le, ába lariñagun joun láni disípulugu.

2 —Quei jasúbudiruni, bián wéyu lári-giñe le, ligíame fédu le páscua, áni nedéregerúaba, áu le Wügüri Garaüwarügüti, lun nádarawagün luágu gurúwa.

³ Ába jóundaragun jábutigu fádirigu, arúfudajatiña lilúrudun Moisés, jáma wügüríña weírígutiña lídan jafíñen juríu tigíbugiñe lúban Gáifasi, fádiri le íñutimaabei.

⁴ Ní jaráanseja luágu Jesúsu lun járügüdüni láu yéguau, lun jáfaruni jilágubei.
⁵ Jariñagati.

—Máma látia fédurugu luei jachágaragun güriáa.

Tájuduraguni ában würi lábulugu Jesúsu

(Mr 14.3-9; Jn 12.1-8)

⁶ Betániañein Jesúsu, lúbiñe Simón lé meja gawágubei gumeín luágu sun lúra,
⁷ ába tiábin ában würi luágun, gámeina tugúya ában lágei ibíñei le weíriri lisérun. Dan luáguñein lan dábulu Jesúsu, ába téseruni ibíñei ligía lábulugun.

⁸ Dan jaríjinbaalin disípulugu cátei le, ába jamágundarun, ába jariñagun.

—¿Cámesan lefédiríu le ítara?

⁹ Gayáraati jamúgagu lalúgurúniwa le luágu sarágu seínsu lun jíderawagún gudémetiña.

¹⁰ Ába lagáambuni Jesúsu le jariñagubei, ába lariñagun joun.

—¿Ca uágu jañáwuriya tun würi to? Cátei buíti le tadügübei.

¹¹ Súnwandan yábaña lan gudémetiña júma, ánjein áu, mámaba súnwandan júma nan.

¹² Le tadügübei würi to láu téseruni ibíñei le nuágun, taráanseruñádina lubá nábuluníwa.

¹³ Ninárün jáu luágu le lan ñí lumuti lapúrichijoúa ugánu luáguti asálbaruni lídan sun ubou, labájüdawagúaba gíñe le tadügübei würi to, lun larítawagún tuágu.

Lalúguruni Júdas Jesúsu

(Mr 14.10-11; Lc 22.3-6)

¹⁴ Ába lídin ában jádaangiñe dúusu disípulugu, le gíríbei Júdas Iscarióte, adímureja jáma jábutigu fádirigu.

¹⁵ Ába lariñagun joun.

—¿Atiríbei jíchugun nun ánjein nedégera Jesúsu jun?

Ába jíchugun daránde murúsun pláta lun.

¹⁶ Lúmagíñeti óra ligía, ába láluaajan Júdas ída lúba lan luwúyeri ledégeruni Jesúsu joun.

Lagúmujoún leigin Jesúsu jáma lánigu

(Mr 14.12-25; Lc 22.7-23; Jn 13.21-30, 1 Co 11.23-26)

¹⁷ Le furúmiñeti wéyu lídan fédu le ñí lubei teigúa fein magánatu ísi, ába jayábin disípulugu lúmoun Jesúsu, ába jariñagun lun.

—¿Jalía babúseera waráanserun lun ñíba lan wadügei eígini le lánina páscua?

¹⁸ Ába lariñagun joun.

—Jeíba ubúru, lúbiñe ítaga wügüri, ábame jariñagun lun. “Ítara líña lariñagun Maésturu. Yaráfaali nórate, búbiñeba nefédujei páscua jáma náni disípulugu.”

¹⁹ Ába jadügüni disípulugu quei lariñaguni Jesúsu joun, ába jaráanseruni eígini le lánina páscua.

²⁰ Dan le lagúñedunbei, ába lañúurun Jesúsu luágu dábulu jáma láni dúusu disípulugu,

²¹ súnti añáa lan eíga, ába lariñagun joun.

—Nínárün jáu luágu lalúgurubadina lan ában jídaangiñe.

²² Ábati jajírudagun, ába jagúmeserun álügüdei ában ában.

—Nabúreme, ¿nugúya funásan?

²³ Ába laríñagun joun.

—Le éderutu leígan fein núma lídan asíedu, ligiába alúgurana.

²⁴ Nídiña, áu le Wügüri Garaüwarügüti, luágu üma le uágubei taríñaga Lerérun Búngiu, áni ¿fugíabutia wügüri le alúgurutina! Buítimaati jamúga lun magüriajouágubei lan.

²⁵ Ábati ladímurejan Júdas, ába lálügüdajan.

—Maésturu, ¿nugúya funásan?

Ába laríñagun Jesúsu lun.

—Ánja, bugúya.

²⁶ Dan añája lan eíga, ába lanügünun Jesúsu fein lújaburugu, ába leteíngiruni Búngiu tuágu, lásun lagúbachagunun, ába líchugunun joun láni disípulugu, aríñageina.

—Joujúma, núgubu le.

²⁷ Lárigiñe, ába lárügüdün ában wéru buin táu diweín lújaburugu, ába leteíngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya.

²⁸ Níta le, le añúragüdúbalin iséri darádu, le giñe áwiyurubei joun sarágu gürígia lun ferúdunawa lan jafígoun.

²⁹ Naríñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Núguchi Búngiu yágüta siélu.

Laríñaguni Jesúsu luágu leyéedaguba lan Pédro láu

(Mr 14.26-31; Lc 22.31-34; Jn 13.36-38)

³⁰ Lárigiñe jerémujani urému luágu Búngiu, ába joudin luágu wübü Olívos.

³¹ Ába laríñagun Jesúsu joun láni disípulugu.

—Sun jugúya, jasándiraguba júngua láu magúraasuni nuágu áriebu le, ladüga laríñajare tidan Lerérun Búngiu. “Náfarubei jouniri mudún jílagubei, ábame jeréderun mudún chagágu.”

³² Lárigiñeme násaarun lídaangiñe ouweni lúnya nabágaridun, ní diba Galiléa jubáragiñe.

³³ Ába laríñagun Pédro lun.

—Gayáraati jarügüdün súnigubei magúraasuni buágu, nugúya no.

³⁴ Ábati laríñagun Jesúsu lun.

—Nínárün báu luágu áriebu méme lan le, lubáragiñe layúgurujan gáyu, beyéedaguba náu ürúwa weíyaasu.

³⁵ Ába laríñagun Pédro lun.

—Gayáraati nouñwen búma, meyéedagunbadina báu.

Ligia méme giñe jariñaga sun disípulugu.

Layúmuragun Jesúsu lun Búngiu, Getsemaní

(Mr 14.32-42; Lc 22.39-46)

³⁶ Ábati lachülürün Jesúsu jáu láni disípulugu lídoun ában fulásu gíriti Getsemaní, ába laríñagun joun.

—ñurújuma ya, neíbuga ayúmuragua lun Búngiu yára.

37 Ába lanügüni Pédro jáma bián lirájüñü Zebedéo lúmagua, ába jagúmeserun asándira íruni lúma tigári anígi.

38 Ábati laríñagun joun.

—Sandítina ában íruni le lánina ouweni tidan nuwáni. Reidei jumá ya, agágudúañu jugúyame núma.

39 Ábati lídin Jesúsu lubáruaguóun mémeraü, ába lájuduragun láu ligíbu múarugun, ába layúmuragun lun Búngiu ítara.

—Núguchi, ánjein gayára lubeí, adúgabá lun masúfurirun náani cátei le lúnbei nasúfuriruni, mámalá quei nabúseerun, queílá babúseerun.

40 Ábati lagíribudun le ñjin jabeí láni disípulugu, ába ladáriruniña arúmuga, ába laríñagun lun Pédro.

—¿Siñátisan buga jeréderun agágudúañu núma ni ában óra?

41 Agágudúañu jumá, ayúmuragua jugúyame, máburujan jumámuga lídoun ínchajóuni lun jeféridiruni jafíñen nuágu. Inárüni luágu ánja tan juwáni lun cátei le lúdubei, ánjeinti júgubu, débiliti.

42 Ábaya lídin luágu libíaman weíyaasu, ába layúmuragun ítara.

—Núguchi, ánjein siñá lubei masúfurirun náani le lúnbei nasúfuriruni, adügüwalá bugúndan.

43 Ábaya lagíribudun, ábaya ladáriruniña láni disípulugu arúmuga ladüga weírjiali lidábu jágu.

44 Ába lígiruniña, ábaya lídin ayúmuragua luágu lürüwan weíyaasu, aríñageina méme dimúrei ligía.

45 Ábati lídin le ñjin jabeí láni disípulugu, ába laríñagun joun.

—¿Jarúmugaña mémesan, eméragua jugúya? Chülújali óra lun nedéregeruniwa, áu le Wügüri Garaúwarügüti, jájaburugun gafígountiña.

46 Sarájuma, queímoun lubároun le lúnbei lalúgurunina, níteeli.

Janügüni Jesúsu adáüra

(Mr 14.43-50; Lc 22.47-53; Jn 18.2-11)

47 Ñígili Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu gürgia táu efeín lúma wéwe. Jayábin lueígiñe jóubadina jábutigu fádirigu jáma wügüriña weirigutiña lídan jafíñen juríu.

48 Aríñagaaliti buga Júdas joun.

—Le nachúurun, ligía, járügüdeime.

49 Ábati layárafadun lun Jesúsu, ába laríñagun.

—¡Buíti güñoun, maésturu!

Ába lachúuruni.

50 Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janügüni adáüra.

51 Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñtumaabei.

52 Ába laríñagun Jesúsu lun.

—Areídabóun befeínte, ladüga sun ja áfarajatiña táu efeín, táuba giñe efeín jáfarúa.

53 ¿Ibídñeti bun luágu ánjana lan jamúga busén, gayára lan namúriajan ürüwa-wein-díisi-mílu jádaangiñe láni Núguchi ánjeligu, áni loúnajañanu lan jamúga?

⁵⁴ Lun jamúga nadügüni ítara, ¿ída lubági lagúnfulirun le tídaanbei Lerérun Búngiu to aríñagouboun luágu lúnti lan lasúseredun le ítara?

⁵⁵ Ábati lariñagun Jesúsu joun mútu jagía.

—¿Iábin táu efein lúma wéwe lun járügüdünina camá jamuga jíwerutina? Ságüñaja wéyu nañúurun témpulurugu jagánagua arúfudaja, madaü jumútna.

⁵⁶ Wel, lasúseredunbei sun le lun lagúnfulirun le jariñagubei profétagu tídan Lerérun Búngiu.

Ábati jígiruni sun disípulugu Jesúsu lábugua, ába janúrajan.

Jesúsu ligíbugiñe líñun-ágei lúrodu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ja adáürübalin Jesúsu, ába janügüni ligíbugiñoun Gáifasi, fádiri le íñutimaabei, le ñi lubei adámurigu jamá arúfudajatiña lilúrudun Moisés jáma wügüriña weirigatiña lídan jafiñen juríu.

⁵⁸ Ánjeinti Pédro, falá lumuti dísegiñe darí túbürürurugun lúban fádiri le íñutimaabei le ñíjin lubei lebélera, ába leréderun ñun jáma oúnigirutiña témpulu lun lariñin jalíaba lan lébeda cátei le.

⁵⁹ Jáluajati jábutigu fádirigu, jáma sun jíbiri líñun-ágei lúrodu lidúnrun Jesúsu láu iyéeni lun gayáraabei lan jasiádiruni lun loúnwen,

⁶⁰ madáritiña, láu sun sarágu jáña lan gürígia ñüdüntiña aríñaga iyéeni luágu. Agúmujuóni, ligía jayábin biáma yéetiña íchiga fe luágu,

⁶¹ ába jariñagun.

—Aríñagati wügüri le luágu gayára lan lagúnrichagunun lání Búngiu témpulu, ábaya lánme laráramagüdúnun lídan ürüwa wéyu.

⁶² Ábati laráramun fádiri le íñutimaabei, ába lariñagun lun Jesúsu.

—¿Moúnabuntibusan ni cáta? ¿Cáteigi le, le aríñawagúbei buágu?

⁶³ Reídeiti Jesúsu maníñu. Ábati lariñagun fádiri le íñutimaabei lun.

—Luágu líri Búngiu le wínwanbei báfiñura lun bariñaguni inárüni. Aríñagabei woun ánjein amürü lubei Crístubei le Liraü Búngiu, le lanúadirubei Búngiu lun lasálbaruniña gürígia ubouágu.

⁶⁴ Ába lariñagun Jesúsu lun.

—Ánja, áu, quei bariñaguni. Aríñagatina giñe jun luágu jarijubadina lan, áu le Wügüri Garaüwarügüti, ñun lueígiñe loúnwenren Búngiu le Súnti Gabáfu, jarijubei giñe niábin lídan juánriñu siélugiñe.

⁶⁵ Ábati lajeíridagunun fádiri le íñutimaabei lanáangun, le ligáñi, ába lariñagun.

—¡Anába láali wügüri le Búngiu láu lerérun! Mabúseerunjadiwa ámu lun líchugun fe luágu, agáamba jumáali anábuni le lariñagubei,

⁶⁶ ¿ída líña jarijin lun?

Ába lariñagun.

—Gadúnrunti, lúnti loúnwen.

⁶⁷ Ábati jásuerañi ligíbu, buleísei jameí, jíbiri, ába jagáyuajan ligíbuagun,

⁶⁸ ába jariñagun lun.

—Quei amürü lan Crístubei, jariñaga beígia ca lan agáyuajabei buágu!

Jariñagunbei lun ítara ladúga gürágu líña lan lágu.

Lariñagun Pédro luágu ibídiñe lan Jesúsu lun

(Mr 14.66-72; Lc 22.56-62; Jn 18.15-18, 25-27)

⁶⁹ Súnti lasúseredun sun cátei le, ñun líña Pédro bougudi túbürürüru luában fádiri le íñutimaabei, ába tiábin ában esériwijatu luágun, ába tariñagun lun.

—Bugúya, lúmañadibútia giñéñaja Jesúsu le Galiléana.

⁷⁰ Ába leyéedagun Pédro jagíbugiñe sùngubei, ába lariñagun.

—Ibídiñeti nun ca lan uágu badímureja.

⁷¹ Leíbuga yebe Pédro luágun béna, ligía tarijini ábanya, ába tariñagun joun ja ñíbaña.

—Eyéri le, lúmañajañein giñe Jesúsu le Nazarétna.

⁷² Ábaya leyéedagun Pédro láu fiñún, ába lariñagun.

—Ibídiñeti wügüri ligía nun.

⁷³ Murúsun lueígiñe, ába jayábin ja ñíbaña lúmoun Pédro, ába jariñagun lun.

—Inárüni luágu ában lan jádaangiñe amürü, arijúati luágu ligáburi badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Ibídiñeti güri gía ligía nun!

Lídan méme óra ligía, ába layúgurujan ában gáyu.

⁷⁵ Ábati lariñagun Pédro luágu le lariñagubei Jesúsu lun. “Beyéedaguba náu ürüwa weíyaasu lubáragiñe layúgurujan gáyu.” Ába láfuridun Pédro ñigiñe, ába layájuajan láu igárigu.

27

Ledéregerúniwa Jesúsu lun Piláto (Mr 15.1; Lc 23.1-2; Jn 18.28-32)

¹ Dan larúgadunbei, ába jádamuridagun sun jábutigu fádirigu jáma wügüriña weírigutiña lídan jafiñen juríu aríja cába lan jadüga lun lasíadirúniwa Jesúsu.

² Ába janügüni gürágu, ába jedéregeruni lun Póncio Piláto le gumádimati.

Louñwen Júdas

³ Dan le lariñinbei Júdas, le alúgurubalin Jesúsu, luágu siádi jamáli lan Jesúsu lun loúnwen, ába laságürijan, ába láguyugüdüni darándi murúsun pláta ligía joun jábutigu fádirigu lúma joun wügüriña weírigutiña,

⁴ ába lariñagun joun.

—Afigounjaadina láu nedéregerun ában wügüri madúnrunti lun loúnwen.

Ába jariñagun lun.

—¿Cámegi le warúma? ¡Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádirigu seínsu ligía, ába jariñagun.

—Siñáti wíchuguni seínsu le tídoun gáfu to lágei liseínsuna Búngiu ladüga lebégi óuweni.

⁷ Ába júaradun lun lagáñijoún lufúlasun ában wügüri le adáagubei barámbi láu seínsu ligía lun jábunajoún teréncha ñi.

⁸ Ligía Lufúlasun Jítaú lubei líribei fulásu ligía chülü lúmoun dan le.

⁹ Ítara líña lagúnfulirun lé meja lariñagubei proféta Jeremías. “Barü jamuti darándi murúsun pláta ligía, ebégi le jíchugubei Israelítagu luágu wügüri ligía,

¹⁰ ába jagañijani lufúlasun ában wügüri le adáagubei barámbi láu, quei lariñaguni Nabúreme nun.”

Jesúsu ligíbugiñe Piláto
(Mr 15.2-5; Lc 23.3-5; Jn 18.33-38)

11 Barúwati Jesúsu ligíbugiñoun gumádimati, le gíribei Piláto, le álügüdúbalin.

—¿Amürüsan Jarúitebei Juríu?

Ába laríñagun Jesúsu lun.

—Ánja, áu quei baríñaguni.

12 Dán buriti jíchugun jábutigu fádirigu jáma wügüríña weírigitíña lidúnrun, mouñabuntija Jesúsu ni cáta.

13 Ábati laríñagun Piláto lun.

—¿Magáambun bumútisan le jaríñagubei buágu?

14 Mouñabunti Jesúsu ni cáta, ábati laweíridun lanígi gumádimati.

Lasiádirún Jesúsu lun louñwen
(Mr 15.6-20; Lc 23.13-25; Jn 18.38-19.16)

15 Gagáburí lumúti mejáti gumádimati lígiragüdün ában adaürüti joun gürígia lídan fédu, furúmieguaügü adaürüti le jamúriajan lúma.

16 Níñeinti ában adaürüti, díseti leíbaajan líri, gíríti Barabási,

17 dánti le adámuriñuñaña lan sun gürígia, ába lálügüdúniña Piláto.

—¿Ca jabúseerubei nígiragüdün jun, Barabási, ódi Jesúsu le únbei laríñawagua Crístu?

18 Líridubalin giñe Jesúsu ladüga subúdi lálali lan luágu ladüga lan jagímugan lun jedéregerei.

19 Sun ñun lan Piláto luágu lála le lánina agúseruni, ába touñajan lúmari aríñaga lun. “Madügabá ni cáta láu gürígia úaraguati le, ladüga gewéñeditina buga ában uwéñedi wuríbati áriebu buga ladüga gürígia le.”

20 Ába jádaruni jábutigu fádirigu jáma wügüríña weírigitíña jádoun gürígia lun jamúriajan lun láfuridun Barabási, lun lafarún Jesúsu.

21 Ábaya ladímurejan gumádimati joun sun gürígia jagía, ába laríñagun joun.

—¿Ca jádaangiñe biángubei jabúseerubei lun nígiragüdüni jun?

Ába jaríñagun.

—Barabási.

22 Ába laríñagun Piláto joun.

—¿Cábatí nadüga láu Jesúsu le únbei laríñawagúia Crístu?

Ába jóunabun súngubei.

—¡Dáguabeí luágu gurúwa!

23 Ába laríñagun Piláto joun.

—¿Cáti wuríbati ladügubei?

Ábatima jagúaragun.

—¡Dáguabeí luágu gurúwa!

24 Dan le laríjnbalin Piláto luágu siñá lan ladügün ni cáta lueídügüya chagáguaü, ába lamúriajan dúna, ába lachíbuni lújabu jagíbugiñe gürígia, aríñageina.

—Máma áu lúnbei naríjin láu louñwen wügürí madúnrunti le, jugúya lun jaríjini ñi.

25 Ába jaríñagun sun gürígia.

—¡Wagía jáma warájüñü, wanügüba furúmieguaügü dúru wawouguoun luágu louñwen!

26 Ábati lígiragüdüni Piláto Barabási, ába loúnajan abeíchei Jesúsu, ába ledéregeruni lun ládarawagún luágu gurúwa.

27 Lárigiñe, ába janügüni lisúdaaranigu gumádimati Jesúsu tídoun lúban Piláto, ába jóúndaraguagüdüniña sun súdeara geyéguá láu.

28 Ába jarágachunun lanáangun, ába jíchugun ában anáanguní funátu luágu,

29 ába jíchugun ában rídi láuti jíyu lálbulugu, lúma ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jariñagun lun.

—¡Gabágarilá Jarúeite Juríu!

30 Ába giñe jásuereguni, janügeija mabúru ligía, jíchaaguei lálbulugu.

31 Lárigiñe jéjerajan láu ítara, ába jagídarunun anáanguní funátu lueí, ába jadáürünun lanáangun luágu. Ába janügüni lun ládarawagún luágu gurúwa.

Ládarawagún Jesúsu luágu gurúwa

(Mr 15.21-32; Lc 23.26-43; Jn 19.17-27)

32 Dan le áfurideina jáña lan, ába jadúnragun lúma ában wügüri Cirénena, gíriti Simón, ába jafósuruní lun lanügüni lugúruwan Jesúsu.

33 Ítara líña jachülürün lídoun ában fulásu gíriti Gólgota, líla líra, Lufúlasun Lábu Ichügü.

34 Ñi jíchiga díweín láu árani tídan lun Jesúsu lun látunun, jóúcharügü lumútu, mátun lumútu.

35 Dan le dágua jamáali luágu gurúwa, ába jájurerun súdeara ubúnuruni lun jafánreinjanun lanáangun Jesúsu jádaangua. Ítara líña lagúnfulirun lé meja labürüjabei proféta. “Ájureratiña ubúnuruni lun jaríjin cába lan jádaangiñe erédera táu nanáangun.”

36 Ába jañúurun ñi lun jóúnigiruni.

37 Ába jíchugun ában abürüjóuni loúgiñe lichügü le ñi lubei lariñaga ca lan lidúnrunbei. Abürüjóuni ligía ítara líña. “Jesúsu le, le jarúeitebei juríu.”

38 Dáwaguatiña giñe bían jíwerutiña luágu gurúwa lúma, ában lueígiñe loúnwenren, ában lueígiñe lubaúna.

39 Já buriti ásügürübaña ñígiñe, ába janábuni, ába jánjingichuni jachügü,

40 aríñageina.

—Bugúya le gayáraabei bágurunun témpulu ábaya baráramagüdünnun lídan ürúwa wéyu, sálbaguayá búngua. Ánjein Liraü bubei Búngiu, raríba lueígiñe gurúwa.

41 Ítara líña giñe jéjerajan jábutigu fádirigu jáma arúfudajatiña lilúruden Moisés, fariséogu, jáma wügüriña weírigutiña, láu, ábaja jariñagun jámagua.

42 —Sálbati ámu, ánjein lúngua, siñáti lasálbaragun. Ánjein ligía lubei Jarúeitebei Israelitagu, raríla lueígiñe gurúwa, afíñe wamámuga luágu.

43 Rúlaali lafiñen luágu Búngiu, sálbaleíti Búngiu guetó ánjein inárüni lubei luágu jínsiñe lan lun, quei aríñagaali lan woun luágu Liraü lan Búngiu.

44 Anába jamúti giñe jíwerutiña ja dáwaguñubaña luágu jagúruwan úara lúma.

Loúnwen Jesúsu

(Mr 15.33-41; Lc 23.44-49; Jn 19.28-30)

45 Ábati labúrigadun sun fulásu lúmagiñe amídirugu darí ladaünrún ürúwa rábounwéyu.

46 Queí buri óra méme ligía, ába lagúragun Jesúsu jére.

—Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷ Níñanu agáambuti jádaangiñe ja níbaña, ába jaríñagun.

—Lagúajaña wügürí le lun proféta Elías.

⁴⁸ Ába lídin ában jádaangiñe eibaagueina anúga ában mudúsi, lárigiñe ladüdüragüdüni táu diweín garüjütu ába líchuguni luágu ában wéwe, ába líchunun lun lun lachúrunun. Ába lachúrunun.

⁴⁹ Ába jaríñagun ja jíbiri.

—Ígirabeí, waríja ánjein núbín Elías asálbarei.

⁵⁰ Ábaya ladügün Jesúsú ában agúaraguni jéreti, ábati loúnwen.

⁵¹ Lídan óra ligía, ába tajeiridagun tubélun témpulu lídan bián murúsun, íñugiñe lun únabun. Ába ladágarun ában járabaganáli, ába láwarajan dübü.

⁵² Ába lánjunrenchúnga umúajaü, ágyuguatiña sarágu jádaangiñe affíñetiña luágu Búngiu já meja jíláguaañábaña.

⁵³ Ába jáfuridunga lídaangiñe jamúaja lárigiñe lásaarun Jesúsú lídaangiñe óuweni. Ába jebélurun lídoun ubúruyu Jerusalén le biníwabei, le ní lubei jaríjaña sarágu güriía.

⁵⁴ Létí jábuti súdeara jáma súdeara ja óunigirubalin Jesúsú, dan jasándirubalin járabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárüni, Liraü Búngiu wügürí le.

⁵⁵ Níñanu sarágu würíña aríagua dísegiñe, ja afálarubalin Jesúsú lúmagiñe Galiléagiñe íderagua jameí.

⁵⁶ Níñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

Labunúniwa Jesúsú

(Mr 15.42-47; Lc 23.50-56; Jn 19.38-42)

⁵⁷ Dan le agúñedeina líña lubeí, ába liábin ában wügürí risiti gíriti José, lídaangiñeti fulásu le giríbei Arimatéa, jádaangiñeti giñe ja afálarubalin Jesúsú.

⁵⁸ Ábati lídin aríjei Piláto, ába lamúriajani lúgubu Jesúsú lúma. Ábati laríñagun Piláto lun líchugúniwa lun,

⁵⁹ ába lanügüni José, ába loúburaguni tídan ában gamísa jarúmatu.

⁶⁰ Ába líchuguni lídoun lumúaja iséri lé yebe lachígagüdübei lubárua luágu dübü. Lárigiñe ladáuruni umúajaü láu ában dübü weírítí luágu lubéneri, ába lídin.

⁶¹ Níñounti María Magdaléna túma to ában María ñun ligíbugiñe umúajaü.

Óunigirutiña ligíbugiñe lumúaja Jesúsú

⁶² Larúgan, lárigiñe aráansejani lubá luwéyuri eméraaguni, ába jóúdin jábutigu fádirigu jáma fariséogu aríjei Piláto,

⁶³ ába jaríñagun lun.

—Wábuti, jarítagua wamúti luágu aríñaga lán meja yéeti ligíra dán meja moúnwengili luágu lásaaruba lan luágu lürüwan wéyu lárigiñe loúnwen.

⁶⁴ Óúnajagubeibá achoúrurei umúajaü darime lürüwan wéyu, mayábin jamámuga láni dísipulugu áriebu íwerujei lúgubu, ábame jaríñagun joun güriía luágu saráali lan. Weírítimaajalímeti lagúmujoún iyéeni le sügü láu le furúmiñeti.

⁶⁵ Ába laríñagun Piláto joun.

—Barújuma fiú súdaara, jeíba chouuru jumeí umúajaü le lubuídun-ágei juáraati.

⁶⁶ Ábati jóúdin, ába jachoúruruni dübü le luágubei umúajaü, ába jígiruniña súdaara lun jóúngiruni.

28

*Lásaarun Jesúsu lídaangiñe óúweni
(Mr 16.1-8; Lc 24.1-12; Jn 20.1-10)*

¹ Dan le lásügürünbei luwéyuri eméraaguni áni arúgadeina líña dimáasu, ába jóúdin María Magdaléna túma to ában María aríjei umúajaü.

² Sódini, ába ladágarun ában járabaganáli jéreti óra ligía láu larárirun ában láni Wabüreme ánjeli siéluçiñe, ába liábin luágun umúajaü, ába lagídaruni dübü le áubei ladaurúa, ába lañúurun luágu.

³ Miríti ánjeli ligía quei ában labírjanoúga, tiábin lanáangun, jarú jarú.

⁴ Dan le jaríjbalin súdaara, ába jadádagarun láu anúfudei, ába jeréderun camá jiláguaña.

⁵ Ábati laríñagun ánjeli ligía joun würiña jagía.

—Manúfude jumá. Subúsiiti nun luágu jáluajañein lan Jesúsu le ádarawagúbei luágu gurúwa.

⁶ Úati ya, saráali quei laríñaguni. Jigoúgu jarijei fulásu le ñíjin lubeí líchugúa,

⁷ ábame jidin furése, ábame jaríñagun joun láni disípulugu luágu saráali lan, luágu níngiran lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸ Ába jóúdin würiña jagía oúfudagueina, láu anúfudei lúma sarágu ugúndani, ába jóúdin eíbaagueina aríñagei joun disípulugu.

⁹ Súnti añája lan luágu úma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóúburuni lugúdi.

¹⁰ Ába laríñagun joun.

—Manúfude jumá. Jeíba awísaraña nánigu lun jóúdin Galiléoun, luágu ñíba lan jaríjana.

Cátei le jabájüdagubei súdaara

¹¹ Dan le jóúdiña lubeí würiña, ligía jóúdin jádaangiñe súdaara ja óúnigirubaña, ába jóúdin ubúrugú, ába jabájüdaguni le asúseredubei joun jábutigu fádirigu.

¹² Ába jóúdin ábutigu ja adímureja jáma wügüriña weirigutiña lídan jafiñen juríu lun jebélurun jáma lídoun ában úarani, ába jíchugun sarágu seínsu joun súdaara,

¹³ ába jaríñagun joun.

—Jaríñagame luágu dan lan le anjünja lan arúmuga áriebu, ába lan jayábin láni Jesúsu disípulugu, ába jíwerujani lúgubu.

¹⁴ Ánjein lasúbudira gumádimati cátei le, wadímurejaba luágu jáni fuleísei lúma lun madügün lan ni cáta jáu.

¹⁵ Ábati jerésibiruni súdaara jagía seínsu, ába jóúdin adúgei le uágubei laríñawagúa joun. Ítara líñáti jaríñaguni juríu chülü lúmoun dan le.

*Líchugun Jesúsu jadásin disípulugu
(Mr 16.14-18; Lc 24.36-49; Jn 20.19-23)*

¹⁶ Ába lubeíti jóúdin únsu disípulugu Galiléoun luágu wübü lé meja uágubei laríñaga Jesúsu joun lun jóúdin.

¹⁷ Dánti le jaríjinalin Jesúsu, ába jájuduragun lun, láu sun añájein lan jádaangiñe, loúguati jafíñen luágu ligía lan.

¹⁸ Ába liábin Jesúsu jawágun, ába laríñagun joun.

—Rúaali sun ubáfu nun siélu lúma ubouágu.

¹⁹ Jeíbati jabügürü güriquia ja lílana sun fulásu, adüga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu.

²⁰ Arúfudaja jugúyame joun lun gagáambadi jamá lun sun le uágubei naríñaga jun. Subúdi jumei luágu anájein lan júma ságü wéyu darime lagúmuchun ubou. Ítaralá.

UGÁNU BUÍTI LE LABÜRÜJABEI MÁRCOS LUÁGU JESÚSU

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

¹ Niján ugánu buíti luágu Jesucrístu, le Liraü Búngiu,

² latátira láu lagúnfulirúniwa dimúrei lé meja labürüjabei proféta Isaías, laríñaga.

Niján noúnagüle, líña Búngiu, noúnajañein bubáragiñe, amürü le Niraü, lun laráansejanun janígi gürígia lubá biábin.

³ Lagúarajaba lídan fulásu mageírawati.

“Aráanse jumoún janígi lubá liábin Wabúreme, queisi ladárarúniwa üma surúti.”

⁴ Lun lagúnfulirúniwa dimúrei ligía liábinbei Juan lídoun fulásu mageírawati, ábaja laríñagun joun gürígia ja ñübinbaña lun luágu lúnti lan jasáansiruni ligáburu jóuserun lun ferúdunawa lan jafígoun, badísei jaglame.

⁵ Ábatija jayábin lídaangiñe sun Judéa lúma sun Jerusalén agáambe lapúrichijan. Dántija le jagúfesaruni jafígoun, ábajei labásteragüdüniña Juan lídan dúna le gíribei Jordán.

⁶ Mebégitu lanáangun Juan, láutu lúra caméyu, lagürüga lamídan, guéru, chigángaru leígibaña lúma síruudu le áraabuna.

⁷ Laríñagaja joun gürígia lídan lapúrichijan.

–Liábinba ában le gabáfutimaati nárigiñe, weíruti lubáfu nueí darí lun madüna nan ni lun nélemuchun afáragadei tagürüga ligeídin.

⁸ Áu, láu dúna nabásteragüdaün, ánjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdüni Juan lídan dúna le Jordán.

¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu quei jamúga ában únjun.

¹¹ Ában lagaambúniwa ában umálali siélugiñe aríñaguti.

–Amürü niraü le jínsiñebei nun, gúndaatina báu.

Louçhaguni Máfia Jesúsu

(Mt 4.1-11; Lc 4.1-13)

¹² Lárigiñe, ába lanügüni Sífiri Sándu Jesúsu lídoun fulásu mageírawati,

¹³ ába leréderun Jesúsu bián-wein wéyu ñi jagánagua anímaalugu janárimetiña. Sun dan le láubei ñi, ába louçhaguni Máfia, lárigiñe, ába jayábin ánjeligu lun jeténirun lun.

Lagúmeseruni Jesúsu luwádigimari lídan fulásu le gíribei Galiléa

(Mt 4.12-17; Lc 4.14-15)

¹⁴ Lárigiñe ladaürüniwa Juan, ába lídin Jesúsu Galiléa apúrichijei ugánu buíti lúmagiñeti Búngiu.

¹⁵ Ába laríñagun.

—Chülütjali dan lun lagúmeserun larúeijan Búngiu, sáansi jumeí ligáburi jóuserun, afiñe jumá luágu ugánu le lánina asálbaruni lídaangiñe figoú.

Lagúarun Jesúsu joun gádürü esénijatiña lun jafálaruni
(Mt 4.18-22; Lc 5.1-11)

¹⁶ Luágu ában wéyu, eibugeina líña Jesúsu láru láru dúna le gíribei Galiléa, ába laríjini Simón lúma Andrés le lamúlen. Esénijani lubeígia jawádigimaribei, jáguruñati óra ligía.

¹⁷ Ába lariñagun joun.

—Jigoúgu nárigi, falá jumana, madíajanjadünme úduraü, gürígiajañame jadíaja nun.

¹⁸ Ába jígirunun jasénin furése furése, ába jóúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraü Zebedéo, láu sun Juan le lamúlen, tídaañanu ában ugúnein arámadajoun jasénin.

²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába jóúdin lúma Jesúsu.

Ában gürígia gawáguti ában espíritu wuríbati
(Lc 4.31-37)

²¹ Ába jachülürün lídoun fulásu le gíribei Capernaüm lídan wéyu le eméraagugülei, ába lebélorun Jesúsu tídoun jalígilisin juríu, ába lagúmeserun arúfudaja joun.

²² Weíríti janígi gürígia láu sun le lariñagubei Jesúsu joun ladüga larúfudajan joun láu ubáfu, máma quei arúfudajatiña lilürudun Moisés.

²³ Ñiñein ában wügüri tídan ligíli tugúya láu ában espíritu wuríbati, ába lagúaragun.

²⁴ —¿Cámesan bemétera wámoun, Jesúsu Nazarétna? ¿Biábiñasan lun bagünrichaguniwa? Subúdi numúti cátabu lan, láu amürü lan Búngiu Irájü le sándybei.

²⁵ Ába ladeínjan Jesúsu lun espíritu wuríbati ligía, ába lariñagun lun.

—¡Maníba, furíba lídaangiñe gürígia le!

²⁶ Ába louwejagüdüni espíritu wuríbati gürígia ligía, ába láfuridun lídaangiñe, wágueina.

²⁷ Sun ja ñíbaña, ába laweíridun janígi, ába jálügüdagun jámagua.

—¿Cáteisan le? ¿Cáteisan iséri arúfudajani le? ¡Gürígia le, gabáfuti lun giñe lagúmadiruniña espíritu wuríbatiña áni agáamba jamúti!

²⁸ Ába lagaambúniwa luágu Jesúsu lídan sun Galiléa furése.

Lareídaguagüdünnun Jesúsu límenidi Simón Pédro
(Mt 8.14-15; Lc 4.38-39)

²⁹ Dan le jáfuridunbei tídaangiñe ligíli tugúya, ába lídin Jesúsu lúma Jacóbo láu Juan jábiñe Simón lúma Andrés.

³⁰ Roun tíñáti límenidi Simón, tabíruajaña, ába jariñagun lun Jesúsu luágu sándiñoun lan.

³¹ Ábati lídin tuágun, ába lárügüdüni tújabu, ába liñúragunun, lídan meme óra ligía ába tareídagun, ába tásaarun, ába teténirun joun.

Lareídaguagüdünnun Jesúsu sarágu sánditiña
(Mt 8.16-17; Lc 4.40-41)

³² Dan le lálüdünnun wéyu, guñeeli, ába janügüniwa sun sánditiña jáma sun ja gawágubaña espíritugu wuríbatiña lun Jesúsu,

33 ába jóúndaragun sun lílana fulásu lubádu béna.

34 Areídaguagüdati Jesúsu sarágu sánditiña ja láutiña ámuñegueinarügü luwúyeri sándi, sagá ligía sarágu espíritugu wuríbatíña jawei güri-gia. Mígiruntijati lun jadímurejan espíritugu jagía, ladüga subúdi jamáni cáteifein lan.

Lapúrichijan Jesúsu Galiléa

(Lc 4.42-44)

35 Lubá larúgan, dan le búrigagili, ába lásaarun Jesúsu, ába láfuridun boúgudin luei ubúru-gu lídoun ában fulásu le mageírawati lun layúmuragun lun Búngiu ñi.

36 Ába lídin Simón jáma líbirigu áluajei.

37 Dan le jadáriruni, ába jaríñagun lun.

—Añájeintia sarágu güri-gia áluajabu.

38 Ába laríñagun joun.

—Queímoun lídoun buri líbiri fulásu le yaráfabei, apúrichija námuga giñe ñi, ladüga lun napúrichijan lídan sun fulásu niábin ubouágun.

39 Ítara líña lubeiti eíbuga lumúti Jesúsu sun Galiléa apúrichijeina tídan buri jalígilisin juríu lídan sun fulásu, aságajeina ligía espíritugu wuríbatíña jawei güri-gia.

Lareídaguagüdüni Jesúsu ában gawáguti gumeín luágu sun lúra

(Mt 8.1-4; Lc 5.12-16)

40 Ába líábin ában güri-gia sánditi láu gumeín luágu sun lúra, ába lájuduragun ligíbugiñe Jesúsu, ába layúmuragun lun, laríñaga.

—Gayáraati bareídaguagüdü-nina ánjabu busúen.

41 Ába lagúdemedagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

42 Quei laríñagun ítara, ába lareídagun sánditi ligía.

43 Ábati loúnajani Jesúsu ñígiñe láu ában furése, aríñageina lun.

44 —Mabájüdagubeítia lun ni ában, ñüdünrügübá arúfudagua búngua lun jafádirin juríu, ábame bíchuguni badágaragüdü-n luágu barúmadun queisi laríñaguni lilúrudun Moisés. Ítara lúba jaríjini güri-gia luágu areídaguadibu lan.

45 Ábarüga lídin, ába labájüdaguni sun le asúseredubei lun joun sun güri-gia, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá güri-gia. Láu sun líra, ñübin mémetiña lídaangiñe sun fulásu aríjei.

2

Lareídaguagüdüni Jesúsu ában wügütri le derégüdaali lúgbu

(Mt 9.1-8; Lc 5.17-26)

1 Átiri wéyu lárigiñe, ába lagíribudun Jesúsu Capernaúm, ába jagáambun güri-gia luágu giríbujali lan.

2 Ába jóúndaragun sarágu güri-gia darí lun mabáraaña lan ni bénabu, ába lapúrichijani ugánu buíti lúmagiñeti Búngiu luágu jasálbarun joun.

3 Ñíñein apúrichija, ligía jayábin gádürü wügüriña barúina jagía ában wügüri le derégüdaali lúgbu.

4 Queísiti siñá lubei jachúlürün le ñí lubei Jesúsu ladüga jíbe güri-gia, ába jagídarun murúsun lueígiñe tábulugu múna loúgiñe le ñí lubei Jesúsu, ába jarárigüdüni sánditi ñígiñe tídan lubárari.

5 Dan le laríjnbalin Jesúsu jafíñen, ába laríñagun lun le sándibeí.

—Niraü, ferúdunawaali bifigoun.

6 Níñanu jádaangiñe arúfudajatiña lilúrudun Moisés ja ñúnbaña ñi, ába jasáminarun.

7 “¿Cásan uágu ladímureja gürígia le ítara? Lanábaguñeiga le Búngiu, ladüga úati ni ában gayáraati ferúduna lan figou lueidügüya Búngiu.”

8 Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara?

9 ¿Cáteitimasan ménreengunbei laríñawagún lun sánditi le. “Ferúdunawaali bifigoun”, o laríñawagún lun. “Sarába, budáboun bubárari, beíba?”

10 Narúfudaaliti jun luágu gabáfu nan, áu le Wügüri Garaüwarügüti lun ferúduna nan figou.

Ába laríñagun lun sánditi.

11 —Sarába, budáboun bubárari, beíba águyu.

12 Ába lásaarun sánditi lídan óra ligía, ába labúdunun lubárari, ába láfuridun nígiñe, aríagu sun ja ñibaña lun. Weíríti janígi ja ñibaña luágu cátei le, ába jíchugun uweíríguni lun Búngiu, aríñageina.

—¡Maríjñajágiwa cátei ítara buriti!

Lagúarun Jesúsu lun Leví lun lánigume

(Mt 9.9-13; Lc 5.27-32)

13 Nígiñe, ábaya lídin Jesúsu láru dúna, dan le jayárafadun sarágu gürígia lubádun, ába larúfudajan joun.

14 Lásun larúfudajan joun, ába lasígiruni leíbugun, ába laríjini Leví, le liraü Álfeó, ñun líña le ñi lubei lagúburajoúa liseínsuna gumádi. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

15 Murúsun óra lárígiñe, ñíñein Jesúsu eíga lúbiñe Leví, ñíñanu gíñeti sarágu agúburajatiña liseínsuna gumádi, jáma ámu gafígountiña ñun luágu dábula úara lúma, jáma láni disípulugu, ladüga sarágu jáña afálaruti.

16 Ja arúfudajatiña lilúrudun Moisés, jáma fariséogu, dan le jaríjnbalin eíga jáma sun wuríbatíña jagía (según jagía), ába jaríñagun joun láni disípulugu.

—¿Ída liñásan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gafígountiña?

17 Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía busénbaña surúsia. Máma lubeíti niábiña áluaja gürígia buítiña ligíbugiñe Búngiu, niábiña áluajaña ja gafígounbaña lun lasáansirún jóúserun.

Jálügüdüni Jesúsu luágu ayúnaruni

(Mt 9.14-17; Lc 5.33-39)

18 Luágu ában wéyu, dan le jayúnarun lánigu Juan jáma jánigu fariséogu lun jagúnfulirun lúma Búngiu, ába jayábin fiú gürígia álügüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnfulirun lúma Búngiu, ánjaña báni disípulugu mayúnaruntiña?

19 Ába louñabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajoútiña lídan ában maríei dan le níjein lan adári ñi jáma? Ánjein níjein lubeí adári ñi, siñáti jayúnarun, lúnti jeígin.

²⁰ Lachülürüba dan lun lanügüniwa adári jámagiñe, ligíameti jadáani lun jayúnarun.

²¹ ‘Máfadajoúntu anáanguni binádujaru táu gamísa to macháwaragungiru, ladüga le méme tífe gamísa to macháwaragungiru tajeiridaguboun to binádujarouboun dánme le tacháwaragun, laweíridatimaabati jeíríti.

²² Meserúnwati giñe bínu le isérigili lídoun ában ágei guéru le binádujali ladüga labouçhagubei bínu iséri guéru binádu dánme le liñúrún. Féridimeti bínu, féridi guéru. Bínu iséri lúnti leserúniwa lídoun guéru iséri.

Játüjan disípulugu türígu lídan wéyu le eméraaguagülei
(Mt 12.1-8; Lc 6.1-5)

²³ Ában wéyu le eméraaguagülei, eíbugeina líña Jesúsu jáu láni disípulugu labádinagua bunáguau, ába játüjan láni disípulugu türígu dan le jásügürün.

²⁴ Ába jariñagun fariséogu lun Jesúsu.

—¡Aríjabá joun bánígu! ¿Cásan uágu jadüga wadágimanu le moún lumuti ladügüniwa lídan wéyu le eméraaguagülei?

²⁵ Ába lariñagun joun.

—¿Malíjangidün luágu le ladügübei David luágu ában dan, dan le lálámachunbei, ligía jáu sun líbirigu?

²⁶ Ába lebélurun ligílisirugun dan le Abiatár lan fádiri le iñutimaabei, ába leíginun fein to sagraúboun, to majouáboun jeíginun ámu gürígia jaweidügüya fádírigu según lilúrurun Moisés, áni ru ligía joun gürígia ja lúmabaña. Mámati figou le ladügübei David ligíbugiñe Búngiu.

²⁷ Ába giñe lariñagun Jesúsu joun.

—Lun wügüri ladügüwa wéyu le eméraaguagülei, máma wügüri adügüwabei lun wéyu ligía.

²⁸ Ligía gabáfutina giñe, áu le Wügüri Garaüwarügüti, lun naríñagun cába lan gayára ladügüniwa lídan wéyu le eméraaguagülei.

3

Ában wügütri jiláali ában lújabu
(Mt 12.9-14; Lc 6.6-11)

¹ Ábaya lebélurun Jesúsu tídoun ában jalígílisin juríu, ñíñeinti ában wügüri jiláali ában lújabu.

² Jaríjati ja ñibaña ánjein lagáranijaba lubeí Jesúsu lun lídan wéyu le eméraaguagülei, lun jadárirun lidúnrun.

³ Ába lariñagun Jesúsu lun le jiláalibeí újabu.

—Sarába, ráramabá ya jagíbugiñe súngubei.

⁴ Ába lálügüdüniña ja jíbiri.

—¿Cátei lúnbei ladügüniwa lídan wéyu le eméraaguagülei, lun jíderawagüniwa gürígia ódi lun ladügüniwa wuríbati joun, lun leséfurúniwa jabágari ódi lun jígirúniwa lun joúnwen?

Sun jagía, ába jámanichun.

⁵ Ábati lariñaguniña Jesúsu láu igáñi lúma íruni ladüga tidére janígi. Ába lariñagun lun wügüri ligía.

—Tulébei bújabu.

Ába látuleruni, ába lareídagun.

⁶ Ába jáfuridun fariséogu, ába jagúmeserun adímureja jámagua jáma gíñe lánigu Heródes ida lúba lan jáfaruni Jesúsu jilágubei.

Sarágu gürígia láru dúna

⁷ Ába lídin Jesúsu jáu lání disípulugu lárún dúna, ába jafálaruni sarágu gürígia Galiléana.

⁸ Dan le lagaambúnbei luágu óunwenbun buri cátei le ladügübei, ába jayábíngua gürígia Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogiñe, lúma Sidóngiñe lun jarjini.

⁹ Ligía laríñagunbei Jesúsu joun lání disípulugu lun aráanseñu jamá ában ugúnein lubá lueí jámuruduni sarágu gürígia jagía,

¹⁰ ladüga queí gíbeeña lan lareídaguagüdün, sun sánditiña, ába jáguragun jóungua luágún lúnrügü jagúuruni lun lareídaguagüdüniña.

¹¹ Dántija le jarjini ja gawágubaña espíritugu wuríbatíña, ábaja jájuduragun ligíbugiñe, ába jagúaragun espíritugu jádaangiñe.

—Liraü Búngiu amürü.

¹² Ába lewéridiruniña Jesúsu lun maríñagun jamá cáteiñein lan.

Lanúadiruniña Jesúsu dúusu apóstolugu

(Mt 10.1-4; Lc 6.12-16)

¹³ Lárigiñe, ába lamúdeirun Jesúsu luágún ában wübü ñí lubei lagúara joun ja labúseerubaña queísi loúnagülegu, ába jayábin lun.

¹⁴ Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buíti lánina asálbaruni.

¹⁵ Ába líchugun ubáfu joun lun jareídaguagüdün sánditiña lúma lun jaságajan espíritugu wuríbatíña.

¹⁶ Niján jiri dúusu wügüríña jagía. Simón, le únbei lagúaja Jesúsu Pédro,

¹⁷ Jacóbo láu Juan le lamúlen, ja lirájüñü Zebedéo, ja únbaña lagúaja Jesúsu Boanérge—míni lan líra, Lirájüñü Wayújururu,

¹⁸ Andrés, Felípe, Bartolomé, Matéo, Tomás, Jacóbo le liraü Álfeo, Tadóo, Simón—ában meja wügürí le áfaaguti lun jawáanserun juríu,

¹⁹ lúma Júdas Iscarióte le alúgurubalin Jesúsu.

Aríñagatiña luágu lubáfu lan Máfia lúmabei Jesúsu

(Mt 12.22-32; Lc 11.14-23, 12.10)

Lárigiñe, ába jagíríbudun járiogún, ába jebélurun tídoun ában múna,

²⁰ ábaya jóúndaragun sarágu gürígia ñi darí lun madáani jamá ni lun jeígin.

²¹ Dan le jasúbudirunbalin lidújeñu Jesúsu ca lan ásügürübei, ába jayábin lún yebe janügüni, ladüga jaríñagun gürígia luágu wuríbaali lan lichügü.

²² Níñanu arúfudajatiña lilúrudun Moisés ja achülürübaña Jerusaléngiñe, ába jaríñagun.

—Wügürí le, níjein Beelzebú, le Máfia, le jábuti espíritugu wuríbatíña, lúma, láu lubáfu Máfia laságaja espíritugu wuríbatíña.

²³ Ábati lagúarun Jesúsu joun lun jayárafadun lubádun, ába líchugun ában jémpulu joun, ába laríñagun.

—¿Ída lúba gayára lan laságaruni Máfia Máfia guánarügü?

²⁴ Furúmieguarügü arúeijani le afánreinraguti lun jageíndagun jámagua, lagünrinchaguba,

²⁵ áni ánjein fánreingujaña lubeí idújeñu ladüga wuríbu jádaangua, siñábei jadúrarun idújeñu jagía queísi idújeñu.

²⁶ Ánjein lubei jamúgati afáreinragua Máfia, lageíndaguame lúmagua, siñábei ladúrarun, lagúmuchagülerügübei le.

²⁷ Úati ni ában lun lebélorun lúbiñoun ában wügüri le jéreti lun lanúgüni lílagu ánjein magúragun lan wügüri jéreti ligía furúmiñe. Ítara rügüñein gayára lan lanúgüni lílagu.

²⁸ Láu sun ninárün nariñagun jun luágu gayára lan ferúdunawa lan sun figou lúma sun wuríbani le lariñagubei güriquia,

²⁹ Iueidügüya lun jadímurejan wuríbati luágu Sífiri Sándu, siñábei ferúdunawa lan figou líra, leréderuba lidúnrun lun sun dan.

³⁰ Lariñagunbalin Jesúsu líra, ladüga jariñagun luágu lubáfu lan Máfia lubáfu Sífiri Sándu le luágubei.

Lúguchu Jesúsu jáma lamúlenu

(Mt 12.46-50; Lc 8.19-21)

³¹ Lárigiñe, ába tachülürün lúguchu Jesúsu jáu lamúlenu tubádun múna to ñi lubei Jesúsu, ába jeréderun bougudi, ába jounagüdün luágu.

³² Játi ñúnbaña geyégu láu Jesúsu, ába jariñagun lun.

—Nurántia búguchu jáu bamúlenu bougudi, jáluajañádibu.

³³ Ába lariñagun joun.

—¿Cági nóguchuboun jáu namúlenu?

³⁴ Ába lariagun jawágun ja ñúnbaña geyégu láu, ába lariñagun.

³⁵ —Añája nóguchu jáu namúlenu, ladüga furúmieguarügü ja adügüti lugúndan Búngiu, jagía namúlenubaña, nítunu, nóguchu.

4

Jémpulu luáguti ábunaguti

(Mt 13.1-9; Lc 8.4-8)

¹ Ábaya lagúmeserun Jesúsu arúfudaja láru dúna, ába joundaragun sarágu güriquia le ñi lubei. Quei gíbeyaaña lan güriquia ñi, ába ládinun Jesúsu údoun ában ugúnein to ñiboun dúnarugu. Ába lañúurun ñi, ába jeréderun sun güriquia láru béya.

² Ábati larúfudajan sarágu cátei joun láu jémpulu, lariñaga joun.

³ —Agáamba jumána. Ñiñein ában ábunaguti, ába láfuridun ábunagua.

⁴ Lídan afúrujeina láani líla nádü, ába laburujan murúsun lídaangiñe luágun úma, ába jayábin dunúru, ába jeigini.

⁵ Líbiri, ába laburujan labádinaguouñ dübü le ñi lumuti úa lan sarágu múa, ába labouçhun furése ladüga majúllin lan múa.

⁶ Dan le lásüdüwéyu, ába lásaurün, queíti málagüle lan, ába loúnwen.

⁷ Líbiri ílaü, ába laburujan labádinaguouñ jíyu, ába laweínamudun jíyu úara lúma, ába lañáradaguagüdüni, magínduntiti nádü ligía.

⁸ Níjeinti lídaangiñe, áburujati lídoun múa buíti, ába labouçhun, ába laweínamudun, jma lubuídun alúbajoúti lídaangiñe! Níjein lídaangiñe, íchuguti darándi águu luágu cáda ában águu, líbiri rúti úruwa-wein, líbiri, san.

⁹ Ábati lariñagun joun.

—Ja garígeirugubaña lun jagáambun, agáamba jamá.

Le lébubei larúfudajan Jesúsu joun güriquia láu jémpulu

(Mt 13.10-17; Lc 8.9-10)

¹⁰ Lárigiñe, dan le leréderunbei Jesúsu lábugua, ába jayábin láni dúusu disípulugu jama jíbiri lánigu, ába jálügüdüni ca lan lílabei jémpulu le.

¹¹ Ába lariñagun joun.

—Jugúya, subúdigüda láali Búngiu cátei arámudaguati le lánina larúejan jun, ánjaña ja mebéresenbaña láu lerérun, láu jémpulu lariñawagúa cátei luáguti larúejan joun,

¹² lun dánme lan jaríjin, ibídiñe lámuga joun ca lan laníchigubei cátei le jaríjubei, dánme jagáambun, úa lámuga gunfaráanda jamá, lun lásíñerun jagíribudun lun Búngiu lun ferúdunawa lan jafígoun.

*Lafúnraanguagüdüni Jesúsu jémpulu luáguti ábunaguti
(Mt 13.18-23; Lc 8.11-15)*

¹³ Ába lariñagun joun.

—¿Úatisan gunfaráanda jumáni le? ¿Ída lubági gunfaráanda jumáni líbiri jémpulu?

¹⁴ Le ábunagubalin líla nádü, ítara líña quei le apúrichjabalin Lerérun Búngiu.

¹⁵ Añájein gürígia, ítara jáña quei úma le uágunbei láburuja lídaangiñe líla nádü, ába jagáambuni Lerérun Búngiu, lárigiñe jagáambuni, ába liábin Máfia, ába lagídaruni dimúrei le abunúbei tídan janígi.

¹⁶ Jíbiri gürígia, ítara jáña quei dübü le abádinaguóunbei láburuja lídaangiñe líla nádü, ába jagáambuni Lerérun Búngiu, ába jerésibiruni láu ugúndani.

¹⁷ Quei márügüdün lubei Lerérun Búngiu tídan janígi buídu, madúрати jádan, dánti le larijíníwa jábun, o jeibaajóuniwa lan lueigiñe Lerérun Búngiu, magúraasuntiña.

¹⁸ Jayábin jíbiri, ítara jáña quei jíyu le abádinaguóunbei láburuja lídaangiñe líla nádü, ába jagáambuni Lerérun Búngiu,

¹⁹ weiritimaati jafúudun luágu cátei le lánina ibágari le, ába leyéeduniña irisini. Sun le, ába láfaruni Lerérun Búngiu tídaangiñe janígi, mígiruntiti lun lalúbajóun jádan gürígia jagía.

²⁰ Añájein giñe gürígia, ítara jáña quei múa buíti le ídounbei láburuja lídaangiñe líla nádü, ába jagáambuni Lerérun Búngiu, ába jerésibiruni, alúbajóuati cátei buíti jádaangiñe. Buíti jagáburi quei líla nádü le íchugubei darándi águu luágu ában, o úrúwa-wein, o san.

*Jémpulu luáguti lámpu
(Lc 8.16-18)*

²¹ Ába lariñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábula líchugúa lun larúgoundagágdün múnada.

²² Úati lubeíti ní cáta le arámudaguati lun mafúnraangudúnbei lan, úa ligía ní cáta le ibídiñewati lun masúbudirúnwabei lan.

²³ Agáamba jumána, jugúya le garígeirugubei lun jagáambun.

²⁴ Ariñagati giñe joun.

—Toúnigi jumátia lun jagúnfulirun lúma inárüni le jagáambunbei. Láuba jagúnfuliruni, gunfaráandatima jumáni le nariñagubei jun.

²⁵ Ítara líña, gürígia le aténirubei buídu lun nerérun, gunfaráandatima lumúti, ánjeinti le meténibeí lun, labúleidubei sun le agáamba lálalibeí.

Jémpulu luáguti nádü le aweíridubei

²⁶ Ariñagati giñe Jesúsu.

—Ítara líña larúeijan Búngiu quei le asúseredubei lun ában wügüri le ábunubei líla nádü lábugiñe múa,

²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chülü dan ába labouchun nádü, ába laweíridun, ibídiñeti lun ábunaguti ída líña lan lasúseredun.

²⁸ Múa guánarügü aráandarati, furúmiñe ába láfuridun ídibu, ñígiñe ába legélewejan, ñígiñe ába labuínchun ílewei láu ílaü.

²⁹ Dánti le funáli líla nádü, ába látüjóuniwa ladüga chülüjali lan dan lun lalúbajoún.

*Jémpulu luáguti tíla mostása
(Mt 13.31-32; Lc 13.18-19)*

³⁰ Ariñagati giñe Jesúsu.

—¿Cásan lenégebei larúeijan Búngiu, o ca jamúga jémpulu gayáraabei wíchuguni lúmoun?

³¹ Ítara líña quei ában tíla mostása le abunúti lábugiñe múa. Tíla mostása, ligía ában lídaangiñe ílaü le ñúraütimaabei ubouágu,

³² dan le labunún, ába laweíridun, ligía weíritimaabei tídaangiñe sun nádü, weínamuti lílímun dari lun gayára lan jeméraagun dunúru lábugiñe lamúñounga le líchugubei.

*Layúsuruni Jesúsu jémpulu
(Mt 13.34-35)*

³³ Ítara líñájei larúfudajan Jesúsu luágu larúeijan Búngiu joun láu sarágu jémpulu líbe le dari le ñí lumuti gayára lan gunfaráanda jamá.

³⁴ Marúfudajaanti ni cáta joun luágu larúeijan Búngiu mayúsurunga jémpulu. Ába lafúnraanguagüdüni sun jémpulu joun láni disípulugu dan le jagíarügü lan lúma.

*Lagálumaruni Jesúsu garábali lúma lugúdi barána
(Mt 8.23-27; Lc 8.22-25)*

³⁵ Wéyu méme ligía, dan le lagúñedunbei, ába laríñagun Jesúsu joun láni disípulugu.

—Queímoun loubáfurugun dúna.

³⁶ Ábati jígiruniña bürübünu gürígia jagía, ába janügüni Jesúsu tídan ugúnein to gádaanbaliña. Ñíñoun buri giñe ámu ugúnein úara jáma.

³⁷ Ába láfuragun ában garábali jéreti, ába lebélujan lugúdi barána tídoun ugúnein dari lún yebe tabuínchun láu dúna.

³⁸ Larúmuguñati Jesúsu tiyúna ugúnein baláñu tuágu ában ichügübarari. Ába jagágudajani, ába jaríñagun lun.

—¡Maésturu! ¿Mebéreseguntibusan láu wadíbiragua lan?

³⁹ Ába lásaarun Jesúsu, ába ladeñjan lun garábali, ába laríñagun lun barána.

—¡Maníba! ¡Derégüdagubá!

Ába lagálumadun garábali, ába darángila lan sun cátei.

⁴⁰ Ábati laríñagun joun láni disípulugu.

—¿Cásan uágu luweírinbei janúfude? ¿Cásan uágu maffínen jubeí?

⁴¹ Ába jeréderun láu luweírin janígi, ába jálügüdagun jámagua.

—¿Cátei funásan le, garábali lúma barána ñüdüntiña láu le lubeíbei?

5

*Ában wügürí Gadárana le gawágubei máfianu
(Mt 8.28-34; Lc 8.26-39)*

¹ Ába jachülürün loubáfurugun duna lídoun fulásu le gíríbeí Gadára.

² Lárígíñerügü láfuridun Jesúsu tídaangiñe ugúnein, ába liábin ában gürígia lídaangiñe ában umúajaü achígítí luágu dúbü luágun, wügürí ligía gawáguti ában espíritú wuríbati.

³ Lídan jabára jiláaña lagánoua áni úati ní ában gayáraati lagüraguni, ní láu güríngüri.

⁴ Güráguañája jamáali láu güríngüri luágu lugúdi lúma luágu lújabu, súnwandan látumuraguni, úati ní ában gayáraati lámuruduni.

⁵ Súnwandanja leíbugun áriebu wéyuagu agúarajeina luágu buri wübü lúma buri lídan jabára jiláaña íbiagua lúngua láu dúbü.

⁶ Dan le laríjínbalin gürígia ligía Jesúsu dísegiñein, ába leíbaagun lubároun, ába lájuduragun ligíbugiñe,

⁷ ába lagúaragun lun.

—¿Cásan uágu bemétera númoun, Jesúsu Liraü Búngiu le Íñutimaabei? Ayúmuraguatina bun luágu líri Búngiu lun masúfuriragüdün bánina.

⁸ Laríñagunbei ítara ladüga guméseeli lan Jesúsu aríñaga lun.

—¡Espíritú wuríbati, ígirabei gürígia le!

⁹ Ába lálügüdüni Jesúsu.

—¿Ca bíri?

Ába louñabun.

—Lejión níña ladüga gíbetiwa.

¹⁰ Ába jayúmuragun espíritugu jagía lun Jesúsu lun moúnajan lániña bougudin lueí fulásu ligía.

¹¹ Queíti ñíñanu lan sarágu büüruju eíga ñi luágu wübü,

¹² ába jayúmuragun espíritugu wuríbatiña jagía lun.

—Oúnaja báwa jádoun büüruju jára, rúba üma woun lun webélurun jádoun.

¹³ Ábati líchugun Jesúsu üma joun, ába jáfuridun lueí gürígia ligía, ába jebélurun jádoun büüruju. Níñanu jawára bián-mílu büüruju. Ába jáguragun büüruju jagía jóngua lueígiñe ában gudúngu, ába jáburujan baránajoun, ába jañáradagun.

¹⁴ Ábati janúfudedagun ja oúnigirubaliña büüruju jagía, ába jeíbaagun abájüdaguei le asúseredubei ubúruгу lúma áraabu. Ába jayábingua gürígia aríjei ca lan asúseredubei.

¹⁵ Dan le jachülürünbei le ní lubei Jesúsu, ába jaríjini gürígia lé meja gawágubei espíritugu wuríbatiña ñun líña, táuñein giñe lanáangun, areídaguuali, ába janúfudedagun.

¹⁶ Játi aríjubalin, ába jabájüdaguni le asúseredubei lun gürígia lé buga gawágubei espíritugu wuríbatiña lúma jawáguti büüruju, joun.

¹⁷ Ábati jayúmuragun lun Jesúsu lun láfuridun lídaangiñe jageíra.

¹⁸ Dan le ládinun Jesúsu tídoun ugúnein, ába layúmuragun wügürí lé buga gawágubei espíritugu wuríbatiña lun lun lídin lúma,

¹⁹ májati Jesúsu, aríñagarügüti lun.

—Beíba júbiñoun jámoun bidújeñu, ábame babájüdaguni sun le ladügübei Babúreme Búngiu báu, ída líña lan bagúdemedun lun.

20 Ába lídin, ába lagúmeserun abájüdaguei sun le ladügübei Jesúsu láu lídan sun fulásu Decápolis, ába laweíridun janígi súngubei.

*Liraiü Jáiro, túma würi to agúurubarun lanáangun Jesúsu
(Mt 9.18-26; Lc 8.40-56)*

21 Dan le lagíribudunbei Jesúsu tídan ugúnein loubáfurugun dúna, ába jayábingua bürübünu güri gia le ñíjin lubei, ába leréderun ñi láru dúna.

22 Ábati liábin ában jádaangiñe tábuti jalígilisin juríu, gíríti Jáiro. Dan le laríjinalin wügüri le Jesúsu, ába lájuduragun lubádu lugúdi,

23 ába layúmuragun lun ítara.

—Nújein niraü touwe, queímoun bíchigei bújabu tuágu, areídagua támuga, mouñwen támuga.

24 Ába lídin Jesúsu lúma, sarágu jáña güri gia afálarutiña, ába buriti jámurudaguni Jesúsu.

25 Jádaanti sarágu güri gia ja, ñíñoun ában würi sánditu, dúusu irúmu táu láu lésejan jítaü tídaangiñe.

26 Súfurijaru sarágu jámangiñe surúsiagu áni gásta táali sun le túmati, mareídaguntu, gáwoun gueíñarügü.

27 Ligía tagáambun ladímurejoün luágu Jesúsu, ába tiábin lanáangiñe jádan sarágu güri gia, ába tagúurunun lanáangun,

28 ladüga tariñagun túnguarügü. “Láurügüme nagúurunun lanáangun nareídaguba.”

29 Lídan óra ligía, ába leréderun lésejan jítaü tuei, ába tasándiragun túngua luágu areídaguau lan.

30 Ábati lasándiruni Jesúsu luágu areídaguagüdaali lan güri gia láu lubáfu, ába lagáraragun jawágun güri gia ja lanáangiñébaña, ába lálügüdajan.

—¿Ca agúurubei tuágu nanáangun?

31 Ába jaríñagun láni disípulugu lun.

—Ariagu biñátia lun jíbe güri gia ya luágu murúgu jáña lan, ¿álügüdajágidibu ca lan agúurubei buágu?

32 Ába lariaajan Jesúsu áluaja ca lan agúurubei luágu.

33 Ába tiábin würi tugúya adádagareina láu anúfudei, subúdiñutei le asúseredubei tun, ába tájuduragun ligibugiñe, ába tariñaguni sun inárüni lun.

34 Ába lariñagun Jesúsu tun.

—Niraü, areídaguadibu ladüga bafiñen. Beíba láu darángilaü, areídaguañu lídaangiñe bisáandi.

35 Ñigili Jesúsu adímureja, ligía jayábin lúbiñegiñe wügüri lé buga ñüdünbei óugei luágu tisáandi liraü, ába jaríñagun lun túguchi irájü tugúya.

—Jilátia biraü, ¿ca uágu bebéreseja lun maésturu guetó?

36 Agáamba lumúti Jesúsu le jaríñagubei, ába lariñagun lun wügüri ligía.

—Manúfudedabá, affíñerügüba.

37 Májatiti jóudin ámu lúma lueídügüya Pédro, Jacóbo lúma Juan le lamúlen Jacóbo.

38 Dan le lachúlürünbei lúbiñoun wügüri ligía, ába laríjini chagáguaü jáma güri gia ja ayájubaña, agúaraja.

39 Ába lebélorun, ába lariñagun joun.

—¿Cásan uágu jareíncha, ayájua buri jugúya ítara? Mouñwentutia irájü to, tarúmugüña.

⁴⁰ Ába jéjerajan láu. Ábati láfuridagüdüniña Jesúsu súngubei ñígiñe, ába lanügüni túguchi irájü túma túguchu jáma ja ñüdünbaña lúma, ába lebélorun le ñíjin tubei irájü.

⁴¹ Ába lárügüdüni tújabu, ába laríñagun tun.

—Talíta, cümi—lílá líra. Niraü, sarába.

⁴² Lídan óra ligía, ába tásaarun irájü tugúya, ába teíbugun. Weíyaraüjaru, dúusu irúmu táu. Ába laweíridun janígi gürígia ja ñíbaña.

⁴³ Ába líchugun Jesúsu dimúrei derégüdati joun lun mabájüdagun jamáni ni ca un, ába laríñagun joun lun jíchugun eíginí tun.

6

Jesúsu lídan fulásu le Nazarét (Mt 13.53-58; Lc 4.16-30)

¹ Ába lídin Jesúsu ñígiñe, ába lagíribudun lageíroun, ába jóudin láni disípulugu lúma.

² Dan lachülürün wéyu le eméraaguagülei, ába larúfudajan tídan jalígílisin juríu, sarágu jáña gürígia agáambeí, ába laweíridun janígi láu larúfudajan, ába jaríñagun.

—¿Jalía funásan lafúnrendeirei gürígia le sun le? ¿Cáteisán lichú áu le luágubei? ¿Ída líñásan gayára lubei ladáagun miláguru?

³ Saráfangeíga le tiraü María le, líbugaña Jacóbo, José, Júdas, lúma Simón, ñáñanu gíñe lítunu wáma.

Ába jíchugun mabájüdüni luágu.

⁴ Ába laríñagun Jesúsu joun.

—Sun gürígia, gúndaatiña láu ában proféta jaweídügüya ja lupáisanun jáma lidújeñu, jáma ja tílana lúban, jagía rügüñanu íchíga mabájüdüni luágu.

⁵ Ligía lásiñerunbei ladügün ámu miláguru ñi lueídügüya líchugun lújabu jawágu biñáraü sánditiña, ába lareídaguagüdüniña.

⁶ Weirititi lanígi láu mafíñen jamá. Lárígiñe, ába leíbuguni lirájüñü fulásu, arúfudajeina.

Loúnajaniña Jesúsu láni disípulugu apúrichija (Mt 10.5-15; Lc 9.1-6)

⁷ Ába loúnajan jawágu láni dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatíña.

⁸ Rúti dimúrei joun lun manügün jamá ni cáta luágu jeíbugun lueídügüya bádun, moún lumuti janügün ni fein, ni ságü, ni seínsu,

⁹ lun geídi tan jasábadun, lun mabíaman tan jasímisin.

¹⁰ Ába gíñe laríñagun joun.

—Dánme le jebélorun lídoun ában fulásu apúsaraja, reídei jumá ñi tídan ában méme múna darí jáfuridun lídaangiñe fulásu ligía.

¹¹ Ánjaünti merésibirúniwa lídan ában fulásu, mája jagía jagáambunün, furíjuma ñígiñe, ábame jáfuruduni calíqui lueígiñe jugúdi, líseínime magúndani jáu lílana fulásu ligía, ígira jumáña quei jadáriragun jóungua. Le ninárün jáu luágu dánme lan lachülürün luwéyuri Búngiu lun lagúseragüdüniña sun gürígia, maweíribei jabeichúniwa Sodómana jáma Gomórrana quei lílana fulásu le merésibirunbalün.

12 Ábati jáfuridun, ába japúrichijan joun gürígia luágu lúnti lan jasáansiruni ligáburu jóuserun.

13 Sagátíña gíñe sarágu espíritugu wuribatíña jawéi gürígia, jurúgua jagía aili jawágu sarágu sánditiña, ába jareidaguagüdüniña.

Loúnwen Juan le abásteragüdjabei

(Mt 14.1-12; Lc 9.7-9)

14 Queiti ebaajali lubei luáguti Jesúsu lídan sun fulásu, ába gíñe lachülürün lábun lagáambun urúei Heródes. Sarágu jáña aríñagutiña.

—Saráya Juan le abásteragüdjabei lídaangiñe oúweni, ligía luweírinbei lubáfu.

15 Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

16 Dan le lagáambunbalin Heródes sun le, ába laríñagun.

—Juan le, le nadürüragüdübei ichügü, saráaya lídaangiñe oúweni.

17 Lé meja asúseredubei, oúnajali meja Heródes adáürei Juan, ába lagüraguni láu güringüri furisunrugu tadüga Heródias. Würi tugúya, lúmari meja Felipe, le lamúlen Heródes, ába lanügünun Heródes lúmarime.

18 Ába meja laríñagun Juan lun Heródes.

—Moún lumuti bagámaridunun lúmari bamúlen.

19 Ába liyéreegudun Juan tun Heródias, ába tabúseerun táfaruni jilágubei,

20 siñá tumuti ladüga subúdi lan lun Heródes luágu ában lan wügüri le eíbугuti buídu lúma Búngiu Juan, áni ában lan wügüri esériwiduti lun Búngiu, janúfudetiti luei. Ligía mája lubei lun tadügün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani.

21 Ába tadáriruni Heródias ticháansin dan le lagúnfulirun Heródes irúmu, ába ladügün fédu joun gumádimatiña jáma jábutigu súdaara jáma ámu buri gürígia weírgutiña ja Galiléabaña.

22 Ába tebélurun tiraü Heródias ñi lubei fédu le, ába tabínajan, gúndaatiti Heródes jáma sun ja ñibaña eíga lúma láu tabínajan irájü to, ába laríñagun tun.

—Amúriajabei le babúseerun núma, níchugubei bun.

23 Rúlumuti lerérun tun luágu líchugubei lan furúmieguaügü cátei le tamúriajan lúma tun, gayára lan lamídan lan fulásu le ñi lubei larúeijan tamúriaja.

24 Ába táfuridun, ába taríñagun tun túguchu.

—¿Cábasan namúriaja lúma?

Ába taríñagun tun.

—Amúriajabei lábulugu Juan le abásteragüdjabei lúma.

25 Ába tebélurun irájü to furése le ñíjin lubei urúei, ába taríñagun lun.

—Buséntina lun bíchuguni lábulugu Juan le abásteragüdjabei nun lídan ában asiedu guelé guelé.

26 Ába lajírudagun urúei sarágu, quei rúlaali lan lerérun áni agáambagu jáña amísurajoútiña lun, májati lun míchu lubei lan le tamúriajabei lúma tun.

27 Furése furése, ába loúnajan urúei ában súdaara láu dimúrei lun lanügüni lábulugu Juan lun.

28 Ába lídin súdeara ligía furísunrugu, ába ladürürüni lábulugu Juan, ába lanügüni lídan ában asíedu. Ába líchuguni tun irájü tugúya, ába tíchuguni tun tóguchu.

29 Dan le jagáambunbalin lánigu Juan, ába jayábin lun janügüni lúgubu, ába jábununi.

*Leíagüdüni Jesúsu seíngü mílu wügüríña
(Mt 14.13-21; Lc 9.10-17; Jn 6.1-14)*

30 Lárigiñe jagíribudun láni Jesúsu apóstolugu, ába joúndaragun lúma, ába jabájüdaguni sun le jadügübei lúma le jarúfudajabei, lun.

31 Ába laríñagun Jesúsu joun.

—Jigóugu, queímoun weméraagua lídan ában fulásu le mageírawati.

Laríñagubaalin líra ladüga ñíñanu sarágu gürígia, jíbiri ñüdün, jíbiri ñübin, darí lun madáani lan Jesúsu jáma láni disípulugu ni lun jeígin.

32 Ába joúdin tídan ába ugúnein lídoun ában fulásu mageírawati.

33 Sarágu jáña aríjiti joúdin, dan le jasúbudiruni luágu níjein lan Jesúsu jádan, ába jeíbaagun geyégu láu lagúnu lídaangiñe sun lirájüñü fulásu, ába jachülürün lubáragiñe lachülürün Jesúsu jáu láni disípulugu.

34 Dan le larárirunbei Jesúsu tídaangiñe ugúnein, ába laríjin sarágu gürígia jagúrabajañein, ába jagúdemedagun lun ladüga ítara jáña lan quei mudún ja moúniritiña. Ába lagúmeserun arúfudaja sarágu cátei joun.

35 Dan le dárüjali, ába jayábin láni disípulugu, ába jaríñagun lun.

—Dárüjalitia áni úatiña aganóutiña lídan fulásu le.

36 Oúnaja báña gürígia ja lun joúdin lídoun buri lirájüñü fulásu le yaráfabei lun jagáñijan fein, ladüga úati ni cáta ya lun jeígin.

37 Ába laríñagun Jesúsu.

—Rújuma eígin joun.

Ába jaríñagun lun.

—¿Gayáraati funági woúdin agáñija fein joun? Busénwati jamúga lebégi bián-san wéyu wadágimanu lun wabíjini seínsu lun wíchugun fein joun súngebui.

38 Laríñaga Jesúsu joun.

—¿Átiriñoungi fein júma? Jeíba aríjoun.

Dan le jaríjinun, ába jaríñagun lun.

—Seíngü fein jáma bián úduraü.

39 Ába lañúragüdüniña gürígia sagádirugu.

40 Ába jañúurun san san lúma dimí dimí san, queísi laríñagun joun.

41 Ába lanügünun Jesúsu seíngü fein to lújaburugu jáma bián úduraü ja, ába laríjin siélun, ába leteingiruni Búngiu tuágu, ába lagúbachagúnun, lárigiñe, ába lamúrusanun lun lichugunun joun láni disípulugu lun jafánreinjanun jádan gürígia jagía, fánrein jamáña gíñe bián úduraü jagía jádan súngebui.

42 Joútiña sun jagía químule.

43 Lárigiñe, ába jabuínchagüdüni dúusu faníñe láu tífe fein lúma úduraü ígiragúti.

44 Seíngüñanu mílu wügüríña eígitíña, mabájüdünga würíña jáma irájüñü.

*Leíbugun Jesúsu ligíbuagu dúna
(Mt 14.22-27; Jn 6.16-21)*

45 Ába ladinagüdüniña Jesúsu láni disípulugu tídoun ugúnein lun jánjiñuragun lubá lun jachülürün Betsáida, sun niján lan ayoúragua joun gürgia.

46 Dan le ñüdünjaña, ába lídin luágu wübü ayúmuragua lun Búngiu.

47 Dan le lagüñedunbei, lamídaanjaru dúna ugúnein jáu disípulugu, Jesúsu rugáali lábugua múarugu.

48 Ába laríjin luágu jénreenguja lan joun lun jénjunjan ladüga jabárouñein lan garábali. Lubá larúgan, ába lídin Jesúsu jawágun eíbugeina ligíbuagu dúna, lásügürá yebe jáu.

49 Dan le jaríjini eíbuga ligíbuagu dúna, ába jarítangun luágu úfiaü lan, ába jagúaragun,

50 ladüga sun jagía aríja jamúti, ába janúfudedagun. Ába ladímurejan joun, ába laríñagun.

—¡Ganígi jumá! ¡Manúfude jumá, áu le!

51 Ába ladinun tídoun ugúnein jámoun, ába lagálumadun garábali. Ába laweíridun janígi láu,

52 ladüga úagili lan gunfaráanda jamáni miláguru le ladügübei táu fein, luágu gabáfu lan lun sun cátei, derégili jachügü.

Lareídaguagüdüniña Jesúsu sánditiña Genésaret

(Mt 14.34-36)

53 Ába jánjiñuraguni dúna, ába jachülürün Genésaret, ába jagürünun ugúnein láru dúna.

54 Quei jaráriragun tídaangiñe ugúnein, ítara jasúbudiruni lílana fulásu luágu Jesúsu lan.

55 Ába jeíbaagun lídoun sun fulásu aríñaga luágu chülüjali lan, ába jagúmeserun gürgia anáaja sánditiña tídan jabáari le ñíjin lubei jagáamba luágu njein lan Jesúsu ñi.

56 Súnti fulásu ñíjin lumúti lebélera, ubúruyu yebe, lirájüñü yebe fulásu, áraabu yebe, ába jíchaajoun sánditiña úmada, ába jamúriajan luma lun lígiruniña lúnrügü jagúurun sánditiña jagía luágu táru lanáangun. Súnti ja agúurubaña luágu, areídaguatiña.

7

Cátei le adügübalin gürgia lun marúman lan ligíbugiñe Búngiu

(Mt 15.1-20)

1 Ába jayábin fariséogu jáma jádaangiñe arúfudajatiña lilúrudun Moisés ja ñübinbaña Jerusaléngiñe, luágun Jesúsu.

2 Ába jaríjin luágu añájein lan jádaangiñe disípulugu machíbun jamúti jájabu lubá jeígin según jagáburi juríu.

3 (Falá jamuti fariséogu jáma jíbiri juríu binádu jagáburi binádu jagübürigu lun meígin jamá, machíbunga jameí jájabu sarágu weíyaasu.

4 Dan le jayábin mágidirugugiñe, meíginbaña magúnfulirunga jagía láu jachíbuni jájabu. Njein buri giñe sarágu luwúyerigu igáburi jafálarun, quei buri lachibúniwa wéru, soúderu, boólu, asiedu.)

5 Ábati jálügüdüni fariséogu jáma arúfudajatiña lilúrudun Moisés jagía, Jesúsu. —¿Cásan uágu mafála jabálin báni disípulugu binádu jagáburi binádu wagübürigu, jeíginbei láu liwíye jájabu?

6 Ába loúnabuniña Jesúsu.

—Linárün proféta Isaías, dan le laríñagunbei juágu luágu ámu lan jigáburi luei le áubei jarúfudagua júngua. Aríñagati.

Gürígia ja, jayumarurügü jíchiga inébesei nun, líña Búngiu, ánjein tídan janígi, mebéresentíña náu.

⁷ Málati jájuduragun nun,

ladüga lé rügüñein jagúmadijan wügüríña jarúfudaja.

⁸ Ába laríñagun Jesúsu.

—Ígira jumáli lagúmadijan Búngiu lun jafálaruni binádu jagáburi binádu gürígia. lachibúniwa soúdienu, wéru, lúma cátei líbeina líra.

⁹ ¡Maésturugu gíñe buítiña jugúya, ígira jumúti lagúmadijan Búngiu lun jafálaruni binádu jigáburi!

¹⁰ Aríñagati meja Moisés. “Inébe jamá bagübürigu bun, le anábagubaliña lagübürigu, jilála.”

¹¹ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Siñáti nideragunibu ladüga sun le nómabei, aríñagaadina luágu lun lan níchuguni lun Búngiu”,

¹² Luágu furúmieguarügü lan le aríñaguti ítara, mámaali lan lúnti líderaguniña lagübürigu.

¹³ Láu líra, mebégigüda jumáli lagúmadijan Búngiu lun jafálaruni binádu jigáburi, adüga jugúya sarágu cátei líbeina líra.

¹⁴ Ábaya lagúarun Jesúsu joun gürígia ja níbaña, ába laríñagun joun.

—Agáamba jumána, sun jugúya, gunfaráanda jumáname.

¹⁵ Úati ni cáta ebéluruti lídoun gürígia lun laríbadagüdüni ligíbugiñe Búngiu, le áfuridubei tídaangiñe lanígi gürígia, ligía aríbadagüdübalin ligíbugiñe Búngiu.

¹⁶ Jugúya le garígeirugubei lun jagáambun, agáamba jumána.

¹⁷ Dan le lígiruniña Jesúsu gürígia jagía, ába lebélorun múnadoun, ába jálügüdüni láni díspulugu luágu jémpulu le.

¹⁸ Ába laríñagun joun.

—¿Úati lubei gíñe gunfaráanda jumá? ¿Úati gunfaráanda jumáni luágu sun lan le ebélurubei bougudigiñe lídoun gürígia siñá lan laríbadagüdüni

¹⁹ ladüga mebéluti tídoun lanígi, lurágeirugun lebéloru, nígiñe ábaya láfuridun lídaangiñe?

Láu líra laríñaguña luágu sun lan eígini, jarúmati.

²⁰ Aríñagati gíñe.

—Le áfuridubei lídaangiñe gürígia, anáti líra, wuríbagüda lumúti,

²¹ ladüga lídaangiñe gürígia o tídaangiñe lanígi láfurida lagübüri samínaü, adultériu, salúfuri, áfarajani,

²² íwerujani, wámajabúni, iyéreejabúni, iyéeni, marícharagun lan ibágari, gimúgaü, marásualugú, anáanguni únguaü, medéraaguaguduni.

²³ Sún buri cátei wuríbati le, tídaangiñe lanígi gürígia liábin, ligíati mabuídundagüdübalin ligíbugiñe Búngiu.

Ában würi teréncha to afíñeruboun luágu Jesúsu

(Mt 15.21-28)

²⁴ Ába lídin Jesúsu nígiñe loubawagun Tíro lúma Sidón. Ába lebélorun tídoun ában múna áni mabúseerunti yebe lun lasúbudiruni ni ában. Siñáti larámudagun,

²⁵ furése, ába tagáambun ában würi luágu, túguchu ában irájü gawágotu ában espíritu wuríbati. Ába tiábin, ába tájuduragun ligíbugiñe Jesúsu.

26 Würi tugúya, máma juríu, Síro-Feniciána. Ába tamúriajan lúma Jesúsu lun laságaruni espíritu wuríbati le tuei tiraü.

27 Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuíduntí lun tagídarúniwa feín jaweí isáanigu lun tíchugúniwa joun ouñli.

28 Ába touñabuni.

—Anja Nabúreme, ouñli ja lábugiñebaña dábula gayáraati giñe jeígin tídaangiñe tífe feín to jágújaboutun isáanigu.

29 Ábati laríñagun Jesúsu tun.

—Adímurejadibu buídu, gayáraajali bídin, furíja espíritu wuríbati tídaangiñe biraü.

30 Dan le tachülürün múnada, ába tadárirunun irájü tídan gabána, furíjali espíritu wuríbati tídaangiñe.

Lareidaguagüdüni Jesúsu ában magáambaditi, maríñagadi

31 Ába láfuridun Jesúsu louúbawagugiñe Tíro, ába lásügürün Sidóngiñe lúma lídaangiñé buri fulásu lánina Decápolis, ába lachülürün luágun barána Galiléa.

32 Ñi janüga ában wügüri magáambaditi, dagádaga lerérun lun, ába jamúriajan lúma lun líchuguni lújabu luágu lun lareidaguagüdüni.

33 Ába ladiñurun Jesúsu ñígiñe láu jaweí gürígia, ába ládaruni bián lirájüñü lújabu larígeirugun, ába lásuerun, ába lájurudunun liñéñe láu arürei.

34 Ába laríjin siélun, ába lawáragun, ába laríñagun.

—¡Efata! —míni lan líra. ¡Junrénba!

35 Ába lánjunrenchun larígeirugu magáambaditi ligía, ába tánjingichun liñéñe lun ladímurejan buídu.

36 Ába laríñagun Jesúsu joun lun mabájüdagun jamáni ni ca un, létima laríñagun joun lun mabájüdagun jamáni, ligiatima jabájüdaguni.

37 Ábati buri laweíridun janígi sarágu, ába jaríñagun.

—Adüga lumúti sun cátei buídu, darí lun lagáambagüdüniña magáambaditiña, adímuregüda láña maríñagaditiña.

8

Leigagüdüni Jesúsu gádürü mílu gürígia (Mt 15.32-39)

1 Lídan dan ligía, ábaya jóundaragun sarágu gürígia áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

2 —Gudémetiña gürígia ja nun ladüga ürüwa wéyu jáu núma ya áni úaali ni cáta jáma lun jeígin.

3 Anjaña nouñaja águyu meíginga, ladágaruba falálaü jawágu ümada, ladüga añájein jádaangiñe, díseti ñígiñe lumúti jayábin.

4 Ába jóunabuni láni disípulugu.

—¿Ída lubáti jeigagüdüniwa ya lídan fulásu le mageírawaguti?

5 Ába lálügüdüniña Jesúsu.

—¿Átiriñoun feín júma?

Ába jaríñagun lun.

—Sédü.

⁶ Ába lañúuragüdüniña güriña múarugu, ába lanügünun sédü fein tugúya lújaburugu, ába líchugun eteíngiruni lun Búngiu. Ába lagúbachagunun, ába lamúrusujanun, ába líchugunun joun láni disípulugu, ába jafánreinjanun jádan güriña jagía.

⁷ Níñanu giñe átiri jarájüñü úduraü jáma, ába líchugun eteíngiruni jawágu, ába lafánreinragüdüniña.

⁸ Joutiña sun jagía químule, buíngüdagíña sédü faníñe táu tife to ígiraguboun.

⁹ Yaráfañanu joun gádürü mílu wügüriña. Ába loúnajaniña Jesúsu águyu,

¹⁰ ába ládinun tídoun ugúnein jáma láni disípulugu, ába joudin Dalmanutoún.

Jamúriajan fariséogu miláguru lúma Jesúsu

(Mt 16.1-4; Lc 12.54-56)

¹¹ Ába jayábin fariséogu, ába jagúmeserun asígeneja lúma Jesúsu. Lúnti jarjín lábun, ába jamúriajan lun larúfudun ában miláguru joun, siélugiñe.

¹² Ába lawáragun Jesúsu weíri, ába lariñagun.

—¿Cásan uágu jamúriaja güriña ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiruniña Jesúsu, ábaya ládinun tídoun ugúnein, ába lídin loubáfurugun dúna.

Jarúfudajan fariséogu quei ísi

(Mt 16.5-12)

¹⁴ Bulíei jamútiti disípulugu janügün eígin, ában rügüñoun fein jáma tídan ugúnein.

¹⁵ Ába lewéridiruniña Jesúsu, lariñaga joun.

—Tounigi jumátia lueí jisite fariséogu lúma lísite Heródes.

¹⁶ Ába jariñagun disípulugu jádaangua.

—Ladúgatia meígan wamá fein lariñagubei ítara.

¹⁷ Ába lasúbudiruni Jesúsu jarítagun, ába lariñagun joun.

—¿Ca uágu jariñaga luágu meígan jumá fein? ¿Úagili gunfaráanda jumá, meféen jugúya? ¿Ítara lidére jichügü?

¹⁸ ¿Maríjintün láu jágu, magáambun jugúya láu jarígeirugu? ¿Marítagun jumáli?

¹⁹ Dan le nafánreinjanbarun seíngü fein jádan seíngü mílu wügüriña, ¿átiriñoun faníñe táu tife jabúdun?

Ába jariñagun.

—Dúusu.

²⁰ —Ángi dan le nafánreinjanun sédü fein jádan gádürü mílu, ¿átiriñeingi faníñe buin jabúdun?

Ába jariñagun.

—Sédü.

²¹ Ába lariñagun joun.

—¿Úagili gunfaráanda jumá luágu máma lan tuágu fein nadímureja?

Lareidaguagüdüñ Jesúsu ában maríjinti Betsáida

²² Lárigiñe, ába jachülürün Betsáidoun, ába lanügüniwa ában maríjinti lun Jesúsu, ába jayúmuragun lun lun lagúurun luágu.

23 Ítara líña lárügüdüni Jesúsu maríjinti ligía, ába lanügüni bougudín luei fulásu ligía. Ába lájurudagun arürei luágu lágu, ába líchuguni lújabu luágu, ába lálügüdüni ánjein gayáaraarü lubei laríjin.

24 Ába laríjin, ába laríñagun.

—Arija numútiña wügüriña, naríjiniña quei tídibu wéwe, eibugeina.

25 Ábaya líchuguni Jesúsu lújabu luágu lágu, ába laríjin güriía ligía láu goúnigi, ába lareidagun, ába laríjini sun cátei furáangu.

26 Ába loúnajani Jesúsu águyu, aríñageina lun.

—Mebélurabátia ubúrugun, maríñagunbeíme lun ni ában ñi.

Laríñaguni Pédro luágu Jesúsu lan Crístubei

(Mt 16.13-20; Lc 9.18-21)

27 Lárigiñe, ába lídin Jesúsu jáu láni disípulugu lídoun buri lirájüñü fulásu le geyéguabei láu ubúrugun Cesaréa le Filípo. Úmada, ába lálügüdüniña láni disípulugu, laríñaga joun.

—¿Cátanasan jaríñagun güriía?

28 Ába joúnabun.

—Añájein aríñagutiña luágu Juan lan le abásteragüdajabei lan amürü, jíbiri aríñaga proféta Elías ban, añájeingua aríñagutiña luágu ámu lan proféta amürü.

29 Ába laríñagun.

—Ánti jugúya, ¿cátanati lídan jarítangun?

Ába laríñagun Pédro lun.

—Amürü Crístubei, le loúnajabei Búngiu lun lasálbaruniña güriía lídaangiñe jafígoun.

30 Ába laríñagun Jesúsu joun lun maríñagun jamáni lun ni ában.

Ladímurejan Jesúsu luágu loúnwen

(Mt 16.21-28; Lc 9.22-27)

31 Ába lagúmeserun Jesúsu, le Wügüri Garaüwarügüti, arúfudaja joun luágu lúnti lan lasúfurirun sarágu, luágu weíribei lan jíchugun wügüriña weírigutiña lídan jafíñen juríu mebéreseni láu, ítara lúba gíñe joúseruni jábutigu fádirigu jáma arúfudajatiña lilúrudun Moisés. Aríñagati joun luágu láfarúaba lan jilágubei, áni lásaaruba lan lídaangiñe ouweni lúnya labágaridun luágu lürüwan wéyu.

32 Furáanguti laríñagun le joun. Ábati lanügüni Pédro Jesúsu ñígiñe, ába lagúmeserun adeínja lun.

33 Ába lagáragun Jesúsu, ába laríjin jawágun láni disípulugu, ába lébechuni Pédro, ába laríñagun lun.

—¡Díseba nuei, Máfia! Bugúya, masáminaruntibu quei Búngiu, basáminarun quei wügüriña.

34 Ábati lagúarun Jesúsu joun láni disípulugu jáma jíbiri güriía lun jayárafadun lun, ába laríñagun joun.

—Le busénti lafálarunina, bulíeilei cáteíñein lan, awándalei sun luwúyeri asúfuriruni le lúnbei liábin lun nueígiñe queísi lanügüni ában wügüri lugúruwan, falálan.

35 Ladüga le abúseeruti leséfuragun lúngua ya ubouágu leféridirubei ibágari le magúmchaditi, ánjeinti le ánjabei leféridiruni libágari ya ubouágu nueígiñe, libíjubei ibágari le magúmchaditi siélu.

³⁶ ¿Cági ju lan lun gürígia lagáñeiruni sun le lánina ubouú, leféridireime lubára siélu?

³⁷ Uati ni cáta lánina ubouú le áuti gayára lan lagáñijan gürígia lubára siélu.

³⁸ Le anügüti busíganu nuágu lúma luágu nerérun jagíbugiñe gürígia múaraantiña áni gafígountiña ja, nanügüba giñe busíganu láu, áu le Wügüri Garaúwarügüti, dánme le niábin siéluigiñe láu luweirígun Nüguchi, geyégu jáu ánjeligu ja sándubaña.

9

¹ Aríñagati giñe Jesúsu joun.

—Nínárün jáu, luágu añájein lan jádaangiñe ja yábaña guetó, mouñwenbaña darí jaríjini lachülürün larúeijan Búngiu láu ubáfu.

*Lámuñedagun larijín Jesúsu
(Mt 17.1-13; Lc 9.28-36)*

² Sísi wéyu lárigiñe, ába lanügüni Jesúsu Pédro, Jacóbo, lúma Juan, ába lídin jáu luágu ában wúbü íñuti le ñi lumuti gayára lan jábugua jamá, ába lámuñedagun larijín ñi jagíbugiñe.

³ Ába támiridun lanáangun jarú quei jeméreedu, weíriti tjarun chülü lúmoun úa jamá ni gürígia ubouúagu gayáraati jachíbus gamísa lun tájarudun ítara.

⁴ Ába jaríjini Elías lúma Moisés ayánuja lúma Jesúsu,

⁵ ába lariñagun Pédro lun Jesúsu.

—Maésturu, jlídan dan awánja lan ya! Adüga wamá ürüwa dibásein, ában bun, ában lun Moisés, ában lun Elías.

⁶ Lariñagubaalin líra ladüga janúfude disípulugu, áni ibídiñeti lun Pédro ca lan lariñagubei.

⁷ Ába larárirun ában juánriñu le ñijin jabeí, ába ladáuragun jáu, ába la-gaambúniwa ában umálali lídaangiñe juánriñu ligía le aríñagubei.

—Niján Niraü le jínsiñebei nun, jeíba láu le lubeíbei.

⁸ Lídan óra ligía, dan le jaríjin geyégu ñi, maríjinjaña ámu ñi lueídügüya Jesúsu.

⁹ Dan le arárireina jamá lueígiñe wúbü, ába léredun Jesúsu jawágu lun mabájüdagun jamáni le jaríjibeí lun ni ában daríme saráli lídaangiñe óuweni lúnya labágaridun, ligía le Wügüri Garaúwarügüti.

¹⁰ Ligía jareidunbalin jádaangua, álügüdjárügütiña jámagua cátei lán funa ásaarunibeí lídaangiñe óuweni.

¹¹ Ábati jálügüdüni Jesúsu.

—¿Cásan uágu jariñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Cristubei?

¹² Ába loúnabuniña.

—Inárüni le jariñagubei luágu Elíasba lan ñübin furúmiñe áni laráanserubei lan sun cátei. ¿Cági tariñagubei Lerérun Búngiu nuágu, áu le Wügüri Garaúwarügüti? Aríñagatu luágu nasúfuriruba lan sarágu áni mabájüdünbadiña lan.

¹³ Nariñajare jun luágu ñübinjali lan Elías, ába jadügüni gürígia sun le jabúseerunbei láu, quei tariñaguni Lerérun Búngiu luágu ítara lúba lan lasúseredun lun.

*Lareidaguagüdüni Jesúsu ában irájü gawáguati espíritu wuríbbati
(Mt 17.14-21; Lc 9.37-43)*

14 Lárigiñe, ába jagíribudun le ñíjin jabei jíbiri disípulugu, ába jaríjin sarágu güri-gia geyégu jáu. Ñíñanu giñe arúfudajatiña lilúrudun Moisés asígeneja jáma.

15 Dan le jaríjinbalin Jesúsu, ába laweíridun janígi láu jaríjini ñi, ába jeibaagun abúsura lun.

16 Ábati lálügüdüniña, lariñaga joun.

—¿Ca uágu jasígeneja jáma?

17 Ába louñabun ában jádaangiñe ja ñíbaña, ába lariñagun.

—Maésturu, niján niraü nanügün bun, níjein ában espíritu wuríbati luágu, merérunjali ladüga.

18 Ñi lumuti lárügüdei espíritu wuríbati ligía, lájuchuruni múarugun, ába láfurijan jacútaü liyúmulugugiñe, ába lacünrinjan lári. Ledébiliduñati ítara. Amúrijaadina jáma báni disípulugu lun jaságaruni espíritu wuríbati le lueí, siñá jamuti.

19 Ába louñabun Jesúsu, ába lariñagun.

—¿Güri-gia mafiñeraditiña! ¿Átiribeisan dan lun neréderuni júma lubá gayára lan jafiñerun nuágu? ¿Ídame lagúmucha mafiñeni le jídaanbei? Barújumei irájü ligía ñájoun.

20 Ába janügüni lun. Dan le laríjinbalin espíritu wuríbati ligía Jesúsu, ába louwejagüdüni irájü ligía, ába leíguadun múarugun, ába lagárabajan, ába láfurijan jacútaü liyúmulugugiñe.

21 Ába lálügüdüni Jesúsu lúguchi, ába lariñagun lun.

—¿Átiri dan lueigiñe ítara lan?

Ába lariñagun lúguchi.

—Lúmagiñe ñúraügili.

22 Gíbeeli weíyaasu lájuchuruni espíritu wuríbati ligía wáturugun o dúnarugun lan lún yebe láfaruni jilágubei. Ánjein lubeíti níjein lubeí gayára bumúti adüga, gudéme wamá bun, íderagua báwa.

23 Ába lariñagun Jesúsu lun.

—¿Ca uágu bariñaga ítara? Inárüni luágu gayára lan nadügüni. Sun cátei gayáraati lun le affínebei.

24 Ába lagúaragun lúguchi irájü ligía.

—¿Afiñetina, íderagua bána lúntima nafiñerun!

25 Dan le laríjinbei Jesúsu luágu furésetimájali lan jagíbedun güri-gia, ába ladeínjan lun espíritu wuríbati ligía, ába lariñagun.

—Espíritu magáambaditi, mariñagadi, aríñagatina bun lun báfuridun, ígirabeí irájü le áni mebéluradügüyabá lídoun.

26 Ába lagúaragun espíritu, ábaya louwejagüdüni irájü ligía, ába láfuridun, ába leréderun irájü ligía camá jiláali. Sarágu jáña aríñagutiña luágu jilá lan.

27 Ába lárügüdüni Jesúsu lueigiñe lújabu, ába liñúraguni, ába laráramun.

28 Ábati lebélorun Jesúsu múnadoun, ába jálügüdüni láni disípulugu dan le jábuguarügaña lúma, ába jaríñagun lun.

—¿Cásan uágu siñá wabalin espíritu wuríbati ligía aságara?

29 Ába lariñagun joun.

—Ladüga líbe espíritu le, láu rügüñein ayúmuraguni lun Búngiu lúma ayúnaruni gayára lan láfuridun.

Ladímurejaanya Jesúsu luágu louñwen
(Mt 17.22-23; Lc 9.43-45)

³⁰ Dan le jóúdin ñígiñe, ába já súgürün Galiléagiñe,

³¹ mabúseeruntiti Jesúsu lun lasúbudirúniwa jalíñañein lan ladüga larúfudajaña lan joun láni disípulugu, aríñageina ligía luágu ledéregérúaba lan, ligía le Wügüri Garaúwarügüti, jájaburugun wügüriña wuríbatíña áni jáfarubei lan jílágubei, ábame lásaarun lídaangiñe óúweni luágu lürüwan wéyu lúnya labágaridun.

³² Úati gunfaráanda jamáni le lariñagubei joun, áni janúfudetiña lun jálügüdüni.

¿Cátima weírigubei?
(Mt 18.1-5; Lc 9.46-48)

³³ Ába jachúlürün ubúругu Capernaúm, múnada, ába lálügüdüniña Jesúsu.

—¿Cásan buga uágu jadímureja le eíbugeina jumá?

³⁴ Ába jeréderun maníñu ladüga úmada adímurejeina jañá buga luágu ca lan jádaangiñe weírigutimaabei.

³⁵ Ábati lañúurun Jesúsu, ába lagúarun joun dúusugubei disípulugu lubádun, ába lariñagun joun.

—Le abúsueruti ligía lan furúmiñeti, lúnti agúmujóuni lan jádan súngubei, lun giñe lesériwidun joun súngubei.

³⁶ Ába lanügün ában irájü, ába líchuguni jamídaangua, ába lanügüni lújaburugu, ába lariñagun joun.

³⁷ —Gürígia le eresíbiruti ában irájü quei le lídan níri, resíbi lumútina, áni máma rügüñein áu lerésibira, resíbi lumúti giñe Nüguchi le óunajabalina.

Le mámabei wágani, wámagiñeñein
(Lc 9.49-50; Mt 10.42)

³⁸ Ába lariñagun Juan lun.

—Maésturu, aríjatiwa ában wügüri aságajati espíritugu wuríbatíña lídan bíri, quei máma lan wámañein, ába wawéridiruni lun madügúndügüya láani.

³⁹ Ába lariñagun Jesúsu.

—Mawéridira jumeí, ladüga úati ni ában le adügüti miláguru lídan níri lun ladímurejan wuríba nuágu.

⁴⁰ Le mámabei wágani, wámagiñeñein.

⁴¹ Ninárün jáu luágu furúmiegurügü lan le íchuguti ában wéru dúna jun lídan níri ladüga láni jumá Crístu, libíjuba afáyeirujau búiti.

Góunigi lueí leíguadúniwa lídoun figóu
(Mt 18.6-9; Lc 17.1-2)

⁴² Furúmiegurügü le afigoungüdüti ában jádaangiñe ja isérigiñabaña lídan jafiñen nuágu, buítimaati jamúga lun lun lágurúniwa baránajoún láu ában óunwenbun dübü le amúligüleí güráñu luágu ligíina sügü láu ladügüni cátei líra.

⁴³ Ánjabu lafíoungüda bújabu guánarü, buítimaati jamúga lun báchuguni, ladüga buítimaati jamúga bídin siélun láurügü ában újabu sügü láu jamúga badarún láu biángubei bújabu máfiougatin,

⁴⁴ ñí lubei mouñwen jamá jéweraü ja eígibalin jágubu jiláaña, méñeguchadi wátu.

45 Ánjabu gíñe laffigoungüda bugúdi guánarü, buítimaati jamúga gíñe lun báchuguni, ladüga buítimaati jamúga bebélurun siélun láu ában ugúdi sügü láu badarün máfiougatin láu biángubei bugúdi,

46 le ñí lubei moúnwen jamá jéweraü, méñeguchadi ligía wátu.

47 Ánjabu gíñe laffigoungüda bágu, buítimaati lun baságaruni, ladüga buítimaati jamúga bebélurun lídoun larúeijan Búngiu láu ában águu sügü láu jamúga badarün máfiougatin láu biángubei bágu,

48 le ñí lubei moúnwen jamá jéweraü, méñeguchadi ligía wátu.

49 ‘Sun gürígia ja lánigubaña Búngiu, jouchúaba quei lau wátu geméti jawágu lun jarúmadagüdüniwa, queísigubeirügü líchugúniwa sálu luágu cátei adágaragüdüwati lun Búngiu, arúfuda lámuga luágu jarúma lan, buídu ligía lun laleidúniwa.

50 Buíti sálu, ánjein leferídura lubásuan, ¿cábago un ju lan? Ítara líña lubeíti, awánda jumei sun ouchúni lubá jarúmadun ligíbugiñe Búngiu, lídan jumá úaraguni júmagua.

10

Larúfudajan Jesúsu luágu ígiraguni (Mt 19.1-12; Lc 16.18)

1 Ába láfuridun Jesúsu Capernaúmgíñe, ába lídin loúbawagun Judéa lúma luágun oubaü le ñígíñe lubei láfuacha wéyu libíti dúna le Jordán. Ábaya jóundaragun gürígia le ñí lubei, ábaya larúfudajan joun queíñaja ligáburi.

2 Ábati jayábin jádaangiñe fariséogu luágun Jesúsu áluga járügüdüni tidan jasádarán láu jálügüdüni ánjein maríban lubei lun lafánreinragun wügüri túma lúmarí.

3 Ába lariñagun Jesúsu joun.

—¿Cá mejagi lariñagubei Moisés jun?

4 Ába jariñagun lun.

—Ariñagati Moisés luágu gayára lan tíchugúniwa gárada lánina ígiraguni tun úmarí.

5 Ába lariñagun Jesúsu joun.

—Líchugunbaalin Moisés gumádi líra jun ladüga tidere janígi.

6 Ánjein méja, dan le ladügünbalin Búngiu sun cátei, “adüga lumútiña wügüri túma würi”.

7 “Ligía lígirubei lubei wügüri lüguchi túma lüguchu lun laganóuniwa túma lúmarí,

8 ábame jeréderun quei ábanrügü.” Mámána lubeíti biáma, ábanrügaaña.

9 Ligía moún lubei lafánreinraguni wügüri le ladúnragugüdübei Búngiu.

10 Dan le múnada jamá, ábaya jálügüdüni disípulugu luágu cátei le,

11 ába lariñagun Jesúsu joun.

—Le ígirutu lúmarí, ába lagámaridun ámu, ladügüña adultériu.

12 Ánjein gíñe tígira würi túmarí, ába tagámaridun ámu, tadügüña gíñe adultériu.

Labíniruniña Jesúsu irájüñü (Mt 19.13-15; Lc 18.15-17)

13 Ába janáajan gürígia irájüñü lun Jesúsu lun lagúurun jawágu, ába jagúmeserun disípulugu adeíña joun ja anájabaliña.

14 Dan le larijini Jesúsu, magúndaati láu, ába lariñagun joun.

—Ígira jumá lun jayábin irájüñü númoun, mamájara jumá, ladüga ja jarúmabaña afiñe quei irájüñü, jagía lílanabaña larúeijan Búngiu.

¹⁵ Ninárün jáu luágu le lan marúfudunti ában igáburi ünabugubuti queísi ában irájü, siñábei lebélorun lídoun larúeijan Búngiu.

¹⁶ Ába lanügüniña lújaborugu, ába labíniruniña láu lújabu jawágu.

*Ladímurejan ában rísiti lúma Jesúsu
(Mt 19.16-30; Lc 18.18-30)*

¹⁷ Dan le lasígirunbalin Jesúsu luweíyasun, ába liábin ában wügüri eíbaagueina lubároun, ába lájuduragun ligíbugiñe, ába lálügüdüni ítara.

—Maésturu buíti, ¿cásan cátei buíti lúnbei nadügüni lun nibíjini ibágari le magúmchaditi?

¹⁸ Ába lariñagun Jesúsu lun.

—¿Ca uágu baríñaga nun “buíti”? Ában rügüñein buíti, Búngiu.

¹⁹ Subúditi gumádi bun. “Maganouábá túma ában gámaritu ámu, máfarajabá, míwerujabá, madímurejabá iyéeni luágu ni ában, mayéeda báña gürígia, inébe jamá bagübüriugu bun.”

²⁰ Ába lariñagun wügüri ligía.

—Maésturu, gúnfulitina láu sun le lúmagiñe ñúraügídina.

²¹ Ába lariaguni Jesúsu láu ínsiñeni, ába lariñagun lun.

—Ában cátei mégeibeí lun badügüni. beíba, alúgurabeí sun le búmabei, ábame bíchuguni lebégi joun gudémetiña, ábame bibíjin irisini siélu. Ábame bagíribudun, ábame bafálarunina.

²² Dan le lagaámbunbalin gürígia le cátei le, ába lírudagun, ába lídin láu íruni ladüga rísiti buídu.

²³ Ába lariñin Jesúsu geyégu jawágun súngubei, ába lariñagun joun láni disípulugu.

—jénreenguti lun jebélurun rísitiña lídoun larúeijan Búngiu!

²⁴ Ába laweíridun janígi disípulugu láu le lariñagubei, ábaya lariñagun joun.

—Nirájüñü, jénreenguti lun jebélurun ja íchubalin jafiñen luágu jarísin lídoun larúeijan Búngiu!

²⁵ Méreenguntimaati lun ában caméyu lun lásügürün lídaangiñe lujúyun ában agúsa sügü láu lebélorun ában rísiti lídoun larúeijan Búngiu.

²⁶ Dan jagáambunbalin cátei le, ába laweíridun janígi, ába jálügüdagun jámagua.

—¿Cáteiti gayáraabei lasálbarun?

²⁷ Ába lariaguniña Jesúsu, ába lariñagun joun.

—Siñáti jasálbaragun gürígia jóungua, ánjein Búngiu, gayáraati, ladüga úati ni cáta siñáti lun Búngiu.

²⁸ Ábati lariñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

²⁹ Ába lariñagun Jesúsu.

—Ninárün jáu luágu furúmieguarügü lan le ígirutu lúban, o lamúlenu, o líbugañanu, o lítunu, o lúguchi, o lúguchu, o lirájüñü, o lufúlasun nueígiñe o lueígiñe lan ugánu le lánina asálbaruni,

³⁰ Ilerésibiruba san weíyaasu sügü láu guetó lídan ubou le. múna, amúlenu, íbugañanu, ítunu, úguchurunu, isáanigu, lúma fulásu, láu sun leíbaajoúniwa, resíbi ligíame ibágari magúmchaditi siélu.

31 Sarágu jáña ja furúmiñetiñábaña guetó, jagiaba agúmujoúni yágüta siélu, áni sarágu ja agúmujoúnibaña, jagiaba furúmiñetiña.

Ladímurejaanya Jesúsu luágu louñwen
(Mt 20.17-19; Lc 18.31-34)

32 Luáguñanu üma lun Jerusaléoun, Jesúsu jabá jabá láni disípulugu, láuñanu luweírin anígi, áni jíbiri gürígia ja afálarubaliña, láuñanu anúfudei. Ábayati ladiñurun Jesúsu jáu láni dúusu disípulugu jaweí jíbiri gürígia, ába lagúmeserun aríñagei le lúnbei lasúseredun lun joun.

33 Ába laríñagun joun.

—Quei lubeí jaríjini, luáguñadiwa üma lun Jerusaléoun, le ñíba lubeí nedégerúa, áu le Wügüri Garaüwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasiádirunina lun nouñwen.

34 Ábame jedégerunina joun ja mámabaña juríu lun jéjerajan náu, jabeíchubadina, jásuerağubadina, ábame jáfarunina jilágubei, luágume lürüwan wéyu, ábame násaarun lídaangiñe ouweni lúnya nabágaridun.

Jamúriajan Jacóbo lúma Juan ában fuleísei
(Mt 20.20-28)

35 Ábati jayábin Jacóbo lúma Juan, ja lirájüñü Zebedéo, ába jaríñagun lun Jesúsu.

—Maésturu, buséntiwa lun badügün ában fuleísei woun.

36 Ábati laríñagun joun.

—¿Cági jabúseerubei lun nadügün jun?

37 Ába jaríñagun lun.

—Lun dánme lan barúeijan láu sun buweírigun, lun bañúuragüdüníwa, ában lueígiñe boúnwenren, ában lueígiñe bubaúna.

38 Ába laríñagun Jesúsu joun.

—Ibidiñeti jun ca lan jamúriajabei. ¿Gayáraabei jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

39 Ába jounabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun,

40 ánjein lun jañúurun ában lueígiñe nouñwenren, ában lueígiñe nubaúna, máma áu lúnbei níchuguni, líchugúba joun ja ubáabaña laráanserei Búngiu.

41 Dan le jagáambunbalin ja jíbiri díisi disípulugu, ába jagáñidun lúma Jacóbo láu Juan.

42 Ába lagúarun Jesúsu joun súngubei lubádun, ába laríñagun joun.

—Quei jasúbudirun, ja agúmadijabaña jádan ja mámabaña juríu, arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu.

43 Ánjein jádan, máma lúba, le abúseeruti lun weíri lan jídan, lúnti lesériwiduniña jíbiri.

44 Furúmieğuarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri,

⁴⁵ Ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu gürígia.

Lareidaguagüdüni Jesúsu Bartiméo, le maríjinbei
(Mt 20.29-34; Lc 18.35-43)

⁴⁶ Ábati jachülürün Jericó. Dan le áfurideina lan Jesúsu lídaangiñe fulásu ligía jáu láni disípulugu jáma sarágu gürígia, ñíñein ában maríjinti gíríti Bartiméo, liraü Timéo, ñun láru üma amúriaja seínsu.

⁴⁷ Dan le lagáambunbei luágu yaráaali lan Jesúsu le Nazarétna, ába lagúmeserun maríjinti ligía agúaraja.

—Jesúsu, ladügewagun David, gudémená bun!

⁴⁸ Sarágu jáña adeinjatiña lun lun lámanichun, ligíatima lagúaragun.

—¡Ladügewagun David, gudémená bun!

⁴⁹ Ába leréderagun Jesúsu, ába lariñagun.

—Wájuma lun lun liábin nun.

Ába jagúarun lun maríjinti ligía, ába jariñagun lun.

—Ragúba gurásu, sarába, lagúajaña bun.

⁵⁰ Ába lachüürunun labíte, ába ladügün ában chubaü, ába layárafadun lun Jesúsu.

⁵¹ Ába lálügüdüni Jesúsu.

—¿Ca babúseerubei nadügün bun?

Ába louñabun maríjinti ligía.

—Maésturu, buséntina naríjin.

⁵² Ába lariñagun Jesúsu lun.

—Gayáraati bídin, areidagaaadibu ladüga afíñeedibu nuágu.

Lídan óra ligía, ába gayára lan laríjin maríjinti ligía, ába lídin lárigi Jesúsu.

11

Lebélorun Jesúsu Jerusaléoun
(Mt 21.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachülürün ligíbugiñe fulásu buri le Betfajé lúma Betánia, le ünabubei libíti wúbü le Olívos, ába lariñagun Jesúsu joun biáma lídaangiñe láni disípulugu.

² —Jeiba lídan liraüräü fulásu le wagíbugiñebei, dánme le jachülürün ñi, jadáriruba ában burígü güráñu le maweinjoungili ni ában weíyaasu. Jafáragadeíme, ábame janügüni ñájoun.

³ Ánjaün álügüdüwa ca lan uágu jadügei le, jariñagame lun luágu busén láni Jesúsu, luágu láguyugüdübei lan furése.

⁴ Ába jóudin, ába jadáriruni burígü ligía güráñu lubádu ában béna, bougudi lídan üma, ába jafáragaduni.

⁵ Ába jariñagun jádaangiñe ja ñíbaña úmadarugu joun.

—¿Ca jadügübei? ¿Cáme jafáragadei burígü le?

⁶ Ába jóunabuniña quei lariñaguni Jesúsu joun, ába jígiruniña lun jóudin láu.

⁷ Ába janügüni burígü lun Jesúsu, ába jichugunun jabíte luágu burígü ligía, ába laweíruni Jesúsu.

⁸ Sarágu jáña átulerutu jabíte luágu üma, jíbiri, ába jánchujan tilímun wéwe, ába jachágajani luágu üma lubá lásügürün Jesúsu ligíbuagugiñe.

⁹ Ja ubáraübaña jáma ja árigibaña, ába jagúmeserun agúaraja.
¡Glória! ¡Biníwati wügüri le ñübinbei lídan líri Wabúreme Búngiu!

¹⁰ Biníwati arúejiani le ñübinbei, le lúnbei ítara lan queísi meja larúejian wáguchi Davíd.

¡Uweíríguni lun Búngiu lídan líñun-ágei siélu!

¹¹ Lárígíñe, ába lebélorun Jesúsu Jerusaléoun, belú ligía témpulurugun, lárígíñe laríjini sun cátei, ába lídin Betánia jáu dúusu disípulugu ladúga dárújali lan.

Líñaraguni Jesúsu tídibu ígo to múnboun

(Mt 21.18-19)

¹² Larúgan, dan le jáfuridunbei Betániagiñe, ába lalámachun Jesúsu.

¹³ Dísegiñe, ába laríjin ában tídibu ígo gabánatu. Ába lídin aríja ánjein gin tubei, ubánaü rügüñein ladárra tuágu ladúga mámagili lan tidáni ígo.

¹⁴ Ábati laríñagun Jesúsu lun tídibu ígo ligía.

—Magúindadügüyabá.

Ába jagáambuni láni disípulugu.

Larúmadagüdünun Jesúsu témpulu

(Mt 21.12-17; Lc 19.45-48; Jn 2.13-22)

¹⁵ Lárígíñe, ába jachülürün Jerusaléoun, ába lebélorun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagárabajani jadábulan ja asáansijabaña seínsu joun gürígia lúma jála ja alúgurajabaña únjun.

¹⁶ Mígirun lumútu témpulu lun úmame.

¹⁷ Ába laríñagun lídan larúfudajan joun.

—Laríñajare Búngiu tídan líburu to Lerérun. “Núban, fulásu le ñí lubei gayára lan jayúmuragun sun gürígia nun, ánjein jugúya, barü jumaaru quei jában jíwerutiña.”

¹⁸ Ába jagáambun jábutigu fádirigu jáma arúfudajatiña lilúrudun Moisés luágu le laríñagubei, ába jagúmeserun áluaja ída lúba lan jáfaruni jilágubei, ladúga janúfudetiña lueí, quei sun lan gürígia weíríti janígi luágu le larúfudajabei.

¹⁹ Dan le lagúñedunbei, ába láfuridun Jesúsu fulásurugugiñe.

Tídibu ígo to ásaurúboun

(Mt 21.20-22)

²⁰ Larúgan bináafin, sügüti Jesúsu jáma láni dúusu disípulugu lueígiñe méme úma ligía, ába jaríjinun tídibu ígo saüja lúmagiñe tlagüle.

²¹ Ába larítaguni Pédro, ába laríñagun lun Jesúsu.

—Maésturu, jaríjabá tun tídibu ígo to bíñaraguboun gúñaarü, saüja!

²² Ába laríñagun Jesúsu joun súngubei.

—Afiñe jumá luágu Búngiu.

²³ Ninárün jáu luágu furúmieguarügü lan le aríñaguti lun wübü le. “Gidába yágiñe, dabúba baránajoun”, ánjein úa lubei liloúguan afiñeni tídan lanígi áni afiñe ligía luágu lagúnfuliruba lan le laríñagubei, ítara lúba.

²⁴ Ligía naríñagunbei jun luágu sun lan le jamúriañan lúma Búngiu, ánjein afiñe jubei luágu resíbi jumáali lan, ítara lúba.

²⁵ Dan le jayúmuraguña lan lun Búngiu, ánjein níjein lubei ladúga ában gürígia jun le mísiñeti jun, ferúduna jumei lun giñe ferúduna lánün Jóguchi Búngiu le siélubei.

²⁶ Ánjein úa ferúduna jumá, úabei giñe ferúduna láani Jóguchi Búngiu le siélubei jífigoun.

Lugúmadin Jesúsu
(Mt 21.23-27; Lc 20.1-8)

²⁷ Ába jagiribudun Jerusaléoun. Dan le eibugeina lubei Jesúsu témpulurugu, ába jayábin jábutigu fádirigu, arúfudajatiña lilúrudun Moisés, jáma ámu wügüríña ja weirigutiña lídan jafiñen juríu,

²⁸ ába jálügüdüni.

—¿Cáteisan biríchabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

²⁹ Ába loúnabuniña Jesúsu, aríñageina ligía joun.

—Nálügüdaadün gíñe ában cátei, ánjana jóúnaba, nariñagubei jun ca lan áu gumádi nadügei buri cátei le.

³⁰ ¿Ca óúnajabalin Juan abásteragüdaja? ¿Búngiu, ódi wügüríña?

³¹ Ába jagúmeserun adímureja jámagua, ába jariñagun.

—Ánjawa aríñaga luágu Búngiu lan óúnajabalin, lariñaguba woun ca lan uágu mafiñerun wabei lun Juan.

³² ¿Ódi wariñaguba funági luágu jóúnajan lan wügüríña?

Lun jamúga jóúnabun itara, janúfudetíña jawei gürígia, ladüga subúdi jamáni sun gürígia luágu proféta lán Juan.

³³ Ábati jariñagun lun Jesúsu.

—Íbidiñeti woun.

Ábati gíñe lariñagun Jesúsu.

—Mariñagun nubei gíñe jun ca lan áu gumádi nadügei cátei le.

12

Jémpulu jawáguti ñadágimeintiña wuríbatíña
(Mt 21.33-46; Lc 20.9-19)

¹ Ábati lagúmeserun Jesúsu adímureja joun gürígia ja ñíbaña láu jémpulu, ába lariñagun joun.

—Ñíñein meja ában wügürí, ábunaguti tídibu beíbei lufúlasunrugu. Ába ladügün bariéru láu, adüga ligía ában ágei lun larábichawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani lichári joun ñadágimeintiña, ába lídin adüga weíyaasu.

² Dan le lachülürünbei dan lun alúbajani, ába loúnajan ában lumúsun amúriajei lufánran jámagiñe ñadágimeintiña.

³ Ábarüga járügüdüni músu ligía, ába jabúleiseiruni, ába jóúnajani lárigoún, míchutiña ní cáta lun.

⁴ Ábaya loúnajan labúreme íchári ábanya músu, ába jíchaagun dübü luágu, bougua jameí lábulugu, anába.

⁵ Ábaya loúnajan labúreme íchári ábanya, ába jáfaruni jilágubei. Lárigiñe, ába loúnajan sarágu, ában lárigi ában, buleísei jamáña jíbiri, áfaragua jíbiri jilágubei.

⁶ Níjeinguati ában lun loúnajani, ában liraü jínsiñeti lun buídu, lagúmujoún óra ába loúnajani, ába lariñagun luágu inébebei lan joun ladüga liraü lan.

⁷ Ába jariñagun ñadágimeintiña jámagua. “Niján le lúnbei libíjini alágan, wáfaraali jilágubei, wagía lámuga labúriña sun cátei.”

⁸ Ábati járügüdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábati lálügüdajan Jesúsu.

—¿Cábatí ladüga labúreme ichári? Liábinme, ábame láfaraguniña ñadágimeintiña jilágubei, ábame líchuguni ichári joun ámu.

¹⁰ ¿Malíjan jumágilisan le taríñagubei Lerérún Búngiu nuágu? Taríñajare.

Lé meja dúbü le mabúseerun jabeí ábnagutiña, ligíaaí furúmiñeti.

¹¹ Wabúreme Búngiu adügübalin lun furúmiñetibeí lan, áni aríja wamúti quei ában cátei weírigitu.

¹² Ába jabúseerún yebe jadáürüni Jesúsu ladüga jasúbudiruni luágu jawágu lan layúsuri jémpulu le. Quei janúfudebei jaweí gürígia, ába jígiruni lúngua, ába jóudin.

Luágu ti lafáyejóun seínsu lun gumádi

(Mt 22.15-22; Lc 20.20-26)

¹³ Lárígíñe, ába jóunajoúniwa jádaangiñe fariséogu jáma jádaangiñe lánigu Heródes lúmoun Jesúsu lun jaríñagagüdüni som cátei le lúnti gayára lan jíchuguni lidúnrunme.

¹⁴ Ába jayábin, ába jaríñagun lun.

—Maésturu, subúdi ti woun luágu aríñaga báani inárüni, manúfudeiga lueí ni ában ladüga ni cáta lan luweírigan gürígia bun, áni barúfudajani lémeri Búngiu láu inárüni. Áríñagabá ában cátei woun. ¿Buítisan lun lafáyejóun seínsu lun warúeite le Rómána ódi mabuíduntí?

¹⁵ Subúdi lumúti Jesúsu luágu biánguañein lan jagíbu, ába laríñagun joun.

—¿Cámesan jíchaajan sádara nubá? Barújuma ában lídaangiñe seínsu ligía nun, aríja námugei.

¹⁶ Ába janügüni lun. Dan le laríjini, ába lálügüdüniña.

—¿Cági iyáwa lúma íri le luágubei?

Ába jaríñagun lun.

—Láni urúei Rómána.

¹⁷ Ába laríñagun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígí láu ligáburi loúnabuniña.

Álügüdajani libügürü ásaaruni lídaangiñe ouweni

(Mt 22.23-33; Lc 20.27-40)

¹⁸ Ába jóudin fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe ouweni. Ába lubeíti jaríñagun lun.

¹⁹ —Maésturu, aríñagatí meja Moisés luágu ánjein lan ouwe ában wügüri le maríeiti masáaniguga táu lúmari, lúnti lan lamárieidun lamúlen túma würi to ueíboun louwe, lun gasáanigu lan táu lun líbugaña le ouwebei.

²⁰ Ñíñanu mejati sédü gamúlenuguátíña, le furúmiñeti, ába lamárieidun, ába loúnwen marájüñüga.

²¹ Le jabíaman, ába lamárieidun túma würi tó buga lúmari líbugaña, ába gíñe loúnwen marájüñütiña, ligía méme asúsereda lúma le jürüwan.

²² Maríeitiña sédügubei jagía túma, úati ni ában garaúti táu. Lagúmujóun óra, ába gíñe toúnwen würi tugúya.

²³ Níjan le uágubei wálügüdaja. Dánme le jásaarun jílaaña lídaangiñe ouweni lúnya gabágari jamá, ¿cábagi úmari würi tugúya jádaangiñe sédü gamúlenuguátíña ja, lárígíñe maríei jamá sun jagía túma?

²⁴ Ába laríñagun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu.

²⁵ Dánme le jásaarun jiláaña lúnya jabágaridun, ámulalime jabágari, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

²⁶ Ánjeinti luágu sará jamá jiláaña lúnya jabágaridun, çmalíjan jumágiru lilíburun Moisés luágu ladímurejan Búngiu lun lídaangiñe ában búbugati durúngu umúti? Laríñajare lun. “Áu Lubúngiutebei Abrahám, Lubúngiute Isáac, Lubúngiute Jacób.”

²⁷ Ítara líña lubeíti, ánjein jamúgati jiláañu jáña wügüríña jagía lun sun dan, mariñagunti jamúga Búngiu luágu Jabúngiute lan, ladüga máma Jabúngiute jiláguaaña Búngiu, Jabúngiute wínwangiña. Ítara líña lubeíti, jugúya weíríti jabúlieidágun.

Gumádi le weírigutimaabei

(Mt 22.34-40)

²⁸ Níñein ában jádaangiñe arúfudajatiña lilúrudun Moisés le agáambubalin jadímurejan, queíti subúdi láani luágu oúnaba lániña Jesúsu buídu, ába líabin lubároun, ába lálügüdüni.

—¿Cáteisan lídaangiñe lilúrudun Búngiu weírigutimaabei?

²⁹ Ába lariñagun Jesúsu lun.

—Niján le weírigutimaabei. “Agáamba jumána, jugúya Israelítagu, Wabúreme Búngiu, ligía rügüñein Abúremein.

³⁰ Jínsiñelá lubeíti Babúreme Búngiu bun táu sun banígi, táu sun buwáni, láu sun bisáminan, láu sun bére.” Ligía gumádi le weírigutimaabei,

³¹ áni le libíaman lídan uweíriguni lenége le furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí biáma le.

³² Ába lariñagun arúfudajati ligía lun.

—Buíti baríñaguni, maésturu. Binárün luágu ában rügüñein lan Búngiu, luágu úa lan ámu,

³³ áni lúnti jínsiñe lan Búngiu woun táu sun wanígi, láu sun wasáminan, táu sun wawáni, láu sun wére, lun giñe jínsiñe jamá wíbirigu woun queísi wínsiñegua woúngua. Gebégiti sun líra ligíbugiñe sügü láu sun wadágaragüdüñ lun lúma sun cátei le agudúbei luágu latárü.

³⁴ Dánti le lagáambun Jesúsu loúnabun láu lichú áu, ába lariñagun lun.

—Madíseedibu lueí lílana ban larúeijan Búngiu.

Manígijaña lun jálügüdajan.

¿Ca adügawagun Crístu?

(Mt 22.41-46; Lc 20.41-44)

³⁵ Larúfudajaña Jesúsu témpulurugu, lariñaga.

—¿Ída liñásan jariñagunbei arúfudajatiña lilúrudun Moisés luágu ladügawagun lan Davíd Crístu?

³⁶ Davíd guánarügü láu lubáfu Sífiri Sándu aríñagati ítara.

Laríñajare Abúremein lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

³⁷ ¿Ída lubáti ladügawagun lan Davíd Crístu ánjein wa lubálin Davíd guánarü Crístu, “Nabúreme”?

Ába jagáambuni bürübünu gürígia jagía láu ugúndani.

*Ladárirun Jesúsu jadúnrun arúfudajatiña lilúrudun Moisés
(Mt 23.1-36; Lc 11.37-54, 20.45-47)*

³⁸ Ábaja laríñagun Jesúsu joun lídan larúfudajan.

—Toúnigi jumátia jawei arúfudajatiña lilúrudun Moisés, jínsiñeti joun lun jeíbugun táu anáanguni durúrutu lúma lun labúsúrúniwa joun úmada láu sarágu inébesei.

³⁹ Áluaja jamúti jalaü le jála weírigutiña tídan jalígílisin juríu, lúma lubuídun-ágei ubáraü lídan eígini.

⁴⁰ Gidá jamutu jában wúriña ja jiláaña úmari jawei, lúnti jadáuragun láu sun líra, ába jadügün afúrieiduni le migímaguti. Weíríbei jasúfurirun luágu sun le jadügübei.

*Tedéweejan fugiábu wúri to jiláali túmari, lun Búngiu
(Lc 21.1-4)*

⁴¹ Luágu ában wéyu, ñun líña Jesúsu témpulurugu tigíbugiñe gáfu to lágei seínsu, aríaguei jíchaajan gürígia seínsu tídoun. Gíbetiña risitiña íchugutiña sarágu seínsu.

⁴² Ligía tiábin ában fugiábu wúri to jiláali túmari, ába tíchugun bián gáwanün tídoun gáfu tugúya.

⁴³ Ába lagúarun Jesúsu joun láni disípulugu lubádun, ába laríñagun joun.

—Nínárün jáu luágu gíbetima lan tíchugun wúri to sügü jáu sun ja íchugubaña seínsu tídoun gáfu to,

⁴⁴ ladüga sun jagía, lídaangiñe le ígiragubei jáma jíchiga, ánjoun tugúya, láu tugúdemegun rútumuti sun lé túmabei lun tawínwandun.

13

*Laríñagun Jesúsu luágu tagünrinchawagúba lan témpulu
(Mt 24.1-2; Lc 21.5-6)*

¹ Dan le láfuriduña lan Jesúsu témpulurugugiñe, ába laríñagun ában jádaangiñe láni disípulugu lun.

—¡Maésturu, aríjabá tun tubuídun watémpulun lúma buri dübü le áubei tadügüwa! ¡Máma tanárime buri!

² Ába louñabuni Jesúsu.

—¿Aríagu jíña tun tanárime témpulu to? Merédebeítia ni ában dübü ligíbuagu ában, lagünrinchaguba sun le.

*Seíni buri lubáragiñe lagúmunchun ubou
(Mt 24.3-28; Lc 21.7-24, 17.22-24)*

³ Ábati jóudin luágu wübü le gíríbei Olívos le tigíbugiñebei témpulu. Dánti le ñun líña lan Jesúsu ñi, ába jayábin Pédro, Jacóbo, Juan lúma Andrés, ába jaríñagun lun, jagíaguarügü.

⁴ —Buséntiwa lun baríñaguni woun ídame lan lasúsereda sun le tun témpulu to. ¿Cábasan seíni luágu chülüjali lan dan lun lagúnfulirun sún buri cátei le?

⁵ Ába laríñagun Jesúsu joun.

—Toúnigi jumá, mayéedagualaün ni ában,

⁶ ladüga sarágujaba ñübintiña, jaríñagame. “Áu Cristubei”, áni sarágujaba jayéedun.

7^{*} Jugúya, dánme le jagáambuni lamúri wuríbu yaráfa jun lúma ugánu luáguti buri wuríbu díseti juei, manúfudedagua jumá, ladüga ñíbei wuríbu súnwandan, mámagili lagúmunchun ubou líra.

8 Lageíndaguba ában fulásu lúma ában, awúribuja ligíame ában ageíraü lúma ámu. Ñíbei járabaganáli lídan sarágu fulásu, ilámaü, chagáguau, áni súnme buri cátei le, lagúmesejarügügilime le lúnbei lasúfurirúniwa.

9^{*} Tounígüa jumá júngua ladüga jedéregérüaba lun lúrudu, ábame jabúleiseirunün tidan buri jalígílisin juríu, janügüba lun jagúseragüdúniwa jagíbugiñe gumádimatiña lúma jagíbugiñe urúeigu, nueígiñe, itara lúba gayára lan jadímurejan nuágu, jagíbugiñe.

10 Lubáragiñe lagúmunchun ubou, lapúrichijoüba ugánu luáguti asálbaruni lídan sun fulásu.

11 Dánmeti le janügüniwa lun jedéregérüniwa joun lúrudugu, magíbedalá jarítagn luágu cába lan jaríñaga, masáminaragubei jumei. Aríñaga jumei le lariñagn Búngiu jun lídan óra ligía, ladüga mámba jugúya adímureja, Sífiri Sándu, ligíaba adímureja.

12 Jedéregérübaña wügüríña jamúlenu jáma jábugaña lun jáfarúniwa jilágubei, deréga jamáñame agübürigu jasáanigu, jagáraabaguba isáanigu jawágun jagübürigu lun jedéregérüniwa lun jáfaruniwa jilágubei.

13 Jiyéreegudaba lun sun ubou nueígiñe, le asígiruti úragu darí lúmoun lagúmujóun, lasálbaruba.

14^{*} ‘Abürüjati proféta Daniél luágu cátei iyéreeguti le gagünrinchaguagüdadíbei, dánme le jarjini cátei ligía le ñí lubei moun lan lun ñi lan—le alijabei, gunfaráandalá—jámetia Judéabaña, lúntimétia janúrajan lagún wübü.

15 Le gürígia le bougudíbei, mebélura látia múnadoun aságara ni cáta,

16 le áraabubei, magíribudalá águyu ni anügoun lanáangun.

17 Fugiábugume würíña ja dageínatíña lídoun wéyu ligía jáma ja garájüñütiña ja gurágiña.

18 Amúriaja jumá lúma Búngiu lun máma lan lídan lidáani lidíliga jeíbaagua,

19 ladüga lidáaníbei asúfuriruni quei le masúseredungili lúmagiñe ladügüni Búngiu ubou, masúseredundügüyaalime giñe lárigiñe.

20 Ánjein jamúga madúraagun lánme Jabúreme Búngiu dan ligía, úabei jamúga ni ában eséfuruti, ladúraagubei luágu jínsiñe lánigu lun, ja anúadaja láañabaña.

21^{*} ‘Anjeinti aríñawagua jun. “Aríja jumá, niján Crístubei”, o “Nírán”, maffíñera jumá,

22 ladüga jayábiba eyéjatiña aríñaga jawougua luágu Crístu lan jagía, jíbiri, aríñaga jagíame luágu profétagu jamá, áni jayéeni. Jadügüba seíni lúma miláguru lun jayéedaguniña ásta ja anúadaja láañabaña Búngiu ánjein gayára.

23 Aráanseñu jumá, rúnaadün luágun jugúdi.

Ída lúba lan ligáburi lagíribudun Crístu ubouagun

(Mt 24.29-35, 42-44; Lc 21.25-36)

24^{*} Lídounme wéyu ligía, lárigiñeme dan ligía le lánina asúfuriruni, ábame labúrigadun wéyu, marúnidunjalime játi.

25 Jeíguaduba warúguma siélugiñe, ábame ladádagarun sun siélu.

26 Ábameti naríjiniwa, áu le Wügüri Garaúwarügüti, niábin lídan juánriñu láu óunwenbun ubáfu lúma uweírighuni,

²⁷ ábame nouñajaniña ánjeligu oúndaraña sun ja nanúadajabaña lídaangiñe gádürü larígei ubouú, lúmagiñe lidíse-ágei ubouú dari lúmoun lidíse-ágei siélu.

²⁸ ‘Gunfaráanda jumei jémpulu le tuágoti tídibu ígo. Dan le ñulúgili tilímun, ába labouúchun tubána, subúdi jumúti luágu níteeli lan lidáani lubáchouga.

²⁹ Ítara meme, dánme giñe jaríjini sún buri cátei le, subúdi jumei luágu yaráfaali lan niábin.

³⁰ Ninárün jáu, luágu lagünrinchawagúba lan sun ubúru gu le Jerusalén lubáragiñe jóúwegun gürígia ja lánina dan le.

³¹ Lagúmuchaguba siélu lúma ubouú, ánjein nerérun, merédebei magúnfulirunga.

³² ‘Ánjeinti wéyu lúma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraú, Búngiu rügüñein le Úguchili asúbudirei.

³³ Lúnti lubeíti agágudúañu jumá, aríaaja, ayúmuragua lun Búngiu, ladüga ibídiñeti jun ídame lan lachülúra óra ligía.

³⁴ Ítara lúba quei ában wügüri le ñüdünbei luágu ában weíyaasu díse, lubáragiñe láfuridun lúbiñegiñe, ába líchuguni sun cátei jájaburugun lumúsuniña áni ru ligía jawádigimari, aríñaga ligía lun le luágubei béna lun louñigirun.

³⁵ Áu queisi tabúreme múna tugúya, furésebei nagíribudun. Agágudúañu jumá lubeíti, ladüga ibídiñeti jun cába lan óra nachülúra, ánjein guñounba lubei lúmoun áriebuba lan, o lubá lan larúgan o bináafin lan,

³⁶ ñübindügü níñein sódini, ábame nadárirunün arúmuga.

³⁷ Le naríñagubei jun aríñaga numúti joun súngebui. Agágudúañu jumá.

14

Lalédawagúniwa lubá Jesúsu

(Mt 26.1-5; Lc 22.1-2; Jn 11.45-53)

¹ Bián rügáali wéyu lubá fédu le arítaguagülei luágu meja dan le lásügürünbei láni Búngiu ánjeli áfaraguáña jarájüñü Ejiptona, máfarawaguntiña jarájüñü Israelítagu, lidáani giñe fédu le ñí lubei teigúa fein to magánatu ísi. Ábanti jáluajan jábutigu fádirigu jáma arúfudajatiña lilúrudun Moisés ída lúba lan járügüdüni Jesúsu láu eyéerawaguni lun jáfaruni jilágubei.

² Ába jaríñagun.

—Márügüda wamei fédurugu luei jáfúudun gürígia.

Tájurudaguni ában würi Jesúsu

(Mt 26.6-13; Jn 12.1-8)

³ Betániañein Jesúsu lúbiñe Simón lé meja gawágubei gumeín luágu lúra, dánti le ñun líña lan luágu dábula, ába tiábin ában würi láu ában budeín buin láu ibíñei le jémeti, le séruti. Ába tájalachuni ligína budeín, ába téseruni ibíñei lálbulugun Jesúsu.

⁴ Ába jagáñidun jádaangiñe ja ñíbaña, ába jaríñagun jámagua.

—¿Cámesan leféridirúa ibíñei jémeti le?

⁵ Gayáraati jamúgagu lalúgurun luágu sügü láu lebégi ában irúmu wadágimanu, lun jíderawagún gudémetiña.

Ába jébechunun,

⁶ ába laríñagun Jesúsu.

—Ígira jumouín. ¿Ca uágu jañáwurija tun? Ában cátei buíti le tadügübei nun.

⁷ Súnwandan ñibaña lan gudémetiña júma lun jíderaguniña dan le jabúseerun, ánjein áu, mámaba súnwandan júma nan.

⁸ Adüga táali würi to le tíaraabei, jurúguaarú ibíñei luágu núgubu lubá nábulanajoún,

⁹ áni ninárün jáu luágu lídan lan furúmieguarügü fulásu lídan sun ubou le ñi lumuti lapúrichioúa ugánu le lánina asalbaruni labájüdawagüba gíñe le tadügübei würi to lun jarítangun tuágu.

Lalúguruni Júdas Jesúsu
(Mt 26.14-16; Lc 22.3-6)

¹⁰ Ábati lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladügün darádu jáma lun ledéregeruni Jesúsu joun.

¹¹ Dan le jagáambubalin, ába jagúndaaragun, ába jaríñangun lun luágu jíchuguba lan seínsu lun. Ába lagúmeserun Júdas áluaja ída lúba lan ledéregeruni Jesúsu joun.

Lagúmujoún leigin Jesúsu jáma lánigu
(Mt 26.17-29; Lc 22.7-23; Jn 13.21-30, 1 Co 11.23-26)

¹² Le furúmiñeti wéyu lídan fédu le ñi lubei teigüa fein to magánatu ísi, luwéyuri lafarún mudún le lánina fédu le páscua, ába jálügüdüni disípulugu Jesúsu.

—¿Jalági babúseera lun wouídin aráansera wabárua lun weígini eígini le lánina fédu?

¹³ Ába loúnajan biáma jádaangiñe láni disípulugu, ába laríñangun joun lubáragiñe joúdin.

—Jeiba ubúrugu, jadúnraguba lúma ában wügüri ñi táu ában dináa láu dúna,

¹⁴ jídinme lárige le ñijin lumúti lebélu, ábame jaríñangun lun tabúreme múna. “Ítara líña maésturu, ¿jagoún nege rúmu to lúnboun ñi lan leígei eígini le lánina fédu jáu láni disípulugu?”

¹⁵ Ábame larúfudun ában rúmu weírítu jun, tougíñegua múna, to aráanseñu tíña, ábamei jaráanseruni eígini woun ñi.

¹⁶ Ába jáfuridun disípulugu, ába jachülürün ubúrugin, ába jadáriruni súnigubei quei laríñangun Jesúsu joun, ába jaráanseruni eígini lánina fédu ñi.

¹⁷ Dan le lagúñedunbei, ába lachülürün Jesúsu jáu dúusu disípulugu.

¹⁸ Dánti le luágu jamá dábula eíga, ába laríñangun joun.

—Nínárün jáu luágu lalúgurubadina lan ában jádaangiñe le eígibeí núma.

¹⁹ Ábati jajírudagun, ába jagúmeserun álügüdaguei ában ában.

—¿Áu funásan?

²⁰ Ába laríñangun Jesúsu joun.

—Ában jádaangiñe jugúya dúusu le éderutu leígan fein lídan asíedu.

²¹ Anángüraadina lubeíti, áu le Wügüri Garaúwarügüti, luágu úma le uágubei taríñaga Lerérun Búngiu, áni ífugiábutia wügüri le alúgurutina! Buítimaati jamúga lun wügüri ligía lun magúriajouñiwa lan.

²² Dan le añája lubei eíga, ába lanügünun Jesúsu jeígan fein lújaburugu, ába leteíngiruni Búngiu tuágu, lárigiñe lagúbachagunun ába líchugunun joun, ába laríñangun joun.

—Joujúma, núgubu le.

²³ Lárigiñe, ába lanügün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagía tídaangiñe diweín tugúya.

²⁴ Ába laríñagun joun.

—Níta le, le añúuragüdúbalin iséri darádu, le gíñe áwiyurúabei joun sarágu gürgia lun ferúdunawa lan jaffigoun.

²⁵ Ninárün jáu luágu mátundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu siélu.

Laríñaguni Jesúsu luágu leyedaguba lan Pédro láu

(Mt 26.30-35; Lc 22.31-34; Jn 13.36-38)

²⁶ Lásun jerémujani urému luágu Búngiu, ába jóudin luágun wübü le gírabei Olívos.

²⁷ Ábati laríñagun Jesúsu joun.

—Sun jugúya janúrajaba, ígira jumáname áriebu le, ladüga tariñajare Lerérun Búngiu. “Náfarubei jóúniri mudún jilágubei, ábame jeréderun mudún chagágu.”

²⁸ Lárigiñeme násaarun lídaangiñe ouweni lúnya nabágaridun, nídiba Galiléa jubáragiñe.

²⁹ Ábati laríñagun Pédro lun.

—Gayáraati jígirunibu sun ja, nugúya, mígirun nubádibu.

³⁰ Ába laríñagun Jesúsu lun.

—Ninárün báu, áriebu meme le, lubáragiñe layúgurujan gáyu bián weíyaasu, ürüwaalime weíyaasu baríñagun luágu ibídiñe nan bun.

³¹ Ába laríñagun.

—Ni ánjein lun lubeí nouñwen búma, mariñagubadina luágu ibídiñe ban nun. Ligía méme gíñe jaríñaga súngubei.

Layúmuragun Jesúsu lun Búngiu, Getsemaní

(Mt 26.36-46; Lc 22.39-46)

³² Ábati jachülürün lídoun ában fulásu gíriti Getsemaní, ába laríñagun Jesúsu joun láni disípulugu,

—Ñurújuma ya, neíbuga ayúmuragua lun Búngiu.

³³ Ába lanügüniña Pédro, Jacóbo, lúma Juan lúmagua. Ába ladíjeridun larítagun buídu, sandí ligía ában igárigu weíriri títan lanígi.

³⁴ Ába laríñagun.

—Sandítina ában íruni weíriri le lánina ouweni títan nuwáni. Reídei jumá ya, áni agágudúañu jumá.

³⁵ Ábati lídin Jesúsu lubáruaguotún mémeraü, ába labúluchagun múarugun, ába lamúriajan lúma Búngiu ánjein gayára lubeí masúfurirun láani le lúnbei lasúseredun lun lídan óra ligía.

³⁶ Ába laríñagun lídan layúmuragun.

—Núguchi, gayára bumúti sun cátei, séfu bána lueí nasúfuriruni cátei le, máma quei nabúseerun, quei babúseerun.

³⁷ Ába lídin, ába ladáriruniña disípulugu arúmuga, ába laríñagun lun Pédro.

—Simón, ¿barúmuguñasan? ¿Siñátisán buga beréderun ni ában óra agágudúañu?

³⁸ Agágudúañu jumá, ayúmuragua jugúyame lueí jeíguadun lídoun ínchajoúni lun jeféridiruni jafíñen nuágu. Inárüni luágu benéfa lan jáni espíritu lun le buídubei, ánjein júgubu, débiliti.

39 Ábaya lídin ayúmurgua lun Búngiu, aríñageinaleí méme dimúrei le lariñagubei furúmiñe.

40 Dánya lagíribudun, ábaya ladáriruniña arúmuga ladüga luweírin lidábu jágu. Ibídiñetiti joun cába lan jóunabagüle lun.

41 Ábaya lídin lürüwan weíyaasu, ába lariñagun joun.

—¿Jarúmuguña mémesan, eméraagua jugúya? Buídürügaali, chülüja óra lun nedéregerúniwa, áu le Wügüri Garaüwarügüti, jájaburugun gafígountiña.

42 Sarájuma, queímoun, níteeli le lúnbei ledéregerunina.

Janügüni Jesúsu adáura
(Mt 26.47-56; Lc 22.47-53; Jn 18.2-11)

43 Ñígili Jesúsu adímureja, ligía lachülürün Júdas, le ában jádaangiñe dúusu disípulugu, liábin jáu sarágu mútu táu efeín lúma wéwe. Joúnajan jábutigu fádorigu, arúfudajatiña lilúrudun Moisés, jáma ámu wügüriña weírigutiña lídan jafíñen juríu.

44 Aríñagalíti buga Júdas joun ítara.

—Le wügüri le nachúurun, ligía, ábame járügüdüni, ábame janügüni, jóunigireime buídu.

45 Ítara líña lubeítí, dan le lachülürünbei, ába layárafadun Júdas lun Jesúsu, ába lariñagun lun.

—Maésturu.

Ába lachúuruni.

46 Ábati járügüdüni Jesúsu, ába janügüni adaürüwa.

47 Ñíñein ában jádaangiñe ja ñíbaña, ába láluguchunun lefeínte, ába líbuguni ában larígei lumúsun fádiri le íñutimaabei.

48 Ábati lariñagun Jesúsu joun mútu jagía.

—¿Jiábin táu efeín lúma wéwe lun janügünina adáura, camá jamuga jíwerutina?

49 Ságüñaja wéyu júma nan témpulurugu arúfudaja jun, madaü jumúтина. Wel, lasúseredunbei le lun lagúnfulirun Lerérun Búngiu.

50 Ábati jígiruni sun disípulugu Jesúsu lábugua, ába janúrajan.

Wügüri ñúraügili le anúrajabei

51 Ñíñein ában wügüri ñúraügili afálaruti Jesúsu, darúgu lougua táurügü ában sídi, ában járügüdüni.

52 Ába lasáfarun jaweí, ába leibáagun surúsu, ígira sídi.

Jesúsu ligíbugiñe líñun-ágei lúrodu
(Mt 26.57-68; Lc 22.54-55, 63-71; Jn 18.12-14, 19-24)

53 Ábati janügüni Jesúsu ligíbugiñoun fádiri le íñutimaabei, ába jóúndaragun sun jábutigu fádorigu jáma arúfudajatiña lilúrudun Moisés, jáma ámu wügüriña ja weírigutiña lídan jafíñen juríu.

54 Ábati lafálaruni Pédro Jesúsu dísegiñe chülü tübürürurugun lúban fádiri le íñutimaabei, ába leréderun ñun jáma oúnigirutiña témpulu abácharagua larügürügü wátu.

55 Jáluajati jábutigu fádorigu lúma sun líñun-ágei lúrodu lidúnrun Jesúsu lun gayáraabei lan jasiádiruni lun láfarúniwa jilágubei, madáritiña lidúnrun.

56 Sarágu jáña yebe adímurejatiña iyéeni luágu, múaradúntiña láu le jariñagubei.

57 Ñiñanu yéetiña ásaarutiña aríñaga.

58 —Agáambatiwa laríñagun. “Nagünrinchaguboun témpulu to, to jadügüboun wügüríña, ábame naráramagüdün ában témpulu lídan ürüwa wéyu to máma jadüga wügüríña.”

59 Ni ítara, múaradúntiña láu le jaríñagubei.

60 Ábati lásaarun fádiri le íñutimaabei jádaangiñe sun jagía, ába laríñagun lun Jesúsu.

—¿Moúnabuntíbusan ni cáta? ¿Cáteisan le, le jaríñagubei buágu?

61 Ába leréderun Jesúsu maníñu, moúnabunga ni cáta. Ábaya lálügüdüni fádiri íñutimaati.

—¿Amürüsan Crístubei le Liraü Búngiu, le lúnbei lasálbaruniña gürígia lídaangiñe jafígoun?

62 Ába laríñagun Jesúsu lun.

—Ánja, áu. Áni jugúya, jaríjubadina, áu le Wügüri Garaüwarügüti, ñun lueígiñe loúnwenren Súnti Gabáfu, aríja jumeíme niábin lídan juánriñu siélugiñe.

63 Ábati lajeíridagunun fádiri íñutimaati lanáangun, le ligáñi, ába laríñagun.

—¿Ca ámu wabúseerubei lun líchugun fe luágu guetó?

64 Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súngubei lun láfarúniwa jilágubei.

65 Ábati buri jagúmeserun jíbiri ásueraquei, adáuragua láu ligíbu, abúleiseirei, jaríñagati.

—¡Aríñaga beígia cátei lan áfarubalibu!

Ába buri jagáyuajan súdaara luágu.

*Laríñagun Pédro luágu ibídiñe lan Jesúsu lun
(Mt 26.69-75; Lc 22.56-62; Jn 18.15-18, 25-27)*

66 Ñiñein Pédro bürürurugu, ligía tiábin ában lumúsun fádiri le íñutimaabei.

67 Dan le taríjini abácharagua larügürügü wátu, ába taríaguni, ába taríñagun lun.

—¿Ma giñe buga lúmañadibu Jesúsu le Nazarétna?

68 Ába leyéedagun Pédro, laríñaga.

—Ibídiñeti gürígia ligía nun, ibídiñegubeíti nun ca lan uágu badímureja.

Ába lígiruni fulás le ñí lubei labácharagua lun yaráfa lan lun lebéneri barieru, ábati layúgurujan ában gáyu.

69 Ábaya taríjini músu tugúya, ába taríñagun joun ja ñíbaña.

—Ába giñétia jádaangiñe lánigu Jesúsu le.

70 Ábaya leyéedagun. Murúsun óra lueígiñe, ábaya jaríñagun ja ñíbaña lun Pédro.

—Inárüni, amürü ában jádaangiñe, ladüga Galiléana amürü, ítara líña badímurejan quei jagía.

71 Ába líñaragun Pédro lúngua ánjein máma lubei inárüni le laríñagubei. Ábaya laríñagun.

—Ibídiñeti gürígia le uágubei jadímureja nun.

72 Lídan óra ligía, ába layúgurujan gáyu libíaman weíyaasu. Ábati larítagun Pédro luágu le laríñagubei buga Jesúsu lun. “Lubáragiñe layúgurujan gáyu bián weíyaasu, beyéedaguba náu ürüwa weíyaasu.” Dánti le larítagun luágu, ába layájun.

15

*Jesúsu ligíbugiñe Piláto**(Mt 27.1-2, 11-14; Lc 23.1-5; Jn 18.28-38)*

1 Larúgan bináafin, ába joúndaragun jábutigu fádirigu jáma arúfudajatiña lilúrudun Moisés, jáma ámu wügüriña ja weírigutiña lídan jafiñen juríu lúma sun líbiri líñun-ágei lúrudu, aríja cába lan jadüga lun lasíadirúniwa Jesúsu. Ába janügüni güragü, ába jedéregeruni lun Pilato.

2 Ába lálügüdüni Piláto Jesúsu.

—¿Amürü Jarúeitebei Juríu?

Ába loúnabun Jesúsu.

—Ánja, itara líña quei baríñaguni.

3 Ába buríti jíchugun jábutigu fádirigu sarágu lidúnrun.

4 Ábayati lálügüdüni Piláto, ába laríñagun lun.

—¿Moúnabuntibusan ni cáta? ¿Aríjabá átiriñein lan bidúnrun íchuguti?

5 Moúnabun mémeti Jesúsu ni cáta, ába laweíridun lanígi Piláto láu líra.

*Lasíadirúniwa Jesúsu lun ouweni**(Mt 27.15-31; Lc 23.13-25; Jn 18.38-19.16)*

6 Jécutiti Piláto ígiragüda ában adaürüti ságü fédu le lánina páscua, le jamúriajan güriña jádaangiñe adaürütiña.

7 Níñeinti ában adaürüti giríti Barabási úara jáma ámu ja áfarajabaña güriña jilágubei lídan iñúraguni luágu gumádi.

8 Ábati jayábin güriña, ába jaríñagun lun Piláto lun ladügüni queíñaja ladüga.

9 Ába lálügüdüniña.

—¿Buséntün lun nígiragüdüni Jarúeite Juríu?

10 Laríñagubaalin Piláto líra ladüga busén lán yebe lígiragüdüni Jesúsu, subúdi lumúti luágu ladüga lan gimúgaü jedéregerei jábutigu fádirigu.

11 Fügüda jamáña jábutigu fádirigu güriña, jaríñaga joun lun jamúriajan lun lígiragüdüni Barabási, máma Jesúsu.

12 Ábati laríñagun Piláto.

—¿Cáti jabúseerubei nadügün láu le uágubei jaríñaga Jarúeite Juríu?

13 Ába jagúaragun.

—¡Dáguabeí luágu gurúwa!

14 Ába laríñagun Piláto joun.

—¿Cáti wuríbati ladügübei?

Ábaya jagúaragun.

—¡Dáguabeí luágu gurúwa!

15 Queíti busén lan Piláto leréderun buídu jáma güriña, ába lígiragüdüni Barabási, lárigiñeti loúnajan abeichei Jesúsu, ába ledéregeruni lun ládarawagün luágu gurúwa.

16 Ábati janügüni súaara lídoun tübürürü lúban urúei, ába joúndarúniwa sun súaara.

17 Ába jadáüraguagüdüni táu ában anáanguni funátu, ába jadügün ában rídi láuti jíyu, ába jíchuguni leréberugu.

18 Ába jagúmeserun agúaraja lun.

—¡Gabágarilá Jarúeite Juríu!

19 Ába jagáyuajan lábulugun láu ában wéwe, ába jásuereguni, ába jájuduragun abúsurá lun.

20 Lárigiñe jéjerajan láu ítara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

Ládarawagún Jesúsu luágu gurúwa

(Mt 27.32-44; Lc 23.26-43; Jn 19.17-27)

21 Níñein ában wügüri Ciréna, gíriti Simón, lúguchi Alejandro lúma Rúfo, liábiña áraabugiñe, dan le lásügürün nígiñe, ába jafósuruni lun lanügüni lugúruwan Jesúsu.

22 Ába janügüni Jesúsu lídoun ában fulásu gíriti Gólgota, míni lan líra, Lufúlasun Lábu Ichügü.

23 Ába jíchugun diweín láu ában luwúyeri árani gíriti mírra tídoun lun, mátun lumútu.

24 Ábati jádaraguni luágu gurúwa, ába jájurerun súdaara ubúnuruni lun jaríjin cába lan jádaangiñe erédera táu lanáangun.

25 Ladaünrún néfu bináafin, ligía jádaraguni luágu gurúwa.

26 Ába labürüdüniwa lidúnrun ñi. “Jarúeite Juríu.”

27 Dáguatiña giñe bián jíwerutiña luágu gurúwa úara lúma, ában lueígiñe louñwenren, ában lueígiñe lubaúna.

28 Láu líra lagúnfulira le taríñagubei Lerérun Búngiu. “Abájüdúwati jáma wuríbatíña.”

29 Dan le buríti jásügürün gürígia, ába jájinjani jachügü láu, ába janábuni, jaríñaga.

—¡Bugúya le aríñagubei luágu fíbounme lan témpulu, ábaya lánme baráramagüdünnun lídan ürúwa wéyu,

30 séfuguabá búngua, raríba lueígiñe gurúwa!

31 Ába giñe jéjerajan jábutigu fádirigu jáma arúfudajatiña lilúrudun Moisés láu, ába jaríñagun jámagua.

—¡Séfuti ámu, ánjein ligía, siñáti leséfuragun lúngua!

32 ¡Raríla Crístu, Jarúeite Israelítagu, lueígiñe gurúwa guetó wagíbugiñe, afíñe wamámuga luágu!

Ja dáwaguñubaña luágu gurúwa úara lúma, anába jamúti giñe.

Loúnwen Jesúsu

(Mt 27.45-56; Lc 23.44-49; Jn 19.28-30)

33 Amídirugu, ába labúrigadun sun ubou darí ladaünrún ürúwa rábounwéyu.

34 Ligía lagúaragun Jesúsu.

—Eloí, Eloí, ¿láma sabáctani? —míni lan líra. Nubúngiute, Nubúngiute, ¿cásan uágu bígirana?

35 Níñanu jádaangiñe ja níbaña agáambuti, ába jaríñagun.

—Agáamba jumá, lagúajaña lun proféta Elías.

36 Ába leíbaagun ában jádaangiñe, ába ladüdüragüdünnun ában mudúsi táu diweín garüjütu, ába líchuguni luágu ában wéwe, ába línchuni lun Jesúsu lun lachúurunun, ába laríñagun.

—Ígira wameí guetó, waríja ánjein nübin Elías aráriragüdei.

37 Ábati ladügün Jesúsu ában agúaraguni jéreti, ába louñwen.

38 Ába tajeiridagun tubélun témpulu lídan bián murúsun íñugiñe lun ünabun.

³⁹ Dan lagáambuni jábuti súdaara Rómana le rárabei ligibugiñe Jesúsu lagúaragun, aríjaleí ída líña lan loúnwen, aba laríñagun.

—Inárüni luágu Liraü lan Búngiu wügüri le.

⁴⁰ Níñanu giñe würiña, ariagutiña dísegiñe, níñoun María Magdaléna, María to lúguchu Jacóbo le ñúraütimagilíbei, lúguchu giñe José, níñoun giñe Salomé.

⁴¹ Würiña ja, falá jamuti Jesúsu áni íderagua jamúti dán meja le Galiléañein lan. Níñanu giñe sarágu ámu würiña ja ñübinbaña Jerusaléoun úara lúma Jesúsu.

Lábunajoún Jesúsu

(Mt 27.57-61; Lc 23.50-56; Jn 19.38-42)

⁴²⁻⁴³ Lubáragiñe lálüdün wéyu, ába liábin José, ában wügüri inébewati jádaangiñe líñun-ágei lúruđu, le agúrabajabaalin lagúmeserun larúeijan Búngiu táu sun lanígi, lílana fulásu le gíríbei Arimatéa. Queíti luwéyuri lubei lan aráansejani, le ában wéyu lubá wéyu le eméraaguagülei, ába lebélorun le ñíjin lubei Piláto amúriajei lúgubu Jesúsu, úouga ni murúsun anúfudei lídan.

⁴⁴ Ába laweíridun lanígi Piláto dan le lagáambun luágu jilá lan Jesúsu, ába loúnajan luágu ában jábuti súdaara lun lálügüdüni ánjein inárüni lubei luágu jilá lan.

⁴⁵ Dan le laríñagunbei lun luágu inárüni lan, ába líchuguni Piláto lúgubu Jesúsu lun José.

⁴⁶ Ábati lagáñijan José ában gamísa fínutu, ába larárigüdüni lúgubu Jesúsu lueígiñe gurúwa, ába loúburaguni táu. Ába líchuguni lídoun ában umúajaü achigífti luágu dübü, ába ladáuruni láu ában dübü.

⁴⁷ Ába tídin María Magdaléna túma María to lúguchu José aríjei fulásu le ñí lubei labunúta Jesúsu.

16

Lásaarun Jesúsu lídaangiñe Oúweni

(Mt 28.1-10; Lc 24.1-12; Jn 20.1-10)

¹ Dan le lásügürünbei wéyu le eméraaguagülei, ába jagáñijan María Magdaléna, María to lúguchu Jacóbo, túma Salomé íbíñei lun jóúdin ájurudei luágu lúgubu Jesúsu.

² Dimáasu, láfunaduña larúgan, ába jóúdin luágu lumúaja,

³ ábati jaríñagun jámagua.

—¿Cábasan agídarei dübü lueígiñe lubéneri umúajaü?

⁴ Dan le jaríjinbei, úaali oúnwenbun dübü ligía lídan lílúgaarun.

⁵ Ába jebélorun lídoun umúajaü, ába jaríjin ában wügüri ñúraügili ñun ñi lueígiñe loúnwenren táu ában goúnu jarútu. Ába janúfudedagun,

⁶ ába laríñagun joun.

—Manúfudedagua jumá, jáluajañein Jesúsu le Nazarétna le ádarawagúbei luágu gurúwa, úati ya, sará lídaangiñe oúweni. Aríja jumeísan fulásu le ñí lubei líchugúa.

⁷ Jeiba, jaríñagame joun láni disípulugu, lúntima Pédro, luágu níngiran lan luágu úma lun Galiléoun jubáragiñe. Jaríjibeí ñi quei laríñaguni jun.

⁸ Ába jóúdin würiña jagía anúrajeina ñígiñe ladúga lebélorun ában luweírin anúfudei joun. Maríñaguntiñati ni cáta ni ca un ladúga janúfude.

Larúfudagun Jesúsu lúngua tun María Magdaléna
(Jn 20.11-18)

⁹ Lárigiñe lásaarun Jesúsu lídaangiñe ouweni, dimáasu bináafin, ába larúfudagun lúngua furúmiñe tun María Magdaléna, to méja ueiboun laságara sédú espíritugu wuribatiña.

¹⁰ Ába tídin, ába tawísaruniña ja eíbugubaña meja lúma. Dan le tadárirunbáliña, jayájuajaña ladüga lanárime íruni jádan luágu loúnwen.

¹¹ Dan le jagáambun luágu wínwanya lan, luágu aríja táani, mafíñetiña.

Larúfudagun Jesúsu lúngua joun biáma jádaangiñe disípulugu
(Lc 24.13-35)

¹² Lárigiñe, ába larúfudagun Jesúsu lúngua joun biáma jádaangiñe já meja eíbugubaña lúma, jóúdiña áraabun. Ibídiñeti yebe joun luágu Jesúsu lan.

¹³ Ába jóúdin, ába jawísaruniña ja jíbiri, ni jagía, mafíñetiña.

Líchugun Jesúsu jadásin disípulugu
(Mt 28.16-20; Lc 24.36-49; Jn 20.19-23)

¹⁴ Lárigiñe, ligía larúfudagun Jesúsu lúngua joun únsu disípulugu jagía dan le ñun jamá luágu dábula, ába celadeínjan joun luágu liloúguan jafiñen lúma lidére jachügü, ladüga mafíñen jamá joun ja aríjubalin lárigiñe lásaarun.

¹⁵ Ába laríñagun joun.

—Jeíba lídan sun fulásu apúrichija jumeí ugánu le luáguti asálbaruni joun sun gürígia.

¹⁶ Ja afíñerutiña luágu, badísei jagíame, jasálbaruba, ja mafíñetiña, jeféridiruba lídaanme luwéyuri agúseragüdüni.

¹⁷ Niján cátei le lúnbei jarúfuduni ja afíñebaña nuágu, lun lasúbudirúniwa luágu Búngiu lan óunajabaliña. Jaságaruba espíritugu wuribatiña jaweí gürígia lídan níri, jadímurejaba ámu dimúrei lueí jerérun,

¹⁸ ánjaña árügüda jéwe jájaburugu o ánjaña lan áta cátei le gáfarajati, madügünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

Lamúdeirun Jesúsu siélun
(Lc 24.50-53)

¹⁹ Lárigiñe ladímurejan joun, ába líñurúniwa Jesúsu siélun, ába lañúurun lueígiñe loúnwenren Búngiu.

²⁰ Ába jáfuridun disípulugu, ába japúrichijani ugánu le lánina asálbaruni lídan sun fulásu. Jesúsu méme íderagua lumútiña, áni choúrügüdaleí ugánu le japúrichijabei láu miláguru lé buri jadügübei.

UGÁNU BUÍTI LE LABÜRÜJABEI LÚCAS LUÁGU JESÚSU

Labürüjani Lúcas lé meja asúseredubei

¹ Lun Teófilo le weírigubei. Gíbeeña gürígia ouchutiña jabürüjani cátei lé buri luáguti wasálbarun lé meja asúseredubei wagánagua lídan lúaragun,

² áfaaguatiña jabürüjani itara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun.

³ Áu giñe, álügüdajaadina giñe buídu buídu libügürü sun cátei le asúseredubei lúmagiñe lagúmeserun, áni afíñetina luágu maríban lan lun nabürüjanun gárada to bun quei lubúdubu,

⁴ subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagüriajóun Juan le abásteragüdjabe

⁵ Dán meja le Heródes lan urúeibei Judéa, ñíñein meja ában fádiri lánina jafíñen juríu, gíriti Zacarías, jádaangiñeti fádirigu ja lánigu Abías. Elisabét tíribe lúmarí, jádaangiñetu giñe ladügawagun Aarón.

⁶ Biángubei jagía, richáguatiña ligíbugiñe Búngiu, gúnfulitiña lúma, adüga jamei sun le lubeibeí dari lun siñá lan laríñawagún ni cáta wuríbati jawágu.

⁷ Masáanigutiña ladüga siñá lan tagáragüdüni Elisabét, áni derébugugaaña giñe jagía biángubei.

⁸ Luágu ában wéyu, lídan lidáani jesériwidun lánigu Zacarías quei fádirigu ligíbugiñe Búngiu,

⁹ ába jabúdujan según jagáburi fádirigu juríu, lun jasúbudiruni cába lan ebelura lídoun fulásu le sándutimaabeí témpulurugu águdaja cupáli ligíbugiñe Búngiu, ába láburiyan luágun Zacarías.

¹⁰ Sun niján lan cupáli águdajóua, añája gürígia bougudi ayúmuragua lun Búngiu.

¹¹ Ábati lasáriragun ában láni Wabúreme ánjeli lun Zacarías, rára luegiñe louñwenren latárü le ñí lubei cupáli.

¹² Dan le laríjini Zacarías ánjeli ligía, ába laweíridun lanígi, ába lebelurun anúfudei lídoun.

¹³ Ába laríñagun ánjeli ligía lun.

—Manúfudebá, Zacarías, ladüga agáamba láali Búngiu bayúmuragun, tagáraüduba búmari ában irájü, ábame bíchuguni líri Juan.

¹⁴ Tabuínchuba banígi láu ugúndani luágu, áni sarágujaba giñe agúndaarutiña láu lagüriajóun,

¹⁵ ladüga weírigubei biraü ligíbugiñe Búngiu. Mátunbei diweín ni bínu, áni ñíbeí Sífiri Sándu lúma lúmagiñe lubáragiñe lagüriajóun lun ladúndejani lídan sun cátei.

¹⁶ Ladügüba lun jagíribudun sarágu jádaangiñe Israelítagu lun jagáambuni Jabúngiute,

¹⁷ lesériwiduba lun Búngiu láu sarágu ubáfu quei meja ladügüni Elías. Laráansejaba lubá Jesúsu láu laráandaragüdüniña agübürigu jáma isáanigu, láu

gíñe larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsú.

18 Ába laríñagun Zacarías lun ánjeli ligía.

—¿Ída lubági nachoúruni cátei le? Áu táu sun númari, derébugugaadiwa.

19 Ába laríñagun ánjeli ligía lun.

—Gabriél áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun.

20 Guetó, quei mafíñerun bubeí luágu le naríñagubei bun, berédera merérunga, siñábei badímurejan daríme lagüriajouñ biraü. Lagúnfuliruba cátei le lídan lidáni.

21 Sun dan le, añájeti buga gürígia bougudi agúrabajei Zacarías, weírítiti janígi luágu lílú témpulurugu.

22 Dan le láfuridunbei, siñá ladímurejan joun, ábati jasúbudiruni luágu salígua lan som cátei lun, témpulurugu. Ladímurejati joun láu seíni, meréngadijaali.

23 Dan le lagúmuchun dan le lúnbei lesériwidun Zacarías témpulurugu, ába lídin lúbiñoun.

24 Lárigíñe cátei le, ába tadágeinadun Elisabét, to lúmari, ába máfuridun tan jábiñeigiñe luágu seíngü játi, teréngati túnguarügü.

25 “Ladügüñein Búngiu lubuidun cátei le nun guelé lun lagídaruni nibúsigari jagíbugíñe gürígia.”

Lasúbudiraügüdüni ában ánjeli luágu ti lagüriajouñ Jesúsú

26 Sísí játi lárígiñe, ába loúnajani Búngiu ánjeli Gabriél lídoun ában ubúругu láni Galiléa, gíríti Nazarét,

27 lun lídin bisíidoun ában würi irájügiru, gírítu María. Würi tugúya, gadáraduñoun lúma ában wügüri gíríti José lun tamárieidun lúma, wügüri ligía, linébaanfan urúei David.

28 Ába lebélorun ánjeli ligía le ñjín tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun würiña.

29 Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara.

30 Ábati laríñagun ánjeli ligía tun.

—Manúfudebá María, fuleísei láadibu Búngiu,

31 badágeinada, ábame bagüriajan ában irájü, ábame bíchuguni líri Jesúsú.

32 Weírígubei, Liraü Búngiu le íñubei lúba lagúarúniwa, áni larúeigüdübei Wabúreme Búngiu quei larúeigüdüni David, le binádu lidúje.

33 Lagúmadirubei linásiñun Israél lun sun dan, áni magúmuchadibei lagúmadijan.

34 Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

35 Ába laríñagun ánjeli tun.

—Liábinba Sífiri Sándu buágun, ábame loúburagunibu lubáfu Búngiu. Ligía sándubei lubei irájü le lúnbei bagüriajani, Liraü Búngiu lúba lagúarún.

36 Tiábin bidúje to Elisabét, dageínaaru gíñe lau sun weíyaaru lan, tagáraüdüba ában wügüri irájü, ítara líña lubeíti, tó meja uáguboun jaríñaga luágu siñá lan tagáraüdun, níjein sísi játi dageínaü tuágu.

37 Úati ni cáta siñáti lun Búngiu.

38 Ábati taríñagun María.

—Lidámun Nabúreme Búngiu nugúya, adügaleí le baríñagubei náu.
Lárigiñe, ába lídin ánjeli.

Tídin María bisídoun Elisabét

³⁹ Lídoun dan ligía, ába tídin María furése lídoun ában ubúru gu le labádinaguabei buri wúbü Judéa,

⁴⁰ ába tebélorun lúbiñoun Zacarías, ába tabúsurun tun Elisabét.

⁴¹ Dan le tagáambuni Elisabét tabúsurun, ába lánjingichagun tiraü turágeirugu, ába liábin Sífiri Sándu tuágun.

⁴² Ábati taríñagun láu umálali le jéreti.

—Binílaadibu Búngiu sügü jáu sun jiñáriñu, binílaali gíñe biraü.

⁴³ ¿Cátanañadina lun tiábin lúguchu Nabúreme bisídana?

⁴⁴ Láu nagáambuni babúsurun, ába lánjingichagun niraü nurágeirugu láu ugúndani.

⁴⁵ Gúndaatibu bugúya le afiñerubei, luágu lagúnfuliruba lan cátei le laríñagubei Wabúreme bun.

⁴⁶ Ábati taríñagun María.

Rútu nuwáni uweírighuni lun Nabúreme,

⁴⁷ gúndaagua tugúya nanígi luágu Búngiu le Nasálbaragüle,

⁴⁸ lugúndun gudémejabu jaali nun, nugúya le lidámun.

Lúmágiñe guelé, jaríñaguba sun gürígia luágu fuleíseiwadina lan,

⁴⁹ ladúga adúgaali Búngiu, le Súnti Gabáfu, cátei weínamuti nun, sánduti líri.

⁵⁰ Súnwandan gudémebaña lan ja inébejabúbaña lun, lun.

⁵¹ Adúgaali oúnwenbun buri cátei, adúgaali lun ni cáta jamá ja barúguabaña jóungua.

⁵² Gidálaaña ja gabáfubaña lídaangiñe jaweírighun,

ja únabubaña, ába ladügüniña lun weírighu jamá.

⁵³ Já buga lamábaña, quimúlegüda lumútiña,

ánjeinti ja rísibaña, míchugunti ni cáta joun.

⁵⁴ Íderagua lumútiña linásiñun Israél, ja esériwidubaña lun,

mabúleidun lumúti lun gudémejabu lan,

⁵⁵ queí meja lidáradun jáma binádu wagübürighu—

Abrahám jáma ladügawagun—lun gudémejabu lan joun lun sun dan.

⁵⁶ Ába teréderun María ürüwa játi ñi, lárigiñe, ába tagríbudun jábiñoun.

Lagüriajoun Juan le abásteragüdjabei

⁵⁷ Ába lagúnfulirun dan lun tagüriajan Elisabét, ába tagüriajan ában wügüri irájü.

⁵⁸ Dan le jagáambun tubésinanigu jáma tidújeñu luágu lubúidun cátei le ladügübei Búngiu tun, ába jagúndaarun úara túma.

⁵⁹ Luágu liwídun wéyu, ába lerésibiruni circuncisión, le liseíni luágu láni lan Búngiu irájü ligía. Buséntiña yebéti jíchuguni líri lúguchi luágu, le Zacarías,

⁶⁰ ába taríñagun lúguchu.

—Uá, Juánba líri.

⁶¹ Ába jaríñagun tun.

—¿Cági uágu? Úati ni ában jádaangiñe binébaanfaangu gíriti Juan.

⁶² Ába jálügüdüni lúguchi irájü láu seíni ca lan íri labúseerubei líchugun luágu.

⁶³ Ába lamúriajan ában murúsun fuláansu, ába labürüdün luágun. “Juan lírabei.” Ába laweíridun janígi sùngubei láu cátei le.

64 Lídán méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu.

65 Ába laweíridun janígi besínagu láu cátei le, ába labájüdawagún cátei le lídan sun fulásu geyéguá jáu.

66 Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladüga biní lumútija Búngiu le tímatimaati.

Lerémujan Zacarías

67 Ába liábín Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le lariñagubei Búngiu lun, ába lariñagun.

68 Buídulá ladímurejoún luágu Wabúreme le Jabúngiutebei güriá ja Israelítagu, ladüga nñubinjali woun, wagía le lánigu, áni sálba láadiwa.

69 Rújali ában Asálbaragülei le gabáfuti woun jádaangiñe linébaanfaangu David, lé meja eseríwidubei lun.

70 Ítara líña meja lariñaguni Búngiu jádaangiñe láni profétagu ja edéregeragubaña jóungua lun, lúmagiñe meja binádu dan,

71 luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

72 Ítara líña gudémejabu lan Búngiu joun binádu wagübüriagu, arúfudaleí luágu mabúlieidagun lan lueí lidáradun le sándubei jáma.

73 Niján lé meja lariñagubei lun wáguchi Abrahám.

74 luágu leséfurubádiwa lan jaweí wáganiñu, lun gayáraabei lan weseríwidun lun manúfudeiga,

75 láu úarani, derégeguñu wagía woúngua lun, sun dan le wabágaridubei.

76 Áni bugúya nisáaniraü, láni Búngiu le íñubei proféta lúba bagúarúniwa, ladüga baráansejaba lubá Wabúreme,

77 subúdi lámuga úma lánina asálbaruni joun lánigu, le áubei ferúduawa lan jafígoun.

78 Wabúngiute, láu lísiñejabu lúma lugúdemejabu, loúnajabei Crístu wámoun siélugiñe

79 lun larúgoungadágüdüñ jáu ja lídaanbaña lubúriga lúma jáu ja luágubaña úma le ouwenibei lébeja,

lúma lun ladúndejani wapásun lídoun úma le anügüwaliwa lídoun darángilaü.

80 Aweírideina ligíati irájü ligía, afáragadagueina giñe lídan láni espíritu. Ába laganoún lídan fulásu mageírawati darí lúmoun wéyu le lagúmeserun luwádigimari lun Búngiu jagánagua lumútuniña Búngiu ja Israelítagu.

2

Lagüriajouniwa Jesúsu

(Mt 1.18-25)

1 Lídoun buga dan ligía, ába lariñagun urúei Augústo lun jabájüdüñ sun güriá ja Rómabaña.

2 Furúmiñe meja jadügüni cátei le, dán meja le Cirénio lan agúmadijabei Síria.

3 Súnti güriá mósu jóüdin jageíra lun ñi lan jabájüdüwa.

4 Ligía láfuridunbei José Nazarétgiñe, loúbawagugiñe Galiléa, ába lídin loúbawagun Judéa lídoun fulásu le gíribei Belén, le ñi lubei lagüriajouá David, quei linébaanfan lubei David José.

⁵ Ába lídin Belén lun labájüdün úara túma María to gadáradunboun lúma lun jamárieidun, áni dageínañoun.

⁶ Dánti le añája lan ñi Belén, ába lachülürün dan lun tagüriajan María.

⁷ Ába tagüriajani furúmiñeti tiraü ñi, ába toúburaguni tídan lágei, ába taróunragüdüni ñi tídan jában anímaalu ladüga úati ubáraü joun tídan jában chülüdügütiña.

Ánjeligu jáma oúnigirutiña mudún

⁸ Lídan áraabu bougudi luei Belén, ñiñanu jóuniri mudún, bou larúgan jáu oúnigiraña jalügüniña mudún.

⁹ Sódini, ába lasálriragun ában láni Wabúreme Búngiu ánjeli siéluñe joun, ába jaríjin ában oúnwenbun larúgounga le lánina Búngiu geyégua jáu, ába janúfudedagun.

¹⁰ Ába lariñagun ánjeli ligía joun.

—Manúfudeda jumá, ladüga níjein ugánu buíti nanügün jun, lébunabei sarágu ugúndani joun sun gürígia.

¹¹ Luágu agüriajouaali lan ában asálbaragülei jun ugüñe, lageíra David, Cristu le Jabúreme.

¹² Jadárirubei irájü ligía jóuburagu tídan lágei, roun tídan jában anímaalu.

¹³ Lídan óra ligía, ába jasálriragun sarágu ánjeligu lubádu furúmiñeti ánjeli, ába jíchugun uweíríguni lun Búngiu lídan líñutima siélu,

¹⁴ ¡Uweíríguni lun Búngiu lídan líñutima siélu, darángilaü múarugu jádan gürígia ja íbjubalin lufúleisein!

¹⁵ Dánti le jagíribudun ánjeligu járigoún siélu, ába jaríñagun jóuniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jóudin furéseguena, ába jadárirunun María lúma José, lúma irájü roun tídan jában anímaalu.

¹⁷ Dan le jaríjinbalin, ába jabájüdaguni le lariñagubei ánjeli joun libügürü le.

¹⁸ Súnti ja agáambuliña, weíríti janígi láu le jaríñagubei.

¹⁹ Áni María, areídañu tíñein sun cátei le tídan tanígi, arítagua luágu.

²⁰ Ábati jagíribudun jóuniri mudún, adímurejeina weíri luágu Búngiu, luágu sun le jagáambubei lúma le jaríjibe, ladüga suséreti ítara quei lariñawagüniwa joun.

Larúfudúniwa Jesúsu témpulurugu

²¹ Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúnfulirunbei lidáani jarúmadun lagübürigu Jesúsu según igáburi lídan lilúrudun Moisés, ába janügüni irájü ligía ubúrugin Jerusalén lun jedéregeruni lun Búngiu.

²³ Jadügünbalin líra ladüga lariñajare tídan lilúrudun Búngiu. “Sun furúmiñeti wügüri irájü agüriajóuti lúnbei Búngiu.”

²⁴ Ába lubeíti jóudin adágaragüda le uágubei lariñaga lilúrudun Búngiu. bián wagúgua o bián lan únjun.

²⁵ Lídan meja dan ligía, ñiñein meja ában wügüri Jerusalén gíriti Simeón. Wügüri ligía ában wügüri buíti, weíríti ledéregeragun lúngua lun Búngiu, áni

agúraba lumúti liábin Crístu, le lúnbei lasálbaruniña Israelítagu. Níñein Sífiri Sándu lúma Simeón,

²⁶ áni arúfuda láali lun luágu mouñwenbei lan maríjngaleí Crístu le lúnbei loúnajani Wabúreme Búngiu.

²⁷ Ába lídin wügüri ligía témpulurugun, ladúndejan Sífiri Sándu. Dánti le janügünbalin lagübürigu Jesúsu Jesúsu témpulurugun lun jadügüni le laráñagubei lúrudu láu,

²⁸ ába loúyuajani Simeón, ába líchugun eteíngiruni lun Búngiu, aríñageina ligía.
²⁹ Nabúreme, gayáraajali bígirunina lun nouñwen láu darángilaü, nugúya le esériwidubei bun,

ladúga gúnfuli báali le baríñagubei nun.

³⁰ Aríja náali Wasálbaragüle láu nágu,

³¹ Asálbaragülei le bouñajabei joun sun güri-gía.

³² Ítara lúba queísi ában lámpu lun larúfuduni inárüni joun ja mámabaña juríu, ru ligíame uweíríguni joun Israelítagu, ja bánigu.

³³ Ába laweíridun lanígi José táu sun María láu le laráñagubei Simeón luágu irájü le.

³⁴ Ábati labíniruniña Simeón, ába laráñagun tun María, to lúguchu Jesúsu.
—Irájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña jeresibiruni.

³⁵ Ítara lúba lasúbudirúniwa le larítagubei cáda ában tídan lanígi luágu Crístu. Áni itara lúba sun cátei le bun quei ában efeín to ácharurutu tuágu buwáni.

³⁶ Níñoun gíñe ában würi proféta, gírítu Ána, würi tugúya liraü Fanuél, jádaangiñe ladúgawagun Áser. Weíríyaaru würi tugúya, ñúraügiru meja tamárieidunbei, sédüñein irúmu táu lúma túmari, ába loúnwen,

³⁷ guetó, gádürü-weín-gádürü irúmu táu. Máfuriduntuti témpulurugugiñe, terédera ñi esériwida lun Búngiu áriebe wéyuagu, ayúnara lúma ayúmuragua lun Búngiu.

³⁸ Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹ Lárígiñeti jagúnfulirun láu sun le laráñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét.

⁴⁰ Aweírídeina ligíati irájü le, éredeina ligía, afáragadagueina lídan lichü áu, biní lumútijati Búngiu sarágu.

Jesúsu témpulurugu

⁴¹ Ságüja irúmu jóudin lagübürigu Jesúsu ubúru-gu Jerusalén lubá fédu le páscua,

⁴² áni dan le lagúnfulirunbei Jesúsu dúusu irúmu, ába jóudin súngubei Jerusalén quei le jagáburi lídan fédu ligía.

⁴³ Dánti le jagíribudun lárígiñe lagúmuchagun fédu, ába leréderun irájü ligía Jerusalén, ibídiñoun tun lúguchu ni lun José,

⁴⁴ jarítagún yebe luágu nítan lan jádan güri-gía ja jámarigubaña luágu üma. Ítara líña jadügün ában wéyu eíbuguni, dan le jáluajani jádan jadújeñu lúma jádan jasúbudiraagun,

⁴⁵ madári jamúti. Ábati jagíribudun ubúrugun Jerusalén áluajei ñi.

⁴⁶ Ūrúwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña.

⁴⁷ Súnti ja agáambubalin, weíriti janígi luágu lichú láu lúma luágu buri loúnabagüle.

⁴⁸ Dan le jaríjinalin lagübürigu, ába laweíridun janígi, ába taríñagun lúguchu lun.

—¿Cáme badügei cátei le woun, niraü? Nugúya lúma búguchi, wáluajañadibutia láu idíjeri.

⁴⁹ Ábati lariñagun Jesúsu joun.

—¿Cági uágu jáluajana? ¿Ibídíñeti jun luágu lúnti lan neténirun lun cátei le láni Núguchi?

⁵⁰ Úati gunfaráanda jamáni le lariñagubei joun.

⁵¹ Ábati lagíribudun jáma, Nazarétün, ába lasígirun láu meme lagáambadi joun. Ábati buri tareíduni lúguchu sun cátei le tarítangunrugun.

⁵² Niján mémeti Jesúsu aweírdeina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe gürígia.

3

Lapúrichijan Juan le abásteragüdjabei, lidan fulásu mageírawati

(Mt 3.1-12; Mr 1.1-8; Jn 1.19-28)

¹ Lídan liqueínsin lirúmoduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia,

² Anás lúma Gáifasi, jagía fádorigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraü Zacarías, lídan fulásu mageírawati,

³ ába leíbuguni Juan sun fulásu buri le lubádubei dúna le Jordán, ariñagueina joun gürígia luágu lúnti lan jaságürijan luágu jafígoun, sáansi jameíme jagáburi lun ferúdunawa lan jafígoun, badísei jagíame.

⁴ Suséreti cátei le ítara quei meja labürüdüni proféta Isaías, lariñaga. Agaambúati lumálali ában agúarajati lídan fulásu mageírawati ítara.

“Aráanseja jumóun janígi lubá liábin Wabúreme, queísi ladárarúniwa üma surúti.

⁵ Labuíñchagüdüwaba sun gudúungu, sun wübü, lagurúaba,

üma buri le segéti, lásururuba,

üma buri le múaragunti, lúwaradaguba.

⁶ Larijúbei sun ubou Wasálbaragüle, le loúnajabei Búngiu woun.”

⁷ Nübintiña sarágu gürígia lun Juan lun labásteragüdüniña, ába lariñaga joun.

—Jarásan jéwe jugúya le! ¿Ca awísarubalün lun jeíbaagun lueí lanárimelafáyeiragüle figou le yaráfaalibeí?

⁸ Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladüga quei nariñaguni jun, gayáraati ladügün Búngiu linébaanfaangu Abrahám lídaangiñe buri dübü le.

9 Yaráfaali dan lun jafáyeijan luágu jifígon queísi taráanserún jaráwa lun tánychuguni tídibu wéwe. Sun ídibu le mabuídunti lín lánchugúba, ábame lagudún.

10 Ábati jariñagun gürígia jagía lun.

—¿Cáteiti lúnbei wadügüni?

11 Ába lariñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

12 Nñubintiña giñe agúburajatiña liseínsuna gumádi lun jabásterun, ába jariñagun lun.

—Maésturu, ¿ca cátei lúnbei wadügüni?

13 Lariñaga Juan joun.

—Magúburaja jumá lougiñe le uágubei lariñaga lúru.

14 Ariñagatiña giñe fiú sudaara lun.

—Ángi wagía, ¿cági lúnbei wadügüni?

Lariñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madügün lumúti, gufúruma jumá láu jafáyeirua.

15 Añájati gürígia madéraguüdünja arítagua luágu fágua lan Juan Crístubei,

16 ába lariñagun Juan joun süngubei.

—Áu, láu dúna nabásteragüdaün, nítenei ában le lúnbei labásteragüdünnün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madüna nan ni lun nafáragaduni tagürüga ligeídin.

17 Dánme liábin, jafánreinrúba gürígia ja lánigubaña jádaangiñe ja wuríbabaña queísigubeirügü lagídarániwa ífei lídaangiñe türígu buíti, ába loundarún türígu buíti tídoun lágei, ába lagudún ífei lídan wátu geméti le meñeguchati.

18 Láu igáburi le lúma láu buri ámu ewéridijani líchigei Juan ugánu buíti joun gürígia luágu wasálbaragüle.

19 Erérati giñe lun gumándan Heródes luágu laganoún túma Heródias, to lúmari Felípe, le lamúlen, lúma luágu ámu buri cátei wuríbati le ladügübei.

20 Lubáragiñe ladügün Heródes gásu láu, adúgarügü ligía ában cátei wuríbatimaati. ládaruni Juan furísunrugun.

Labásterun Jesúsu

(Mt 3.13-17; Mr 1.9-11)

21 Lubáragiñe ladaürüniwa Juan, dan le labásteragüdüniña gürígia, badíseiti giñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu,

22 ába larijiniwa larárirun Sífiri Sándu luágun camá jamuga ában únjun, ába lagaambúniwa lariñagun ában umálali siélugiñe.

—Amürü Niraü le jinsínebei nun, gúndaatina báu.

Linébaanfaangu Jesúsu

(Mt 1.1-17)

23 Queí buri darándi irúmu láu Jesúsu dan le lagúmeserunbalin luwádigimari le uágubei louñajei Búngiu. Jarítawagúati luágu liraü lan José, José, liraü Elí,

24 Elí, liraü Matát, Matát, liraü Leví, Leví, liraü Melquí, Melquí, liraü Jána, Jána, liraü José,

25 José, liraü Matatías, Matatías, liraü Amós, Amós, liraü Nahúm, Nahúm, liraü Eslí, Eslí, liraü Nagai,

²⁶ Nagái, liraü Maat, Maat, liraü Matatías, Matatías, liraü Semeí, Semeí, liraü José, José, liraü Judá,

²⁷ Judá, liraü Joána, Joána, liraü Résa, Résa, liraü Zorobabél, Zorobabél, liraü Salatiél, Salatiél, liraü Néri,

²⁸ Néri, liraü Melquí, Melquí, liraü Adí, Adí, liraü Cosám, Cosám, liraü Elmodám, Elmodám, liraü Er,

²⁹ Er, liraü Josué, Josué, liraü Eliézer, Eliézer, liraü Jorím, Jorím, liraü Matát,

³⁰ Matát, liraü Leví, Leví, liraü Simeón, Simeón, liraü Judá, Judá, liraü José, José, liraü Jonán, Jonán, liraü Eliaquím,

³¹ Eliaquím, liraü Meléa, Meléa, liraü Mainán, Mainán, liraü Matáta, Matáta, liraü Natán,

³² Natán, liraü David, David, liraü Isaí, Isaí, liraü Obéd, Obéd, liraü Booz, Booz, liraü Salmón, Salmón, liraü Naasón,

³³ Naasón, liraü Aminadáb, Aminadáb, liraü Arám, Arám, liraü Esróm, Esróm, liraü Fáres, Fáres, liraü Judá,

³⁴ Judá, liraü Jacób, Jacób, liraü Isáac, Isáac, liraü Abrahám, Abrahám, liraü Taré, Taré, liraü Nacór,

³⁵ Nacór, liraü Serúg, Serúg, liraü Ragáu, Ragáu, liraü Pelég, Pelég, liraü Héber, Héber, liraü Sála,

³⁶ Sála, liraü Cainán, Cainán, liraü Arfaxád, Arfaxád, liraü Sem, Sem, liraü Noé, Noé, liraü Laméc,

³⁷ Laméc, liraü Matusalén, Matusalén, liraü Enóc, Enóc, liraü Jaréd, Jaréd, liraü Mahalaléel, Mahalaléel, liraü Cainán,

³⁸ Cainán, liraü Enós, Enós, liraü Set, Set, liraü Adán, Adán, liraü Búngiu.

4

Loúchwagúniwa Jesúsu (Mt 4.1-11; Mr 1.12-13)

¹ Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanügüni Sífiri Sándu lídoun fulásu mageírawati.

² Reídeiti Jesúsu bián-wein wéyu ñi láu Máfia oúchaguei ánjein áburuja lídoun wuríbani. Meíginti ni cáta lídan sun bián-wein wéyu lígía, ába lasándirun ában oúnwenbun ilámaü.

³ Ábati laríñagun Máfia lun.

—Ánjein Liraü bubei Búngiu, salíguagüdabeí dübü le feínme.

⁴ Laríñaga Jesúsu lun.

—Tariñajare Lerérun Búngiu. “Mámarügüba táu fein jabágarida gürgía, jabágariduba gíñe láu jagúnfulirun láu sun dimúrei le laríñagubei Búngiu.”

⁵ Lárigiñe, ába lanügüni Máfia Jesúsu luágun ában wübü íñuti, ába larúfuduni sun fulásu le ubouágubei lun lídan ában.

⁶ Ába laríñagun Máfia lun.

—Níchugubei sun ubáfu lúma sun uweíríguni le bun

⁷ ánjabu ájuduragua nun lun banügünina quei bubúngiute, báníbei súngubei, ladüga íbija náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Dísebá nueí, Máfia, ladüga tariñajare Lerérun Búngiu. “Judúguabá lun Búngiu le Babúreme, lúnrügüla besériwida.”

⁹ Lárigiñe, ába lanügüni Máfia ubúrugin Jerusalén, ába laweínragüdüni tábulugu témpulu, ába laríñagun lun.

—Ánjein Liraü bubei Búngiu, chüguabá búngua yágiñe lun ünabun,

¹⁰ ladüga tariñajare Lerérun Búngiu.

Loúnajabaña Búngiu láni ánjeligu lun jóunigirunübu,

¹¹ janügübadibu jájaburugu luei labúleiseirun bugúdi luágu dübü.

¹² Ába lariñagun Jesúsu lun.

—Tariñajare giñe Lerérun Búngiu. “Mouchaguabeí Búngiu le Babúreme.”

¹³ Dánti le madárijali Máfia cába lan luwúyeri ouchwagúni ladüga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa

(Mt 4.12-17; Mr 1.14-15)

¹⁴ Ába lagíribudun Jesúsu Galiléoun buin láu lubáfu Sífiri Sándu, ába buríti ladímurejóun luágu lídan sun fulásu geyégua.

¹⁵ Arúfudajatija tídan jalígilisin juríu lídan sun fulásu, buíti jadímurejan sun güriágu luágu.

Jesúsu lídan ubúruğu Nazarét

(Mt 13.53-58; Mr 6.1-6)

¹⁶ Ábati lídin Jesúsu Nazarétün, le fulásu le ñí lubei lagüriajouá, ába lebélorun tídoun jalígilisin juríu lídan wéyu le eméraaguagülei quei ligáburi yebu, ába laráramun lun lalíjan tídan Lerérun Búngiu.

¹⁷ Ába jíchugunun lílburun proféta Isaías lun, dan le ladáranun, ába ladáriruni le ñí lubei lariñaga ítara.

¹⁸ Níjein láni Búngiu Sífiri Sándu nuágu, ladüga anúadaja láadina lun níchuguni ugánu buíti joun gudémetiña, oúnaja láadina lun námaliñaniña ja nidjjeribaña tídan janígi, lun náfuridagüdüniña adaürütiña, lun níchugun aríjini joun maríjintiña, lun neséfuruniña ja ouserúabaña wuríba,

¹⁹ lun nadímurejan luágu dan le fuleisejjabu lan Búngiu joun güriágu.

²⁰ Ába ladáranun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei,

²¹ ába lagúmeserun adímureja, lariñaga.

—Ugúñe guánarü gúnfulijali cátei le jigíbugiñe.

²² Adímurejatiña sun jagía buíti luágu Jesúsu, weirititi janígi luágu lubuídun buri dimúrei le lariñagubei. Jálügüdagua buríti jámagua.

—¿Mámasan le liraü José le?

²³ Ába lariñagun Jesúsu joun.

—Subúsiiti nun luágu jariñagubei lan cátei le nun. “Surúsia, agáraniguabá búngua”, jariñaguba giñe nun. “Agáambaadiwa luágu buri cátei le adüga baalibe Capernaüm, adügabei giñe ya bageira.”

²⁴ Ába lasígirun adímureja, lariñaga.

—Nínárün jáu luágu úa lan ni ában proféta erésibirúati buídu lageira.

²⁵ Choúru numúti luágu añájein lán meja sarágu würiña ja jiláguañábaña jámarigu jádan Israelítagu lídan meja lídáani proféta Elías, dan le májuyun lubei júya luágu úruwa írúmu dimí, ába ñi lan sarágu ilámaü fulásurugu,

²⁶ áni mouñajan lumúti Búngiu Elías túmoun ni ában jádaangiñe würiña jiláguaaña jámarigu jagía ja aganoubaña Israel, loúnajei túmoun ában to aganououn Sarépta, yaráfa lun ubúruğu Sidón.

²⁷ Ñiñanu meja giñe sarágu gawágutiña gumeín luágu jára ñi Israél lídan lidáni proféta Eliséo, úati ni ában jádaangiñe areídawaguagüdüti lueidügüya Naamán le Síriana.

²⁸ Dan le jagáambunbalin sun ja ñibaña ligílisirugu cátei le, ába jagáñidun sarágu.

²⁹ Ába jásaarun, ába jásaáruni Jesúsu bougudín luei fulásu, ába janügüni lálbulugun wúbü le gagíbuagubalin fulásu lun jájuchuruni ñigiñe.

³⁰ Ába lásügürün Jesúsu jamídaanguágiñe jámagua, ába lídin.

Ában wügüri gawáguti espíritu wuríbati

(Mr 1.21-28)

³¹ Ábati lídin Jesúsu Capernaúm, ában fulásu le lídaanbei Galiléa, ába larúfudajan joun güriáa ñi lídan wéyu le eméraguagülei.

³² Weirititi janígi láu ligáburí larúfudajan, ladüga láu ubáfu ladímureja.

³³ Ñiñeinti ában wügüri ligílisirugu, gawáguti espíritu wuríbati, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Biábiña agünrinchaguawa? Subúdi numútibu, áni subúdi numúti luágu amürü lan Liraü Búngiu le sándubei.

³⁵ Ába ladeínjan Jesúsu lun espíritu wuríbati ligía, ába lariñagun lun.

—¡Maníba, furíba lídaangiñe güriáa le!

Ábati lájuchuruni espíritu wuríbati wügüri ligía múarugun jagíbugiñe súngubei, ába láfuridun lídaangiñe, mabúleiseirunga.

³⁶ Ába laweíridun janígi súngubei, ába jariñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espíritu wuríbatiña, ába jáfuridun!

³⁷ Adímurejoátiti buri luágu Jesúsu lídan sun fulásu geyégu.

Lareídaguagüdünnun Jesúsu límenidi Pédro

(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígílisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmuragun lun Jesúsu lun lareídaguagüdünnun.

³⁹ Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

Lareídaguagüdünnun Jesúsu sarágu sánditiña

(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le láfuachun wéyu ába janügüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti.

⁴¹ Sarágu jaña giñe ja gawágutiña espíritu wuríbatiña, ába jagídarúniwa jaweí, ába buri jagúaragun ítara.

—Amürü le Liraübei Búngiu.

Ába ladeínjan Jesúsu joun espíritu wuríbatiña, mígirun lumútiña lun jadímurejan, ladüga subúdi jamúti luágu ligía lan Crístubei.

Lapúrichijan Jesúsu Galiléa

(Mr 1.35-39)

42 Dan le larúgadunbei, ába láfuridun Jesúsu bougudín lueí ubúruгу lídoun ában fulásu mageírawati. Ába jáluajani gürígia, ába jachúlürün le ñíjin lubeí, buséntiña yebe jeréderuni lueí lídin,

43 ába laríñagun joun.

—Gásu gíñe níchuguni ugánu le luáguti larúeijan Búngiu joun lílana líbiri fulásu, ladúga lun líra nouñajoúa.

44 Ítara líña lídin apúrichijeina tídan buri jalígílisin juríu, Galiléa.

5

*Esénijani le láubei miláguru
(Mt 4.18-22; Mr 1.16-20)*

1 Luágu ában dan, ñíñein Jesúsu láru dúna le Genesarét, ábati jayábingua sarágu gürígia darí lun jámurudaguni, ladúga busén jamá jagáambuni lerérun Búngiu.

2 Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin.

3 Ábati ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladisedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfudaja joun gürígia ñígiñe.

4 Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

5 Laríñaga Simón lun.

—Maésturu, ñadímeinjadiwa sun áriebu, mañúguntiwa ni cáta, quei amürü lubeí aríñagubalin, wágura.

6 Ába jágurun, dan le jíñúrangunbárun séni, ñíñanu sarágu úduraü tídan darí yebe lun tajeíridagun.

7 Ábati jadügün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdünnun bíangubei ugúnein darí yebe lun tadíbiragun.

8 Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladúga ában wügüri gafígounti nugúya.

9 Laríñagubaalin Simón líra ladúga laweíridun lanígi, jáu sun ja úarabaña lúma, luágu añúguni le jadügübei.

10 Weíríti gíñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádigimarida adíaja gürígia nun.

11 Lárígiñeti játürün, ába jígiruni sun cátei, ába jóudin lúma Jesúsu lun láni jamá disípulgu.

*Lareídagugüdüñ Jesúsu ában gawágti gumeínluágu sun lúra
(Mt 8.1-4; Mr 1.40-45)*

12 Luágu ában dan, lídaañein ában fulásu Jesúsu, le ñí lubei ában wügüri gawágti gumeín luágu sun lúra. Dan le laríjinbalin wügüri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, ánjabu busén, gayáraati bareídagugüdüñina.

13 Ábati lagúruruni Jesúsu láu lújabu, ába laríñagun.

—Buséntina, areídagubá.

Quei lariñagun ítara, ába lagídarun gumeín lueí wügüri ligía,

¹⁴ ábati lariñagun Jesúsu lun lun mabájüdagun láani cátei le ni ca un. Lariñaga lun.

—Ñüdünrügüba, arúfudagua búngua lun fádiri, rúbeíme edéweejani le uágubei lariñaga lilúrudun Moisés luágu barúmadun, aríja jamámugei güriquia luágu areídaguadibu lan.

¹⁵ Eibu dan, eibu labúrchaguntima luágu Jesúsu, sarágu jañátija güriquia oúndaragutiña lun jagáambuni lúma lun lareídaguágüdüni jasándi.

¹⁶ Ábaja lídin Jesúsu le ñíjin lumúti úa jamá güriquia lun layúmuragun lun Búngiu.

Lareídaguagüdüni Jesúsu ában fadáguaali

(Mt 9.1-8; Mr 2.1-12)

¹⁷ Luágu ában wéyu, ñínein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdüniña sánditiña.

¹⁸ Ábati jayábin fiú wügüriña barúina ában wügüri fadáguaali tídan ában ubárari, jálugati jebélaagüdüni le ñíjin lubei Jesúsu lun larijini.

¹⁹ Madáritiña jalíagiñeba lan jebélura ladüga jibe güriquia, ábati jaweínrun tábulugun múna, ába jagídarun murúsun lueígiñe lougiñe le ñí lubei Jesúsu, ába jarárigüdüni sánditi tídan lubárari ligíbugiñoun.

²⁰ Dan le larijínbalin Jesúsu affíñeni le jawágubei, ába lariñagun lun sánditi ligía.

—Wügüri, ferúdunawaali bifígoun.

²¹ Ábati jariñagun arúfudajatiña lilúrudun Moisés jáma fariséogu jóunguarügü.

—¿Cáteisán güriquia le, le minébenejabubei lun Búngiu láu ligáburi ladímurejan? Úati ámu gayáraati ferúduna lan figou lueídügüya Búngiu.

²² Subúdi lumúti Jesúsu ca lan jasáminabei, ába lariñagun joun.

—¿Ca uágu jasáminara ítara?

²³ ¿Cátima méreengúnbei lariñawagun. “Ferúdunawaali bifígoun”, ódi “Sarába, beíbuga”?

²⁴ Narúfudaaliti jun luágu gayára lan ferúduna nan figou, áu le Wügüri Garaúwarügüti.

Ábati lariñagun lun le sándibei.

—Sarába, barúboun bubárari, beíba búbiñoun.

²⁵ Lídan óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu.

²⁶ Ába laweíridun janígi súngebui, ába jadímurejan luágu luweírigun Búngiu, ába jariñagun láu luweírin janígi.

—Aríjaadiwa cátei weíriguti ugüñe.

Lagúarun Jesúsu lun Leví lun lánime disípulu

(Mt 9.9-13; Mr 2.13-17)

²⁷ Lárigiñe cátei le, ába láfuridun Jesúsu lídaangiñe fulásu ligía, ába larijín ában agúburajati liseínsuna gumádi, gíriti Leví, ñun líña lídan fulásu le ñí lubei lagúburaja, ába lariñagun Jesúsu lun.

—Falábana, queímoun núma queísi náni disípulu.

28 Ába lásaarun Leví, ába lígiruni sun cátei lánina binádu libágari, ába lídin lúma Jesúsu queisi láni disípulu lúmagiñe óra ligía.

29 Lárigiñe, ába ladügün Leví ában oúnwenbun fédu lun Jesúsu, lúbiñe, ñiñanuti sarágu agúburajatiña liseínsuna gumádi jámaya ámu güriña ñun luágu dábula jáma.

30 Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulugu, ába jariñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gafígonitiña?

31 Lariñaga Jesúsu joun.

—Ja magádiebaña, memégeirúntiña surúsia, aná ja sándibaña.

32 Máma niábiña álujaja magádiñe ligíbugiñe Búngiu, niábiña álujaja gafígonitiña lun lasáansirún jouuserun.

Jálügüdüni Jesúsu luágu ayúnaruni

(Mt 9.14-17; Mr 2.18-22)

33 Ábati jariñagun lun Jesúsu.

—¿Ída liñásan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, jouítiña, gurá jagía súnwandan?

34 Ába lariñagun Jesúsu joun.

—¿Gayáraati funági jayúnaragüdüniña güriña ja jamísurajan lídoun ában maríei sun niján lan adári jáma ñi?

35 Lachülürüba dan lun lídin adári, ligíameti jayúnarun.

36 Rúti giñe Jesúsu ában jémpulu joun luágu iséri larúfudajan lúma binádu, lariñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladüga ítara, lagádeiruboun to isérigiruboun, áni merédebei giñe murúsun gamísa iséri ligía buídu tuágu anáanguni ñulújaru tugúya.

37 Michugúntu giñe diweín iséri lídoun guéru ñulújali, ánjein adügüwa ítara, tajeiridagubei diweín iséri guéru ñulújali, féridiméti diweín, féridi guéru.

38 Ligía lúnti lubeí tichugún diweín iséri lídoun guéru iséri, ítara lúba lesériwidun guéru, seríwi diweín.

39 Úati giñe átuti diweín to binádu lun labúseerunun to iséri lárigiñe, lariñaguba. “Buítimaatu to binádu.”

6

Jabúdajan disípulugu türígu lídan wéyu le eméraguagülei

(Mt 12.1-8; Mr 2.23-28)

1 Luágu ában wéyu le eméraguagülei, eíbugeina líña Jesúsu labádinagua nádü jáma láni disípulugu, átüjeina jagiati disípulugu lin türígu, ába jéferajani láu jájabu, ába jeígini líla.

2 Ábati jariñagun jádaangiñe fariséogu joun.

—¿Cásan uágu jadüga wadágimanu le moún lumuti ladügün lídan wéyu le eméraguagülei?

3 Lariñaga Jesúsu joun.

—¿Malíjangidün luágu le ladügübei David luágu ában dan, dan le lálámachunbei jáu sun ja úarabaña lúma?

4 Ába lebélorun tídon lúban Búngiu, ába lanügün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádirigu rügüñanu lán yebe lúnbaña jeigin tídaangiñe fein tugúya, según lilúrudun Moisés, áni máma figou le ladügübei David ligíbugiñe Búngiu.

5 Ariñagati giñe joun.

—Gabáfutina, áu le Wügüri Garaúwarügüti, lun naríñagun cába lan gayára ladügüniwa wéyu le eméraaguagülei.

Wügüri le jiláalibei újabu

(Mt 12.9-14; Mr 3.1-6)

6 Lídaanya ában wéyu le eméraaguagülei, ába lebélorun Jesúsu tídon jalígílisin juríu, ába lagúmeserun arúfudaja. Níñein ában wügüri jiláali lújabu le louñwenren,

7 añájati arúfudajatiña lilúrudun Moisés jáma fariséogu aríaa jei Jesúsu ánjein lagáranijaba lubei lun lídan wéyu le eméraaguagülei, lun jadárirun lidúnrun.

8 Subúdi lumúti ca lan jarítagebei, ába laríñagun lun wügüri le jiláalibei újabu.

—Sarába, ráramabá wagíbugiñe.

Ába lásaarun, ába laráramun ñi.

9 Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügün lídan wéyu le eméraaguagülei, buídu ódi wuríbani, lasálbarun ibágari ódi lagídárún?

10 Ábati lariaguniña Jesúsu sun ja geyégubaña láu, ába laríñagun lun wügüri ligía.

—Tulébei bújabu.

Ába látuleruni, ába lareídagun.

11 Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmchun láu Jesúsu.

Lanúadajaniña Jesúsu dúusu apóstolugu

(Mt 10.1-4; Mr 3.13-19)

12 Lídon dan ligía, ába lídin Jesúsu luágun ában wübü ayúmuragua lun Búngiu.

13 Dan le larúgadunbei, ába lagúarun joun lání disípulugu, ába lanúadajan dúusu jádaangiñe, ja únbaña lagúara apóstolugu.

14 Niján jírubei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé,

15 Matéo lúma Tomás, Jacóbo, le liraü Alféo, Simón, le áfaaguti lun jawáanserun juríu,

16 Júdas, le lamúlen Jacóbo, lúma Júdas Isarióte, le alúgurubalin Jesúsu.

Larúfudajan Jesúsu joun sarágu güriá

(Mt 4.23-25)

17 Ába larárirun Jesúsu jáu lueígiñe wübü, ába leréderagun jáu lání disípulugu lídan ában fulásu le ñi lumuti sagádi wásati, ñíñanu giñe sarágu güriá ñúbintiña loubwagugiñe Judéa, Jerusalén, lúma lárurugugiñe Tíro lúma Sidón. Sun güriá ja, jayábiña lun jagáambuni lapúrichijan Jesúsu lúma lun lareídagugüdüni jasándi.

18 Já buri asúfurirubaña jáu espíritugu wuríbatiña, areídaguatiña giñe.

19 Álugatiña sun güriá jagúrurun luágu Jesúsu, ladüga areídaguagüda lumútiña súngebei láu lubáfu.

*Fuleíseiwatiña jáma fugiábugu**(Mt 5.1-12)*

²⁰ Ábati laríjin Jesúsu jawágun láni disípulugu, ába laríñagun joun.

—Fuleíseiwatún, jugúya le mégeibe, ladüga ménreengünbei jun lun jebélurun lidoun larúeijan Búngiu.

²¹ ‘Fuleíseiwatún, jugúya le áfaagubei ilámaü guetó, ladüga jaquímuladuba.

‘Fuleíseiwatún, jugúya le ayájubei guetó, jéjerajaba lárigiñe.

²² ‘Fuleíseiwatún dan le iyéreegu jumá joun gürigia nueígiñe, dan le jabúgagunün jawáriu, dan le janábagunün, dan le janügüni jiri quei ni cáta, quei cátei wuríbati, nueígiñe, áu le Wügüri Garaüwarügüti.

²³ Gúnda jumá sarágu, buin jumá láu ugúndani lídan wéyu ligía, ladüga jibíjuba ában oúnwenbun afáyeyruajaü siélu, ítara méme líña meja jadüga binádu jagúbürigu gürigia ja joun profétagu.

²⁴ ‘Fugiábugu jugúya, jugúya le risibe, ladüga íbja jumáli sun ugúndani le lúnbei jibíjini.

²⁵ ‘Fugiábugu jugúya, jugúya le químulubei, ladüga jalámachuba.

‘Fugiábugu jugúya le éjerajabei guetó, ladüga jayájuajaba láu íruni.

²⁶ ‘Fugiábugu jugúya dan le sun jamá gürigia adímureja buíti juágu, ítara líña meja jadímurejan binádu jagúbürigu buíti jawágu profétagu yéetiña.

*Jínsiñe jamá jáganiñu jun**(Mt 5.38-48, 7.12)*

²⁷ ‘Níjan nerérun jun, Jugúya le agáambubalina. Jínsiñe jamá jáganiñu jun, adüga jumá buíti joun ja iyéreejabúbaña jun,

²⁸ biní jumaña ja íñragutün, ayúmuragua jumá jawágu ja anábagutün.

²⁹ Ánjabu láfara ában gürigia luágu ában louba bigibu, rúbei giñe le ában louba lun, le anügütu babíte buei, rúboun giñe bisímisin lun.

³⁰ Furúmieguarügü le amúriajati búma, rúba lun, le anügüti bumégen, máluajabei lúma.

³¹ Le cátei le babúseerubei ladügün bun, ligíalá badüga joun ámu.

³² ‘Ánjein já rügüñanu lubei jínsiñejabúbaña jun jínsiñe jun, ¿ca buíti jadügübei láu líra? Ásta gafígountiña, ítara líña jadüga.

³³ O ánjaün lan adüga buíti jóunrügü ja adügübaña buíti jun, ¿ca buíti jadügübei láu líra? Ítara líña giñe jadügün gafígountiña.

³⁴ Ánjaün afúredeija jóunrügü ja úmagiñebaña jarítagua jibíjin som cátei, ¿ca buíti jadügübei láu líra? Afúredeijatiña giñe ja wuríbabaña joun wuríbatiña jáledi, agúrabañu jagía giñe jabíjin som cátei jámagiñe.

³⁵ Ánjein jugúya, lúnti jínsiñe jamá jáganiñu jun, adüga jugúyame buíti, afúredeija jugúyame, magúrabajaanga ni cáta lewéñegua. Ítara lúba weíri lan jafáyeyruaja lúmagiñe Búngiu le íñgubei, áni lirájüñübadün giñe le tímatimaati, ladüga ligía, fuleíseijabúti giñe joun ja meteíngiradibaña lúma joun ja wuríbabaña.

³⁶ Gudémejabu jumá, quei gudémejabu lan júguchi Búngiu.

*Madímureja jumá wuríba jawágu ámu**(Mt 7.1-5)*

³⁷ ‘Madímureja jumá wuríba jawágu ámu, ábame giñe maríñagun lan Búngiu luágu wuríba lan jigáburi. Míchiga jumá jadúnrun ámu, míchun lámuga giñe Búngiu jidúnrun. Ferúduna jumá, ferúduna lámugaün giñe Búngiu.

³⁸ Rújuma joun ámu, ru lámuga gíñe Búngiu jun. Líchuguba Búngiu sarágu jun, ladügüba jun queígubeirügü jadüga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba bíangubei lídoun ában meme júyu?

⁴⁰ Úati ni ában disípulu weíriguti luei lumáesturun, íbini ánjein lagúmucha latúriaJan, chülürügübei quei lumáesturun.

⁴¹ ¿Ída líña gayára bubálin liraüraü ífei le lídaanbei lágu bíbugaña aríja, áni masándi bumúti durúsu le lídaanbei bágu?

⁴² ¿Ída líña gayára lubei baríñagun lun bíbugaña. “Sagánei liraüraü ífei le bágurugubei”, áni masándi bumúti durúsu le bágurugubei? ¡Bíanguañein bigíbu! Sagábei durúsu le bágurugubei furúmiñe, gayára lámuga baríjini liraüraü ífei le lagurugubei bíbugaña buídu lun baságaruni.

Luágu lin tídibu wéwe tasúbudirúa

(Mt 7.17-20, 12.34-35)

⁴³ “Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin.

⁴⁴ Sun tídibu wéwe subúdiwati luágu lin, mátüjountu ígo lueígiñe jíyu, ni beíbei lueígiñe guribiyuwa.

⁴⁵ Gürígia le buídubei, cátei buíti laríñagubei ladüga cátei lan buíti tídaanbei lanígi, gürígia le wuríbati, cátei wuríbati laríñagubei ladüga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

Bián ébuu

(Mt 7.24-27)

⁴⁶ “¿Ca uágu jaríñaga luágu áu lan Jabúremebei áni madügün jumúti le nubeíbei?

⁴⁷ Naríñagaali jun ída líña lan le ñübinbei nun áni adügaleí le nubeíbei.

⁴⁸ Ítara líña quei ában wügüri le ábunagubei ában múna, achíajati julíli furúmiñe, ába lábununi wagábu labádinagua dúbü derébuguti. Dan le liñúrunbei dúná, ába liábin fulúdu láu érei tuágun múna tugúya, siñá lumutu ánjingicha ladüga luáguñoun lan ébuu derébuguti.

⁴⁹ Ánjeinti le agáambubalina áni madügün lumúti le nubeíbei, ítara líña quei ában wügüri le ábunagubei lúban ligíbuagu ságoun, mawágaburiga, dánti le liñúrunbei dúná, ába liábin fulúdu láu érei tuágun, ába teíguadun, ába tagünrinchagun le gumúti.

7

Lareídaguagüdüni Jesúsu lumúsun ában gumándan Rómána

(Mt 8.5-13)

¹ Dan le lásurunbei ladímurejan Jesúsu joun gürígia, ába lídin Capernaúm.

² Ñíñein ában gumándan Rómána ñi, láu ában lumúsun jínsiñeti lun sarágu, sándiñein músu ligía, yaráfa lun loúnwen.

³ Dan le lagaambunbei gumándan ligía luágu Jesúsu, ába loúnajan fiú jádaangiñe wügüríña weírigutiña lídan jafiñen juríu lun jayúmuragun lun Jesúsu lun lídin areídaguagüdei lumúsun.

⁴ Ába jóudin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le,

⁵ ladüga jínsiñetiwa wagía juríu lun, ligía guánarügü ábunaguagüdubarun walígílisin.

⁶ Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manügün ban bubéresegun ñüdüñ lúbiñe, luágu nege madúna lan lun bebélurun lúbiñoun,

⁷ ligía nege midín lubei lúngua álugabu. Rúrügübei dimúrei, ábame lareídagun lumúsun.

⁸ Ladüga ligía nege gíñe lábugiñeñein gumádi íñutimaati, áni añájein gíñe súdaara lábugiñe lagúmadijan. Dan lé nege laríñagun lun ában jádaangiñe lun lídin, ñüdüñti, dan le laríñagun lun le ában lun liábin, ñüñbinti, áni dan le loúnajani lumúsun adüga som cátei, adüga lumúti. Ítara lúba nege, luágu berérun mósu lídin sándi luei lumúsun.

⁹ Dan le lagáambunbalin Jesúsu cátei le, weíríti lanígi láu wügüri ligía, ába laríjin jawágun gürígia ja afálarubalin, aba laríñagun joun.

—Nínárün jáu, ni íbini jádan Israelítagu madárigidina affíñeni weíríti quei laffíñen wügüri le.

¹⁰ Dánti le jachülürünbei wügüriña ja ñüdüñbaña álugeti Jesúsu járigoún lúbiñoun gumándan, areídaguuali lumúsun.

Láguyuguágüdüni Jesúsu tiraü ában jiláali túmari

¹¹ Lárigiñe cátei le, lídiña Jesúsu lídoun ában ubúru gu gíríti Naín, úareina jáña lání dísiplugu lúma, jáma sarágu gürígia.

¹² Dan le lachülürünbei yaráfa lun lubéneri ubúru gu ligía, ába laríjin jóúdin ábunaja ában jiláali le ligíarügüti tiraü lúguchu to jiláali túmari. Sarágu jáña lílana fulásu ñüdüñ ábunaja túma.

¹³ Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

¹⁴ Ába layárafadun, ába lagúrurunun gánjoun, ába jaráramagun ja anügübaña. Ába laríñagun lun jiláali.

—Írájü, ñnaríñaguña bun lun básaarun!

¹⁵ Ábati lásaarun lé buga jiláalibeí, ába lagúmeserun adímureja. Ába ledéregeruni Jesúsu tun lúguchu.

¹⁶ Dan le jaríjinbalin gürígia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chülúgua ában proféta weíríguti wádoun.

Aríñagatiña gíñe.

—Ñüñbinja Búngiu íderaguawa, wagía le lumútuniña.

¹⁷ Ába lagaambúniwa cátei le ladügübei Jesúsu lídan sun Judéa lúma geyégu lúu.

Louñagülegu Juan le abásteragüdjabei

(Mt 11.2-19)

¹⁸ Agáambati Juan luágu sun cátei le, abájüdagua jamúti lánigu lun. Ábati lagúarun joun bíama jádaangiñe,

¹⁹ ába loúnajaniña álügüdei Wabúreme Jesúsu ánjein ligía lubei Crístubei le lúnbei liábin, o ánjein jagúrabajaba lubei ámu.

20 Dan le jachülürünbei le ñí lubei Jesúsu, ába jayárafadun, ába jaríñagun lun.
—Loúnajañadiwa Juan le abásteragüdajabei álügüdabu ánjein amürü lubei Crístubei le lúnbei liábin, o ánjein lun lubei wagúraban ámu.

21 Lídán méme óra ligía, areídaguagüdati Jesúsu sarágu gürígia lídaangiñe jasándi lúma jasúfurirun, lúma jádaangiñe espíritu wuriñbatiña, aríjagüda ligía giñe sarágu maríjintiña.

22 Ába lubeiti lariñagun joun.

—Jeiba, jariñageime le jaríjubei lúma le jagáambubei lun Juan. Jabájüdaguáme lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguyugun jiláaña, lúma luágu líchugún ugánu luáguti asálbaruni joun gudémetiña.

23 Gúndaati giñe gürígia le meferidirun lumúti lafiñen nuágu.

24 Lárigiñe jóudin já buga loúnajabaña Juan, ába lagúmeserun Jesúsu adímureja luágu Juan joun gürígia, lariñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali?

25 Ánjein máma lubei ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu.

26 Lídán linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügü láu proféta.

27 Juan, ligía óunagülei le uágubei taríñaga Lerérun Búngiu.
Nounajañein nounagüle bubáragiñe
lun laráansejani úma bubá.

28 Quei nariñaguni jun, jádan sun gürígia, úgali proféta weíriguti luei Juan, áni láu sun líra, weíriguti le únabutimaabei lídan larúeijan Búngiu sügü láu le anúgarügübalin ugánu luágu arúejani ligía.

29 Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jariñagun luágu richá lan Búngiu láu lariñagun liyúmulugugiñe Juan luágu lúnti lan jasáansiraguni jagáburi. Gürígia jagía, resibi jamáli meja labásteragüdjagan Juan,

30 ánjañati jíbe-ágei fariséogu jáma arúfudajatiña lilúrudun Moisés, májatiña meja lun jadügüni le lubeíbei Juan, merésibirun jamúti lé yebe labúseerubei Búngiu ladügün luágu jafúleisein.

31 Ába lariñagun Jesúsu.

—¿Ída liñásan jagáburi gürígia lánina dan le? ¿Cásan lenégebei?

32 Ítara jáña quei irájüñü ja añúurubaña mágidirugu ájurera, ába jagúaragun joun jibegu. “Íñaajatiwa fidu jun, mabíñajantün, erémujatiwa urému jírti jun, mayájuntün.”

33 Ladüga nübinti Juan le abásteragüdajabei, lé meja meíginbei fein, mátun ligía diweín, aríñagatün luágu gawágu lan espíritu wuriñbati.

34 Lárigiñe, ába niábin, áu le Wügüri Garaüwarügüti, jóutina áni gurá áu. Jaríñaga luágu geígadina, gátadi, jamáda áu nege gafígountiña jáma agúburajatiña liseínsuna gumádi.

35 Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

Jesúsu lúbiñe Simón le fariséo

36 Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan.

37 Níñounti ában würi wuríbati témeri lídan ubúru gu ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti.

38 Ába taráramun lanágangiñe Jesúsu, lubádu lugúdi, ába tadúdūr agúdüni lugúdi láu táguira. Nuján ayájuaja, nuján arágajei láu tí diburi, nuján achújei lugúdi, ába téseruni ibíñei luágun.

39 Dan le laríjinalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügüri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.”

40 Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabeí nun, maésturu.

41 Laríñaga Jesúsu lun.

—Níñanu bián wügüriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san.

42 Queiti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

43 Laríñaga Simón lun.

—Lídan narít agun, le gíbetimaabei adúweijan.

Laríñaga Jesúsu lun.

—Richátibu.

44 Ába laríjin Jesúsu tuágun würi tugúya, ába laríñagun lun Simón.

—¿Aríagu bíña tun würi to? Belútina búbiñoun, míchutibu dúna nun lun nachíbuni nugúdi, ánjounti würi to, ágawagúda tumúdi nugúdi láu táguira, ába tamábeidagúdüni láu tí diburi.

45 Machú bumútina, ánjoun tugúya, lúmagiñe nebé lurun, merédegili tachújani nugúdi.

46 Míchutibu aílí nábulugu, ánjoun tugúya, túguatu ibíñei jémeti luágu nugúdi.

47 Ligía naríñagunbei bun luágu arúfuda láani luweírín tínsiñejabu luágu ferú dunawa lan libe tífgoun, ánjeinti gürígia le míbeti ferú dunawa lan, míbeti ínsiñei larúfudun.

48 Ábati laríñagun Jesúsu tun würi tugúya.

—Ferú dunawaali bífgoun.

49 Ábati jagúmeserun amísurajóutiña ja ñúnbaña lúma ñi aríñaga jámagua.

—¿Cáteis an wügüri le, ferúduna lubei gíñe figou?

50 Ába laríñagun Jesúsu tun würi tugúya.

—Sálbawádibu lídaangiñe bífgoun ladüga bafíñerun nuágu, beíba darángilañu.

8

Würiña já buri meja íderaguti Jesúsu

1 Lárigiñe cátei le, ñúdünti Jesúsu lídoun sarágu ubúru gu lúma buri lirájüñü fulásu íchigei ugánu buíti luágu larúeijan Búngiu.

² Ñūdūtiña dúusu apóstolugu lúma jáma wūrífña ja laleidaguagüdūbaña jádaangiñe espíritu wūrífatiña lúma sándi. Ñiñoun María to giriboun Magdaléna jádan, to idaangiñeboun jáfurida sédū espíritu wūrífatiña,

³ ñiñoun giñe Juána, to lúmari Chúza, le oúnigirubarun lúban Heródes, ñiñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti
(Mt 13.1-9; Mr 4.1-9)

⁴ Sarágu jáña gürígia ñūbinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Lariñaga joun.

⁵ —Furíti ában ábunaguti ábunagua líla nádū, dan le afúrujeina láani, ába láburuhan lídaangiñe luágun ūma, ába jadūgūraguni ásūgūrūtiña, ába jeígini dunúru.

⁶ Líbiri, ába láburuhan labádinaguóun dūbū, dánti le labóuchun, ába lásaurūn ladūga lumábei fulásu.

⁷ Ába láburuhan líbiri labádinaguóun jíyu, ába láfaruni jíyu le ájūchūbei úara lúma.

⁸ Ñiñein giñe lídaangiñe, áburujati lídoun múa buíti, dan le laweinamudun, gin ligía, buíti lalúbajoún, cáda ílaū rúti san águu.

Lárigiñe lariñaguni Jesúsu cátei le, ába lariñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu
(Mt 13.10-17; Mr 4.10-12)

⁹ Ábati jálūgūdūni láni disípulugu ca lan lílabei jémpulu le.

¹⁰ Lariñaga joun.

—Jugúya, subúdigūda láali Búngiu cátei arámudaguati le luágutibe larúeijan jun, ánjaña ja mebéresenbaña láu lerérun, láu jémpulu lariñawagūa cátei luáguti larúeijan joun lun ibídiñebei lan líla cátei le jaríjibe joun, lun giñe úa lan gunfaráanda jamáni cátei le jagáambubei.

Lafúnraanguagūdūni Jesúsu jémpulu luáguti ábunaguti
(Mt 13.18-23; Mr 4.13-20)

¹¹ Ába lariñagun Jesúsu joun.

—Niján líla jémpulu ligía. Líla nádū, ligía lerérun Búngiu,

¹² ūma le ñijin lubei láburuja lídaangiñe líla nádū, jagía gürígia ja agáambubalin lerérun Búngiu, ába líábin Máfia, ába lagídaruni tídaangiñe janígi lun maffínerun jamá, masábarun jagíame.

¹³ Dūbū le ñijin lubei láburuja líbiri líla nádū, jagía gürígia ja agáambubalin lerérun Búngiu, ába jerésibiruni láu ugúndani, áni márūgūdūnti jádan buídu, affíñetiña luágu murúsun dan, áni dan le jóuchawagún, mawándun jamúti, ába jefédiruni jafíñen luágu Búngiu.

¹⁴ Jíyu le ñijin lubei láburuja líbiri líla nádū, jagía gürígia ja agáambubalin lerérun Búngiu, ába jasígiruni binádu jagáburi, ába jasígirun aritagua luágu írisini lúma ugúndani le lánina uboú le, úati fulásu jarítarugun lun lerérun Búngiu, siñátiti laságarún cátei buíti jádaangiñe.

¹⁵ Ánjeinti múa buíti le ñijin lubei láburuja líbiri líla nádū, jagía gürígia ja agáambubalin lerérun Búngiu táu anígi buítu, adūga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

Jémpulu luáguti lámpu
(Mr 4.21-25)

¹⁶ Ába laríñagun Jesúsu.

—Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdün múnada, lun gayára lan jaríjin ja ebélurubaña jabárua.

¹⁷ Úati lubeiti ni cáta arámudaguati lun mafúnraangudun lan, úa ni cáta le ibídiñewati lun machülürün lan dan lun lasúbudirúniwa lúma lun lafúnraangudun.

¹⁸ ‘Gagáambadi jumá lubeiti buídu lun lerérun Búngiu, le gámati lerérun Búngiu tidan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tidan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu
(Mt 12.46-50; Mr 3.31-35)

¹⁹ Ábati tachülürün lúguchu Jesúsu jáma lamúlenu le ñíjin lubei Jesúsu, siñáti jayárafadun lun ladúga jíbe gürígia.

²⁰ Ába laríñawagún lun.

—Nujántia búguchu jáma bamúlenu boúgudi áni buséñtiña jaríjinibu.

²¹ Ába laríñagun joun.

—Ja agáambubalin lerérun Búngiu, úara jagía lúma, jagía nóguchubaña jáma namúlenu.

Lagálumaduni Jesúsu lérouga
(Mt 8.23-27; Mr 4.35-41)

²² Luágu ában wéyu, ába ládinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóúdin.

²³ Dan le añája lan áñjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun.

²⁴ Ábati jóúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei.

²⁵ Ábati laríñagun joun disípulugu.

—¿Ca susébebe lun jaffíñen?

Ába jálügüdagun jámagua láu anúfudei lúma luweírín anígi, jaríñaga.

—¿Cátei funásan wügüri le, gumádi lubáli garábali lúma lugúdi barána áni agáamba jamei?

Wügüri Gadárana le gawágubei espíritugu wuríbatíña
(Mt 8.28-34; Mr 5.1-20)

²⁶ Ába jachülürün louíbawagun Gadára, le loubáfurugubei lagúnu, ligíbugiñe Galiléa.

²⁷ Dan le larárirunbei Jesúsu, ába liábin ában wügüri lílana fulásu ligía lubádun. Lújali wügüri ligía gawágu espíritugu wuribatiña. Madáüti anáanguni, maganoun ligía tidan múná, lídan buri jabára jiláaña le achigiti luágu dúbü lagánawa.

²⁸ Dan le larijnbalin wügüri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraü Búngiu le Íñugutimaabei? Ayúmuraguatina bun lun masúfuriragüdün bánina.

²⁹ Lariñagunbei itara ladüga lagúmadiruñein lan Jesúsu espíritu ligía lun láfuridun lídaangiñe. Saráguja weíyaasu lárügüdüni espíritu wuribati ligía, ábaja jagüraguni güriá lújabu lúma lugúdi láu güriñgüri lun ledéraguagüdün, ábaja látumuraguni, ába lanúrágüdüni espíritu lídoun fulásu le mageírawati.

³⁰ Ába lariñagun Jesúsu lun.

—¿Ca bíri?

Ába lariñagun.

—Lejión níribei.

Lariñagunbei luágu ligía lan líribei ladüga gíbeeña espíritugu wuribatiña ja ebélorubaña lídoun.

³¹ Ába jamúriajan espíritugu jagía lúma Jesúsu lun moúnajan láníña máfiougatin.

³² Queíti níñanu jamá sarágu búiruju eíga luágu ában wübü yaráfa, ába jayúmuragun espíritugu jagía lun lun loúnajaniña jádoun búiruju jagía, ába lánjarun Jesúsu.

³³ Ábati jáfuridun espíritugu wuribatiña jagía luei wügüri ligía, ába jebélurun jádoun búiruju, ábati jáguragun búiruju jagía jóungua lueígiñe ában gudúungu, ába jáburujan lídoun lagúnu, ába jañáradagun.

³⁴ Dan le jarijnbalin ja oúnigirubaliña búiruju cátei le asúseredubei, ába janúfudedagun, ába jeíbaagun abájüdaguei ubúrugú lúma áraabu.

³⁵ Ábati jóúdingua güriá aríjei cátei le asúseredubei. Dan le jachúlürünbei le ní lubei Jesúsu, ába jádáriruni wügüri le ídaangiñebei jáfurida espíritugu wuribatiña ñun lubádu lugúdi Jesúsu, táu lanáangun, areídaguaali, ába janúfudedagun.

³⁶ Játi buga aríjubalin, ába jabájüdaguni luáguti lareídagun wügüri lé buga gawágubei espíritugu wuribatiña joun,

³⁷ ába jayúmuragun lílana fulásu ligía lun Jesúsu lun lídin nígiñe, ladüga janúfude. Ábati ládinin Jesúsu tidoun ugúnein lun lídin,

³⁸ ába layúmuragun wügüri le ídaangiñebei jáfurida espíritugu lun lun lídin lúma, ába lariñagun Jesúsu lun lun leréderun, lariñaga lun.

³⁹ —Giríbubá búbiñoun, ábame babájüdaguni sun le ladügübei Búngiu bun.

Ába lídin, ába labájüdaguni le ladügübei Jesúsu lun lídan sun fulásu ligía.

Liraü Jáiro túma würi to agúrurubarun lanáangun Jesúsu

(Mt 9.18-26; Mr 5.21-43)

⁴⁰ Dan le lagíribudunbei Jesúsu loubáfurugun lagúnu, ába jerésibiruni güriá lúu ugúndani ladüga sun jagía agúrabañu jáñein.

⁴¹ Ábati liábin ában wügüri gíriti Jáiro, le ábanbei jádaangiñe tábutigu jalígílisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe,

42 ladüga ában rügüñoun liraü, quei buri dúusu irúmu táu, touwe. Dan le lídinbei Jesúsu, ába jafálaruni sarágu gürígia darí lun jámurudaguni.

43 Níñounti ában würi jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda.

44 Ába tayárafadun lun Jesúsu lanágangiñe, ába tagúruruni táru lanáangun, lídan méme óra ligía ába tareídagun.

45 Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe gürígia, ¿álügüdajagidibu ca lan agúrurubei buágu?

46 Ába laríñagun Jesúsu.

—Gurúwaali nuágu, ladüga sandí numuti luágu areídaguagüdaadina lan gürígia láu nubáfu.

47 Dan le tasúbudiruni würi tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfeserun lun jagíbugiñe sun gürígia ca lan lébubei tagúrurun luágu áni ába lan tareídagun lídan méme óra ligía.

48 Ábati laríñagun Jesúsu tun.

—Niraü, areídaguadibu ladüga bafíñerun nuágu. Beíba darángilañu.

49 Nígili Jesúsu adímureja, ligía lachülürün ában lúbiñegiñe Jáiro, ába laríñagun lun Jáiro.

—Jilá biraü, mebérésejadügüyabá lun Maésturu.

50 Dan le lagáambunbalin Jesúsu le, ába laríñagun lun.

—Manúfudedabá, afíñerügüba, ábame tareídagun biraü.

51 Dan le lachülürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagübürigu irájü tugúya.

52 Jayájuña sun ja ñibaña tárigi, ába laríñagun Jesúsu joun.

—Mayájua jumá, mouñwentu, tarúmugarügüña.

53 Ába jéjerajan láu ladüga subúdi jamáni luágu jilá tan.

54 Ábati lárügüdüni Jesúsu tújabu, ába laríñagun láu umálali jéreti.

—Irájü, sarába.

55 Ába táguyugun, ába tásaarun lídan méme óra ligía, ába laríñagun Jesúsu lun jíchugun eíginí tun.

56 Weiriti janígi tagübürigu, ába laríñagun Jesúsu joun lun mabájüdagun jamáni le asúseredubei ní ca un.

9

Loúnajaniña Jesúsu dúusu apóstolugu apúrichija (Mt 10.5-15; Mr 6.7-13)

1 Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatíña lúma lun jareídaguagüdün sánditiña.

2 Ába loúnajaniña apúrichijeí ugánu luáguti larúeijan Búngiu lúma areídaguagüdaña sánditiña.

3 Laríñaga joun.

—Manüga jumá ni cáta júmagua luágu juweíyasun—ni bádun, ni ságü, ni fein, ni seínsu. Ábanrügütá símisi janügün.

⁴ Furúmieguarügü múna to ñíjin lumúti jachülüra, reídei jumá ñi darí jídin lídaangiñe fulásu ligía.

⁵ Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun jóungua.

⁶ Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ñí lumuti jóúdin.

*Loúnwen Juan le abásteragüdjabei
(Mt 14.1-12; Mr 6.14-29)*

⁷ Ába lagáambun gumádimati Heródes luágu sun cátei le ladügübei Jesúsu, ibídiñetiti lun cába lan larítagua, ladüga ñíñanu aríñagutiña luágu saráali lan Juan lídaangiñe óuweni,

⁸ jíbiri aríñaga luágu proféta Elías lan achülaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe óuweni.

⁹ Ába laríñagun Heródes.

—Áu guánarügü óúnajabei adürürei lichügü Juan. ¿Cátei funáti le, le uágubei nagáamba labájüdawagún sarágu cátei?

Ábati loúchun Heródes laríjini Jesúsu.

*Leítagüdüñ Jesúsu seíngü mílu wügüriña
(Mt 14.13-21; Mr 6.30-44; Jn 6.1-14)*

¹⁰ Dan le jagíribudun apóstolugu, ába jabájüdagun lun Jesúsu luágu sun le jadügübei. Ábati lanügüniña lídoun fulásu mageírawati yaráfa lun Betsáida.

¹¹ Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Óúnaja báña gürígia ja, ñüdüñ jamámuga áluja jabára lun jeméraagun, áluaja jagíame eígini lídan buri lirájüñü aüdü lúma lídan buri fulásu yaráfati, ladüga úati ni cáta ya.

¹³ Laríñaga Jesúsu joun.

—Rújuma eígini joun.

Jaríñaga lun.

—Seíngü rügüñoun fein wáma jáma bián úduraü, ánjawa gubeírügü ñüdüñ agáñija eígini joun sun gürígia ja.

¹⁴ Yaráfañanu jóun seíngü mílu wügüriña ñi, mabájüdünga würiña jáma irájüñü. Ába laríñagun Jesúsu joun láni disípulugu.

—Ñurügüda jumáña dimí dimí-san.

¹⁵ Ába jadügüni ítara, ába jañúurun súngubei.

¹⁶ Ábati lanügünun Jesúsu seíngü fein lújaburugu jáma bián úduraü, ába laríjin siélun, ába líchuguni eteíngiruni lun Búngiu. Lárigiñe lagübachagunun fein lúma úwi, ába líchuguni joun láni disípulugu lun jafánreinjani jádan gürígia.

¹⁷ Jóutiña súngubei quimúle, dan le jabúdajanun ígiragutu, buíngüdatiña dúusu faníñe láu.

*Laríñaguni Pédro luágu Jesúsu lan Crístubei**(Mt 16.13-19; Mr 8.27-29)*

¹⁸ Luágu ában wéyu dan le layúmraguñia lan Jesúsu lábugua, ñíñanu láni disípulugu díseraü luei, ába laríñagun joun.

—¿Ída liñásan jarítangun güriña nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüdejabei amürü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe ouweni amürü.

²⁰ Ábati laríñagun joun.

—Ángi jugúya, ¿cátanagi lídan jarítangun?

Laríñaga Pédro lun.

—Crístu, le loúnajabei Búngiu lun lasálbaruniña güriña, amürü.

*Ladímurejan Jesúsu luágu louñwen**(Mt 16.20-28; Mr 8.30-9.1)*

²¹ Ába laríñagun Jesúsu joun láu éregu lun maríñagun jamáni cátei le ni ca un.

²² Ába laríñagun joun.

—Nasúfuriruba sarágu, áu le Wügüri Garaüwarügüti. Janügübadina wügüriña weirigutiña lídan jafíñen juríu, jábutigu fádirigu, jáma arúfudajatiña lílurudun Moisés, quei ni cáta. Nafarúaba jilágubei, ábame násaaran lídaangiñe ouweni luágu lürüwan wéyu lúnya nabágaridun.

²³ Lárigiñe, ába laríñagun joun súngebui.

—Le busénti nánigu lan, buléilei cáteiñein lan, awándalei sun luwúyeri asúfuriruni le lúnbei liábin lun, nueigiñe, queisi lanügüni ában wügüri lugúruwan, falálana.

²⁴ Ladüga le abúseeruti leséfuragun lúngua ya ubouágu leféridirubei ibágari le magúmuchaditi, ánjein le ánjabei leféridiruni libágari ya ubouágu nueigiñe, libíjubei ibágari le magúmuchaditi siélu.

²⁵ ¿Cági ju lan lun güriña lagáñeiruni sun le lánina ubou, leféridireime lubára siélu o lagünrinchaguba lan lúngua?

²⁶ Le anügüti busíganu nuágu lúma luágu nerérun, áu le Wügüri Garaüwarügüti, nibúsigaribadina gíñe láu dánme le niábin quei urúei láu luweirigun Nüguchi jáma ánjeligu ja sándubaña.

²⁷ Ninárün naríñaguni jun luágu añájein lan jádaangiñe ja yábaña guetó, mouñwenbaña maríjinga jamei larúeijan Búngiu.

*Lámuñedagun laríñ Jesúsu**(Mt 17.1-8; Mr 9.2-8)*

²⁸ Queíburi wídü wéyu lárigiñe laríñaguni Jesúsu cátei le, ába laweínrun luágun ában wübü ayúmragua lun Búngiu, barü lumútiña Pédro, Jacóbo, lúma Juan lúmagua.

²⁹ Dan le niján lan Jesúsu ayúmragua, ába lámuñedagun ligíbu, ába tájarudun lanáangun, ába támiridun.

³⁰ Ábati jasálriragun Moisés lúma Elías ayánuja lúma,

³¹ geyégu líña ában larúgounga weíruti jáu, jayánujaña libügürü ouweni le lúnbei lasúfuriruni Jesúsu, Jerusalén.

³² Láu sun luweírín lidábu lágu Pédro jáma líbirigu, marúmuguntiña, aríja jamúti luweirigun Jesúsu jáma bián wügüriña ja lúmabaña.

33 Dan le adísedeinaña bián wügüríña jagía lueí Jesúsu, ába laríñagun Pédro lun.

—Maésturu, ¡lídan dan awánja lan ya! Adüga wamá ürüwa dibásein ya—ában bun, ában lun Moisés, túma ában lun Elías.

Ibídiñeti lun Pédro ca lan laríñagubei.

34 Súnti niján lan adímureja, ába liábin ában juánriñu oúburaguaña, ába janúfudedagun ladüga jadáriragun jóungua lurágeirugu juánriñu ligía.

35 Ábati jagáambun ában umálali aríñaguti lídaangiñe juánriñu ligía.

—Niraü le jínsiñebei nun le, agáamba jumeí le lubeíbei.

36 Lárigiñe ladímurejan umálali ligía, ába jarijin disípulugu luágu lágubua rügáli lan Jesúsu. Reideitiña maníñu, maríñagun jamúti cátei le jaríjubei lun ni ában lídan dan ligía.

Lareídaguagüdün Jesúsu ában irájü gawáquti espíritu wuríbati

(Mt 17.14-21; Mr 9.14-29)

37 Larúgan, dan le jarárirunbei lueígiñe wübü, sarágu jáña gürígia ñüdüntiña lubároun Jesúsu.

38 Ábati lagúaragun ában wügürí jádaangiñe láu umálali jéreti, laríñaga.

—Maésturu, fuleísejábubá nun, aríjabei niraü le ligía rügüñeíbei,

39 níjein ában espíritu wuríbati luágu, dan le lárügüdüni, ába lagúaraguagüdüni, ába louwejan, ába láfurijan jacútaü liyúmulugugiñe. Añáwurija lumúti, májati lígiruni.

40 Ayúmuraguaadina joun báni disípulugu lun jaságaruni espíritu wuríbati le lueí, siñá jamuti.

41 Ába louñabun Jesúsu, laríñaga.

—¡Jugúya gürígia mafiñeradiitiña, wuríbatiña! ¿Átiribeísan dan lun neréderuni júma lubá gayára lan jafiñerun nuágu? ¿Ídame lagúmucha mafiñeni le jídaanbei? Barübei biraü ñájoun.

42 Dán yebe le lídin irájü ligía lun, ába lájuchuruni espíritu wuríbati múarugún, ába louwejagüdüni, ába ladeínjan Jesúsu lun espíritu wuríbati ligía, ába lareídaguagüdüni irájü, ába ledéregeruni lun lúguchi.

43 Ába laweíridun janígi súngubei láu luweírigin Búngiu.

Ladímurejaanya Jesúsu luágu louñwen

(Mt 17.22-23; Mr 9.30-32)

Sun añája lan láu luweírigin janígi láu le ladügübei Jesúsu, ába laríñagun joun láni disípulugu.

44 —Agáamba jumeí cátei le buídu. nedéregerúaba, áu le Wügürí Garaüwarügüti, jájaburugun náganiñu.

45 Úati gunfaráanda jamáni disípulugu le laríñagubei, ladüga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le laríñagubei, joun.

¿Ca weírgutimaabei?

(Mt 18.1-5; Mr 9.33-37)

46 Ábati jagúmeserun disípulugu asígeneja jámagua luágu ca lan weírgutimaabei jádan,

47 quei lasúbudiruni Jesúsu jasáminan, ába lanügün ában irájü lubáduagun,

48 ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti únabugutimaabei jídan, ligía weírigutimaabei.

*Le mámabei wágani, wámagiñeñein
(Mr 9.38-40)*

⁴⁹ Ábati lariñagun Juan lun Jesúsu.

—Maésturu, arijatiwa ában wügüri aságajati espíritugu wuríbatíña lídan bíri, ába wewéridiruni ladüga máma lan ában wádaangiñe.

⁵⁰ Lariñaga Jesúsu lun.

—Mewéridira jumeí, ladüga le mámabei wágani, wámagiñeñein.

Ladeínjan Jesúsu lun Jacóbo lúma Juan

⁵¹ Dan le layárafadun dan lun lanügüniwa Jesúsu siélun, ába ladügüni luweíyasun Jerusaléoun láu anígi.

⁵² Ába loúnajan loúnagülegu lubá, ába jóudin lídoun ában liraúraü fulásu láni Samária lun jáluajan muna lubá,

⁵³ májatiña Samariána jerésibiruni ladüga jaríjin luágu leíbuga lan Jerusaléoun.

⁵⁴ Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siélugiñe lun lagúmuchun jáu queí meja ladügüni proféta Elías?

⁵⁵ Ábati ladígiragun Jesúsu jawágun, ába ladeínjan joun, lariñaga.

—Íbidiñeti jun luágu wuríba lan cátei le jayúmajabei.

⁵⁶ Máma niábiña, áu le Wügüri Garaúwarügüti, agünrinchaguei jabágari gürígia, niábiña asálbarei.

Ábati jóudin lídoun ámu liraúraü fulásu.

*Já yebe busénbaña jafálaruni Jesúsu
(Mt 8.19-22)*

⁵⁷ Dan le luágu jamá üma, ába lariñagun ában wügüri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Lariñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügüri Garaúwarügüti, úati ní jalíaba lan nabálachagüdei nichügü.

⁵⁹ Lariñagaya Jesúsu lun ában.

—Falábana.

Lariñaga lun.

—Nabúreme, lárígiñeme loúnwen nóguchi, buná neíme, ábame neíbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi, ánjein bugúya, beíba apúrichíjei ugánu luáguti larúeijan Búngiu.

⁶¹ Ábayati lariñagun ában lun.

—Nabúreme, buséntina nafálarunibu, neíba yebe ayoúragua joun ja wábiñebaña.

⁶² Lariñaga Jesúsu lun.

—Le íchuguti lújabu luágu awoújagülei, lárígiñe ába laríjin lárigoún, mabuídunti lun lílaname larúeijan Búngiu.

10

Loúnajaniña Jesúsu ürüwa-wein-díisi disípulugu apúrichija

¹ Lárigiñe cáite le, ába lanúadajan Jesúsu ürüwa-wein-díisi jádaangiñe lánigu, ába loúnajaniña lubá, bián bián, lídoun sun ageíraü lúma fulásu le lúnbei lídin ñi.

² Lariñaga joun.

—Inárüni, gíbetiña gürígia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni loúguatiña ñadágimeintiña. Ligía lúnti lubei jamúriajan lúma Búngiu lun loúnajan ñadágimeintiña jagánaguóun.

³ Jeíba, nouñajañadün quei mudún jádoun anímaalu gáñitiña.

⁴ Manüga jumá ságü júmagua, ni seínsu, ni geídi, meréderagun jugúyame ayánuja ni ca úma luágu úma.

⁵ Dánme le jebélurun tídoun ában múna, busújuma furúmiñe, jaríñagame. “Darángiläü joun tilana múna to.”

⁶ Ánjein añájein lubei gürígia jínsiñejabutiña lun darángiläü tídan múna tugúya, jerésibirubadün láu ugúndani, jóunbei abúsuruni lánina darángiläü. Ánjein úa jabei gürígia jínsiñejabutiña lun darángiläü tídan múna tugúya, giríbugüda jumei abúsuruni.

⁷ Reídei jumá tídan múna tugúya to ñi lubei jerésibirúa, jou jumeíme, gurá le íchugúti jun úouga busíganu, ladüga garíchatí ñadágimeinti lun lafáyeirua. Masánsija jumá múna.

⁸ Dánme le jachülürün lídoun ában ageíraü le ñi lumuti jerésibirúa, jóújumei le íchugúti jun,

⁹ areídaguagüda jumáña sánditiña ja ñítiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.”

¹⁰ Ánjaün achülüra lídoun ában ageíraü le ñi lumuti merésibirúniwa jumá, furíjuma lídoun buri úma, jaríñagame.

¹¹ “Ásta licáliquin jageíra le luágubei wagúdi furú wamuti lun warúfuduni jun luágu magúndan wamá láu jigáburí, áni subúdi jumei luágu subúdigüdáwaali lan luáguti larúeijan Búngiu jun.”

¹² Naríñajare jun luágu lídan lánme luwéyuri lagúseragüdüniña Búngiu gafígountiña, janárimetimaabei jabeichúniwa lílana fulásu le merésibirunbadün sügü láu jabeichún lílana ubúругu le Sodóma.

*Lílana ageíraü buri magáambaditiña
(Mt 11.20-24)*

¹³ ¡Fugiábu jugúya lílana Corazín! ¡Fugiábu jugúya lílana Betsáida! Ladüga lun jamúga ubúругu lan Tíro o Sidón ladügüwa buri miláguru le adügübei lídan jubúrugute, binárü jamúga lasáansiragua jagáburí lílana, ába jamúga jarúfuduni láu jadáuragun lúdu lúma balígi.

¹⁴ Ánjein jugúya, lídaanme luwéyuri agúseruni, weírítimaabei jabeichúniwa sügü jáu gürígia Tírona jáma Sidónna.

¹⁵ Amürüti, ubúругu le Capernaúm, ¿jarítaguatibu luágu liñurúaba lan bíri queísi líñun siélu? Larárirawagüdüwaba bíri únabun queísi lúnabun máfiougati.

¹⁶ Ába lariñagun Jesúsu joun ürüwa-wein-díisi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati giñe lagáambunina, áni le májati lagáambunina, májati giñe lagáambuni Núguchi le oúnajabalina.

Jagíribudun ürüwa-wein-díisi disípulugu

¹⁷ Ába jagíribudun ürüwa-wein-díisi disípulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatíña agáamba jamútiwa dan le waságaruniña lídan bíri.

¹⁸ Laríñaga Jesúsu joun.

—Ánja, aríja numúti ligáburu leíguadun Máfia siéluigiñe quei ában labírjanouga.

¹⁹ Rújadina ubáfu jun lun jadügüragun jéwe jáma águru, masúfurirunga ni cáta, lúma lun jéne lan jubáfu luei lubáfu Máfia.

²⁰ Láu sun líra, magúndaara jumá luágu jagáambunün espíritugu, gúnda jumá luágu níjein lan jiri bürüwañu tídan lilíburun Búngiu siélu.

Lagúndaarun Jesúsu

(Mí 11.25-27, 13.16-17)

²¹ Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Núguchi, le Labúremebei siélu lúma múa, inúrágüda numúti bíri, ladüga arámuda báali cátei luáguti barúeijan jaweí chútiña áu jáma furéndeitiña, ába bafúraanguagüdüni joun ja louguabaña ufúrendeí queísi irájüñü. Ánja, Núguchi, ladüga ítara líña babúseeruni.

²² ‘Derége láali Núguchi sun cátei nun. Úati ni ában subúdíjabuti cáтана lan lueídügüya Núguchi, úati giñe ni ában subúdíjabuti cáteíñein lan Núguchi nueídügüya jáma ja úntiña nabúseera nasúbudiragüdüni.

²³ Ábati ladígiragun adímureja jóunrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya,

²⁴ ladüga nariñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

²⁵ Lídan ában guríriguaü, níñein ában arúfudajati lilúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadüga lun gayára lan nibíjini ibágari magúmuchaditi?

²⁶ Laríñaga Jesúsu lun.

—¿Cáteigi bürüwañubei lídan lilúrudun Moisés? ¿Ída liñágia balíjan ñi?

²⁷ Ába louñabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

²⁸ Ábati laríñagun Jesúsu lun.

—Oúnabaadibu buídu, ánjein badüga ítara, bíbíjubei ibágari magúmuchaditi.

²⁹ Queíti busén lan arúfudajati ligía larúfuduni luágu buídu lan lálügüdján, ába laríñagun lun Jesúsu.

—¿Cátañagi níbirigubaña?

³⁰ Ábati louñabuni Jesúsu, laríñaga lun.

—Ñiñein ában wügüri arágachuti Jerusaléngiñe lun ubúrugin Jericó, luágu luweíyasun ába járügüdüni jíwerutiña, ába jíwerujani sun le lúmabei ásta lanáangun, buleisei jameí, ába jígiruni jilá mémeeli.

³¹ Ába lásügürün ában jafádirin juríu lídaangiñe méme üma ligía, dan le laríjinalin wügüri ligía, mebéresenti láu, ába lasígiruni leíbugun loubáfurugugiñe üma.

³² Sügü ligía ában jádaangiñe ladügawagun Leví ñigiñe, dan giñe le laríjini wügüri buleiseiwaali ligía, ába giñe lasígiruni leíbugun loubáfurugugiñe üma, mebéresenga giñe láu.

³³ Ábati lásügürün ában wügüri Samariána aweíyasujati lídaangiñe üma ligía, dan le laríjinalin, ába lagüdemedagun lun.

³⁴ Ába liábin, ába lagáranijan lun bití buri le luágubei láu aili túma diweín, ába lagüraguni. Ába laweínrágüdüni luágu lilügün burígü, ába lanügüni tídoun jában chülüdügütiña, ába ladügüni le liyáraati lun.

³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Toúnigibeí wügüri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe ürüwa wügüriña ja líbiribeí le ueíbei líwerujoúa, lídan barítangun?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá giñe badüga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachülürün lídoun ában liraúraü fulásu le ñí lubei terésibirei ában würi gíritu Márta, túbiñe.

³⁹ Ñiñoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le laríñagubei,

⁴⁰ ánjounti Márta, weíriti teténirun lun tubéresegun. Ába taríñagun Márta lun Jesúsu.

—Nabúreme, ¿mebéresentibusan láu tígirunina namúlelua adügei sun berésegu nábugua? Aríñagabá tun lun tíderagunina.

⁴¹ Ába louñabunun Jesúsu, laríñaga tun.

—Márta, bafúuduña luágu sarágu cátei,

⁴² buídurügüti murúsun lun weígin. Anúadaja táali María lubuídun-ágei cátei le lúnbei ladügüniwa, áni úabei ni ában lun lagídaruni tueí.

11

Larúfudajani Jesúsu ayúmuraguni lun Búngiu

(Mt 6.9-15, 7.7-11)

¹ Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun queí larúfudajan Juan joun láni disípulugu.

² Laríñaga Jesúsu lun.

—Dánme le jayúmragun lun Búngiu, jaríñagame ítara.

Wáguchi Búngiu le siélubei, inébewalá bíri.

Ñübinlá bidáani lun barúeijan ya ubouágu, adügüwalá bugúndan ubouágu quei ladügün bugúndan siélu.

³ Rúboun fein buídurügütu woun lun wéyu le ugúñebei.

⁴ Ferúdunabei wuríbati le adüga wamaalibei quei ferúduna wamániña ja adügübaña wuríbati woun.

Mígira báwa lun wáburujan lídoun wuríbani, dísegüdarügü báwa lueí.

⁵ Aríñagati giñe Jesúsu joun.

—Niján ában jémpulu jun. lídin jamúga ában jídaangiñe lúbiñe ában lumáda amídi áriebu, ába laríñagun lun. “Numáda, furédeibá ürüwa fein nun,

⁶ ladüga sun líña lachülürün ában numáda núbiñoun áni úati ni cáta núma lun níchugun lun.”

⁷ Ába jamúgati loúnabun le ában múnadagiñe, laríñaga jamúga. “Mebéreseja bána, darúnaali nubéneri, áni rouñjadina jáu sun nisáanigu, siñáti násaarun íchiga ni cáta bun.”

⁸ Naríñaguña jun luágu íbini lan jamúga másaarun lan íchigoun lun ladüga lumáda lan, lásaaruña jamúga íchigoun lun lueí lasígirun ebéreseja lun.

⁹ Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun.

¹⁰ Ladüga sun le amúriajati, íbíjati, le áluajati, daríti, le adaúnjati luágu béna, junrénwati lun.

¹¹ ‘¿Gayáraabei funági líchugun ában úguchili jídaangiñe dübü lun liraü dan le lamúriajan fein lúma? ¿o líchugun lan ában jéwe lun dan le lamúriajan úduraü?’

¹² ¿o líchugun lan ában águru lun dan le lamúriajan gañeín?

¹³ Gíchigadijadün ligía cátei buíti joun jirájüñü láu sun juríban, ígúbumeti líchigei Júguchi Búngiu le siélubei Sífiri Sándu joun ja amúriajati!

*Laríñawagün luágu níjein lan lubáfu Máfia lúma Jesúsu
(Mt 12.22-30; Mr 3.19-27)*

¹⁴ Níñein Jesúsu aságara ában espíritu wuríbati lueí ában wügüri le madímuregüdün láalibei yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le.

¹⁵ Níñanu giñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügüri le espíritugu wuríbatíña.

¹⁶ Jíbiri, lun jóuchaguni, ába jamúriajan miláguru lúma lun larúfuduni luágu lumagiñe lan Búngiu líábin lubáfu.

¹⁷ Queíti subúdi láani le jarítagubei, ába laríñagun joun.

—Furúmiegarügü arúeijani le afánreinraguti lun jageíndagun jámagua, lagünrinchaguba, ában giñe família fánreinguatíña ladüga wuríbu, jagünrinchaguba giñe.

¹⁸ Ánjein giñe níjein lubei fánreinguaü jádan Máfia jáma lánigu, ¿ída lubági ladúrarun lubáfu? Naríñagunbalin le, ladüga jaríñagun luágu láu lan lubáfu

Máfia naságaja espíritugu wuríbatíña ja ebélagüdübaña Máfia guánarügü jádoun gürígia,

¹⁹ Áni ánjein ítara líña lubeí, ¿cági íchugubei ubáfu joun ja jánigu jugúya lun jaságajan espíritugu wuríbatíña, Máfia ódi Búngiu? Láu líra, jagía guánarügü arúfuda jamúti luágu bulíeigua jumá.

²⁰ Le inárünibeí, láu lubáfu Búngiu naságaja espíritugu wuríbatíña, áni arúfuda lumúti líra luágu chúlújali lan larúeijan Búngiu lídoun fulásu le.

²¹ ‘Ába wügüri jéreti, dan le aráanseñu lan, toúnigi lúban buídu, sun le lúbiñebei choutruti.

²² Ánjein ñübin ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanügüni le labúseerun, ába lafánreinraguni jáma lumádagu.

²³ Le mámabei númagiñe, náganiñein, le míderagun lumútina, güríngua lumúti le nadügübei.

*Espíritu wuríbatí le agíribudúbei
(Mt 12.43-45)*

²⁴ Ába lariñagun Jesúsu.

—Dan le láfuridun ában espíritu wuríbatí lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába lariñagun lúnguarügü. “Nagíribudayá tídoun núban to ñígiñe lubeí náfurida.”

²⁵ Dánti le lagíribudun, ába ladáriruni gürígia buga ligía quei ában múna to buídawaru, aráanserúa.

²⁶ Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lídan gürígia ligía, wuríbatimaajaliti le gádaanbalin wügüri ligía lueí buga furúmiñe.

Ugúndani le tímataaati

²⁷ Dan le niján lubeí Jesúsu ariñagei cátei le, ába tagúaragun ában würi jádaangiñe gürígia, tariñaga.

—¡Fuleíseiwatu jínáru to agúriajabalibu, fuleíseiwatu to átagüdübalibu!

²⁸ Ába lariñagun Jesúsu.

—¡Fuleíseiwatimaatiña ja agáambubalin le lubeíbei Búngiu áni abájüda jameí!

*Amúriajatiña gürígia wuríbatíña miláguru lúma Jesúsu
(Mt 12.38-42; Mr 8.12)*

²⁹ Añája méme gürígia oúndaragua geyégu láu Jesúsu, ába lagúmeserun adímureja, lariñaga.

—Wuríbatíña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás.

³⁰ Ítara quei meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügüri Garaüwarügüti, ligíaba ában seíni joun gürígia ja lánina dan le luágu Búngiu lan oúnajabalina.

³¹ Dánme le lídáani agúseruni, dánme le lagúseragüdüniña Búngiu gürígia ja lánina dan le, ábame tásaarun lurúeite Súru lun tasíadiruniña, ladüga tugúya, ñübintu lídaangiñe lidíse-ágei ubouú lun tagáambuni lichú láu Salomón, áu, weírigutimaatina sügü láu Salomón áni májatün jagáambunina.

32 Lídan mémeme agúseruni ligía, ábame gíñe jásaarun já meja aganoúbaña ubúru gu Nínive, ábame jasíadiruniña ja lánina dan le, ladúga sáansiguati jagáburi Nínivena lárígiñe lapúrichijani Jonás ugánu le lání Búngiu joun, áni áu ában le weíríguti sùgú láu Jonás, áni májatùn lun jagáambunina.

Lilámpun úgubu

(Mt 5.15, 6.22-23)

Ába lasígirun Jesúsu aríñaga.

33 —Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoundadun joun ja ebélurutiña.

34 Ítara líña águu quei ában lámpu lun úgubu, ánjein baibeí lubei bágu, aríja ligía luágun cátei lánina Búngiu, camá jamuga jarúgoundabei gíñe láu sun búgubu, áni buídubei gíñe sun bigáburi. Ánjein sándi lubei bágu, aríja ligía luágun cátei lánina ubou, camá jamuga lídaanbei lubúriga sun búgubu, wuríbabei gíñe bigáburi.

35 Touñigibá lun mabúrigadun lan bilámpun.

36 Ánjein jarúgounda lubei láu sun búgubu, úaga ni murúsun lubúriga, barijubei sun cátei furáangu quei dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés

(Mt 23.1-36; Mr 12.38-40; Lc 20.45-47)

37 Dan le lagúmunchunbei ladímurejan Jesúsu, ába lamísurajani ában fariséo eíga lúbiñe. Ába lebélorun Jesúsu, ába lañúurun luágu dábula.

38 Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eígini.

39 Ába laríñagun Wabúreme Jesúsu lun.

—Jugúya fariséogu ragá jumuti wéru lúma asiedu bougudigiñe libíti, múnadagiñe jibíti, wíyetùn, buin jíña láu luweínamu águu lúma sarágu luwúyeri wuríbani.

40 ¡Deré tagáambun jugúya le! ¿Ibídíñeti jun luágu le lan adügübalin le bougudigiñebei, ligía lan gíñe adügübalin le múnadagiñebei?

41 Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe bougudigiñe jibíti.

42 ¡Fugiábugu jugúya fariséogu! Adúgatùn díisi fánreinti láu jíduru le ménta, rúda, lúma ámu luwúyeri nádú lun jíchugun ában fánreinti lun Búngiu, áni madügüntùn gásu láu ísuruni lúma línsiñejabu Búngiu. Ligía lúnbei jadügüni, mígirunga jumeíme jadügüni le ában.

43 ¡Fugiábugu jugúya fariséogu! Buséntùn jarügüdüni ubáraü le jabára ja weírigitimaabaña tídan jilígílisin, busén jugúya lun labúsurún jun láu sarágu inébesei úmada.

44 ¡Fugiábugu jugúya fariséogu, biángua tigíbul, ladúga ítara jíña quei umúajaü le marijinti, sùgú jagía gúrigia ligíbuagugiñe ibídíñoun joun.

45 Ábati louñabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gíñetia dan le bariñaguni le.

46 Ába laríñagun Jesúsu.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queisi ában anügüni jürüti joun ámu, áni jugúya, májatùn janügün ni murúsun lídaangiñe.

47 ¡Fugiábugu jugúya!, ladúga rújumuti dübü arítaguagüleme luágu jamúaja profétagu já meja jáfaragubaña binádu jagübürigu.

48 Láu líra, arúfuda jumúti luágu gúnda jumá láu le jadügübei binádu jagübürigu, jagía áfaragubaliña, jugúya wédegüda jumúti jamúaja.

49 Ligía laríñagunbei meja Búngiu láu lichú láu. “Noúnajaba profétagu jáma apóstolugu joun, ábame jáfaraguniña jíbiri jilágubei, eibaaja jamáñame jíbiri.”

50 Ligía lagúseragüdübaña lubei Búngiu gürígia ja lánina dan le luágu játa profétagu ja áfarawagübaña lúmagiñe ladügün ubou,

51 lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu jóüwegun profétagu.

52 ‘¡Fugiábugu jugúya arúfudajatiña lilúrudun Moisés!, ladüga ragü jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

53 Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani

54 lun jaríjin ánjaña adárrira lidúnrun.

12

Larúfudajan Jesúsu luágu mabuídun lan biángua lan igíbu

1 Ába jóúndaragun sarágu mílu gürígia, gíbetiña darí lun jachúinragun jóúngua. Ába lagúmeserun Jesúsu aríñaga jóúntima láni disípulugu.

—Toúnigi jumátia jawei fariséogu, ítara líña jagáburi quei ísi —biánguañein jagíbu.

2 Úati ni cáta lágubiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan.

3 Ítara líña lubeíti, sun le jaríñagubei lágugiñe lubúriga, lagaambúaba lídan larúgounga, le jaríñagubei lanágangiñe béna, lagúarajoúba tábulugugiñe múna.

Ca lan ueí lúnbei janúfudewa lan

(Mt 10.28-31)

4 ‘Naríñajare jun, numádagu, mouñ lumuti janúfudedun jawei gürígia ja gabáfubaña lun jáfarunün jilágubei, lárigiñe líra siña jadügün ámu cátei jun.

5 Naríñagaali jun ca lan ueí lúnbei janúfudedun. Janúfude jumá luei Búngiu le gabáfugilibei lun loúnajanun juwáni máfiougatin lárigiñe lagídaruni jibágari. Lueílá janúfudeda.

6 ‘¿Ma alúgurúatiña seingü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe.

7 Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégitün sügü jáu sarágu dunúru ligíbugiñe Búngiu, áni loúnigiruñádün.

Ja meyédagunbaña luágu Jesúsu jagíbugiñe gürígia

(Mt 10.32-33, 12.32, 10.19-20)

8 ‘Naríñajare jun luágu sun lan ja aríñagubaña jagíbugiñe gürígia luágu nánigu jamá, naríñaguba giñe luágu nánigu jamá jagíbugiñe láni Búngiu ánjeligu.

9 Ánjaña ja aríñagubaña jagíbugiñe gürígia luágu máma jamá nánigu, naríñaguba giñe jagíbugiñe láni Búngiu ánjeligu luágu máma jamá nánigu.

10 'Furúmieguarügü le aríñaguti cátei wuríbati nuágu, áu le Wügüri Garaüwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

11 'Dánme le janügün ligíbugiñoun lúrudu lun jagúserun, o jagíbugiñoun lan tábutigu jalígilisin juríu, madíjerida jumá luágu cába lan jounaba o cába lan jaríñaga,

12 dánme le lachülürün óra lun jadímurejan, larúfudubei Sífiri Sándu le lúnbei jaríñaguni jun.

Ewéridijani lueí leténirún sarágu lun irísini

13 Ába laríñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

14 Laríñaga Jesúsu lun.

—¿Cági íchubalina quei agúseragüdüti o quei afánreinjati jídan?

15 Aríñagati giñe ítara.

—Tounígua jumá júngua lueí luweínamu águu, ladüga máma lueígiñe líbe lúmati gürígia labágarida sarágu dan.

16 Ábati líchuguni jémpulu le joun, laríñaga.

—Ñíñein méja ában wügüri rísiti, ába líchugun lichári alúbajouñi buíti.

17 Ábati laríñagun rísiti le lúnguarügü. “¿Cábasán funa nadüga? Ibídiñeti nun jalíaba lan nareidei sun le nalúbajabei.”

18 Ába lasáminarun, ába laríñagun. “Subúdi náali cába lan nadüga, nagünrinchaguaru sun nání lágei líla nádü, ábame nadügün ámu weínamutimaatu, ábame nareíduni nalúbajan lúma sun le nómabei tídan.

19 Ábamei nariñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, jóuba, gurába, gúndaabá.”

20 Laríñaga Búngiu lun. “Wügüri deré tagáambun, bouwe áriebe le, sun le búmabei areídañu, ¿cábasan un lerédera?”

21 Ítara líña lasúseredun lun gürígia le adámuridaguagüdüti irísini lánina ubouú le lúngua, ába leréderun gudémeñu lídan cátei le luágu ti Búngiu, líña Jesúsu.

Tounigi lumútiña Búngiu lirájüñü

(Mt 6.25-34)

22 Ába laríñagun Jesúsu joun lání disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnbound jadáürünun.

23 Gebégitimaati íbágarí sùgü láu eígini, gebégi úgubu sùgü táu anáanguni.

24 Aríja jumá joun dunúru. mábunaguntiña, malúbajan, mágei ligía jeígin, láu sun líra, jóügüda lumútiña Búngiu. ¡Gebégitimaatün sùgü jáu dunúru!

25 Úati ni ában jídaangiñe gayáraati líchugun lánwoun libágarí láu sun luweírín lidíjeri luágu.

26 Ánjein lubeíti siñá lubei jadügüni le míbebei, ¿ca uágu jadíjerida luágu buri líbiri cátei?

27 'Aríja jumá ída líña lan labouóchun buri fulúri. mawádigimariti, májúchagun ligía lanáangun, áni láu sun líra, quei naríñaguni jun, ni urúei Salomón láu sun luwéndegun, mawéndedunti quei ában fulúri.

28 Ánjeinti ítara líña lubei ladáüraguagüdüni Búngiu jíduru, le níjeinbei ugúñe, jarúga lagudúña, ¡ladáüraguagüdatimabadün, lougua tafiñen jugúya le!

²⁹ Madíjerida jumá lubeíti luágu ni cáta, ni luágu cába lan jeíga, ni luágu cába lan játa.

³⁰ Ladüga lirájüñü ubou le, lárigiñanu buri cátei le, ánjein jugúya, níjein ában júguchi le subúdíjabúbei lun sun jemégeirun.

³¹ Áluaja jumá lun jesériwidun lun furúmiñe, ábame líchuguni sun le jemégeirubei jun.

*Írsini siélu
(Mt 6.19-21)*

³² ‘Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan.

³³ Alúgura jumeí le júmati, jíhigeime lebégi joun gudémetiña, láu líra, jadügüñoun lágei seínsu to maweyadaditu, írsini siélu le magúmuchaditi, le ñí lubei siña lan jebélurun jíwerutiña anügei jírisin, úa jagía jamútiri ñi lun jeígini.

³⁴ Nariñagubalin le jun ladüga le ñí lumuti jírisin, ñíñoun giñe janígi.

Aráanseñu jumá, agúrabaja

³⁵ ‘Aráanseñu jumá lubá nagíribudun siélugiñe, durúngu jllámpun.

³⁶ Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun.

³⁷ Buídubei dan joun músu ja ladárirubaña jayúbudiri agágudúañu dan le lachülürün, ninárün jáu, iyúbudiri meme ligía laráanseruba, ábame lañúuragüdüniña luágu dábula, ábame lesériwiduni jeígin joun.

³⁸ Íbini amídi áriebu lan lachülüra o lubá lan larúgan, ánjaña ladárra agágudúañu, buídubei dan joun músu jagía.

³⁹ Subúdi jumeí luágu lun lan jamúga subúdi láni tabúreme múna cába lan óra lachülüra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegún.

⁴⁰ Jugúya, aráanseñu jumá giñe, ladüga lídaanme magáradajan jumá ligíame nagíribudun, áu le Wügüri Garaüwarügüti, ubouágún.

*Músu le úarabei, lúma le múaraanbei
(Mt 24.45-51)*

⁴¹ Ábati lálügüdüni Pédro Jesúsu, laríñaga lun.

–Nabúreme, ¿woúnrügü bíchigei jémpulu le ódi joun súngubei?

⁴² Laríñaga Wabúreme Jesúsu lun.

–Lun furúmiegurügü oúnigiruti úarati, gunfaráanda ligía, le lígirubei liyúbudiri lun laríjin jáu tilana lúban, lun leígagüdüniña lídan dan.

⁴³ Buídubei dan lun músu le ladárirubei liyúbudiri agúnfulira láu luwádigimari dan le lachülürün.

⁴⁴ Ninárün jáu, luágu líchugubei lan liyúbudiri lun ligía lan aríja láu sun le libjubei.

⁴⁵ Ánjein arítagua músu ligía luágu lügili lan liábin liyúbudiri, ábame lagúmeserun ouserañu jíbiri músu ja lábugiñebaña laríajaan wuríba, leréderame eíga, áta, abácharuada,

⁴⁶ ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírín-ágei abeichuni luágu, lasíadireime lun lasúfuriruni le jasúfurirubei ja múaraanbaña, máfiogati.

⁴⁷ ‘Músu le subúdíjabúbei lun ca lan labúseerubei liyúbudiri áni maráanserunti, mabájüdüñleí, labeichúba sarágu.

⁴⁸ Ánjeinti músu le ibídiñeti lun, ába ladügün cátei lé buri lúnti labeichún lueígiñe, maweíribei labeichún. Le únti líchugúa gíbeti, gíbebei amúriajóuti lúmagiñe, le gíbeti ígirúti lábugiñe laríajaan, gíbetimaabei amúriajóuti lúmagiñe.

Jesúsu lébunabei fánreinguaü

(Mt 10.34-36)

⁴⁹ ‘Láu niábin ubouágun, ñíbei fánreinguaü ubouágu queísi wátu geméti. ¡Busénjadina jamúga durúnguaali lan wátu ligía!

⁵⁰ Lúnti nasúfurirun le gumúti, ¡meménija nanígi lagúmuchun!

⁵¹ ¿Jarítaguatúnsan luágu barü nán meja darángilaü númagua dan le niábinbei ubouágun? Manügütina darángilaü, fánreinguaü nanügübei. Jafánreinraguba ja mafiñebaña nuágu jáma ja afiñebaña nuágu,

⁵² lúmagiñe guetó, seíngüga tídan ában múna, jafánreinraguba ürüwa jawei biáma, biáma jawei ürüwa, nueígiñe.

⁵³ Lagárabaguba úguchili luágun liraü, isáani luágun úguchili, úguchuru tuágun tiraü, isáani tuágun túguchu, ímenidi tuágun ágürü, ágürü tuágun ímenidi.

Liseíni buri dan

(Mt 16.1-4; Mr 8.11-13)

⁵⁴ Aríñagati giñe Jesúsu joun gürigia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda.

⁵⁵ Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda.

⁵⁶ ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubei luáguti ligáburi dan le gádaanbalün jun?

Joucha jumá lun lídan jumá dan jáma jáganiñu

(Mt 5.25-26)

⁵⁷ ‘¿Ca uágu siñá lubei jasúbudiruni cátei le úraguabei júnga?

⁵⁸ Ánjein agúaragüda ában gürigia buágu, ába bídin lúma ligíbugiñe lúruðu, jóuchabá baráanseragun búngua lúma luágu úma lubáragiñe jachülürün, manügün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame ládarunibu furisunrugun.

⁵⁹ Nariñajare bun luágu máfuridunbadibu lan ñígiñe darí bafáyeiruni lagúmujoün bigáwanün.

13

Ca lan uágu lúnti lubei lasáansirún igáburi

¹ Lídoun méja dan ligía, ába jayábin gürigia abájüdagua lun Jesúsu jawágu wügüríña Galiléana ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu.

² Ába lariñagun Jesúsu joun.

—¿Jarítaguatúnsan luágu ladüga lan luweírín jafígoun Galiléana jagía sügü jáu ja jíbiri lílana jageíra lasúseredunbei le joun?

³ Máma lueígiñe líra, láu sun líra, nariñajare jun luágu ánjein lan masáansirun jumá jigáburi, jóúweguba giñe sun jugúya.

⁴ Ángi díisi-wídü jagüra ja ouwegubaña dan le lábुरुjanbei wáyelesi le Siloébei jawágun — ¿jarítaguatün luágu weiritima lan jadúnrun sügü jáu ja jíbiri ja aganoubaña Jerusalén?

⁵ Mára líña gíñe, láu sun líra, naríñajare jun luágu ánjein lan masáansirun jumá jigáburí, jóuweguba gíñe sun jugúya.

Jémpulu tuáguti tídibu ígo to mínboun

⁶ Ábati labájüdaguni Jesúsu jémpulu le joun, laríñaga.

—Níñein ában wügüri, ganádiriti ában tídibu wéwe to ígo, ába lídin aríja ánjein gín tubei, madáriti ní cáta tuágu.

⁷ Ábati laríñagun lun le ouñigirubalin ichári. “Aríjabásan, ürüwaali irúmu gabügürüga niábin áluaja ígo tuágu ídibu to, madáritina. Chaúnboun, ¿cába uágu terédera ñi luágu ní cáta?”

⁸ Ába louñabuni le ouñigirubalin ichári, ába laríñagun. “Niyúbudiri, ígirayaboún irúmu le, nañúludagüdalí múa táu, awoúja áume táu.

⁹ Fágua tagíndun ítara, ánjoun magíndun, ábame táñchugún.”

Lareídaguagüdünnun Jesúsu ában würi sebúti tanágan lídan wéyu le eméraguagülei

¹⁰ Luágu ában wéyu le eméraguagülei, níñein Jesúsu arúfudaja tídan jalígílisin juríu,

¹¹ níñounti ában würi, díisi-wídü irúmu táu láu ában espíritu wuríbati tuágu, ígira láaru espíritu ligía lemúñu, síñá tásururun ní murúsun.

¹² Dan le laríjinbarun Jesúsu, ába lagúarun tun, ába laríñaga tun.

—Würi, areídaguadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu.

¹⁴ Ábati lagáñidun tábuti ligílisí ladüga lareídaguagüdünnun Jesúsu lídan wéyu le eméraguagülei, ába laríñagun joun gürija ja ñibaña.

—Níjein sísi wéyu lídan dímaasu lun gayára lan luwadígimaríniwa, lídan sísi wéyu ligía lun jíabin lun lagáranijóun jun, máma lídan wéyu le eméraguagülei.

¹⁵ Ába laríñagun Wabúreme Jesúsu lun.

—¡Bíangua tigíbu jugúya le!, ¿ma farára jumúti sun jugúya jilügün bágasu o jilügün lan burígü lun janügün áta dúna lídan wéyu le eméraguagülei?

¹⁶ Würi to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿móun lumuti funági yebe lun tareídawaguagüdünnun lídan wéyu le eméraguagülei?

¹⁷ Dan le laríñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri gürija, gúndaatiña láu cátei lé burí weiriguti le ladügübei Jesúsu.

*Jémpulu luáguti tíla mostása
(Mt 13.31-32; Mr 4.30-32)*

¹⁸ Ábati laríñagun Jesúsu.

—¿Ída líña ligáburí larúeijan Búngiu? ¿ca cátei úmounbei gayára lan níchuguni?

¹⁹ Ítara líña quei ában liraüraü tíla mostása le lábunubei ában wügüri líchárirugu, ába labouçhun, ába laweíridun darí lun líabin lun ábanme lan tídibu wéwe weiriti, darí lun jadügün dunúru jádibu luágu tuburébu.

Jémpulu luáguti ísi
(Mt 13.33)

²⁰ Ábaya lariñagun Jesúsu.

—¿Ca cátei úmounbei gayára lan níchuguni larúeijan Búngiu?

²¹ Ítara líña quei ísi le tíchugubei ában wúri tídoun úrúwa líburu fulúaarú, ába terésirun súnqubei.

Béna le bürüraübei
(Mt 7.13-14, 21-23)

²² Ába lasígiruni Jesúsu luweíyasun Jerusaléoun, arúfudajeina ligía lídan buri sun aüdü lúma lirájüñü fulásu le ídaangiñebei lásügúra.

²³ Ába lariñagun ában wügüri lun Jesúsu.

—Nabúreme, míbetiñásan ja lúnbaña jasálbarun?

Ába loúnabun Jesúsu, ába lariñagun.

²⁴ —Bürüraüti lubéneri siélu, jóucha jumá lun gayáraabei lan jebélurun lídaangiñe, ladüga quei nariñaguni jun, sarágujaba busúentiña jebélurun, siñábei.

²⁵ Lárigiñe ladáuruni tabúreme múna lubéneri, jugúya le bougudibei jadaünjaba luágu béna, jariñagame. “Wabúreme, darába béna wabá.” Ábame loúnabunün, lariñagame jun. “Íbídiñetün nun, íbídiñe giñe nun jalána jumá.”

²⁶ Ábameti jagúmeserun aríñaga. “Joujadiwa, gurá wagía búma, arúfudaja amürü woun úmadarugu.”

²⁷ Ábameti loúnabunün, lariñagame. “Aríñaga náali jun luágu íbídiñe jumá nun, íbídiñe nun jalána jumá. Díse jumá nueí, sun jugúya le adügübei wuríbani.”

²⁸ Ligíaba jayájuaan, acünrijame jári dánme jarijini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin.

²⁹ Jayábiba güriña lueigiñe oúbaü le ñigiñe lubei láfuara wéyu lúma lueigiñe le ñigiñe lubei lálüda, lueigiñe núru lúma lueigiñe suédi lun jañúurun eíga lídan larúeijan Búngiu.

³⁰ Ñíbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

Layájun Jesúsu jawágu lílana Jerusalén
(Mt 23.37-39)

³¹ Lídan méme wéyu ligía, ába jayábin fariséogu, ába jariñagun lun Jesúsu.

—Beiba yágiñe, ladüga buséti Heródes láfarunibu jilágubei.

³² Ába lariñagun joun.

—Jeíba, jariñagame lun wügüri bíbuti ligía. “Ugúñe lúma jarúga naságajan espíritu wuriñatiña jádaangiñe güriña, areídaguagüda áu sánditiña, lárigiñe jarúga, lásurun nuwádigimari.

³³ Lúnti nasígiruni nuweíyasun ugúñe, jarúga, lúma lárigiñe jarúga, ladüga máma lúnti lafarúniwa ában proféta jilágubei bougudi luei Jerusalén.

³⁴ Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáañe profétagu, chügua jugúya dübü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün!

³⁵ Ígira láadün Búngiu, áni naríñajare jun luágu maríjindügüya jumáadina lan daríme lachülürün dan lun jariñagun. “Biníwati le ñübinbei lídan líri Wabúreme.”

14

Lareídaguagüdün Jesúsu ában wügüri lújali lariña lúma liyáda

¹ Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñíbaña, jariaguñein Jesúsu.

² Ñíñein giñe ában wügüri láu sándi le ílu,

³ ábati lálügüdüniña Jesúsu arúfudajatiña lilúrudun Moisés jáma fariséogu, lariñaga joun.

—¿Gayáraati lareídawaguagüdün ában wügüri lídan wéyu le eméraaguagülei ódi siñáti?

⁴ Ába jeréderun maníñu. Ábati lanügüni Jesúsu sánditi ligía, ába lareídaguagüdüni, ába lariñagun lun lun lídin.

⁵ Ába lariñagun joun fariséogu.

—Furúmiegurügü jídaangiñe, ánjein eíguada lilügün bágasu o lilügün lan burígü lídoun ában wélu lídan wéyu le eméraaguagülei, laságarubei ñígiñe furése.

⁶ Maríñagun jáña ni cáta.

Ja amísurajoúbaña lídoun maríei

⁷ Dan le laríjini Jesúsu janúadajani amísurajoútiña ubáraü buri le jounbei ja weírigubaña, ába lariñagun joun.

⁸ —Dánme le bamísurajoün lídoun ában fédu lánina maríei, máluajabei lubuidun-ágei ubáraü, ñübin líñein ábanya amísurajoúti weírigutimáati buei,

⁹ ábame liábin le amísurajabalün, lariñagame bun. “Rúbei bubára lun wügüri le.” Ábameti bídin láu busíganu añúura lídan lünabun-ágei ubáraü.

¹⁰ Dánme le bamísurajoün lídoun ában fédu, ñurúba lídan lünabun-ágei ubáraü, lun dánme lan le liábin le amísurajabalibu, lariñagame bun. “Numáda, sügüba lídoun ában ubáraü weírigutimaati.” Ítara lúba berésibirun inébesei jagíbugiñe sun ja ñünbaña luágu dábula.

¹¹ Le anánguti lúngua weíri, lünabudúba, le ünabuti lanáangun lúngua, weíribei lanügün.

¹² Aríñagati giñe lun wügüri le amísurajabalin.

—Dánme le bíchugun ában adíneruni o fédu, mamísuraja báña bumádagu, ni bamúlenu, ni bíbugañanu, ni jíbiri bidújeñu, ni bubésinanigu ja rísitiña, ladüga jamísurajabadibu giñe, bibíjubati bafáyeiruaja.

¹³ Dánme le badügün fédu, amísuraja báña gudémetiña, siñáguatiña úngua, danímaatiña, maríjintiña.

¹⁴ Ábame gúnda ban, ladüga siñáti jafáyeirunibu, bibíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe ouweni.

Jémpulu luáguti oúnwenbun adíneruni

¹⁵ Dan le lagáambunbalin ában jádaangiñe ja ñünbaña luágu dábula cátei le, ába lariñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶ Ábati lariñagun Jesúsu lun.

—Ñíñein ában wügüri, íchuguti ában oúnwenbun adíneruni, ába loúnajan amísuraja sarágu gürígia.

17 Óra lun adíneruni, aba loúnajani lumúsun aríñaga joun amísurajoútiña. “Queímoun, aráanseeli sun cátei.”

18 Súngubei, ába jaríñagun luágu siñá lan jóudin. Lariñaga furúmiñeti. “Sun líña nagañijan ában fulásu, mósu nídin aríjei, ferúduna bána, siñáti nídin.”

19 Lariñaga ában. “Agáñijaadina seíngü féru bágasu lánina wadágimanu, neibuga oúchaña, adúgabá fuleísei nun, ferúduna bána, siñáti nídin.”

20 Lariñagaya ában. “Sun líña namárieidun, ligia siñá lubei nídin.”

21 Dan le lagíríbudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába lariñagun lun músu. “Beíba lídan sun üma le ubúrugubei, banúgañame gudémetiña, siñáguatiña úngua, danímaatiña, jáma maríjintiña.”

22 Lárigiñe ladügüni, ába lariñagun músu lun liyúbudiri. “Nabúreme, adüga náali le bubeíbei nun, níjein mémegua ubáraü.”

23 Ábati lariñagun iyúbudiri lun músu ligia. “Beíba lídan sun üma bougudin luei ubúrugú, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban.

24 Ladüga nariñajare jun luágu úabei lan ni ában jádaangiñe ja namísurajabaña eígti lídan nadíneragüdün.”

Lúnti lígirúniwa sun cátei lun lánibe lan Crístu

25 Sarágu jáña gürígia afálaruti Jesúsu, ába lagáragun, ába lariñagun joun.

26 —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúlenú, o lítunu, o libágari guánarügü, sügü náu.

27 Le giñe májabei lasúfurirun nueígiñe queísigubeirügü jamúga ában wügüri le anügüti lugúruwan, siñáti náni lan disípulu.

28 Ánjein arítagua ában jídaangiñe ladügün ában wáyelesi, ¿ma funági lañúuruba furúmiñe asáminara átiribeí lan lagástarun lun laríjini ánjein gabáfu lubeí lun lagúmuchuni?

29 Ladüga ánjein líchiga ébuu, lárigiñeme lásíñerei wadágimanu agúmucha, jéjerajaba ja aríjubalin láu,

30 jaríñagame. “Guméseti wügüri le ában wadágimanu, siñá lumuti agúmucha.”

31 Ánjein lawúribuja lubeí ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubeí lageíndagun jáu díisi mílu súdaara lúma le jáubei wein mílu?

32 Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli.

33 Ítara líña lubeíti, furúmieguarügü jídaangiñe le mígirunti sun le lúmabei lun lafálarunina, siñáti nánibeí lan disípulu.

Dan le lefériiduruni sálu lubásuan

(Mt 5.13; Mr 9.50)

34 ‘Buíti sálu, ánjein lefériidura lubásuan, ¿cábago un ju lan?

35 Mabuídunjali ni lun labunawagún nádü lídan, ni lun lidérebugu múa, fíwarúgaalime. Agáamba jumána, jugúya le garígeirugubei lun jagáambun.

15

*Jémpulu tuáguti mudún to efériiduboun
(Mt 18.10-14)*

1 Luágu ában wéyu, ába jayárafadun sarágu agúburajatiña liseínsuna gumádi jáma gafígountiña lun Jesúsu lun jagáambuni.

2 Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cáte le, jariñaga.

—Wügüri le, resíbi lumútiña gafígountiña, jou ligía jáma.

3 Ábati líchuguni Jesúsu jémpulu le joun, lariñaga.

4 —¿Ca jídaangiñe, lun jamúga galügüniña lan san mudún, leféridira ában jídaangiñe, mígiran lubáña gádürü-wein-dísi-néfu ñi, lubárua, lun lídin áluajoun mudún to eféridiruboun?

5 Dan le ladárirunun, ába lanügünun légewagu láu ugúndani.

6 Dan le lachülürün lúbiñoun, ába loúndaruniña lumádagu jáma lubésinanigu, lariñaga joun. “Gúnda jumá úara núma, ladüga darína nilügün mudún tó yebe eféridiruboun nuei.”

7 Nariñajare jun luágu ítara méme líña weiritima lan ugúndani siélu luágu ában gafígounti le asáansiruti luríban ligáburu lun lafálaruni Búngiu, sügü láu jawágu gádürü-wein-dísi-néfu gürígia richágutiña ligíbugiñe Búngiu ja memégeirunbaña jasáansiruni jagáburu.

Jémpulu luáguti seínsu le eféridirubei

8 ‘¿Ca würi to njeinti jamúga dísi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buidu darí lun tadáriruni?

9 Dan le tadáriruni, ába toúndaruniña tumádagu jáma tubésinanigu, tariñaga joun. “Gúnda jumá núma, ladüga darína seínsu lé yebe neféridirubei.”

10 Nariñajare jun luágu ítara líña lan giñe ugúndani jádan láni Búngiu ánjeligu luágu ában gafígounti le asáansiraguti luríban ligáburu lun lafálaruni Búngiu.

Jémpulu luáguti irájü le acháragadubei

11 Rúlumuti giñe Jesúsu jémpulu le joun, lariñaga.

—Ñiñein méja ában wügüri jáu bián lirájüñü.

12 Ába lariñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei.

13 Málüti lueígiñe, ába loúndaruni amúleñein sun lumégegún, ába lídin díse lídoun ámu fulásu, ába lagástaruni liseínsun ñi lídan ában ibágaru mabuídunti.

14 Dan le gumújali sun liseínsun, ába ladágarun ában lemégeirun eígini lídan fulásu ligía, ába ladáiragun lúngua lídan ában oúnwenbun mégei.

15 Ábati lídin áluaja wadágimanu lúma ában lílana fulásu ligía, ába loúnajani wügüri ligía oúnigiraña lilügüniña búruju.

16 Weiriti liláma darí lun lawámadun lun lun leígini jeígin búruju, míchugúnwati lun.

17 Ábati lasáminarun, lariñaga lúnguarügü. “¿Sarágu ñadágimeintiña lúbiñe núguchi ígiraguati eígini joun, áu ya, ouwe niláma!

18 Nagíribuda le ñijin lubei núguchi, nariñagame lun. Núguchi, afígounjaadina ligíbugiñe Búngiu lúma bigíbugiñe.

19 Madúnaali lun nanáangun nungua quei biraü, barúbana quei ában jídaangiñe ñadágimeintiña búma.”

20 Ába lárügüdün üma lun lagíribudun lúbiñoun lúguchi.

‘Dísegi líña, ába larijini úguchili irájü le, ába lagúdemedun lun. Ába leíbaagun lubároun, ába loúburuni, ába lachúuruni.

21 Ábati laríñagun isáani lun. “Núguchi, affigounjaadina ligíbugiñe Búngiu lúma bigíbugiñe, madúnaali lun nanáangun núngua quei biraü.”

22 Ába laríñagun úguchili joun lumúsuniña. “Sagájumoun tubuídun-ágei anáanguní furése, daúguagüda jumeí. Daújuma giñe ában bágü luágu lújabu túma geídi luágu lugúdi.

23 Áfara jumeí liraüraü bágasu le dibúnetimaabei. ¡Weíga, eféduja wagíame!,

24 ladüga niraü le, rúnaali yebe quei jiláali áni chülüguaya, féridijalí yebe áni dariwama.” Ába jagúmeserun eféduja.

25 ‘Súnti buga dan le, níjeinti buga íbugañau áraabu. Dánti le lagíribudun, dan le lachülürün tubádun múna, ába lagáambuni áfaruni lúma abínajani.

26 Ábati lagúarun lun ában jádaangiñe músu, ába lálügüduni ca lan susérebei.

27 Ába laríñagun lun. “Chülüjali bamúlen, áfaragüdalá búguchi liraüraü bágasu le dibúnetimaabei, ladüga lachülürün láu magádiei.”

28 Ába lagáñidun íbugañau, májaali lebéllurun. Ába láfuridun lúguchi, ába layúmuragun lun lun lebéllurun.

29 Ába laríñagun lun lúguchi. “Subúdi bumúti luágu seríwíjadina lan bun sarágu dan, madúraagunganéi le bubeíbei ní ában weíyaasu, míchugidibu ní ában liraüraü gábara nun lun nefédujan jáma numádagu.

30 Guetóti, láu liábin biraü le, le achágarubalin biseínsun jáma wúriña wuríbatíña, jáfaragüdadá bágasu le dibúnetimaabei!”

31 Ábati laríñagun úguchili lun. “Niraü, amürü númañadibu súnwandan, sun le náni, báni.

32 Ánjein guetó, lúnti wadügün fédu lúma lun wagúndaarun ladüga bamúlen le yebe rúwamaalíbei quei jiláali, chülüguaya, féridijalí yebe, áni dariwama.”

16

Jémpulu luáguti Oúnigiruti le múaraanbei

1 Aríñagati giñe Jesúsu joun láni disípulugu.

–Ñíñein méja ában iyúbudiri rísiti, ñíñein giñe ában loúniri lumégegun, ába jayábin aríñaga lun luágu lachágaruñein lan oúnigiruti ligía lirísin.

2 Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladüga masígijadibu oúnigirei nílugu.”

3 Ábati leréderun oúnigiruti ligía asáminara, laríñaga lúnguarügü. “¿Cábati nadüga guetó lárigiñe gidála lan niyúbudiri wadágimanu nueí? Méretina lun nadügün wadágimanu jürüti, áni nibúsigaritina lun namúriajan.

4 Subúdi náali cába lan nadüga lun ní jama erésibirutina jábiñe dánme mawádigimaríjadina.”

5 Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, laríñaga lun. “¿Átiri badúweiruni niyúbudiri?”

6 Ába laríñagun lun. “Dúwei numúti san barín agülei.” Ábati laríñagun oúnigiruti ligía lun. “Nuján bigáradan, ñurúba furése, badügame ában luágurügü dimí-san.”

7 Lárigiñe, ábaya lálügüdün ában, laríñaga lun. “Ángi amürü, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adügabá ában luágurügü gádürü-wein.”

⁸ Ába lasúbudiruni iyúbudiri luágu chu lan láu oúnigiruti ligía lídan ligáburi ladügüni cátei.

Ligía lariñagun Jesúsu.

—Gürígia wuríbatiña ja lánina ubou le, chúti jáu lídan jáni jáma ámu sügü jáu ja lánina larúgounga, ja lirájüñü Búngiu.

⁹ Siñáti leménigidún luágu irisini lánina ubou le, aríñagatina lubeíti jun lun jayúsuruni jirisin lun jadügün buíti, lun dánme lan le lagúmuchun jibágari, jerésibirúba tídan múna to magúmuchaditu, yágüta siélu.

¹⁰ Le adügüti buíti láu le murúsunrügüti, ladügüba giñe buíti láu le gíbeti, le madügüti buíti láu le murúsunrügüti, madügünbei giñe buíti láu le gíbeti.

¹¹ Ánjaün lubeíti madügün buíti láu buri irisini le láni ubou le, le uágubei siñá lan leménigidún, ¿cábagi affínera juágu lun ledéregerun irisini inárüni lábugiñe jariajaan?

¹² Ánjaüti madügün buíti láu jemégen ámu, ¿cábagi íchigei le jáni guánarügü jun?

¹³ Siñáti lesériwidun ában güri-gia joun bián iyúbudirigu, ladüga liyereeguduba ában lun, línsiñedame le ában lun, o úarabei lan lun ában, lanügeime le ában quei ni cáta. Siñáti lesériwidúniwa lun Búngiu lúma lun seínsu.

¹⁴ Agáambagu jáña fariséogu lun sun cátei le, ába jéjerajan láu Jesúsu, ladüga jinsiñe lan seínsu joun.

¹⁵ Ábati lariñagun Jesúsu joun.

—Jugúya güri-gia ja arúfudagubaña jóungua quei buítiña jagíbugiñe güri-gia, ánjeinti Búngiu, subúdi lumútu janígi luágu wuriba tan. Le cátei le janügübei güri-gia quei weíríti cátei, iyereeguti lun Búngiu.

Lúru-du lúma larúeijan Búngiu

¹⁶ Níjein meja lilúrudun Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun güri-gia jóuchatiña lun jebélurun lídoun.

¹⁷ Méreenguntimaati lun lagúmuchagun siélu lúma ubou, máma lun magúnfulirun lan liñúraü-ágei dimúrei lídaangiñe lilúrudun Búngiu.

Larúfudajan Jesúsu luágu ígiraguni

(Mt 19.1-12; Mr 10.1-12)

¹⁸ Ánjoun lígira ában wügüri lúmari, lagámarida ámu, ladügüñein figou le gíribei adultériu, le giñe agámariduti ában würi to ígiraguau, ladügüña giñe adultériu.

Wügüri le rísibei, lúma Lázaro

¹⁹ Aríñagati giñe Jesúsu.

—Ñiñein méja ában wügüri rísiti, anáanguni fínutu to wéndegutu ladáuraguboun, ságüja wéyu ladáagun fédu láu sarágu wéndegu.

²⁰ Ñiñein giñe ában gudémeti gíriti Lázaro, sun lúra láu gumeín,

²¹ lañúurati buri múarugu tubéneri lúban rísiti ligía áluga leigini lífe eíginí le eíguaduti lueígiñe lidábulan rísiti. Weíríti lasúfurirun darí lun lawánduni jayábin oúnli éjelujei lugúmeín.

²² Luágu ában wéyu, ába loúnwen fugiábu ligía, ába janügüni ánjeligu lúmoun Abrahám, le ñíjin jabeí jiláaña buítiña, ába giñe loúnwen rísiti, ába lábunajoún.

²³ Dan le lasúfuriruña lan rísiti ligía lídan fulásu le ñíjin jabeí jiláaña wuríbatiña, ába liñúruni laríjin, ában laríjini Abrahám disegiñe, láu Lázaro lúma.

²⁴ Ábati lagúaragun, lariñaga. “¡Núguchi Abrahám, gudémená bun! Oúnajabei Lázaro lun ladüdüragüdüni ligíbu lújabu láu dúna, ñúbin lámuga éderei tuágu niñéñe, ladüga nasúfuriruña sarágu lídan wátu geméti le.”

²⁵ Ába lariñagun Abrahám lun. “Niraü, jarítaguabá luágu buídu lán meja dan bun lídan bibágari, ánjein lun Lázaro, wuríbati meja dan. Guetó, buíti dan lun ya, bugúya asúfurira.

²⁶ Bougudiñe luei sun le, níjein ában baráangu afánreinraguáwa júma, ja jamúga buséntiña jóudin yágiñe lun ñíjin, siñáti, ni ja ñúbaña, siñáti jayábin ñájoun.”

²⁷ Ábati lariñagun rísiti. “Amúriajatina búma, Núguchi Abrahám, lun bouúnajani Lázaro lúbiñe núguchi,

²⁸ añájein seingü namúlenu ñi, lun ladímurejan joun, mayábin jamámuga giñe lídoun fulásu lánina asúfuriruni le.”

²⁹ Ába lariñagun Abrahám lun. “Níjein le labürüjabei Moisés jáma profétagu jáma ñi, jadüga jamá gásu lául!”

³⁰ Ába louñabun rísiti, ába lariñagun. “Binárün, núguchi Abrahám, láu sun líra, ánjein ñüdüñ ában jádaangiñe jiláaña adímureja joun, lasáansiraguba jagáburi.”

³¹ Lariñaga Abrahám lun. “Ánjein mája jabei jadügün gásu láu le lariñagubei Moisés jáma profétagu, mafíñebaña giñe láu sun lásaarun ában jádaangiñe jiláaña lun lídin adímureja joun.”

17

*Luríban lafigoungüdüniwa ában güriquia
(Mt 18.6-7, 21-22; Mr 9.42)*

¹ Ába lariñagun Jesúsu joun láni disípulugu.

—Súnwandan níjeinbei lán buri cátei afigougüdüti güriquia, jáni fugiábu güriquia le afigougüdüti ámu!

² Buítimaati jamúga lun lun lagurún baránajoun láu ában dübü le lamúlija awási güráñu luágu ligíina sügü láu lafigoungüdüñ ában jádaangiñe ja ñübürigiñabaña lídan jafíñen nuágu.

³ Ítara líña lubeíti toúnigi jumá.

‘Ánjein adüga bamúlen o bíbugaña wuríbani bun, wéridibeí, ánjein asáansiragua ligáburi, ferúdunabeí,

⁴ ánjein adüga wuríbani bun sédü weíyaasu lídan ában wéyu, sédü weíyaasu líabin aríñaga bun luágu madügüdüngüya láali lan, lúnti ferúduna báni.

Lubáfu afíñeni

⁵ Ába jariñagun apóstolugu lun Jesúsu.

—Wabúreme, rúba lánwoun wafíñen.

⁶ Ábati lariñagun Wabúreme Jesúsu joun.

—Lun jamúga níjein lan murúsuraü afíñeni jídan—gayáraati jamúga ñúraüraü lan queisi ában tla mostása—gayáraati jamúga jariñagun tan tidíbu wéwe to. “Gidába yágiñe láu sun bílagüle, beíba ájúcha baránaja”, áni lasúsereduña jamúga.

Wesériwidun lun Búngiu máma ában cátei lun lateñgiruntwa luágu

⁷ Ánjein níjein lubeí lumúsun ában jídaangiñe, dan le lagíribudun áraabugiñe lárigiñe lawoujan o louñigirun lan anímaalu, ¿lariñaguba funági lun músu ligía. “Belúba, ñurúba eíga”?

⁸ Uá, aríñagarügübei lun. “Aráansebeí neígin, aráanseñu amürüme lun beténirun nun sun anája lan eíga lúma áta, lárigiñeme, gayáraajálme beígin lúma bátun.”

⁹ ¿Teíñqui lumúti funági iyúbudiri músu luágu ladügüni le lubeíbei lun? Uá.

¹⁰ Jugúya giñéti, dánme lásurun jadügüni le uágubei lariñaga Búngiu jun lun jadügüni, lúnti jariñagun. “Músu mouñtiña wagia, ladüga lé rügüñein lúnbei wadügüni wadüga.”

Lareídaguagüdün Jesúsu dísi gawágutiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária lúma Galiléa.

¹² Dan le lachülürünbei lídan ában liraüraü fulásu, ába jayábin dísi wügüriña gawágutiña gumeín, lubároun. Ába jeréderun díse lueí,

¹³ ába jagúaragun lun ítara.

—Jesúsu, Maésturu, gudéme wamá bun!

¹⁴ Dan le laríjinbaliña Jesúsu, ába lariñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun.

¹⁵ Níñeinti ában jádaangiñe, dan le laríjinbei luágu areídaguaali lan, ába lagíríbudun le ñíjin lubeí Jesúsu, adímurejeina buíti luágu Búngiu láu umálali jéreti.

¹⁶ Ába lájuduragun dagá ligíbu múarugu lun líchuguni eteíngiruni lun. Áni Samariána wügüri ligía.

¹⁷ Ábati lariñagun Jesúsu.

—¿Ma dísiñanu areídagutiña? ¿Jagáñagi ja jíbiri néfu?

¹⁸ ¿Níján gubeírügü teréncha le agíríbuda eteíngirei Búngiu?

¹⁹ Ábati lariñagun lun wügüri ligía.

—Sarába, beíba, areídaguadibu ladüga baffínen.

*Ída lúba lan ligáburí liábin larúeijan Búngiu
(Mt 24.23-28, 36-41)*

²⁰ Ába jálügüdüni fariséogu Jesúsu ídaba lan lagúmesera larúeijan Búngiu, ába lariñagun joun.

—Dánme le lagúmeserun larúeijan Búngiu, maríjinbei,

²¹ maríñawagúnbei. “Níján”, o “Níngitan”, ladüga lídan linárün cátei, níjeinjali larúeijan Búngiu jagánagua.

²² Ábati lariñagun joun láni dísipulugu.

—Lachülürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía.

²³ Lariñawagúba jun. “Níján Crístu ya”, o “Níngitan yágüta.” Iyéenibei, mídin jumá járigi, mafálarun jumáñame.

²⁴ Ladüga ítara quei laríjin ában labíríjaníga lueígiñe ában louba siélu lun luágun le ában, ítara lúba dánme le nagíríbudun ubouágun, áu le Wügüri Garaüwarügüti.

²⁵ Lúnti nasúfurirun sarágu furúmiñe, mebéresen jagíame gürígia ja lánina dan le náu.

²⁶ Quei meja lasúseredun lídan lidáani Noé, ítara lúba giñe lasúseredun lídan búrime wéyu le niábíngüle, áu le Wügüri Garaüwarügüti.

27 Dán meja ligía, jerédera meja gürígia eíga, áta, agámarida, íchaajaña jarájüñü lun jamáriedun dari wéyu le lebélorun Noé tídon ugúnein to árca. Ába liábin gúnran, ába jañáradagun súngubei.

28 Ítara lúba giñe quei lasúseredun lídan lidáani Lot. jerédera gürígia eíga, áta, agáñija, alúguraja, ábunagua, adáagua muna.

29 Dan le láfuridunbei Lot ubúrugugiñe Sodóma, ába láburujan wátu geméti lúma sáfuru siélugiñe, ába láfaraguniña súngubei.

30 Ítara lúba dánme le niábin, áu le Wügüri Garaüwarügüti.

31 ‘Lídaanme wéyu ligía, le gürígia le bougudibeí tueí lúban, ánjein níjein lubeí lumégegun múnada, mebéloralá aságarei. Le gürígia le áraabubei lídan óra ligía, magíribudalá lúbiñoun.

32 Jarítagua jumá luágu le asúseredubei tun lúmari Lot.

33 Le áluguti leséfuruni libágari ya ubouágu, leféridirubei ibágari magúmuhaditi, le ánjabeí leféridiruni libágari ya ubouágu, nueígiñe, libíjuba ibágari magúmuhaditi.

34 ‘Nariñajare jun luágu áriebu lánme ligía, ñíbaña biáma gürígia arúmuga tídan ában meme gabána, lanügüba ában jádaangiñe, igirúame le ában según jafiñen nuágu.

35 Ñíbaña biáma würiña amúlija lídan ában, tanügüba ában jádaangiñe, igirúame to ában.

36 Ñíbaña biáma wügüriña áraabu, lanügüba ában jádaangiñe, igirúame le ában.

37 Dan le jagáambunbalin cáteí le, ába jálügüdüni, jaríñaga lun.

—¿Jalíabasan lasúsereda buri cáteí le, Wabúreme?

Laríñaga joun.

—Le ñí lumuti lúgubu jiláali, ñíba jóúndaragua wadúbi.

18

Jémpulu tuáguti würi to jiláali túmari, lúma agúseragüdüti

1 Ába labájüdagun Jesúsu ában jémpulu joun, lun larífudajan joun luágu lúnti lan jayúmragun lun Búngiu súnwandan, láu gurásu.

2 Laríñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában gürígia.

3 Ñíñoun giñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun lichuguni tirícha tun luágu ában tuwúribun lúma tágani.

4 Luágu sarágu dan, májati yebe leténirun tun, lárigiñe, ába laríñagun lúngarügü. “Láu sun minében lan Búngiu nun, mebéresen áu láu ni ában,

5 quei nuján méme lan würi to ásüdagüda nichügü, neséfuraaru, jebé lámuga tiábin, gumú líñein nugúraasun.”

6 Ába laríñagun Jesúsu.

—Niján laríñagubei agúseragüdüti le wuríabei,

7 gúbumeti leséfuraña Búngiu lánigu ja ayúmuragutiña lun wéyuagu, áriebu. ¿Lúbei lubá líderaguniña?

8 Uá, madárasanbei. Láu sun le, dánme le nagíríbudun, áu le Wügüri Garaüwarügüti, ubouágun, ¿nadáriruba funásan afiñeni jádan gürígia ja yábaña, nuágu?

Jémpulu luáguti fariséo lúma agúburajati liseínsuna gumádi

9 Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janúgaña ámu gürígia quei ni cáta. Laríñaga.

10 –Ñüdütiña bián wügüriña témpulurugu ayúmuragua lun Búngiu, ában fariséo, ában agúburajati liseínsuna gumádi.

11 Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürígia –jíwerutiña, wuribatiña, salúfuriñe, mítaraantina giñe quei agúburajati liseínsuna gumádi le.

12 Ayúnaratina bián weíyaasu lídan dimáasu lun nagúnfulirun búma, rúnumuti giñe díisi gáwanün lidaangiñe ságü fiádürü le ebélurubei nun, bun.”

13 Ánjeinti agúburajati liseínsuna gumádi, ába leréderun díse, mabúseerunti ni lun liñúrini laríjin siélun, le luweírín lúnabun lanáangun lúngua. Aboujarügülei laníguagu láu igárigu, laríñaga. “¡Búngiu, gudémená bun, nugüya le gafígouti!”

14 Naríñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladüga le anáanguti lúngua weíri, ñúraübei lanügün, ánjein le ñúraübei lanáangun lúngua, weíríbei lanügün.

Labíniruniña Jesúsu irájüñü

(Mt 19.13-15; Mr 10.13-16)

15 Anaajouátiña giñe irájüñü lun Jesúsu lun lagúrurun jawágu, dan le jaríjinbalin dísipulugu cátei le, ába jadeínjan joun ja anáajabaliña irájüñü.

16 Ába laríñagun Jesúsu joun lun jasígirun anaájaña jarájüñü lun, ába laríñagun joun lánigu.

–Ígira jumá lun jayábin irájüñü nun, mewéridija jumá lueí, ladüga ja ítarabaña quei jagía, jagía lílanabaña larúeijan Búngiu.

17 Ninárün jáu luágu le lan merésibirun lumúti larúeijan Búngiu láu afiñeni jarúmati líbe jafiñen irájüñü, mebélubei lídoun.

Layánujan ában wügüri rísiti lúma Jesúsu

(Mt 19.16-30; Mr 10.17-31)

18 Ába lálügüdüni ában jádaangiñe ábutigu Jesúsu, laríñaga lun.

–Maésturu buíti, ¿ca lúnbei nadügüni lun gayára lan nibíjini íbágarí le magúmuchaditi?

19 Laríñaga Jesúsu lun.

–¿Ca uágu baríñaga nun “buíti”? Ában rügüñein buíti, Búngiu.

20 Subúdi bumúti gumádi. Maganoúabá túma würi gámaritu, máfarajabá, míwerujabá, mayéejabá luágu ni ában, inébe jamá bagübüriгу bun.

21 Laríñaga wügüri ligía lun.

–Gúnfulitina láu sun le lúmagiñe ñúraügidina.

22 Lídan le lagáambunbalin Jesúsu cátei le, ába laríñagun lun.

–Mégeigili ában cátei lun badügüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíríbudun, ábame hafálarunina.

23 Dan le lagáambunbalin wügüri ligía cátei le, ába lírudagun, ladüga rísiti buídu.

24 Dan le laríjini Jesúsu lírudagun, ába laríñagun.

—¡Jénreenguti lun jebélurun rísitiña lídoun larúeijan Búngiu!

25 Méreenguntimaati lun lásügürün ában caméyu lídaangiñe lujýun ában agúsa sügü láu lebelurun ában rísiti lídoun larúeijan Búngiu.

26 Ába jariñagun ja agáambubalin.

—¿Cáteiti gayáraabei lasálbarun?

27 Laríñaga Jesúsu joun.

—Le jásiñerubei gürígia adüga, gayára lumúti Búngiu, ladüga úati ni cáta siñáti lun Búngiu.

28 Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

29 Ába laríñagun Jesúsu joun.

—Nínárün jáu luágu furúmieguarügü lan le ígiruti lúban, o lagübürigu, o líbugañanu, o lamúlenu, o lúmari, o lirájüñü luágu larúeijan Búngiu,

30 libíjubatíma sarágu weíyaasu lougiñe lídan ubouú le, ibíjaleíme ibágari magúmuchaditi yágüta siélu.

Ladímurejaanya Jesúsu luágu louñwen
(Mt 20.17-19; Mr 10.32-34)

31 Ába lagúarun Jesúsu joun láni dúusu apóstolugu jábugua, ába laríñagun joun.

—Weíbuga Jerusalén guetó, le ñíba lubeí lagúnfulira sun le jabürújabei profétagu nuágu, áu le Wügüri Garaúwarügüti.

32 Jedéregerubadina joun ja mámabaña juríu, jéjerajaba náu, anába jamáname, suégua.

33 Jabeíchubadina, lárigiñeme, ábame jáfarunina jilágubei, áni násaaruba lídaangiñe ouweni luágu lürüwan wéyu lúnya nabágaridun.

34 Úati gunfaráanda jamá ni cáta lídaangiñe cáteí le, ibídiñegubeíti joun ca lan uágu ladímureja joun, darúguati laníchigu cáteí le laríñagubei, joun.

Lareídaguagüdüñ Jesúsu ában Jericóna maríjinti
(Mt 20.29-34; Mr 10.46-52)

35 Dan le achülüreinaali Jesúsu ubúrugin Jericó, ñíñein ában maríjinti ñun lárú üma amúriaja.

36 Dan le lagáambunbei maríjinti ligía já süüñan sarágu gürígia, ába lálügüdajan ca lan susérebei.

37 Ába jariñagun lun luágu niján lan Jesúsu Nazarétna ásügüra ñígiñe.

38 Ábati lagúaragun, laríñaga.

—¡Jesúsu, le ladügawagun David, gudémená bun!

39 Ja lubá lubáabaña, ába jadeñjan lun lun lámancinun, ligiatima lagúaragun.

—¡Ladügawagun David, gudémená bun!

40 Ábati laráramagun Jesúsu, ába louñajan anügei. Dan le yaráfaali lun, ába laríñagun lun.

41 —¿Ca babúseerubei nadügün bun?

Ába laríñagun lun.

—Nabúreme, buséntina naríjin.

42 Laríñaga Jesúsu lun.

—¡Ibájabei baríjin! Areídaguadibu ladüga bafíñen.

43 Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

19

Jesúsu lúma Zaquéo

1 Ábati lebélorun Jesúsu fulásurugun Jericó, ába lásügürün ubúrugugiñe.

2 Níñein ában wügüri rísiti, gíriti Zaquéo, jábuti agúburajatiña liseínsuna gumádi.

3 Buséntiti Zaquéo laríjini Jesúsu lun lasúbudiruni, siñátí laríjini ladüga ñúraüráuti lúgubu, áni gíbetiña gürígia.

4 Lúnti gayára lan laríjini, ába leíbaagun ubáraü, ába laweínrun tuágun ában tídibu wéwe sicómoro yaráfa lun le ñígiñeba lubei lásügúra Jesúsu.

5 Dan le lásügürün Jesúsu ñígiñe, ába laríjin íñun, ába laríñagun lun Zaquéo. —Zaquéo, raríba furése, ladüga lúnti neréderun búbiñe ugúñe.

6 Ábati larárirun Zaquéo furése, ába lerésibiruni Jesúsu lúbiñe láu ugúndani.

7 Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gafígounti.

8 Ábati laráramun Zaquéo, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubei luei ában gürígia láu eyéeraguni, nágyuyüdüba gádürü weíyaasu sügü láu lun.

9 Laríñaga Jesúsu lun.

—Sálbañu jáña tílana múna to ugúñe, ladügawagun gíñe Abrahám amürü.

10 Ligía niábinbei ubouágu, áu le Wügüri Garaüwarügüti, lun náluajaniña lúma asálbaraña já yebe féridijañabaña.

Jémpulu luáguti dísi murúsun seínsu

11 Dan le añája lubei gürígia agáambajei laríñaguni buri Jesúsu cátei le, ába labájüdagun ában jémpulu joun, ladüga ayárafadeinaali lan lun Jerusalén áni jarítaguatiñátí luágu lagúmesera lan larúeijan Búngiu dan ligía.

12 Ábati laríñagun joun.

—Níñein ában wügüri íñugutiña lidújeñu, leíbugati wügüri ligía lídoun ámu fulásu díseti lun líchugúniwa lurúeiteme lageíra, ábayame lagíribudun.

13 Lubáragiñe láfuridun, ába loúnajan jawágu dísi jádaangiñe lumúsuniña, ába ledégerun ában seínsu le gebégiti sarágu lun cáda ában, ába laríñagun joun. “Agárabaja jumei seínsu le darí nagíribudun.”

14 Queiti liyéreegunbei wügüri ligía joun lílana fulásu, ába jóúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme.

15 Láu sun líra, resíbiwati lun urúeime, ába lagíribudun lageíroun. Dan le lachülürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában.

16 Ába liábin le furúmiñeti, ába laríñagun. “Nabúreme, gáñeitina dísi weíyaasu ligíbuagun biseínsun.”

17 Laríñaga urúei lun. “Buíti, ában músu buíti bugúya. Quei úara bubei lídan le murúsunrügüti, níchigaadibu agúmadija lídan dísi fulásu.”

18 Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.”

19 Ába gíñe laríñagun lun. “Bagúmadija lídan seíngü fulásu.”

20 Ábati liábin ában, ába laríñagun. “Nabúreme, niján biseínsun, areída numúti tídan ában músue ladüga nanúfude buei,

21 ladüga ában ban wügüri derégüdati, reídeitibu láu cátei le mawádigimaritibu luágu, alúbaja amürü le ñí lumuti mábunagun ban.”

22 Ábati laríñagun urúei lun. “Músu wuríbati, luágu guánarügü berérun nagúseragüdábu. Quei subúdi bubálin luágu ában nan wügüri derégüdati, luágu reidei nan láu cátei le mawádigimaritina luágu, alúbaja áu le ñí lumuti mábunagun nan,

23 ¿cáti uágu míchububalin niseínsun báncürugun lun jamúga lagánwoundun dan le nagíríbudun?”

24 Ába laríñagun joun ja ñíbaña. “Gidájumei seínsu lueí, rújumei lun le díisibeí lúma.”

25 Ába jaríñagun lun. “Wabúreme, níjeinga díisi seínsu lúma.”

26 Ába laríñagun urúei. “Naríñajare jun luágu sun lan le adügati buíti láu le lúmabei, libíjuba lánwoun, ánjein le madügünti ni cáta buíti láu murúsun le lúmabei, lagídarúaba murúsun ligía lueí.

27 Játi náганиñu, já yebe mabúseerúnbaña lun urúei nan, barüjumaña ñájoun, áfaragá jumaña jílagubei nigíbugíñe.”

*Lebélorun Jesúsu Jerusaléoun
(Mt 21.1-11; Mr 11.1-11; Jn 12.12-19)*

28 Lárígíñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá.

29 Dan le chülü mémeeli lídoun buri fulásu le Betfajé lúma Betánia, yaráfa lun wübü le gíríbei Olívos,

30 ába laríñagun joun biáma jádaangiñe láni disípulugu.

—Jeíba lídan liraúraü fulásu le wagíbugíñebei, dánme le jachülürün ñi, jadáriruba ában burígü güráñu le maweínrúngili. Jafáragadeíme, ábame janügüni ñájoun.

31 Ánjaün álügüdüwa ca lan uágu jafáragadei, jaríñagame luágu busén láani Jabúreme.

32 Ába jóudin, ába jadáriruni ítara quei laríñaguni Jesúsu joun.

33 Dánti le añája lubeí afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

34 Ába jóunabuniña.

—Ladüga busén láani Wabúreme.

35 Ábati janügüni lun Jesúsu, ába jíchugunun janáangun lanágawagun burígü, ába jaweínragüdüni Jesúsu luágun.

36 Quei awáansereina lan Jesúsu, átulejeina jamóun janáangun luágu üma lubá.

37 Dan le jayárafadun lun larárirún wübü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigin Búngiu, luágu buri miláguru le jaríjibeí.

38 Jaríñaga.

—¡Biníwati urúei le ñúbinbei lídan líri Wabúreme Búngiu! ¡Níjein ñurúguau siélu, lúma uweírigu lun Búngiu!

³⁹ Ábati jaríñagun fariséogu ja ñíbaña jádan gürígia lun.

—Maésturu, aríñagabá joun bánigu lun jámanichun.

⁴⁰ Laríñaga Jesúsu joun.

—Nínárün jáu luágu ánjaña lan ámanichaja ja, lagúarajaba lán buri dúbü nuágu.

⁴¹ Dan le layárafadun lun Jerusalén, dan le laríjini ubúrugu ligía, ába layájuagan jawágu lílana fulásu ligía, laríñaga.

⁴² —¡Lun jamúga gunfaráanda jumáni uguñe luágu áu lan ñmabei lun ñurúguau jun, buíti jamúga! Májatün.

⁴³ Ligía lachúlürüba lubei wéyu buri wuríbati jun, jadügame jáganiñu ában baríeru geyégu láu jubúrugute lun siñá lan jáfuridun ñígiñe, ábame jageíndagun júma lídaangiñe sun oúbaü.

⁴⁴ Jagünrinchagubei jufúlasun le gumúti, mígirunbaña ni ában dúbü ligíbuagu dúbü, jáfarúaba sun jugúya, ladüga mebéresen jumá láu óra le liábinbei Búngiu asálbaraün.

Larúmadagüdünnun Jesúsu témpulu

(Mt 21.12-17; Mr 11.15-19; Jn 2.13-22)

⁴⁵ Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi.

⁴⁶ Laríñaga joun.

—Laríñajare tídan Lerérun Búngiu. “Núban, fulásu le ñí lubei gayára lan jayúmragun gürígia nun”, ánjein jugúya, barújumaaru quei jában jíwerutiña.

⁴⁷ Ságü buri wéyu larúfudajan Jesúsu témpulurugu, añájati jábutigu jafádirigun juríu jáma arúfudajatiña lílürudun Moisés, jáma gíñe lábutigu fulásu áluaja ída lúba lan jáfaruni jílagubei,

⁴⁸ madáritiña ída lúba lan jadügüni ladüga weíri lan jórabajoúniwa sun gürígia lun jagáambuni lerérun.

20

Lirícha Jesúsu témpulurugu

(Mt 21.23-27; Mr 11.27-33)

¹ Luágu ában wéyu, dan le témpuluruguñein lubei Jesúsu arúfudaja joun gürígia, apúrichíjei ugánu luáguti asálbaruni, ligía jayábin jábutigu jafádirigun juríu, jáma arúfudajatiña lílürudun Moisés, jáma wügüriña weírigitíña lídan jafíñen juríu,

² ába jaríñagun lun.

—Aríñagabeí woun ca lan biríchabei lun badügüni cátei le. ¿Ca íchugubalin ubáfu le bun?

³ Ábati laríñagun Jesúsu joun.

—Nálügüdáadün gíñe ában cátei, oúnaba jumána.

⁴ ¿Ca oúnabajalin Juan abásteragüdjaja? ¿Loúnajan Búngiu ódi jóunajan wügüriña?

⁵ Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu maffínerun wabei lun.

⁶ Ánjawa aríñaga luágu jóúnajan lan wügüríña, jachámuraguba güriúa dübü wawágun, ladüga choúru jamúti luágu proféta lán meja Juan.

⁷ Ábati jaríñagun luágu ibídiñe lan joun ca lán meja óúnajabalin Juan abásterágüdjaja.

⁸ Ábati laríñagun Jesúsu joun.

—Maríñagun nubeí gíñe jun ca lan áu ubáfu nadügei buri cátei le.

Jémpulu jawáuti ñadágimeintiña wuríbatíña

(Mt 21.33-44; Mr 12.1-11)

⁹ Ába lagúmeserun Jesúsu adímureja joun güriúa, ába labájüdagun ában úraga le gibebei laníchigu, joun. Niján úraga ligía.

—Ñíñein meja ában wügüri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan.

¹⁰ Dan le lachülürün lidáani alúbajani, ába loúnajan ában lumúsun anügei lufánran, ába jabúleseiruni ñadágimeintiña músu ligía, ába jóúnajani lárigoún, míchugunga ni cáta lun.

¹¹ Ábayati loúnajan ábanya músu, ába gíñe janábuni, buleísei jameí, óúnaja jameí, míchugunga ni cáta lun.

¹² Ábaya loúnajan ábanya, ábaya gíñe jabúleseiruni, ába jabúguni ñígiñe.

¹³ ‘Ába laríñagun labúreme ichári lúnguarügü. “¿Cábasán funa nadüga? Noúnajaali niraú le jínsiñebei nun, dánme le jaríjini, fágua inébebei joun.” Ába loúnajani.

¹⁴ Dan le jaríjinalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.”

¹⁵ Ábati jaságaruni lídaangiñe fulásu ligía, ába jáfaruni jilágubei.

Ábati lálügüdjagan Jesúsu, laríñaga.

—¿Cábatí ladüga labúreme ichári?

¹⁶ Líábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

¹⁷ Ába laríaguniña Jesúsu, ába laríñagun joun.

—¿Cáti lilabei le búrtñubei tídan Lerérun Búngiu le ñí lubei laríñaga.

Lé meja dübü le mabúseerun jabeí ábunagutiña, ligíaali furúmiñeti?

¹⁸ Furúmieguarügü le achúgeraguti luágu dübü ligía lagünrinchaguba, léti uágunti láburuja, labúrechagúbei. Áu dübü ligía.

Luáuti liseínsuna gumádi

(Mt 21.45-46, 22.15-22; Mr 12.12-17)

¹⁹ Lidán meme óra ligía, ába jálugun jábutigu jafádirigun juríu jáma arúfudajatiña lilúruden Moisés járügüdüni Jesúsu, ladüga jasúbudiruni luágu jawáuti lan jémpulu le laríñagubei, madügün jamúti ladüga janúfude jaweí güriúa. Ábati jagúrabajan ámu dan.

²⁰ Ábati jóúnajan güriúa ja ásügürütíña jóungua camá jamuga jarúmatíña lun jaríaaajani Jesúsu, lun jaríñagagüdüni cátei le gawáuti gayára lan jíchugun lidúnrun lun jedéregeruni lun gumádimati.

²¹ Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabei, manúfudetibu gíñe lueí ni ában, ladüga ni cáta lan luweirigun güriña bun, áni láu inárüni barúfudajei lémeri Búngiu.

²² Aríñagabá ában cátei woun. ¿buíti lun lafáyeijouñ seínsu lun warúeite César ódi mabuídunti?

²³ Ába lasúbudiruni Jesúsu luríban jarítangun, ába lariñangun joun.

—¿Ca uágu jabúseera jíchugun sádara nubá?

²⁴ Arúfuda jumá ában lídaangiñe seínsu ligía nun. ¿Cá iyáwa lúma íri le bürüñubei luágu?

Jaríñaga lun.

—Láni César.

²⁵ Ábati lariñangun joun.

—Le láni César rújumei lun César, le láni Búngiu rújumei lun Búngiu.

²⁶ Siñá jamútiti áburugüda tídoun jasá daran láu lé buri lariñagubei jagíbugiñe güriña, weírirügüti janígi láu loúnabagüle joun. Ába jámanichun.

Álügüdjani lübügürü ásaaruni lídaangiñe óuweni

(Mt 22.23-33; Mr 12.18-27)

²⁷ Láriñe, ába jóúdin saduséogu aríjei Jesúsu. Jaríñajare saduséogu luágu másaarunbaña lan jiláaña lídaangiñe óuweni lúnya jabágaridun. Ábati jaríñangun lun Jesúsu.

²⁸ —Maésturu, lariñajare Moisés woun tídan lilíburun, luágu ánjein lan óuwe ában wügüri, ába lígirunun lúmari marájüñüga ligia táu, lúnti lan lamárieidun lamúlen túma lun garájüñü lan táu, gadügawagun lámuga líbugaña le óuwebei.

²⁹ Wel, ñíñanu mejáti sédü wügüriña gamúlenuguátiña, ába lamárieidun le furúmiñeti, ába loúnwen marájüñüga.

³⁰ Ába lamárieidun le jabíaman túma buga lúmari íbugañaü, ába gíñe loúnwen marájüñüga.

³¹ Ábati lamárieidun le jürüwan túma, chülü lúmoun le jasédün, jilágua meme jagía, marájüñüga táu.

³² Ába gíñe toúnwen würi tugúya.

³³ Aríñagabá ában cátei woun. dánmeti le jásaarun lídaangiñe óuweni lúnya jabágaridun, ¿cábati úmari würi to jádaangiñe, quei maríei tubeí jáma sédügubei?

³⁴ Ába lariñangun Jesúsu joun.

—Lídan ubou le, maríeitiña wügüriña jáma würiña,

³⁵ ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe óuweni lúma lun jebélurun siélu agánawa ñi lun sun dan. Magámaridubaña ñi, míchaajan jamáñame jarájüñü lun maríei,

³⁶ ladüga mouñwendügüyaaña güriña siélu, itaraañame quei ánjeligu, lirájüñü jañáme Búngiu ja saráaña lídaangiñe óuweni.

³⁷ Moisés guánarügü arúfuda lumúti luágu níjein lan ásaaruni lídaangiñe óuweni lídan le labürüjanbei luágu búbugati geméti. Lariñajare ñi luágu Búngiu lan Lubúngiutebei Abrahám, Isáac lúma Jacób.

³⁸ Láu dimúrei ligía, arúfuda lumúti Moisés luágu wíñwangiña lan Abrahám, Isáac lúma Jacób, láu sun jilá lan jágubu, ladüga máma Jabúngiute jiláaña Búngiu, Jabúngiute ja wíñwangiñabaña. Wíñwangiña lanügüniña Búngiu sun güriña.

³⁹ Ábati jaríñangun arúfudajatiña lilúrudun Moisés.

—Buíti baríñaguni, Maésturu.

⁴⁰ Ába málügüdagun jamáli lan.

*¿Ladügawagunsan Davíd Crístu?
(Mt 22.41-46; Mr 12.35-37)*

⁴¹ Ába lariñagun Jesúsu joun.

—¿Ída liñásan jariñagunbei luágu ladügawagun lan Davíd Crístu?

⁴² Lariñajare Davíd guánarügü títan líburu to gíríbouton Sálmos.

Ariñagati Búngiu lun Nabúreme. “Ñurúba lueígiñe nouñwenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladügawagun lan Davíd Crístu, áni aríñagati Davíd guánarügü lun Crístu “Nabúreme”?

*Ladárirun Jesúsu jadúnrun arúfudajatiña lilírudun Moisés
(Mt 23.1-36; Mr 12.38-40; Lc 11.37-54)*

⁴⁵ Ñiñanu sarágu gürígia agáambajei Jesúsu, ába jagáambun lariñagun joun láni disípulugu.

⁴⁶ —Toúnigigua jumá júngua jaweí arúfudajatiña lilírudun Moisés, ganígitiña jeíbugun táu anáanguni durúrutu, busén jagía lun labúsúrún joun láu inébesei úmadarugu, áluaja jameí ubáraü le jabára weírigitíña títan liglísi, lúma lubuídun-ágei ubáraü lídan eíginí.

⁴⁷ Gidá jamutu gíñe jában wúriña ja jiláaña úmari jaweí, lúnti jadáuragun láu, ába jadügün furíeigi migínaguti. Weíríbei jasúfurirun luágu sun le jadügübei.

21

*Seínsu le tíchugubei ában fugiábu wúri témpulurugu
(Mr 12.41-44)*

¹ Ába larijin Jesúsu jíchaajan rísitiña seínsu tídoun buri gáfu to lágei seínsu témpulurugu,

² aríja lumúti gíñe tíchugun ában wúri jiláali túmari, gudémetu, bián gáwanün tídoun gáfu.

³ Ába lariñagun Jesúsu.

—Ninárün jáu luágu gíbetima lan tíchugun fugiábu wúri to sügü jáu súngebúi, ladúga sun jagía, lídaangiñe le ígiragubei jáma jíhiga,

⁴ añjoun tugúya, láu tugúdemeğun tíchigei sun le túmabei lún yebe tawínwandun.

*Lariñagun Jesúsu luágu tagünrinchawagúba lan témpulu
(Mt 24.1-2; Mr 13.1-2)*

⁵ Jadímurejaña fiú gürígia tuágu témpulu, luágu tubuídunmeraü láu lubuídun buri tidúbüri lúma buri cátei le jíchugubei gürígia lun tawéndedun. Ábati lariñagun Jesúsu.

⁶ —Lachülürüba wéyu lun lagünrinchawagún sun le jariágubei tuágu témpulu to guetó, merédebei ní ában dübü ligíbuagu dübü.

*Seíni buri lubá lagúmuchun ubouí
(Mt 24.3-28; Mr 13.3-23)*

⁷ Ábati jálügüdüni, jariñaga lun.

—Maésturu, ¿ídamé san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jariñagame. “Áu Crístubei”, “Niján dan ligía.” Mafíñera jumá joun, mafálara jumáña.

⁹ Dánme le jagáambun ladímurejoún luágu awúribujani lúma jawágu gürígia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun uboú líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu.

¹¹ Ñíbei oúnwenbun buri jarabaganáli, ilámaü, sándi, lídan ámuñegueinarügü fulásu, larijúba buri cátei janúfunati siélu lúma oúnwenbun buri seíni.

¹² Lubáragiñe lasúseredun sun le, járújoüba, eibaajoüa jugúyame. Janügüba agúsera tídan jalígilisin juríu, jádarawagüba furísunrugun, barüwa jugúyame jagbugiñoún urúeigu jáma gumádimatiña, nueígiñe, lun jagúseragüdünün,

¹³ ligíame jidáani lun jadímurejan luágu nufúleisein.

¹⁴ Aráanse jumei jarítangun lun madíjeri jumá cába lan jariñaga jueígiñegua,

¹⁵ níchuguba dimúrei lúma lichú áu jun le lásíñerun ní ában jádaangiñe jáganiñu asígenera ní oúnaba.

¹⁶ Jalúgurubadün jagúbürigu guánarügü, jibugañanu, jamúlenu, jidújeñu, jumádagu. Jáfarüba jidaangiñe,

¹⁷ jiyéreeguduba joun sun gürígia, nueígiñe.

¹⁸ Lídaanme sun líra, latoúnigirubadün Búngiu le gumúti,

¹⁹ áni ánjaün meme derégüdagua lídan jafíñen nuágu, jibíjibeí ibágarí magúmchaditi.

²⁰ Dánme jaríjin geyégua jamá lan súdeara ubúruğu Jerusalén, subúdi jumei luágu yaráfaali lan lagünrinchagun ubúruğu ligía.

²¹ Jámeti gürígia ja Judéabaña, lúnti janúrajan luágun buri wúbü, ja ubúrugubaña Jerusalén, lúnti jáfuridun ñígiñe, ja áraabubaña, magíribuda jamá ubúrugun.

²² Luwéyuri buríbei jafáyeirun gürígia luágu wuríbati le jadügübei, dánme le lagúnfulirún sun le bürüwañubei tídan Lerérun Búngiu.

²³ ¡Fugiábugume würíña ja dageínatiña lídan dan ligía, o ja lan garájñütiña ja gurágiña! Ladüga ñíbei sarágu igárigu uboúagu, larúfudubei Búngiu luweírin ligáñi luágu jafígoun gürígia ja juríu.

²⁴ Ñíbaña ouwegutiña wuríburugu, jíbiri janáawaguba adáürawagua lídoun ámu ageíraü, ábame jagünrinchaguni ja mámabaña juríu ubúruğu Jerusalén daríme lagúmuchun dan le íchugübei joun lun jadügüni.

*Ligáburi ída lúba lan liábin Crístu
(Mt 24.29-35, 42-44; Mr 13.24-37)*

²⁵ Lasáliragubáti buri seíni luágu wéyu, luágu játi lúma jawágu warúguma, ábame laweíridun janígi néchaanigu uboúagu, ábame janúfudedagun luágu lanáreme lajúujan lúma laboúnjan lugúdi barána.

²⁶ Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladüga járügüdüba lan warúguma ámu üma.

²⁷ Ábameti larijín niábin, áu le Wügüri Garaüwarügüti, lídan juánriñu láu sun nubáfu lúma oúnwenbun nuweírigun.

²⁸ Dánme le lagúmeserún buri cátei le asúsereda, ragüjuma dügüdaguaü, iñúra jumeíme jichügü, ladüga madíseelime jasálbarun.

²⁹ Rúlumuti giñe jémpulu le joun.

—Arija jumoún tídibu ígo, o furúmieguarügü tídibu wéwe.

³⁰ Dan le jaríjin laboučhun tubána, subúdi jumúti luágu yaráfaali lan lidáani lubáchouga.

³¹ Dánme giñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³² ‘Ninárün jáu luágu lagünrinchawagúba lan sun ubúruğu le Jerusalén lubáragiñe jóúwegun güriğa ja lánina dan le.

³³ Lagúmuchaguba siélu lúma ubouú, ánjein nerérun, ladúraruba lun sun dan.

³⁴ ‘Toúnigi jumá, mígira jumá lun tabuínchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina ibáğari le, márügüdün lámugaün wéyu nagiribudagüle ubouúagun lídan magáradajan jumá,

³⁵ quei ában sáđara to adárurutu. Ladüga ítara lúba liábin wéyu ligía jawágun sun ja aganoúbaña lídan sun fulásu ya ubouúagu.

³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun giñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, árieibu, ábaja lídin erédera luágu wúbü le Olívos.

³⁸ Ábaja chülügiñe jamá güriğa témpulurugun ságü bináafin lun jagáambuni.

22

Jelédegun áganiñu lubá Jesúsu

(Mt 26.1-5, 14-16; Mr 14.1-2, 10-11; Jn 11.45-53)

¹ Yaráfaali fédu le lidáani teiginiwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjei áfaraguaña jígirama Ejíptona, máfaragun lumútiña jígirama Israélitagu.

² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, ibídiñounga joun güriğa, ladüga janúfude jaweí.

³ Ábati lagáñeiruni Máfia larítagun Júdas Iscarióte, le ában jádaangiñe láni Jesúsu dúusu apóstolugu,

⁴ ába lídin adüga darádu jáma jábutigu jafádiríñegu juríu jáma jábutigu tisúdaarana témpulu lun ledéregeruni Jesúsu joun.

⁵ Ába jagúndaaragun, ába jaríñagun lun Júdas luágu jíchuguba lan seínsu lun,

⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá güriğa.

Lagúmujoún leígin Jesúsu jáma lánigu

(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachülürün fédu le ídaanbei teigüa fein magánatu ísi, ñí lubei giñe ladágarawagüdüwa mudún le lánina fédu.

⁸ Ába laríñagun Jesúsu lun Pédro lúma Juan.

—Jeíba aráanserei eígin le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Laríñaga joun.

—Dánne le jebélurun ubúrugun, jadúnraguba lúma ában wügüri táu ában dináa láu dúna, jafálareime chülü tidoun múna to ñjin lumúti lebélera.

¹¹ Jaríñagame lun tabúreme múna. “Laríñajare Maésturu. ¿Jigóun rúmu to ñí lubei gayára lan neígini eígini le lánina fédu jáu náni disípulugu?”

¹² Ábame larúfudun ában rúmu weírutu jun tougíñegua múna, aráanseñu tíña, jaráansereime eígini ñi.

¹³ Ába jóudin, ába jadáriruni sun cátei quei laríñaguni Jesúsu joun, ába jaráanseruni eígini lánina fédu ñi.

¹⁴ Dan le lachülürünbei óra, ába lañúurun Jesúsu jáu láni disípulugu luágu dábula,

¹⁵ ábati laríñagun joun.

—¡Oúnwenbun nabúseerun neígini eígini lánina fédu le júma lubáragiñe nouñwen!

¹⁶ Ladúga naríñajare jun luágu meígindügüya náali lan eígini lánina fédu le daríme lagúnfulirún lanichigu lídan larúeijan Búngiu.

¹⁷ Ábati lanügün ában wéru táu diweín lújaburugu, ába leteíngiruni Búngiu, laríñaga.

—Barújumei le, fánreingua jumei jídaangua,

¹⁸ naríñajare jun luágu mákundügüyaadina lan diweín daríme liábin larúeijan Búngiu.

¹⁹ Lárigiñe, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adúga jumei le, jarítaguagüleme nuágu.

²⁰ Ítara meme giñe, lárigiñe jeígin, ába lanügüni wéru táu diweín, ába laríñagun.

—Niján níta le lúnbei láwiyurun lídaangiñe núgubu juágu, lun lañúurun iséri darádu.

²¹ Niján wügüri le lúnbei ledéregerunina wáma ya luágu dábula,

²² luáguñadina úma le lúnbei nanügüni, áu le Wügüri Garaúwarügüti, áni ¡fugiábutia wügüri le lúnbei lalúgurunina!

²³ Ábati jagúmeserun álügüdagua jádaangua cába lánfuna alúgurei.

Ladímurejóun luágu cába lan weírigutima

²⁴ Ába jasígenejan lánigu luágu cába lan jádaangiñe weírigutimá.

²⁵ Ába laríñagun Jesúsu joun.

—Lídan arúejani lánina ubou le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügüriña jamá ja gadügatiña fuleísei joun gürigia.

²⁶ Anjein lídan narúeijan, mítaraanti, lubáragiñe líra, le weírigutimaabei le tímátimaati jídan lúnti lanáangun lúngua quei le únabutimaabei, le agúmadijabei, lúnti ítara lan quei le esériwijabei.

²⁷ ¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸ Jugúya úarabañája núma lídan nouchawagun,

²⁹ ligía níchugunbadün lun jarúeijan quei líchugunina Núguchi lun narúeijan.

³⁰ Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadügawagun dúusu lirájüñü Israél.

Lariñaguni Jesúsu luágu leyéedaguba lan Pédro láu
(Mt 26.31-35; Mr 14.27-31; Jn 13.36-38)

³¹ Ariñagati giñe Wabúreme Jesúsu.

—Simón, Simón, amúrijaali Máfia üma lúma Búngiu lun gayáraabei lan louchagunün quei lawánijoún türígu,

³² ibíja lumúti, áni ayúmuraguaadina buágu lun Búngiu lun meféridirun báani bafiñen nuágu lídaanme óra ligía. Áni dánme le bagíribudun nun, rúba dügüdaguaú joun bíbirigu.

³³ Lariñaga Simón lun.

—Nabúreme, aráansetina lun nídin búma furísunrugun, o lun lan nouñwen búma.

³⁴ Lariñaga Jesúsu lun.

—Pédro, ugúñe méme, beyéedaguba náu ürüwa weíyaasu lubáragiñe layúgurujan gáyu, bariñaguba luágu ibídiñe nan bun.

Layárafadun lórate Oúchawaguni

³⁵ Ábati lariñagun Jesúsu joun.

—Dan le nouñajanbalün maságüteiga, ni láu lágei seínsu, ni geídi, ¿ñiñein funági jemégeirun?

Ába jariñagun.

—Uá Maésturu, memégeiruntiwa ni cáta.

³⁶ Ábati lariñagun joun.

—Ánjeinti guetó, le gaságüteti, barüloun, barü ligíame lágei seínsu, le mefeínteti, alúguraloún labíte lun lagáñijan lefeínte, ladüga wuríbati dan le.

³⁷ Naríñajare jun luágu lagúnfuliruba lan le taríñagubei Lerérun Búngiu nuágu. “Ába jabájüdüni jádan wuríbatiña.” Sun le бүрүwаñubei nuágu lagúnfuliruña guetó.

³⁸ Ábati jariñagun.

—Wabúreme, nuján bián efeín ya.

Ába lariñagun joun.

—Buíti.

Layúmuragun Jesúsu Getsemaní
(Mt 26.36-46; Mr 14.32-42)

³⁹ Ábati láfuridun Jesúsu, ába lídin luágun wübü le Olívos quei ligáburiñaja, ába jóudin láni disípulugu lúma.

⁴⁰ Dan le jachülürün lídan fulásu ligía, ába lariñagun joun.

—Jayúmuragua, meféridirun jumámugei jafiñen nuágu.

⁴¹ Ába ladisedun Jesúsu jaweí murúsunraü, ába lájuduragun ayúmuragua lun Búngiu,

⁴² lariñaga.

—Núguchi, ánjabu busén, séfu bána lueí ouñwenbun asúfuriruni le lúnbei nasúfurirun, madügüwalá le nabúseerubei, le la babúseerubei adügüwa.

⁴³ Ábati liábin ában ánjeli siéluigiñe lun líchugun érei lun.

44 Dan létima laweíridun ligárigu, ligíatima layúmuragun láu érei, lédedejati lísüga lueí camá jamuga oúnwenbun lédedejan jítaü, múarugun.

45 Dan le lásaarun lídaangiñe layúmuragun, ába ladáriruniña disípulugu arúmuga, larúmagüdün íruni.

46 Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

Janügüni Jesúsu adáüra

(Mt 26.47-56; Mr 14.43-50; Jn 18.2-11)

47 Nígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúuruni.

48 Ábati laríñagun Jesúsu lun.

—Júdas, ¿láu ában chúuti balúgurana, áu le Wügüri Garaüwarügüti?

49 Játi lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

50 Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren.

51 Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun.

52 Ába laríñagun joun jábutigu fádorigu, joun wügüriña weírigitüña lídan jafíñen juríu, lúma joun jábutigu tisúdaarana témpulu, ja ñübinbaña anügei.

—¿Jiábin nuágu táu efeín lúma wéwe camá jamuga jíwerutina?

53 Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadügüni jugúndan náu, óraali lun lagúmadijan le labúremebei lubúriga.

Laríñagun Pédro luágu ibídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

54 Ábati jarügüdüni Jesúsu, ába janügüni lúbiñoun fádiri le íñutimaabei, ábati lafálaruni Pédro dísegiñe.

55 Ába jáfuragun wátu ñi lamídaangua baríeru, ába jañúurun geyégu láu, ába giñe lañúurun Pédro jádan.

56 Queíti taríjini ában músu ñun larügürügü wátu, ába teréderun aríaguei, ába taríñagun.

—Lúmañein buga giñe Jesúsu gürígia le.

57 Ába leyéedagun Pédro, laríñaga.

—Ibídiñeti wügüri ligía nun.

58 Murúsun lueígiñe, ábaya laríjini ában, ába laríñagun.

—Jánigu giñe amürü.

Ába laríñagun Pédro.

—Máma jánigu áu.

59 Queí buri ában óra lárigiñe, ábaya laríñagun ában.

—Inárüni luágu lúmañajañein lan wügüri le ladüga Galiléana giñe.

60 Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu.

⁶¹ Ába ladígiragun Wabúreme Jesúsu aríja luágun Pédro, ába larítagun Pédro luágu lé buga laríñagubei Jesúsu lun. “Lubáragiñe layúgurujan gáyu uguñe, beyéedaguba náu úrúwa weíyaasu.”

⁶² Ábati láfuridun Pédro, ába layájun láu igárigu.

Jéjerajan láu Jesúsu

(Mt 26.67-68; Mr 14.65)

⁶³ Ja wügüríña ja oúnigirubalin Jesúsu, ába jéjerajan láu, bei jameí.

⁶⁴ Ába jagúraguni lágu, ába jagáyuajan ligíbuagun, aríñageina jagía.

—¡Bugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu

(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába jóundaragun wügüríña weírigutiña lídan jaffñen juríu, jábutigu jafádirigun juríu, jáma arúfudajatiña lilúrudun Moisés, ába janügüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabeí woun, ¿amürüsan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágu ánja lan, mafiñebadün nun,

⁶⁸ ánjaün nálügúdagua, moúnabun jubádina, migiragüdün jumáname.

⁶⁹ Naríñaga ában cátei jun. lúmagiñe guetó, nañúuruba, áu le Wügüri Garaúwarügüti, lueígiñe loúnwenren Búngiu le Súnti Gabáfuti.

⁷⁰ Ábati jálügüdüni súngubei.

—¿Amürü lubeíti Liraúbei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

Jesúsu ligíbugiñe Piláto

(Mt 27.1-2, 11-14; Mr 15.1-5; Jn 18.28-38)

¹ Ábati jásaarun sun líñun-ágei lúrudu, ába janügüni Jesúsu ligíbugiñoún Piláto,

² ába jagúmeserun íchiga lidúnrun, jaríñaga.

—Darí wamaali wügüri le achágaraguágúdaña gürígia, laríñajare luágu moun lan lun wafáyeijan seínsu lun urúei Rómána, aríñagati giñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

³ Ábati laríñagun Piláto lun.

—¿Amürüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri gürígia.

—Madáritina dúru luágu wügüri le.

⁵ Ábatima jariñagun jére.

—Lacháraguagüdüñanu sun güriá Judéana láu ligáburí larúfudajan, lagúmesera Galiléagiñe, niján mémegua adúgei chülú ñájoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügüdajan ánjein Galiléana lubeí wügüri ligía.

⁷ Dánti le jariñagun lun luágu Galiléana lan, ába loúnajani lun Heródes, le gumándan Galiléa, ladüga ñiñein Heródes Jerusalén lídan dan ligía.

⁸ Ába lagúndaaragun Heródes dan le laríjini Jesúsu, ladüga agáambañajaali lan luágu áni lüja labúseerun laríjini, agúrabatiti laríjin ladügün ában milágu.

⁹ Ába lálügüdagani luágu sarágu cátei, moúnabunti Jesúsu ni cáta.

¹⁰ Ñiñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun.

¹¹ Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anáanguni wéndegutu quei lanáangun urúei, ábaya loúnajani Heródes lun Piláto.

¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen

(Mt 27.15-26; Mr 15.6-15; Jn 18.39-19.16)

¹³ Ábati loúndaruniña Piláto jábutigu fádirigu jáma lúrudugu, jáma buri ámu güriá,

¹⁴ ába laráñagun joun.

—Jugúya anügübalin wügüri le nun, jariñaga luágu chagáguagüda láníña güriá, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jariñagubei luágu.

¹⁵ Madáriti giñe Heródes lidúnrun, giríbugüdalá woun. Aríja jumáali luágu madügün lan ni cáta le lúnti lafarún jilágubei lueígiñe,

¹⁶ nabeíchagüdali lubeíti, lárigiñeme, ábame nígiragüdüni.

¹⁷ Gagáburititi Piláto lúnja lígiragüdüni ában adaürüti fédurugu,

¹⁸ ába jagúarajan súngubei lídan ában.

—¡Áfarabeí le! ¡Ígiragüdebeí Barabási!

¹⁹ Barabási ligía, ladaürüña lueígiñe ligía lan ában jádaangiñe ja iñúragubaña jóungua luágu gumádi, lúma lueígiñe láfarajan.

²⁰ Busénti yebe Piláto lígiragüdüni Jesúsu, ábaya ladímurejan joun,

²¹ ligiatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába laráñagun Piláto joun luágu lürüwan weíyaasu.

—¿Cáti wuríbati ladügübei? Madáritina ni cáta le lúnti lafarún jilágubei lueígiñe. Nabeíchagüdali, ábame nígiragüdüni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei.

²⁴ Ábagubeíti ladügüni Piláto le jabúseerubei,

²⁵ ábati lígiragüdüni wügüri le jabúseerubei, le adaürübei lueígiñe iñúraguni lúma áfarajani, ábati ledéregeruni Jesúsu joun lun jadügüni jagúndan láu.

Ládarawagún Jesúsu luágu gurúwa
(Mt 27.32-44; Mr 15.21-32; Jn 19.17-27)

²⁶ Dan le jóúdiña lan láu Jesúsu lun ládarawagún luágu gurúwa, ába járügüdün ában wügüri Cirénena giriti Simón, liábiña áraabugíñe, ába janúgagüdüni gurúwa lun, ába lídin láu lárígi lárígi Jesúsu.

²⁷ Sarágu jáña gürígia afálaruti jáma sarágu würiña jádan ayájuajeina, agúarajeina láu írúni luágu.

²⁸ Ába ladígiragun Jesúsu jawágun, ába lariñagun joun.

—Würiña Jerusalénna, mayájua jumá nuágu, jayájua juoúgua lúma jawágu jirájüñü,

²⁹ ladüga liábinba buri wéyu dánme le lariñawagún. “Fuleíseiwatiña ja siñábei jagáraüdüni jáma gíñe ja marájüñüjañábaña, jáma ja mátagüðajanbaña.”

³⁰ Ábamei jaríñagun gürígia lun wübü íñuti. “Áburujabá wawágun”, aríñaga jagíame lun wübü únabuti. “Darúguabá wáu.”

³¹ Ladüga ánjein adügajabalin sun le láu tídi bu wéwe le düdügili, çábaga madügün jamá láu le mábejali? (Ítara líña ladímurejan luóúgua, le madúnrunbei, lúma jawágu ja gadúnrunbaña.)

³² Barütiña gíñe biáma gadúnruntiña lun jafarún úara lúma Jesúsu.

³³ Dan le jachülürünbei lídoun fulásu le gíribei Lufúlasun Lábu Ichügü, ába jádaraguni Jesúsu luágu gurúwa jáma gíñe biáma wuribatiña jagía, ában lueígíñe loúnwenren, ában lueígíñe lubáüna.

³⁴ Dánti le añája lan ádaraguei Jesúsu luágu gurúwa, ába lariñagun.

—Núguchi, ferúduna báña ladüga ibídiñeti joun ca lan jadügübei.

Ába jájurerun súdeara ubúnuruni lun jaríjin cába lan un jádaangiñe terédera lanáangun Jesúsu.

³⁵ Níñanu gürígia aríagua, níñanu gíñe lúrudugu jéjerajaña láu, jaríñaga.

—Sálbati ámu, sálbagonalá gíñeti lúngua, ánjein inárüni lubei luágu ligía lan Crístubei le lanúadirubei Búngiu lun lasálbaruniña gürígia.

³⁶ Éjerajatiña gíñe súdeara láu, láu jayárafadun íchiga tagübüri diweín lun lun látunun,

³⁷ jaríñaga buri lun.

—Ánjein Jarúeite bubei juríu, sálbaguabá búngua.

³⁸ Níñeinti ában abürüjóuni lougíñe lichügü, lariñajare ñi. “Niján Jarúeite Juríu.”

³⁹ Ába lanábuni ában jádaangiñe wuribatiña ja dáwagubaña luágu gurúwa ñi Jesúsu, lariñaga.

—Ánjein bugúya lubei Crístubei, sálbaguabá búngua, sálba báwame.

⁴⁰ Ába ladeínjan le ában lun louba, lariñaga lun.

—çManúfudetibusan luei Búngiu, bugúya le lábugíñebei ában meme súfuri lúma?

⁴¹ Wagía, garíchatywa lun wasúfurirun ladüga wafáyeijaña luágu wadüga, ánjeinti wügüri le, madügünti ni cáta wuribati.

⁴² Ábati lariñagun.

—Jesúsu, barítaguame nuágu dánme le lagúmeserun barúejan.

⁴³ Lariñaga Jesúsu lun.

—Ninárün báu luágu númabadibu lan siélu, ugúñe méme.

*Loúnwen Jesúsu**(Mt 27.45-56; Mr 15.33-41; Jn 19.28-30)*

44 Amídirugu, ába labúrigadun sun fulásu darí ladaúnrun ürüwa rábounwéyu.

45 Ába labúrigadun wéyu, ába tajeíridagun tubélun témpulu tamídan túmagua.

46 Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

47 Dan le laríjnbalin jábuti súdaara Rómána le asúseredubei, ába ladímurejan weírugu luágu Búngiu, laríñaga.

—Inárüni, madúnrunti buga wügüri le.

48 Sun gürígia ja ñibaña, ja aríjubalin le asúseredubei, ába jóudin ñígiñe, áfarajeina jamei janíguagu, le jagárigu.

49 Ánjaña sun lumádagu Jesúsu jáma giñe würiña ja ñübinbaña úara lúma Galiléagiñe, ába jeréderun díse aríjei buri cátei le.

*Labunún Jesúsu**(Mt 27.57-61; Mr 15.42-47; Jn 19.38-42)*

50 Ñíñein ában wügüri gíriti José, lídaangiñeti fulásu le gíribei Arimatéa, le jafúlasun juríu. Buíti ligáburi wügüri ligía, richáguati ligíbugiñe Búngiu, lídaañein líñun-ágei lúrudu le jáni juríu.

51 Agúrabañu líñein larúeijan Búngiu, magúndaanti lubeíti láu cátei le ladügübei líñun-ágei lúrudu láu Jesúsu.

52 Ábati lídin lúmoun Piláto, ába lamúriajani lúgubu Jesúsu lúma.

53 Lárigiñe laráriragüdüni lueígiñe gurúwa, ába loúburaguni táu ában gamísa, ába lácharuni lídoun ában umúajaü achigíti luágu ában dúbü le ñí lubei úagili lan ní ában abunúti.

54 Wándaradi wéyu ligía, luwéyuri aráansejani lubá luwéyuri eméraaguni joun juríu, áni agüñeeli gumése.

55 Ába jafálaruni würiña já meja ñübinbaña lúma Jesúsu Galiléagiñe José, aríja jamei umúajaü, aríja jamei buídu ída líña lan lichugún lúgubu Jesúsu lídoun umúajaü.

56 Dan le jagíribudunbei jábiñoun, ába jaráanseruni ibíñei buri le íchugübei jawágu jiláaña, ábati jeméraagun lídan wéyu le eméraaguagülei quei laríñaguni lílúrudun Moisés.

24*Lásaarun Jesúsu lídaangiñe óúweni**(Mt 28.1-10; Mr 16.1-8; Jn 20.1-10)*

1 Wéyu dimáasu, ába jagíribudun würiña luágun umúajaü, bináafingua, barüina jamei ibíñei le jaráanserubei jámagua.

2 Dan le jachülürünbei, mámaali lídan lubára dúbü le lidaü umúajaü.

3 Ába jebélurun lídoun umúajaü ligía, madári jamúti lúgubu Wabúreme Jesúsu ñi.

4 Súnti añája lan ñi arítagua jagei lánfuna, ligía jaríjin bián wügüriña rára jarúgabu táu anáanguni mirítu.

5 Queíti jélemuchun láu jagíbu ünabun, buin láu anúfudei, ába jaríñagun wügüriña jagía joun.

—¿Ca uágu jáluajei le wínwanbei jádan jiláaña?

6 Úati ya, saráali lídaangiñe ouweni. Jarítağa jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügüri Garaúwarügüti,

7 luágu ledéregerúaba lan jájaburugun gaffigountiña, ábame jádaraguni luágu gurúwa, ábame lásaarun lídaangiñe ouweni luágu lürüwan wéyu.

8 Ábati jarítağun luágu dimúrei le laríñagubei Jesúsu.

9 Lárigiñeti jagírübudun umúajaürügügiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu.

10 Ja anügübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri würiña.

11 Dan le jaríñagunbalin buri cátei le joun apóstolugu, ába janügüni quei lílülün áu, maffíñetiña joun.

12 Ába láfuridun Pédro, ába lídin eíbaagueina luágun umúajaü, dan le laríñabei lurágeirugun, gamísa rügüñoun ñi, úaali úgubu. Ába lídin lúbiñoun láu luweírín anígi láu cátei le laríjubei.

Luágu ñma lun Emaúsun

(Mr 16.12-13)

13 Luágu méme wéyu ligía, jouđiña bíama jádaangiñe lánigu Jesúsu lídoun ában liraúraü fulásu gíríti Emaús, ürüwa óra eíbuguni Jerusaléngiñe,

14 adímurejeina jáña luágu sun cátei lé buri asúseredubei.

15 Súnti adímurejeina jamá, ába layárafadun Jesúsu joun, ába lagúmeserun eíbuga úara jáma.

16 Láu sun aríja jamáni, siñáti jasúbudiruni luágu Jesúsu lan.

17 Ábati laríñagun joun.

—¿Cásan le uágubei jadímureja, sun eíbugeina jumá?

18 Ába jaráramagun láu íruni jagíbuagu, ába louñabun ában jádaangiñe, gíríti Cleofás, ába laríñagun.

—Sun güriğia subúdi jamúti le asúseredubei Jerusalén lídoun buri wéyu le. ¿Amürü rügüñein jádaangiñe ja ñíbaña ibidiñejabu lun?

19 Ábati laríñagun joun.

—¿Cági asúseredubei?

Jaríñaga lun.

—Luáğuti Jesúsu le Nazarétna, ában meja proféta láu ubáfu luágu le ladügübei lúma luágu lerérün ligíbugiñe Búngiu lúma jagíbugiñe sun güriğia.

20 Ábati jedéregeruni jábutigu wafádiriñegu jáma walúrudungu lun siádiwa lan lun ouweni lúma lun ládarawagún luágu gurúwa.

21 Rúwamutí yebe wafiñen luágu ligíaba lan eséfurei linásiñun Israél. Ürüwa wéyu guetó lueígiñe lasúseredun cátei le.

22 Láu sun líra, weirígüda jamáli jádaangiñe würiña ja wámabaña wanígi láu jouđin luágun umúajaü lubá buga larúgan,

23 queíti madári jamáni lúgubu ñi, ába jayábin abájüdagua woun luágu aríja jamá anjeligu ñi, aríñaga jamá joun luágu wíñwan lan Jesúsu.

24 Ába jouđin jádaangiñe wíbirigu aríjei umúajaü, ába jadáriruni ítara quei jaríñaguni würiña jagía, marijin jamúti Jesúsu.

25 Ábati laríñagun Jesúsu joun.

—¡Louguati giñe gunfaráanda jumá, lüti giñe lubá jafíñerun luágu lé meja jaríñagubei profétağul!

²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigin?

²⁷ Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmagiñe buri lilíburun Moisés túmoun sun jalíburun profétagu.

²⁸ Dan le jachülürün lídoun fulásu le ñjínbaña lubei, ába ladügün Jesúsu camá jamuga lasígiraali leíbugun.

²⁹ Ába jéredun luágu lun leréderun jáma, jariñaga lun.

—Reídeibá wáma, ladüga ladáruduña áni gúñememeeli.

Ábati lebélorun Jesúsu lun leréderun jáma.

³⁰ Dánti le ñurújali jáma luágu dábula, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun.

³¹ Lidán óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe.

³² Ábati jariñagun jámagua.

—¿Ma sandítiwa tásüdün wanígi le wagúndan dan le adímurejeina lubei woun luágu üma, aríñageái tíla Lerérun Búngiu woun?

³³ Ábati magúrabaanjaña lan, ába járügüdün üma lun jagíribudun ubúrugin Jerusalén le ñi lubei jadáiraña únsu apóstolugu oúndaragu jáma giñe jíbiri lánigu.

³⁴ Ába jariñagun ja oúndaraguñubaña ñi joun.

—Inárüni luágu saráli lan Wabúreme Jesúsu lídaangiñe oúweni lúnya labágaridun, aríja láali Simón.

³⁵ Ábati jabájüdaguni bián wügüriña jagía le asúseredubei joun luágu üma, lúma luágu jasúbudiruni luágu Jesúsu lan dan le lagúbachagúnbarun fein.

Larúfudagun Jesúsu lúngua joun disípulugu

(Mt 28.16-20; Mr 16.14-18; Jn 20.19-23)

³⁶ Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítagun luágu pántu lan jaríjubei.

³⁸ Ába laríñagun Jesúsu joun.

—¿Ca uágu tájüchüra janígi? ¿Ca uágu níjein lubei lilóuguan affíeni le tídan janígi?

³⁹ Aríja jumei nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan laríñaguni líra, ába larúfuduni lújabu lúma lugúdi joun.

⁴¹ Queíti mafiñen memegiña lan ladüga ugúndani lúma luweírin anígi le jawágubei, ába laríñagun Jesúsu joun.

—¿Níjeinsan eígini júma ya?

⁴² Ába jíchugun murúsun úduraü süti lun lúma síruudu,

⁴³ ába lanügüni, ába leígini jagíbugiñe sun jagía.

⁴⁴ Lárígiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürüwañubei nuágu tídan lilíburun Moisés, tídan jalíburun profétagu, lúma tídan líburu to gíríbound Sálmos.

⁴⁵ Ábati gunfaráandagüda lánun Lerérun Búngiu joun,

⁴⁶ ába laríñagun joun.

—Bürüwañu líña luágu lúnti lan loúnwen Crístu, ába lánme lásaarun lídaangiñe óuweni lúnya labágaridun luágu lürüwan wéyu,

⁴⁷ lúnti lan giñe lapúrichijoún lídan líri joun sun gürígia ubouágu lun jasáansiruni jóuserun lun ferúdunawa lan jafígoun, lagúmeseruña apúrichijani ligía ubúrugugiñe Jerusalén.

⁴⁸ Jugúya geféentün luágu buri cátei le.

⁴⁹ Nounajabei Sífiri Sándu, le uágubei laríñaga Núguchi Búngiu jun, ítara líña lubeíti, reídei jumá ya ubúruyu Jerusalén daríme jerésibiruni ubáfu lúmagiñe Búngiu le siélubei.

Lamúdeirun Jesúsu siélun

(Mr 16.19-20)

⁵⁰ Ábati lanügüniña Jesúsu bougudin lueí ubúruyu chülü Betánia, ába liñúrui lújabu, ába ln ferúdunawa laabíniruniña.

⁵¹ Dánti labíniruniña, ába lamúdeirun jaweí, ába lanügüniwa siélun.

⁵² Lárigiñe jájuduragun lun, ába jagíribudun járigoún ubúrugun Jerusalén, ima jagúndan!

⁵³ Súnwandánti témpulurugúñanu lan íchiga uweírighi lun Búngiu.

UGÁNU BUÍTI LE LABÜRÜJABEI JUAN LUÁGU JESÚSU

Líabigüle Búngiu Irájü ubouágun queisi Wügüri Garañwarügüti

¹ Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía.

² Lídan lubeíti lagúmeserunbei sun cátei, lúmañein Búngiu Úguchili Búngiu Irájü.

³ Lídaangiñe ladügei Búngiu sun cátei, úati ni cáta adügüti le máma ladüga.

⁴ Ligía íchugubei íbágarí lun sun cátei, áni ligía arúgoungadagüdübei jáu gürígia.

⁵ Rúti larúgounga queisi lámpu lídan lubúriga, áni lásiñerubei lubúriga lámpu ligía eñegucha.

⁶ Níñein meja ában wügüri loúnajan Búngiu, gíríti Juan, le ñübinbei lun líchugun fe luágu Búngiu Irájü le lúnbei liábin ubouágun lun larúgoungadágüdün jáu gürígia.

⁷ Juan, lúnti líchugun fe luágu, lun gayáraabei lan jafiñerun sun gürígia luágu cátei le lúnbei laríñaguni dánme le liábin.

⁸ Máma Juan le lúnbei larúgoungadágüdün jáu gürígia, ában wügüri ligía le oúnajoúbei lun ladímurejaba lan luágu.

⁹ Búngiu Irájü, le queisigubeirügübei ában lámpu le tímatimaati lun larúgoungadágüdün jáu sun gürígia, lachülürüña meja ubouágun lídan dan ligía.

¹⁰ Nñübinti ubouágun, áni láu sun lídaangiñe lan ladügei Búngiu ubou, manügün jamúti lirájüñü ubou quei Búngiu Irájü.

¹¹ Lageíroun yebe liábin, merésibirun jamúti lílana lageíra.

¹² Láu sun líra, añájein erésibiruti, ába jafiñerun luágu, ába líchugun ubáfu joun lun lirájüñübaña lan Búngiu.

¹³ Mítaraantiñatia quei jasáanigu agübürigu ja gürígiabaña, ja agüriajóutiña quei furúmierügü gürígia o láu lan lugúndan ában wügüri, lirájüñü Búngiu jagía.

¹⁴ Ligírati meja le Dimúreibe, le méme Búngiu Irájübei, ñübinti lun ítara lúba lan quei furúmierügü gürígia, ába laganouñiwa wádan. Aríja wamúti luweírigin, uweírigin le ladúnabei Liraü Búngiu le ábanrügüti, le buínbei láu areíni lúma inárüni.

¹⁵ Adímurejati Juan luágu, ába laríñagun.

—Níján léñaja uágubei nadímureja jun dan le naríñagunbei luágu le lan ubábei naráanseja úma, weírigitima lan sügü náu, ladüga níjeinjali lán meja lubáragiñebei nagüriajóun.

¹⁶ Sun wagía íbjaadiwa sarágu abíniruni lídaangiñe luweírín lirísín.

¹⁷ Lúmagiñe Moisés lerésibirúa lílúrudun Búngiu, ánjeinti ínsiñeni lúma inárüni, lídaangiñe Jesucrístu liábin.

¹⁸ Úgáli ni ában aríjiti Búngiu, Liraü le ábanrügübei le yaráfabei tun lanígi, ligía arúfudubalin woun ída líña lan Búngiu.

*Ladímurejan Juan le abásteragüdjabei luágu lufüleisein Jesucrístu
(Mt 3.11-12; Mr 1.7-8; Lc 3.15-17)*

19 Ába jóunajan juríu ja Jerusalénna fádírigo jáma wügüríña jádaangiñe ladügawagun Leví álügüdei Juan cáteíñein lan.

20 Ába laríñagun joun furáangu.

—Máma áu Crístu.

21 Ábayati jálügüdüni.

—¿Cátabuti? ¿Proféta Elías amürü?

Laríñaga joun.

—Uá, máma áu.

Ábaya jaríñagun lun.

—¿Amürü proféta ligíra le lúnbei liábin?

Ába laríñagun joun.

—Máma giñe áu.

22 Ábati jaríñagun lun.

—¿Cátabuti? Mósutia wanügüni boúnabagüle joun ja oúnajabaliwa. ¿Cági gayáraabei baríñagun woun buoúgua?

23 Ába loúnabuniña láu méme dimúrei lé meja laríñagubei proféta Isaías.

—Áu ában le agúrajabei lídan fulásu le mageírawati. “Aráanse jumóun janígi lubá liábin Wabúreme queísi ladárarúniwa úma surúti.”

24 Ja nüdümbaña adímureja lúma Juan, lánigu jadámurin fariséogu,

25 ábati jaríñagun lun.

—Ánjeinti máma bubeí Crístu, ni Elías, ni proféta ligía, ¿cáti uágu babásteragüdaja?

26 Ába laríñagun joun.

—Áu, láu dúna nabásteragüdaja, níjein ában ibídiñeti jun jagánagua,

27 liábinba nárigiñe, wügürí ligía, madúnatina ni lun jamúga nafáragaduni tagürüga ligeídín.

28 Sun cátei le, lídan fulásu le gíríbei Betábara lasúsereda, luágu oúbaü le ñígiñe lubei láfuara wéyu libíti dúna Jordán, le ñí lubei labásteragüdaja Juan.

Wügürí le loúnajabei Búngiu lun loúnwen luágu jafígoun gürígia

29 Larúgan, ába laríjin Juan liábin Jesúsú ayárafadeina lun, ába laríñagun joun lánigu.

—Níján le loúnajabei Búngiu lun loúnwen luágu jafígoun gürígia queísi meja lafarúniwa mudún lídan dan ligíra luágu jafígoun gürígia.

30 Luáguñaja nadímureja dan le naríñagunbei. “Liábinba ában wügürí nárigiñe le weirígiti sügü náu, ladúga níjeinjali lán meja lubáragíñe nagüríajóun.”

31 Ni áu, ibídiñeti meja wügürí ligía nun, abásteragüdajádina láu dúna lun jasúbudiruni Israelítagu.

32 Aríñagati giñe Juan.

—Arija numúti Sífiri Sándu camá ában únjun, larárirun siéluigiñe, ába laráramagun lábulugu.

33 Ibídiñeti yebe nun cátei lan wügürí ligía, aríñagarügaali meja le oúnajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lábulugu itaga wügürí, ligía wügürí ligía le abásteragüdajabei láu Sífiri Sándu.”

34 Arija náaliti, geféen áu luágu ligía lan Liraübei Búngiu.

Furúmiñetiña láni Jesúsú disípulugu

35 Larúgan, ñíñeinya Juan jáma biáma jádaangiñe lánigu.

36 Dan le laríjinbei Juan lásügürün Jesúsu, ába laríñagun.

—Niján wügüri le lanúadirubei Búngiu lun lagídaruni jafígoun güriǵia.

37 Ába jagáambuni biáma lánigu Juan laríñagun ítara, ába jafálaruni Jesúsu.

38 Ábati ladígiragun Jesúsu lárigoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

39 Ába laríñagun Jesúsu joun.

—Jigoúgu jaríjei.

Ába jóudin, ába jaríjini jalía lan lagánawa, ába jásügürüni líbiri wéyu ligía lúma, ladüga queiburijali lan gádürü rábounwéyu óra ligía.

40 Andrés, le lamúlen Simón Pédro, ligía ában jádaangiñe biáma ja agáambubalin le laríñagubei Juan ába jafálaruni Jesúsu.

41 Lubáragiñe ámu cátei, ába lídin Andrés álugei Simón Pédro le líbugaña, ába laríñagun lun.

—Darí wamaali Mesías, le Crístu, le lanúadirubei Búngiu lun lasálbaruniña güriǵia lídaangiñe jafígoun.

42 Ába lanügüni Andrés Simón le ñíjin lubei Jesúsu, ába laríaguni Jesúsu Simón ligíbuagun, ába laríñagun lun.

—Simón, amürü le liraü Jonás, guetó Céfasha bíri, míni lan íri le. Pédro, o dübü.

Lanúadiruniña Jesúsu Felípe lúma Natanaél lun lánime díspulugu

43 Larúgan, ába larítagnun Jesúsu lídin loúbawagun Galiléa, ába ladúnragun lúma Felípe, ába laríñagun lun.

—Falábana.

44 Felípe ligía, Betsáidana le ñí lubei giñe lagánawa Andrés láu sun Pédro.

45 Ábati lídin Felípe áluajei Natanaél, ába laríñagun lun.

—Aríja wamáali wügüri le uágubei labürüja Moisés tídan líburu to lánina lilürudun Búngiu, le giñe uágubei jabürüja profétagu—Jesúsu le liraü José le Nazarétna.

46 Ába laríñagun Natanaél.

—¿Níjein funági Nazarétna buíti?

Ába laríñagun Felípe lun.

—Jigábu baríja.

47 Dan le laríjin Jesúsu layárafadun Natanaél, ába laríñagun.

—Nitén ában ladügawagun Israél le tímatimaati, úati yéguau lídan.

48 Ába laríñagun Natanaél lun.

—¿Ída líñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

49 Ábati laríñagun Natanaél lun.

—Maésturu, amürü Liraübei Búngiu, amürü jarúeitebei Israelítagu.

50 Ába laríñagun Jesúsu lun.

—¿Bafíñerunbei nun ladügarügü naríñagun bun luágu aríja nánibu tábugiñe tídibu ígo? Baríjubati cátei weínamutimáati luei le.

51 Aríñagati giñe Jesúsu.

—Ninárün jáu, luágu jaríjubei lan siélu junreñu, añájame láni Búngiu ánjeligu aweínja lúma arárija nougiñe, áu le Wügüri Garaüwarügüti.

2

Ában maríei lídan fulásu le gíribei Caná, le lídaanbei Galiléa

¹ Ürüwa wéyu lárigiñe, ñíñein ában maríei lídan ában fulásu gíriti Caná, le lídaanbei Galiléa. Ñíñounti lúguchu Jesúsu,

² amísurajoúati gíñeti Jesúsu jáu sun láni disípulugu lídoun maríei ligía.

³ Ába tagúmuchun diweín, ába taríñagun lúguchu Jesúsu lun.

—Gumújatia diweín.

⁴ Ába laríñagun Jesúsu tun.

—¿Cági uágu baríñagei le nun, núguchu? Machülügili dan lun nídejan lídan cátej le.

⁵ Ába taríñagun joun ja éjeeragubaña.

—Adüga jumeí sun le laríñagunbei jun.

⁶ Ñíñoun sísi dináa láutu dübü tíbe to jayúsurboun juríu lun jachíbagun joúnga según jagáburi. Ságü ában dináa tugúya, barütu weín o darándi gálun dúna.

⁷ Ába laríñagun Jesúsu joun éjeeragutiña.

—Buíngüda jumoún sun dináa to láu dúna.

Ába jabuínchagüdünun buídu buídu.

⁸ Ábati laríñagun Jesúsu joun.

—Dabú jumati murúsun tídaangiñe, ábame janügüni lun le aríjubei láu fédu.

Ába jadügüni ítara.

⁹ Ábati loučhuni le aríjubei láu fédu dúna ligía salígua lun diweínme, ibídiñoun lun jalágiñeti lan, ja rügüñanu éjeeragubaña asúbudirei, ladüga jagía lan adáburubalin dúna. Ábati lagúarun le aríjubei láu fédu lun le amárieidubei,

¹⁰ ába laríñagun lun.

—Sun gürígia seríwi jamútu tubuídun—ágei diweín furúmiñe, dánti le guráaña amísurajoútiña gíbe, ligía jéjeeragun diweín to furúmiegurügü, ánjeinti amürü, ába bareídunun tubuídun—ágei diweín darí guetó baságaroun.

¹¹ Cátei le, le ladügübei Jesúsu lídan fulásu le gíribei Caná le lídaanbei Galiléa, ligía furúmiñetibe miláguru le áubei larúfudei luweírigin, ába jafíñerun láni disípulugu luágu.

¹² Lárigiñe cátei le, ába lídin lídoun fulásu le gíribei Capernaúm, úara túma lúguchu, lamúlenu, jáma láni disípulugu, ába jeréderun átiri wéyu ñi.

Labúgaguniña Jesúsu alúgurajatiña témpulurugugiñe

(Mt 21.12-13; Mr 11.15-18; Lc 19.45-46)

¹³ Ábati lídin Jesúsu ubúruğu Jerusalén ladüga yaráfaali lan jafédun juríu le lánina páscua.

¹⁴ Ñi ladáriña ja alúgurajabaña bágasu, mudún, únjun, jáma buri ja ñúnbaña lídan jabára le ñi lubei jasáansija seínsu joun gürígia. Lídan түbүrүrү témpulu ladáriña sun gürígia ja.

¹⁵ Dan le laríjinbalin Jesúsu cátei le, ába ladügün ában labeíjagüle láu gúruđu, ába labúgaguniña sun jagía lídaangiñe түbүrүrү témpulu jáu sun jalügüniña mudún jáma bágasu. Chagálei jaseínsun ja asáansijabaña seínsu, garábaguealeí jadábulan.

¹⁶ Ába lariñagun joun ja alúgurajabaña únjun.

—¡Sagájumei sun cátei le yágiñe! ¡Manüga jumouñ lúban Núguchi lun jalúguraagüleme!

¹⁷ Ábati jaritagun láni disípulugu luágu lariñawagún tídan líburu to Lerérun Búngiu. “Jángitina táu búban táu sun nanígi.”

¹⁸ Ábati jariñagun juríu lun.

—¿Ca miláguru barúfudubei woun lun wasúbudiruni ánjein garícha bubei lun badügüni cátei le?

¹⁹ Ába lariñagun Jesúsu joun.

—Güríngua jumouñ témpulu to, naráramagüdáyaboun lídan úrúwa wéyu.

²⁰ Ába jariñagun juríu lun.

—Bián-wein-sísi írúmu janügün adügoun témpulu to, ¿lun biyáraaboun lan aráramagüda lídan úrúwa wéyu?

²¹ Lúgubu guánarü Jesúsu témpulu to uáguboun ladímureja joun.

²² Ligía dan lubei le lásaarun lídaangiñe ouweni, ába jaritagun luágu dimúrei le meja lariñagubei, ába jafiñerun luágu sun le tídaanbei líburu to Lerérun Búngiu lúma luágu dimúrei buri lé meja lariñagubei joun.

Subúsi le tídaanbei janígi gürígia lun Jesúsu

²³ Dan le Jerusalén lubei Jesúsu lídan fédu le lánina páscua, sarágu jáña afñerutiña luágu dan jaríjinbaalin miláguru buri le ladáagubei lun larúfuduni luágu ligía lan Crístubei.

²⁴ Ánjeinti Jesúsu, míchaagunti lúngua jájaburugun ladüga subúdi lániña cátañañanu lan.

²⁵ Mabúseerunti lariñawagúniwa lun ída jáña lan gürígia, ligía lúngua subúdi lumúti cátei lan tídaanbei janígi.

3

Jesúsu lúma Nicodémo

¹ Níñein ában wügüri lánina jadámurin fariséogu, ába jádaangiñe jábutigu juríu, gíriti Nicodémo.

² Ába lídin Nicodémo ayánuja lúma Jesúsu gúñoun, ába lariñagun lun.

—Maésturu, subúdi wamúti luágu Búngiu lan ouñajabalibu arúfudaja woun, ladüga úati ni ában lun gayára lan larúfuduni lubáfu láu miláguru quei badügüni ánjein úa lubei Búngiu lúma.

³ Ába lariñagun Jesúsu lun.

—Nínárün báu luágu le lan magüriajouñwayati, siñáti lebélorun lídoun larúejan Búngiu.

⁴ Ába lariñagun Nicodémo lun.

—¿Ída lubági lagüriajouñwaya ában wügüri weíriyaali? ¿Gayáraati funági lebélorunya turágeirugun lúguchu lúnya tagüriajani?

⁵ Ába lariñagun Jesúsu lun.

—Nínárün báu luágu le lan magüriajouñti lídaangiñe dúna lánina abásteruni, lúma lídaangiñe Sífiri Sándu, siñáti lebélorun lídoun larúejan Búngiu.

⁶ Le agüriajoubei jádaangiñe agübürigu ja gürígiabaña, ítara líña ligáburi queísi jagáburi gürígia, le agüriajoubei lídaangiñe Sífiri Sándu, ítara líña ligáburi queísi ligáburi Sífiri Sándu.

7 Maweíralá banígi luágu naríñagun bun luágu lúnti lánya jagüriajóúniwa sun gürgia.

8 Ítara quei láfurun garábali le ñígiñe lumúti labúseera, agáambabei lamúri, ibídiñeti bun jalíagiñe lan liábin ní jalíñoun lan lídin, ítara jáña giñe sun ja agüriajóúbaña lídaangiñe Sífiri Sándu.

9 Ábayati laríñagun Nicodémo lun.

—¿Ída lubásan cátei le?

10 Ába laríñagun Jesúsu lun.

—Ába oúnwenbun maésturu Israélna amürü, ¿ibídiñeti cátei le bun?

11 Ninárün báu luágu le lan wasúbudirubei, ligía lan wadímurejabei, geféen wagía luágu le aríja wamáalibei, jugúya fariséogu, mafiñetün luágu le waríñagubei jun.

12 Ánjein mafiñen jubei nun dan le nadímurejan jun luágu buri cátei le lánina ubou, ¿ída lubági jafiñera luágu le lánina siélu?

13 ‘Úgali ní ában amúdeiruti siélun, lárigiñe ába larárirun ñígiñe lun gayára lan geféen lan luágu nueídügüya, áu le Wügüri Garaüwarügüti, le gábanbei siélu.

14 Ítara quei mesa liñúrurun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara liñá giñe niñurúaba lan luágu gurúwa

15 lun sun lan le afiñeruti nuágu, mídin lámuga máfiougati, siélun lámuga lídin abágarida ában ibágari le magúmuchaditi.

Lísiñejabu Búngiu joun gürgia

16 ‘Weíríti jínsiñe gürgia ja ubouágubaña lun Búngiu darí lun loúnajanina, áu le Liraü le ábanrügüti, lun nouñwen luágu jafígoun, lun sun lan ja afiñerutiña nuágu, mídin jamámuga máfiougati, siélun lámuga jóúdin, abágarida ában ibágari le magúmuchaditi.

17 Moúnajan lumútina Búngiu áu le Liraü ubouágoun lun níchugun jadúnrun gürgia, loúnajanina lun jasálbarun ja ubouágubaña nuágu.

18 ‘Le afiñeti nuágu, áu le Liraü Búngiu, barü lumuti Búngiu queisi madúnrun, ánjein le mafiñeti, gadúnrunjali ligíbugiñe Búngiu ladüga mafiñen lan nuágu, áu le Liraü Búngiu le ábanrügüti.

19 Ja mafiñebaña, gadúnrunjaña ligíbugiñe Búngiu ladüga dán buga le niábinbei ubouágoun lun narúougungädün láu, gúndaatimaatiña lílana ubou láu lubúriga sügü láu larúgounga, ladüga cátei lan wuríbati jadágubei.

20 Sun ja adügübaña cátei wuríbati, iyéreeguti larúgounga joun, ába jadísedun luei larúgounga ligía, luei lasúbudirúniwa cátei wuríbati le jadügübei.

21 Ja adügübalin lugúndan Búngiu, jínsiñeti joun lun lídan jamá larúgounga lun laríjiniwa luágu jarúma lan le jadügübei, láu lubáfu Búngiu.

Ladímurejaanya Juan luágu Jesúsu

22 Lárigiñe sun cátei le, ába lídin Jesúsu jáu láni disípulugu Judéoun, ába leréderun átiri dan ñi, abásteragüdaja.

23 Ñíñein giñe Juan abásteragüdaja lídan fulásu le giríbei Enón, yaráfa lun Sálím, ladüga ñíñein lan sarágu dúna, ába buríti jayábíngua gürgia, ába jabásterun.

24 Lubáragiñe ladaürün Juan lasúsereda sun cátei le.

25 Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni.

²⁶ Ábati jóúdin aríñaga lun Juan.

—Aríjabásan maésturu, wügüri lé buga búmabei luágu óubaü le ñígiñe lubei láfurida wéyu libíti dúna Jordán, le ligira lé meja uágubei badímureja woun, guetó labásteragüdajaña gürígia áni jafálaruñeíti sun gürígia.

²⁷ Ába lariñagun Juan joun.

—Siñáti níjein lan ni cáta lúma ni ában gürígia ánjein máma lubei líchugun Búngiu lun.

²⁸ Agáamba jumúti lubeígia nariñagun jun furáangu luágu máma lan áu Crístubei, luágu áu lan ában le oúnajoúbei lubá.

²⁹ Lídan ában maríei, adári ligía táubei ladári. Léti lumáda adári, le ñúbei agáambe, oúnwenbun lugúndan láu lagáambuni ladímurejan. Ítara níña gíñeti, oúnwenbun nugúndan luágu Jesúsu,

³⁰ ligía lúnti laweírigudúntima, áu lun núnabuduntima.

Le ñúbinbei siélugiñe

³¹ ‘Jesúsu, le ñúbinbei siélugiñe, jóúgiñeñein sun gürígia. Áu, múaruguna áu, áni lérügüñein lánina ubou gunfaráanda nan. Ánjein le ñúbinbei siélugiñe, jóúgiñeñein sun gürígia,

³² luágu giñe le aríja lálalibei lúma le agáamba lálalibei ladímureja, míbetiña affíñerutiña luágu le lariñagubei.

³³ Ánjeinti le affíñeruti, lachóúrurubei luágu inárúni lan le lariñagubei Búngiu, láu lafiñerun.

³⁴ Le loúnajabei Búngiu, lerérun Búngiu ladímurejabei, ladüga mébejati líchuguni Búngiu láni Espíritu lun.

³⁵ Jínsiñeti Liraü Búngiu lun, rúlaali giñe sun cátei lújaburugun.

³⁶ Le afiñebeí luágu Liraü Búngiu, gabágariti le magúmuchaditi, ánjeinti le májabei lafiñerun luágu Liraü Búngiu, mabágaribeí líbe íbágarí ligía áni mebélurunbei siélu, láburrarügüba ligáñi Búngiu luágu.

4

Jesúsu túma würi to Samariána

¹ Ába jagáambun fariséogu luágu gíbetima jamá lánigu Jesúsu sügü jáu lánigu Juan, áni gíbetima gürígia ñúbintiña lun, lun jabásterun,

² láu sun máma lan Jesúsu abásteragüdajabaliña, lánigu abásteragüdajabaña.

³ Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴ Lídan weíyaasu ligía lásügürübati louábawagugiñe Samária.

⁵ Ítara liñáti lachülürün lídoun ában fulásu lídan Samária gíriti Sícar, yaráfa lun múa lé meja lígirubei Jacób lun José le liraü, le ában jádaangiñe binádu wagübürigu.

⁶ Níñein wélu le únbei jagúara luwélun Jacób, queíti buchá lan luágu Jesúsu eíbuga, ába lañúurun láru wélu ligía. Queí buri amídirugu óra ligía.

⁷ Tiábijati ában würi Samariána adábura dúna lídaangiñe wélu le, ába lariñagun Jesúsu tun.

—Rúba dúna nun.

⁸ Añángüratí buga láni disípulugu agáñija eíginí ubúru.

⁹ Ábati tariñagun würi Samariána to lun Jesúsu.

—¿Ída liñági bamúriajanbei dúna núma, lárigiñe juríu ban, nugúya Samariána?

(Mínsiñeguatiñati juríu jóungua jáma Samariána.)

¹⁰ Aba lariñagun Jesúsu tun.

—Lun jamúga subúdi báni edéweejani le líchugubei Búngiu, subúdibeí jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun ibágari bun, bun.

¹¹ Ába tariñagun lun.

—Úagubeíti cába lan áu badábura dúna áni julíiti wélu le, ¿ída lubáti bíchuguni luwúyeri dúna ligía nun?

¹² Jacób, lé meja binádu wadügawagun, ígirubalin wélu le woun, guráti meja dúna lídaangiñe jáu sun lirájüñü jáma lilügüniña. ¿Weírigutibu funági sügü láu Jacób?

¹³ Ába lariñagun Jesúsu tun.

—Sun ja átubaña lídaangiñe dúna le, jamágürabudayaba,

¹⁴ ánjein le átuti lídaangiñe dúna le níchugubei, mamágürabundügüyaali, ladüga dúna le lúnbei níchuguni lun, géseséenbei lídan lun líchugun ibágari magúmchaditi lun.

¹⁵ Ábati tariñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wéluru adábura dúna.

¹⁶ Ába lariñagun Jesúsu tun.

—Beíba oúgei búmari le úmabei bamárieida, ábame biábin.

¹⁷ Ába tariñagun lun.

—Mámaritina le maríeitina lúma.

Ábati lariñagun Jesúsu tun.

—Binárün láu baríñagun luágu mámari ban le maríeiti búma,

¹⁸ ladüga seíngüjáña wügüriña úmatiña bagánawa, áni mamárieiduntibu lúma wügüri le úmabei bagánawa guetó. Aríñagaadibu inárüni.

¹⁹ Dan tagáambubalin würi to cátei le, ába tariñagun lun.

—Afiñetina luágu proféta ban.

²⁰ Binádu wagúbürigu ja Samariána, judúguatiña meja lun Búngiu ya luágu wübü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹ Ába lariñagun Jesúsu tun.

—Afiñebá nun luágu nítebei lan dan lun jájuduragun lun Búngiu mídinga jugúya luágun wübü lígita, ni jídin Jerusalén.

²² Jugúya Samariána, ibídiñeti jun ca lan un jájuduragua, ánjein wagía, subúdi wamúti ca lan un wájuduragua ladüga lídaangiñe warásan wagía juríu liábin asálbaruni.

²³ Lachülürüba óra, áni niján óra ligía, lun mebéresenwa lan jalía lan jájuduragua gürígia lun Búngiu. Le lúnbei lebéreserunwa láu, ída líña lan ligáburu jájuduragun lun. lúnti jadügüni táu sun janígi lídan ában luwúyeri le áuti lagúndaara Búngiu, segün lerérun. Niján luwúyeri ájuduraguni le láluajabei Búngiu jámagiñe gürígia.

²⁴ Espíritu Búngiu, ja ájuduragubaña lun, lúnti jadügüni láu sun janárün, mebéresenga láu cátei le aríjúati.

²⁵ Ába tariñagun lun.

—Subúditu nun luágu liábinba lan Mesías le gírubei Crístu, dánmeti liábin, lafúnraanguagüdübei sun cátei woun.

²⁶ Ába lariñagun Jesúsu tun.

—Áu Mesías ligía.

²⁷ Ligíati jachülürün láni disípulugu, ába laweíridun janígi láu jadáriruni Jesúsu adímureja túma ában würi, úati ni ában ganígiti lun lálügüdajan ca lan tabúseerubei o ca lan uágu layánuja túma.

²⁸ Ábati tígirunun würi tugúya tidína, ába tídín ubúругu ougaña gürígia, ába taríñagun joun.

²⁹ —Jigoúgu jaríja ában eyéri aríñaguti sun cátei le adüga náalibeí nun. ¿Mámadügü funásan ligía Crístubei?

³⁰ Ábati jóudingua ubúrugugiñe lun le ñíjin lubei Jesúsu.

³¹ Añájati buga disípulugu ayúmuragua lun Jesúsu lun leígin.

³² Lariñaga joun.

—Níjein cátei lun neígini le ibídíñeti jun.

³³ Ábati jagúmeserun disípulugu álügüdagua jámagua, ába jaríñagun.

—¿Máfuna barüjaña eígini lun?

³⁴ Ába lariñagun Jesúsu joun.

—Nadügüni lugúndan le ouñajabalina, agúmucheí luwádigimari, ligía neíginbei.

³⁵ Jugúya aríñagatün. “Níjeingua gádürü játi lubá alúbajani.” Ánjein áu, nariñajare jun. Aríja jumei nádü, dánjali lun lalúbajoún.

³⁶ Le ñadágimeinbei alúbaja, ibíja lumúti lafáyeiruaja, áni cáteiti le lalúbajabei, gürígia, lun jabíjini ibágarí le magúmuchaditi siélu, lun lagúndaarun le ábunagubei úara lúma le alúbajabei.

³⁷ Quei le lubei bei lariñawagún. “Ámu le ábunagubei, ámu le alúbajabei.”

³⁸ Oúnaja náadün alúbaja le ñí lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le láni Samária afíñerutiña luágu Jesúsu láu taríñagun würi tugúya joun luágu aríñaga láni sun le adüga táalibeí tun.

⁴⁰ Dánti le jachülürünbei Samariána le ñí lubei Jesúsu, ába jayúmuragun lun lun leréderun jáma. Ába leréderun bián wéyu ñi,

⁴¹ ábaya jafíñerun sarágu gürígia dan le jagáambunbalin le lariñagubei.

⁴² Ábati jaríñagun tun würi tugúya.

—Mámarügaali luágu le bariñagubei woun wafíñera, ladüga agáamba wamáali giñe lúmagiñe, áni subúdi wamúti luágu ligía lan Crístubei le lasálbaja ubóu.

Lareídaguagüdüni Jesúsu liraiü ában ñadágimeinti lúma urúei

⁴³ Bián wéyu lárigiñe, ába láfuridun Jesúsu Samáriagiñe, ába lasígiruni luweíyasun loúbawagun Galiléa,

⁴⁴ mídinti lageíra quei lariñaguni Jesúsu guánarü luágu madügüniwa lan gásu láu ában proféta lídan guánarü lageíra.

⁴⁵ Dan lachülürünbei Galiléa, resíbi jamúti lílana fulásu buídu, ladüga ñüdün jamá giñe lídan fédu le lánina páscua Jerusalén áni aríja jamúti sun le ladügübei lídan fédu ligía.

⁴⁶ Ábayati lagíribudun Jesúsu lídoun fulásu le Caná le lídaanbei Galiléa, le ñí lubei lasálraguagüda dúna lun diweíñme. Níñeinti ában wügüri weíriguti,

ñadágimeinti lúma urúei, níjein ában liraü sánditi lídan fulásu le gíribei Capernaúm.

⁴⁷ Dan lagáambunbei wügüri ligía luágu ñübinjali lan Jesúsu Judéagiñe lun Galiléoun, ába lídin aríjei, ába layúmragun lun lun lídin lúbiñe lun lareidaguagüdüni liraü, ladüga madíseeli lan lun loúnwen.

⁴⁸ Ába laríñagun Jesúsu lun.

—Jugúya, ánjaün maríjin miláguru, mafñetün.

⁴⁹ Laríñaga wügüri ligía lun.

—Queímoun furése lubáragiñe loúnwen niraü.

⁵⁰ Ábati laríñagun Jesúsu lun.

—Giríbubá búbiñoun, areidagua biraü.

Ába lafiñerun wügüri ligía luágu le laríñagubei Jesúsu lun, ába lídin.

⁵¹ Dan layárafadun tun lúban, ába jayábin lumúsuniña lubároun, ába jaríñagun lun.

—Magádieeli biraü.

⁵² Ába lálügüdüniña ca lan óra lagúmesera liraü areidagua, ába jaríñagun lun.

—Gúñaarü ladaünrún ában rábounwéyu lagídara abíruaü lueí.

⁵³ Ába larítaguni luágu ligía lan óra laríñagun Jesúsu lun luágu areidaguaali lan liraü, ába lafiñerun luágu Jesúsu jáu sun lufámilian.

⁵⁴ Ligía libíaman miláguru le ladügübei Jesúsu dan le lagíribudunbei Judéagiñe lun Galiléoun.

5

Lareidaguagüdüni Jesúsu wügüri adádagaraali le Betésdana

¹ Lárigiñe cátei le, jadügüña juríu ában fédu, ába lagíribudun Jesúsu Jerusaléoun luágu fédu ligía.

² Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri.

³ Sarágu jáña sánditiña roun ñi múarugu, ñíñanu maríjintiña, meíbuguntiña, jáma derégüdaña, jagúrabajañein lánjingichagun dúna.

⁴ Ladüga nújeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareidagun furúmieguarügü sándi le luágubei.

⁵ Ñíñeinti ában wügüri, darándi-wídü irúmu láu láu sándi,

⁶ dan laríjínbalin Jesúsu wügüri ligía roun, subúdileí átiri lan dan láu ítara, ába laríñagun lun.

—¿Buséntibu bareidagun?

⁷ Ába loúnabun le sándibei.

—Úati cába lan anügana lídoun dúna dan le lánjingichagun. Ságu nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárari, beiba.

⁹ Lídan óra ligía, ába lareidagun, ába labú dunun lubárari, ába lagúmeserun eíbuga. Queíti lidáani lubeí eméraguni wéyu ligía,

¹⁰ ába jaríñagun juríu lun le areidagubei.

—Wéyu le eméraguagülei ugúñe, moún lumuti banügünun bubárari buógu.

¹¹ Ába laríñagun joun.

—Le areídaguagüdübalina aríñagubei nun. “Budáboun bubárari, beíba.”

¹² Ába jaríñagun lun.

—¿Cáteigi le aríñagubei bun. “Budáboun bubárari, beíba”?

¹³ Ibídiñetiti lun ca lan areídaguagüdübalin, ladüga gíbetiña gürígia ñi áni ñüdünja bugáti Jesúsu.

¹⁴ Lárigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguaadibu lubeí, maffígonjadügüyabá lueí ladágarun ámu cátei janárimetimaati buágu.

¹⁵ Ábati lídin, ába lawísaruniña juríu luágu Jesúsu lan areídaguagüdübalin.

¹⁶ Ligía lébubei jeíbaajani juríu Jesúsu lun jáfaruni jilágubei ladüga buri ladáaguni cátei líbe le lídan wéyu le eméraaguagülei.

¹⁷ Ába laríñagun Jesúsu joun.

—Ñadágimeinti Nóguchi chülü lúmoun dan le, áu ñadágimeintina gíñe.

¹⁸ Ligiatimaati jabúseerunbei juríu jáfaruni jilágubei, mámarügü ladüga lálalachaguni lúru du le lánina wéyu le eméraaguagülei, ladüga gíñe líchaagun lúnga quei Búngiu láu laríñagun luágu Lúguchi lan.

Lugúmadin Liraü Búngiu

¹⁹ Ábati laríñagun Jesúsu joun.

—Nínárün jáu, luágu siña lan nadügün, áu le Liraü Búngiu, ni cáta láu nání nungua, le rügüñein naríjubei ladügün Nóguchi, nadüga. Sun le ladügübei Búngiu Úguchili, adüga numúti gíñe, áu le Búngiu Irájü,

²⁰ ladüga jínsiñetina lun Búngiu, arúfuda lumúti sun le ladügübei nun, áni larúfuduba cátei weínamutimaati nun, le lúnti laweíridun janígi láu.

²¹ Ítara quei lásaaragüdüniña Búngiu Úguchili jiláañe lídaangiñe oúweni ába líchugun ibágari joun, itara líña gíñe níchugun, áu le Búngiu Irájü, ibágari joun ja nabúseerun.

²² Magúseragüdünti Búngiu ni ában, rúrügü lumúti sun ubáfu nun, áu le Liraü, lun nadügüni,

²³ lun sun lan gürígia íchigei ában méme inébesi le jíchugubei lun Búngiu Úguchili nun. Le míchuti inébesi nun, áu le Búngiu Irájü, míchuti gíñe inébesi lun Búngiu Úguchili le oúnajabalina.

²⁴ Nínárün jáu, luágu le lan eténiruti lun le naríñagubei lun, afíñe ligía luágu le oúnajabalina, gabágariti le magúmuchaditi, masíadirúnwabei gíñe, sügüjali lídaangiñe féridi lídoun ibágari le magúmuchaditi.

²⁵ Nínárün jáu luágu nítebei lan dan, áni niján dan ligía, dánme le jagáambuni jiláañe numálali, ja ñüdünbaña láu le nubei, gabágaribaña.

²⁶ Ladüga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari,

²⁷ rújali gíñe ubáfu nun lun nagúseragüdüniña gürígia ladüga Wügüri Garaúwarügüti áu.

²⁸ Maweíridalá janígi luágu le, ladüga lachülürüba dan lun jagáambuni sun jiláguaaña numálali,

²⁹ ábame jáfuridunga lídaangiñe jamúaja. Já meja arúfudubalin luágu nánigu jamá láu jadügüni buíti ubouágu, jásaaruba lun jaganouún lúma Búngiu lun sun dan, ánjañati ja arúfudubalin luágu lánigu jamá Máfia láu jadügüni wuríbani, jásaaruba lun jasiadirúniwa lun máfiougati lun sun dan.

Larúfuduni Jesúsu lagúmadijan

³⁰ ‘Siñáti nadügün ni cáta láu náni núngua. Quei lariñawagúniwa nun, ítara liña nagúseragüdün, áni buíti ligáburu nagúseragüdün ladüga mouchun nan lun nadügüni le nabúseerubei, lueídügüya le labúseerubei Nóguchi le oúnajabalina.

³¹ Ánjein ába lubei geféen nuougua, mounti le nariñagubei.

³² Níjein ámu le geféenbei luágu náni fuleisei, áni subúdiiti nun luágu le lan lariñagubei nuágu, gebégiti.

³³ Jugúya oúnajatün álügüdei Juan nuágu, áni le loúnabagülebei jun, inárüni.

³⁴ Áu magúrabuntina ladímurejan ni ában wügüri luágu nufúleisein, narítaguagüda rügüñaadün luágu le lariñagubei Juan nuágu lun gayáraabei lan jafiñerun nuágu lun jasálbaruba lan.

³⁵ Ítara liñá meja Juan quei ában lámpu le durúnguati, ru ligía larúgounga, áni jugúya aráanseñu jíña méjati lun jerésibiruni larúgounga ligía luágu murúsun dan.

³⁶ Níjein ában cátei luágu nufúleisein buítimaati sügü láu le lariñagubei Juan. Lé buri cátei le nadügübei, le méme buri uágubei lariñaga Nóguchi nun lun nadügüni, arúfuda lumúti luágu Nóguchi lan oúnajabalina le tímatiimaati.

³⁷ Nóguchi le oúnajabalina, arúfuda láali luágu áu lan Liraú le oúnajoúbei lun nasálbaruniña gürígia ubouágu, láu sun magáambun jumágili lan lumálali Búngiu, maríjin jumei.

³⁸ Mebélugili lerérun jídoun, ladüga maffiñetün nuágu, áu le loúnajabei.

³⁹ Atúriaja jumútu Lerérun Búngiu láu sarágu gounigi, ladüga agúrafa jumá jadáriruni ibágari le magúmuchaditi tidan, láu sun líra, líburu tugúya adímurejaboun nuágu,

⁴⁰ áni májatün jiábin númoun lun jibíjini ibágari ligía.

⁴¹ ‘Máluajantina lun janügünina gürígia weírigu.

⁴² Gáma lúmoun, subúdi numútün, áni subúdi numúti luágu mísiñen lan Búngiu jun.

⁴³ Áu, lueígiñe loúbadina Nóguchi niábin, áni jugúya, merésibirun jumútina, ánjein ñúbin ámu láu láni lúngua, ligíaba jerésibira.

⁴⁴ ¿Ída lubásan jafiñerun nuágu, resíbitünga uweíriguni júmagiñegua, máluajan jumúti uweíriguni le lúmagiñeti Búngiu le ábanrügüti?

⁴⁵ Marítagua jumátia luágu níchuguba lan jidúnrun ligíbugiñe Nóguchi, Moisés guánarügüba íchiga jidúnrun, le guánarügü uágubei jíchiği jeménigin.

⁴⁶ Ladüga, lun jamúga afiñe jumá luágu le lariñagubei Moisés, jafiñeruña jamúga giñe nun, ladüga abürújati Moisés nibügürü.

⁴⁷ Ánjein mafiñen jubei luágu le labürújabei, ¿Ída lubáti jafiñerun luágu le nariñagubei jun?

6

Leígagüdün Jesúsu seingü mílu wügüriña

(Mt 14.13-21; Mr 6.30-44; Lc 9.10-17)

¹ Lárigiñe, ába lídin Jesúsu loubáfurugun dúna le Galiléa, le méme giñe dúna le gíribei Tibérias.

² Sarágu jáña gürígia afálarei ladüga jaríjini buri miláguru le ladáagubei, láu lareídaguagüdüniña sánditiña.

³ Ábati laweínrun Jesúsu luágun ában wübü, ába lañúurun ñi jáma láni díspulugu.

⁴Yaráfaaliti páscua, le jafédun juríu.

⁵Dan laríjinbei Jesúsu luágu sarágu jáña lan gürígia afálaruti, ába laríñagun lun Felípe.

—¿Jalíabasan wagáñija eígini joun sun gürígia ja?

⁶Laríñagunbalin líra lúnrügü lagáambun cába lan laríñaga Felípe, Jesúsu, subúdi láali cába lan ladüga.

⁷Ábati laríñagun Felípe lun.

—Ni bián-san fiádürü fein louguaboun lun tafánreinjoúniwa murúsun murúsun jádan sun gürígia ja.

⁸Ábati laríñagun Andrés, ában giñe jádaangiñe disípulugu, le lamúlen Simón Pédro, lun.

⁹—Niján ában irájü ya, nújein seíngü fein lúma, jáma bián úduraü, louguabei líra joun sarágu gürígia.

¹⁰Ábati laríñagun Jesúsu.

—Aríñaga jumá joun süngubei lun jañúurun.

Ñíñanuti jawára seíngü mílu wügüríña bougudin jawei würíña jáma irájüñü. Queíti níñein lan sarágu sagádi lídan fulásu ligía, ába jañúurun.

¹¹Ábati lanügünun Jesúsu fein lújaburugu, lárigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja ñunbaña. Ligía méme ladüga jáu úduraü, ruíñalei sun le jabúseerubei joun.

¹²Dan le quimúleña, ába laríñagun Jesúsu joun láni disípulugu.

—Abúdaja jumei sun le ígiragubei, mabúlegu lámuga ni cáta.

¹³Ába jabúdajani, ába jabuñchagüdün dúusu faníñe láu tife fein le ígiragubei tídaangiñe seíngü fein.

¹⁴Dánti le jaríjinbalin gürígia miláguru le, le ladügübei Jesúsu, ába jaríñagun.

—Inárüni luágu niján lan proféta lé meja lúnbei liábin uboúagun.

¹⁵Queíti lasúbudiruni Jesúsu luágu busén jamá janügüni láu érei lun jadügüni urúeime, ába lídin lábuga luágun wübü.

Leibugun Jesúsu ligíbuagu dúna

(Mt 14.22-27; Mr 6.45-52)

¹⁶Dan le lagúñedunbei, ába jarágachun láni Jesúsu disípulugu lárün dúna,

¹⁷ ába jádinagun tídoun ában ugúnein, ába jagúmeserun ánjiñuragua lun jachülürün Capernaúm. Búrigaaliti, machülüti Jesúsu jámoun.

¹⁸Ába lagúmeserun garábali áfuragua jére, ába lérougadun.

¹⁹Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eibugeina ligíbuagu dúna, ába janúfudedagun.

²⁰Ába laríñagun joun.

—Manúfudedá jumá, áu le.

²¹Ábati jerésibiruni láu ugúndani tídan ugúnein, ába jachülürün lídoun fulásu le ñíjin lubei jóudin lídan murúsun óra.

Jáluajani gürígia Jesúsu

²²Larúgan, ába jaríjin gürígia ja eréderubaña loubáfurugu luágu ñüdüñja jamá buga disípulugu tídan ugúnein to ñíboun áni tugúya rügüñoun ñi, áni mídin lan Jesúsu jáma.

²³Súnti dan ligía, ába tiábíngua ugúnein ubúrugugiñe Tibérias lun lídoun ában fulásu yaráfa lun le ñi lubei jeígoun fein lárigi leteíngirun Jesúsu tuágu.

24 Dánti jaríjini gürígia luágu úa lan Jesúsu ñi, ni láni disípulugu, ába jádinagun tidoun ugúnein buri tugúya, ába jóudin Capernaúm áluajei.

Jesúsu, fein to lánina ibágari

25 Dan le jachülürünbei loubáfurugu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

26 Ába laríñagun Jesúsu joun.

—Nínárün jáu luágu ladüga lan jeígin darí lun jaquímuludun jáluajana, máma ladüga gunfaráanda jumáni laníchigu buri miláguru.

27 Madíjerida jumá luágu eígin le gagúmuchaditi le lúntibeí júgubu, áluaja jumeí eígin tun juwáni, le íchugubei íbágari magúmuchaditi. Ligía eígin le lúnbei níchuguni jun, áu Wügüri Garaüwarügüti, ladüga rúlaali Búngiu Úguchili ubáfu nun lun níchuguni íbágari ligía.

28 Ábati jaríñagun lun.

—¿Ída lubásan wadüga lun woúdin láu le lubeíbei Búngiu?

29 Ába laríñagun Jesúsu joun.

—Le labúseerubei Búngiu, lun jafíñerun nuágu, áu le loúnajabei.

30 Jaríñagati lun.

—¿Cábagi seíni gayára barúfudun woun lun wafíñerun buágu? ¿Cági cátei badügübei?

31 Binádu wagübürigu jóutiña meja fein to gíriboun maná lídan fulásu mageírawati, quei taríñaguni Lerérun Búngiu. “Jóügüda lumútiña Búngiu fein to siélugiñetu.”

32 Ába laríñagun Jesúsu joun.

—Nínárün jáu luágu máma lan Moisés íchugubarun fein siélugiñetu tugúya joun, Nóguchi íchugubei fein joun áni ligía gíñe íchugubarun fein siélugiñetu jun to tímátimaatu.

33 Ladüga fein to líchuguboun Búngiu, tugúya to aráriruboun siélugiñe áni rúti gíñe íbágari joun lílana ubou.

34 Ábati jaríñagun lun.

—Rúboun fein tugúya woun súnwandan.

35 Ába laríñagun Jesúsu joun.

—Áu fein to íchuguboun íbágari. Le ñübinti nómoun, malámadügüyaarume luwáni, le afíñeruti nuágu, mamágürabudügüyaaru gíñe luwáni.

36 Quei le nubeíbei jun, jugúya mafiñetün láu sun aríja jumáadina lan.

37 Sun gürígia ja líchugubaña Nóguchi nun, ñübintiña nun, játi ñübintiña nómoun mabúgun nubáña.

38 Máma niábiña siélugiñe lun nadügüni nugúndan, le náni núngua, niábiña lun nadügüni lugúndan le oúnajabalina.

39 Léti labúseerubei Nóguchi le oúnajabalina, lun meféridirun nan ni ában jádaangiñe ja líchugubaña nun, lun sarágüdarügü nániña lídaangiñe ouweni lídaanme lagúmujóun wéyu.

40 Le labúseerubei le oúnajabalina, lun sun lan ja anügütina queísi Li-raü Búngiu, afíñe jagía nuágu, lun gabágari jamá le magúmuchaditi, áni násaaragüdübaña lídaangiñe ouweni lídan lagúmujóun wéyu.

41 Ába jagúmeserun juríu adímureja wuríba luágu Jesúsu ladüga laríñagun luágu ligía lan fein to aráriruboun siélugiñe.

42 Ába jariñagun.

—¿Ma funáti Jesúsu le liraü José le? Subúdi wamúti lúguchi túma lúguchu. ¿Ída liñáti lariñagunbei luágu siéluigiñe lan larárirara?

43 Ábati lariñagun Jesúsu joun.

—Madímureja jumá nuágu.

44 Siñáti liábín ni ában númoun ánjein máma lubei lanügün Búngiu Úguchili le ouñajabalina, áni násaaragüdúbei lídaangiñe ouweni lídan lagúmujoún wéyu.

45 Lariñajare tídan líburu to jerérun profétagu. “Larúfudajaba Búngiu joun súngebey.” Sun lubeíti ja agáambubalin Búngiu Úguchili, furéndeí jagía lúmagiñe, ñúbiníña númoun.

46 ‘Máma jamúgata luágu níjein lan aríjiti Búngiu Úguchili. Áu le ñúbinbei lúmagiñe Búngiu, áu rügüñein aríjei.

47 Ninárün jáu luágu le lan afíñeti nuágu, gabágariti le magúmuchaditi.

48 Áu fein to íchuguboun íbágari.

49 Joutíña binádu jagübürigu fein to maná lídan fulásu mageírawati áni láu sun luwúyeri jiláguatiña.

50 Áu, tuágu fein to aráriruboun siéluigiñe nadímureja, lun ja lan eígitu, lúmounbaña Búngiu.

51 Áu méme fein wínwantu tugúya to aráriruboun siéluigiñe, le eígiti tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, núgubu guánarü, níchugubei lun gayáraabei lan jabágaridun gürígia lun sun dan lúma Búngiu.

52 Ábati jeréderun juríu adímureja jámagua, ába jariñagun.

—¿Ída lubásan leígagüdüni le lúgubu guánarü woun?

53 Lariñaga Jesúsu joun.

—Ninárün jáu luágu ánjaün lan meígin lídaangiñe núgubu, áu Wügüri Garaüwarügüti, mátun jumeíme níta, mabágaribadün.

54 Le eígiti núgubu, gurálei níta, gabágariti tímatimaati le magúmuchaditi, áni násaaragüdúbei lídaangiñe ouweni lídan lagúmujoún wéyu.

55 Ladúga eígini le tímatimaati núgubu, uníñein le tímatimaati níta.

56 Le eígiti núgubu, gurálei níta, lídaañein ában núma, áu lúma.

57 Úguchili le ouñajabalina, gabágariti, áni áu, gabágaritina gíñe lídaangiñe, ítara méme líña, le awínwanduti nídaangiñe, gabágaribei nídaangiñe.

58 Tuágu fein to aráriruboun siéluigiñe nadímureja. Mítaraantu fein to quei maná le jeígubei binádu jagübürigu, láu lan sun luwúyeri jiláguatiña, le eígiti tídaangiñe fein to, labágariduba tímatimaati lun sun dan lúma Búngiu.

59 Lídan adámuridaguni tídan jalígilisin juríu to Capernaúboun, ñi larúfudajeyi Jesúsu cátei le.

Dimúrei lánina íbágari magúmuchaditi

60 Sarágu jáña jádaangiñe ja afálarubalin Jesúsu, dan le jagáambubalin arúfudajani le, ába jariñagun.

—Cátei le lariñagubei, jénreenguti lerésibirúniwa, ¿cábasan adúga gásu láu?

61 Ába lasúbudiruni Jesúsu luágu jadímurejaña lan luágu cátei ligía, ába lariñagun joun.

—¿Wuríbatí láburujan líra jun?

62 ¿Cába jamúga funáti asúsereda ánjana jamúga jaríja, áu Wügüri Garaüwarügüti, awárirara nárigoún siélun lé meja ñi nubei furúmiñe?

⁶³ Náni Espíritu, ligía íchugubei ibágari tímatimaati, núguburügü, siñáti líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei ibágari magúmuchaditi.

⁶⁴ Áni añájeingua jídaangiñe, mafiñetiña.

Ladüga lúmagiñe furúmiñeti dan, subúdi láña Jesúsu cátaña lan mafiñebaña, lúma cátei lan le lúnbei lalúguruni.

⁶⁵ Ába laríñagun.

—Ligía naríñagunbei jun luágu siñá lan liábin ni ában númoun ánjein máma lubei Núguchi Búngiu agúarubei lun.

⁶⁶ Lúmagiñe dan ligía, sarágu jáña jídaangiñe ja afálarubalin Jesúsu, ába jígiruni, ába meíbugunjaña lan lúma.

⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün giñe jídin nueí?

⁶⁸ Ába louñabun Simón.

—¿Cábagi úmoun wouúdin? Dimúrei buri le baríñagubei, lánina ibágari tímatimaati le magúmuchaditi.

⁶⁹ Wagía affiñeediwa, áni subúdi wamúti luágu amürü lan Crístubei le Liraü Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jídaangiñe láni Máfia.

⁷¹ Dan laríñagunbalin Jesúsu líra, luáguñe in Júdas, le liraü Simón Iscarióte, ladüga ligíaba lan alúgurei, láu sun ában lan jídaangiñe dúusu disípulugu ligía.

7

Mafiñeruntiña lamúlenu Jesúsu luágu

¹ Lárigiñe sun cátei le, ába eíbugañaja lan Jesúsu louñabawagu Galiléa, mabúseerunti leréderun Judéa ladüga ñi buséntiña juríu jáfaruni jílagubei.

² Queiti yaráfaali lan ában lídaangiñe jafédun juríu le gíríbei tufédun dibásein,

³ ába jaríñagun lamúlenu lun.

—Meréderabá ya, beíba Judéoun aríja jamámugei giñe bánigu ja ñíbaña cátei lé buri badügübei.

⁴ Dan le busén lan ában gürígia lasúbudirúniwa, madügün lumúti buri cátei arámudaguarügü. Queiti adüga ban cátei líbeina le, adügabeí ligíbugiñe sun ubou.

⁵ Ni íbini lamúlenu mafiñetiña luágu.

⁶ Ábati laríñagun Jesúsu joun.

—Machülügili dan lun nídin Jerusalén luágu fédu ligía, ánjein jun, buíti furúmierügü óra.

⁷ Siñáti jíyereegudún joun ja lánina ubou le, anáti áu, iyéreegutina joun, ladüga geféentina luágu wuríba lán buri cátei le jadügübei.

⁸ Jeíba lídan fédu, áu mídinbadina guetó, machülügili nidáani lun nídin.

⁹ Lárigiñe laríñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe jouúdin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijóuniwa.

¹¹ Ítara líña jáluajani juríu lídan fédu ligía, ába jaríñagun.

—¿Jageí funásan wügüri le?

¹² Sarágu jañáti adímurejatiña luágu jádan güri-gia. Ñíñanu aríñagutiña luágu ában lan wügüri buíti ligía, jíbiri aríñaga. “Mabuídunti, yéegua lumútiña güri-gia.”

¹³ Úati ni ában adímurejati furáangu luágu, ladüga janúfude jaweí juríu.

¹⁴ Lamídonjali fédu lúmagua, ligía lebélorun Jesúsu témpulurugun, ába lagúmeserun arúfudaja.

¹⁵ Ába laweíridun janígi juríu, ába jaríñagun.

—¿Ída liñásan lasúbudirunbei le sarágu cátei, matúriajaanga ligía?

¹⁶ Ába lariñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina.

¹⁷ Ánjein níjein lubeí ában le aránsenti lun ladügüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan náni núngua nadímureja.

¹⁸ Le adímurejabei luágu láni lúngua, ladügüni lun janügüni güri-gia weíri, le oúchubei lun lanügüniwa le oúnajabalin weíri, ligía aríñagubalin inárüni, áni máma ligía biángua tigíbu.

¹⁹ ¿Ma inárüni luágu rúlaani Moisés lúruđu jun? Láu sun líra, úati ni ában jídaangiñe úraduti lúma lúruđu ligía. ¿Ca uágu jabúseera jáfarunina jilágubei?

²⁰ Ába jaríñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹ Ába lariñagun Jesúsu joun.

—Luágurügü ában cátei le nadügübei lídan wéyu le eméraguagülei laweírda janígi sun jugúya.

²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun binádu lagübürigu lubáragiñe), ligía leúbubei lerésibirun ában irájü circuncisión íbini lídan lan wéyu le eméraguagülei.

²³ Ánjein adüga jubálin líra íbini lídan lan wéyu le eméraguagülei lueírügü jadúraaguni lilúrudun Moisés, ¿cáti uágu jagáñida núma lueígiñe nareídaguagüdüni lúgubu ában wügüri dayárugubei lídan wéyu le eméraguagülei?

²⁴ Masáminara jumá luágu cátei quéisi larijíníwa, samína jumá luágu quéisi lubeí.

Ladímurejan Jesúsu luágu ladügawagún

²⁵ Ábati jagúmeserun jádaangiñe ja aganóubaña Jerusalén álügüdaja.

—¿Másan niján le jáluajabei lun jáfaruni jilágubei?

²⁶ Nijánga adímureja ligíbugiñe guríriguau, áni úati ni ában aríñaguti ni cáta lun. ¿Léfunasan afiñe jamá gumádimatiña luágu wügüri lan le Crístubei?

²⁷ Subúditi woun jalágiñe lan liábin le, ánjeinti dánme le liábin Crístu, ibídiñebei ni ca un jalágiñe lan liábin.

²⁸ Dan lagáambubalin Jesúsu cátei le, dan larúfudajaña lubeí témpulurugu, ába lariñagun rein.

—¡Subúdi jumútina lubeíti, subúdi jumeí jalágiñe lan niábin! Máma láu náni núngua niábin, ában le inárünibeí luágu níjein lan, ligía oúnajabalina, áni ibídiñeti jun.

²⁹ Áu, subúdi numúti ladüga lúmagiñe lan niábin, áni ligía oúnajabalina.

30 Ába yebéti jabúseerun jadáürüni, úati ni ában agúuruti luágu ladüga machülügili lan dan lun louñwen.

31 Sarágu jáña afiñerutiña luágu, ába jariñagun.

—Dánme le liábin Crístu, ¿ladügüba funági ámu miláguru sügü láu wügüri le?

Jouñajan fariséogu polisía adáürei Jesúsu

32 Ába jagáambuni fariséogu le jariñagubei güriégia luágu Jesúsu, jagía jáma jábutigu fádirigu, ába jouñajan polisía témpulurugugiñe lun jadáürüni.

33 Ábati lariñagun Jesúsu.

—Murúsunrügübei dan neréderun júma ya, ábame nagíribudun lúmoun le ouñajabalina.

34 Jáluajabadina, madári jubádina, ladüga siñábei lan jídin le ñjínbadina lubeí.

35 Ábati jagúmeserun juríu álügüdagua jámagua.

—¿Jalíñounba funásan lídin le siñábei lubeí nege wadáriruni? ¿Leíbuga funa jámoun juríu ja jagánaguabaña güriégia ja güriégu, lun larúfudajan joun güriégu?

36 ¿Ca míni lan láu lariñagun woun. “Jáluajabadina, madári jubádina ladüga siñábei lan jídin le ñbadina lubeí”?

Líseesen dúna wínwanti

37 Le lagúmujoún wéyu lídan fédu ligía, ligíatima weírigubei. Lídaanti wéyu ligía, ába laráramun Jesúsu, ába lariñagun láu umálali reínti.

—Le mágürabutu luwáni, ñübinlá númoun, gurála.

38 Le afiñeti nuágu, láwiyujaba dúna wínwanti tídaangiñe lanígi, quei tariñaguni Lerérun Búngiu.

39 Lariñaguña Jesúsu láu líra luágu ja lan afiñerutiña luágu, jerésibirubei lan Sífiri Sándu, dan ligía, miábingili Sífiri Sándu ladüga magíribudungili lan Jesúsu larigoún siélun lídoun luweírigun.

Fánreinguaü jádan güriégia

40 Ñíñanu jádaangiñe güriégia, dan le jagáambunbalin cáte le, ába jariñagun.

—Inárüni luágu niján lan proféta lé meja lúnbei liábin.

41 Jariñaga jíbiri.

—Niján Crístubei.

Jariñaga jíbiri.

—¿Ída lubásan Galiléanabei lan Crístu?

42 Tariñajare Lerérun Búngiu luágu ladügawagunbei lan urúei Davíd Crístu, áni Beléngiñetibe lan, fulásu meme le ñíngiñeti lubeí Davíd.

43 Ába lubeíti jafánreinragun güriégia lueígiñe Jesúsu.

44 Ñíñanu yebe abúseerutiña jadáürüni, úati ni ában adügüti.

Mafiñetiña gumádimatiña luágu Jesúsu

45 Ába jagíribudun polisía ja tánina témpulu jarigoún jámoun fariséogu jáma jábutigu fádirigu. Ába jariñagun joun polisía.

—¿Ca uágu manügün jubálin?

46 Ába jariñagun polisía.

—¿Ígagili ni ában adímurejati quei ladímurejan wügüri le!

47 Ábati jariñagun fariséogu joun.

—¿Ígiraguagüdaadün giñe júngua lun leyéedunün?

⁴⁸ ¿Níjein funági ában jádaangiñe wábutigu o jádaangiñe lan fariséogu affíneruti luágu?

⁴⁹ Ánjaña gürígia ja, ja afálarubalin wügüri ligía, ja ibídiñejabubaña lun lúruđu, íñarawagúaaña.

⁵⁰ Nicodémo, le ñüdüñbei adímureja lúma Jesúsu güñoun, ligía ában jádaangiñe fariséogu, ába lariñagun joun.

⁵¹ —Según walúrudun, siñáti wasíadiruni ában wügüri magáambunga wameí furúmiñe lun wasúbudiruni ca lan lidúnrunbei.

⁵² Ábati jariñagun lun.

—¿Galiléana giñe amürü, badímurejaanbei luágu lufúleisein? Atúriajaboún Lerérün Búngü, basúbudirubei luágu úagili lan ni ában proféta Galiléana.

⁵³ Ába jóudin cáda ában jábiñoun.

8

Würi maríeitu to aganoúboun luma ámu wügüri

¹ Ánjeinti Jesúsu, ába lídin luágun wübü le gíribei Olívos.

² Larúgan bináafin, ába lagíribudun témpulurugun, ába jayábin sun gürígia lubáduñ, ába lañúurun, ába lagúmeserun arúfudaja joun.

³ Ábati janügün arúfudajatiña lilúrudun Moisés jáma fariséogu ában würi jadáriragun lúma ámu wügüri lueí túmari. Ába jíchugunun jamídaangua ja ñíbaña jámagua,

⁴ ába jariñagun lun Jesúsu.

—Maésturu, nuján würi to, wadáriragun lúma ámu wügüri lueí túmari.

⁵ Lariñajare lilúrudun Moisés jawágu jíbe würiña ja, lun jáfarawagún jílagubei láu dübü. ¿Cági baríñagubei?

⁶ Jariñagunbalin líra lun jarijin lábun, lun gébuna lan jíchugun lidúnrun. Ábati lélemuchun Jesúsu, ába labürüjan múarugu láu lújabu.

⁷ Queiti jasígirun álügüdaguei, ába laráramun, ába lariñagun joun.

—Furúmiñeguarügü jídaangiñe le mafígounti, chüleí furúmiñeti dübü tuágu.

⁸ Ábaya lélemuchun, ába lasígirun abürüja múarugu.

⁹ Jagía, le jagáambubalin le lariñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámagiñe ja weínamutimáajañabaña. Dánti le furíjaña súnigubei, ába ladáriragun Jesúsu lúngua lábugua túma würi tugúya quei teréderunbei ñi.

¹⁰ Ábati liñúraguni Jesúsu lichügü, ába lariñagun tun.

—¿Jagáñasán buga ja íchugubaña bidúnrun? ¿Úati ni ában asiadirutibu lun bouñwen?

¹¹ Ába tariñagun lun.

—Uá, úati ni ában.

—Ábati lariñagun Jesúsu tun.

—Ni áu, masiadirun nubádibu, beíba, madügadügüyabá figoú.

Jesúsu lilámpun uboú

¹² Ábaya ladímurejan Jesúsu joun gürígia, ába lariñagun.

—Áu lilámpunbei uboú, le afálarutina, libíjubei larúgounga le anügübei gürígia lídoun ibágari magúmuchaditi, áni meíbugunbei lídan lubúriga.

¹³ Ábati jariñagun fariséogu lun.

—Amürü, badímurejaña buíti buouúgua, mebégiti líra.

¹⁴ Ába laríñagun Jesúsu joun.

—Le nariñagubei gebégiti, láu sun áu lan adímurejabei buíti nuouúgua. Áu, subúdi numúti jalíagiñe lan niábin lúma jalíñounba lan nídin, ánjein jugúya, ibídiñeti jun jalíagiñe lan niábin ni jalíñounbadina lan.

¹⁵ Jugúya, jasáminarun nuágu queísi luwúyeri lasáminarun ubouú, áu, magúseragüdúntina ni ában.

¹⁶ Ánjana jamúga agúseragüda, nadügüñein jamúga láu úarani, ladüga mámarügüba áu agúseragüda, Nüguchi le oúnajabalina lagúseragüdüba giñe núma.

¹⁷ Bürüwati lídan jilúrudun luágu dan lan geféen jamá bián gürígia luágu ában méme cátei, lúnti lan lafiñerún joun.

¹⁸ Ítara liñáti áu ában le geféenbei luágu náni fuleísei, Nüguchi le oúnajabalina, ligía giñe ában le geféenbei nuágu.

¹⁹ Ábati jaríñagun lun.

—¿Jageígi Búguchi?

Ába laríñagun joun.

—Jugúya, ibídiñetina jun, ni Nüguchi, ibídiñeti giñe jun, lun jamúga subúdi jumánina, subúditi jamúga giñe Nüguchi jun.

²⁰ Lídan laríñagubalin Jesúsu cátei le, larúfudajaña témpulurugu lídan fulásu le ní tubei buri gáfu to lágei seínsu. Madáürün lumúti ni ában ladüga machülügili lan lidáani lun louñwen.

Laríñajare Jesúsu joun luágu siñá lan jeídin ñíjinba lubei lídin

²¹ Ábaya laríñagun Jesúsu joun.

—Áu, neíbuga, jugúya jáluajabadina, jóúweguba gaffigounga, siñáti jídin le ñíjinba lubei nídin.

²² Ábati jaríñagun juríu.

—¿Láfaragua funa lúngua, laríñagunbei luágu siñá lan wóudin le ñíjinba lubei lídin?

²³ Ábati laríñagun Jesúsu joun.

—Jugúya, únabuna jugúya, ánjein áu, yágütana íñu áu. Láni ubouú le jugúya, ánjein áu, máma láni ubouú le áu.

²⁴ Ligía nariñagunbei jun luágu jóúweguba lan gaffigounga, ladüga ánjein mafiñen jubei luágu áu lan áu, jóúweguba ítara.

²⁵ Ábati jaríñagun lun.

—¿Cátabuti?

Ába laríñagun joun.

—Ariñaga náali jun lúmagiñe binárü.

²⁶ Gayáraati jamúga nariñagun gibeti jun luágu luríban jigáburu lun nadeínjan jun, le oúnajabalina aríñaga lumúti inárüni, áni cáteirügübei le nagáambubei lúmagiñe le oúnajabalina nariñaga joun ja lílana ubouú.

²⁷ Ánjein jagía, úati gunfaráanda jamáni láu luágu lan Búngiu ladímureja Jesúsu joun.

²⁸ Ligía laríñagunbei joun.

—Dánme le jíñürunina, áu Wügüri Garaüwarügüti, ligíame jasúbudiruni luágu áu lan le uágubei nariñaga luágu áu lan, áni madügün nan ni cáta luágu náni núngua, lueídügüya le larúfudajabei Nüguchi nun.

²⁹ Ladüga númañein le oúnajabalina, mígirun lágidina Núguchi nábugua, ladüga adüga náni le áubei lagúndaara súnwandan.

³⁰ Dan le laríñagunbalin Jesúsu le, ába jafíñerun sarágu luágu.

Lirájüñü Búngiu jáma lidámuniña figou

³¹ Ába laríñagun Jesúsu joun juríu ja áñarubaña lun lerérun.

—Ánjaün asígira lun jídin surúñu láu le nubeibeí jun, jíábinba lun náni jumá disípulugu le tímatimaati.

³² Ábame jasúbudiruni inárüni, ábame lafúnraanguagüdünün inárüni.

³³ Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti baríñagunbei luágu furáangujadiwa lánme?

³⁴ Ába laríñagun Jesúsu joun.

—Nínárün jáu, luágu sun lan ja adáagubaña figou, lidámun figou jagía.

³⁵ Ában idámuni, máma jádaangiñeti família, ánjeinti ában isáani, jádaangiñeti família súnwandan.

³⁶ Ánjaün lubeíti nafúnraanguagüda, áu le Búngiu Irájü, lídaangiñe idámuni lun figou, furáangubadün le tímatimaati.

³⁷ Subúdi náali luágu linébaanfaangu jumá Abrahám, láu sun líra, buséntün jáfarunina, ladüga mája jumá lun le nubeibeí jun.

³⁸ Áu nadímurejan luágu le larúfudubei Núguchi nun, jugúya jadügüni le jafúnrendeirubei lúmagiñe júguchi, le Máfia.

³⁹ Ába jaríñagun lun.

—Abrahám wáguchibeí.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadügüñein jamúga le ladügübei.

⁴⁰ Láu sun aríñaga náali lan inárüni le larúfudajabei Búngiu nun jun, buséntün jáfarunina. ¡Madügünte meja Abrahám ni cáta líbe líra!

⁴¹ Le méme ladügübei júguchi, ligía jadügübei.

Ábati jaríñagun lun.

—Mámata wagía bástadi, ában rügüñein wáguchi, Búngiu.

⁴² Ába laríñagun Jesúsu joun.

—Ánjein jamúga Búngiu lubeí júguchibeí, jínsiñetina jamúga jun ladüga lúmagiñe Búngiu niábin, áni anája ya. Máma láu náni nungua niábin, Búngiu oúnajabalina.

⁴³ ¿Ca uágu lásiñerunbei gunfaráanda jumáni le naríñagubeí? Ladüga mabúseerun jumá jagáambuni náni ugánu.

⁴⁴ Máfia júguchibeí, lánigu jugúya, áni buséntün jadügüni lugúndan. Gáfarajadigubeíñein Máfia lúmagiñe furúmiñeti dan. Márügüdünti lueígiñe inárüni, maríñagunti gíñe inárüni. Lídan le laríñagun iyéeni, ladímurejaña quei ligáburi, ladüga yéeti áni ligía lúguchibeí iyéeni.

⁴⁵ Ánjeinti áu, quei inárüni lubeí naríñagubeí, maffíñetün nun.

⁴⁶ ¿Ca jádaangiñe gayáraabeí larúfuduni luágu gafígoun nan? Ánjeinti inárüni lubeí naríñagubeí, ¿cáti uágu maffíñen jubeí nun?

⁴⁷ Le lánigu Búngiu, agáamba lumúti lerérun Búngiu, ánjeinti jugúya, quei máma jubeí lánigu Búngiu, ligía mája jubeí jagáambuni.

Nýjeinjali meja Crístu lubáragiñe Abrahám

48 Ábati jariñagun juríu lun.

—Wanárün láu waríñagun luágu máma ban ámu jawei jagübüri Samariána, luágu gíñe níjein lan ában espíritu wuríbati bídan.

49 Ába laríñagun Jesúsu joun.

—Úati espíritu wuríbati nídan. Le nadügübei, níchuguña inébesei lun Núguchi, jugúya, íchiga minébeni nun.

50 Málujajaantina inébesei núngua, láu sun níjein lan ában áluga lumúti ninébesi, áni ligía le agúseragüdübei.

51 Ninárün jáu luágu le lan adügüti gásu láu le nubeíbei, moúnwenbei lan.

52 Ábati jariñagun juríu lun.

—Anáti guetó, choóru wamáali luágu níjein lan espíritu wuríbati bídan. Jiláti Abrahám, jilágua profétagu, áni aríñagagibu luágu le lan adügüti gásu láu le bubeíbei, moúnwenbei lan.

53 ¿Cátabuñadíbugi lúmoun wáguchi Abrahám? Jiláti Abrahám, jilágua profétagu. ¿Ída liñáti banáangun búngua?

54 Ába laríñagun Jesúsu joun.

—Ánjana íchiga uweírighuni nuóugua, málabei, ánjeinti Núguchi, le méme uágubei jariñaga luágu ligía lan Jubúngiutebei, ligía íchugubei uweírighuni nuágu.

55 Jugúya, ibídiñeti Búngiu jun, anáti áu, subúdiiti nun, áni ánjana jamúga aríñaga luágu ibídiñe lan nun, yéetina jamúga gíñe quei jugúya. Subúdiiti Búngiu nun le tímatimaati, áni adúga numúti le lubeíbei.

56 Abrahám lé meja binádu júguchi, gúndaati meja láu lasúbudiruni luágu lachülürüba lan nuwéyuri lun niábin uboúagun queisi asálbaragülei, buin líña láu ugúndani dan laríjini wéyu ligía.

57 Ábati jariñagun juríu lun Jesúsu.

—Úagubeigili ni dimí-san irúmu báu, ¿aríñagatibu luágu aríja báni Abrahám?

58 Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

59 Ába jabúdajan dübü lun jachüraguni luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

9

Lareídagugüdüin Jesúsu ában wügüri maríjinti

1 Lídan le lásügürün Jesúsu lídaangiñe ában fulásu, ába laríjin ában wügüri maríjinti lúmagiñe lagüriajóun.

2 Ába jariñagun láni disípulugu lun.

—Maésturu, ¿cásan uágu lagüriajóunbei wügüri le maríjinga? ¿Ladúgasan jafígoun lagübürigu, o ladúga lifígoun guánarú?

3 Ába laríñagun Jesúsu joun.

—Máma ladúga lifígoun, máma gíñe ladúga jafígoun lagübürigu, lasúseredunbei itara lun larijóuniwa le luáraabei Búngiu adúga láu lareídagun wügüri ligía.

4 Lúnti nadügüni luwádigimari Búngiu le oúnajabalina sun wínwangidina lan, jiláadina ligíame, siñáme nadügüni.

5 Sun dan anája lan ligíbuagu uboú le, áu lilámpunbei uboú.

⁶ Lárigiñe laríñaguni Jesúsu cátei le, ába lásuerun múarugun, ába ladügün murúsun gubégubeti láu larüre, ába lájuruduni luágu lágu le maríjinbei.

⁷ Ába laríñagun lun.

—Beíba achíbei bigíbu lídan dúna le gíribei Siloé —míni lan líra, Oúnajoúti.

Ába lídin maríjinti ligía, ába lachíbuni ligíbu ñi, dan le lagíribudunbei, aríjaali.

⁸ Játi lubésinanigu jáma gürígia já meja aríjubalin amúriaja, ába jaríñagun.

—¿Másan nijáñaja le añúurubei amúriaja seínsu?

⁹ Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügüri ligía.

—Ánja, áu.

¹⁰ Ábati jaríñagun lun.

—¿Ída liñáti aríjaadibu lubeí?

¹¹ Ába laríñagun joun.

—Wügüri le gíribei Jesúsu, ligía adügübei murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíribei Siloé, ábame bachíbuni bigíbu ñi.” Ábati nídin, lásun nachíbuni nigíbu, ába naríjin.

¹² Ábati jaríñagun lun.

—¿Jageígi wügüri ligía?

Laríñaga joun.

—Ibidiñeti nun jageí lan.

Jálügüdaguni fariséogu maríjinti le areídaguagüdüwalibei

¹³ Ábati janügüni wügüri lé meja maríjinbei jagíbugiñoún fariséogu.

¹⁴ Queíti lídan lan wéyu le eméraaguagülei ladügei Jesúsu gubégubeti le áubei lareídaguagüdei maríjinti ligía,

¹⁵ ába giñe jálügüdüni fariséogu wügüri ligía ída líña lan gayárajali lubeí laríjin. Ába laríñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

¹⁶ Ábati jaríñagun jádaangiñe fariséogu.

—Le wügüri le adügübalin cátei le, siñáti louñagüle lan Búngiu ladüga minébenti wéyu le eméraaguagülei lun.

Jaríñagati jíbiri.

—¿Ída liñáti ladáaguni buri miláguru le, ánjein gafígoun lubeí?

Ába lubeíti ñi lan fánreinguaü jádan.

¹⁷ Ábaya jálügüdüni lé meja maríjinbei.

—Ángi bugúya, ¿cági bariñagubei luágu wügüri le, queísi bugúya lubeí le laríjagüdübei?

Ába laríñagun.

—Nugúya, naríñagun luágu ában lan proféta.

¹⁸ Májatiña yebe fariséogu jafíñerun luágu maríjin lán meja wügüri ligía áni aríjaali lan guetó, darí lun jagúarun joun lagübürigu,

¹⁹ ába jaríñagun joun.

—¿Nijánsan jiraü le uágubei jaríñaga luágu maríjin gubeifnein lan lúmagiñe lagüriajouñ? ¿Ída liñáti aríjaali lubei guetó?

²⁰ Ába jaríñagun lagübürigu.

—Subúdi wamúti luágu waraü lan le, áni maríjin lan dan le lagüriajouñbei,

²¹ ibídiñeti woun ída líña lan aríjaali lubei, ni ca lan areídaaguagdübálin lágu.

Álügüda jumei, weíriyaali, gayáraati loúnabun lueígiñegua.

²² Anúfudeiti aríñagagdübálin líra joun lagübürigu wügüri ligía, ladüga aríñagaaña lan fariséogu luágu sun lan ja afiñerutiña luágu Jesúsu lan Crístubei, jabugúba lan tídaangiñe jalígilisin juríu.

²³ Ligía jaríñagunbei lagübürigu. “Álügüda jumei, weíriyaali.”

²⁴ Ábayati jagúarun juríu lun wügüri lé meja maríjinbei, ába jaríñagun lun.

—Aríñagabei inárüni woun ligíbugiñe Búngiu, wagía, subúdi woun luágu gafígoun lan wügüri líra.

²⁵ Ábati laríñagun joun.

—Ibídiñeti nun ánjein gafígoun lubei lúmoun mafígoun lan. Le nasúbudirubei, luágu maríjin nán meja, áni guetó aríjaadina.

²⁶ Ábaya jaríñagun lun.

—¿Cásan ladügübei báu? ¿Ída liñásan ladüga lun laríjagüdünibu?

²⁷ Ába laríñagun joun.

—Aríñaga náali jun, mebereseguntün náu, ¿cáti uágu jabúseera naríñaguniya jun? ¿Ódi buséntün giñe jafálaruni?

²⁸ Ábati janábuni, ába jaríñagun lun.

—Bugúya, falá bumuti larúfudajan wügüri ligía, ánjein wagía, larúfudajan Moisés wafálarubei.

²⁹ Subúdi woun luágu adímureja lán meja Búngiu lun Moisés, ánjein le, ibídiñegubeíti woun jalágiñeti lan.

³⁰ Ábati laríñagun wügüri ligía joun.

—¡Ámuti giñe cátei le! ¡Ibídiñeti jun jalágiñeti lan, áni aríjagüda lána!

³¹ Subúdi woun luágu magáambun lániña Búngiu gafígouñtiña, ja rügüñanu ájuduragubaña lun jáma ja adügübalin lugúndan, lagáamba.

³² Magáambuñajagili luágu ni ában aríjagüdüti ában gürígia le agüriajouñti maríjinga.

³³ Lun jamúga máma lan lúmagiñe Búngiu liábin wügüri le, siñáti jamúga ladügün ni cáta.

³⁴ Ábati jaríñagun lun.

—¿Bugúyasan le agüriajouñbei buin láu figou, buséntibu barúfudajan woun?

Ába jabúguni tídaangiñe jalígilisin.

Ja maríjinbaña luágu cátei lánina Búngiu

³⁵ Ába lagáambuni Jesúsu luágu bugá jamaani maríjinti meja ligía, dánti le ladúnragun lúma, ába laríñagun lun.

—¿Afiñetibu luágu Líraü Búngiu?

³⁶ Ába laríñagun wügüri ligía lun.

—Aríñagabei nun cátei lan, afiñe námuga luágu.

³⁷ Ába laríñagun Jesúsu lun.

—Aríja báali, áu le úmabei badímureja.

³⁸ Ába lájuduragun ligíbugiñe Jesúsu, ába laríñagun.

— Afíñetina, Nabúreme.

³⁹ Ába laríñagun Jesúsu.

— Niábinbei ñájoun ubouágun lun néfegechagüdüni jágu ja ibídiñejabubaña lun cátei lánina Búngiu, lun giñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, maríjin jamá ni cáta.

⁴⁰ Dan le jagáambunbalin jádaangiñe fariséogu ja ñúbaña cátei le, ába jaríñagun lun.

— ¿Baríñaguñati luágu darúñu líña lan giñe wágu lun cátei le luáguti Búngiu?

⁴¹ Laríñaga Jesúsu joun.

— Lun jamúga ibídiñe lan cátei lánina Búngiu jun, madúnrunntün jamúga luágu jifigoun, quei jaríñagun luágu subúdi jumáni, gadúnrunntün.

10

Jémpulu luáguti loúnigiruniña Jesúsu lánigu queísi ában oúnigiruti mudún

¹ Ninárün jáu luágu le lan mebéluti lídaangiñe lubéneri jabárierun mudún, lun lebélorun lídaangiñe ámu oubaü, jíweruti.

² Ánjeinti le ebélurubei lídaangiñe béna, ligía le oúnigirubaliña mudún.

³ Ába lánjunrenchuni le oúnigirubalin béna béna lun, lun lebélorun, subúdi jamúti giñe mudún lumálali. Ába lagúajan joun láu jíri, ába laságaraguniña baríerurugugiñe.

⁴ Lárigiñe laságaraguniña súngubei, ába lídin eíbugeina jabá jabá, ába jafálaruni ladüga subúdi jamáni lumálali.

⁵ Mídintiña lárigi ában le ibídiñeti joun, anúrajarügütiña lueí ladüga ibídiñeti jamálali ámu mútu joun.

⁶ Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu jouniri mudún buíti

⁷ Ábayati laríñagun Jesúsu joun.

— Ninárün jáu, áu béna le ñígiñe lubei gayára lan jayábin gürígia lun lánigu jamá Búngiu.

⁸ Ja ñúbinbaña nubáragiñe, ítara jáña queísi jíwerutiña mudún ladüga iyéeni lan jarúfudajabei, madügütiña lánigu Búngiu gásu jáu.

⁹ Áu bénabei, le ebéluruti nueígiñe, lasálbarúba. Ítara lúba quei ában mudún le ebéluruti furí ligía baríerurugugiñe, darí ligía sagádi lun leígin.

¹⁰ Jíweruti, liábin rügüña lun líwerujan, lun láfarajan lúma lun lagünrinchagun, ánjein áu, niábiña lun jibíjin ibágari, áni lun jibíjini gíbe.

¹¹ Áu, ítara ñiña queísi ában jouniri mudún le buíti, le gayáraati líchuguni libágari jawágu lilügüniña mudún.

¹² Ánjein le ñadágimeinrügüti luágu fáyeiti, dan le laríjin liábin anímaalu le jabísa mudún, ába lígiruniña mudún, ába leíbaagun, ladüga máma lan oúnigiruti buíti ligía, máma giñe lilügüniña mudún. Ábati liábin jabísa mudún, ába lawáraüdagugüdüniña.

¹³ Wügüri ligía eíbaaguati ladüga luwádigimariña lan luágurügü fáyeiti, mebéresegüti jáu mudún.

¹⁴⁻¹⁵ ‘Áu oúnigirutibe buíti. Ítara quei nisúbudin lun Núguchi áni subúdi Núguchi nun, ítara líña giñe jasúbudin nánigu nun, subúdi jamána giñe queísi

subúdi jamáni mudún jóuniri. Rúnumuti nibágari jawágu queísi líchuguni oúnigiruti mudún libágari jawágu lilügüniña mudún.

¹⁶ Añájein gíñe ámu güriquia ja lúnbaña nánigu jamá ja mámabaña juríu, lúnti gíñe nanügüniña lun nánigu jamá. Jagáambubadina, ábame jeréderun súngubei lídan ában lúma ában oúnigiruti.

¹⁷ ‘Jínsiñetina lun Nüguchi, ladüga níchugubei nibágari luágu ubou, ligía ábayame nibjini.

¹⁸ Magída lubei ni ában güriquia nibágari, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubei Nüguchi nun.

¹⁹ Dan le jagáambubalin juríu dimúrei buri le, ábaya jafánreinragun.

²⁰ Sarágu jáña jádaangiñe aríñagutiña.

—¿Cásan uágu jadüga gásu láu, níjeingusan espíritu wuríbati lídan áni lülüjali láu?

²¹ Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági laríjagüdüñ espíritu wuríbati maríjintiña?

Merésibirun jamáni juríu Jesúsu

²² Dan ligía lídáani luríbouga, ladügüñati fédu le lánina tedéregérún témpulu Jerusalén lun Búngiu.

²³ Níñeinti Jesúsu eíbugañaaja témpulurugu luágu corredór le gíribei Láni Salomón corredór.

²⁴ Ába jagúriridagun juríu láu, ába jaríñagun lun.

—¿Darísan ídaba bígirawa láu machouúriñi? Ánjein amürü lubei Crístubei, aríñagabeí furáangu.

²⁵ Ába laríñagun Jesúsu joun.

—Aríñaga náali, maffñetün nun. Sún buri cátei le nadáagubei láu lugúmadin Nüguchi, arúfuda lumúti furáangu.

²⁶ Jugúya, maffñetün ladüga máma jumá jádaangiñe nilügüniña mudún quei bugája nariñaguni jun.

²⁷ Subúdi jamúti nilügüniña mudún numálali, subúdi numútiña gíñe, áni falá jamutina.

²⁸ Rúтина íbágari magúmuchaditi joun áni meféridirubaña, úabei gíñe agídarutiña nújaburugugiñe.

²⁹ Nüguchi le weíríbei jaweí súngubei, ligía íchugubaliña nun, áni úati ni ában lun lagídaruniña lújaburugugiñe.

³⁰ Áu lúma Búngiu Úguchili ában méme wagía.

³¹ Ábayati jabúdajan juríu dübü lun jachúráguni luágun.

³² Ába laríñagun Jesúsu joun.

—Gíbeeli cátei buíti nadüga jigíbugiñe láu lubáfu Búngiu, ¿cábago lídaangiñe uágu jíchaagua dübü nuágu?

³³ Ába jaríñagun juríu lun.

—Míchaagunbadiwa dübü buágu luágu ni cáta buíti badüga, ladüga anába báali lan Búngiu láu berérun. Wügüri rügüñadibu, áni bíchaaguña búngua quei Búngiu.

³⁴ Ábati laríñagun Jesúsu joun.

—Bürúwati lídan jilúrudun luágu aríñaga lan Búngiu. “búngiu buri jugúya”.

³⁵ Subúdi woun luágu siñá lan leyéedawagún láu le taríñagubei Lerérun Búngiu, áni aríñagatu líburu tugúya luágu wa lániña Búngiu gürígia ja erésibirubalin lerérun lun jíchuguni joun gürígia, quei búngiugu.

³⁶ Ánjeinti anúadaja lubáalina Búngiu, ába loúnajanina ubouágun, zída liñáti jaríñagunbei luágu anába náni láu naríñagun luágu Liraü nan Búngiu?

³⁷ Ánjein madügün nan cátei lé buri ladügübei Nüguchi, mafiñera jumá nun,

³⁸ ánjein nadüga, íbini mafiñerun jumá nun, afiñe jumá luágu buri cátei le nadügübei, subúdi jumámugei luágu njein lan Nüguchi nidan, áni anájein lan giñe lídan Nüguchi.

³⁹ Ábaya jálugun jadáürüni, ába leséfurun jawei.

⁴⁰ Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñi lubei meja labásteragúdaja Juan.

⁴¹ Sarágu jáña gürígia ñüdüntiña aríjei, ába buri jaríñagun.

—Láu sun madügün lan Juan ni ában miláguru, inárüni sun le laríñagubei luágu wügüri le.

⁴² Ába jafiñerun sarágu gürígia luágu Jesúsu lídan fulásu ligía.

11

Loúnwen Lázaro

¹ Ñiñein ában wügüri sánditi, gíriti Lázaro, lílana fulásu le gíribei Betánia, le tageíra María túma Márta to tibusaña.

² María tugúya, to lítu Lázaro le sándibei, tugúya to éseruboun ibíñei luágun lugúdi Jesúsu, ába tarágajani láu tídiburi.

³ Ábati jóunajan bián ítunu ja, aríñaga lun Jesúsu.

—Jesúsu, sándiñeintia bumáda.

⁴ Dan lagáambunbalin Jesúsu cátei le, ába laríñagun.

—Mámabei ouweni lébeja cátei lídaangiñe sándi le, lúntibei larijiniwa luweírigin Búngiu, lúma giñe lun larijiniwa luweírigin Liraü Búngiu lídaangiñe sándi ligía.

⁵ Láu sun weíri lan jínsiñe Márta, María, lúma Lázaro lun Jesúsu,

⁶ dan le jaríñawagúnbei lun luágu sándiñein lan Lázaro, reideigili bián wéyu lídan fulásu le ñi lubei.

⁷ Lárigiñe, ába laríñagun joun láni disípulugu.

—Queímounya Judéa.

⁸ Ábati jaríñagun lun.

—Maésturu, málügili lueigiñe jálugun juríu jáfarunibu láu dübü ñi, ¿busényadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eíbuga ában gürígia wéyuagu, machúgeragúnbei, ladüga laríjubei lan larúgounga le yábei ubouágu,

¹⁰ ánjein eíbuga árieibu, lachúgeraguba ladüga lubúriga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neíbuga agágudajei.

¹² Ábati jaríñagun disípulugu lun.

—Maésturu, ánjein arúmuga lubei, lareídaguárügü líña.

¹³ Míni lánti Jesúsu luágu jíla lan Lázaro, jarítagunti disípulugu luágu luágu lan furúmieguarügü arúmuguni ladímureja.

¹⁴ Ábati laríñagun Jesúsu joun, furáangu.

—Jilá Lázaro.

¹⁵ Gúndaatina láu úa nan ñi, ladüga buítimaati itara jun, affñe jumámuga. Queímoun waríjei.

¹⁶ Ábati lariñagun Tomás, le únbei jariñaga Mádou, joun jíbiri disípulugu.

—Queímoun giñe, jilá wamámuga úara lúma.

Jesúsu ásaaragüdübei lídaangiñe oúweni, ligía íchiga íbágarí

¹⁷ Dan le lachülürünbei Jesúsu, gádürüjali wéyu lueígiñe labunún Lázaro.

¹⁸ Lidíse Betánia lueí Jerusalén quei bián quilómetros dimí.

¹⁹ Sarágu jáñati jádaangiñe juríu ñüdüntiña Jerusalengiñe bisídoun Márta túma María lun jíchugun ñurúguauú joun luágu loúnwen jamúlen.

²⁰ Dan tagáambunbei Márta luágu níteeli lan Jesúsu achülüreina, ába táfuridun lubároun, ánjoun María, ába teréderun múnada.

²¹ Ába tariñagun Márta lun Jesúsu.

—Lun jamúga ya ban, moúnwenti jamúga namúlen,

²² áni subúditi nun luágu líchugubei lan Búngiu sun le bamúriajan lúma bun.

²³ Lariñaga Jesúsu tun.

—Labágaridayaba bamúlen.

²⁴ Tariñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujoún wéyu.

²⁵ Ábati lariñagun Jesúsu tun.

—Áu le ásaaragüdübaliña jiláaña, rúnei jabágarí joun lárigoún. Le affñeti nuágu, gayáraati loúnwen, labágaridayaba,

²⁶ áni sun le wíngangilibei áni affñeti nuágu, labágariduba giñe lúma Búngiu súnwandan. ¿Affñetibu?

²⁷ Tariñaga lun.

—Ánja, Nabúreme, affñetiña luágu bugúya lan Crístubei le Liraü Búngiu, lé meja lúnbei liábin ubouágun.

Layájun Jesúsu lubádu lumúaja Lázaro

²⁸ Lárigiñe tariñaguni Márta le, ába tídin ougoun María, ába tariñagun tun jóunguarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu.

³⁰ Mebélugiliti Jesúsu ubúrugun, lídaañein fulásu le ñi lubei tadárierei Márta.

³¹ Dan le jaríjinbei juríu ja ñibaña múnada túma María ámalijoun tásaarun ába táfuridun furésegeina, ába jóúdin tárigi, jarítagun luágu teíbuga lán yebe luágu umúajaü ayájua.

³² Dánti le tachülürünbei María le ñjin lubei Jesúsu, ába tájuduragun ligíbugiñe, ába tariñagun.

—Nabúreme, lun jamúga ya ban, moúnwenti jamúga namúlen.

³³ Dan le laríjin Jesúsu tayájun María jáma juríu ja ñübinbaña túma, ába lírudagun tídan lanígi,

³⁴ ába lariñagun joun.

—¿Jalíasan jábunei?

Ába jariñagun lun.

—Jigábu baríjei.

³⁵ Ába layájun Jesúsu.

³⁶ Ábati jaríñagun juríu.

—¡Aríja jumá luweírín meja línsiñe lun!

³⁷ Níñanu jádaangiñe aríñagutiña.

—Níján le aríjagüdübalin wügüri le maríjinbei, ¿siñáti jamúga funásan ladügün lun moúnwen lan Lázaro?

Lásaarun Lázaro lídaangiñe oúweni

³⁸ Ábaya tírudagun lanígi Jesúsu, ába layárafadun lun umúajaü. Umúajaü ligía ában júyu luágu dübü, ñíñein ában dübü lidaüme.

³⁹ Ába lariñagun Jesúsu.

—Gidájumei dübü.

Ába tariñagun Márta lun.

—Mósutia jingiaali lan ladüga gádürü wéyu lueígiñe loúnwen.

⁴⁰ Ába lariñagun Jesúsu tun.

—¿Másan aríñagatina bun luágu ánjabu lan afíñe nuágu, barijubei lan luweírigin Búngiu?

⁴¹ Ábati jagídaruni dübü, ába larijin Jesúsu siélun, ába lariñagun.

—Núguchi, teínqui numútibu luágu bagáambunina.

⁴² Subúdi numúti luágu agáamba bánina súnwandan, nariñaguñein líra jawágu güriquia ja, ja yábaña, lun jafiñerun luágu amürü lan oúnajabalina.

⁴³ Lárigiñe lariñaguni cáte le, ába lagúaragun.

—¡Lázaro, furíba ñígiñe!

⁴⁴ Ába láfuridun jíláali láu lújabu lúma lugúdi gürágu táu gamísa, lúma ligíbu táu ában gamísa. Ába lariñagun Jesúsu joun.

—Farára jumeí, ígira jumeí lun lídin.

Elédeguni lun lárügüdüniwa Jesúsu

(Mt 26.1-5; Mr 14.1-2; Lc 22.1-2)

⁴⁵ Láu lasúseredun líra, sarágu jádaangiñe juríu ja ñüdünbaña túma María, aríja jameí le ladügübei Jesúsu, ába jafiñerun luágu.

⁴⁶ Níñanu jádaangiñe, ába jóudin jámoun fariséogu, ába jabájüdaguni le ladügübei Jesúsu joun.

⁴⁷ Ábati jayábin fariséogu jáma jábutigu fádirigu, ába jóúndaragun jáma jíñun-ágei agúmadijatiña, ába jaríñagun.

—¿Cábasan wadüga? Ladáaguñatia wügüri le sarágu miláguru.

⁴⁸ Ánjeinti wígira ítara, jafiñeruba sun güriquia luágu, ábamei jayábin gumádimatiña Rómata, ábame jagúmuchaguagüdünnun walígilisin láu sun warásan.

⁴⁹ Níñein ában jádaangiñe, gíriti Gáifasi, ligía jábutibeí fádirigu lídan irúmu ligía, ába lariñagun joun.

—Ibidiñeti ni cáta jun,

⁵⁰ maríjin jumeí luágu buítima lan woun lun loúnwen ábanrügü wügüri jawágu jíbiri, máma lun lagünrinchawagún sun warásan.

⁵¹ Máma láu láni Gáifasi lúngua lariñagei líra, ladüga quei ligía lan fádiri le íñutimaabei lídan irúmu ligía, ába lariñagagüdüni Búngiu lun, luágu loúweba lan Jesúsu jawágu juríu,

⁵² áni mámarügü jawágu juríu, lun giñe loúndaruniña sun lirájüñü Búngiu ja díseguabaña jawáriuagua.

⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴ Ligía ába lubei meibugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíriti Efraín, yaráfa lun fulásu mageírawati. Ába leréderun ñi jáma láni disípulugu.

⁵⁵ Yaráfaaliti jafédun juríu le gíribei páscua, sarágu jáña gürígia ñüdüñ Jerusalén lun jadügüni igáburi le lánina jarúmadun lubáragiñe fédu ligía.

⁵⁶ Jáluajañeinti Jesúsu, dánti le témpulurugúñanu lan, ába jálügüdajan jámagua. —¿Ca jaríñagubei? ¿Liábinba lídan fédu, ódi miábinbei?

⁵⁷ Rújañati fariséogu jáma jábutigu fádirigu dimúrei lun le lan asúbudiruti jalíañein lan Jesúsu, lun lan laríñaguni, barü jamámugei adáüra.

12

Tájurudaguni ában würi lugúdi Jesúsu

(Mt 26.6-13; Mr 14.3-9)

¹ Sísi wéyu lubáragiñe páscua, ába lídin Jesúsu Betánia, le ñí lubei lagánawa Lázaro le lásaaragüdübei jádaangiñe jiláaña lúnya labágaridun.

² Ába jadügün ában adíneruni ñi luágu láni fuleísei, Márta, tugúya éjeeraguboun, Lázaro ában jádaangiñe ja ñünbaña luágu dábula lúma Jesúsu.

³ Ábati tanügün María ában paénti ibíñei le séruti, ába tájurudaguni lugúdi Jesúsu láu, ába tarágajani láu tídiburi, ába lejmougadun ibíñei ligía sun ñi múnada.

⁴ Ába laríñagun Júdas Iscarióte, le liraü Simón, ában jádaangiñe láni Jesúsu disípulugu, le méme lúnbei lalúguruni.

⁵ —¿Ánsan malúgurún lubei ibíñei le luágu ürüwa-san fiádürü lun jíderawagún gudémetiña?

⁶ Laríñagunbei Júdas ítara, máma luágu berése lan jáu gudémetiña, laríñagunbei ítara ladüga jíweru lan, áni queiti ligía lan gámabarun lágei seínsu, ábaja líwerujan lídaangiñe le íchugúbei tídoun.

⁷ Ábati laríñagun Jesúsu lun.

—Ígiraboún, taráanseruñadina lubá lachülürün luwéyuri nábunúniwa.

⁸ Súnwandan ñibaña lan gudémetiña jídan, ánjeinti áu, mámaba súnwandan júma nan.

Elédeguni lubá Lázaro

⁹ Ába jasúbudiruni sarágu jádaangiñe juríu luágu níjein lan Jesúsu Betánia, ába jóúdin ñi, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jiláaña.

¹⁰ Ába giñéti juáradun jábutigu fádirigu lídan ában lun giñe jáfaruni Lázaro,

¹¹ ladüga sarágu jáña lan juríu adiseduntiña jawei lun jafíñerun luágu Jesúsu, lídaangiñeti Lázaro.

Lebélorun Jesúsu ubúrugun Jerusalén

(Mt 21.1-11; Mr 11.1-11; Lc 19.28-40)

¹² Sarágu jáña gürígia ñüdüñtiña Jerusalén lubá fédu le páscua, larúgan, ába jasúbudiruni luágu lachülürüba lan Jesúsu ñijin ubúrugun.

¹³ Ábati játüjan tubána fáluma, ába jáfuridun lubárun Jesúsu agúarajeina.

—¡Uweíriguni lun Búngiu! ¡Biníwati le ñübinbei lídan líri Wabúreme! ¡Biníwati lurúeite Israé!l

14 Ába ladárirun Jesúsu ában burígü, ába laweínruni quei laríñagun tídan Lerérun Búngiu.

15 Manúfudebá, ubúrgu le Sión, níten burúeite waríñu luágu ában burígü.

16 Úati yebe gunfaráanda jamáni láni disípulugu cátei le wéyu ligía, lárigiñe, dan le belújali Jesúsu lídoun luweírigun yágüta siélu, ába jarítangun luágu bürúwa lan sun cátei le luágu, áni ítara líña lan lasúseredun lun.

17 Ja güriúa ja ñíbaña dan le lagúarun Jesúsu lun Lázaró lídaangiñe lumúaja, ába lásaaragüdüni lídaangiñe ouweni, abájüdagua jamúti le jaríjubei.

18 Ligía lébubei jáfuridun güriúa erésibirei Jesúsu, ladüga jagáambun luágu miláguru le ladügübei.

19 Ábati jaríñagun fariséogu jámagua.

—Arija jumáli luágu, siñá lan ladügüniwa ni cáta, sun güriúa añágüran lúma.

Jáluajani güriégu Jesúsu

20 Ñíñanu güriégu jádan güriúa ja ñüdümbaña Jerusalén lun jájuduragun lun Búngiu,

21 ába jayábin güriégu jagía lúmoun Felípe, le Betsáidana, ñi Galiléa, ába jaríñagun lun.

—Buséntiwa waríjini Jesúsu.

22 Ába lídin Felípe, ába laríñaguni lun Andrés, ába jóudin biángubei jagía abájüdaguei lun Jesúsu.

23 Ábati laríñagun Jesúsu joun.

—Chülüja óra lun líchugüniwa uweíriguni nun, áu le Wügüri Garaüwarügüti.

24 Ninárün jáu luágu ánjein lan máburujan ában lágu türígu múarugun lun louñwen, ában mémebei águu, ánjein ouwe, lalúbajouba sarágu lídaangiñe.

25 Le jósiñejabuti lun libágari, leféridirubei, ánjein le mebéresenti láu libágari lídan ubou le, lareídubei lubá íbágari le magúmchaditi, siélu.

26 Le busénti lesériwidunina, lúnti lafálarunina, áni le ñi numuti, ñíbei gíñe le esériwidubalina. Le esériwidutina, líchuguba Núguchi uweíriguni lun.

Ladímurejan Jesúsu luágu louñwen

27 ‘Níjein ában ouñwenbun líbe samínaü nuágu guetó. ¿Cábasan nariñaga? ¿Nariñaga funa. “Núguchi, sálba bána lídaangiñe le lúnbei lasúseredun nun guetó”? Uá, lun líra niábin.

28 Núguchi, íñurúalá bíri nídaangiñe.

Ábati lagaambúniwa ában umálali siélugiñe le aríñagubei.

—Íñúra náali níri bídaangiñe, áni niñúrüyabei.

29 Ábati jaríñagun güriúa ja ñíbaña agáambaja luágu wayújururu lan, jíbiri aríñaga.

—Ában ánjeli adímurejabei lun.

30 Ábati laríñagun Jesúsu joun.

—Mámatia luágu nufúleisein lagaambúa umálali le, luágu jufúleisein.

31 Niján dan ligia lun lagúserawagüdün ubou, áni guetóba leféridirei Máfia, le agúmadijabei lídan ubou le, lubáfu.

32 Dánmeti le niñurúniwa múarugugíñe, nanügübaña súngubei númoun.

33 Láu líra laríñaguñein luágu louweba lan luágu ában gurúwa.

34 Ába jaríñagun gürígia lun.

—Agáambaadiwa laliijoún tídan walíburun to lánina lilúrudun Moisés luágu labágariduba lan Cristu lun sun dan. ¿Ída liñáti baríñagunbei luágu liñurúaba lan Wügüri Garaüwarügüti? ¿Cáteigi Wügüri Garaüwarügüti ligía?

35 Ábati lariñagun Jesúsu joun.

—Níchiga mémebei larúgounga jun luágurügü murúsun dan. Ebuga jumá lídan larúgounga ligía sun anájagua lan júma lun gayáraabei lan jachülürün le ñíjin lubei jabúseera jachülürün, márügüdün lámugaün lubúriga, ladüga le eíbuguti lídan lubúriga, ibídiñeti lun jalíñouñein lan.

36 Afíñe jumá lubeiti nuágu sun anájagua lan júma lun lirájüñü jumá larúgounga.

Láriñe lariñaguni Jesúsu sún buri cátei le, ába lídin, ába larámudagun jawei.

Lébuna mafíñen jamá juríu luágu Jesúsu

37 Láu sun adüga lan Jesúsu sarágu miláguru jagíbugiñe, mafíñetiña luágu.

38 Láu líra jagúnfulirei le lariñagubei proféta Isaías.

¿Cásan afíñerubei luágu wáni ugánu?

¿Ca un larúfudei Wabúreme Búngiu lubáfu?

39 Quei mafíñerun jabei, ába lasúseredun le ámu dimúrei le lariñagubei Isaías tídan labürüjan, joun.

40 Darú lumuti Búngiu jaríjin, derégüda loun janígi,

lun maríjin jamá láu jágu,

úame gunfaráanda jamá,

mayábin jagíame nun lun nareídaguagüdüniña.

41 Lariñagunbalin Isaías le luágu Jesúsu ladüga aríja láali lan luweírigun.

42 Láu sun líra, sarágu jáña jádaangiñe juríu afíñerutiña luágu Jesúsu ásta jádaangiñe ábutigu, áni maríñagun jamúti bougudi, le janúfude jawei fariséogu, luei jabúguniña tídaangiñe jalígílin.

43 Ladüga gúndaatimaatiña láu inébesi le jíchugubei gürígia sügü láu le líchugubei Búngiu.

Lagúseragüdübaña dimúrei buri le lariñagubei Jesúsu gürígia

44 Ába lariñagun Jesúsu láu umálali jéreti.

—Le afíñeti nuágu, máma rügüñein nuágu lafíñera, afíñeti giñe luágu Núguchi le oúnajabalina.

45 Le giñe aríjitina, lariñiñein giñe le oúnajabalina.

46 Áu lámpubei, niábinbei ubouágun lun sun lan ja afíñetiña nuágu, merédera jamámuga lídan lubúriga.

47 Ánjein le agáambuti nerérun áni madügünti gásu láu, máma áu asíadirubalin, ladüga máma niábiña lun nasíadiruniña gürígia ubouágu, niábiña asálbaraña.

48 Le mebéresenti náu, madügün ligía gásu láu nerérun, níjein lúnti lasíadiruni. dimúrei buri le aríñaga náalibe, ligíaba asíadirei lídaanme lagúmujoún wéyu.

49 Ladüga madímurejaantina luágu náni núngua, Núguchi le oúnajabalina, ligía aríñagubalin le lúnbei nariñaguni nun lúma le lúnbei narúfudajani.

50 Áni subúdi numúti luágu barü lan lugúmadin Núguchi ibágari magúmchaditi joun ja adügübalin le lubei. Le lubeiti nariñagubei, nariñaguni quei lariñaguni Núguchi nun.

13

Lachíbuni Jesúsu jagúdi láni disípulugu

¹ Ábanrúgaali wéyu lubá fédu le páscua. Subúdi láali Jesúsu luágu chülüja lan óra lun lígiruni uboú le lun lídin lúmoun Lúguchi. Súnwandan meja jínsiñe jamá lánigu ja uboúagubaña lun, guetó larúfuduñeinti línsiñejabu lídan luweírín-ágei.

²⁻⁴ Dálaalíti Máfia larítapun tídoun lanígi Júdas Iscarióte lun ledéregeroni Jesúsu joun láganiñu. Jesúsu, láu sun subúdi láni luágu lúmagiñe lan Búngiu liábin, luágu lúmounba lan giñe Búngiu lagíribuda, luágu giñe rúlaali lan Úguchili sun cátei lújaburugun, ába larúfuduni luweírín-ágei únabuni le luágubei. Dan lubeíti jadíneruña lan, ába lásaarun luegiñe dábula, ába larágachunun gamísa to tigibuaguboun ladáúragnun, ába lagürün ában tuáya liránaagua.

⁵ Ába líchugun dúna lídoun ában dabárasí, ába lachíbuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachíbaali lan lugúdi Simón Pédro, ába lariñagun lun.

—Nabúreme, ¿bachíbaalisan nugúdi?

⁷ Ába lariñagun Jesúsu lun.

—Guetó, úati gunfaráanda báni le nadügübei, gunfaráanda bubeí larígiñe.

⁸ Ába lariñagun Pédro lun.

—¡Machíbun bubeí nugúdi!

Lariñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába lariñagun Simón Pédro lun.

—Mámarügüla nugúdi bachíba, chibábei giñe nújabu lúma nigíbu.

¹⁰ Lariñaga Jesúsu lun.

—Le sun liñábei lágoun, lugúdi rügüñein abúseera lachibúniwa, ladüga jarúmati líbiri lúgubu. Jugúya, jarúmatün, mámarügü líña sun jugúya.

¹¹ Le lariñagunbei luágu máma lan sun jagía jarúmatiña, ladüga subúdi láni cába lan edéregerei.

¹² Lásun lachíbuni Jesúsu jagúdi, ábaya ladáúrurunun gamísa to larágachuboun, ábaya lañúurun luágu dábula, ába lariñagun joun.

—¿Gunfaráanda jumútisan le nadügübei jun?

¹³ Jugúya agúajatün nun Maésturu, lúma Nabúreme, áni richátün ladüga áu ligía,

¹⁴ ánjeinti chibá nubálin jugúdi láu sun Jumáesturun nan áni Jabúreme, lúnti giñe jachíbuni jugúdi júmagua.

¹⁵ Rújadina ában jémpulu jun lun jadügüni líbe méme le nadügübei.

¹⁶ Ninárün jáu luágu míñugun lan ní ában músu lueí liyúbudiri, ní ában le oúnajoúti lueí le oúnajabalin.

¹⁷ Ánjein gunfaráanda jumá buri cátei le áni adüga jumeíme, gúndaabadün.

¹⁸ ‘Mámatia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatiimaati. Áni lúnti lagúnfulirún le tídaanbei Lerérun Búngiu. “Garábagua le eígubei núma, nuágun.”

¹⁹ Nariñaguñein le jun lubáragiñe lasúseredun, lun dánme lan le lasúseredun, affiñe jumámuga luágu áu lan Crístubei.

²⁰ Ninárün jáu luágu le lan erésibiruti le noúnajan, resíbi lumútina giñe, áni le erésibirutina, resíbi lumúti giñe le oúnajabalina.

Ladímurejani Jesúsu luágu ledéregerubei lan Júdas

(Mt 26.20-25; Mr 14.17-21; Lc 22.21-23)

²¹ Lásun laríñaguni Jesúsu sun cátei le, ába lasándirun sarágu íruni tídan lanígi, ába laríñagun furáangu.

—Ninárün jáu luágu ledéregerubadina lan ában jídaangiñe.

²² Ábati jagúmeserun disípulugu aríagua jawoúguoún, ibídiñounga joun ca lan jádaangiñe uágubei ladímureja Jesúsu.

²³ Áu Juan, le abürüjabarun gárada to, ában jádaangiñe disípulugu, le weírubei ínsiñe lun Jesúsu, loúbagiñeñádina lídan adíneruni,

²⁴ ába ladügün Simón Pédro seíni nun lun nálügüdüni Jesúsu ca lan jádaangiñe uágubei ladímureja.

²⁵ Ábati nayarafaduntima lun Jesúsu, ába naríñagun lun.

—Nabúreme, ¿cáteisán lúnbei ledéregerunibu?

²⁶ Ába laríñagun Jesúsu nun.

—Nadüdüragüda murúsun fein, le únti níchigoun, ligíaba edéregerana.

Ábati ladüdüragüdün murúsun fein, ába líchugunun lun Júdas Iscarióte, le liraü Simón.

²⁷ Quei larügüdünun Júdas fein tugúya, ítara lebéllurun Máfia tídoun lanígi. Ábati laríñagun Jesúsu lun.

—Le lúnbei badügüni, adügabei furése.

²⁸ Úati gunfaráanda láni ni ában jádaangiñe ja eigibaña luágu dábula ca lan uágu laríñagei Jesúsu líra lun.

²⁹ Quei Júdas lubei táubei lágei seínsu, sun jaríñagun yebéti laríñaguña Jesúsu lun lun lagáñijani le jabúseerubei lubá fédu, o lun lan líchugun seínsu joun gudémetiña.

³⁰ Lárigiñe leíginun Júdas fein, ába láfuridun. Gúñeeli óra ligía.

Iséri gumádi

³¹ Lárigiñe láfuridun Júdas, ába laríñagun Jesúsu.

—Laríjúa nuweírigin, áu le Wügüri Garaüwarügüti, guetó, arijúame luweírigin Úguchili nuágu.

³² Ánjeinti arúfuda nubálin luweírigin Búngiu, larúfudubei giñe Búngiu nuweírigin, áni ladügübei madíse.

³³ Nirájüñü, úaadináme júma sarágu dan. Jáluajabadina, le méme naríñagubei joun juríu naríñagayaali jun guetó. Siñábei jídin le ñíjinba lubei nídin.

³⁴ Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti giñe jínsiñegua jumá júngua.

³⁵ Ánjaün jínsiñegua júngua, jasúbudirubei sun gürígia luágu náni jumá disípulugu.

Ladímurejani Jesúsu luágu leyéedaguba lan Pédro luágu

(Mt 26.31-35; Mr 14.27-31; Lc 22.31-34)

³⁶ Ába laríñagun Simón Pédro lun Jesúsu.

—¿Jalíñounbadibusan, Nabúreme?

Ába laríñagun Jesúsu lun.

—Siñáti bafálarunina le ñíjinbadina lubei guetó, lachülürüba wéyu lun bafálarubadina lan.

³⁷ Laríñaga Pédro lun.

—¿Ca uágu siña lubei nafálarunibu guetó? Aráanseedina lun níchuguni nibágari buágu.

³⁸ Laríñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu ürüwa weíyaasu lubáragiñe layúgurujan gáyu.

14

Jesúsu, ligía ùmabei lun lúmoun Úguchili

¹ Merédera jumá láu líbe samínaü, afiñe méme jumá luágu Búngiu, afiñe méme jugúyame nuágu.

² Níjein sarágu ubáraü tídan lúban Nóguchi lun jaganoún gürígia ñi, lun jamúga máma lan ítara líña, aríñaga náali jamúga jun. Neíbuga lubeiti aráanseja ában ubáraü jubá.

³ Lárigiñeme nídin, aráanse neíme ubáraü ligía, ábame nagíribudunya lun nanügünün númagua, lun ñi jumá le méme ñí numuti.

⁴ Subúdi jumúti jalíñounbadina lan, subúdi jumúti gíñe ùma.

⁵ Laríñaga Tomás lun.

—Nabúreme, ibidíñeti woun jalíñounbadibu lan, ¿ída lubáti wasúbudiruni ùma?

⁶ Laríñaga Jesúsu lun.

—Lun lachülürüniwa lúmoun Búngiu, áu ùmabei, áu inárüni, áu íbágari. Nueígiñe rügüñein gayára lan lachülürüniwa lúmoun Búngiu Úguchili.

⁷ Lun jamúga subúdi nan jun buídu, subúdi jumúti jamúga gíñe Nóguchi, subúdi jumáaliti lúmagiñe guetó, ladúga aríjañaja jumáali láu jaríjinina.

⁸ Laríñagati Felípe lun.

—Arúfudabeí Úguchili woun, buídurügaalime woun.

⁹ Laríñaga Jesúsu lun.

—Felípe, lújadina júma, ¿ibidíñegidina bun? Le aríjitina, laríjiñein gíñe Búngiu Úguchili, ¿cáti uágu baríñaga nun lun narúfuduni Búngiu Úguchili jun?

¹⁰ ¿Mafíñetibusan luágu anájein lan lídan Búngiu Úguchili, níjein lan gíñe Búngiu Úguchili nídan? Lé buri cátei le nariñagubei jun, máma lan láu náni núngua nariñagei, Búngiu Úguchili le aganoúbei nídan, ligía adügübalin luwádigimari guánarü.

¹¹ Afiñe jumá nun luágu anájein lan lídan Búngiu Úguchili, áni lan níjein gíñe Búngiu Úguchili nídan, íbini luágurügü cátei lé buri nadügübei, afiñe jumá nun.

¹² Ninárün jáu, luágu le lan afiñeti nuágu, ladügübei lan cátei lé buri nadügübei, ladügüba buri cátei weínamutimaati, ladúga áu, neíbuga le ñíjin lubei Nóguchi.

¹³ Sun le jamúriajan lídan níri, nadügübei, arúfuda námugei luweírigun Nóguchi.

¹⁴ Nadügübei furúmiegurügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ Ánjein jínsiñe nubei jun, gúnfuli jumá láu le nubeíbei,

¹⁶ ábame nayúmurañun lun Nóguchi lun loúnajan ámu jun newéñegua lun líderagunün, lun gíñe líchugun gurásu jun. Ligíaba Sífiri Sándu le subúdjabúbei lun sun inárüni, júmabei súnwandan.

¹⁷ Ja lánigu ubou le, siñáti jerésibiruni Sífiri Sándu ligía, ladüga siñá lan jarjini ni jasúbudiruni, ánjein jugüya, subúdi jumáli, ladüga nújein júma áni leréderuba jidan.

¹⁸ Mígirun nubádün jábugua, nagíribudayaba lun júma nan.

¹⁹ Málüjadina ánjana marjín jamá gürígia, ánjein jugüya, jarjibadina, áni gabágaribadün ladüga wínwañu níña lan.

²⁰ Lárigiñeme liábin Sífiri Sándu lun júma lan lun sun dan, jasúbudirubei luágu anájein lan lídan Nüguchi, jugüya nídan, áu gíñe jidan.

²¹ Le subúdijabuti lun nugúmadin áni úaragu ligía lúma, arúfuda lumúti luágu jinsiñe nan lun le tímatimaati. Áni jinsiñejabúbei Nüguchi lun le jinsiñejabuti nun, jinsiñebei gíñe nun, arúfudagua áume nungua lun.

²² Ába laríñagun Júdas (mámata le Iscarióte).

—¿Cásan uágu barúfudaguba lubei búngua woun, máma joun gürígia ja lánigu ubou le?

²³ Laríñaga Jesúsu lun.

—Le jinsiñejabuti nun, adügati gásu láu le nubeibe, áni línsiñeduba lun Nüguchi, ábame wayábin, áu lúma Nüguchi, agánawa lúma.

²⁴ Le mínsiñejabuti nun, madügúnti gásu láu le nubeibe. Dimúrei le naríñagubei, máma náni, láni Nüguchi le oúnajabalina.

²⁵ ‘Naríñaguñein sun le jun láu anájagua lan júma,

²⁶ Sífiri Sándu le lúnbei loúnajani Nüguchi lídan níri lun líderagunün, larúfudajaba jun, larítaguagüdúbadün gíñe luágu sun le aríñaga náalibeí jun.

²⁷ ‘Neibuga júmágiñe, nígiraali ñurúguau júma—ában luwúyeri ñurúguau le áurügübei gayára lan níchiguni. Mítaraanti queísi ñurúguau le líchugubei ubou. Magíbedalá jisáminan, manúfude jugúyame.

²⁸ Agáamba jumáli naríñagun luágu neibuga lan, áni nagíribudayaba lan lun júma nan, lun jamúga jinsiñe nan jun láu jinárün, gúndaatün jamúga láu jasúbidiruni luágu neibuga lan lúmoun Nüguchi, ladüga ligía íñugutimaati nueí.

²⁹ Ligía aríñaga gíñe nubálin le jun, lun dánme lan lasúseredun, affíñe jumámuga.

³⁰ ‘Madímurejaanjadina sarágu júma, ladüga níteeli le agúmadijabeí lídan ubou le. Láu sun mabáfu lan nuágu,

³¹ lúnti ítara lúba lan lun lasúbudiruni ubou luágu jinsiñe lan Nüguchi nun, áni adüga náni le lubeibe nun. Sarájuma, queímoun yágiñe.

15

Tídibu beibe lúma tilímun

¹ Laríñaga Jesúsu.

—Ítara níña quei ában tídibu beibe le tímatimaati, Nüguchi, ítara líña quei le oúnigirubarun nádü.

² Chaün lumuti furúmieguarügü lídaangiñe nilímun le mínti, atírímuja lumúti le gíinbei, jarúmagüdaleí lúntima lagíndun.

³ Jugüya, jarúmaadün lárigi narúfudajan jun.

⁴ Lídan méme jumá ában núma quei lídaañadina lan ában júma. Ában límu siñáti lagíndun ánjein mámañein lubei luágu ídibu, ítara jíña gíñe, siñáti jagíndun ánjein máma lubei badüleñu jíña nuágu.

⁵ ‘Áu ídibubei, jugüya límu. Le badüleñuti nuágu, badüleñu áu luágu, lagínduba gíbe, siñáti jadügün ni cáta úouga áu.

⁶ Le merédeti badüleñu nuágu, lágurúba bougudin, ábame lamábeidun quei buri límu le abúdajoubei lun lagudúniwa.

⁷ ‘Ánjaün asígira badüleñu nuágu, mabúlieidun jumeíme le narúfudajabei, gayáraabei jamúriajani le jabúseerun, áni jíbíjubei.

⁸ Ibíjati Núguchi inébesi dan le gíbe lan jagíindun, áni arúfuda jumúti luágu náni jumá disípulugu ja tímataatiña láu líra.

⁹ Jínsiñetün nun ítara quei nínsiñe lun Núguchi, ítara méme jumá lubeíti lídan ínsiñeni le nánibeí jun.

¹⁰ Ánjaün nüdün láu le nubeíbei, lídan mémebadün ínsiñeni le nánibeí jun, ítara quei nídin láu le lubeíbei Núguchi, áni lídan mémeñadina ínsiñeni le lánibeí nun.

¹¹ ‘Nadímurejánbei jun ítara lun gayára lan jasúbusiruni úgundani le níchugubei, le gumúti.

¹² Niján nugúmadinbei. lun jínsiñegua jumá júngua quei jínsiñe nun.

¹³ Luweírín-ágei ínsiñeni le gayáraabei gáni láni gürígia, lun líchuguni libágarí jawágu lumádagu.

¹⁴ Numádagu jugúya, ánjein jadúga le nubeíbei.

¹⁵ Manügün náadün quei músu, ladúga ibídiñeti le ladügübei liyúbudiri músu lun, nanügünün quei numádagu ladúga subúdigüda náali sun le laríñagubei Núguchi nun jun.

¹⁶ Máma jugúya anúadajabalina, áu anúadajabalün, áni rújadina dimúrei jun lun jagíindun gíbe, lun gíñe ladúrarun jin. Ítara lúba líchuguni Núguchi sun le jamúriajan lúma lídan níri jun.

¹⁷ Ítara líña lubeíti nugúmadin jun lun jínsiñegua jumá júngua.

Iyéreeguti Jesúsu jáu sun lánigu lun ubou

¹⁸ ‘Ánjaün iyéreeguda lun ubou, subúdi jumei luágu áu lan iyéreegudubei lun furúmiñe.

¹⁹ Lun jamúga lánigu jumá ubou, jínsiñetün jamúga joun gürígia ja lánigu ubou quei jínsiñe jánigu joun. Anúadaja numútün jádaangiñe ja lánigu ubou, ligía jiyéreegunbei lun ubou ladúga mámaadün lan láni ubou.

²⁰ Jarítağa jumá luágu le naríñagubei jun. “Úati músu íñuguti lueí liyúbudiri.” Ánjein eíbaaja jamáadina lubeí, jeíbaajabadün gíñe, ánjein giñéti madügün jabei gásu láu narúfudajan, madügünbaña gíñe gásu jáu.

²¹ Jadügübei sun le jun, nueígiñe, ladúga ibídiñe lan le ouñajabalina joun.

²² ‘Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figou ligía.

²³ Ja iyéreejabúbaña nun, iyéreeguti gíñe Núguchi joun.

²⁴ Madúnruntiña jamúga lun jamúga madügün nan ni cáta le úagili adügüti jagánagua, guetó aríja jamáli buri cátei ligía áni láu sun líra iyéreegugidina joun, iyéreegu gíñe Núguchi joun.

²⁵ Wel, lasúseredunbei le ladúga lúnti lan lagúnfulirun dimúrei le bürúwañubei lídan jalúrudun. “Ába niyéreegudun joun, mébunouga.”

²⁶ ‘Dánme liábin Sífiri Sándu le lúnbei líderagunün, Espíritu le lánina inárüni le lúnbei nouñajani luágu loubadina Núguchi, ligiaba adímureja luágu náni fuleísei.

²⁷ Jugúya, jadímurejaba gíñe luágu náni fuleísei, ladúga númañadün lan lúmagiñe furúmiñeti dan.

16

1 ‘Nariñaguñein buri cátei le jun lun mouñwen lan jafíñen nuágu.

2 Jabúgagubadün tidaangiñe jalígilisin, wuríbabei dan jun daríme lun ánjaün lan láfaragua furúmierügü güriúa jilágubei, larítaguba luágu lesériwiduñein lan Búngiu láu líra.

3 Jadügübei líra ladüga masúbudirun jamágili lan Núguchi, masúbudirun jamána.

4 Nariñaguñein le jun, lun dánme lan le lachülürün dan ligía, lun jarítagun luágu aríñaga náali lán meja jun.

Le ladügübei Sífiri Sándu

‘Maríñagun numúti meja le jun lúmagiñe binárü ladüga meja júmañadina lan,

5 ánjein guetó, neíbuga lúmoun le ouñajabalina. Málügüdün lumútina ni ában jídaangiñe jalíñounbadina lan,

6 jírurügütün luágu nariñaguni cátei lé buri jun.

7 Inárüni nariñagubei jun. buítimaati jun lun nídin, ladüga ánjana mídin, miábinbei Sífiri Sándu júmoun lun líderagunün, áni ánjana ñüdüñ, nouñajabei.

8 Dánme liábin, ladáriraguagüdübaña güriúa ja ubouágubaña jouñgua luágu gafígoun jamá, luágu giñe níjein lan ában úma le lánina úarani, luágu giñe lagúseragüdübaña lan Búngiu.

9 Larúfudubei joun luágu gafígoun jamá láu mafíñen jamá nuágu,

10 lasúbudiragüdübei joun luágu úaragua nan, láu larúfuduni joun luágu nídiba lan le ñíjin lubei Núguchi dánme le nígirunün.

11 Líchuguba fe joun luágu lagúseragüdün Búngiu, ladüga agúseragüda láali Máfia, le agúmadijabei lídan ubou le.

12 ‘Gíbegili lúnti nariñaguni jun, jásiñerubei gunfaráanda guetó.

13 Dánme liábin Sífiri Sándu le lánina inárüni, larúfudajabei sun inárüni jun, ladüga madímurejanbei luágu láni lúngua, le lagaámbubei, ligiába lariñaga. Lasúbudiragüdübei cátei lé buri lúnbei lasúseredun jun.

14 Líchuguba inébesi nun, ladüga lerésibiruba lídaangiñe ninárün, ábame lasúbudiragüdüni jun.

15 Sun le lúmabei Núguchi, náni giñe, ligía nariñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasásansiraguba íruni lun ugúndanime

16 ‘Málújadina, ánjana maríjin jumá, múrusunmeya dan lárigiñe, ábayame jaríjinina, ladüga neíbuga le ñíjin lubei Núguchi.

17 Ábati jálügüdagun jádaangiñe láni disípulugu jámagua, ába jariñagun.

—¿Cásan míni lan le? Lariñaga woun luágu málújali lan ánjein maríjin wamá, múrusunya lánme dan lárigiñe, ábayame lan waríjini, ladüga leíbuga lan le ñíjin lubei Lúguchi.

18 ¿Ca míni lan láu “múrusun dan lárigiñe le”? Úati gunfaráanda wamáni ca lan uágu ladímureja.

19 Ába lasúbudiruni Jesúsu luágu busén jama jálügüdaguni, ába lariñagun joun.

—Ariñagatina jun luágu málújadina lan ánjana maríjin jumá, múrusun lánme dan lárigiñe, ábaya lánme jaríjinina. ¿Ligía le uágubei jálügüdagua júmagua?

²⁰ Ninárün jáu luágu jayájuba lan, jírugua jugúyame, ánjañati gürígia ja láni ubou le, jagúndaaruba. Láu sun líra, íbini jíru jumá, lasáansiraguba jírun lun ugúndanime.

²¹ Dan le tagúriajan lan ában würi, súfuritu ladüga chülüja lan lórate igári, lásun agúriajouaali lan irájü, marítangunjaru luágu igári, ladüga ugúndani le tasándirubei luágu agúriajaaru lan ában irájü ubouágu.

²² Ítara líña gíñe, jugúya jírutün guetó, naríjayabadün, ábame ti tabuínchun janígi láu ugúndani, ában ugúndani le úati gayáraati lagídaruni jueí.

²³ Lídaanme wéyu ligía, málügüdün jumádiname luágu ni cáta. Ninárün jáu luágu líchugubei lan Nóguchi sun le jamúriajabei lídan níri lúma, jun.

²⁴ Chülü lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucrístu, le ásiiragúbalin ubou

²⁵ Aríñaga náali buri cátei le jun láu jémpulu, ínítebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili.

²⁶ Lídaanme wéyu ligía, jamúriajaba lúma lídan níri, maríñaguntina luágu nayúmraguba lan lun Nóguchi juágu,

²⁷ ladüga ligía guánarü jínsiñetün lun. Jínsiñetün lun ladüga jínsiñe nan jun, affíñeedün gíñe luágu lúmagiñe lan Búngiu niábin.

²⁸ Lúmagiñe Búngiu Úguchili náfurida, ába niábin lídoun ubou le, guetó nígiraaali ubou le, neíbugaya lúmoun Nóguchi.

²⁹ Ába jaríñagun láni disípulugu.

—Anáti guetó, badímurejaña furáangu, mayúsurunga jémpulu.

³⁰ Aríja wamáali guetó luágu subúdi lan sun cátei bun, moún lumuti bálügüdün luágu ni cáta ladüga subúdi báni jarítangun gürígia. Luágu líra wafíñera luágu lúmagiñe lan Búngiu biábin.

³¹ Ába laríñagun Jesúsu joun.

—¿Affíñedünti guetó?

³² Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábugua, láu sun máma lan nábuguañadina ladüga níjein Nóguchi núma.

³³ Naríñagunbalin sun le jun, lun jadárirun ñurúguaü lídan jaffíñerun nuágu. Jasúfuriruba ubouágu, ganígi jumá, ísirígia náali ubou!

17

Layúmuragun Jesúsu jawágu láni disípulugu

¹ Lárígiñe laríñaguni Jesúsu sun cátei le, ába laríjin siélun, ába laríñagun.

—Nóguchi, chülüja nidáani, rúba inébesi luágu Biraü, ru lámuga gíñe Biraü inébesi bun.

² Rújadibu ubáfu lun Biraü jawágu sun gürígia lun líchugun ibágari magúmuchaditi joun ja bíchugubaña lun.

³ Niján lébunabei ibágari le magúmuchaditi, lun jasúbudirunibu gürígia amürü le Búngiu ábanrügüti, le inárüti, lúma lun jasúbudirunina, áu Jesucrístu le bouñajabei.

⁴ Rújadina uweíríguni bun ya ubouágu, gumú nan gíñe le uágubei bouñajana.

5 Guetóti Nóguchi, rúbei uweíriguni le méme méja nánibei nun biñúwarü lubáragiñe meja ñi lan ubou.

6 'Subúdigüda náali joun ja baságarubaña lídaangiñe ubou lun bíchuguniña nun, cátabu lan. Bánigu meja, ába bíchuguniña nun, ñüdüntiña láu le bubeíbei.

7 Guetó, subúdi jamáli luágu sun lan le bíchugubei nun búmagiñe lan liábin,

8 rúnaali ugánu le bíchugubei nun joun áni resibi jamúti, subúdi jamáli luágu inárüni lan luágu búmagiñe lan niábin, affíñeeña gíñe luágu amürü lan oúnajabalina.

9 'Ayúmuraguatina bun jawágu, mayúmuraguntina jawágu lánigu ubou, nayúmuragun jawágu ja bíchugubaña nun, ladüga báni jamá.

10 Sun le náni, báni, le báni, náni, arijúati nuweírigun jawágu.

11 'Áu, merédeedina ubouágu, ánjein jagía, jeréderuba. Áu, neíbuga búmoun. Nóguchi sánduti, toúnigi báña ja bíchugubaña nun láu bubáfu lueí jeíguadun, lun lídan jamá ában le tímatimaati quei áu búma.

12 Dán meja le jáma nun ubouágu, toúnigi numútiña meja ja bíchugubaña nun láu bubáfu, meféridiruntina ni ában jádaangiñe lueídügü Júdas, lun lagúnfulirun le bürüwañubei tidan Berérun.

13 'Guetó, neíbuga le ñíjin bubeí, luágu anájagua lan ubouágu aríñaga numúti buri cátei le lun jabuínchun láu ugúndani méme le nuágubei.

14 Rúnaali berérun joun, ába jeyéreegudún lun ubou, ladüga máma jamá lánigu ubou ítara queisi máma lan lánigu ubou áu.

15 Mamúriajaantina búma lun baságaruniña ubouáguagiñe, namúriajan búma lun batouñigiruniña lueí Máfia.

16 Ítara quei máma lan láni ubou áu, máma gíñe láni ubou jagía.

17 Derégeguagüda báña jóungua bun, láu lubáfu berérun le inárütibeí.

18 Quei bouñajanina jádoun lánigu ubou láu ugánu lánina asálbaruni, ítara gíñe nouñajaniña jádoun lánigu ubou láu ugánu ligía.

19 Áni derégeguatina núngua bun jawágu, lun gíñe jedéregeragun jóungua bun le tímatimaati.

20 'Máma rügüñein jawágu namúriaja búma, amúriajatina gíñe jawágu ja lúnbaña jafíñerun nuágu dánme le jagáambuni ugánu lánina asálbaruni jámagiñe.

21 Amúriajatina búma lun lídan jamá ában sun jagía, lun ában méme jamá cátei wama quei áu búma, amürü núma, lun lídan jamá ában buídu buídu, lun lafíñerun ubou luágu bouñajan nan.

22 Rúnaali uweíriguni le méme bíchugubei nun joun, lun ában méme jamá cátei quei ában méme wamá cátei áu búma,

23 áu jádan, amürü nídan, lun jayábin lun ában mémebaña lan buídu buídu, subúdi lámugei ubou luágu bouñajan lan áu, áni jínsiñe jamá bun sarágu quei nísíñe bun.

24 'Nóguchi, amürü íchugubaliña nun, buséntina lun númabaña lan le ñí numuti, lun jaríjini uweíriguni le bíchugubei nun, ladüga jínsiñegubeiñadina bun lubáragiñe ladügüniwa ubou.

25 Nóguchi richáguati, ibídiñetibu lun ubou, subúditibu nun, subúdi jamáli gíñe wügüriña ja luágu bouñajan lan áu.

26 Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun gíñe ñi nan já dan.

18

Janügüni Jesúsu adáüra
(Mt 26.47-56; Mr 14.43-50; Lc 22.47-53)

¹ Lárigiñe lariñaguni Jesúsu cátei le, ába láfuridun jáu láni disípulugu lun jóudin loubáfurugun dúna le cedrón. Níñein ában fulásu lé buri ñi lumuti tídibu olívos, ñijin lubei lebélura Jesúsu jáu láni disípulugu.

² Subúdi lumúti giñe Júdas le alúgurubalin Jesúsu, fulásu ligía, ladüga oúndaraguañaajaali Jesúsu ñi jáma láni disípulugu.

³ Ába lubeiti lachülürün Júdas ñijin jáu sarágu súdeara jáma polisia ja tánina témpulu, jóunajan jábutigu fádirigu jáma fariséogu. Gárumatetiña, barútiña giñe lámpu lúma tóchi.

⁴ Quei subúdi láali lan Jesúsu le lúnbei lasúseredun lun, ába láfuridun, ába lariñagun joun.

—¿Ca jáluajabei?

⁵ Ába jariñagun lun.

—Wáluajañein Jesúsu le Nazarétna.

Lariñaga Jesúsu joun.

—Áu Jesúsu ligía le jáluajabei.

Ñíñeinti Júdas le edéregerubalin jáma.

⁶ Dan lariñagunbei Jesúsu joun luágu ligía lan le jáluajabei, ába jeíguadunga múarugún janagóun.

⁷ Ábaya lariñagun Jesúsu joun.

—¿Ca jáluajabei?

Ába jariñagun lun.

—Wáluajañein Jesúsu le Nazarétna.

⁸ Ábati lariñagun Jesúsu joun.

—Ariñagaadinatia jun luágu áu lan. Ánjein áu lubei jáluajabei, ígira jumáña ja lun jóudin.

⁹ Lasúseredunbei líra lun lagúnfulirun le lariñagubei Jesúsu guánarügü. “Meféridirúnti ni ában jádaangiñe ja líchugubaña Núguchi nun.”

¹⁰ Ábati laságarunun Simón Pédro lefeínte, ába líbuguni larígei ában lumúsun fádiri le íñutimaabei gíriti Málco.

¹¹ Ába lariñagun Jesúsu lun Pédro.

—Dáboun befeínte tárigoún. ¿Jarítaguatibu funági luágu moun lan nasúfuriruni oúchawagúni le líchugubei Núguchi lun nasúfuriruni?

Jesúsu ligíbugiñe fádiri le íñutimaabei
(Mt 26.57-58; Mr 14.53-54; Lc 22.54)

¹² Ábati janügüni súdeara, lúma gumándan, jáma japolisían juríu, Jesúsu adáüra, ába jagüraguni.

¹³ Lárigiñe, ába janügüni lúbiñoun Anás. Anás ligía limédamurubei Gáifasi, fádiri le íñutimaabei lídan irúmu ligía.

¹⁴ Gáifasi ligía, le méme meja ariñagubei joun juríu luágu buítima lan joun lun louñwen ában wügüri jawágu sun mútu.

Leyéedagun Pédro luágu subúdi láni Jesúsu
(Mt 26.69-70; Mr 14.66-68; Lc 22.55-57)

15 Ába wouúdin, áu Juan lúma Simón Pédro, lárigi lárigi Jesúsu. Áu, subúditina lun fádiri le íñutimaabei, ábati nebélurun lúma Jesúsu lídoun түbүrүrү lúban fádiri.

16 ánjeinti Pédro, ába leréderun bouúgudi luágu béna. Ligía náfuridunbei, ába nadímurejan túma to ouñgírubalin béna, ába nebélaagüdüni Pédro.

17 Ábati tálügüdüni ouñgírutu béna Pédro.

—¿Ma bugúya ában jádaangiñe láni güriǵia le disípulugu?

Lariñaga Pédro.

—Uá, máma áu.

18 Queiti dilíga lubei, fúguatiñati músu jáma polisía wátu, rára jañáti ñi abácharagua. Ñiñein giñe Pédro jáma, abácharagua larügürügü wátu.

*Lálügüdaguni fádiri le íñutimaabei Jesúsu
(Mt 26.59-66; Mr 14.55-64; Lc 22.66-71)*

19 Ába lagúmeserun fádiri le íñutimaabei álügüdaguei Jesúsu cátaña lan lánibaña disípulugu, cátei lan giñe larúfudajabei.

20 Lariñaga Jesúsu lun.

—Bouúgudi nadímureja ligíbugiñe sun ubouú, súnwandan narúfudajan tídan ligílisi lúma témpulurugu le ñi lubei jóundaragua sun juríu, madügüngidina lubeiti ni cáta arámudaguati.

21 ¿Ca uágu bálügüdana? Álügüda báña ja agáambubalina, jagíalá aríñagei le uágubei nadímureja joun. Subúdi jamúti le nariñagubei joun.

22 Dan lariñaguni Jesúsu cátei le, ába liábin ában jádaangiñe polisía ja tánina témpulun, ába lagáyuajan ligíbuagun, ába lariñagun lun.

—¿Ítara lúba bouñabuni fádiri le íñutimaabei?

23 Lariñaga Jesúsu lun.

—Ánjein aríñaga nubei wuríbati, aríñagabei jalíañein lan luríban, ánjeinti buídu lubei le nariñagubei, ¿ca uágu bagáyuaja nuágu?

24 Ábati louñajani Anás gürágu lun Gáifasi, fádiri le íñutimaabei lídan irúmu ligía.

*Leyéedagunya Pédro luágu Jesúsu
(Mt 26.71-75; Mr 14.69-72; Lc 22.58-62)*

25 Sun dan le, nijágu Pédro abácharagua larügürügü wátu, ába jariñagun lun.

—¿Másan amürü ában jádaangiñe láni güriǵia le disípulugu?

Ába leyéedagun Pédro, ába lariñagun.

—Uá, máma áu.

26 Ábati lálügüdüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ñi lumuti tídibu olívos?

27 Ábaya leyéedagun Pédro, lídan óra ligía, ába layúgurujan gáyu.

*Jesúsu ligíbugiñe Piláto
(Mt 27.1-2, 11-14; Mr 15.1-5; Lc 23.1-5)*

28 Ábati janügüni Jesúsu lúbiñegiñe Gáifasi lun lúbiñoun gumándan. Arúgadeina liñáti, mebelutiñati juríu palásiurugún luei marúma jamá, siñáme gádan lániña adíneruni le lánina páscua.

29 Ligía láfuridunbei Piláto lun ladímurejan jáma, ába lariñagun joun.

—¿Cásan lidúnrunbei güriǵia le jurúma?

30 Ába jariñagun lun.

—Lun jamúga madügün lan wuríbani, medéregerun wamúti jamúga bun.

³¹ Ábati laríñagun Piláto joun.

—Barüjumei, agúseragüda jumei quei laríñaguni jilúrudun guánarü.

Jaríñaga juríu lun.

—Wagía juríu, maríchatywa lun wáfarun ni ában jilágubei.

³² Ítara líña lagúnfulirún le laríñagubei Jesúsu luágu ligáburí ída lúba lan loúnwen.

³³ Ábaya lebélorun Piláto palásiurugun, ába lagúarun lun Jesúsu, ába laríñagun lun.

—¿Amürü Jarúeitebei Juríu?

³⁴ Ába laríñagun Jesúsu lun.

—¿Luágu báni búngua bálügüdjaja luágu líra, ódi ladüga jaríñaguni ámu bun nuágu?

³⁵ Laríñaga Piláto lun.

—¿Juríu funági áu? Binásiñun jáma jábutigu fádirigu, jagía edéregerubalibu nun. ¿Cági bidúnrunbei?

³⁶ Ábati laríñagun Jesúsu lun.

—Narúeijan máma lánina ubou le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábati laríñagun Piláto lun.

—¿Urúei lubeíti amürü?

Laríñaga Jesúsu lun.

—Urúei áu quei baríñaguni. Agüriajouatina, ñübin áu lídoun ubou le lun naríñaguni le inárünibeí. Sun ja gagáambadibaña lun inárüni, agáamba jamúti le naríñagubei.

³⁸ Laríñaga Piláto lun.

—¿Cáteiti inárünibeí?

*Lasiadirúniwa Jesúsu lun ouweni
(Mt 27.15-31; Mr 15.6-20; Lc 23.13-25)*

Lárigiñe ladügüni Piláto álügüdjajani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügüri le.

³⁹ Quei jéchu jumá lun nígiragüdün ában adaürüti jun lídan fédu le láni páscua, ¿buséntün lun náfuridagüdüni Jesúsu le jarúeitebei juríu?

⁴⁰ Ábaya jagúaragun sun jagía.

—¡Mígiragüdabeí le! ¡Barabáslá bígiragüda!

Barabási ligía, ában jíwer uti.

19

¹ Ábati lanügüni Piláto Jesúsu, ába loúnajan abeíchagüdei,

² ába jíchugun ában súdaara ába rídi láuti jíyu leréberugu Jesúsu, ába jadáüraguagüdüni táu ában anánguni colóru gúchu.

³ Ába jayárafadun lubádun dan méme aríñageina.

—¡Gabágarilá Jarúeite Juríu!

Ába jagáyuajan ligíbuagun.

⁴ Ábayati láfuridun Piláto, ába laríñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵ Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábati laríñagun Piláto joun.

—¡Niján wügüri ligía!

⁶ Dan jaríjinbalin jábutigu fádirigu jáu sun polisía, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Laríñaga Piláto joun.

—Barújumeiti, dágua jumeí luágu gurúwa, ladüga áu, madáritina ni murúsun dúru luágu.

⁷ Ába jaríñagun juríu lun.

—Wagía galúruduntiwa áni según walúrudun, lúnti loúnwen ladüga laríñagun luouúgua luágu Liraü lan Búngiu.

⁸ Dan lagáambunbalin Piláto le, ábatima lanúfudedun.

⁹ Ábaya lebélorun palásiurugun, ába laríñagun lun Jesúsu.

—¿Jalíanasan amürü?

Moúnabunti Jesúsu ni cáta.

¹⁰ Ábati laríñagun Piláto lun.

—¿Moúnabun bumútina? ¿Ibídíñetisan bun luágu gabáfu nan lun nígiragüdünibu, gabáfu áu lun nádaraguagüdünibu luágu gurúwa?

¹¹ Laríñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligia weiritima lubei lidúnrun le edéregerubalina bun sügü báu.

¹² Lúmagiñe óra ligía, ába lálugun Piláto ida lúba lan lígiragüdüni Jesúsu. Ába jagúaragun juríu lun.

—¡Ánjein bígiragüda, máma amürü lumáda urúei Rómana! ¡Furúmieguarügü le aríñaguti luouúgua luágu urúei lan, lágani urúei Rómana!

¹³ Dan lagáambunbalin Piláto líra, ába loúnajan aságarei Jesúsu, ába lañúurun luágu jalaü le agúseragülei, ubáraü le únbei jaríñaga Dübü, Gabáta lídan jerérun juríu.

¹⁴ Queí buri amídirugujaali, le ában wéyu lubá páscua. Ábati laríñagun Piláto joun juríu.

—¡Niján jurúeite!

¹⁵ Ába jagúaragun.

—¡Jilála! ¡Jilála! ¡Dáguabeí luágu gurúwa!

Laríñaga Piláto joun.

—¿Buséntün nádaraguni jurúeite luágu gurúwa?

Jaríñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, ába ledéregeruni Piláto joun lun ládarawagún luágu gurúwa, ába janügüni.

Ládarawagún Jesúsu luágu gurúwa

(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barüinaleí lugúruwan lun lídin lídoun fulásu le únbei jaríñaga Lufúlasun Lábu Ichügü, Gólgota lídan jerérun juríu.

¹⁸ Ñi jádaragui luágu gurúwa, dágua jagía bián wügüriña úara lúma, ában lueígiñe cáda louba.

¹⁹ Ába loúnajan Piláto íchigagüda ában abürüjóuni luágu gurúwa, laríñaga ñi. “Jesúsu Nazarétna, Jarúeite Juríu”.

²⁰ Sarágu jáña jádaangiñe juríu alíjati abürüjóuni ligía ladüga fulásu le ñi lubei jádaraguei Jesúsu luágu gurúwa, madíseti ubúrugugiñe, áni abürüjóuati abürüjóuni ligía lídan buri dímuerei hebreó, güriégu, lúma latín.

²¹ Ligía jariñagunbei jábutigu jafádirin juríu lun Piláto.

—Mabürüdadá ñi “Jarúeite Juríu”, bürüba “Le aríñagubei luágu Jarúeite lan Juríu.”

²² Ába lariñagun Piláto joun.

—Le bürünaalíbei bürünaalíbei, ítara lúba.

²³ Lárigiñe jádaraguni súdeara Jesúsu luágu gurúwa, ába janügünun lanáangun, ába jadügün gádürü fánreinti táu, ába fánreinti lun cáda súdeara. Ába gíñe janügünun lisímisin, quei májüchawagún tubei, ában rügüñoun fiésu íñugiñe lun únabun,

²⁴ ába jariñagun súdeara jámagua.

—Majeíridagua wamoún, ájurerera wamá tuágu, aríja wamámuca cába lan agáñiroun.

Ítara líña lagúnfulirun le taríñagubei Lerérun Búngiu. “Fánreingua jamútu nanáangun jádaangua, ájurerera jagía tuágu nisímisin cába lan agáñiroun.” Ítara líña lubeiti jadügüni súdearagu.

²⁵ Ñíñoun lúguchu Jesúsu yaráfa lun gurúwa túma tamúlelua, María to lúmarí Cléofas, túma María Magdaléna.

²⁶ Dan laríjinbarun Jesúsu lúguchu rára nubádu, áu le disípulu lé jínsiñebei lun sarágu, ába lariñagun tun lúguchu.

—Núguchu, nirán biraü.

²⁷ Ába lariñagun nun.

—Nurán búguchu.

Lúmagiñe óra ligía, ába nerésibirunun núbiñe.

Loúnwen Jesúsu

(Mt 27.45-56; Mr 15.33-41; Lc 23.44-49)

²⁸ Lárigiñe sun cátei le, quei subúdi láni Jesúsu luágu gúnfulijali lan láu sun le lúnbei ladügüni luágu wasálbarun, ába lariñagun, lun lagúnfulirún le taríñagubei Lerérun Búngiu.

—Mágürabujadina.

²⁹ Ñíñein ában fúdu táu diweín garüjütu, ába jadüdüragüdün ában mudúsi tídan diweín tugúya, ába jíchuguni luágu ában wéwe, ába jíñüruni luágun liyúma.

³⁰ Ába látunun Jesúsu diweín garüjütu tugúya, ába lariñagun.

—Gúnfulija sun cátei.

Ába larábachun ligíina, ába loúnwen.

Lúmiruni ában súdeara loúba Jesúsu táu lefeíte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu güriñgía luágu gurúwa lídan wéyu le eméraaguagülei, ladüga weíríti wéyu ligía. Ligía jamúriaajaanbei lúma Piláto lun loúnajan ájalajei járuna ja dáwaguñubaña luágu gurúwa, lun gíñe lagídarún jágubu ñígiñe.

³² Ábati jóúdin súdeara, ába jájalachuni lúruna furúmiñeti, jalá jamei lúruna le ában le dáwaguñubei luágu gurúwa úara lúma Jesúsu.

³³ Dan le jayárafadunbei lun Jesúsu, ába jaríjin luágu jiláali lan, ligía májalachun jamáali lubei lúruna.

³⁴ Ába liábin ában súdeara, ába límiruni Jesúsu louábawagun táu ában efeín, ába láfuridun jítaü lúma dúna níngiñe.

³⁵ Áu Juan, le abürüjabalin le, ában le aríjubalin, áni aríñaga numúti inárüni, subúdi numúti luágu aríñaga náni inárüni lun giñe jafiñerun jugúya.

³⁶ Ladüga lasúseredunbei buri cátei le, lun lagúnfulirun le taríñagubei Lerérun Búngiu. “Májalachúnwabei ni ában ábuu luágu.”

³⁷ Aríñagati giñe tídan Lerérun Búngiu. “Jaríjubei le jímiragubei.”

Lábunajoún Jesúsu

(Mt 27.57-61; Mr 15.42-47; Lc 23.50-56)

³⁸ Lárigiñe sun cátei le, níñein ában wügüri Arimatéana, gíriti José, falá lumuti meja wügüri ligía Jesúsu, láu sun arámudaguaruügü lan ladüga lanúfude jawei juríu, ába lamúriajani lúgubu Jesúsu lúma Piláto. Ába lichuguni lun, ába lanügüni José lúgubu Jesúsu.

³⁹ Ába giñe liábin Nicodémo, lé meja nüdüñbei ayánuja lúma Jesúsu guñoun, ába liábin láu sarágu ibíñei.

⁴⁰ Ábati janügüni José lúma Nicodémo lúgubu Jesúsu, ába jóuburaguni táu gamísa to túaguatu láu ibíñei ligía según jagáburi juríu lubá jábunajan.

⁴¹ Níñein ában fulúri-ágei lídan fulásu le ní lubei jádaraguei Jesúsu luágu gurúwa, lídaanti fulásu ligía, níñein ában umúajaü iséri le mayúsurungili.

⁴² Níjin jíchigei lúgubu Jesúsu, ladüga yaráfa lan umúajaü ligía, ladüga giñe agúñeeli lan, gumése wéyu le eméraaguagülei.

20

Lásaarun Jesúsu lídaangiñe ouweni

(Mt 28.1-10; Mr 16.1-8; Lc 24.1-12)

¹ Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachülürünbei ní, úaali dübü le lidaü umúajaü ní.

² Ába tídin eíbaagueina le níjin wabei áu lúma Simón Pédro, ába taríñagun woun.

—Barújama Jesúsu lídaangiñe lumúaja, ibídiñeti woun jalía lan jíchigei.

³ Ábati wáfuridun, ába wouúdin luágun umúajaü.

⁴ Úara wouúdin biángubei wagía eíbaagueina, furésetina lueí Pédro, ába nachülürün furúmiñe luágu umúajaü.

⁵ Ába nélemuchun aríja níjin, gamísa rügüñoun naríja ní, mebélutina.

⁶ Lárigiñe, ába lachülürün Simón Pédro, ába lebélorun lídoun umúajaü. Gamísa to áuboun lagúrurawaga Jesúsu, tugúya rügüñoun giñe laríja ní.

⁷ Gamísati to áuboun louábarawagúa lichügü Jesúsu, máma lídaañoun ában túma tó buri áuboun lagúrurawagúa, jóuburagu tíña, tábuga.

⁸ Ába giñéti nebélorun, ába naríjini le asúseredubei, ába nafíñerun luágu saráali lan Jesúsu lídaangiñe ouweni.

⁹ Ligíaaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe ouweni.

¹⁰ Ábati wagíribudun wábiñoun.

Larúfadagun Jesúsu lúngua tun María Magdaléna

(Mr 16.9-11)

11 Ánjounti María, ába teréderun bougudi ayájuaia lubádu umúajaü. Sun nuján lan ayájua, ába télemuchun aríja lídoun umúajaü,

12 ába tarijin bián ánjeligu, jarútu jadáüragun, ñun le ñí lubeí buga lúgubu Jesúsu, ában lichügügiñe, ában lugúdigíñe.

13 Ába jariñagun ánjeligu jagía tun.

—¿Ca uágu bayájua?

Tariñaga joun.

—Barújama Nabúreme, ibídiñeti nun jalía lan jíchigei.

14 Quei tariñagun ítara, ába tadígragun, ába tarijini Jesúsu, niján lan ñi, ibídiñeti tun luágu ligía lan.

15 Ábati lariñagun Jesúsu tun.

—¿Ca uágu bayájuaia? ¿Ca báluajabei?

Sun tariñaguti le oúnigirubalin fulúri-ágei adímurejabei tun, ába tariñagun lun.

—Ánjein banügün lubeí, aríñagabei nun jalía lan bíchigei, barü námugei.

16 Ábati lariñagun Jesúsu tun.

—¡María!

Ába tagáragun, ába tariñagun lun lídan jerérur juríu.

—¡Rabóni! —míni lan líra, Maésturu.

17 Lariñaga Jesúsu tun.

—Márügüdbá nuágu, ladüga maweínrunggina le ñíjin lubeí Núguchi. Beíba, bariñagame joun náni disípulugu luágu neíbuga lan le ñíjin lubeí Núguchi, le gíñe Júguchi, Nubúngiute le gíñe Jubúngiute.

18 Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni burí cátei le tun lun tariñaguni joun.

*Larúfudagun Jesúsu lúngua joun disípulugu
(Mt 28.16-20; Mr 16.14-18; Lc 24.36-49)*

19 Wéyu méme ligía güñoun, oúndaragu jáña disípulugu, darúgu béna jáu ladüga janúfude jaweí juríu. Ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

20 Lárigiñe lariñaguni líra, ába larúfuduni lújabu lúma louba joun. Ába jagúndaaragun disípulugu láu jarijini Jesúsu.

21 Ábaya lariñagun Jesúsu joun.

—Níjeinlá darángilaü jídan. Ítara quei loúnajanina Núguchi, ítara líña gíñe nouñajanün.

22 Ábati láfurun jawágun, ába lariñagun joun.

—Resíbi jumeí Sífiri Sándu.

23 Ánjein ferúduna jumá jafígoun ámu, ferúdnawaali, ánjein úa ferúduna jumáni, reidejiali, úouga ferúdnawa lan.

Larijini Tomás Jesúsu lárigiñe lásaarun lídaangiñe Oúweni

24 Tomás, ában jádaangiñe dúusu disípulugu le únbei jariñaga Mádou, úatiti jáma dan le liábinbei Jesúsu.

25 Lárigiñe, ába jariñagun ja jíbiri disípulugu lun.

—Aríja wamáali Wabúreme Jesúsu.

Ába lariñagun Tomás joun.

—Ánjein marijin nan lárigi gürábu luágu lújabu, da neíme liraúraü nújabu lídoun júyu le lárigi gürábu, da nújabu lídoun louba, siñábei nafíñerun.

²⁶ Widü wéyu lárigiñe, oúndaragu jáñaya disípulugu tídan ában múna, ñíñeinti Tomás jáma dan ligía. Láu sun darúgu líña lan béna jáu, ába lebéllurun Jesúsu, ába laráramun jamádaangua, ába labúsurun joun ítara.

—Níjeinlá darángiläü jídan.

²⁷ Ába laríñagun lun Tomás.

—Dábei liraúraü bújabu ñájoun, aríja beíme nújabu, da beíme bújabu lídoun nouba. Masígirabá láu liloúguan afíñeni, afíñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, afíñeedibu guetó, ladüga aríja báadina lan, gúndaatiña ja afíñerubaña, marijinga jamána.

Ca lan lébube tabürüjóun líburu to

³⁰ Adügayati Jesúsu ámu sarágu miláguru jagíbugiñe láni disípulugu, le úabei büríñu tídan líburu to.

³¹ Labürüdünbei buri le lun jafíñerun luágu Jesúsu lan Crístubei, le Liraü Búngiu, lun gíñe láu lan jafíñerun, gabágari jumá queési lánigu.

21

Larúfudagun Jesúsu lúngua joun sédü jádaangiñe láni disípulugu

¹ Lárigiñe, ábaya larúfudagun Jesúsu lúngua joun láni disípulugu láru dúna le gíribe Tibérias. Niján ligáburi ladügüni.

² Lídaañanu ában Simón Pédro, Tomás le únbei jariñaga Mádou, Natanaél, le lílana Caná le láni Galiléa, lirájüñü Zebedéo, jámaya bián jádaangiñe láni Jesúsu disípulugu.

³ Ába laríñagun Simón Pédro joun.

—Neíbuga esénija.

Ába jariñagun lun.

—Weíbuga gíñe búma.

Ába jádinun tídoun jagúne, ába jóudin, mañúguntiña ni cáta árieibu ligía.

⁴ Dan le arúgadeina lan, ába jaríjini Jesúsu ñi láru dúna, ibídiñetí yebe joun disípulugu luágu Jesúsu lan.

⁵ Ábati laríñagun joun.

—Numádagu, ¿mañúgungidünsan?

Jaríñaga lun.

—Ni cáta.

⁶ Ábati laríñagun Jesúsu joun.

—Fíjuma lueigiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jíbe úduraü tídan.

⁷ Ábati naríñagun, aú Juan, lun Pédro.

—¡Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun.

⁸Ja jíbiri disípulugu, ába jóúdin lárún béya táu ugúnein, adúrujeina jamóun séni buin jáu úduraü, quei ában rügüñein lan san bádun jadise luei béya.

⁹Dan le jarárirun múarugun, ába jadárirun wátu geméti láu eñéguraü, láu ában úduraü ligibuagu túma fein.

¹⁰Ába laríñagun Jesúsu joun.

—Barüjuma fiú jádaangiñe úduraü ja sun liñábei jañúguniña.

¹¹Ába ládinun Simón Pédro tídoun ugúnein, ába ladúrujanun séni lárún béya buin jáu úduraü weínamutiña, san dimí-san úrúwañanu, láu sun jibe, ma-jeíridaguntu séni.

¹²Ábati laríñagun Jesúsu joun.

—Jigoúgu, játa bacháti.

Úati ni ában jádaangiñe disípulugu álügüdüti cátei lan, ladüga subúdi jamáni luágu Jesúsu lan.

¹³Ába liábin, ába lanügünun fein lújaburugu, ába líchugunun joun, ligía méme ladüga láu úduraü.

¹⁴Ligía lürüwan larúfudagun Jesúsu lúngua joun láni disípulugu lárigi lásaarun lídaangiñe oúweni lúnya labágaridun.

Ladímurejan Jesúsu lúma Simón Pédro

¹⁵Lárigiñe játun bacháti, ába laríñagun Jesúsu lun Simón Pédro.

—Simón, Liraü Jonás, ¿jinsiñetinasan bun sügü jáu ja?

Laríñaga Pédro lun.

—Ánja, Nabúreme, subúditi bun luágu jinsiñe ban nun.

Ába laríñagun Jesúsu lun.

—Toúnigi báñati nánigu queisi ában jóuniri mudún buíti.

¹⁶Ábaya lálügüdüni luágu libíaman weíyaasu.

—Simón, liraü Jonás, ¿jinsiñetinasan bun le tímatimaati?

Laríñaga Pédro lun.

—Ánja, Nabúreme, subúditi bun luágu jinsiñe ban nun.

Laríñaga lun.

—Toúnigi báñati nánigu.

¹⁷Ábaya lálügüdüni luágu lürüwan weíyaasu.

—Simón, liraü Jonás, ¿jinsiñetinasan bun?

Ába lírudagun Pédro ladüga lálügüdüni Jesúsu luágu lürüwan weíyaasu ánjein jinsiñe lubei lun, ába laríñagun lun.

—Nabúreme, subúsi sun cátei bun. Subúsi bun luágu jinsiñe ban nun.

Ába laríñagun Jesúsu lun.

—Toúnigi báñati nánigu queisi ában jóuniri mudún buíti.

¹⁸Ninárün báu, luágu dan lán meja nūraütimagidibu, ábaja badáuragun, ába bídin le ñijin lumúti babúseera, dánme le weíyaadibu, iñúrarügübalime barúna, ábame ladáuraguagüdünibu ámu, ábame lanügünibu le ñijin lumúti mabúseerun ban bídin.

¹⁹Láu laríñaguni Jesúsu cátei le, lasúbudiragüdüñein ída lúba lan ligáburi loúnwen Pédro, lun líchugun uweíriguni lun Búngiu láu. Lárigiñe, ába laríñagun lun.

—¡Falábana!

Disípulu le jinsiñegubei

²⁰ Dan ladígiragúnbei Pédro, ába laríjinina, áu Juan, anángüran lan járigi, áu le jínsiñebei sarágu lun Jesúsu, le méme añúurubei loubagiñe Jesúsu lídan adíneruni, le gíñe álügüdúbalin Jesúsu cába lan wádaangiñe edéregerei.

²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amürü, falábana.

²³ Ábati leíbaagun dimúrei jádan jíbiri lánigu Jesúsu luágu moúnwenbadina lán nege, mariñagunti Jesúsu luágu moúnwenbadina lan, aríñagarügüti. “Ánjana busén labágaridun darí lúmoun nagíribudun, ¿cámegi burúma?”

²⁴ Áu méme disípulu le, le achoúrurubalin buri cátei le, abürüja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladüga Jesúsu, ánjein jamúga abürüjoúa ában ában, afíñetina luágu mábara tan jamúga buri líburu to abürüjoútu láu lídan sun ubou.

CÁTEI LÉ BURI MEJA JADÜGÜBEI APÓSTOLUGU

Louñajani Búngiu Sífiri Sándu

¹ Lun teófilo.

Abürüjatina bun tídan furúmiñetu nigáradan luágu sun le ladügübei Jesúsu, lúma le larúfudajabei, lúmagiñe dan le lagúmeserunbalin luwádigimari

² dari lúmoun wéyu le lamúdeirünbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadügüni apóstolugu já meja lanúadajabaña, lárigiñe lídin jámagiñe.

³ Lidán bián-wein wéyu le láubei ubouágu lárigiñe lásaarun lídaangiñe ouweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúrugug Jerusalén, lariñaga joun.

—Agúraba jumá lagúnfulirun dimúrei le líchugubei Nóguchi jun, le uágubei nariñaga jun.

⁵ Subúdi jumúti luágu badíseigüda lan Juan láu dúna, nasúbudiragüdüñein jun luágu máljüjadün lan giñe ánjaün badísei láu Sífiri Sándu.

Lamúdeirun Jesúsu siélun

⁶ Dan le oundaragujaña lubei lúma Jesúsu, ába jariñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Lariñaga Jesúsu joun.

—Siñáti jasúbudiruni ídame lan o cába lan dan ladügei Nóguchi cátei le buri, ligía rügüñein gayára lariñagun ídame lan ladügei.

⁸ Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loubawagu Judéa, Samária, chülü lúmoun lidíse-ágei fulásu ubouágu.

⁹ Lárigiñe lariñaguni Jesúsu cátei le, sun añája lan aríaguei, ába liñurúniwa lun lanügüniwa siélun, ába liábin ában juánriñu, ába ladáuragun láu, ába marijin jamáli lan.

¹⁰ Ñiñanu aríagua siélun sun amúdeireina lan Jesúsu, ligía jasáliragun bián wügüriña, jarútu jadáuragun jarúgabu,

¹¹ ába jariñagun joun.

—Wügüriña Galiléana, ¿ca uágu jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jarijin lídin.

Lanúadirün Matías lewéñeguame Júdas

¹² Ábati jagíribudun disípulugu lueígiñe wübü le giríbei Olívos lun ubúrugun Jerusalén, lidíse ában kilómetro.

¹³ Dan le jachülürünbei ubúrugun, ába jamúdeirun tídoun rúmu to ñí lubei jagánawa. Ñiñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraü Álfeo, Simón le lídaanbei adámurini le giríbei Cananísta, lúma Júdas le lamúlen Jacóbo.

¹⁴ Oúndaraguátiñaja sun jagía súnwandan lun jayúmuragun lun Búngiu jáma lamúlenu Jesúsu, túma María to lúguchu, jáma ja jíbiri würiña.

15 Luágu ában wéyu lídan dan ligía, ába laráramun Pédro jagíbugiñe sun afiñetiña ja ñíbaña—jawára san-wein gürígia—ába laríñagun joun.

16 —Nidújeñu, lúnti buga lagúnfulirun le lariñagubei Sífiri Sándu liyúmulugugiñe Davíd tídan Lerérun Búngiu, lídan le ladímurejánbei luágu Júdas, le adúndejabáliña ja anügübalin Jesúsu adáüra.

17 Ában meja jádaangiñe wánigu, Júdas, áni seríwiti lun Jesúsu úara wáma.

18 Ába lídin, ába lagáñijian ában fulásu láu seínsu le afáyeirúbei lun luágu wuríbani le ladügübei. Ába lábburujan láu lábubugu ünabun, ába lafáüñchün, ába láfuridun sun litíripan.

19 Dan le jagáambunbalin gürígia ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

20 Ába lasígirun Pédro aríñaga.

—Bürüwañu líña dimúrei buri le luágu Júdas tídan líburu to gíriboun Sálmos. Lariñajare ñi.

Reídeitá lúban málouga,

úa jamá aganoútiña tídan.

Aríñagati giñe ñi.

Rúalá lubára lun ámu.

21 Ítara líña lubeíti, lúnti wanúadajan ában wügüri wádaangiñe lé meja wámati sun dan le wáma lubei Jesúsu,

22 lúmagiñe dan le labásterágüdünbalin Juan Jesúsu dari lúmoun dan le lamúdeirünbei siélun, lun lewéñegua lan Júdas. Wügüri ligía, líchuguba fe úara wáma luágu lásaarun Jesúsu lídaangiñe oúweni lúnya labágaridun.

23 Ábati jíridun bián jádaangiñe. José, le méme gíribei Barsabási, le méme giñe gíribei Jústó, lúma Matías.

24 Ába jayúmuragun lun Búngiu ítara.

—Wabúreme, amürü le subúdíjabúbei tun janígi sun gürígia, arúfudabei woun ca lan jádaangiñe bián wügüriña ja anúadira báalibei

25 lun lesériwidunibu queísi apóstolu lewéñegua Júdas. Ladüga féridi láali Júdas lubára ladüga lafígounjan, áni ñüdünja lídoun fulásu le ladünabei.

26 Ábati jíchaajan ubúnuruni, ába lábburujan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

1 Dan lachülürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu.

2 Sódini ába lagaambún ában ireíni ñübinti siélugiñe quei dan le láfurun ában garábali jéreti, ába lagaambún tídan sun múna to ñí jabei.

3 Ábati lasáiragún buri cátei joun camá ligémeri wátu, afánreinjoúañu lun ñi lan ában murúsun lougiñe lábubugu cáda ában jádaangiñe.

4 Ába jabuñchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei luei jerérun quei ladímuregüdüniña Sífiri Sándu.

5 Lídoun buri dan ligía, ñíburiñanu juríu Jerusalén ja gúnfulitiña lídan jafíñen, ñübintiña lídaangiñe sun fulásu uboúagu.

⁶ Dan le jagáambunbalin ireíni ligía, ába jounderagunga gürígia, ibídiñeja joun cába lan jasáminara ladüga cáda ában jádaangiñe gürígia jagía, agáamba jamútiña lánigu Jesúsu adímureja lídan jerérun guánarü.

⁷ Ába laweíridun janígi, ába jariñagun jámagua.

—¿Ma funági Galiléana ja adímurejabaña?

⁸ ¿Ída liñáti wagáambubaliña adímureja lídan lerérun cáda ában wádaangiñe?

⁹ Añájein gürígia Pártiana ya, Médiana, Elámna, Mesopotámiana, Judéana, Capadóciána, Póntona jáma Ásiana,

¹⁰ Fríjiana, Panfiliana, Ejíptona lúma lídaangiñe buri fulásu África le yagüroun mémebei lueí Ciréne. Añájein giñe Rómána aganouútiña ya, añájein jádaangiñe, juríu ladüga juríu jamá jagübürigu, jíbiri, barü jamaali ligáburí jaffínen juríu.

¹¹ Añájein giñe gürígia Crétana jáma Arábiana, sun wagía agáamba wamútiña adímureja luágu luweírigun Búngiu lídan werérun guánarü.

¹² Weíríti janígi súngebei, ibídiñeja joun cába lan jasáminara, ába buri jálügdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jariñagun.

—Bacháruañanúrügü jáña.

Le lariñagubei Pédro joun gürígia ja ñíbaña

¹⁴ Ábati laráramun Pédro jáma ja jíbiri únsu apóstolugu, ába lariñagun láu umálali jéreti.

—Wügüríña Judéana jáma sun ja aganoubaña Jerusalén, agáamba jumeí le lúnbei nariñaguni jun buídu, subúdi jumámugei ca lan lílabei cátei le jaríjubei.

¹⁵ Mabácharuántiña wügüríña ja quei jarítagun, néfugubeigili bináafin guetó.

¹⁶ Cátei le, le jaríjubei, ligía lé meja uágubei ladímureja Joél, le proféta, dan le lariñagunbei.

¹⁷ Lídoun buríme lagúmujoun wéyu, líña lariñagun Búngiu, nouñajabei náni Espíritu jádoun sun gürígia, nadímurejaba jayúmulugugiñe jisáanigu.

Nayáwadaguba joun irájüñü, lúma joun weíyaaña mútu.

¹⁸ Nouñajabei giñe náni Espíritu jádoun ja esériwidubaña nun lídoun buri wéyu ligía, wügüríña jáma würíña, ábame nadímurejan jayúmulugugiñe.

¹⁹ Narúfuduba buri cátei gariyawaseti siélu, narúfuduba seíni ubouágu.

láubei jítaü seíni buri ligía, láu wátu geméti, lúma láu juánriñu láuti gumúlali.

²⁰ Labúrigaduba wéyu,

láfuarame játi funáti quei jítaü,

lubáragiñe lachülürün luwéyuri Wabúreme,

le lúnbei ában lan wéyu weíríti, le marijngilíbei líbe.

²¹ Áni sun ja amúriajatiña asálbaruni lúmagiñe Búngiu, jasálbaruba.

²² Agáamba jumeí lubeíti le lúnbei nariñaguni, jugúya wügüríña Israelítagu. Jesúsu le Nazarétna, ában meja wügürí le larúfudubei Búngiu jigíbugiñe quei wügürí úraguati láu buri cátei weínamuti, miláguru, lúma buri seíni le ladügubei Búngiu jagánagua lídaangiñe, quei le jisúbudin.

²³ Láu sun líra, dan le ledéregerúnbei jun, quei ligáburí aráansejani le larítagubei Búngiu lúmagiñe furúmiñeti dan, ába jáfaruni jilágubei láu jedéregeruni joun wügüríña wuríbatíña lun jádaraguni luágu gurúwa.

²⁴ Ába leséfuruni Búngiu lídaangiñe lubáfu oúweni, sarágüda lumúti lúnya labágaridun, ladüga siñá lan gabáfu lan oúweni luágu.

²⁵ Lariñajare urúei Davíd, dan le ladímurejan luágu Jesúsu. Subúdi numúti luágu nómabei lan Nabúreme Búngiu súnwandan, noubagiñeñein lun úa lan ni cáta lun lebélaagüdün anúfudei nidoun.

²⁶ Ligía lébubei téjerajan nanígi, ába nadímurejan luágu ugúndani le nídaanbei.

Láu sun wügürí nan garaüwarügüti, jeménigitina buágu luágu nabágaridayaba lan,

²⁷ ladüga mígirun bubóun nuwáni lídan jabára jiláaña, mígirun amürúme lun lañáladun nügubu, áu le bánigu le jínsiñebei bun.

²⁸ Arúfuda bumúti úma le anügübei gürígia lídoun ibágarí magúmchaditi nun, áni babuínchagüdúbadina láu ugúndani láu abúnja lan nubádu.

²⁹ Nidújeñu, cátei furáanguti le, luágu jilá lan meja wadúje Davíd, bunáwa ligía, gayáraagili waríjini lumúaja chúlú lumoun wéyu le.

³⁰ Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeba lan linébaanfan liábin Crístu, le lúnbei lañúurun luágu lála.

³¹ Adímurejati lubeíti Davíd luágu lásaarun Crístu lídaangiñe oúweni, luágu giñe merédeboun lan luwáni lídan jabára jiláaña, mañáladun ligíame lügubu. Ítara líña ladímurejan Davíd luágu Crístu camá jamuga aríagu líña lun, áni ítara líña lasúseredun.

³² Sarágüda lumúti Búngiu Jesúsu méme le lídaangiñe oúweni, sun wagía geféentiwa luágu líra.

³³ Nürügüda lumúti Búngiu lueígiñe louñwenren láu sarágu uweíríguni, ába lerésibiruni Sífiri Sándu lúmagiñe Búngiu queísi lariñaguni Búngiu lun, lun gayáraabei lan louñajani méme Sífiri Sándu ligía joun sun lánigu ubouágu. Ligía cátei le aríja jumáalibei lúma le agáamba jumáalibei guetó.

³⁴ Mára Davíd amúdeirubei siélun, aríñagati Davíd guánarügü.

Lariñajare Búngiu lun Nabúreme.

“Nürúba lueígiñe nouñwenren,

³⁵ daríme níchuguniña báganiñu lábugiñoun bubáfu.”

³⁶ ‘Lúnti jasúbudiruni sun jugúya linásiñun Israél luágu Jesúsu méme lan le, le jádaragubei luágu gurúwa, adüga láali lan Búngiu lun ligíaba lan Wasálbaragüle, ligíame giñe Wabúreme.

³⁷ Dan jagáambunbalin cátei le, ába lebélurun igárigu tídoun janígi, ába jaríñagun lun Pédro lúma joun jíbiri apóstologu.

—Wadújeñu, ¿cábasan wadüga?

³⁸ Ába lariñagun Pédro joun.

—Sáansi jumei jigáburí ligíbugiñe Búngiu, badísei jugúyame cáda ában lídan líri Jesucrístu, ferúdnawa lámuga jífigoun, ru lámugei Búngiu Sífiri Sándu jun.

³⁹ Ladüga aríñagaali Búngiu luágu líchugubei lan giñe Sífiri Sándu jun, lúma joun jadügewagun, lúma joun ja aganoubaña díse, lúma joun sun ja lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába lariñagun joun.

—Séfu jumá lueí asúfuriruni le lúnbei liábin jawágun gürígia wuríbatíña ja.

⁴¹ Ítara liñáti ába jabásterun, ja adügübaña gásu láu lerérun, ába jayábin queí buri úrúwa mílu gürígia lun jafiñerun luágu Jesucrístu wéyu ligía.

⁴² Ába jedéregeragun jóungua lun jafúnrendeiruni le jarúfudajabei apóstolugu joun, aganoúa jagía lídan úarani jámagua, ayúmuragua jagía buri lun Búngiu, oúndaragua jagía lun jeíginun fein to arítaguagülei luágu loúnwen Jesúsu, queísi meja lariñaguni joun apóstolugu lun jadügüni.

Jabágari furúmiñetiña lánigu Crístu

⁴³ Súngubei láuñanu luweírin anígi luágu buri seíni lúma buri miláguru le ladügübei Búngiu jádaangiñe apóstolugu.

⁴⁴ Sun ja afiñerubaña, lídaañanu ában, ába buríti jafánreinjani le jámati jádaangua.

⁴⁵ Jalúgurajei buri jafúlasun lúma le jámati, ába jafánreinjani lebégi según lemégeirun cáda ában.

⁴⁶ Ságü wéyu jóúndaragun témpulurugu lun jájuduragun lun Búngiu. Láriğiñe, ába jóúndaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémeгу.

⁴⁷ Ábaja jadímurejan weírugu luágu Búngiu, ábati jínsiñe jamá joun gürígia, ábatija anájaina lániña Búngiu ja asálbareinabaña jánwoun.

3

Lareídagun ában meíbuguti

¹ Luágu ában wéyu, ába lídin Pédro lúma Juan témpulurugu ladaúnrün úrúwa rábounwéyu, le lórate ayúmuraguni lun Búngiu.

² Ságü wéyu, ñíñein lan ában wügüri meíbuguti lúmagiñe lagüriajóun, barúwarügütíja añúura lubádu tubéneri témpulu le gíribei “Béna Buídumeraüti” lun lamúriajan seínsu jáma ebélorutiña témpulurugun.

³ Dan le lariñbaliña meíbuguti ligía Pédro lúma Juan jebélura lan témpulurúgun, ába lamúriajan seínsu jáma.

⁴ Ábati jarijin Pédro lúma Juan luágun, ába lariñagun Pédro lun.

—Aríjabá wawágun.

⁵ Ába larijin jawágun, agúraba yebe jíchugun seínsu lun.

⁶ Ába lariñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueíğiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute.

⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírigun Búngiu.

⁹ Ába jarijini sun gürígia eíbuga lúma adímureja luágu luweírigun Búngiu.

¹⁰ Weírítiti janígi luágu le asúseredubei lun, queí subúdi jabálin wügüri ligía, subúdi jamei luágu ligía lan léñaja añúurubei amúriaja tubéneri témpulu le gíribei “Béna Buídumeraüti”.

Lapúrichijan Pédro témpulurugu

11 Mígiragüdün lumútiñati meíbugunti le areídagubei Pédro lúma Juan, súnti gürígia, ába jeíbaagun láu luweírín janígi luágun tubárandá témpulu le gíríbei Salomón, le ní jabei.

12 Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírída janígi? ¿Ca uágu jaríaguawa camá jamuga wagía areídaguagüdúbalin wügürí le, eíbugagúdei láu wabáfu o láu lan wagúnfulin lúma Búngiu?

13 Máma líña, Búngiu, le Jabúngiute binádu wagübürigu Abrahám, Isáac lúma Jacob, ligía areídaguagüdúbalin wügürí le lun líchuguni líñun-ágei uweíríguni lun Jesucrístu le Liraü, ligíra lé meja jederegerubei joun lúrudugu, áni dan lálugan Piláto lígiragüdüni, májatün.

14 Lubáragiñe jamúriajan lun lígirawagüdün Jesúsu le jarúmabei áni richágua, amúriajarügü jugúya lun lígirawagüdün ában gáfarajati.

15 Ítara líña jáfaruni le íchugubalin íbágarí tímátimaati. Ába lásaaragüdüni Búngiu lídaangiñe oúweni, áni geféentiwa luágu líra.

16 Niján wügürí le jaríjubei áni subúdi jumeí, láu lubáfu méme Jesúsu ligía, lerésibira érei. Wafiñen luágu Jesúsu, ligía areídaguagüdúbalin buídu buídu quei jaríjini.

17 ‘Subúdi náali, nidújeñu, luágu íbídiñe lán meja jun ca lan jadügübei dan le jáfarunbálin Jesúsu, jugúya jáma jábutinu.

18 Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasúfuriruba lan Crístu.

19 Ligía lubeítí, ígira jumeí binádu jigáburí, giríbu jumá lun Búngiu, chibáwa lámuga jifígoun.

20 Ábamei gayára lan loúnajan Búngiu eméraaguni tun juwáni, oúnajaya leíme Jesúsu le Crístu, le aráanseelíbei lubáragiñe furúmiñeti dan woun.

21 Láu sun, lúnti lan leréderun Jesucrístu siélu guetó daríme laráanseruni Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu.

22 Ítara líña lubeítí aríñagati meja Moisés joun binádu wagübürigu. “Louúnajaba Wabúreme Búngiu ában proféta jádaangiñe guánarügü quei loúnajanina. Ánja jumá lun sun le lúnbei laríñaguni jun,

23 ladüga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagúnrinchawagún.”

24 ‘Ítara líña lubeítí, sun profétagu lúmagiñe Samuél darí lárígiñe, adímurejatiña libügürü burí cátei le lúnbei lasúseredun lídoun burí wéyu le.

25 Jugúya lúnbei jerésibiruni sun le laríñagubei Búngiu jádaangiñe profétagu, luáguti gíñe jufúleisein darádu lé meja ladügübei Búngiu jáma binádu wagübürigu dan le laríñagunbei lun Abrahám. “Nabínirubaña sun gürígia ja ubouagubaña láu ában jádaangiñe binébaanfaangu.”

26 Ába lanúadajani Búngiu Liraü lun loúnajani jun furúmiñe, jugúya juríu, lun labínirunün cáda ában jádaangiñe, láu laságarunün lídaangiñe luríban jigáburí.

4

1 Ñígiña Pedro lúma Juan adímureja joun gürígia, ligía jayábin jafádirigun juríu, jáma jábutigu súdaara ja oúnigirubárun témpulu, jáma ja lídaanbaña jadámurin saduséogu.

2 Gáñitiña ladüga jarúfudajan Pédro lúma Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe oúweni lúnya jabágaridun ladüga sará lan Jesúsu.

3 Ábati janügüniña adáúra, ába jádaruniña furísunrugun darí larúgan quei dárüjali lubeí.

4 Sarágu jáña jádaangiñe ja agáambubalin ugánu le jíchugubei apóstologu afíñerutiña luágu. Ja afíñerubaña járügü wügüríña, quei buri seíngü mílu.

5 Larúgan, ába jóundaragun jábutigu juríu, wügüríña weírigutiña lídan jafiñen, jáma arúfudajatiña lilúrudun Moisés, Jerusalén.

6 Ñíñein giñe Anás le fádiri le íñutimaabei, Gáifasi, Juan, Alejandro jáma sun ja jádaangiñebaña lufámilian Anás.

7 Ábati jóunajan anügei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügüri le?

8 Buin líña Pédro láu Sífiri Sándu, ába laríñagun joun.

—Jábutigu juríu jáma wügüríña weírigutiña lídan wafiñen.

9 quei jálügüdüníwa luágu buíti le adügübei lun ában wügüri sánditi, ída líña lan laρείdawaguágüdün,

10 buséntiwa lun jasáburuní, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubeí wügüri le ya jigíbugiñe areídaguañu. Láu lubáfu Jesucrístu, le meme jádaragubei luágu gurúwa, le lásaaragüdübei Búngiu lídaangiñe oúweni, laρείdagua.

11 Jesúsu le, ligía queísi dúbü le áubei jíchiga mebéreseni, jugúya le queíbaña ábunagutiña múna, áni ñübinjali Jesúsu lun ligíaba lan quei dúbü le megeíwatimaabei lídan bunáguau.

12 Úati ámu lun lasálbaruníwa lueídügüya Jesucrístu, ladüga míchuti Búngiu ámu íri ubouágu lun gayára lan wasálbarun lueígiñe.

13 Dan jaríjini gumádimatiña luágu adímureja jamá Pédro lúma Juan manúfudeiga ní murúsun, áni subúdi jameí luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasáburuníwa luágu jádaangiñetiña lan já meja eíbugubaña lúma Jesúsu.

14 Queíti ñíñein lubeí wügüri le areídawaguágüdübei jáma, rára ligía, siñáti jaríñagun lúrudugu ní cáta.

15 Ábati jóúnajaniña lúrudugu Pédro lúma Juan lúma wügüri le areídaguualibeí bougudin lueí jadámurin lun gayáraabei lan jayánujan jámagua.

16 Jaríñagati.

—¿Cábasan wadüga jáu wügüríña ja? Sun ja aganoúbaña Jerusalén subúdi jamúti luágu adüga jamáali lan miláguru le, áni siñáti wayéedagun láu.

17 Lun mabúruchagun lan ugánu luágu cátei le lídan sun fulásu, wewéridiraña lun madímurejandügüya jamá ní ca un lídan líri Jesúsu lúmagiñe ugúñe.

18 Ábati jagúarun joun lun jebélurun, ába jaríñagun joun lun ní lan ca uágu lun madímurejan jamá, marúfudajan jagíame lídan líri Jesúsu.

19 Ába jaríñagun Pédro lúma Juan joun.

—Samína jumá júngua ánjein buídu lubeí ligíbugiñe Búngiu lun ladügün le jubeíbei, ígira le lubeíbei Búngiu.

²⁰ Wagía, siñáti wámanichun láu cátei le aríja wamáalibei lúma le agáamba wamáalibei.

²¹ Ábayati jewéridiruniña gumádimatiña, ába jígiragüdüniña. Madáritiña ída lúba lan jadügün ni cáta jáu ladüga adímurejatiña buri gürígia buíti luágu Búngiu luágu cátei le asúseredubei.

²² Wügüri le areidagubei láu miláguru ligía, sügü láu bián-wein irúmu láu.

Jamúriajan afñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furísunrugugiñe, ába jóudin le ñi jabei jibirigu, ába jabájüdaguni sun le jariñagubei jábutigu fádirigu jáma wügüriña weírigitüña joun.

²⁴ Dan jagáambubalin, ába jayúmuragun sun jagía lun Búngiu, ába jariñagun.

—Wabúreme, amürü Búngiubei le adügübalin siélu, ubou, barána lúma sun cátei.

²⁵ Amürü, aríñagatibu láu lubáfu Sífiri Sándu liyúmulugugiñe David lé meja esériwidubei bun.

¿Ca uágu jagáñida ja mámabaña juríu, samína jagía lun jadügüni cátei le siñábei jadügüni?

²⁶ Iñúraguatiña lurúeitegu ubou jóungua,

oúndaraguatiña lábutigu fulásu

lun jadügün wuríbani lun Wabúreme Búngiu lúma lun Crístu le lanúadajabei.

²⁷ Áni suséreti ítara, oúndaraguatiña Heródes luma Póncio Piláto lídan ubúругu le, jáma ja mámabaña juríu, lúma jáma Israelítagu lun jadügün wuríbani lun Biraü Jesúsu le sándubei, le banúadajabei.

²⁸ Láu líra, adüga jamúti sun le baráansejabei lun lasúsereduba lan.

²⁹ Guetóti, Wabúreme, aríjabei jasíadiruniwa, rúba anígi woun, wagía le esériwidubalibu, lun wadímurejan buágu manúfudeiga,

³⁰ gayára lámuga gíñe wareidaguágüdün sánditiña, adüga wagiame miláguru lídan líri Biraü Jesúsu le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñi lubei jóúndaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súngua luágu

³² Sun ja afñerubaña, ában lábu jarítagnun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súngua luágu.

³³ Ába jasígirun apóstolugu adímureja luágu lásaarun Wabúreme Jesúsu lídaangiñe ouweni láu sarágu ubáfu, ábati labíniruniña Búngiu sun jagía sarágu.

³⁴ Úati ni ában jádaangiñe emégeiruti ni cáta ladüga sun ja gafúlasunbaña o gában, ába buri jalúgurunun, ába janügüni tebégi,

³⁵ ába jadéregeruni joun apóstolugu lun lafánreinjóun jádan ja emégeirutiña.

³⁶ Queíburi, ñiñein ában jádaangiñe ladügawagun Leví jádan, gíriti José, agüriajóuti luágu ubóju le gíribei Chípre, ába jáchuni apóstolugu Bernabé, míni lan líra, “Le Íchigubei Gurásu”.

³⁷ Wügüri ligía, ába lalúguruni lufúlasun, ába lanügüni seínsu edégera joun apóstolugu.

1 Ñiñein giñe ában wügüri giriti Ananías, túma Safíra, to lúmari, ába giñe jalúgurun ában fulásu.

2 Wügüri le, ába lanügün lídaangiñe seínsu, ába lídin láu líbiri joun apóstolugu, lafámura camá jamuga ligía rügüñein libíjin luágu fulásu. Ani subúsititi sun cátej tun lúmari.

3 Ábati lariñagun Pédro lun.

—Ananías, ¿ca uágu bígira lun lagañiruni Máfia baritagun lun layéejagüdünibu lun Sífiri Sándu, lun beréderun láu líbiri seínsu le afáyeirúbei bun luágu fulásu?

4 ¿Ma funági bufúlasun meja fulásu? Lárigiñe balúguruni, ¿ma biseínsun lun badügüni le babúseerunbei láu? ¿Ca uágu basáminara badügüni cátei le? Búngiu bálugubei bayéedagun, máma wügüriña.

5 Dan lagáambuni Ananías cátei le, ába láburijan ouwe. Súnti ja asúbudirubalin cátei le, ába janúfudedagun.

6 Ábati jayábin wügüriña, ába jóuburaguni Ananías, ába janügüni ábuna.

7 Queíburi ürüwa óra lárigiñe, ába tebélorun lúmari Ananías, ibídiñoun ni cáta tun luágu le asúseredubei.

8 Ába lariñagun Pédro tun.

—Ariñagabei nun, ¿luágu ebégi le jariñagubei jalúgurei fulásu?

Ába tariñagun.

—Ánja, luágu ebégi ligía.

9 Ábati lariñagun Pédro.

—¿Ca san uágu jebélura lídoun úaraduni lun jóuchaguni láni Búngiu Espiritu itara? Añatén ja anügübalin búmari ábuna, janúgadibu giñe.

10 Lídan méme óra ligía, ába táburujan ouwe lubádu lugúdi Pédro. Dan jebélurun wügüriña, jadáriroun jiláaru, ába jaságarunun, ába jábununun loubagiñe túmari.

11 Súnti güriquia ja afiñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

12 Adáaguatiña buri apóstolugu sarágu seíni lúma miláguru jádan güriquia, ábati buri jóundaragun sun afiñetiña lídan fulásu témpulurugu le giríbei “Barandá Salomón”.

13 Úati meja ni ában jádaangiñe ja mámabaña afiñetiña lun jóundaragun jáma afiñetiña ladúga janúfude, láu sun jínsiñe jamá sun afiñetiña joun güriquia, sarágu.

14 Eíbu wéyu, eíbu jayábin güriquia lun jafiñerun luágu Jesucrístu, dándu wügüriña queísi würiña.

15 Quei jadügüña lan apóstolugu sarágu miláguru, ába jaságaraguniña güriquia sánditiña úmadoun tídan jabárrari lun dan lan lásügürün Pédro, gayára lan jareídagun láurügü tadágarun liyáwa jawágu.

16 Ñübintiña giñe sarágu güriquia lídaangiñe buri fulásu yaráfati lun Jerusaléoun jáu sánditiña jáma ja gawáguatiña espíritugu wuríbatíña, sun jagía areídaguatiña.

Jeibaajoín Pédro lúma Juan

17 Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü,

18 ába janüğüniña apóstolugu, ába jadáürüniña.

19 Ába ladáraruni ában láni Wabúreme Búngiu ánjeli tubéneri furísun árieibu ligía, ába láfuridagüdüniña, ába laríñagun joun.

20 —Jeiba, jaráramame témpulurugu, ábame jabájüdagun joun ja ñíbaña luágu iséri íbágari le líchugubei Jesucrístu joun güriía.

21 Dan jagáambuni cátei le, ába jóudin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóúndaruniña líñun-ágei lúruđu, ja súnbaña Israelítagu weírigutiña, ába jóúnajan anügaña apóstolugu furísunrugugiñe.

22 Dan jachülürünbei polisia furísunrugu, madári jamútiña ñi. Ába jagíribudun,

23 ába jaríñagun.

—Darúñu líña wadárirunun furísun, ñíñanu súaara bénabu oúnigira, dan le webélurunbei, madáritiwa ni ában jádaangiñe apóstolugu ñi múnada.

24 Dan le jagáambunbalin jábutigu fádirigu lúma jábuti súaara ja oúnigirubarun témpulu cátei le, ába jálügüdagun jóúngua cába lánfuna ídan lébeda cátei le.

25 Lídan óra ligía, ligía liábin ában wügüri, ába laríñagun joun.

—Ja wügüriña ja jádarubaña furísunrugun, añájein témpulurugu arúfudaja joun güriía.

26 Ábati lídin jábuti oúnigirutiña jáu súaara, ába janüğüniña láu buíđu, ladüga janúfude luei jachámuragun güriía dübü jawágun.

27 Dan jachülürün jáu, ába jíchuguniña ligíbugiñe líñun-ágei lúruđu, ába laríñagun fádiri íñutimaati joun.

28 —Wéridi wamáadün lun marúfudajandügüya jumá lídin líri Jesúsú, áni ¿ca jadüga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügüri ligía.

29 Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadügüni le lubeíbei lubáragiñe le jabeíbei wügüriña.

30 Le Jabúngiute bináđu wagübürigu, ligía ásaaragüdübalin Jesúsú, le méme jáfarubei láu jádaraguni luágu ában gurúwa.

31 Rúlaali Búngiu uweiriguni lun, ñurügüdalei lueigiñe loúnwenren, adüga láali Ábutime lúma Asálbaragülei, gayára lámuga jígiruni Israelítagu bináđu jagáburi, lun giñe ferúdüna lan jafígoun.

32 Geféentiwa luágu líra, geféenti giñe Sífiri Sándu le líchugubei Búngiu joun ja ñüdübbaña láu le lubeíbei.

33 Dan jagáambunbalin líñun-ágei lúruđu cátei le, ába jagáñidun, ába yebe jabúseerun jáfaraguniña jílagubei.

34 Ñíñein ában fariséo jádan lúrudugu, gíriti Gamaliél, maésturu lánina lílúrudun Moisés, inébeti joun güriía sarágu. Ába laráramun, ába laríñagun lun janüğüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúruđu.

35 Ába laríñagun joun gumádimatiña.

—Wügüriña Israelna, toúnigi jumátia láu le lúnbei jadügüni jáu wügüriña ja.

36 Jarítagu jumátia luágu íñúragua lán meja Teudás lúngua aríñaga luágu ában lan wügüri weíriguti ligía, ába jafálaruni gádürü-san wügüriña, áni afarúati jílagubei, súnti ja afálarubalin, ába jawáragadagun, ába lagúmuchun sun cátei.

³⁷ Lárigiñe, lídan lidáni jabájüdüniwa güriǵia, ligía liñúrágun Júdas le Galiléana lúngua, sarágu jáña afálaruti lídan labúseerun yebe lagáragagun luágun gumádi. Afáruati giñe, ába giñe jawáragadagun sun ja afálarubalin.

³⁸ Ígira jumáña lubeíti wügüríña ja, memétera jumá jámoun. Ladüga ánjein jáni lubei wügüríña cátei le jarúfudajabei lúma le jadüǵübei, lagúmuhaguba,

³⁹ ánjein láni lubei Búngiu, siñá jubei agünrinchagua. Touñigi jumá, mageindagua jumá lúma Búngiu.

⁴⁰ Ába jánjanrun súngubei láu le lariñagubei. Ábati jebélaagüdüniña apóstolugu, ába jabeichuniña, ába jariñagun joun lun jebé lan jadímurejan lídan líri Jesúsu. Lárigiñe, ába jígiragüdüniña,

⁴¹ Ába jáfuridun apóstolugu jámagiñe lúrudugu, gúndaanu láu larijiniña Búngiu queísi güriǵia gadünamatiña lun jasúfuriruni busíganu luágu líri Jesúsu.

⁴² Merédetiti jarúfudajan témpulurugu lúma tidan buri múna ságü wéyu, aríñaga jagía luágu Jesúsu lan Cristubei le agúrabajoúbei.

6

Jáluajoúniwa sédü idejatiña

¹ Lídan dan ligía, quei agibedeina jamátima afiñetiña luágu Jesucristu, ába jagúmeserun ja adímurejabaña güriégu adárira jadúnrun ja adímurejabalin jerérun juríu, ába jariñagun luágu mibíjin jamá würíña güriégu ja jiláañabaña úmari eígini dan le lafánreinjoúniwa, ságü wéyu.

² Ábati joúndaruniña dúusu apóstolugu afiñetiña, ába jariñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eígini.

³ Ligía lubeíti nidújeñu, áluga jumá sédü wügüríña jídaangiñe ja gafiñerúati jawágu, ja chúbaña áu, ja derégeguatiña joúngua lun Sífiri Sándu le gumúti, lun jadüǵüni wadágimanu le.

⁴ Wagía, wedéregubei wadáani lun ayúmuraguni lun Búngiu luma lun warúfudajani lerérun.

⁵ Ába júaradun súngubei lídan cátei le, ába janúadiruní Estéban, le ában wügürí buín líña láu afiñeni luágu Jesucristu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas lúma Nicolás le Antioquiana, lé meja afálarubalin ligáburi jafiñen juríu.

⁶ Ába janüǵüniña le ñíjin jabei apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimajaña lan agáambuti lerérun Búngiu lídan sun fulásu, agánwoundeina jagía afiñetiña Jerusalén furése, ába giñe jafiñerun sarágu fádirigu juríu luágu Jesucristu.

Ladáürin Estéban

⁸ Adáaguatiña Estéban, le ábanbei wügürí le buínbei láu ubáfu lúma abíniruni lúmagiñeti Búngiu, milágoru lúma seíni jádan güriǵia.

⁹ Ábati jagúmeserun güriǵia asígeneja luágu, güriǵia jagía, tídaangiñetiña jalígilisin juríu to gíriboun “Idámunigu Joúnguaña”, jáma Cirénena, Alejan-dríana, Cilíciana jáma Ásiana.

¹⁰ Siñáti joun lúma Estéban, ladüga láu lichú áu le líchugubei Sífiri Sándu lun ladímureja.

¹¹ Ábati jafáyeirun wügüríña lun jaríñagun luágu agáamba jamáani adímureja wuríba luágu Moisés lúma luágu Búngiu.

¹² Ábati jafúdagüdüniña güriía, jáma arúfudajatiña lilúrudun Moisés, jáma wügüríña weirigutiña lídan jafiñen juríu, ába jarügüdüni Estéban, ába janügüni ligíbugiñoun líñun-ágei lúruđu.

¹³ Ába giñe jalugun yéetiña lun jaríñagun luágu lerédera lan adímureja wuríba tuágu témpulu sáandu lúma luágu lilúrudun Moisés.

¹⁴ Jaríñaga.

—Agáamba wamúti lariñagun luágu lagünrinchagubouñ lan Jesúsu Nazarétna témpulu, sáansi leíme igáburí le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7

Ladímurejan Estéban luágu lufúleisein

¹ Ábati lariñagun fádiri le íñutimaabei lun Estéban.

—¿Inárüni sun cátei le?

² Ába louñabun.

—Nidújeñu, nagübürigu, agáamba jumána. Weiriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán.

³ Ába lariñagun lun. “Ígirabei bageíra jáma bidújeñu, beíba lídoun fulásu le lúnbei narúfuduni bun.”

⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába louñwen lúguchi, ába lanügüni Búngiu Abrahám lídoun fulásu le ñí lubei wagánawa guetó.

⁵ Míchuti ñi murúsun múa lun lídan fulásu le, aríñagarügüti lun luágu lachülürüba lan dan lun lánibei lan ageíraü le jáu sun ladügüwagun, láu sún meja marájüñgüli lan Abrahám lídan dan ligía.

⁶ Aríñagati Búngiu lun luágu jaganóüba lan ladügawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu.

⁷ Aríñagati giñe Búngiu lun. “Nagúseragüdübaña lílana fulásu le anügübaliña idámunime, lárigiñeme lásügürün gádürü-san irúmu, ábame jáfuridun ñígiñe, ábame jesériwidun nun lídan fulásu le.”

⁸ Adüñgati Búngiu ában darádu lúma Abrahám, ába lerésibiruni Abrahám circuncisión, liseíname darádu ligía. Ligía, dan lubei lagüriajouñbei liraü Abrahám le Isáac, ába lerésibiruni circuncisión luágu wídü wéyu láu, ítara giñe ladüga Isáac lun Jacób le liraü, adüglei Jacób, le méme giríbei Israél, joun dúusu lirájüñü, ja jagübürigubaña dúusu türíbu ja giribaña Israelítagu guetó.

⁹ Lirájüñü Jacób ja, ja binádubaña wagübürigu, ába jagímugajan lun José le jamúlen, ába jalúguruni lun lanügün Ejíptoun quei idámuni. Ñíñein Búngiu lúma José,

¹⁰ ába leséfuruni lídaangiñe sun lidíjeri láu líchugun gunfaráandaü lun. Ába lagáñeiragüdüni lufúleisein Faraón, le lurúeite Ejípto lun, ába líchuguni José ábutime ñi Ejípto lúma tídan lúban Faraón.

¹¹ Ábati ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagübürigu cába lan jeiga.

12 Ába lagáambun Jacób luágu níjein lan eígini Ejípto, ába loúnajaniña lirájüñü, ja binádu wagübürigu, ñi. Ligía furúmiñetibi jaweíyasun.

13 Le libíaman jóudin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José.

14 Ábati loúnajan José anúgei Jacób le lúguchi jáu sun lufámilian, Ejíptoun, úrúwañanu-wein-queínsi gürígia jagía.

15 Ítara líña lídinbei Jacób agánawa Ejípto, le ñí lubei louwe, ñí lubei giñe jówegua binádu wagübürigu.

16 Átiri irúmu lárigiñe, ába lanügüniwa jábu nígiñe lídoun fulásu le gíríbei Síquem, ába jabunún lídan umúajaü lé meja lagaññabei Abrahám jámagiñe lirájüñü Hamor ñi Síquem.

17 ‘Dan le layárafadúnbei dan lun lagúnfulirun dimúrei le líchugubei Búngiu lun Abrahám, gíbeeña ladügawagun Israél Ejípto.

18 Ábati lagúmeserun ában urúei agúmadija Ejípto le ibídiñejabubei lun José.

19 Ába layéeraguniña urúei ligía warásan juríu, amúdiragua láña binádu wagübürigu, águragüdáña jasáanigu ja figigiña joun lun jówegun, gumúgua lámuga warásan.

20 Lídan dan ligía, ligía lagüriajóun Moisés, ában irájü buídumeraüti, ába jagüriajani lagübürigu jábiñe luágu úrúwa játi.

21 Dan lachülürünbei dan lun jáguruni, ába jáguruni, ába tabúduni liraü urúei Ejíptona, ába tagüriajani quei tiraü.

22 Ligía lafúnrendeirubalin Moisés lichú jáu Ejíptona, áni gabáfutiti lídan le lariñagubei lúma le ladügübei.

23 ‘Dan le bián-weñjali irúmu láu Moisés, ába lálugun lídin aríjaña lirásan ja ladügawagun Israél, ja ñíbaña Ejípto.

24 Ába laríjin ában Ejíptona amúdiragua ában jádaangiñe, ába lídin Moisés ideoquei lidúje, ába leséfuruni láu láfaruni Ejíptona ligía jilágubei.

25 Moisés, jaritaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti.

26 Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdüniña jámagua. Ítara líña lariñagunbei joun. “Ában mémetia mútu jugúya, ¿ca uágu jageíndagua júmagua?”

27 Ábati ládaruni wüğüri le áluajabei wuríbu lúma le ában, ába lariñagun lun. “¿Ca íchubalibu ábutime lúma agúseragüdútime wádan?”

28 ¿Buséntibu giñe báfarunina quei báfaruni Ejíptona ligíra güñaarü?”

29 Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jáguchi lan bián irájüñü ñi.

30 ‘Bián-wein irúmu lárigiñe, ába lasáriragun ában ánjeli lun lídan fulásu mageírawati, yaráfa lun wübü le gíríbei Sinaí, liábin lun quei wátu geméti lídan ában búbugati.

31 Ába laweíridun lanígi Moisés láu cátei le laríjubei, dánti layárafadun lúntima laríjini buídu, ába lagáambun lariñagun lumálali Wabúreme Búngiu.

32 “Áu Jabúngiute binádu bagübürigu, Lubúngiute Abrahám, Lubúngiute Isáac lúma Jacób.” Ábati lagúmeserun Moisés adádagara láu anúfudei, májaali ni lun laríjin ñíjin.

33 Ába laríñagun Búngiu lun. “Gidáboun bigeídin lueígiñe bugúdi, ladüga fulásu le ñi bubei rára, fulásu sánduti.

34 Aríja náali jasúfurirun numútuniña Ejipto, agáamba náali jagúajan láu igárigu, neséfuraña lubeíti. Jigábu lubeíti, nouñajadibu Ejipto.”

35 “Láu sun meberesen jamá láu Moisés, álügüda jamei ca lan íchubalin ábutime lúma agúseragüdútime, oúnaja lumúti Búngiu quei ábuti lúma quei eséfujati, adímurejeina Búngiu lidaangiñe ánjeli le asálriragubei lun lídan búbugati.

36 Moisés aságarubaliña binádu wagübürigu Ejiptogiñe, adüga ligía miláguru buri lúma buri cátei weíriguti lídan fulásu ligía, lídan Barána Funáti, lúma lídan fulásu mageirawati, luágu bián-wein irúmu.

37 Moisés meme le, ligía aríñagubei joun Israelítagu. “Loúnajaba Búngiu ában proféta jun jádaangiñe guánarügü jibíriña, quei loúnajanina. Adüga jumá gásu láu.”

38 Lídan le añája lubei Israelítagu adámurigu lídan fulásu mageirawati, Moisés méme le, ába ladímurejan lúma ánjeli luágu wúbü le Sinaí, ába lásügüragüdüni lerérun ánjeli ligía joun binádu wagübürigu. Ligía le erésibirubalin ugánu le adúrarubei lun sun dan lúmagiñe Búngiu lun lásügüragüdüni woun.

39 ‘Májatiña meja binádu wagübürigu jagáambuni Moisés, mebereseruntiña láu, busénrügü jagía jagíribudun Ejiptoun.

40 Ábati jaríñagun lun Aarón. “Buséntiwa lun badügün búngiugu woun lun jóudin wabá wabá, ladüga ibídiñeti woun ca lan susérebei lun Moisés, le aságarubaliwa Ejiptogiñe.”

41 Ábati jadügün ában tiyáwa bágasu lun jasándunme, ába jáfarun anímaalugu lun jadágaragüdün tun jasándun, ába jadügün fédu lun jagúndaarun láu cátei le jadügübei láu jájabu.

42 Ábati ladíreirun Búngiu jawei, ába lígiruniña lun jájuduragun joun warúguma ja siélubaña. Ítara líña labürüdün tídan jalíburun profétagu.

Jugúya Israelítagu, ¿áfaratün funági anímaalugu lun jadágaragüdün nun lídan bián-wein irúmu le jáubei lídan fulásu mageirawati?

43 Madügün jumúti líra, lubáragiñe lira, barü jumuti jisándun Molóc tídan lágei to jadügüboun lun,

túma tiyáwa warúguma to gíriboun Renfán, to gíñe janügüboun quei jisándun, iyáwaü buri ja jadáagun guánarügü lun jájuduragun joun.

Ligía naságarubadün lubei jageiragiñe, nouñajaünme yagüroun méme luei Babilónia.

44 ‘Lídan fulásu mageirawati, ñíñoun méja lúban Búngiu to gadíñurúwadiboun jáma binádu wagübürigu, ñi lubei lerédera Búngiu jáma. Adüga lumútu Moisés lúban Búngiu tugúya queisi larúfuduni Búngiu lun lun ladügünun.

45 Nújeingua méja múna tugúya jáma jadügwagun binádu wagübürigu, ába janügünun jámawagua lídoun fulásu le ñi lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoubaña ya. Ítara líña, nújeingua lubei lúban Búngiu tugúya lídan fulásu le dari lidáni Davíd.

46 Daríti urúei Davíd fuleisei ligíbugiñe Búngiu, ába labúseerún yebe ladügün ában témpulu lun laganóun Lubúngiute Jacób ñi,

47 Salomón adügubarun témpulu tugúya,

48 láu sun, maganoún lan Búngiu le weírigutimaabei tídan buri ligíli to jadüga gürigia, quei meja laríñaguni proféta.

49 Siélu nálabei le ñí lubei nañúura lun narúeijan, ubou, le ñí lubei neméraaguagüdei nugúdi.

¿Cába tuwúyeri múna jadúga nun? líña lariñagun Búngiu.

¿Cátei fulásu le ñí lubei gayára lan neméraagun?

50 ¿Ma funági nadúga sun cátei le láu nújabu?

51 Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagübürigu.

52 ¿Ca jádaangiñe profétagu mouserun jabáña binádu jagübürigu wuríba? Ni ában, áfaragua jamútiña já meja adímurejabaña luágu liábin Cristu le richáguabei, guetóti dan liábin, ába jalúguruni joun láganiñu, ába jáfaruni jiláguabei.

53 Jugúya le erésibirubálin lilúrudun Búngiu jámagiñe ánjeligu, mídintün láu.

Loúnwen Estéban

54 Dan jagáambunbalin cátei le, ába jagáñidun buídu, ába lacúnrinjan jári luágu Estéban, le jagáñi lun.

55 Ánjein Estéban, buin líña láu lubáfu Sífiri Sándu, ába laríjin siélu, ába laríjini luewirigun Búngiu, luma Jesúsu rára lueígiñe loúnwenren Búngiu.

56 Ába lariñagun joun.

—¡Aríja jumá! Ariagu níña lun siélu darágu, luma Jesúsu le Wügüri Garaüwarügüti, lueígiñe loúnwenren Búngiu.

57 Ába jadáuruni jarígei láu jájabu luei jagáambuni, ába jayábin sun jagía luágun, agúarajeina.

58 Ába jaságaruni ubúrugugiñe, ába jígirunun geféentiña janáangun lábugiñe lariaajan ában wügüri giriti Sáulo, ába jachámuragun dübü luágun Estéban.

59 Súnti añája lan achámuragua dübü luágun, ába layúmuragun Estéban lun Jesúsu, ába lariñagun.

—Nabúreme Jesúsu, resíbiboún nuwáni.

60 Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figou le.

Lárigiñe lariñaguni le, ába loúnwen.

8

Leibaajaniña Sáulo ja afiñebaña luágu Cristu

1 Sáulo, gúndaatiti láu láfarún Estéban.

Wéyu méme ligía, ába lagúmeserun ában oúnwenbun eibaajoúni jawágun ja afiñebaña luágu Jesucristu, Jerusalén. Ába janúragun lídoun buri lirájüñü fulásu Judéa luma Samária le míbetiña gürígia ñi, apóstolugu rügüñanu manúrajan.

2 Ába jayábin wügüriña ja derégeguatiña jóungua lun Búngiu, ába jábununi Estéban láu sarágu íruni luágu loúnwen.

3 Ábati lasígirun Sáulo eibaajaña afiñetiña, ábaja lebéllurun tídoun sun múna lun laságaruniña wügüriña jáma würiña adúruujeina, ába loúnajaniña furísunrugun.

Lapúrichijoún ugánu buíti luáguti asálbaruni Samária

4 Apúrichija jamúti ja anúrajabaña Jerusaléngiñe ugánu buíti luágu chülü lan Jesucristu lun lasálbaruniña sun gürígia, sun le ñí lumuti jóudin.

⁵ Ába lídin ában jádaangiñe, gíríti Felípe, lídoun ában ubúruyu Samária, ába lagúmeserun adímureja joun ja ñíbaña luágu Crístu.

⁶ Ábaja jóundaragun gürígia, ru jagía jarígei lun le ladímurejabei Felípe, aríja jamei buri gíñe miláguru le ladáagubei.

⁷ Ladüga sarágu buri gürígia ja gawágutiña espíritugu wuríbatíña, areídaguátíña, ába buri jáfuridun espíritugu wuríbatíña jagía agúarajeina jádaangiñe, areídagua jagía sarágu derégúdaaña jamá, meibuguntiña.

⁸ Súnti gürígia lídan fulásu ligía, gúndaatiña luágu cátei le.

⁹ Ñíñein ában wügüri lídan fulásu ligía, gíríti Simón, gabíñarajati meja, lüñajaali ayéjaña gürígia Samariána láu laríñagun joun luágu máma lan furúmieguarügü gürígia ligía.

¹⁰ Agáambaja jamútítíja sun gürígia buídu, jámagiñe ja gudémegutiña dagá jámoun ja weirígutiña, ába jaríñagun.

—Íbíja lumúti gürígia le ouñwenbun lubáfu Búngiu.

¹¹ Adügatiñatíja gásu láu, ladüga lüñajaali ayéjaña láu labíñarajan.

¹² Dan le jafíñerunbei luágu ugánu le líchugubei Felípe joun luágu larúejan Búngiu lúma luágu Jesucrístu, dándu wügüriña quei würiña, ába jabásterún.

¹³ Simón meme ligía ába gíñe lafíñerun, ába gíñe labásterún, ába lagúmeserun afálarei Felípe, le luweírín lanígi láu buri ouñwenbun buri miláguru lúma seíni le ladáagubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáli lan Samariána lerérún Búngiu, ába jóúnajani Pédro lúma Juan ñi.

¹⁵ Dan le jachülürünbei, ába jayúmuragun jawágu afíñetiña ja Samariána lun liábiba Sífiri Sándu jádoun,

¹⁶ ladüga miábíngili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsu.

¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu ñübin lan Sífiri Sándu jádoun gürígia dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu.

¹⁹ Ába laríñagun joun.

—Rújumei gíñe ubáfu le nun, lun dánme lan níchuguni nújabu luágu furúmieguarügü, lun gíñe lerésibiruni Sífiri Sándu.

²⁰ Ábati laríñagun Pédro lun.

—Beíba máfiougatin láu sun biseínsun, ladüga jarítugatuibu luágu gayára lan lagáñijóun cátei le ledéweejan Búngiu.

²¹ Maríchatibu, mafánran bugúya lídan wesériwidun lun Búngiu, ladüga múaraantu banígi ligíbugiñe Búngiu.

²² Ígirabeí buríban le, ayúmuraguabá lun Búngiu, lun ferúduna lánibu luágu luríban barítagan.

²³ Ladüga aríja numúti luágu buin tíña lan banígi láu wuríbani, áni ragúñu liñálibu Máfia.

²⁴ Ábati laríñagun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jaríñagubei.

²⁵ Lárígiñe jíchugun fe luágu Jesucrístu lúma jadímurejani lerérún Búngiu lídan fulásu ligía, ába japúríchijani apóstolugu ugánu buíti luáguti lasálbaruniña

Jesucrístu gürígia lídaangiñe jaffgoun lídan sarágu lirájüñü fulásu Samária, luágu jaweíyasun járigouñ Jerusaléoun.

Felipe lúma wügüri le Etiópiana

²⁶ Lárigiñe cátei le, ába laríñagun láni Wabúreme Búngiu ánjeli lun Felipe.

—Aráansebá, beíba luágun sur lídaangiñe úma le arárirubei Jerusaléngiñe lun ubúrugun Gáza.

Lígia úma le ásügürübei lídaangiñe fulásu mageírawati.

²⁷ Ába laráanserun Felipe, ába lídin. Luágu leíbuguniwágu, ába ladárirun ában wügüri Etiópiana lubá lubá. Wügüri lígia siñáti garaü lan, ában wügüri weíriguti, lígia giñe gamánijaribeí láu sun tiseínsun Candáce to lurúeite Etiópía. Liábiñati wügüri lígia Jerusaléngiñe lárigi lídin ájuduragua lun Búngiu.

²⁸ Lagíribuduñáti lageíroun, ñun tídan ában cárü, alíjeinaloún lilíburun proféta Isaías.

²⁹ Abati laríñagun Sífiri Sándu lun Felipe.

—Yaráfabá tuágun cárü túra.

³⁰ Ába leibaagun tuágun cárü, ába lagáambuni lalíjaña lan tídan lilíburun Isaías, ába laríñagun lun.

—¿Gunfaráanda bumútisan le balíjabei?

³¹ Ába laríñagun wügüri lígia lun.

—¿Ída lubági gunfaráanda náani, úaga cába lan afúnraanguágüdei nun?

Ába laríñagun lun Felipe lun ládinun lúmoun lun lañúurun loúbagiñe.

³² Niján buri dimúrei le lalíjabei.

Quei mudún, lanügüwa lun lafarún jilágubei, ítara quei leréderun mudún maníñu jagíbugiñe ja ásarubalín líyu, ítara líña giñe maríñagun lan ni cáta.

³³ Ünabuti lanügün, áni michugúnwati lirícha lun, siñábei ladímurejoún jawágu ladúgawagun, ladúga gumúja lan labágaridun ubouágu.

³⁴ Ába laríñagun wügüri lígia lun Felipe.

—Adúgabei fuleisei nun, aríñagabei nun, ¿cáteisán le uágubei laríñagei wügüri le abúrújabei dimúrei le, luougua, ódi luágu ámu?

³⁵ Abati lagúmeserun Felipe arúfudajei Lerérun Búngiu lun, lúmagiñe le ñígiñe lubei lagúmesera alíja, ába líchuguni ugánu luáguti Jesúsu lun.

³⁶ Dánti le jásügürünbei lídaangiñe ában fulásu le ñí lubei dúna, ába laríñagun wügüri lígia.

—Nijántia dúna, ¿siñátisan nabásterun?

³⁷ Laríñaga Felipe lun.

—Ánjein affíne bubei luágu Jesucrístu táu sun banígi, gayáraati babásterun.

Laríñaga wügüri lígia lun.

—Afiñetina luágu Jesucrístu lan Liraübei Búngiu.

³⁸ Abati laráramagüdünun cárü, ába jarárirun biángubei jagía dúnarugún, ába labásterágüdüni Felipe.

³⁹ Dan jamúdeirun dúnarugugiñe, ába lanügüni láni Búngiu Espírítu Felipe ñígiñe, ába maríjin láali lan wügüri lígia. Ába lasígiruni leíbugun, gúndaañu.

⁴⁰ Ába ladáriragun Felipe lúngua Azóto, ába lídin lídaangiñeina fulásu apúrichijeinaléi ugánu luáguti Crístu darí lachülürün Cesaréa.

9

Lerésibiruni Sáulo Crístu queísi lasálbaragüle

¹ Sun dan ligía, merédeti lasíadiruniña Sáulo afiñetiña luágu Jesucrístu.

² Ligía lídinbei lúmoun fádiri íñutimaati lídan jafiñen juríu amúriaja gárada láutu ubáfu lun lídin tídan buri jalígílisin juríu to Damáscoboun álujajaña ja afálarubalin lémeri Crístu lun lanúgüniña adáüragua Jerusalén, dándu wügüríña quei würiña.

³ Luágu leíbuguniwágu, dan yaráfaali lun Damáscu, sódini ába ladúnraagun ában larúgouna siéluçiñe, geyégu láu.

⁴ Ábati láburujan Sáulo múarugún, ába lagáambun lariñagun ában umálali lun.
—Sáulo, Sáulo, ¿ca uágu beíbaajana?

⁵ Ábati lariñagun Sáulo.
—¿Cátabusan Nabúreme?

Ába lariñagun umálali ligía.
—Jesúsu áu, le méme beíbaajabei.

⁶ Sarába, belúba ubúrugun, lariñawagúba bun ñi cába lan badüga.

⁷ Wügüríña ja úarabaña lúma Sáulo lídan luweíyasun, ába jaráramun láu luweírin janígi ladüga agáamba jamúti umálali, áni maríjin jamúti le adímurejabei.

⁸ Ába lásaarun Sáulo múarugugíñe, dan le léfegechúnbalin lágu, maríjinjali. Ábati járgüdüni lújabu, ába janügüni ubúrugun Damáscu.

⁹ Ába leréderun ürüwa wéyu ñi maríjina, meígin líña, mátun ni cáta.

¹⁰ Ñiñein ában afiñeti luágu Jesucrístu ñi Damáscu gíriti Ananías, le únbei layáwadagua Wabúreme Jesúsu, ába lariñagun lun.

—¡Ananías!

Ába loúnabun.
—Anája ya, Nabúreme.

¹¹ Ábati lariñagun Jesúsu lun.

—Beíba guetó guetó luágu üma le gíribei Surúti, danme le bachülürün lúbiñe Júdas, bálügüdjame luágu ában wügüri Társona gíriti Sáulo. Badárirubei ñi ayúmuragua lun Búngiu,

¹² áni ayáwadaguaali ában wügüri gíriti Ananías lun, ába líchuguni lújabu luágu lun gayára lan larijin.

¹³ Dan lagáambunbalin Ananías cátei le, ába lariñagun.

—Nabúreme, gíbeeñátia abájüdagutiña nun luágu wügüri ligía lúma luágu sun wuríbaní le ladáagubei joun ja afiñebaña buágu, Jerusalén.

¹⁴ Guetó, liábiña ñájoun láu ubáfu jámagíñe jábutigu fádirigu lun ladáüraguniña sun ja bánigubaña.

¹⁵ Ába lariñagun Jesúsu lun.

—Beíba, ladüga anúadira náali wügüri ligía lun ladímurejan nuágu joun gürija ja mámabaña juríu lúma joun jarúeitegu, lúma gíñe joun Israelítagu.

¹⁶ Narúfudubei sarágu cátei le lúnbei lasúfuriruni nueígiñe lun.

¹⁷ Ábati lídin Ananías lídoun fulásu le ñi lubei Sáulo. Ába lebéllurun múnadoun, ába líchuguni lújabu luágu, ába lariñagun lun.

—Nidüje Sáulo, loúnajañadina Wabúreme Jesúsu le arúfudagubei lúngua bun luágu üma le ñígiñe lubei biábin, lun gayáraaya lan baríjin, lun gíñe berésibiruni Sífiri Sándu.

18 Lídán óra ligía, ába leíguadun camá jamuga arúraü lueígiñe lágu, ábaya laríjin. Lídán óra ligía, ába labásterún.

19 Lárigiñe, ába leigin, ábaya lejéredun, ába leréderun átiri wéyu jáma affiñetiña ja aganoubaña Damáscó.

Lapúrichijan Sáulo Damáscó

20 Ába lagúmeserun Sáulo apúrichija tídan buri jalígilisin juríu, laríñaga luágu Jesúsu lan Liraübei Búngiu.

21 Súnti ja agáambubalín, ába laweíridun janígi, jaríñagati.

—¿Másan niján wügüri léñaja eíbaajabáliña ja afálarubalin Jesúsu Jerusalén? ¿Ma ligia méme le nübinbei ya lun lanáanguniña adáüra, lun ledéregeruniña joun jábutigu fádirigu juríu?

22 Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña gürigia lídaangiñe jafígoun, dari lun labúlieidaguágüdün jáu juríu buri ja aganoubaña Damáscó.

Leséfurun Sáulo jawei juríu

23 Lárigiñe sarágu wéyu, ába jelédegun juríu lun jáfaruni Sáulo jilágubei,

24 ába lasúbudirawagüdün le jabúseerubei jadügün lun Sáulo. Wéyuagu, áriebu, jagúrabajanja juríu luágu béna le áfuridagülei le láni ubúrugú Damáscó lun jáfaruni jilágubei.

25 Ába jíchuguni affiñetiña lídoun ában faniñe weíríti, ába jarárigüdüni áriebu lueígiñe bariéru le geyégubei láu ubúrugú, ába leséfurun.

Sáulo ubúrugú Jerusalén

26 Dan le lachülürünbei Sáulo Jerusalén, ába yebe lálugun ládaragun lúngua jádoun affiñetiña, sun jagía, janúfudetiña lueí, ladüga maffiñetiñá yebe luágu affiñejali lan luágu Jesucrístu.

27 Ába lanügüni Bernabé jagíbugiñoun apóstolugu. Ába labájüdagun joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúrugú Damáscó.

28 Ábati jerésibiruni Sáulo queísi jánigu, ába leíbugun jáma Jerusalén,

29 apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma juríu ja adímurejabaña güriégu, asígeneja ligía jáma, ába jabúseerun jáfaruni jilágubei.

30 Dan le jasúbudirúnbalin affiñetiña cátei le, ába janügüni Sáulo ubúrugun Cesaréa, ñigiñe ába jóúnajani Társoun.

31 Lidoun buri dan ligía, buiti jóuserúniwa affiñetiña luágu Jesucrístu ja aganoubaña Judéa, Galiléa, lúma Samária. Ába jedérebugudün lídan jaffiñen luágu Jesucrístu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá affiñerutiña.

Lareídagun Enéas

32 Dan le lebélujaña lubeí Pédro lídan buri fulásu lun líderaguniña ja affiñeñaabaña luágu Jesucrístu, ába giñe lídin aríjaña lánigu Búngiu ja ubúrugaña Lída.

33 Ñi ladárira ában wügüri gíriti Enéas, wídü irúmu láu gabánarugu láu derégüdaü.

34 Ába laríñagun Pédro lun.

—Enéas, areídagugüda lumútibu Jesucrístu. Sarába, aráanseboún bigábana.

Ába lásaarun Enéas óra ligía.

³⁵ Ába jaríjini sun ja aganoúbaña fulásu buri Lída lúma Sarón, ába jígiruni binádu jafiñen, ába jafiñerun luágu Jesúsu.

Táguuyugun Dórcas

³⁶ Lídan meja dan ligía, ñiñoun meja ában affiñetu aganoútu Jópe, gíritu Tabíta, lídan jerérun güriégu, gíritu Dórcas. Würi tugúya, súnwandan táu adúga buíti, íderagua tugúya gudémetiña.

³⁷ Lídoun dan ligía, ába tasándirun Dórcas, ába touñwen, lárigiñe jagawagüdünnun, ába jaríwachaguagüdünnun.

³⁸ Yaráfati Jópe lun Lída le ñi lubei Pédro, queíti jagáambuni affiñetiña luágu níjein lan ñi, ába jóunajan bián wügüriña aríñaga lun.

—Queímoun Jópe, oúfuda.

³⁹ Ábati lídin Pédro jáma. Dan le lachülürünbei, ába janügüni tídoun rúmu to ñi tubei jiláaru, ába jagúriridágun sun würiña ja jiláguaañábaña úmari láu, ayájuaja tárigi, arúfudajoún buri dínugu túma simísi tó buri tájúchagubóun Dórcas dán meja moúnwengiru, lun.

⁴⁰ Ába láfuridagüdüniña Pédro sun ja ñíbaña, ába lájuduragun, ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegehuni tágu, dan taríjini Pédro, ába tiñúragun túngua.

⁴¹ Ába lárügüdüni tújabu, ába lásaaragüdünnun. Lárigiñe, ába lagúarun joun würiña jagía jáma jíbiri affiñetiña ja ñíbaña, ába larúfudunun joun, wínwañu.

⁴² Ába lagaambún cátei le lídan sun ubúругu Jópe, ába sarágu jamá affiñerutiña luágu Jesucristu.

⁴³ Ába leréderun Pédro sarágu dan lídan ubúругu ligía, lúbiñe Simón le aráansejabei úraü.

10

Louñajan Cornélio ougei Pédro

¹ Ñiñein ában wügüri ubúругu Cesaréa gíriti Cornélio, gumándan joun súdaara ja Italiána.

² Wügüri ligía jáu sun lufámilian, derégeguaatiña jóungua lun Búngiu, judúguatiña lun Búngiu láu sun máma jamá juríu. Rúti buri giñe sarágu seínsu lun jíderawagún juríu, áni súnwandan layúmuragun lun Búngiu.

³ Luágu ában wéyu, quei buri ladaünrün úruwa rábounwéyu, ába lasáriragun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjalei buri cátei le badügübei lun bíderaguniña gudémetiña.

⁵ Oúnajabá lubeíti wügüriña ubúругu Jópe lun jóunguni Simón, le giñe gíribei Pédro, lun liábin bun.

⁶ Lúbiñe Simón le aráansejabei úraü, le gábanbei láru barána.

7 Dan le ñüdünjali ánjeli le adímurejabei lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdeara ligía, ában wügüri derégeguati lúngua lun Búngiu, leménigira Cornélio.

8 Ába labájüdaguni sun cátei joun, ába loúnajaniña ubúrgu Jópe.

9 Larúgan amídirugu, sun ayarafadeina jamá wügüriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu.

10 Weírjaliti liláma óra ligía, busénjali leigin. Dan le añája lan aráanserei leigin, ába lasálriragun ában cátei lun ítara.

11 aríja lumúti lánjunrenchun siélu, ába tiábin ában cáton camá jamuga gamísa weírutu gürágu lueigiñe gádürü tarígei, tiábin arárireina múarugun.

12 Tidán gamísa tugúya, ñíñanu sun jawúyeri anímaalu, gádürügua tugúdi, jéwe, jáma dunúru.

13 Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beígin.

14 Ába loúnabun Pédro.

—Uá, Nabúreme, meigiñajágidina ni cáta le wanügübei quei mabuídunti según lilúrudun Moisés.

15 Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, maríñagabá luágu luágu mabuídun lan.

16 Ūrúwañein weíyaasu lasúseredun cátei le, lárigiñe, ábaya tamúdeirun gamísa tugúya siélun.

17 Súnti niján lan Pédro láu luweírín arítaguni luágu, asáminara ca lan laníchigubei cátei le laríjubei, ligía jachülürün luwügüriñan Cornélio, álügüdajeína tuágu lúban Simón.

18 Dan jachülürün tubéneri múna, ába jálügüdajan rein ánjein ñí lubei lagánawa ában gíríti Simón le giñe únbei jaríñaga Pédro.

19 Queíti buga nijágu lan Pédro asáminara luágu cátei le asálriragubei lun, ába laríñagun Sífri Sándu lun.

—Añája ũrúwa wügüriña álugabu,

20 raríba, oufudabá, beíba jáma láu afiñeni ladúga áu lan oúnajabalíña.

21 Ábati larárirun Pédro le ñíjin jabeí wügüriña ja loúnajabaña Cornélio, ába laríñagun joun.

—Áu le jáluajabei. ¿Ca gabügürübalün?

22 Ába jaríñagun.

—Loúnajan gumándan le gíríbei Cornélio wagía, ában wügüri surúti, derégeguati lúngua lun Búngiu, jínsiñeti joun sun juríu. Ñübinti ában ánjeli aríñaga lun lun loúnajan ougabun bídín lúbiñe, lun lagáambuni le lúnbei baríñaguni lun.

23 Ábati lebélaagüdüniña Pédro, ába jeréderun lúma ñi áriebu ligía. Larúgan, ába lidin Pédro jáma, ñüdüntiña giñe jádaangiñe affñetiña ja aganoúbaña Jópe jáma.

24 Larúgan, ligía jachülürün Cesaréa, le ñí lubei Cornélio agúrabajaña jáu lidújeñu jáma jabuídun-ágei lumádagu ja lamísurajabaña.

25 Dan lachülürün Pédro, ába láfuridun Cornélio erésibirei, ába lájuduragun ligíbugiñe láu sarágu inébesei.

26 Ába liñúraguni Pédro, ába laríñagun lun.

—Ráramabá, wügüri giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuriñu ñi.

²⁸ Ábati laríñagun Pédro joun.

—Subúsi jumúti luágu mája lan wafiñen wagía juríu lun jóundaragun juríu jáma ja mámabaña juríu quei jugúya, ni lun webélorun tídoun jában luei wasálrin mabuídunga ligíbugiñe Búngiu. Wel, aráfuda láali Búngiu nun luágu mabúseerun lan lun noúseruniña ja mámabaña juríu queísi gürígia mabuíduntiña.

²⁹ Ligía nánjanrunbei niábin dan le bouñajanbei nuágu. Buséntina jamúgati nasúbudiruni ca lan lébubei jóunajan nuágu.

³⁰ Ábati loúnabun Cornélio.

—Ürüwa wéyu guetó, queiburi óra le, ñáñadina núbiñe ayúmuragua lun Búngiu ladaürün ürüwa rábounwéyu, queísi wéchun, ligía lasálriragun ában wügüri nun táu ában dáüguaü miritu.

³¹ Ába laríñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badügübei lun bíderaguniña gudémetiña.

³² Oúnajabá lubeíti wügüriña ubúruгу Jópe ougei Simón le giñe giríbei Pédro, lúbiñe ábanya Simón aráansejati úraü, le gábanbei láru barána, ñi lagánawa.”

³³ Ába lubeíti noúnajan ougabu furése, áni buítiti badüga biábin. Guetóti awánja sun wagía ya ligíbugiñe Búngiu, busétiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanügüniña Búngiu sun gürígia.

³⁵ Resibirügü lumútiña sun ja inébejabúbaña lun áni adüga jamei le buídubei, dándu juríu quei ja mámabaña juríu.

³⁶ Adímurejati Búngiu joun ladügawagun Israél, adímurejeina ugánu luágti gayára lan jaráandarun gürígia luma Búngiu lídaangiñe Jesucristu, le Jabúremebei sun gürígia.

³⁷ Jugúya, subúdi jumúti cátei le asúseredubei jageira juríu buídu, le agúmeserubei Galiléa lárigiñe lapúrichijan Juan, áni abásteragüdaja ligía.

³⁸ Subúdi jumúti luágu rúlaani Búngiu lubáfu Sífiri Sándu lun Jesúsu Nazarétna, luágu meja giñe ladáagun buíti, lúma lareidaguagüdüniña ja asúfurirubaña lábugiñe lubáfu Máfia. Ladügünbalin buri meja cátei le, ladüga ñíñein lan Búngiu lúma.

³⁹ Wagía geféentiwa luágu sun cátei le ladügübei Jesúsu Jerusalén lúma lídan sun líbiri jageira juríu. Lárigiñe, ába jáfaruni jilágubei láu jádaraguní luágu ában gurúwa.

⁴⁰ Sarágüda lumúti Búngiu lídaangiñe ouweni luágu lürüwan wéyu, ába larúfudaguágüdüni lúngua wíwnañu woun.

⁴¹ Marúfudagúnti lúngua joun sun gürígia, lueídügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe ouweni. Jóütiwa lúma, gurá wagía lúma lárigiñe lásaarun lídaangiñe ouweni lúnya labágaridun.

⁴² Ába loúnajaniwa apúrichija joun gürígia luágu, lun giñe waríñaguni luágu rúlaali lan Búngiu Jesúsu méme le lun lagúseragüdüniña ja wíwnangiñabaña jáma ja jiláguaañabaña dánme le lagribudun ubouágun.

⁴³ Adímurejaaña meja giñe sun profétagu luágu Jesúsu lúmagiñe binárú, luágu sun lan ja afñebaña luágu, resíbi jamáni ferúdon luágu jafígoun.

Jerésibiruni ja mámabaña juríu Sífiri Sándu

⁴⁴ Ñígili Pédro adímureja, ligía liábin Sífiri Sándu jádoun ja agáambajabalin ladímurejan.

⁴⁵ Játi juríu ja afñetiña luágu Jesucrístu ja ñübinbaña úara lúma Pédro, ába laweíridun janígi láu liábin Sífiri Sándu jádoun ja mámabaña juríu.

⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigin Búngiu.

⁴⁷ Ábati lariñagun Pédro.

—¿Majouabei funági lun jabásterún gürígia ja, quei resíbi jamáli lubei Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucrístu. Lárigiñe, ába jayúmragun lun Pédro lun leréderun átiri wéyu jáma.

11

Labájüdagun Pédro joun tílana ligíisi to Jerusaléoun luágu le asúseredubei Jópe

¹ Ába jagáambuni apóstolugu jáma jíbiri afñetiña ja Judéabaña luágu ánjaaña lan giñe ja mámabaña juríu lun láni Búngiu ugánu luáguti Wasálbaragüle, Jesucrístu.

² Dánti le lagíribudun Pédro Jerusaléoun, ába jachúrjani juríu ja afñetiña,

³ jaríñaga.

—¿Cámesan bídin aríjaña ja mámabaña juríu, áni jou amürü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába lariñagun.

⁵ —Ubúruguñadina Jópe, ayúmragua lun Búngiu, ligía naríjin ában cátei lasáliragun nun camá jamuga ában gamísa weírítu tarárirun siélugiñe, gürágu lueigiñe gádürü tarígei, tiábin chülü le ñi nubei.

⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürüga tugúdi ñi, anímaalugu gáñitiña, jéwe, jáma dunúru.

⁷ Ába nagáambun lariñagun ában umálali nun. “Sarába Pédro, áfarabá jádaangiñe, joubei.”

⁸ Ába nariñagun. “Uá, Nabúreme, ladüga meigiñajágidina ni cáta le wanügübei quei mabuídunti según lilúruden Moisés.”

⁹ Ábayati ladímurejan umálali siélugiñeti ligía nun, lariñaga nun. “Le cátei le labuíduragüdün Búngiu, maríñagabá luágu luágu mabuídun lan.”

¹⁰ Ürüwañein weíyaasu lasúseredun cátei le, lárigiñe, ábaya tamúdeirun siélun.

¹¹ Lídan óra ligía, ligía jachülürün ürüwa wügüríña tídoun múna to ñi nubei, óunajóutiña Cesaréagiñe álugana.

¹² Ába lariñagun Sífiri Sándu nun lun nídin jáma láu afñeni. Ñüdüntiñá giñe sísi afñetiña ja núma. Dan wachülürün Cesaréa, ába webélurun sun wagía lúbiñoun ában wügüri,

¹³ Le abájüdagubei woun luágu nege lariñin ában ánjeli rára lúbiñe, ába lán nege lariñagun ánjeli ligía lun. “Óunajabá wügüríña lun jóudin ubúругu Jópe óugei Simón le giñe giríbei Pédro,

¹⁴ lariñagubei bun ida lúba lan gayára lan basálbarun jáu sun bufámilian.”

15 Dan nagúmeserúnbei adímureja joun, ába liábin Sífiri Sándu jádoun quei meja liábin wádoun furúmiñe.

16 Ábati narítangun luágu lé meja lariñangunbei Wabúreme. “Inárüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.”

17 Ánjeinti ru lubálin Búngiu líbe le líchubei woun, wagía le afiñeelibe luágu Jesucristu, joun, ¿cátanañadináti lun neréderubei lan le labúseerubei Búngiu ladúga?

18 Dánti le jagáambuni afiñetiña ja Jerusalénbaña cáte le, ába jámanichun. Ába jadímurejan luágu luweírigun Búngiu, ába jariñangun.

—¡Rújali lubei giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabijin ibágari magúmuchaditi!

Ligilisi to Antioquiana

19 Dan le láfarúnbei Estéban, ába giñe jagúmeserun eíbaajaña ja jíbiri afiñetiña, ába janúrajan jíbiri chülü Fenícia, Chípre, luma Antioquía. Ñi jíchigei ugánu luáguti lasálbaruniña Jesucristu gürígia lídaangiñe jafígoun jóunrügü juríu, máma joun ámu gürígia.

20 Ánjeinti afiñetiña ja Chíprena jáma Cirénena, ába jachülürün Antioquía, ába giñe jadímurejan joun ja mámabaña juríu, ába jíchuguni ugánu luáguti Wabúreme Jesucristu joun lun jasálbarun.

21 Ñiñein lubáfu Búngiu jáma afiñetiña jagía, sarágu ja mámabaña juríu, ába jígiruni binádu jafiñen, ába jafiñerun luágu Jesucristu.

22 Dan lachülürünbei ugánu le lábun jagáambun afiñetiña ja Jerusalénbaña, ába jóunajani Bernabé Antioquioun.

23 Dan lachülürünbei Bernabé, ába larijin luágu binílaaña lan Búngiu gürígia ja mámabaña juríu, ába lagúndaarun sarágu. Ába labímejaniña súngebui lun jafálaruni Wabúreme Búngiu táu sun janígi.

24 Bernabé, ában meja wügüri buíti, derégeguati lúngua lun Sífiri Sándu le gumúti, buin líña giñe láu afiñeni luágu Jesucristu, itara líña lagáñeirun sarágu gürígia lun Jesucristu.

25 Lárigiñe, ába lídin Bernabé Társo áluajei Sáulo, dan ladáriruni, ába lanügüni Antioquioun.

26 Ába jeréderun ñi jáma tílana ligilisi ában irúmu, arúfudaja joun sarágu gürígia. Ní Antioquía lagúarúa joun afiñetiña “Cristiánugu” furúmiñe.

27 Lídan dan ligía, ába jóudingua já burí profétagu Jerusalengiñe lun Antioquioun.

28 Ában jádaangiñe, gíriti Ágabo, ába laráramun jádan afiñetiña, ába lariñangun láu le lasúbudirágüdübei Sífiri Sándu lun luágu liábiba lan ában oúnwenbun ilámaü lídan sun ubóu, áni suséreti lídan lidáani larúejan Cláudio.

29 Ábati jóundaragun afiñetiña ja Antioquiana lun jóunajan seínsu joun afiñetiña ja Judéabaña según le jayáraati íchiga.

30 Ítara líña jadügüni, ába jóunajani seínsu ligía lúma Sáulo joun tábutigu jalígilisin afiñetiña Judéana.

1 Lídán dan ligía, ába lagúmeserun urúei Heródes eíbaajaña jádaangiñe affñetiña.

2 Ába láfaragüdüni Jacóbo le lamúlen Juan táu efein,

3 queíti laríjin láu gúnda jamá juríu láu cátei le, ába gíñe lanügüni Pédro adaüra. Lídán buri wéyu le fédu le ídaanbei teigúa fein magánatu ísi lasúsereda cátei le.

4 Lárigiñe lanügüni Heródes Pédro adaüra, ába ládaruni furísunrugun jáu díisi-sísi súdaaragu oúnigira gádürü gádürü, larítangun lún yebe laságaruni jagíbugiñe lílana fulásu lárigiñe fédu lun lagúserun.

5 Níñein lubeíti Pédro furísunrugu toúnigiwañu buídu, merédeti jayúmuragun túlana ligílisi lun Búngiu luágu.

Leséfuruni Búngiu Pédro furísunrugúgiñe

6 Áriebe le lubáragiñe wéyu lé yebe lúnbei laságaruni Heródes Pédro jagíbugiñoun güriñgía, larúmuguña Pédro jamídaangua bían súdaara, gürágu ligía láu bían güriñgüri, jámaya bían súdaara luágu béna oúnigira.

7 Sódini, ligía lasálriragun ában láni Wabúreme ánjeli, ába larúgoundún furísunrugu. Ába lagúuruni ánjeli ligía loúbawagu, ába lagáguduni, ába laríñagun lun.

—Sarába furése.

Ábati láburujan güriñgüri lueígiñe lújabu Pédro,

8 ába laríñagun ánjeli ligía lun.

—Murúbei bubélin, daúbounme bigeídin.

Lárigiñe ladügüni Pédro sun líra, ába laríñagun ánjeli ligía lun.

—Daúboun babíte, falábana.

9 Ába láfuridun Pédro lárigi ánjeli ligía, ibídiñoun lun ánjein inárüni lubeí lúmoun máma lan inárüni cátei le ladügübei ánjeli ligía. Genégetimáati lun camá gewenediñein.

10 Ába jásügürün jáu furúmiñetiña oúnigirutiña, sügü jamaña jabíaman, dánti le jachülürün luágun béna le gürábu le úmadagiñebei, ába lánjunrenchun lúngua. Ába jáfuridun, lárigiñe jánjiñuragún ában úma, ába lígiruni ánjeli ligía Pédro lábuga.

11 Ligíaali lárügüdagun Pédro lúngua, ába laríñagun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes lúma lueí sun lé yebe jabúseerubei juríu jadügün náu.

12 Asáminareína ligía Pédro luágu cátei le, ába lídin túbiñoun María to lúguchu Juan Márcos, le ñí jabei sarágu güriñgía adámuriñu ayúmuragua lun Búngiu luágu.

13 Dan lacañjan luágu lubéneri bürürü, ába táfuridun ában irájü músu, gírítu Róde, aríja ca lan agújabei.

14 Dan tasúbudiruni luágu Pédro lan luágu lumálali, bulíei tumúti tánjunrenchuni béna, le luweírín tugúndan, ábarüga teíbaagun múnadoun awísaja luágu niján lan Pédro bénabu.

15 Ábati jaríñagun tun.

—¡Lülüjaali báu!

Ába taríñagun joun luágu choúru tan luágu ligía lan. Ába jaríñagun.

—Máma ligía, fágua láfurugu.

16 Niján mémeti Pédro acañja luágu béna. Dan jánjunrenchuni, ába laweírídun janígi dan le jaríjini.

17 Ába líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárigiñe, ába laríñaga joun.

–Abájüdagua jumei cátei le lun Jacóbo lúma joun jíbiri afíñetiña.

Ábati láfuridun, ába lídin lídoun ámu fulásu.

18 Dan larúgadunbei, niján luwúyerigu samínaü jádan súaara, ladüga íbidiñeti joun ca lan susérebei lun Pédro.

19 Ába loúnajan Heródes áluaeji, quei madári jamáni, ába lálügüdaguniña súaara já buga oúnigrubalin, lárigiñe, ába láfaraguágüdüniña jílágubei. Lárigiñe, ába láfuridun Heródes Judéagiñe, ába lídin agánawa Cesaréa.

Loúnwen Heródes

20 Weíriti ligáñi Heródes jáma gürígia ja aganoúbaña Tíro lúma Sidón, ánjein jagía, ába jebélurun lídoun ában arítaguni lun jóúnajan wügüriña lun jadímurejan lúma luágu jafúleisein. Dan le jachülürün, ába jagáñeiruni Blásto, ában wügüri íñuguti láni Heródes, lun líderaguniña adíljei sun cátei, ladüga lageíragiñe Heródes jabíja eígni.

21 Ába lagúaragüdün Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubei lagúmadija, ába ladímurejan joun.

22 Ábati jagúmeserun gürígia agúaraja.

–¡Máma wügüri adímurejabei, búngiu adímurejabei!

23 Lídan óra ligía, ába lasándiragüdüni láni Búngiu ánjei Heródes, ladüga lanáangun lúngua luágu jerérun gürígia, míchu lumúti linébase Búngiu lun, ába jéigini jéweraü, ába loúnwen.

24 Abúrchagueínatimá ligíati ugánu le láni Búngiu, apúrichijóuati lídan sun fulásu.

25 Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barúina jamei Juan Márcos jámagua.

13

Jagúmeseruni Bernabé lúma Sáulo jawádigimari apúrichijeí Lerérun Búngiu

1 Tídan ligílisi to Antioquíaboun, ñíñanu profétagu jáma maésturugu. Wügüriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agúriarúbei úara lúma Heródes le gumádimati Galiléa, lúma Sáulo.

2 Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

–Dírei jumei Bernabé lúma Sáulo nun lun wadágimanu le únbei nanúadiraña.

3 Lárigiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóúnajaniña luágu jawádigimari.

Japúrichijan Bernabé lúma Sáulo lídan fulásu le Chípre

4 Ítara líña loúnajaniña Sífiri Sándu Bernabé lúma Sáulo, ába jóúdin Seléucia, ñígiñe, jádina lun jóúdin luágun uboúju le Chípre.

5 Dan jachülürün lídan ubúruge le gíribei Salamína, líbiri méme Chípre, ába jagúmeserun apúrichijeí lerérun Búngiu tídan jalígilisin juríu. Ñüdünti giñe Juan Márcos jáma, íderaguaaña.

6 Eíbuga jamúti sun uboúju ligía chülü lúmoun fulásu le gíribei Páfos. Ñi jadárra ában juríu gíriti Barjesús, garíyajati wügüri ligía, ye ligía, laríñaga luágu proféta lan.

⁷ Garíyajati ligía lúmañein gumádimati le Sérjio Páulo, ában wügüri janíchiguti. Ába loúnajan gumádimati ligía luágu Bernabé lúma Sáulo ladüga busén lan lagáambuni lerérun Búngiu.

⁸ Ánjein garíyajati ligía, le méme gíribei Elímas, sigéne lumútiña lueí yebe lafiñerun gumádimati luágu le jaríñagubei lun luágu Jesucrístu.

⁹ Sáuloti, le méme gíribei Páblo, buin líña láu lubáfu Sífiri Sándu, ába laríaguni Elímas,

¹⁰ ába laríñagun lun.

—¡Yéetibu, buin bíña láu wuríbani, liraü Máfia amürü, lágani sun le buídubei! ¿Ca uágu meréde lubeí beyéean luágu lémeri Búngiu le surúbei?

¹¹ Guetó laburuja ligáñi Búngiu buágun, berédera maríjina luágu átiri dan.

Lídan óra ligía, ába labúrigadún láu, ába lálujan cába lan árüjei lújabu, ladüga maríjinjali lan.

¹² Dan laríjini gumádimati cátei le, ába lafiñerun luágu Jesucrístu, weíriri lanígi láu le jarúfudajabei luágu Wabúreme Jesucrístu.

Páblo lúma Bernabé ubúruğu Antioquía

¹³ Ába láfayarun Páblo jáma líbirigu Páfosgiñe lun ubúrugun Péрге, le lídaanbei fulásu gíriti Panfília. Ánjein Juan Márcos, ába lígiruniña, ába lagíribudun Jerusaléoun.

¹⁴ Lárigiñe, ába jásügürün Péргеgiñe lun ubúrugun Antioquía, le lídaanbei Pisidia. Ába jebélurun lídan wéyu le eméraaguagülei tídoun jalígílisin juríu, ába jañúurun ñi.

¹⁵ Lárigiñeti taliijouñiwa líburu to lánina lilúrudun Moisés túma buri líburu to jabürüjabout profétagu, ába jóúnajan ábutigu aríñaga joun.

—Wadújeñu, ánjein njein lubeí dimúrei lun jaríñaguni joun gürígia ja, aríñaga jumeí guetó.

¹⁶ Ábati lásaarun Páblo, ába ladügün seíni joun láu lújabu lun jámanichun, ába laríñagun.

—Agáamba jumá, wügüriña Israelítagu júma jugúya le ájuduragubei lun Wabúngiute.

¹⁷ Búngiu le Jabúngiute Israelítagu, anúadaja lumútiña meja binádu wagübürigu lun lánigubaña lan, ába ladügüniña ábanme oúnwenbun násiñun dán meja le añájagua lan agánawa quei teréncha Ejípto, lárigiñe, ába laságaruniña lídaangiñe fulásu ligía láu lubáfu.

¹⁸ Awánda lumúti Búngiu luríban jagáburi lídan fulásu mageírawati quei buri bián-wein írúmu.

¹⁹ Lárigiñe, ába lagúmuchaguagüdüni sédü násiñun ja aganoútiña Canaán lun líchuguni jafúlasun joun binádu wagübürigu luára gádürü-san-dimí írúmu.

²⁰ Lárigiñe, ába líchugun gürígia lun jagúseragüdüniña darí lúmoun lidáni proféta Samuél.

²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu bián-wein írúmu, Saúl ligía, liraü Cis, ladúgawagun Benjamín.

²² Lárigiñe, ába lagídaruni Búngiu arúejani lueí Saúl, ába líchuguni lun Davíd, le uágubei laríñaga. “Darína Davíd, liraü Isaí, ában wügüri le áubei nagúndaara, áni ladügübei sun le nabúseerubei.”

²³ Jádaangiñe ladügawagun David ligía liábin Jesúsu le loúnajabei Búngiu lun jasálbarun Israelítagu, quei meja laríñaguni.

²⁴ Lubáragiñebei liábin Jesúsu ubouágun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame.

²⁵ Dan le layárafadúnbei dan lun loúnwen Juan, ába laríñagun. “Mámatia áu le uágubei jarítagua luágu áu lan, liábiba ában nárigi, ni cáta áu loubagiñe, madúnatina ni íbini lun nafáragadunun ligeidin.”

²⁶ ‘Nidújeñu, jugúya le jarájũñubei ladügawagun Abrahám, júma jugúya le mámbabei ladügawagun Abrahám, inébejabutün lun Búngiu. wagía gürígia ja únbaña loúnajoúa ugánu le luáguti Wasálbaragüle.

²⁷ Já meja gürígia ja aganoubaña Jerusalén jáu sun jábutigu, ibídiñetí yébe joun ca lan Jesúsubei, úa ligía gunfaráanda jamáni jerérun profétagu, láu sun aliijoúa lan jerérun tídan jalígilisin ságü luwéyuri eméraaguni, jagía guánarügüti gúnfuli jamúti le bürüwañubei láu jasiadiruni Jesúsu lun loúnwen.

²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña lúma Piláto lun lidúnrun Jesúsu lun gayára lan jáfaruni jilágubei.

²⁹ Dánti le adüga jamáali sun le taríñagubei Lerérun Búngiu luágu, ába jarárigüdüni lueigiñe gurúwa, ába jíchuguni lídoun lumúaja.

³⁰ Ába lásaaragüdüni Búngiu lídaangiñe ouweni lúnya labágaridun.

³¹ Arúfadaguati Jesúsu lúngua wínwañu luágu sarágu weíyaasu joun ja ñübinbaña lúma luágu luweiyasun Galiléagiñe lun Jerusaléoun, jagíati geféenbaña luágu joun gürígia guetó.

³² ‘Wíchiguñein lubeíti ugánu le jun, luágu darádu lé meja ladügübei Búngiu jáma binádu wagübürigu

³³ gúnfuli láali woun, wagía le jadügawagun, láu lásaaragüdüni Jesúsu, quei laríñaguni tídan lilíburun, lídan libíaman Sálmo. “Niráü amürü, rúnaali ubaráü le bun ugúñe.”

³⁴ Aríñaga láali meja Búngiu luágu lásaaragüdüni Jesúsu lídaangiñe ouweni lun mañáladun lan lúgubu, dan laríñagun tídan líburu to Lerérun. “Níchugubei abíniruni le uágubei naríñaga lun David bun, gayáraati beménigidun luágu.”

³⁵ Laríñaga gíñe David lídan ábanya Sálmo. “Mígirunbadibu lun lañáladun lúgubu Biraü le jínsiñebei bun.”

³⁶ David, seriwiti méja joun ja lánina lidáani quei laríñaguni Búngiu lun, lárigiñe, ába loúnwen, ába labunún le ñí lubei jabunúa lagübürigu, ába lañáladun lúgubu.

³⁷ Ánjeinti Jesúsu, sarágüda lumúti Búngiu lídaangiñe ouweni, mañáladunti lúgubu.

³⁸ Nidújeñu, lúnti lubeíti jasúbudiruni luágu lídaangiñe lan Jesúsu ferúdnawa lan wafígoun. Ligía ugánu wanügübei jun.

³⁹ Lídaangiñeti gíñe, chibáwaali lubei sun wafígoun, sun wagía le afiñebei luágu, gidáwa ligia wadúnrun ligíbugiñe Búngiu, cátei lé meja siñá lubei lilúrudun Moisés adüga.

⁴⁰ Touñigi jumá lubeíti luei láburujan ligáñi Búngiu juágun queisi jaríñaguni profétagu dan le jaríñagunbei.

⁴¹ Jugúya le éjerajabei náu, weírilá janígi, áni gumúgua jumá, ladüga áu le Búngiubei, nadügüba cátei weínamuburiti, daríme lun mafiñen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe ligílisi, ába jamúriajan jáma lúnya jadímurejan joun luágu buri cátei le lewéñegua dimáasu.

⁴³ Dan lagúmuchun jadámuridagun ligílisirugu, sarágu jádaangiñe juríu jáma buri ja ígirubalin binádu jafiñen lun jafálaruni jafiñen juríu, ába jafálaruni Páblo lúma Bernabé. Ába jadímurejan Páblo lúma Bernabé jáma, ába jariñagun joun lun jasígirun eménigira luágu lareídun Búngiu.

⁴⁴ Lewéñegua dimáasu, le luwéyuri eméraaguni, ába jóundaragun jibe-ágei lílana fulásu lun jagáambuni lerérun Búngiu.

⁴⁵ Láu jaríjin juríu sarágu gürígia agáambajei lerérun Búngiu, ába jeméendüjan, ába jagúmeserun asígeneri Páblo, anába jameí líri Jesúsu.

⁴⁶ Ábati jadímurejan Páblo lúma Bernabé manúfudeiga, ába jariñagun.

—Lúnti yebe wíchuguni ugánu lúmagiñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarífuduñein luágu madúna jumáni ibágari le magúmuchaditi, ítara líña weíbugagubeíti apúrichija joun ja mámabaña juríu.

⁴⁷ Ladúga ítara líña lariñaguni Wabúreme woun.

Níchuguñadibu lun bíchuguni larúgunga joun ja mámabaña juríu, lun gayáaraabei lan jasálbaran ja aganoubaña lídan lagúmujóun fulásu ubouágu.

⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan lání Búngiu ugánu, ába jafiñerun sun ja lúnbaña jafiñerun luágu Jesucrístu, ja lúntiñabaña ibágari le magúmuchaditi.

⁴⁹ Ítara líña lapúrichijoún lerérun Búngiu lídan sun fulásu ligía.

⁵⁰ Ába jadímurejan juríu jáma würiña gúnfulitiña, inébewa jagía, lúma jáma wügüriña weirigutiña ñi ubúru, ába jínchajaniña lun jeíbaajaniña Páblo lúma Bernabé darí lun jabúguniña lídaangiñe fulásu ligía.

⁵¹ Ábati jáfuruduní calíqui lueígiñe jagúdi, arúfudei luágu mabuídun lan jóuserun lílana fulásu ligía, ába jóudin ubúrugun Icónio.

⁵² Gúndaañu jáña afíñetiña Antioquía luágu jabágari lúma Crístu, weíriti jedéregeragun jóungu lun Sífiri Sándu.

14

Páblo lúma Bernabé ubúru Icónio

¹ Ába jebélurun Páblo lúma Bernabé tídoun jalígílin juríu ubúru Icónio, ába japúrichijan, buíti jadímurejan darí lun jafiñerun sarágu, dándu juríu quei máma juríu, luágu Jesucrístu.

² Juríu ja mafiñebaña luágu Jesucrístu, ába jínchajaniña ja mámabaña juríu, amísiñedagúdaña afíñetiña joun.

³ Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru.

⁴ Fánreinguañu jáña lílana ubúru ligía, jíbiri jámagiñeñanu juríu, jíbiri jámagiñe apóstolugu.

⁵ Játi juríu jáma ja mámabaña juríu, ába jebélurun lídoun ában arítaguni jáma gumádimatiña lun jeíbaajaniña apóstolugu lúma lun jachámuragun dúbü jawágun.

⁶ Ánjein Páblo lúma Bernabé, ába jasándiruni, ába jóudin lídoun buri fulásu le gríbeí Lístra lúma Dérbe, bíama fulásu le láni méme fulásu le Licaónia, lúma geyégua láu,

⁷ apúrichija jamúti gíñe ugánu luáguti Wasálbaragüle Jesucrístu ñi.

Jachámuragun dübü luágu Páblo lídan fulásu le Lístra

⁸ Ñíñein ában wügüri meíbugunti, Lístra, ñun líña ladüga ítaragubeíñein lan lúmagiñe lagüriajóun, meíbugungubeíti.

⁹ Lagáambajañein wügüri ligía le laríñagubei Páblo, láu laríjin Páblo luágun, ába lasúbudiruni luágu afíñe lan wügüri ligía luágu gayára lan lareídagun.

¹⁰ Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügüri ligía arárama, ába lagúmeserun eíbuga.

¹¹ Dan jaríjini gürígia cátei le ladügübei Páblo, ába jagúmeserun agúaraja lídan jererun Licaónia, jaríñaga.

—¡Raríjaña búngiugu quei jagáburi wügüriña wámoun!

¹² Jaríñaga luágu Bernabé búngiu Júpiter, luágu Páblo búngiu Mercúrio, ladüga ligía lan adímurejabei. Nújein lúban jabúngiute Júpiter bougudiñoun lueí ubúru,

¹³ ába líabin lufádirin Júpiter ñígiñe barúina wügüriña bágasu lúma buri fulúri luágun lubéneri ubúru, busénti yebéti ligía jáma buri gürígia lun jáfaruniña bágasu jagía lun jadágaragüdün joun Páblo lúma Bernabé.

¹⁴ Dan jasúbudiruni Páblo lúma Bernabé cátei lan jabúseerunbei gürígia ja jadügün, ába jajeíridagunun janáangun le luweírín lubéresen cátei le joun, ába jádaragun jóungua jádoun gürígia agúarajaina.

¹⁵ —¡Wügüriña! ¿cámesan jabúseera jadügüni cátei le? Wügüriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wínwanbei, le adügübalín siélu lúma ubou, barána lúma sun cátei le lídaanbei.

¹⁶ Lídan meja dan le sügüjalibeí, ígira lumútiña meja Búngiu gürígia lun jadügüni le jabúseerubeí,

¹⁷ láu sun, arúfuda láani joun gürígia cáteiñein lan láuja buídu le ladügübei joun. Rúti júya woun lúma alúbajani buíti, ru ligía eíginí buídurügüti woun, belügüda lumúti ugúndani tídoun wanígi.

¹⁸ Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña gürígia lueí jáfaruniña bágasu jagía lun jadágaragüdün joun.

¹⁹ Ábati jachúlürün juríu Antioquíagiñe lúma Icóniogiñe, ába jagáñeiruni jaríttagun gürígia lun jachámuragun dübü luágun Páblo. Lárigiñe, ába jadúrüguduní bougudín lueí fulásu, sun jaríñagun luágu jiláali lan.

²⁰ Dan le jagúriridágun afíñetiña láu Páblo, ába lásaarun, ábaya lebélerun fulásurugún. Larúgan, ligía lídin lúma Bernabé ubúrugun Dérbe.

²¹ Lárigiñe lapúrichijani ugánu luáguti Wasálbaragüle ñi Dérbe, le ñi jabei sarágu gürígia afíñerutiña luágu Jesucrístu, ába jagíríbudun, ába jóudin Lístra, Icónio lúma Antioquia.

²² Rútiña gurásu joun afíñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafíñen, aríñageina jagía joun luágu lúnti lan wasúfurirun sarágu lun gayára lan webélerun lídoun larúeijan Búngiu.

²³ Rútiña gíñe ábutigu lídan cáda jadámurin affiñetiña. Lásunti jayúmuragun lúma jayúnarun, ába jedéregeruniña lábun lariaajan Búngiu le uágubei jafiñera.

Lagíribudun Páblo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachülürün Panffília.

²⁵ Ába japúrichijaní ugánu luáguti Jesucrístu ubúruge Péрге, líbiri méme Panffília, ábati jóúdin Atálioun.

²⁶ Nígiñe jádina, ában jóúdin Antioquíoun, le fulásu le ñíjin lubei jóúnajóúa lábugiñe lariaajan Búngiu adúgei wadágimanu le jagúmuchubei guetó.

²⁷ Dan jachülürün Antioquía, ába jóúndaraguniña tánigu jalígílisin affiñetiña, ába jabájúdaguní sun cátei le ladügübeí Búngiu jáu joun, lúma luágu lánjunrenchuní Búngiu béna joun ja mámabaña juríu lun gíñe gayáraabei lan jafiñerun luágu Jesucrístu lun jasálbarun.

²⁸ Ába jeréderun Páblo lúma Bernabé sarágu dan jáma affiñetiña ñi.

15

Adámuridagúni Jerusalén

¹ Ligía jayábin wügüríña Judéagiñe lun Antioquíoun, ába jagúmeserun arúfudaja joun affiñetiña luágu lun lan jasálbarún, mósu lan jerésibiruni wügüríña circuncisión, quei lariñaguni lilúrudun Moisés.

² Barúti Páblo lúma Bernabé ában sigénei weíríti jáma luágu cátei ligía, lagúmujóun óra, ába loúnajóun Páblo, Bernabé, jámaya ámu wügüríña Jerusaléoun lun jóúdin aráanserei cátei le jáma apóstolugu jáma tábutigu ligílisi to ñílboun.

³ Ja tánigu ligílisi to Antioquíaboun oúnajabaliña, lídaanti jaweíyasun, ába jásügürün loúbawagugiñe Fenícia lúma Samária, abájúdagueina jagía luágu jígiruni ja mámabaña juríu binádu jafiñen lun jafálaruni Crístu. Ába jagúndaaragun sun affiñetiña láu ugánu le.

⁴ Dan jachülürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájúdagun Páblo lúma Bernabé joun luágu sun le adúga láalibeí Búngiu jádaangiñe.

⁵ Níñanu jádaangiñe jadámurin fariséogu ja affiñetiña luágu Crístu, ába jaráramun, ába jariñagun.

—Lúnti jerésibiruni wügüríña affiñetiña ja mámabaña juríu circuncisión, lúnti gíñe jagúnfulirun lúma lilúrudun Moisés.

⁶ Ábati jóúndaragun apóstolugu jáma tábutigu ligílisi lun jatúriajaní cátei le.

⁷ Lárigiñe sarágu dimúrei, ába lásaarun Pédro, ába lariñagun.

—Nidújeñu, subúdi jumúti luágu binárü lán meja lanúadirana Búngiu jídaangiñe lun níchuguni ugánu le lánina asálbaruni joun ja mámabaña juríu, lun gíñe gayáraabei lan jafiñerun luágu Jesucrístu.

⁸ Búngiuti, le subúdjíabúbeí tun anígi, arúfuda lumúti luágu resíbi láníña ja mámabaña juríu láu líchuguni Sífiri Sándu joun quei líchuguni woun.

⁹ Manügün lumútiwa Búngiu ámu jaweí, jarúmagüda lumútu gíñe janígi láu jafiñen luágu Jesucrístu.

¹⁰ ¿Cáti uágu laloúguada jafiñen guetó luágu le adúga láalibeí Búngiu, ru jugúya ában ijürügu jawágun affiñetiña ja, le wásiñerubei wagía guánarügü anúga—ni wagía ni binádu wagübürigu?

11 Afñetiwa luágu sálbaadiwa lan láurügü wafñerun luágu Jesucristu, madügünga wagía ni ámu cátei lun wabíjini, sálbaadiwa láu lareíni Wabúreme Jesucristu. Ítara méme líña giñe jasálbarun ja mámabaña juríu.

12 Ábati jámanichúnga, ába jagáambuni sun le jariñagubei Bernabé lúma Páblo joun luágu buri seíni lúma miláguru le ladügübei Búngiu jádaangiñe, jagánagua ja mámabaña juríu.

13 Dan le lásurun jadímurejan, ába lariñagun Jacóbo.

—Nidújeñu, agáamba jumána.

14 Abájüdaguaali Simón Pédro woun ída líña lan fuleísei lániña Búngiu ja mámabaña juríu, láu lanúadajan jádaangiñe lun lánigume.

15 Ítara líña cátei le quei lé meja jabürüjabei profétagu tídan Lerérun Búngiu.

16 Gumúguaali jarúeijan ladügawagun Davíd, queísigubeirügü tagúmuchagun ában múna eíguadutu.

Lachülürüba wéyu nun, áu le Búngiu, lúnyame naríjin jawágun ladügawagun Davíd,

ábame níchuguni ubáfu lun ában jádaangiñe lun larúeijan jádan.

17 Nadügübei líra lun gayáraabei lan jayábin sun jíbiri gürígia lun jáluajanina queísi Jabúreme,

lun jayábin sun ja mámabaña juríu nun, ja anúadaja náñabaña lun nánigume.

18 Ítara líña nariñagun, áu le Búngiu, le asúbudirágüdúbalin cátei le lúmagiñe buga binádu dan.

19 ‘Ligía nariñagunbei luágu moun láni wíchugun sarágu lúruđu jawágun ja mámabaña juríu, ja ígirubalín binádu jafiñen lun jafálaruni Búngiu,

20 buídurügüti láu labürüjóun joun lun jebé lan jeígin eígin le adágarawagüdüti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigiwarügütiña lugúndun máfuridunti játa jádaangiñe, meígin jagíame játa anímaalu.

21 Búiti lun jagúnfulirun lúma buri cátei le lun jíchugun inébesi joun juríu, ladüga lúmagiñe bugája binádu dan, añájein gürígia apúrichijati lílúrudun Moisés lídan ságü fulásu, aliijóati lúruđu luágu tídan buri jalígilisin juríu ságü luwéyuri eméraaguni.

22 Ábati jaritagun apóstolugu jáma tábutigu ligílisi jáma sun tílana ligílisi janúadajan wügüríña jádaangiñe, lun jóunajaniña Antioquía úara lúma Páblo lúma Bernabé. Ába janúadiruni Júdas, le giríbei Barsabási, lúma Sílas, bián wügüríña weirigutiña jádan afñetiña.

23 Ába jóunajan ában gárada jáma, láriñajare tídan gárada tugúya.

“Wagía le apóstolugu, tábutigu ligílisi, jáma sun jíbiri afñetiña, mábuga wáña joun wadújeñu luegiñe Jesucristu ja mámabaña juríu ja aganóubaña Antioquía, Síria, lúma Cilícia.

24 Agáambaadiwa luágu añájein lan gürígia ñüdüntiña yágiñe ibídiñoun woun ebéreseja jun láu jadímurejan, áni dájaña ámu arítangun jídoun láu jariñagun jun luágu mósu lan jerésibiruni wügüríña circuncisión, queísi lariñaguni lílúrudun Moisés.

25 Ligía wúwaradúnbei lídan warítangun lun wanúadajan gürígia wádaangiñe lun jóudin aríjaun úara jáma wadújeñu Bernabé lúma Páblo ja jínsifebaña woun sarágu,

26 ja rújamaalíbei jabágarí lídoun pelíguru luegiñe Wabúreme Jesucristu.

27 Wounajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídaanbei gárada to wounajaboun jun, jun.

28 Maribaanti larijín lun Sífiri Sándu lúma woun, míchugúniwa lan ámu ijürügu jun lueídügüya murúsun cátei le, le lunbei jadügüni.

29 lun meigin jumá úwi le jáni anímaalu ja adágarawagüdütiña joun sándu, meigin jugúyame jítaü, ní úwi le jáni anímaalu ja tigiwarügütiña, madáagun jugúyame cátei buri jama güriája ja mamárieidüntiña júma. Ánjaün areidagua júngua lueí buri cátei le, buídubei jadüga. Buídu lámuga lídin jun.”

30 Lárigiñeti jóunajoún luágu jaweíyasun, ába jóúdin Antioquía. Dan le jachülürünbei ñi, ába jóúndaraguniña afññetiña, ába jíchugunun gárada joun.

31 Dánti le jalíjanbarun afññetiña, ába jagúndaarun sarágu luágu gurásu le tíchugubei joun.

32 Quei giñeti gabáfu jamá Júdas lúma Sílas lun ladímurejan Búngiu jayúmługügiñe, ába jíchugun gurásu joun afññetiña láu jadímurejan joun, ru jagía idérebugu lun jafññen.

33 Lárigiñe jásügürün átiri dan ñi, ába jayoúragun afññetiña joun lubá jagíribudun jámoun já meja oúnajabaliña Jerusalén.

34 Ánjeinti Sílas, ába leréderun.

35 Reídeitiña giñe Páblo lúma Bernabé Antioquía, ába jasígirun arúfudajei lúma apúrichijeí ugánu luáguti Crístu, jagía jáma sarágu ámu.

La gúmeseruni Páblo libíaman luweíyasun apúrichija

36 Átiri dan lárigiñe, ába lariñagun Páblo lun Bernabé.

—Queímounya aríjaña afññetiña lídan sun ubúrugü buri le ñi lubei apúrichija wamáali lan ugánu luágu Crístu, aríja wamámuga ída jáña lan.

37 Busénti yebe Bernabé janügüni Juan Márcos jámagua,

38 májati Páblo janügüni ladüga meja ígira láaña lan Panfília, masígiti jáma lídan wadágimanu.

39 Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanügüni Bernabé Márcos, ába jóúdin Chípree,

40 ába lanügüni Páblo Sílas. Lárigiñe jedéregeruni afññetiña Páblo lúma Sílas lújaburugun Búngiu, ába jóúdin,

41 ába jásügürün Síriagiñe lúma Cilíciagiñe, íchaajeina gurásu joun afññetiña ligílisirugu.

16

Lídin Timoteo úara jáma Páblo lúma Sílas

1 Ába jachülürün Páblo lúma Sílas lídoun buri fulásu le Dérbe lúma Lístra, le ñi lubei jadárira ában afññeti gírítí Timotéo, tiraü ában wúri juríu afññetu luágu Jesucrístu, güriégu lúguchi.

2 Afññetiña ja aganoúbaña Lístra lúma Icónio, buíti jadímurejan luágu.

3 Busénti Páblo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión lueí wuríba lan joun juríu ja aganoúbaña lídan buri fulásu ligía, quei subúdi jamáni luágu merésibirun láani circuncisión ladüga güriégu lan lúguchi.

4 Súnti fulásu le ñígiñe lumúti jásügüra, jasúbudirágüdüni cátei le jaríñagubei apóstolugu jáma tábutigu ligílisi ja Jerusalénbaña joun afññetiña, ába jéredun jawágu lun jagúnfulirun lúma jagúmadin.

5 Ába lubeíti jedéraagüdün tılana ligílisi lídan jafiñen, ába jagánwoundun afiñetiña ságü wéyu.

Lasálriragun ában wügüri Macedóniana lun Páblo

6 Májati Sífiri Sándun lun jíchugubei lan ugánu luágu Crístu Ásia. Ábati já súgürün labádinaguagiñe Fríjia luma Galácia,

7 ába jachülürün luágu fadáguau le Mísia. Nígiñe yebe jarítagua lun jebélurun loúbawagun Bitínia, májati láni Jesúsu Espírítu le méme Sífiri Sándun lun jadügüni.

8 Ábati jóudin surúru Misioun, ába jarárirun Tróas.

9 Ní lasálriragua ában wügüri Macedóniana lun Páblo, áriebu, rára ayúmuragua lun, laríñaga lun. “Queímoun Macedónia íderagua bámugawa.”

10 Lárigiñe lasálriragun wügüri ligía lun Páblo, ába waráansejan lun wóudin Macedónia láu wafiñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo lúma Silas ubúruyu Filípos

11 Ábati wáfayarun Tróasgiñe, ába wóudin sügülügü luágun ubóju le Samotrácia, larúgan, ligía wachülürün Neápolis.

12 Nígiñe ába wóudin Filípos, Filípos lábugiñeñein lagúmadijan Róma, ligía gíñe ubúruyu le weírigutimáabei luágu loúba Macedónia. Reídeitiwa átiri wéyu ñi.

13 Luágu ában wéyu le luwéyuri eméraaguni, ába wáfuridun bougudin lueí ubúruyu, lárún dúna, lídan ában fulásu le ñi lubeíja layúmurawagúa lun Búngiu. Ába wañúurun ñi, ába wíchuguni ugánu luáguti Crístu joun wúriña ja oúndaragubáña ñi.

14 Níñoun ában jádaangiñe, gírítu Lídia, ubúruguna Tiatíra, tifísiute alúguraja gamísa finutu to gúchu tágu. Judúguatu wúri tugúya lun Búngiu, tagáambajañádiwa, ába lánjunrenchunun Búngiu tanígi lun tadügün gásu láu le laríñagubei Páblo.

15 Ába tabásterun jáu sun tılana túban, lárigiñe, ába tayúmuragun woun ítara.

—Ánjein afiñe jubeí luágu afiñe nan le tímatisaati luágu Wabúreme Crístu, reidei jumá ya núbiñe.

Jéretu wawágu, ába weréderun.

16 Luágu ában dan, dan le wóudiña lan lídoun fulásu le ñi lubeíñaja layúmurawagúa lun Búngiu, ába wadúnragun túma ában irájü gawágutu ában espírítu wuríbati le íchugubei ubáfu tun lun tasábiujan. Ában idámuni irájü tugúya, íbijatutíja sarágu seínsu joun tabúriña láu tasábiujan.

17 Ába tagúmeserun irájü to afálarawa, wagía lúma Páblo, agúarajeina tugúya ítara.

—Gúrija ja, jesériwiduña lun Búngiu le íñubei, jadímurejaña luágu úma lánina asálbaruni lídaangiñe figóu jun.

18 Gíbeti wéyu táu adúgei cátei le darí lun tebéresedun lun Páblo, ába lagáragun, ába laríñagun lun espírítu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espírítu ligía tídaangiñe lídan méme óra ligía.

19 Dan le jaríjin tabúriña luágu siñáli lan jagáñeirun seínsu tueígiñe, ába jarügüdüni Páblo lúma Silas, ába janügüniña jagíbugiñoún ábutigu lamídaangua ubúruyu.

20 Ába jaráfuduniña jagíbugiñe gumádimatiña, ába jaríñagun.

—Wügüríña juríu ja, jachágaraguñein wabúrugute,

21 jarúfudajaña igáburí le wásiñerubei erésibira ni adüga ladüga Rómana wagía.

22 Ábati jiñúragun gürígia jóungua jawágu, ába jarágachaguágüdüniña gumádimatiña, ába jíchugun dimúrei lun jabeichúniwa láu wéwe.

23 Lárígiñe sarágu abeichúni, ába jádaruniña furísunrugún, ába jariñagun lun oúnigiruti adaürütiña lun goúnigi lániña buídu.

24 Dan libíjini oúnigiruti lúruđu le, ába ládaruniña líđuun lagúmujoún tarígeirugu furísun, ába legélenchuni jagúdi.

25 Queí buri luágun amídi áriebu, ñíñanu Páblo lúma Sílas ayúmuragua lúma erémuja urému lun Búngiu, ja jíbiri, agáambaja.

26 Sódini, ába liábin ában oúnwenbun járabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güríngüri le jawágubei adaürütiña.

27 Ába lagágudun oúnigiruti, dan laríjin luágu júnren líña lan sun tubéneri furísun, ába laságarunun lefeínte lún yebe láfaragun lúngua, sún yebe laríñagun luágu ñüdüngua jamá adaürütiña.

28 Ába lagúragun Páblo lun.

—Máfaraguabá búngua, awánja ya sun wagía.

29 Ábati lamúriajan oúnigiruti lámpu, ába lebélorun eíbaagueina, adádagareina láu anúfudei, ába lagúragun lúngua lubádu jagúdi Páblo lúma Sílas.

30 Ába laságaruniña furísunrugugiñe, ába laríñagun joun.

—Wügüríña, ¿ca cátei lúnbei nadügüni lun nasálbarun?

31 Ába jariñagun lun.

—Afiñebá luágu Wabúreme Jesucrístu, ábame basálbarun jáu sun tílana búban.

32 Ába jíchuguni ugánu luáguti Crístu lun jáu sun ja lúbiñebaña.

33 Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian.

34 Lárígiñe, ába lanügüniña lúbiñoun, ába líchugun eígini joun, ¡máti lugúndan jáu sun lufámilian láu jafíñerun luágu Búngiu!

35 Larúgan bináafin, ába jóúnajan gumádimatiña polisía aríñaga lun oúnigiruti lun lígiragüdüniña Páblo lúma Sílas.

36 Ábati laríñagun oúnigiruti lun Páblo.

—Oúnajaaña gumádimatiña aríñaga nun lun nígiragüdüñun, gayárajali lubeíti jídin darángilañu.

37 Ába laríñagun Páblo joun polisía.

—Láu sun Rómana wamá, beíjamutiwa jagíbugiñe gürígia, míchigunga dan woun lun wadímurejan waweígíñegua, dágua jamáwa furísunrugun, ¿guetó buséntiña jígiragüdüniwa arámudaguárügü? ¡Máfuridunbadiwa! Núbín jamá aságarawa.

38 Ába jabájüdaguni polisía cátei le joun gumádimatiña, ába janúfudedagun gumádimatiña dan le jasúbudiruni luágu Rómana jamá Páblo lúma Sílas.

39 Ábati jóúdin amúriaja ferúduđu jáma, ába jaságaruniña, ába jayúmuragun joun lun jáfuridun nígiñe ubúrugugiñe.

40 Dan le jáfuridunbei furísunrugugiñe, ába jóúdin túbiñe Lídia, lárígiñe jarijiniña afíñetiña lúma jíchugun idérebugu joun, ába jasígiruni jaweíyasun.

17

Chagáguai ubúruгу Tesalónica

¹ Lidan jaweiyasun Páblo lúma Sílas, sügütiña Anfípolisgiñe lúma Apolóniagiñe, ñígiñe, ába jachülürün ubúrugun Tesalónica le ñi tubei ában jaligilisin juríu.

² Quei léchun Páblo, ñüdünti tidan ligíli tugúya, adímurejati jáma ürúwa dimáasu, ságü luwéyuri eméraaguni.

³ Arúfudajati joun quei tariñaguni Lerérun Búngiu luágu lúnti lán meja lasúfurirun Crístu, lárigiñeme lan louñwen, aba lánme lásaarun lídaangiñe ouweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña güriña.

⁴ Ábati jafiñerun jádaangiñe juríu, ába júaradun lúma Páblo lúma Sílas. Afíñetiña giñe sarágu ja mámabaña juríu ja judúguatiña lun Búngiu, jáma sarágu wúriña weirigutiña.

⁵ Juríu ja mafiñebaña luágu Jesúsu lan Crístubei le lunbei liábin, magúndaantiña láu cátei le, ába jóundaragun wügüriña wuríbatíña ja eibugañajádügübaña úmada, ába jachágaraguágüdüniña güriña ñi ubúruгу. Ába jaságarajanun lúban Jasón, áluajaña Páblo lúma Sílas lun jaságaruniña lun jedéregeruniña jájaburugún güriña.

⁶ Queiti madári jamániña ñi, ába janügüni Jasón jáma átiri jádaangiñe afíñetiña jagíbugiñoún gumádimatiña lidan ubúruгу ligía, ába jagúaragun aríñaga.

—Wügüriña ja, ja ebéresejabaña lídan sun fulásu, chülüjaña giñe ñájoun,

⁷ resibi láaña Jáson lúbiñe. Sun jagía dürügua jamúti lilürudun Urúei César, ladüga aríñagatiña luágu níjein lan ámu urúei, ában nege gíriti Jesúsu.

⁸ Dan jagáambuni gumádimatiña jáma sun jíbiri güriña cátei le, ába jachágaragun.

⁹ Jáson jáma ja jíbiri, ába jafáyeijan, ába jígirawagüdüniwa.

Páblo lúma Sílas ubúruгу Beréa

¹⁰ Furése furése, dan le labúrigadun, ába jóunajaniña afíñetiña Páblo lúma Sílas ubúrugun Beréa. Quei jachülürün ñi, ába jóudin tidoun jaligilisin juríu.

¹¹ Juríu ja ñibaña, buitimaati jagáburi jawei ja Tesalónicabaña, resibi jamúti ugánu luáguti Crístu láu ugúndani, ságüti wéyu jalíjanun Lerérun Búngiu lun jaríjini ánjein inárüni lubei le aríñawagúbei joun.

¹² Sarágu jáña lubeiti afíñerutiña jádaangiñe, afíñe jagía giñe sarágu ja mámabaña juríu, dándu wúriña weirigutiña quei wügüriña.

¹³ Dan le jasúbudirunbalin juríu ja Tesalónicabaña luágu lapúrichijañein lan giñe Páblo Lerérun Búngiu Beréa, ába joudin achágaraguágüdaña güriña ñi.

¹⁴ Ába jóunajani afíñetiña Páblo furése lun lídin lacóstoun, leréderame Sílas lúma Timotéo Beréa.

¹⁵ Ja ñüdünbaña láu Páblo, ába jáfayajan lúma chülü ubúruгу Aténas. Lárigiñe, ába jagíribudun barúina jagía dimúrei lun Sílas lúma Timotéo lun jóudin lárigi Páblo lídan lufúresen.

Páblo ubúruгу Aténas

¹⁶ Sun niján lan Páblo Aténas agúrabajei Sílas lúma Timotéo, medéraaguágüdünti larítangun láu laríjini ubúruгу ligía buin jáu bürübün sándu.

17 Ligíaja ladímurejaanbei tídan jalígilisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma gürígia ja úmadarugubaña, ñi lubei jadámuridagua.

18 Ñiñanu jádaangiñe wügüríña ja atúriajabalin jarúfudajan epicúreogu, jáma ja atúriajabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan lariñagubei wügüri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiugu.

Jaríñagunbeiti ítara ladüga lapúrichijan Pábgo joun luágu Jesúsu lúma luágu ásaaruni lídaangiñe ouweni.

19 Ábati janügüni lídoun ában fulásu gíriti Areópago, le ñi lubeija jóundaragua lun jagáambagun jóungua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei?

20 Cátei lé buri bariñagubei woun, terénchati woun, buséntiwati wasúbudiruni ca lan laníchigubei.

21 Sun Aténasna, jáma teréncha ja aganoúbaña ñi, marítaguntiña luágu ámu cátei lueídügüya luágu jaríñagun lúma jagáambun cátei iséri.

22 Ábati laráramun Pábgo jamídaangua ñi Areópago, ába lariñagun.

—Wügüríña Aténasna, aríja numúti luágu afiñe jumá jawágu jisándun,

23 ladüga dan le aríajeina nubálin fulásu buri le ñi lubei jájuduragua joun jisándun, darítina ában latárü le ñi lubei bürüwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

24 Ligía Búngiu le adügübalin ubouú lúma sun cátei le ubouágubei, ligía labúremebei siélu luma ubouú. Maganoúnti tídan ligíli to jadüga gürígia,

25 memégeirun lumúti giñe le gayáraabei jadügüni gürígia luágu lufúleisein, ligía guánarügü íchugubei íbágarí lúma garábali, lúma sun cátei woun, sun wagía.

26 Lídaangiñe ábanrügü wügüri ladügaña sun néchaanigu lun jaganoún lídan sun fulásu, aráanseleí dan le lúnbei jabágariduni lúma fulásu le lúnbei ñiba lan jagánawa.

27 Adüga lumúti Búngiu sun líra lun gayáraabei lan jáluajani gürígia, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe.

28 Ladüga lídaangiñeti Búngiu awánjein lubeí, gabágarí wagía, eíbuga wagía ligíbuagu ubouú le, quei jaríñaguni poétagu jídaangiñe. “Lirájüñü Búngiu wagía.”

29 Queíti lirájüñü wabei Búngiu, mouñ lumuti wanügüni Búngiu quei ában sándu le gólu, o pláta o dübü le jadüga wügüríña quei jarítagun luágu ítara líña lan Búngiu.

30 Mebéresegúnti méja Búngiu láu cátei le jadügübei gürígia lábugiñe libídiñe joun, ánjein guetó, aríñagati joun sun gürígia lídan sun fulásu lun jasáansiruni jóuserun.

31 Ladüga anúdajaali Búngiu ában wéyu lun ligíaba lan wéyu lagúseragüdüniña gürígia ja ubouágubaña láu ísuruni láu ában wügüri le anúdaja láalíbei, wügüri ligía, ligía Jesucristubei, arúfuda lumúti woun láu lásaaragüdüni Jesúsu lídaangiñe ouweni lúnya labágaridun.

32 Dan le jagáambubei luágu ásaaruni lídaangiñe ouweni, ñiñanu jádaangiñe, ába jéjerajan láu, jíbiri ába jaríñagun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígírúniña Páblo.

³⁴ Ába jafíñerun jádaangiñe luágu Jesucrístu, ába jafálaruni. Níñein Dionísio jádan, lé meja ában jádaangiñe ábutigu lídan fulásu le gíríbei Areópago, túma gíñe ában wúri gírítu Dámaris, jámaya ámu gúrgía.

18

Páblo ubúruğu Corínto

¹ Lárígiñe cátei le, ába láfuridun Páblo Aténasgiñe, ába lídin ubúruğu Corínto.

² Ñi ladárina ában juríu gírítu Aquíla, túma lúmari to gíríbout Priscíla, Póntona jagía. Málúgíli lueígiñe jayábin Itáliagiñe, jayábinbei nígiñe ladúga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña, ³ queíti ában lan lífisiute jáma—tadáawagun quiámpu—ába leréderun jáma lun jawádigimaridun lídan ában.

⁴ Ságüti wéyu le lídaani eméraaguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucrístu.

⁵ Dan jachúlürün Sílas lúma Timotéo Macedóniagiñe, ába líchaagun Páblo lúngua le gumúti apúrichíjei Lerérun Búngiu. Aríñagati joun juríu furáangu luágu Jesúsu lan Crístubei le jagúrabajabei lun lasálbaruniña lídaangiñe jafígoun.

⁶ Ánjaña juríu, ába jasígeneruni le lubeíbei, anábagua buri jameí. Ábati láfurudunun Páblo labíte jawágun, arúfudei joun luágu mínsiñe lan jagáburi lun, ába laríñagun joun.

—Ánjaünme eféridira jádaangiñe, mámaalime nídaangiñeti. Lúmagiñe guetó, neíbuga apúrichíja joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbiñoun ában wügüri gírítu jústo, wügüri ligía, judúguati lun Búngiu, ñi toubagiñe ligílisi lagánawa.

⁸ Críspo, le tábuti jalígílisin juríu, ába lafíñerun luágu Wabúreme Jesucrístu, jáu sun tílana lúban. Sarágu gíñe jádaangiñe Coríntona, dan jagáambunbalin ugánu luáguti Jesúsu, ába jafíñerun, ába jabásterún.

⁹ Ábati lasáliragun Wabúreme Jesúsu lun Páblo luágu ában árieubu, ába laríñagun lun.

—Manúfudebá, bapúrichíja méme, mámanichabá,

¹⁰ ladúga anájein búma, úabei ni ában agúruruti buágu lun ladügün wuríbani bun. Anájein sarágu gúrgía lídan ubúruğu le ja lúnbaña nánigubaña lan.

¹¹ Reídeiti lubeíti Páblo ában írúmu dimí ñi Corínto arúfudajei Lerérun Búngiu joun lílana fulásu.

¹² Lídan dan le Galión lan gumándanbei Acáya, ába jóundaragun juríu lun járügüdüni Páblo. Ába janügüni ligíbugiñoun lúruđu lun lagúserawagüdün.

¹³ Ába jaríñagun lun gumándan.

—Wügüri le, leréde arúfudaja joun gúrgía lun jájuduragun lun Búngiu láu ában igáburi le múaraanbei lúma lúruđu.

¹⁴ Dán yebe ladímureja lan Páblo, ligía laríñagun Galión joun juríu.

—Lun jamúga ában lan wuríbani o dúru jürüti ladügübei wügüri le, níchaaguña jamúga núngua lun nagáambunün, jugúya juríu,

¹⁵ quei luágu lan dimúrei buri, lúma íri, lúma jilúrúdu, aráanse jumeí júngua, ladúga mabúseruntina nagúseragüdün luágu buri cátei le.

¹⁶ Ába labúgaguniña ñígiñe.

¹⁷ Ábati járügüdüni sun güriégugu Sóstenes le tábuti jalígilisin juríu, ába jabúleiseiruni ñi guánarügü ligíbugiñe gumándan. Meberesejúnti Galión láu líra.

Lagríbudun Páblo Antioquoun, lagúmeseruni lürüwan luweýyasun apúrichija

¹⁸ Lárigiñe líra, ába leréderun Páblo átiri dan ñi Corínto. Lárigiñe, ába layouragun joun afiñetiña, ába lídin Síria úara túma Priscíla lúma Aquíla. Ába lásaruni lídiburi lídan ubúruyu Céncrea lubáragiñe ladinun, lun lagúnfulirun láu ában méja darádu le ladügübei lúma Búngiu.

¹⁹ Dan le jachülürün ubúruyu Éfeso, ába lígiruniña Páblo Priscíla lúma Aquíla lun jeréderun ñi lídan ubúruyu ligía. Lubáragiñe lígiruni Páblo Éfeso, ába lídin ligílisirugu adímureja jáma juríu.

²⁰ Ába jamúriajan lúma lun leréderun méme ñi jáma, májati.

²¹ Ábati layouragun joun, laríñaga joun.

—Mósu ñi nan Jerusalén lubá fédu le lúnbei ladügün, nagíribudayaba aríjaün ánjein busén Búngiu.

Ába ladinun, ába lídin Éfesogiñe.

²² Türiiti Cesaréa, ñígiñe ába lídin Jerusalén abúsura joun títana ligíli, lárigiñe, ába larágachun Antioquoun.

²³ Lárigiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríjia ában ában, íchaajeina dügüdaguau joun afiñetiña.

Lapúrichijan Apólos ubúruyu Éfeso

²⁴ Lídan dan ligía, ába lachülürün ában juríu gíriti Apólos ubúrugun Éfeso, Alejandríana juríu ligía. Gapúrichijati, áni subúdi lumúti gíñe Lerérun Búngiu buídu buídu.

²⁵ Subúdiiti luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesús, inárüni, láu sun lougua lan lasúbudirun luágu, le rügüñein larúfudajabei Juan le abásteragüdajabei luágu Jesús le lúnbei liábin lárigiñe, lasúbudira.

²⁶ Luágu ában wéyu, dan le ladímurejaña lan Apólos tidan jalígilisin juríu láu sarágu ichouruni, ába jagáambuni Priscíla lúma Aquíla. Dan lagúmuchun lapúrichijan, ába janügüni Priscíla luma Aquíla jábiñoun lun jafúnraanguagüdünitima luáguti Jesús le Wasálbaragülebei lun, luma luáguti cátei le larúfudajabei.

²⁷ Dánti le labúseerunbei Apólos lídin loubwagun Acáya, lúmagiñeñanun afiñetiña Éfeso lun lídin, ába jounajan ában gárada joun afiñetiña ja ñibaña Acáya lun jerésibiruni buídu. Dan lachülürünbei Apólos Acáya, nderagua lumútiña ja lafiñeragüdúbaña Búngiu luágu Jesús, láu lareíni,

²⁸ arúfuda lumúti joun güriágu láu richaü le siñá jamuti asígenera, luágu marícha lan le jarúfudajabei juríu, arúfudalei joun tídaangiñe Lerérun Búngiu luágu Jesús lan Cristu le jagúrabubei lun lasálbaruniña.

19

Páblo ubúruyu Éfeso

¹ Sun niján lan Apólos ubúruyu Corínto, ligía lásügürün Páblo labádinaguagiñe buri fulásu, ába lachülürün Éfesoun ñi lubei ladárira sarágu afiñetiña.

² Ába laríñaga joun.

—¿Resíbi jumútisan Sífiri Sándu dan le jafiñerunbei luágu Jesucrístu? Jaríñaga lun.

—Uá, magáambungubeígidíwa yebe luágu níjein lan Sífiri Sándu.

³ Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdün Juan.

⁴ Laríñaga Páblo joun.

—Labásterágüdüníña méja Juan gürígia, arúfudei luágu sáansi jamáli lan jóuserun, aríñagati gíñe joun luágu lúnti lan jafiñerun luágu le lúnbei liábin larígíñe—luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu.

⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmugugiñe.

⁷ Jawáraañanu dúusu wügüríña jádan sùngubei.

⁸ Úrúwañein játi láu Páblo abásija tídoun jalígílin juríu le ñi lubeíja lapúríchija, adímureja ligíaja furáangu luágu larúeijan Búngiu, afíñegüda láña gürígia luágu.

⁹ Ñíñanu gíñe, edéreragüdütu janígi, májatiña jafiñerun, adímurejarügü jagía wuríba luágu lémeri Crístu jagíbugiñe gürígia. Ábati ladíreirun Páblo jaweí, ába lanügüniña ja afíñebaña luágu Jesucrístu tídoun ában lescuéla to ñi lubei larúfudaja ában wügürí gíríti Tiránno, ábaja ladímurejan ságü wéyu joun, ñi.

¹⁰ Ítara líña lasígirun luágu bián irúmu, súnti ja aganóubaña loúbawagu Ásia, agáamba jamúti ugánu luágu Wabúreme Jesúsu, dándu juríu quei ja mámabaña juríu.

¹¹ Adügati buríti Búngiu óunwenbun buri milágu lídaangiñe Páblo,

¹² darí lun tánügüniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatíña jádaangiñe.

¹³ Ñíñanu juríu eibugañajádügütiña, aságajatiña gíñe espíritugu wuríbatíña jaweí gürígia, álugatiña yebe jayúsuruní líri Wabúreme Jesúsu lun jaságajaniña, jaríñaga buri joun espíritugu.

—Gumádi numúti bu lídan líri Jesúsu, le uágubei lapúríchija Páblo, lun báfuridun.

¹⁴ Ñíñanu sédü lirájüñü ában juríu gíríti Escéva, jábuti méja fádirigu, jádan ja adügübalin buri cátei le.

¹⁵ Níjein ában jadügüni, ába loúnabuniña espíritugu wuríbatí ligía.

—Subúdi numúti Jesúsu, subúditi gíñe nun cátei lan Páblobei, ánjein jugúya, ¿cátaün?

¹⁶ Ába lachüragun wügürí le láubei espíritugu wuríbatí lúngua jawágun, gabáfuti ságü jáu sùngubei, ába labúleiseiruniña buídu, ába jeíbaagun ñígíñe surúsu lúma láu buri bíti jawágu.

¹⁷ Agáamba jamúti sun ja aganóubaña Éfeso cátei le, juríu jáma máma juríu, ába janúfudedagun, weíríti linébedun líri Wabúreme Jesúsu joun.

¹⁸ Sarágu gíñe buri jádaangiñe ja afíñerubaña, ába jayábin agúfeserei buri cátei wuríbatí lé meja jadügübei,

¹⁹ sarágu gíñe buri jádaangiñe já meja gabíñarajadibaña, ába janügünun jalíburun buri, ába jágudunun jagíbugiñe sùngubei. Dan jabájüdünbalin tebégi líburu buri tugúya, gebégitu quei buri dimí-san mílu murúsun seínsu le pláta.

²⁰ Ítara líña abúruchagueína lan ugánu luáguti Jesúsu, arúfudeinaleí lubáfu lun lasáansiragüdüni jagáburí gürígia.

²¹ Lárigiñe sun cátei le, ába laráanserun Páblo lun lídin aríjaña afñetiña Macedónia luma Acáya, lubá lasígiruni luweyasun Jerusaléoun. Aríñagati giñe luágu lárigiñe lanme lídin Jerusalén, lídiba lan giñe Róma.

²² Ábati louñajan biáma jádaangiñe ja íderagubalin lubá, Macedónia, wügüríña jagía, Timotéo luma Erásto, ligía, ába leréderun átiraúya dan Ásia.

Chagáquaü ubúruğu Éfeso

²³ Lídan dan ligía, ñiñein ában oúnwenbun achágaraguní Éfeso jaweigiñeti ja afálarubalin lémeri Cristu,

²⁴ lídaangiñeti ában wügürí giríti Demétrio, ladáawagun cátei láuti pláta lifisiutebei. Wügürí ligía, adáaguati tirájüñü ligílisi láu pláta to tilígilisin sándu to gíriboun Diána, belútiti sarágu seínsu joun ja ñadágimeinbaña lúma.

²⁵ Ábati louñaruniña ja ñadágimeinbaña lúma úara jáma ámu ja ñadágimeintiña ámu físiu le lenége jafsiute, ába laríñagun joun.

—Wügüríña, subúdi jumúti luágu ñulú lan wabágarí láu físiu le,

²⁶ agáamba jumáali, aríja jumeí ída líña lan lídin Páblo aríñaga luágu máma jamá búngiugu sándu ja jadügübaña wügüríña, áni gíbeeña gürígia jafiñeragüdün, mámarügü ya Éfeso, lídan giñe líbe-ágei Ásia.

²⁷ Ñounguati cátei le, ladüga gayáraabei weféridiruni wabísinin, gayáraabei giñe teféridiruni tilígilisin búngiu Diána tuweirigun, ábame tanügün búngiu Diána to únoun jájuduraga sun gürígia Ásia lúma lídan sun ubou quei ni cáta.

²⁸ Dan le jagáambunbalin cátei le, ába jagáñidun buídu, ába jagúaragun.

—¡Weirigutu Diána to jabúngiute Éfesona!

²⁹ Ñiñeinti ában oúnwenbun achágaraguní lídan sun ubúruğu ligía. Ába jarügüdüni Gáyo lúma Aristarco, biáma wügüríña Macedóniana ja úarabaña lúma Páblo, ába jadúruguduniña chülü tuágun múna to ñi lubeíja joúndaragua.

³⁰ Álugatí yebe Páblo lebélorun lun ladímurejan joun gürígia ñi lun ladílirun sun cátei, mígirun jamúti afñetiña lun lebélorun.

³¹ Ñiñanu giñe jádaangiñe ábutigu ñi Ásia lumádagu Páblo, oúnajatiña giñe dimúrei lun lun mebélorun lan ñjin.

³² Níti lídan adámurini, jíbiri agúaragua ában cátei, jíbiri agúaragua ámu, ladüga chagágujaña gürígia, jíbe-ágei, ibídiñeti joun ca lan lébubei jadámuridagun.

³³ Ñiñanu jádaangiñe gürígia, ába jafúnraanguágüdüni cátei le lun Alejándro, le jádajabei juríu ligíbugiñoún guríriguaü lun ladímurejan luágu jafúleisein. Ába ladügün Alejándro seíni láu lújabu lun jámanichun, lun ladímurejan luágu jafúleisein jagíbugiñe gürígia.

³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weirigutu Diána to jabúngiute Éfesona!

³⁵ Dánti le galumagüda láaña abürüjati le láni ubúruğu ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigirubárun tilígilisin búngiu Diána, túma tiyáwa to áburujaboun siélugiñe.

³⁶ Quei úa lan ni ában lun lasígeneruni cátei le, gáluma jumá, madüga jumá ni cáta masáminarunga jumeí buídu.

³⁷ Wügüríña ja, ja janügübaña ñájoun, míwerujan jamágiru jilígílisin, madímurejan jagía wuríbati tuágu jubúngiute.

³⁸ Ánjein níjein lubei cátei uáguti labúseera Demétrio jáma ja ñadágimeinbaña lúma lichugun jadúnrun, ligía níjein lubei agúseragüdüti lúma agúseragülei, gayáraati jídin ligíbugíñoun lúruđu lun ladímurejan cáda ában lueígiñegua.

³⁹ Ánjein ámu lubei cátei jamúriajabei, lúnti laráanserún lídan ában adámurini le richáti,

⁴⁰ ladüga gayáraabei laríñawagúniwa luágu wagúbujaña lan wuríbani ladüga cátei le asúseredubei ugúñe, ibídiñebei woun cába lan wounabagüle ánjawa áltügüdüwa luágu chagáguau le.

⁴¹ Lárígiñe laríñaguni cátei le, ába lagúmuchaguagüdüni adámuridaguni.

20

Luweíyasun Páblo Macedónioun lúma Grécíoun

¹ Dan le lagúmuchunbei chagáguau Éfeso, ába loúnajan Páblo jawágu afíñetiña lun jayábin lun, gayára lámuga lichugun gurásu joun, ábati loúburuniña, ába layóuragun joun, ába lídin Macedónioun.

² Luágu luweíyasun, chülügueina líña jámagiñe afíñetiña lídan buri fulásu le ídaangiñebei lásügüra, ru ligía sarágu dügüdaguaü joun láu lerérun. Ítara líña lachülürün lídoun ageíraü le Grécia.

³ Reideiti ürüwa játi ñi Grécia, ládina yebe ugúnein lun lídin Síria, ligía lagáambun luágu jelédeguña lan juríu lubá. Ábagubeíti laráanserun lun lagíríbudun múarugugiñe, sügüina ligíaya Macedóniagiñe.

⁴ Gíbetiña wügüríña ñüdüntiña úara lúma. Sópater, le liraü Pyrrhus, Beréagiñe, Aristarco lúma Segundo, Tesalónicagiñe, Gáyo, Dérbeigiñe, Timotéo giñe, lúma giñe Tíquico lúma Trófimo, Ásiana.

⁵ Afíñetiña ja, ába jóúdin wabá, ába jagúrabuniwa ubúruđu Tróas.

⁶ Wagía, lárígiñe fédu le teigín fein to magánaboun ísi, ába wáfuridun Filíposgiñe tídan ugúnein, seíngü wéyu lárígiñe, ligía wátürün Tróas, le ñi lubei wúwarada jáma ja ñüdünbaiña wabáragiñe, ába weréderun ñi sédü wéyu.

Bisída láni Páblo ubúruđu Tróas

⁷ Samúdi güñoun, ába jóundaragun afíñetiña lun jeigín fein le jarítaguagüle luágu loúnwen Cristu, Páblo arúfudajabei joun. Queíti gaweíyasúnbei lan larúgan, ába lasígirun adímureja joun darí lúmoun amídi árieibu.

⁸ Íñuñanu lídan lürüwan túbanana múna to ñi lubei jóundaragua, ñíñein sarágu lámpu durúngu.

⁹ Ñíñein ában irájü agáambaja, ñun líña luágu funédere, Eútico líribei. Queíti lílúbei lapúrichijan Páblo árieibu ligía, ába ladábudun lágu irájü ligía, ába larúmugun ñi, ába leígüadun lídaangiñe lürüwan túbanana múna, múarugun. Dan le jarárirunbei lun jiñúraguni, jiláali.

¹⁰ Ábati larárirun Páblo, ába laroúnrun ligíbuagu irájü ligía, ába loúburuni. Ába laríñagun joun afíñetiña.

—Madíjeri jumá, gabágariyaali.

¹¹ Ábayati lawárirun Páblo, ába jafánreinragunun fein, ába jeigín. Ábati lasígirun adímureja darí larúgadun, ligíaali lídin.

¹² Irájüti buga ligía, ába janügüni águyu wínwañu, sun jagía láu ugúndani láu.

Weŷyaasu lúmagiñe Tróasgiñe lun Milétoun

13 Ába giñe woúdin, ába wádinun tídon ugúnein, ába woúdin chülü Asón, le ñí lubei lúnti lan wabúduni Páblo quei wadáradun, ladüga busén lan lídin Asón múarugugiñe.

14 Dan le wadúnragun lúma ñi Asón, ába ládinun wáma, ába woúdin Mitiléne.

15 Larúgan, ába wáfuridun ñigiñe, sügúina wagía ligíbugiñe ubóju Quío, ában wéyu lárigiñe, ligía wachülürün ubóju Sámos. Ába weméraagun ubúru Trojílio, larúgan, ligía wachülürün ubúru Miléto.

16 Mátürüntiwa ubúru Éfeso luágu waweŷyasun ladüga mabúseerun lan Páblo leréderun sarágu dan ageíraü Ásia, busénti lachülürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligíli, Éfeso

17 Dánti le Milétojadiwa, ába loúnajan Páblo jawágu tábutigu ligíli Éfeso lun jayábin Miléto aríjei,

18 dan le jachülürünbei, ába laríñagan joun.

—Subúdi jumúti ída líña lan nigáburi lúmagiñe furúmiñeti wéyu nachülürün Ásioun.

19 Sun dan le jagánaguañadina lubei, seríwitina lun Búngiu láu ünabuni, láu sarágu águiraü, súfuri áu sarágu láu cátei lé buri jabúseerubei juríu jadügün nun.

20 Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguaü lúma júbiñe.

21 Dándu joun juríu quei joun ja mámabaña juríu, aríñagaadina luágu lúnti lan jasáansiruní jóuserun ligíbugiñe Búngiu, lúma lun jafiñerun luágu Wabúreme Jesucrístu.

22 Guetó lubeiti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi,

23 lé rügüñein nasúbudirubei, luágu sun lan ubúru le ñí lumuti nídin, aríñagati Sífiri Sándu nun luágu nadaürüba lan, nasúfuriruba sarágu, Jerusalén.

24 Úati ni cáta lídaangiñe áuti nebéresera, ni nibágari guánarügü, mebégiti ni cáta nun, adügarügü náali ligía le uágubei loúnajana Búngiu láu ugúndani darí lúmoun lagúmujóun, lun nadímurejan ugánu buíti luágu línsiñejabu Búngiu.

25 Guetó, choúru numúti luágu maríjindügüya láadina lan ni ában jídaangiñe, jugüya lé meja únbei napúrichija luágu larúeijan Búngiu.

26 Ligía naríñaganbei jun ugüñe luágu masándiragun nan núngua láu dúru luegiñe ni ában jídaangiñe,

27 ladüga subúdigüda náali sun laráansejan Búngiu jun, marámuduntina ni cáta jueí.

28 Toúnigigua jumá lubeiti júngua, toúnigi jumáñame afiñetiña ja líchugubaña Sífiri Sándu lun jóunigiruniña, ja tánigu líligilisin Búngiu, ja lagáñijabaña láu líta Liraü guánarügü.

29 Subúdi numúti luágu dánme lan nídin, jayábinba lan ámu áluga jagünrinchaguni jafiñen, quei lebélorun geígusi jádoun mudún áfaraguaña.

30 Ñíbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña afiñetiña.

31 Toúnigi jumá lubeiti, jarítagua jumeí luágu úrüwa lan irúmu náu ewerídijaun wéyuagu árieibu, ayájua buri áu.

³² ‘Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jafiñen lúma lun líchugun ubárau jun siélu jádan ja derégeguáañabaña joúngua lun.

³³ Mabúseerun nágili ni liseínsun ni ában, ni lanáangun,

³⁴ lubáragiñe líra, subúdi jumúti luágu ñadágimein nan lun nibjini le nemégeirubei lúma le jemegeirubei ja númabaña.

³⁵ Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemegeirun, luágu giñe lúnti lan laritawagún luágu dimúrei le lariñagubei Wabúreme Jesúsu dan le lariñagunbei. “Gúndaatimáati le íchugubei sügü láu le erésibirubei.”

³⁶ Lárigiñe lariñaguni Páblo cátei le, ába lájuduragun, ába layúmuragun lun Búngiu jáma súngubei.

³⁷ Ába jayájun súngubei láu igárigu, ába jóuburuni Páblo, ába jachúuruni.

³⁸ Jírutiñati ladüga lariñagun joun luágu marjindügüya jamáali lánme. Ába jóudin íchaajei tuágu ugúnein.

21

Luweiyasun Páblo ubúrugun Jerusalén

¹ Dan le wígiruniña afiñetiña, ába woúdin sügülügü lídoun fulásu le gíribei Cos, larúgan, ában woúdin Ródas, ñigiñe Ródasgiñe woúdin lun Pátara.

² Ñi Pátara wadárira ában ugúnein teíbuga Fenícia, ába wádinun tídoun, ába woúdin.

³ Dan wásügürün, ába warijini uboúju le Chípre, ába wígiruni lueígiñe wabaúna, ába wasígirun darí wachülürün Síria. Queiti taráriguágüdüba lan ugúnein lídan ubúругu le gíribei Tíro, ába warárirun ñi.

⁴ Áluaja wamútiña afiñetiña ja ñíbaña, ába weréderun sédü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jariñagun lun lun mídin lan.

⁵ Dan lásügürün sédü wéyu ligía, ába woúdin. Sun afiñetiña jáu jámarigu jáma jasáanigu, ñüdüntiña íchaajawa chülü bougudi lueí ubúrugu, ñi béyabu ába wájuduragun ayúmurgua lun Búngiu.

⁶ Ábati woúburagun woúngua jáma, ába wádinun tídoun ugúnein, jagía, ába jagíribudun jábiñoun.

⁷ Ába wagúmuchuni waweiyasun baránaja lúmagiñe ubúrugugiñe Tíro darí Tolemáida, le ñi lubei wabúsura joun afiñetiña, ába weréderun ában wéyu jáma ñi.

⁸ Larúgan, ába láfuridun Páblo wáma, wagía le lúmabei, ába wachülürün ubúrugu Cesaréa. Ñi woúdin lúbiñe Felipe le apúrichijabalin ugánu luáguti Jesucristu, ába giñe jádaangiñe sédü wügüriña já meja anúadajóubaña Jerusalén lun jeténirun lun le jemegeirubei afiñetiña, ába weréderun lúma.

⁹ Gasáaniguti Felipe gádürü würiña irájüñü ja máfuridungiña, ibíja jamúti ubáfu lúmagiñe Búngiu lun ladímurejan jayúmulgugiñe.

¹⁰ Átiri wéyu wáu ñi, ligía lachülürün ában proféta Judéagiñe, gíriti Ágabo,

¹¹ liábiña aríjawa. Ába lanügüni lubélitin Páblo, ába lagúraguni lugúdi guánarü lúma lújabu láu, ába lariñagun.

—Lariñajare Sífiri Sándu luágu ítara lúba lan jagúraguni juríu labúreme bélití le ubúrugú Jerusalén, ábame jedégeruní joun ja mámabaña juríu.

12 Dan wagáambuni cátei le, wagía jáma Cesaréana, ába wayúmuragun lun Páblo lun midin lan Jerusalén.

13 Ába lariñagun Páblo.

—¿Ca uágu jayájua, írudagüdána? Aráansetina mámarügü lun nagúrawagún Jerusalén, aráansetina dari lun nouwen lueígiñe Nabúreme Jesúsu.

14 Quei siña wamani laritagun agáñeira, ába wígiruni, ába waríñagun lun ladügüniwa lugúndan Búngiu.

15 Dan le gumújali webélujan ñi, ába waráanserun, ába wouúdin Jerusalén.

16 Ñüdütiña jádaangiñe afíñetiña wáma Cesaréagiñe, ñíñein ában Chíprena jádan, gíriti Mnasón, lújali lueígiñe lafiñerun luágu Jesucrístu, lúbiñeba wagánawa.

Bisída láani Páblo Jacóbo

17 Dan wachúlürün Jerusalén, ába jerésibiruniwa afíñetiña láu ugúndani.

18 Larúgan, ába wouúdin lúma Páblo aríjei Jacóbo, ñíñanu giñe sun tábutigu ligílisi Jerusalén.

19 Ába labúsurun Páblo joun, ába labájüdagun lun cátei le ladügübei Búngiu lídaangiñe joun, jádan ja mámabaña juríu.

20 Dan le jagáambunbalin ugánu le, ába jadímurejan luágu luweírigan Búngiu. Ábati jariñagun lun Páblo.

—Wadúje, aríjabásan, añájein sarágu mílu juríu afíñerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés.

21 Aríñawagúaaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madügün jamá gásu luágu lé meja lariñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu.

22 ¿Cábasan wadúga? Joúndaragubátia juríu dánme le jasúbudiruni luágu chúlújadibu lan, lun jadügün wuríbani bun.

23 Níjan cátei le lúnbei badügüni. Añájein gádürü wügüriña ya wádan, gásu jagúnfulirun ában darádu lúma Búngiu.

24 Barúbaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jedáradun, lárigiñeme gayáraajalíme jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan giñe lúma lilúrudun Moisés quei lubúdubu.

25 Ánjeinti jawágu ja mámabaña juríu áni afíñejaña luágu Búngiu, abürüjaadiwa joun lun madíjeri jamá luágu buri cátei le, lúnrügü meígin jamá úwi le dagágüdawaali joun sándu, ni jítaü, ni anímaalu le tigíwarügüti, lun giñe úa lan ni ában agámariduti würi to mamárieiduntu lúma.

Járügüdüni Páblo adáüra tídan témpulu

26 Ábati lanügüniña Páblo gádürü wügüriña jagía, larúgan, ába larúmadaguagüdün lúngua jáma, ába lebélorun témpulurugun awísaja ídaba lan lagúmucha jawéyuri gádürü wügüriña jagía lun jarúmadun, léme lidáani jadágaragüdün cáda ában jádaangiñe lun Búngiu.

27 Dan lé yebe yaráfaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába járügüdüni Páblo,

28 ába jagúaragun.

—¡Wügüríña Israelítagu, íderagua jumáwa! Niján wügüri le eíbugubalin sun fulásu arúfudaja joun sun gürígia wuríba luágu wanásiñun, luágu lilúrudun Moisés, lúma tuágu témpulu to, belúgúdaali gíñe gürígia ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei ítara ladúga meja jaríjini Páblo ubúru gu lúma Trófimo le Éfesona, jarítaguatiñati luágu barúlaani témpulurúgun.

³⁰ Ába jachágaragun sun lílana fulásu, ába jayábin gürígia eíbaagueina. Ábati jarügüdüni Páblo, ába jadúruguduní bougudin tueí témpulu, ába jadáuraguni béna furése.

³¹ Busénjaña yebe jáfaruni jilágubei, ligía lachülürün ugánu lun gumándan luágu chagágujaña lan sun lílana ubúru gu Jerusalén.

³² Ábati loúndaraguniña gumándan lisúdaaranigu jáma jábutigu, ába lachülürün eíbaagueina le ñíjin jabeí gürígia. Dan jaríjini gumándan jáma súdaaragu, ába lásurun jabeíchuni Páblo.

³³ Ábati layárafadun gumándan, ába lárügüdüni Páblo, ába lagüraguágüdüni láu bián güríngüri, lárigiñe, ába lálügüdajan cátei lan, lúma ca lan lidúnrunbei.

³⁴ Ámuñegueinarügüti cátei jaríñagun gürígia, siñátiti gunfaráanda lan gumándan ni cáta ladúga ireíni le jadügübei, ába lanügagüdüni jábiñoun súdaara.

³⁵ Dan le jachülürünbei luágu testépute múna, ába janügüni súdaara Páblo oúyuajeina lueí jáfaruni gürígia jilágubei,

³⁶ ladúga jayábiña sún gubei jarígi agúarajeina.

—¡Jilála!

Ladímurejan Páblo lueígiñegua

³⁷ Dan lé yebe jádaraali lan Páblo múnadoun, ába laríñagun lun gumándan le jáubei súdaara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güriégu?

³⁸ ¿Máma lubeí bugúya Ejíptona lé meja adügübei ában mabúchajaü luágu ában dan, ába lanügün gádürü mílu wügüríña gáfarajatiña lídoun fulásu mageírawaguti?

³⁹ Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adügabá fuleísei nun lun bígirunina lun nadímurejan joun gürígia.

⁴⁰ Ába líchugun gumándan üma lun, ába laráramun Páblo luágu estépu, ába líchugun seíni láu lújabu joun gürígia lun jámanichun. Dan le manígaali, ába ladímurejan joun lídan hebréo, le jerérun juríu, ába laríñagun.

22

¹ —Nidújeñu jáma jagübürigu, agáamba jumeí le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguágüdü. Ábati laríñagun joun.

³ —Juríu áu, le gumúti, ubúru gu Társo loúbawagu Cilícia nagüríajouá, ya Jerusalén naweírída. Lábugiñe larúfudajan Gamáliei natúriaja, úarati larúfudajan lúma jalúrudun binádu wagübürigu. Jouchatina súnwandan lun

nesériwidun lun Búngiu táu sun nanígi, queígubeirügü ligáburí jadügüni jugúya ugúñe wéyu.

⁴ Áu, eſbaaja numútiña meja lánigu Críſtu darí náfaraguniña jilágubei, barúgua áu wügüriña furíſunrugun.

⁵ Geféenti fádiri ñtútimaati jáu sun jábutigu juríu luágu rújama gárada nun joun wapaíſanu ja Damáſcobaña. Ñüdúntina ñi áluajaña afiñetiña luágu Críſtu lun nanügüniña ñájoun lun naſúfuriragüdúniña.

Labájüdaguní Páblo luáguti laſáansiragun ligáburí

⁶ ‘Dan luáguñadina lubei úma, yaráfaadina lun nachülürün Damáſco, queíburí amídirugu, sódini ligía ladúnraagun ában oúnwenbun larúgounga ſiélugiñe náu,

⁷ ába náburujan múarugun. Ába nagáambun laríñagun ában umálali nun. ‘Sáulo, Sáulo, ¿ca uágu beíbaajanina?’

⁸ Ábati nariñagun. ‘¿Cátabusan Nabúreme?’ Lariñaga nun. ‘Jesúsu le Nazarétna áu, le méme beíbaajabei.’

⁹ Aríja jamúti ja úrabaña núma larúgounga ligía, ába janúfudedagun, magáambun jamúti lumálali le adímurejabei nun.

¹⁰ Ábati nariñagun. ‘¿Cábagi nadüga, Nabúreme?’ Ába lariñagun nun. ‘Sarába, beíba luágu buweíyasun Damáſcoun, ñíba lariñawagúa sun le lúnbei badügüni bun.’

¹¹ Queíti maríjngüda láadina lubei buga larúgounga ligía, ába járügüdüni ja númabaña nújabu darí wachülürün Damáſco.

¹² Ñiñein ában wügüri Damáſco gíríti Ananías, gúnfuliti buídu lúma lilúrudun Moisés, sun juríu ja aganoúbaña Damáſco adímurejatiña buídu luágu wügüri ligía.

¹³ Ába liábin Ananías aríjana, dan lachülürün, ába laráramun nubádu, ába lariñagun nun. ‘Nidúje Sáulo, íbjayabei baríjin lárigoún.’ Lídan méme óra ligía, ába léfegechun nágu, ába narijini.

¹⁴ Ábati lariñagun nun. ‘Anúadaja láadibu Jabúngiute binádu wagübürigu lúmagiñe binárü lun baſúbudiruni lugúndan, lúma lun baríjini Jesúsu le richáguabei, lun bagáambuni lumálali,

¹⁵ ladüga bíchuguba lan fe luágu Jesúsu joun sun gürígia, abájüdagubeíme le aríja báalíbei lúma le agáamba báalíbei.

¹⁶ Guetóti, ¿ca uágu badárasaja? Sarába, badíſeibá jeménigiñu luágu Wabúreme lun lachíbun bíffigoun.’

Labájüdagun Páblo luágu louñajoún apúrichija joun ja mámabaña juríu

¹⁷ ‘Dan nagribudun ubúrugun Jerusalén, luágu ában wéyu dan le nídin témpulurugu ayúmuragua, ába laſáliragun Nabúreme Jesúsu nun,

¹⁸ ába lariñagun nun. ‘Furíba yágiñe Jerusaléngiñe, oúfuda, ladüga madügünbaña juríu gáſu láu le baríñagunbei nuágu lídan fuláſu le.’

¹⁹ Ábati nariñagun lun. ‘Nabúreme, subúdi jamúti luágu ñüdü nán buri méja tídan sun jalígílisin afiñetiña anáajaña ja afiñebaña buágu furíſunurugun, beí buri náña.

²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu oúnigirubárun janáangun ja áfarubalín.’

²¹ Ába lariñagun Nabúreme nun. ‘Beíba, ladüga nouñajadibu díſe, apúrichija joun ja mámabaña juríu.’

Páblo lújaburugu gumándan

²² Agáamba jamúti chülü lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumei jilágubei! ¡Maríchatí lun labágaridun!

²³ Queítí jasígirun agúaraja, achüjoun buri janáangun, achüja calíqui íñun le jagáñi,

²⁴ ába laríñagun gumándan lun ladarúniwa Páblo jábiñoun súdeara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara.

²⁵ Dan le gürágu jamáli lun jabeíchuni, ába laríñagun Páblo lun jábuti súdeara le ñíbei.

—¿Garíchatúnsan lun jabeíchun ában wügüri Rómána, magúserunga ligía?

²⁶ Dan le lagáambuni jábuti súdeara cátei le, ába lídin aríñaga lun gumándan.

—Touñigibátia láu le lúnbei badügüni, Rómanatia wügüri le.

²⁷ Ábati lídin gumándan luágun Páblo, ába laríñagun lun.

—¿Inárüni luágu Rómána ban?

Laríñaga Páblo lun.

—Ánja.

²⁸ Ábati laríñagun gumándan.

—Fáyeitina sarágu seínsu lun Rómána nan.

Laríñaga Páblo.

—Ánjein áu, ñi nagüriajouá.

²⁹ Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómána lan Páblo, ába lanúfudedagun lueígiñe lagüraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güríngüri lueí, ába loúndaraguágdüniña jábutigu fádorigu jáma lúrudugu juríu ja íñutimáabaña, ábati laságaruni Páblo, ába lichuguni jagíbugiñe.

23

¹ Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülü lúmoun wéyu le.

² Ábati loúnajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo.

³ Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdüniña quei laríñaguni lúrudu, ¿cátí uágu bagáyuagüda nuágu, adúraaguei lúrudu?

⁴ Ába jaríñagun ja ñíbaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába laríñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladüga taríñajare Lerérun Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagübürigu, áni jagúseragüdñíadina ladüga afiñe nan luágu jásaaruba lan jiláaña lídaangiñe oúweni lúnya jabágaridun.

⁷ Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini.

⁸ Ladüga jaríñajare saduséogu luágu másaarunbaña lan jiláaña lídaangiñe oúweni, úatiña nege giñe ánjeligu, ni espíritugu, ánjañati fariséogu, afíñetiña luágu sun cátei le.

⁹ Jareínchati sùngubei, ába jásaarun jádaangiñe arúfudajatiña lilúrudun Moisés ja ñíbaña, áni fariséogu giñe jagía, ába jaríñagun.

—Wügüri le, úati ni cáta wuríbati ladüga, áni ánjeindügü ában lubei espíritu adímurejabei lun o ában lan ánjeli, toúnigi wamáti luei wadárirún oúcha weréderuni luwádigimari Búngiu.

¹⁰ Weírjiali sigénei darí lun lanúfudedun gumándan luei jáfaruni Páblo jilágubei. Ábati loúnajaniña lisúdaaranigu lun jaságaruni Páblo lídaangiñe adámurini lúnya janügüni jábiñoun súdaara.

¹¹ Le ában árieubu, ába lasáliragun Wabúreme Jesúsu lun Páblo, ába laríñagun lun.

—Manúfudebá, Páblo, ladüga ítara quei rújadibu lan fe nuágu ya Jerusalén, bíchuguba giñe fe nuágu, Róma.

Aráansejaní lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni.

¹³ Jougíñe bián-wein wügüriña ja aríñagubalin cátei le.

¹⁴ Ábati jóudin jámoun jábutigu fádirigu lúma jámoun wügüriña weírígutiña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei.

¹⁵ Guetóti, jugúya jáma ja jíbiri lúrudugu íñutimaatiña amúriaja jumá lúma gumándan lun lanügüni jun jarúga, jaríñagame lun luágu lun lántima jálügüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachülürün.

¹⁶ Ába lachülürün cátei le lábun lagáambun tiraü lítu Páblo, ába lídin jábiñoun súdaara asúbudiragüdei lun Páblo.

¹⁷ Ábati lagúarun Páblo lun ában jádaangiñe jábutigu súdaara, ába laríñagun lun.

—Barübei irájü le lúmoun gumándan, níjein cátei lun laríñaguni lun.

¹⁸ Ába lanügüni jábuti súdaara lúmoun gumándan, ába laríñagun lun.

—Wáti adaürüti Páblo nun, ába lamúriajan núma lun nanügüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanügüni lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriajan búma lun banügüni Páblo jagíbugiñoun lúrudugu íñutimaatiña lún nege jálügüdünitima luágu lidúnrun.

²¹ Mafiñerabá joun, añájein jougiñe bián-wein jawügüriña arámudagu jabá ùmada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meiginbaña lan, mátun dari jáfaruni Páblo, guetó aráanseñu jáña, jagúrafa rügüñein boúnabagüle.

²² Ábati loúnajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Louñajoún Páblo lun gumádimati le Félix

²³ Ába lagúarun gumándan joun bián jádaangiñe jábutigu súdeara, ába laríñagun joun lun jaráanserun bián-san súdeara lun jóudin Cesaréa eibu, úara jáma úrúwa-wein-díisi ja jawágutiña gabáyu, jáma bián-san ja táutiña efeín, lun jóudin ladaünrún nefu gúñoun.

²⁴ Aráansegüdáti giñe gabáyu lun laweínjaniña Páblo, ru ligía dimúrei lun jachülüragüdüni Páblo lúmoun gumádimati Félix láu magádiei.

²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun.

²⁷ Niján wügüri le, le nouñajabei bun, daújamaali yebe juríu áni jáfaraali yebe jilágubei, dan le nasúbudirúnbalin luágu Rómata lan, ába nídin jáu nisúdaaranigu, ába neséfuruni.

²⁸ Queíti nabúseerun nasúbudiruni ca lan lidúnrunbei jarúma, ába nanügüni jagíbugiñoun lúrudugu juríu íñutimaatiña.

²⁹ Lidúnrun jarúma luáguti buri cátei le luáguti jalúrudun, úati iríchaü lun láfarún jilágubei, ni íbini lun ladaürün.

³⁰ Quei lachülürün lábun nagáambun luágu jaráansejaña lan juríu lun jáfaruni jilágubei, ligía lébubei nouñajani bun madárasajaanga. Aríñagaadina giñe joun ja íchugubaña lidúnrun lun búma lan jaráanserei le jánibeí lúma.”

³¹ Ábati janügüni súdeara Páblo quei laríñawagúniwa joun, áriebu, chülü Antípatris.

³² Larúgan, ligía jagíribudun súdeara ja eíbubaña, súdeara ja jawágubaña gabáyu, ába jasígiruni jaweíyasun láu Páblo.

³³ Dan le jachülürünbei Cesaréa, ába jedéregerunun gárada lun gumádimati, derége jamei giñe Páblo.

³⁴ Lárigiñe lalíjanun gumádimati gárada, ába lálügüdajan jalíana lan Páblo, dánti le lasúbudirúnbalin luágu Cilíciana lan,

³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu lárigiñe, ába lachülürün Ananías, fádiri le íñutimaabei, ubúrugin Cesaréa jáu wügüriña jádaangiñe juríu weírigutiña, lúma ában wügüri le subúdjabuti lun lúrudu, grítiti Tértulo. Ába jayábin lúmoun gumádimati lun íchugun lidúnrun Páblo.

² Dan le lanügüniwa Páblo jagíbugiñoún, ába lagúmeserun Tértulo íchiga lidúnrun, lariñaga.

—Luágu bareíni, gumádimati, lüjadiwa láu darángilaü ya wageíra, buíti leibugun sun cátei ya fulásurugu súnwandan lábugiñe lichü báu.

³ Ibija wamúti sun le, áni teinqui wamútibu luágu.

⁴ Lun magídarun wamáni bidáani sarágu, amüriajatina búma lun badügün murúsun fuleísei woun lun bagáambuniwa luágu murúsun óra.

⁵ Niján wügüri le Páblo, beréseti, lerédera afánreinraguagüdaña juríu lídan sun fulásu, ligía giñe ában jádaangiñe lichügüdinabei jadámurin nazarénugu.

⁶ Álugati giñe lawíyedagüdünun témpulu ligíbugiñe Búngiu láu lebélaagüdün ában wügüri le mámabei juríu tídoun. Ába wárügüdüni, ába yebe wabúseerun wagúseragüdüni láu ligáburi walúrudun,

⁷ ába leméterun gumándan Lísias ñijin, ába lagídaruni waweí láu érei,

⁸ ába lariñagun luágu ja lan ichugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugei inárüni luágu sun cátei le, le wariñagubei luágu.

⁹ Juríu buri ja ñibaña, ariñagatiña giñe luágu inárüni lan sun le lariñagubei Tértulo.

¹⁰ Ába ladügün gumádimati seíni lun Páblo lun ladímurejan, ában lariñagun Páblo.

—Lau sun nugúndan nadímureja nueígiñegua bigíbugiñe ladüga subúdi náani luágu lúmagiñe lan sarágu írúmu bagúseragüdajan lídan fulásu le.

¹¹ Gayáraati bálügüdagun ánjein inárüni lubeí le lúnbei nariñaguni bun. Dúsurügügili wéyu lueígiñe nachülürün ubúrugin Jerusalén lun nájduragun lun Búngiu,

¹² madárirúnwatina asígeneja ni ca úma, ni achágaraguagüdaña güriquia témpulurugu, ni tídan buri tibiri jalígilisin juríu, ni lídan buri ámu fulásu ubúrugu.

¹³ Güriquia ja, siñáti jarúfuduni luágu inárüni lan ni ában lídaangiñe sun cátei le jariñagubei nuágu.

¹⁴ Ában cátei nariñagubei bun, luágu nesériwiduña lan lun Jabúngiute nagübürigu quei larúfudajani Jesucrístu, le uágubei jariñaga luágu marícha lan. Afíñetina luágu sun le bürüwañubei tídan buri líburu to lánina lilúruden Moisés lúma lé meja jabürüjabei profétagu.

¹⁵ Níjein giñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ya buidubaña quei ja wuríbabaña.

¹⁶ Ligía náfaagunbei súnwandan lun madúnrun nan ligíbugiñe Búngiu lúma jagíbugiñe güriquia.

¹⁷ Lárigiñe átiri dan náu eíbugei ámu buri fulásu, ába nagíribudun nageíroun lun nedéregerun seínsu joun gudémetiña Jerusalén lúma lun nadágaragüdün lun Búngiu.

¹⁸ Nadügüñein yebe cátei le témpulurugu lárigiñe narúmudaguagüdün núngua quei le igáburi, ligía jadárirunina átiri juríu loubwaguna Ásia ñi témpulurugu, úatiña sarágu güriquia ñi, ni chagáguau.

¹⁹ Jagía lúnbaña jayábin arúfudagua jóungua ya lun jariñaguni le lúnbei jariñaguni ánjein níjein lubeí lúnti jariñaguni nuágu,

²⁰ jariñaguni lan ja yábaña ánjein darí jabei nidúnrun dan le ligíbugiñe nubei líñun-ágei lúruđu juríu.

21 Siñáti jaríñagun ni cáta nuágu, lueídügüya luágu lan ában wéyu dan le jádaañadina lubeí, ába nagúaragun aríñaga. “Jagúseragüdüñadina ugúñe lueígiñe afíñe nan luágu jásaaruba lan jiláaña lídaangiñe oúweni lúnya jabágaridun.”

22 Subúsi sarágu luágu larúfudajan Jesúsu lun gumádimati Félix, ítara líña, dan le lagáambunbalin le lariñagunbei Páblo luágu jásaarun jiláaña, ába lagúmuchaguagüdüni adámurini, aríñageina ligía.

—Nagúseragüdübei wügüri le dánme le lachülürün gumándan Lisías.

23 Ábati lariñagun Félix lun jábuti súdeara lun lasígirun Páblo daúwañu, lun furáangu lan lun gayára lan jóudin lumádagu aríjei, eténira lun.

24 Átiri wéyu lárigiñe, ábaya lachülürün Félix túma Drusíla to lúmari, to juríu, ubúrugin Cesaréa, ába lagúaragüdüni luágu Páblo lun ladímurejan lun luágu Jesucrístu.

25 Dan le ladímurejaanbei Páblo lun luágu ibágari le surúbei, lúma luágu ágüdaagüni únguaü lueí le wuríbabei, lúma luágu wéyu le lúnbei lagúseragüdüniña Búngiu sun gürgía, ába lanúfudedagun Félix, ába lariñagun lun.

—Beiba yebe, dánme le gadáani nan, nagúarayaba bun.

26 Agúrabatí yebe giñe Félix lun líchugun Páblo seínsu lun lun lígiragüdüni, ligía, dan méme lubei wájali luágu lun layánujan lúma.

27 Sügüti bián írúmu ítara, ábati lagúmuchun lagúmadijan Félix, ába lárügüdüni Pórcio Féstó lufúlasun. Queíti busén lan Félix leréderun buídu jáma juríu, ába lígiruni Páblo daúwañu.

25

Páblo ligíbugiñe Féstó

1 Ábati lachülürün Féstó lun lárügüdüni lufúlasun queísi gumádimati, ürüwa wéyu lueígiñe, ába lamúdeirin Cesaréagiñe lun ubúrugin Jerusalén.

2 Ába jachülürün jábutigu fádirigu ñijin jáma juríu ja weírigutimaabaña íchiga lidúnrun Páblo ligíbugiñe Féstó.

3 Ába jamúriajan fuleisei lúma lun loúnajan anügei Páblo Jerusalén. Le jaráansejanbei, lún yebe jáfaruni jilágubei luágu úma.

4 Ába loúnabun Féstó luágu Cesaréa lan ladaürüwa Páblo, áni jarítagua lan lidin ñi madíse.

5 Ába lariñagun joun.

—Ligía lúnti lubeí jóudin ja weírigutimaabaña jídaangiñe Cesaréa úara núma, áni ánjein adúgaali lubeí wügüri ligía dúru, gayáraabei jaríñaguni.

6 Wídü rügüñein o díisi lan wéyu láu Féstó Jerusalén, ába lagíribudun ubúrugin Cesaréa. Larúgan, ába lárügüdüni lufúlasun lun lagúseragüdüni, ába loúnajan luágu Páblo.

7 Dan le lebélorunbei Páblo, ába jagúriridágun juríu ja ñúbinbaña Jerusaléngiñe láu, ába jíchugun sarágu lidúnrun le jürüti, áni siñáti jarúfuduni luágu inárüni lan ni cáta lídaangiñe le jaríñagunbei.

8 Ábati lariñagun Páblo lídan ladímurejan lueígiñega.

—Madügüngidina ni murúsun dúru ni lun jalúrudun juríu, ni tun témpulu, ni lun uréi César.

9 Queíti busén lan Féstó leréderun buídu jáma juríu, ába lariñagun lun Páblo.

—¿Buséntibu bídin Jerusalén lun nagúseragüdüni ñi?

¹⁰ Ába loúnabun Páblo.

—Ligibugiñeñadina lagúseragüle urúei César, le ñí lubei lúnti lan nagúserún. Queisi basúbudiruni buídu, madügüngidina dúru joun juríu.

¹¹ Ánjein adúgaadina lubei dúru le garíchatí lun nafarún jilágubei lueígiñe, mebéresegúntina nouñwen, ánjein úa lubei ni cáta lánina inárúni lídan sun le aríñawagúbei neágu, úati ni ában garíchatí lun ledéregerunina joun juríu. Amúriajatina lun César lan agúseragüdána.

¹² Lárígiñeti layánujan Fésto jáma lánigu cába lan ladüga láu Páblo, ába laríñagun lun.

—Amúrijaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³ Átiri wéyu lárígiñe, ába lídin urúei Agrípa túma Bereníce Cesaréa aríjei Fésto.

¹⁴ Quei reídei jabei átiri wéyu ñí, ába labájüdaguni Fésto luáguti lagúserun Páblo lun urúei Agrípa, laríñaga lun.

—Níjein ában wügúri lígirun Félix dáúwañu ya.

¹⁵ Dan le Jerusalén nubei, rútiña jábutigu fádirigu jáma wügúriña juríu weírigutiña lídúnrun nigíbugiñe, amúriajatiña núma lun nasiadiruni.

¹⁶ Ába naríñagun joun luágu magáburi láani lúrudu Rómana lun lasíadirun ában gürígia lun ouweni maríjinga láña ja íchugubaña lídúnrun ligíbugiñe, lun gayára lan ladímurejan lueígiñegua.

¹⁷ Ligía, lídan lubei le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába nouñajan luágu wügúri ligía.

¹⁸ Ja ñübinbaña lun jíchugun lídúnrun, maríñagutiña ni cátei luágu lídaangiñe lé yebe uágubei narítaqua.

¹⁹ Lé buri cátei le jaríñagubei luágu, luágu múaradun lán nege jáma luágu ligáburi jafiñen, lúma luágu ában nege wügúri giriti Jesúsú —jiláti nege, laríñajare Páblo luágu wínwanya lán nege.

²⁰ Queíti ibídiñe lan nun cába lan nadüga lídan ában cátei líbe le, ába nálügüdüni Páblo ánjein busén lubei lídin Jerusalén lun lagúserún luágu cátei le ñí.

²¹ Quei lamúriajan lun urúeiba lan Augústo César agúseragüdeí, ába naríñagun lun lasígirun dáúwañu daríme gayára lan nouñajani lun Augústo César.

²² Ábati laríñagun Agrípa lun Fésto.

—Buséntina gíñe nagáambuni wügúri ligía.

Ába laríñagun Fésto lun.

—Bagáambubei jarúga.

²³ Larúgan, dan le jachülürünbei Agrípa túma Bereníce, ába jebélurun láu ouñwenbun uweíriguni múnadoun, jáma jábutigu súdaara jáma wügúriña weírigutiña ñí ubúругu. Ába loúnajan Fésto luágu Páblo,

²⁴ ába laríñagun.

—Urúei Agrípa, jáma wügúriña ja adámurigubaña wáma ya, niján wügúri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan loúnwen.

²⁵ Laganóun nun camá madügüngili ni cáta le lúnti lafarún jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdeí, nouñajaali lun.

²⁶ Queíti úa lan cába lan cátei uágu nabürüja lun Augústo luágu wügüri le, ligía nanügübalin jigíbugiñoún, bigíbugiñoúntimá urúei Agrípa, lun bálügüdaguni, nijein lámuga cába lan nabürüja.

²⁷ Ladüga garábaguati nun lun noúnajan ában adaürüti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹ Ábati laríñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába laríñagun.

² —Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le aríñaga jamáalibei juríu nuágu,

³ gúndaatimáatina ladüga subúdi báni jagáburi juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburi meja nabágaridun jádan, nageíra lúma ubúruyu Jerusalén, lúmagiñe irájügídina.

⁵ Lúja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdagubei lídan luwúyeri wafíñen, wagía juríu.

⁶ Guetóti, jagúseragüdúñadina luágu eménigini le nuágubei, luágu lásaaragüdúbaña lan Búngiu jiláaña lídaangiñe ouweni lúnya jabágaridun, queí meja laríñaguni joun binádu wagübürigu.

⁷ Dúusugubei família le jadügawagunbei lirájüñü Israél agúrabatiña jaríjini lagúnfulirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárira juríu nidúnrun, urúei Agrípa.

⁸ ¿Mafíñetün funági luágu gayára lan lásaaragüdúniña Búngiu jiláaña?

Labájüdagun Páblo luágu meja leibaajaniña afíñetiña

⁹ ‘Nugúya guánarügü, jarítaguatina méja luágu lúnti lan neibaajaniña ja afálarunbalin Jesúsu Nazarétna,

¹⁰ áni ítara líña nadügüni ubúruyu Jerusalén. Láu ubáfu le jíchugubei jábutigu fádirigu nun, dátina sarágu jádaangiñe lánigu Búngiu furisunrugun, áni dan lé buri jasíadirúniwa lun joúnwen, nugúya ában jádaangiñe ja abúdujabaña lun ítara lúba lan.

¹¹ Níjeinja dan, súfurigüda numútiña lún yebe jeyéedagun luágu jafíñen luágu Jesucristu. Adáagua numúti meja cátei le tídan sun jalígilisin afíñetiña, áni weíríti meja nigáñi joun darí lun neibaajaniña chülü lídoun buri ubúruyu le díseti.

Labájüdagunya Páblo luágu lasálbarun

¹² ‘Ligía yebe cátei le gabügürübalina ubúruyu Damáscu ában dan, joúnajan jábutigu fádirigu.

¹³ Luágu úma, nurúeite, amídirugu, ába naríjin ában larúgounga siélugiñeti, jéreti sügü lau larúgounga wéyu, ába ladúnraagun geyégua náu jáu sun ja úarabaña núma.

14 Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beibaajana? Basúfuriraguagüdüñatia búngua láu bamánjarun nun quei ladüga bágasu dan le líchaagun quíqui luágun cátei gágiriti.”

15 Ábati naríñagun. “¿Cátabusan, Nabúreme?” Ába laríñagun nun. “Jesúsu áu, le guánarügü beibaajabei.

16 Sarába, ráramabá, ladüga narúfudagunbei núngua bun lun besériwidun nun, lun geféen ban luágu le aríja báalibei guetó lúma le lúnbei narúfuduni bun.

17 Neséfurubadibu jaweí juríu lúma jaweí ja mámabaña juríu, ja únbaña nouñajabu guetó.

18 Nouñajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Nouñajañadibu joun, afíñe jamámuga nuágu, ferúdnawa lámuga jafígoun, íbija jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

19 Ítara líña lubeíti, urúei Agrípa, ába nadügüni le laríñagunbei Jesúsu nun lídan le lasáliragunbei nun.

20 Furúmiñe, ába napúrichijan joun ja Damáscobaña, aríñagatina joun lun jaságürijan luágu jafígoun, lun jagíribudun lun Búngiu, lun jadügün cátei buíti, aríjúa lámuga luágu saansiguaali lan jagáburi. Lárigiñe, ába napúrichijani cátei méme le joun ja Jerusalébaña, ja mámabaña juríu.

21 Ligía lébubei járügüdüñina juríu témpulurugu, ába jálugun jáfarunina jilgubei.

22 Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weírigubaña queísi ja únabugubaña, chülü lúmoun óra le. Maríñaguntina ní cáta joun gürígia bougudin lueí le uágubei jariñaga Moisés jáma profétagu luágu lasúsereduba lan—

23 Luágu lúnti lán meja lasúfuriruba lan Crístu, luágu lárigiñe lánme loúnwen, ligíaba lan furúmiñeti ásaaruti jádaangiñe jiláaña láu íbágari magúmchaditi, luágu gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafíñeragüdüni Agrípa luágu Jesucrístu

24 Lídan le laríñagunbalin Páblo cátei le burí lídan ladímurejan lueígiñegua, ába lagúaragun Fésto.

—¡Lülüjaali báu, Páblo! Lülügüdá sarágu atúriajani báu.

25 Ába loúnabun Páblo, ába laríñagun.

—Málülünti náu, gumádimati, inárüni le naríñagunbei.

26 Niján urúei Agrípa le subúdiabúbei lún burí cátei le buídu, ligía gayára lubei nadímurejan ligíbugiñe, furáangu, ladüga choúru náni luágu subúdi láani gíñe sun cátei le asúseredubei lun Jesúsu, ladüga máma cátei le adügüti arámudaguarügü.

27 ¿Afíñetibu luágu le jariñagubei profétagu, urúei Agrípa? Subúdi numúti luágu afíñe ban.

28 Ába laríñagun Agrípa lun.

—¿Jarítaguatibusan luágu bafíñeragüdübadina lan luágu Jesucrístu ítara ufúresen?

29 —Furése yébe, o darása yébe, amúriajatina lúma Búngiu, mámarügü buágu, jawágu gíñe sun ja añábaña agáambana ugúñe, lun jayábin lun jafiñerun quei nugúya, úouga güringüri jawágu.

30 Lárigiñe laríñaguni Páblo cátei le, ába lásaarun urúei, sará gíñe gumádimati úara túma Bereníce jáma sun ja ñúnbaña ñi,

31 ába jadíñurun ñígiñe lun jadímurejan luágu cátei le. Jaríñagatí buri jámagua. —Wügüri le, madügünti ni cáta le lúnti lafarún jilágubei lueígiñe, moún lumuti ni íbini leréderun furísunrugu.

32 Ába laríñagun Agrípa lun Fésto.

—Lun jamúga mamúriajan lan wügüri le lun lagúseragüdüni Augústo César, gayáraati jamúga lígirawagüdün.

27

Louñajóun Páblo ubúrugun Róma

1 Lídan le jaráanserunbei lun jóunajaniwa Itálioun, ába ledéregerún Páblo jáma ja jíbiri adaürütiña lábu laríjin ában súdaara gíriti Júlio, ligía gumándanbei lun jadámurin súdaara le gíribei “lísúdaaranigu Urúei Augústo.”

2 Ába wádinagun tídoun ában ugúnein ñúbintu Adramítioigiñe lun Ásioun. Ñíñein gíñe Aristárco wáma, le Tesalónicana, Tesalónica ában ubúругu láni Macedónia.

3 Larúgan, ligía wachülürün Sidón, lídan fulásu ligía, buíti louseruni Júlio, le gumándan, Páblo, ígira lumúti lun bisída lániña lumádagu lúma lun jeténirun lun.

4 Lídan wáfuridun Sidóngiñe, ába wóudin ünabugiñe libíti ubóuju Chípree ladúga wabánrouñein lan garábali.

5 Ába wájiñuraguni barána ligíbugiñe lubéyaari Cilícia lúma Panfília, ába wachülürün lídoun fulásu le gíribei Míra, ában ubúругu láni Lícia.

6 Ñi ladárira gumándan ában ugúnein Alejandríana teíbuga Itália, ába ladinagüdüniwa lun wasígiruni waweíyasun.

7 Áfayajatiwa jámaru luágu sarágu wéyu, láu lénreengun wachülúra ligíbugiñe ubúругu le gíribei Gnído. Queíti wabánroun mémegili lubeí garábali, ába wáfayajan ünabugiñe libíti ubóuju Créta, sügüina wagía ligíbugiñe Salmón,

8 wasígira láu méme lénreengun láru láru, ába wachülürün lídoun ában ubúругu gíriti Buíti Fulásu, yaráfa lun ubúругu Laséa.

9 Féridijadiwa sarágu dan, dénchajaliti áfayajani baránaja ladúga yaráfaali lidáni luríbouga, sügüjali jafédun juríu le lánina ferúdon figóu. Ligía lewéridirunbaliña Páblo, laríñaga joun.

10 —Aríja numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei gíñe weféridiruni wabágari.

11 Lubáragiñe ladügün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei.

12 Queíti mabuídun lubeí fulásu ligía lun lásügürün luríba dan ñi, ába jarítangun jíbe-ágei luágu buídutima lán yebe lun wáfuridun ñígiñe, lun waríjin ánjein gayára wachülürün Feníce, ában fulásu láni ubóuju Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

13 Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun láru láru Créta.

14 Málúti lueigiñe jáfayarun, ába láfurun ában nodísi jéreti,

15 ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün woúngua lun lanügüniwa.

16 Ába wásügürün ünabugiñe libíti ában liraúraü ubouju gíriti Cláuda, le ñi lubei mére lan láfujan garábali, ába wádinagüdünun tisálufun wagúne to atoújeina waboún, láu ában lénreengun.

17 Lárigiñe wiñúrurunun ugúneirugun, ába lásügüragüdüniwa gúrudu tábugiñegiñe ugúnein lun jagúragunun, derébugu támuga. Queíti janúfudebei luei jóudin adágara luágu sándala le gíribei Síрте, ába jagídaraguní bira, ába jígiraguagüdün jóungua lun lanügüniwa garábali.

18 Larúgan, quei jere mémegili lubei dan, ába jagúmeserun achágajei tíla ugúnein baránajoún,

19 luágu lürüwan wéyu, ába jachágajani lídaangiñe tumégegungun ugúnein baránajoún láu jájabu guánarügü.

20 Maríjintiwa wéyu ni warúguma lídan sarágu wéyu, láuti oúnwenbun luríban dan le, féridi wamáali wafiñen luágu weséfuruba lan.

21 Queíti sügüjadiwa lubei sarágu dan meíginga, ába laráramun Páblo wádan, ába laríñagun.

—Wügüriña, aríñagatiná yebe jun lun mayábin wamá Crétagiñe, buídutimaati jamúga luei wasúfuriruni dáñu le, áni féridi wamei wálagu.

22 Gagúraasun jumá, úabei ni ában jídaangiñe ouweti, láu sun teféridiruba lan ugúnein.

23 Chülüjali ában láni Búngiu ánjeli númoun áriebu to, loúnagüle Búngiu le Nabúreme le giñe ünbei nesériwida,

24 laríñajare ánjeli ligía nun. “Manúfudedabá, Páblo, ladüga barúfudaguba búngua ligíbugiñe urúei César Augústo, áni badügaba leséfuraña Búngiu sun ja tídaanbaña ugúnein búma luei ouweni.”

25 Gagúraasun jumá lubeiti, ladüga jeménigitina luágu Búngiu, áni choúru numúti luágu ítara lúba lan quei laríñaguni ánjeli luágu nun,

26 láu sun, wadágaruba lan luágungun ában ubouju.

27 Bián dimáasu wáu luágu waweíyasun, lubáranarugüñadiwa Ádria, labánreinja mémeñadiwa garábali, ligía, amídi áriebu, ába jasándirun mádulungu luágu achülüreina wáña lan luágungun múa.

28 Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguouún mémeraü, gádürü-wein-díisi ugúdi.

29 Léti janúfude luei jabúguchun luágu dübü, ába jágurun gádürü oúnguru tiyúnagiñe ugúnein, ába jagúrabajan larúgadun láu idíjeri.

30 Sunti dan le, añája mádulungu asáminara lun jeséfuragun jóungua láu jeíbaagun tídaangiñe ugúnein, ába jagúmeserun aráriragüdoún salúfu dúnarugun, jadüga camá jágura oúnguru tígiriñe ugúnein.

31 Ába lawíсарuni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

32 Ábati jíbununi súdaara tugúrudun salúfu, ába jígiragüdünun dúnarugun.

33 Lubá larúgan, ába laríñagun Páblo joun súngubei lun jeígin, laríñaga joun.

—Bián dimáasu guetó lueigiñe marúmugun jumá buídu, meígin sarágu, ladüga idíjeri le juágubei.

³⁴ Ayúmuruaguatina jun lun jeígin, líchuguba érei jun lun jeséfurun. Choúru numúti jun luágu úabei lan ni ában eféridiruti libágarí.

³⁵ Lárigiñe laríñaguni Páblo cátei le, ába lanügün ában fein lújaburugu, ába líchugun eteíngiruni lun Búngiu jagíbugiñe súngubei. Ábati lagúbachagunun, ába leígin.

³⁶ Ába járügüdün ja jíbiri gurásu, ába gíñe jeígin.

³⁷ Bián-sáñadiwa úrúwa-wein-díisi-sísi gürígia tídan ugúnein.

³⁸ Dánti le jóujúaña quimúle, ába jáguruni túrígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ñí jabei mádulungu joun, ába jaríjin ában beídi gebéyaariti, ába jóúchun lun janügünun ugúnein ñíjin.

⁴⁰ Ába jíbuniguni lagürüga oúnguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweínragüdüni lúgubu bíra, ába tagúmeserun ugúnein ayárafajoúa lun láru béya.

⁴¹ Ába tídin lídoun ában fulásu le ñí lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun aboucháguia tiyúnagiñe, le lére lugúdi barána.

⁴² Ába yebe jabúseerun súdeara jáfaraguniña adaürütiña jilágubei lueí janúrajan áfuljeina.

⁴³ Anjein le gumándan, quei busén lubei leséfurun Páblo, mígirunti lun jadügüni súdeara le jarítagubei. Ábati laríñagun lun lan jachúbaragun ja gáfulijadibaña baránajoun furúmiñe lun jachülürün múarugun,

⁴⁴ jáme jíbiri, jóúdinme ligíbuagu buri fuláansu lúma buri tífe ugúnein. Ítara líña jachülürün súngubei múarugun séfuñu.

28

Páblo luágu ubouju le gíribei Málta

¹ Dan le séfujadiwa sun wagía láru béya, ligía wasúbudiruni luágu Málta lan líribei ubouju ligía.

² Buiti jóuseruniwa gürígia ja aganoúbaña ñi, ába jáfuragun ában oúnwenbun wátu quei dilíga lubei áni náján júya ájuya, ába jamísurajaniwa sun wagía lun wabácharagun.

³ Ábati labúdajan Páblo wátu mábeiti, líchuguñein yebe wáturugun, ligía táfuridun ában jéwe tanúrājaña lueí lára wátu, ába tárügüdün luágu lújabu, ába tágürüni.

⁴ Dan le jaríjinbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügüri gáfarajati wügüri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúseredunti ni cáta lun.

⁶ Agúrabiñá yebe súngubei láludun lújabu, o láburuan lan ouwe. Lílúwagu jagúrabajan, dan le jaríjinbei luágu masúseredun lan ni cáta lun, ába lasáansirun jarítagun, ába jagúmeserun aríñaga luágu ában lan búngiu Páblo.

⁷Yaráfa lun fulásu ligía, ñíñein lufúlasun ában wügüri le weírigutimaabei lídan sun uboúju ligía, Públio lírabei, resíbi lumútiwa lúbiñe, seríwi láwa buídu luágu úrúwa wéyu.

⁸Roun líñáti lúguchi Públio láu sándi, abíruaü, lúma denési. Ába lídin Páblo aríjei, lásun layúmuragun lun Búngiu luágu, ába líchuguni lújabu luágu, ába lareídagun.

⁹Lárigiñe lira, ába gíñe jayábingua jíbiri sánditiña ja lídaanbaña fulásu ligía, ába jareídagun.

¹⁰Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachülürün dan lúnya wádinagun lun wasígiruni waweíyasun, ába jichuguni sun le wemegeirubei woun lun waweíyasun.

Lachülürün Páblo ubúrugun Róma

¹¹Lárigiñe úrúwa játi wáu luágu uboúju ligía, ába wádinagun tídoun ában ugúnein to eréderuboun ásügürei luríbouga ñi luágu uboúju ligía. Alejandríana ugúnein tugúya, ñíñanu jayáwa bián sándu luágu tigíbu ugúnein tugúya, Cástor lúma Pólux.

¹²Ába wachülürün ubúругu Siracúsa, ába weréderun úrúwa wéyu ñi,

¹³ñígiñe wasígira láru láru darí wachülürün ubúругu Régio. Larúgan, ába láfujan suédi, luágu libíaman wéyu ába wachülürün lídoun liraúraü aüdü le gírabei Puteóli.

¹⁴Ñi wadárira átiri affñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúrugun Róma.

¹⁵Agáambaña affñetiña ja Rómabaña wawágu luágu awánte lan, ába jóudin wabároun, jíbiri chülü lúmoun fulásu le gírabei Fóro, le luágubei úma giriti Ápio, jíbiri, dúnguatiña wáma lídan fulásu le gírabei Úrúwa Jában Chülüdügütiña. Dan le laríjinbaliña Páblo, ába líchugun eteíngiruni lun Búngiu, ába lárügüdün gurásu.

¹⁶Dan le wachülürünbei Róma, ába ledéregeruniña gumándan adaürütiña lun jábuti oúnigirutiña, ánjeinti Páblo, ígira lumúti lun leréderun lábuga láu ában súdaara oúnigirei.

Lapúrichijan Páblo Róma

¹⁷Úrúwa wéyu lárigiñe lachülürün Páblo, ába loúnajan jawágu juríu weírigutiña ja Rómabaña, dan le adamuriguana, ába laríñagun joun.

—Nidújeñu, láu sun madügün nan ni cáta wuríbati joun juríu, ni lun le uágubei jéchuda binádu wagübürigu, derégawatina dáúwañu joun Rómata ubúругu Jerusalén.

¹⁸Lárigiñe jálügüdagúnina, álugatiñá yebe jígiragüdünina ladüga madári jamá nidúnrun le lúnti náfarúniwa jílágubei lueígiñe,

¹⁹májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásíñun nun.

²⁰Ligía lubeíti lébubei noúnajan juágu lun naríjinün lúma lun nadímurejan jun, ladüga lueígiñe cátei le uágubei weménigida wagía Israelítagu anája lubeí gürágu láu güringüri le.

²¹Ábati jaríñagun lun.

—Wagía, merésibirúngidiwa ni ában gárada buágu Judéagiñe, uágili gíñe ni ában wapaísanu jádaangiñe ja núbinaña ñígiñe aríñaguti wuríbati woun buágu.

²² Buséntiwa jamúga wagáambuni ca lan barítagebei, ladüga subúdi wamúti luágu adímurejóua lan wuríba luágu iséri adámurini le, le lánina lémeri Jesúsú, lídan sun fulásu.

²³ Abati jíridun ában wéyu lun, ába jachülürün sarágu gürígia le ní lubei lagánawa Páblo. Ába ladímurejan joun lúmagiñe bináafin darí guñoun luágu larúeijan Búngiu. Louchun lun lafiñeragüdüniña luágu Jesúsú lan asálbaragülebei le jagúrabajabei láu layúsuruní lílúrudun Moisés lúma le jabürüjabei profétagu.

²⁴ Jíbiri, afiñetiña luágu le laríñagebei Páblo, jíbiri mafiñetiña.

²⁵ Queiti múradun jamá jámagua luágu jarítage, ába jagúmeserun ñüdüngua, ábati laríñage joun.

—Ligía laríñagebei Sífiri Sándu joun binádu wagübürigu lídaangiñe proféta Isaías.

²⁶ Beíba, bariñage joun gürígia ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dímuerei le jagáambubei.

Jaríjuba sarágu cátei, meféenbadün luágu,

²⁷ ladüga deréeru janígi gürígia ja, áni wuríbati jagáambun,

darú jamuti jágu, luei jaríjini laníchigu cátei le jaríjubei,

úati gíñe gunfaráanda jamáni cátei le jagáambubei,

derétu gíñe janígi,

máluajan jamútina lun nareídaguagüdünun jawáni.

²⁸ Subúdi jumei luágu oúnaja láali lan Búngiu ugánu luáguti Jesúsú le méme Wasálbaragülebei joun ja mámabaña juríu, áni jagía, jánjaruba lun.

²⁹ Dan le laríñagebei Páblo ítara, ába jóúdingua juríu, adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban ájayajóutu, resíbi lumútiña sun ja ñüdünbaña aríjei.

³¹ Apúrichijati luágu larúeijan Búngiu láu furáangu, arúfudaja ligía luágu Wabúreme Jesucristu, mebéresejanga ní ában lun.

LIGÁRADAN PÁBLO JOUN RÓMANA

Labürüjan Páblo joun títana liglísi to Rómaboun

¹ Anája áu, Páblo, nabürüjañoun gárada to jun, jugúya lánigu Búngiu ja aganoubaña ubúruгу Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse láalibeí jaba gürígia.

² Sabúdigüda lumúti Búngiu ugánu le lúmagiñé meja binárü jádaangiñe profétagu, bürüwati le jadímurejabei tídan Lerérun Búngiu.

³ Nübinti asálbaruni ligía woun lídaangiñe Wabúreme Jesucrístu. Gürígia ubouáguna Jesucrístu, Búngiu méme giñe. Queisi gürígia, jádaangiñeti meja lufámilian Urúei Davíd Jesucrístu,

⁴ arufudúati luágu Liraü lan Búngiu láu luweírín miláguru le ladügübei láu lásaaragüdüni Jesucrístu lídaangiñe ouweni.

⁵ Fuleisei lumútiwa Búngiu lídaangiñe Jesucrístu lun loúnajaniwa lídan líri lun wasúbudiragüdün joun gürígia luágu queisi Wasálbaragüle lídan sun fulásu, gayára lámuga jafiñerun luágu, adüga jameíme le lubeíbei.

⁶ Anjünjein jagánagua gürígia jagía, jugúya le únbei lagúara Búngiu lun lánigu jumá Jesucrístu.

⁷ Nabürüjaña lubeíti jun, jugúya le aganoubei ubúruгу Róma, ja jínsiñebaña lun Búngiu, wa ligía jun lun jabágaridun ában ibágarí derégeguañu júngua lun. Ibíja jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírín neteíngiruni Nubúngiute lídaangiñe Jesucrístu juágu, sun jugúya, lugúndun adímurejouáti luágu jafiñen luágu Jesucrístu lídan sun fulásu.

⁹ Áni Búngiu, le únbei nesériwida táu sun nanígi apúrichijeí ugánu luáguti Liraü, geféenti luágu luweírín nayúmuragun juágu súnwandan lídan nayúmuragun lun.

¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídín aríjaün, ánjein ligía lubeí lugúndaanbei.

¹¹ Lugúndun buséntina naríjinün lun níderagunün lídan jafiñen, lúntima derégüdagú jumá,

¹² lun giñe wíchugun gurásu wádaangua láu afiñeni le wawágubei.

¹³ Nidújeñu, buséntina jasúbudiruni luágu álugaadina lan nídín aríjaün sarágu weíyaasu, siñágili nídín. Álugaadina nídín lun níderagunün lídan jawáanserun lídan jeíbugun lúma Búngiu, queisi naríjini jawáanserun jíbiri afiñetiña lídan buri ámu fulásu.

¹⁴ Lúnti níderaguniña sun gürígia, dándu ja chülüguatiña queisi ja machúlaaguntiña, dándu chu táu queisi ibídiougua táu.

¹⁵ Lueígiñe lubeíti noubadina, buséntina giñe lun napúrichijani ugánu luáguti Wasálbaragüle jun, jugúya le aganoubei ubúruгу Róma.

Lubáfu ugánu lánina asálbaruni

16 Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja afíñebaña luágu, juríu furúmiñe, lárigiñe, ja mámabaña juríu.

17 Arúfuda lumúti ugánu ligía woun ída líña lan larícharaguagüdüniña Búngiu gürigia ligíbugiñe, lun gayáraabei lan lerésibiruniña queísi lánigu. luwúyeri igáburí ligía, láurügü lafiñerúniwa luágu, libijúa. Ítara líña tariñaguni Lerérun Búngiu. “Le gürigia le richáguabei ligíbugiñe Búngiu láu lafiñerun luágu, libíjubei íbágari magúmchaditi.”

Jadúnrun gürigia ligíbugiñe Búngiu

18 Aríja wamúti láburujan lanárime ligáñi Búngiu siélugiñe jawágun sun gürigia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban.

19 Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda láali joun,

20 le marijínbei luágu Búngiu, gayáraati lasúbudirúniwa láu buri cátei le ladügübei. Arijúali furáangu lúmagiñe lagúmeserun ubou luágu Búngiu lan ligía, luágu gíñe Súnti Gabáfu lan ligía lun súnwandan. Gadúnrunjaña lubeiti luágu jaríban,

21 lugúndun láu sun subúdi jamáni Búngiu ítara, míchugugiña inébesi lun queísi Búngiu, meteíngirun jameí. Queísi libídiouniga láu ligáburí jarítagn luágu Búngiu, féridi jamúti murúsun larúgounga luágu Búngiu lé meja jabíjibeí.

22 Láu sun aríñaga jamá luágu chu lan jáu, íbídiouguati jáu,

23 lubáragiñe jájuduragun lun Búngiu le weírigubei, le mouwedadibeí, jájuduragarúga joun jayáwa gürigia ja gouwedaditiña, lúma gíñe joun jayáwa dunúru, jéwe jáma anímaalu ja gádürúgua tugúdi.

24 Ligía ígira láaña lubeí Búngiu láu luríban ayúmajani le gádaanbaliña, darí lún buri jadügün cátei buri nibúsigarídünati jámagua.

25 Ítara líña ligáburí jabágaridun lugúndun mafiñerun jamá luágu inárüni luáguti Búngiu, jafiñera luágu iyéeni, jájuduragua láu inébesi lún buri cátei le ladügübei Búngiu lubáragiñe jamúga jájuduragun lun Búngiu, le gadúnabei inébesi súnwandan. Ítaralá.

26 Ligía ígira láaña lubeí Búngiu lun jadáagun cátei nibúsigarídünati, ásta wúriña adáagutiña cátei jáma wúriña jáledi lubáragiñe jamúga jagámaridun wügüri queísi lubúdubu.

27 Ítara méme gíñe ígira jamáali wügüriña jayúsurun wúriña lun jayúsuragun jóungua. Adáagutiña wügüriña cátei buri nibúsigarídünati jámagua, ábati jasúfuriruni lafáyeiruaja jawíye jawouúga.

28 Queísiti mabúseerúnjaña lan jíchuguni lilúgaarun Búngiu lun, ígira láañati láu lagübüri jasáminan, lun jadügüni le mouñ lubei jadügüni.

29 Buin jáña láu sun luwúyeri maríchaü, salúfuri, wuríbani, meménijabuni, iyéreejabuni, gimúgaü, áfarajadi, lanígiwa wuríbu, ayéeraguní, íbíbuni, marásualugu.

30 Adímurejatiña wuríba jawágu jíbiri gürigia, iyéreeguti Búngiu joun, minébenejabutiña, barúguatiña jóungua, pántatiña. Gachúgütiña lun jaságarun iséri buri cátei wuríbatí, mabájüdüni jamútiña jagübürigu,

31 íbídiouguati jáu, magúnfulirun jamúti jerérun, mínsiñejabutiña ní ca un, úati ferúduna jamá, magúdemejabutiña.

³² Subúdi jamúti le laríñagubei Búngiu buídu buídu, subúdi jamúti luágu ja lan adügüti buri cátei le, lúnti lan jounwen lueígiñe. Láu sun líra, adüga méme jamúti, dari lun gúnda jamá dan l jasáminan, lun jadügüni lee jaríjin ámu güriá adügei.

2

Agúseragüdüti Búngiu láu inárüni

¹ Ligía gadúnrun lubei le adímurejabei luágu le ladügübei ámu, cáteiñein lan, lugúndun dan le ladímurejan luágu wuríbani le ladügübei ámu, líchuguña guánarügü dúru luóguá, lugúndun líbe méme giñe cátei wuríbati ligía ladügübei.

² Subúdi wamúti luágu láu lan inárüni lagúseragüda Búngiu dan le lasiadiruniña ja adügübalin buri cátei l jasáminan, lun jadügüni lee.

³ Bugúyati le adímurejabei jawágu ja adügübalin buri cátei wuríbati le, áni ligía méme giñe badügübei, çjarítaguatibu funági luágu beséfuruba lan luei ligáñi Búngiu?

⁴ ¿Ódi mebésentibu láu lareíni Búngiu le magúmuchadibei lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburu, máma lun basígirun afígounja?

⁵ Derétu banígi, májatibu basáansiruni bigáburu. Ligía abúnja lubei agánwoundagüda lafáyeija bífígoun lubáme luwéyuri lagúseragüdüti Búngiu dánme liábin lun líchuguni lisíadin le richábei,

⁶ dánme le lafáyeiruni cáda ában según le ladügübei.

⁷ Líchuguba ibágari magúmuchaditi joun ja áluajabalin uweiríguni, inébesi, lúma cátei lé buri magúmuchaditi yágüta siélu láu jadügüni le buídubei súnwandan ya ubóuágu.

⁸ Ánjaña sun güriá ja magáambadibaña lun Búngiu, ja májabaña lun jafálaruni linárün Búngiu, jafálarei wuríbani, lafáyeirubaña Búngiu láu sun ligáñi.

⁹ Níjeinbei asúfuriruni lúma igárigu joun sun ja adügübalin le wuríbabei, joun juríu furúmiñe, lúma giñe joun ja mámabaña juríu.

¹⁰ Ánjeinti joun sun ja adügübalin le buídubei, líchuguba Búngiu uweiríguni, inébesi, lúma darángilaü, juríu furúmiñe, lúma giñe joun ja mámabaña juríu.

¹¹ Lugúndun ában lan lanügüniña Búngiu sun güriá.

¹² Sun ja afígounjabaña masúbudirunga jamei lilúrudun Búngiu le ledéregerubei joun güriá lídaangiñe Moisés, jagúserawagüdüba bougudin luei lúrudu ligía, tídiba jawáni máfiougatin. Játi afígounjabaña láu sun subúdi jamáni lilúrudun Búngiu, jagúserawagüdüba láu lúrudu ligía, tídiba giñe jawáni máfiougatin.

¹³ Lugúndun máma ja agáambarügübalin lúrudu richáguabaña ligíbugiñe Búngiu, anáti ja agúnfulirubalin.

¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadügüni le lubei Búngiu láurügü laríñagun jarítagu guánarügü joun luágu le buídubei lúma le wuríbabei.

¹⁵ Láu jagáburu, arúfuda jamúti luágu níjein lan lilúrudun Búngiu bürüñu tídan janígi, arúfuda tumúti janígi líra, áni laríñagubei jarítagu joun ánjein gadúnrun jabei lúmoun madúnrun jamá.

¹⁶ Luágume wéyu le lagúseragüdüniña Búngiu sun güriá lídaangiñe Jesu-crístu, larítaguaba luágu sún buri cátei le, ladüga lagúseragüdübei giñe ásta cátei

lé buri arámudagúabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárúni Bubúngiutebei.

¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei.

¹⁹ Jarítaguatibu búngua luágu gayára lan badúndejan maríjintiña lídoun úma buíti lúma luágu gayára lan bichugun larúgounga joun ja eibugubaña lídan lubúriga.

²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni úma joun ja isérigiñabaña lídan jafiñen, queisi baritagun luágu íbija báani sun subúdi lúma inárúni lídan lilúrudun Moisés.

²¹ Wel, ánjein lubeíti arúfudaja bubei joun ámu, ¿cági uágu marúfudajan bubei bun guánarügü? Ánjein apúrichija bubei luágu lúnti lan míwerujoún lan, ¿cági uágu bíweruja?

²² Ánjein aríñaga bubei luágu moún lumuti lan jagámaridúniwa jámari gürígia maríetiña, ¿cámegi badúgei? Ánjein iyéreegu lubei cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísin jalígilisin?

²³ Pántatibu láu lilúrudun Búngiu, ába bíchugun minébesei lun Búngiu láu magúnfulirun báani.

²⁴ Tinárün Lerérun Búngiu dan le taríñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adúga jumáti jugúya juríu igáburu le circuncisión le meja liseíni lídaradun Búngiu jáma lánigu. Buíti igáburu ligia ánjaün agúnfulira lúma líbiri lilúrudun Búngiu le meja líchugubei joun lánigu lídaangiñe Moisés. Ánjein magúnfulirun jumá, manügünti circuncisión ni cáta jun, queígubeirügü madügúniwa lan.

²⁶ Gürígia ja mámabaña juríu, ánjein jadúga buri cátei le lubeíbei lilúrudun Búngiu, janügúba queisi lánigu Búngiu láu sun merésibirun jamáni circuncisión.

²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalibei circuncisión, ja magúnfulirunbalin Lerérun Búngiu, láu sun jun lan labürüdúwa.

²⁸ Le juríubei le tímatisaati, máma bougudigiñerügü libíti juríu lan, máma giñe láurügü wadügün cátei le bouguditi wabíti lánigu wamá Búngiu.

²⁹ Láu wafálaruni Búngiu táu sun wanígi, lánigu wagía le tímatisaati, wáfaaguba táu sun wanígi lun wadügüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligia buídubei ligíbugiñe Búngiu íbini jarítagun gürígia luágu mabuídun lan.

3

¹ Queisi ítara líña lubei, ¿jalíañeinti jagáñiragüle gürígia lueigiñe juríu jamá? ¿o cági lubuídúña lerésibirúniwa circuncisión?

² Sarágu, áni gíbeti giñe lébuna. Furúmiñeti cátei, rúlumuti Búngiu lerérun joun juríu.

³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérun ladúga líra?

⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia ubouágu. Tariñajare Lerérun Búngiu. Babájüdüba queísi richáti lídan le baríñagubei, áni buídubei báfuridun dánme le bagúserawagüdü.

⁵ Ábanya álügüdajani. ánjein seríwi lubei luríban wagáburi lun larúfuduni luágu richágu lan Búngiu, ¿cábagi waríñaga? ¿Maríchatí funági Búngiu lugúndun larúfuduni ligáñi luágu luríban wagáburi? (Nadíjurejañatia queísi gürígia.)

⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragüdüniña gürígia?

⁷ Ánjein giñe seríwi lubei wayéeni lun weírigutimá lan linárün Búngiu, ¿cáti uágu lariñawagúa wawágu luágu gafígoun wamá?

⁸ ¿Lúnti lubei jamúga ladügün wuríbani lun larijóuniwa le buídubei? Níján cátei le jaríñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasiádirúniwa.

Sun wagía gadúnruntiwa ligíbugiñe Búngiu

⁹ ¿Ída líñági? ¿Buítimaatiwa wagía juríu sügü jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu lábugiñeñanu lubáfu figóu.

¹⁰ Tariñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,

¹¹ úati ni ában ánjaruti lun gunfaráanda lan,

úati ni ában áluajati Búngiu.

¹² Yuríguaaña súngubei, ñüdünjaña lídoun féridi.

Úati ni ában adügüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagübüri dimúrei le mínsiñeguti queísi limínsiñegun líjeme umúajaü júnren lárigiñe líchugúniwa jiláali ñíjin.

Yúsu jamúti jayúma lun jagádeirun jíri gürígia furése queísi láfarajan lupeísini jéwe.

¹⁴ Anábajani rügüñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barüti jagáburi gürínguaü lúma igárigu,

¹⁷ áni ibídiñeti úma lánina darángilaü joun.

¹⁸ Marítagungubeítiña luágu lanúfudewa lueí Búngiu.

¹⁹ Subúdi wamúti luágu sun lan le lariñagubei binádu lílúrudun Búngiu, joun lan ja lábugiñebaña lúru luágu ligía lariñagei, lun jasúbudiruni gürígia jagía luágu gafígoun jamá. Ítara líña lubeíti, gadúnrun jamá sun gürígia ligíbugiñe Búngiu, dándu juríu queísi ja mámabaña juríu.

²⁰ Lugúndun úabei ni ában eréderuti richágu ligíbugiñe Búngiu lueígiñerügü ladügüni le lubeíbei lúru, lúnrügü lasúbudiragüdüni lúru woun luágu gafígoun wamá lesériwida.

Lídaangiñe afíñeni líabin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe bougudin lueí lúru lé meja líchugubei

lídaangiñe Moisés. Gayáraati wasúbudiruni líra láu walíjanun lilíburuna to meme lilúrudun Moisés, túma jalíburun profétagu.

²² Láu waffínerun luágu Cristu, gayára lan weréderun richáguañu ligíbugiñe Búngiu, áni ában lan ladügüni Búngiu líra joun sun gürígia,

²³ lugúndun affígounjaaña sun gürígia áni siñáti lagúndaarun Búngiu jáu.

²⁴ Láu lareíni Búngiu, resíbi lumútiña sun gürígia queísi lánigu, mafáyeijaanga jagía lágu, lugúndun fáyejali Cristu luágu wafígoun lun gayáraabei lan weréderun richáguañu ligíbugiñe Búngiu.

²⁵ Adügati Búngiu lun lébunabei lan ferúndun Cristu láu louñwen luágu wafígoun, áni lídaangiñe waffínerun luágu queísi Wasálbaragüle liábin ferúndun woun. Láu louñwen Cristu queísi afáyeiragüle luágu figou, ába larúfuduni Búngiu luágu úragua lan áni iyéreeguti figou lun. Ába lachíbuni líta Cristu jafígoun gürígia já meja aganoúbaña lídan dan le sügüjalíbei, le uágubei mafáyeijagúdüñ lóañabaña lan,

²⁶ chibá lumuti gíñe jafígoun ja aganoúbaña lídan buri dan le, lun larúfuduni luágu úragua lan, áni sun ja affíñebaña luágu Jesucristu queísi Jasálbaragüle barü lumútiña queísi úraguatiña.

²⁷ Queísiti ítara líña lubei, ¿cáti asúseredubei lun japántan gürígia luágu lubuídun jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuídun wagúnfulirun luma binádu lilúrudun Búngiu, gayáraati jamúga wanáangun woúngua, queísi sálbañu wáña lubei láurügü waffínerun luágu Cristu, gumúgua lébuna wanáangun woúngua.

²⁸ Subúdi wamáali lubeíti buídu luágu resíbi láani Búngiu gürígia le affíñeti luágu Cristu queísi gürígia richáguati, mebéresegúnga ánjein gúnfulijali lubei luma lilúrudun Moisés lúmoun magúnfulirungili lan.

²⁹ ¿Juríu rügüñanu funági Gabúngiutei Búngiu? ¿Ma funági gíñe Jabúngiute ja mambabaña juríu? Jabúngiute gíñe,

³⁰ lugúndun ában rügüñein Búngiu, le erésibirubaliña sun gürígia ja affíñebaña luágu Jesucristu queísi Jasálbaragüle, mebéresenga ligía ánjein resíbi jabálin circuncisión lúmoun merésibirun jamáni.

³¹ ¿Wayúsuruñein lubeíti affíñeni luágu Cristu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúru luágu ligía.

4

Jémpulu luáguti Abrahám

¹ ¿Cábati waríñaga luágu Abrahám, le binádu wáguchi, wagía juríu?

² Lun jamúga lueígiñe lan ladügün cátei buíti lerésibirei Búngiu queísi ában gürígia richáguati, gébunati jamúga lapántajan, máma ligíbugiñe Búngiu.

³ Tariñajare Lerérun Búngiu. “Affíñeti meja Abrahám luágu Búngiu, luágu laffíñen lerésibirei queísi wügüri richáguati.”

⁴ Dan le ladügün gürígia ában wadágimanu, fáyeiti le libíjubei lebégi luwádigimari, máma edéweejani.

⁵ Ánjeinti gürígia le asálbaruti lídaangiñe lifígoun láurügü laffínerun luágu Búngiu le erésibirubaliña gafígountiña, lerésibirubei Búngiu queísi ában gürígia richáguati luágu laffíñen, anáti líra, edéweejani.

⁶ Davíd guánarügü adímurejati luágu jagúndan gürígia ja lerésibirubaña Búngiu queísi richáguatiña luágurügü jaffíñen, mebéresenga ligía ca lán meja jadügübei.

⁷ Laríñajare Davíd.

Gúndaatiña gürígia ja ferúduna lubáña Búngiu jaríban, áni chibáwa ligía jafígoun.

⁸ Gúndaati gürígia le lanúgubei Búngiu queisi gürígia mafígounjaangili.

⁹ ¿Joúnti rügüñein funásan ja erésibirubalin circuncisión, ódi joúnti giñe ja merésibirubalin? Joúnti sun jawúyeri gürígia ugúndani ligía. Aríñagaadiwa luágu resíbi láani Búngiu Abrahám queisi wügüri richáguati, luágu lafiñen.

¹⁰ ¿Ída bugági lerésibirei, lárigiñe lerésibiruni circuncisión ligía ódi lubáragiñe? Mára lárigiñe, lubáragiñe.

¹¹ Lárigiñe larúfuduni Abrahám lafiñen luágu Búngiu, ligía lerésibiruni circuncisión queisi seini luágu resíbi láali lan Búngiu queisi wügüri richáguati ladüga lafiñen luágu. Ítara líña giñe liábin Abrahám lun jáguchibeí lan sun ja afiñebaña luágu Búngiu merésibirunga circuncisión, áni resíbi lumútiña giñe Búngiu itara queisi richáguatiña.

¹² Jáguchi giñe ja resíbi jamáalibeí circuncisión Abrahám, ja afiñebaña luágu Búngiu queisi lafiñerun Abrahám lúmagiñe lubáragiñe meja lerésibiruni circuncisión.

Gúnfuliti Búngiu láu lerérun

¹³ Aríñagati meja Búngiu lun Abrahám luágu líchugubei lan ubou lun jáu sun linébaanfaangu queisi jalágaante, máma ladüga lagúnfuliruni Abrahám lilúrudun Búngiu líchugúa dimúrei le lun, ladüga lafiñerun luágu Búngiu, ába lerésibiruni Búngiu queisi ában wügüri richáguati.

¹⁴ Lun jamúga já rügüñanu lan íchugubalin jeménigi luágu jagúnfulirun luma lilúrudun Búngiu erésibira alágan, málati lubeíti jamúga jafiñerun ja eménigidubaña luágu jafiñen luágu Búngiu lun jerésibiruni. Málati jamúga giñe dimúrei le líchugubei Búngiu luágu alágan lugúndun lídan linárün cátei, mabáfutiña gürígia lun jagúnfulirun luma lilúrudun,

¹⁵ barürügü lumúti lilúrudun Búngiu ligáni jawágun gürígia luágu magúnfulirun jamáni. Ánjein le ní lumuti úa lan lúrudu, úati giñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti afiñeni. Mámarügü joúnti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, joúnti giñe sun ja mámabaña juríu áni máma giñe lábugiñeñanu lúrudu ligía, ába jafiñerun luágu Búngiu queisi lafiñerun Abrahám luágu.

¹⁷ Ligíbugiñe Búngiu, ñübinti lubeíti Abrahám lun wáguchibeí lan sun wagía le afiñebeí luágu Búngiu, queisi taríñagun Lerérun Búngiu. “Adüga náadibu lun jáguchi ban sarágu mútu.” Gabáfuti Búngiu lun ladügüni líra queisi gabáfu lan lun líchugun íbágarí joun jiláaña, níjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaü lan ladüga weíyaali lan, weíya tugúya Sára, afiñeti dán meja le laríñagubei Búngiu lun luágu itara lúba lan jibe ladügawagun queisi warúguma. Ába lasúseredun itara lun jáguchibeí lan sarágu mútu.

¹⁹ Meféridirun lumúti lafiñen luágu dimúrei le laríñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru giñe Sára lun tagáraüdün.

²⁰ Malouguadunti lafiñen luágu dimúrei le laríñagubei Búngiu lun, weiritimáarügüti lafiñen.

²¹ Rúti uweírighuni lun Búngiu láu ában ichoúruni le tímatimaati luágu gabáfu lan Búngiu lun ladügüni sun le uágubei laríñaga.

²² Ligía lerésibirunbalin Búngiu queísi wügüri richáguati, luágu lafiñen.

²³ Cátei le, luáguti lerésibiruniña Búngiu gürígia luágu jafiñen, mámarügü luágu Abrahám labürüjoá,

²⁴ labürüjoúña giñe wawágu. Lugúndun luágu wafiñen, resíbi lumútiwa giñe Búngiu queísi richáguatiña, wagía le afiñebeí luágu le ásaaragüdúbalin Wabúreme Jesúsu lidaangiñe oúweni.

²⁵ Jesúsu le edeđergerúabei lun loúnwen luágu wafígoun, ába lásaarun lidaangiñe oúweni lun larúfuduniwa richáguañu ligíbugiñe Búngiu.

5

Niján lébubei weréderun madúnrunga

¹ Queísiti resíbi láadiwa lubeí Búngiu láu wafiñerun luágu, lídaanjadiwa dan lúma, lídaangiñe Wabúreme Jesucrístu.

² Ladüga Crístu, biníwadiwa lubeí láu wafiñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírighun Búngiu.

³ Áni máma rügüñein líra, gúndaatiwa giñe lídan wasúfurirun ya uboúagu, lugúndun subúdi wamúti luágu ru lan asúfuriruni gurásu woun,

⁴ buídugüda lumúti gurásu wagáburi, áni láu líra, gayára lan weménigidun lun gafáanranbadiwa lan lídan luweírighun Búngiu yágüta siélu.

⁵ Áni máburujanbei warúna lurúma eménigini le, ladügübei Búngiu le aríñaga láalibeí woun ladüga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífiri Sándu le rúlaalíbeí woun.

⁶ Ladüga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figoú le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gafígounbei.

⁷ Máma cátei ménreengunti lun loúnwen ában gürígia jawágu ámu gürígia, ní íbini lueigiñe ában gürígia le buídubei, láu sun níjein lan gürígia gayáraati jamúga loúnwen lueigiñe ában gürígia le buíti le tímatimaati.

⁸ Ánjein Búngiu, ába larúfuduni luweírín línsiñejabu woun láu loúnajani Jesucrístu le Liraü lun loúnwen wawágu, láu sún meja gaffigoungidiwa lan.

⁹ Guetóti, láu resíbi láadiwa lan queísi gürígia richáguatiña láu loúnwen Crístu wawágu, choúrutimaati luágu weséfuruba lan lueí ligáñi Búngiu le lúnbei láburujan jawágun gaffigountiña lídaanme luwéyuri agúseruni.

¹⁰ Lugúndun ánjein ru lubáliwa Búngiu lídan dan lúmagua láu loúnwen Liraü dán meja le láganigídiwa, choúrutimaati luágu lasálbarubadiwa lan le gumúti, luágu Liraü le wínwafubei lúma, siélu.

¹¹ Áni máma rügüñein cátei le, gúndaatiwa giñe lúma Búngiu lídoun buri dan le, lídaangiñe Wabúreme Jesucrístu, le ídaangiñebeí lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wügüri le gíríbeí Adán lebélera figoú uboúagun, ába lanügüni figoú oúweni lúmagua queísi lafáyeija, ítara líña giñe jóuweguba lubeí sun gürígia lugúndun afigounjatiña súnubei.

¹³ Lubáragiñé meja líchuguni Búngiu lilúrudun joun gürígia lídaangiñé Moisés, añájeinjaña méja gürígia afígounjaña ubouágu, láu sun úagili lan lúrudu ligía lun gayáraabei lan jadúraaguni.

¹⁴ Láu sun líra, lúmagiñé meja lidáani Abrahám darí lúmoun lidáani Moisés, jilátiña gürígia luágu jafígoun láu sun máma lan ladüga magáambadi jamá jafígounbei queísi ladügüni Adán le magáambadibeí lun lerérun Búngiu lun. Lueígiñé ában oubaú, Adán liyáwa Crístu le lúnbei liábin, ladüga bíangubei jagía barútiña som cátei joun gürígia.

¹⁵ ¡Ámuñegueinarügü giñé cátei le janügübei joun gürígia! Barúti Adán ouweni joun sun gürígia láu lafígounjan, ánjeinti Crístu, barúti asálbaruni joun sun gürígia, áni weíríti asálbaruni le líchugubei Búngiu láu lareíni woun lídaangiñé Crístu sügü láu lifígoun Adán.

¹⁶ Weíríti giñé le líchugubei asálbaruni sügü láu le líchugubei lifígoun Adán woun. Ladügarügü ában figou, chülüti ouweni joun sun gürígia, ánjeinti ladüga loúnwen Crístu wawágu, ferúdnawati sun wafígoun le gíbebei, resíbi lumútiwa Búngiu queísi gürígia richáguatiña.

¹⁷ Ánjein gabáfu lubeí ouweni jawágu sun gürígia ladüga lidúnrun ábanrügü wügüri—Adán, choúrútimaati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei íbágarí magúmuchaditi lúma Búngiu, jarúejíjaba úara lúma Crístu, ladüga ábanrügü wügüri ligía.

¹⁸ Ítara queísi líchuguniña Adán sun gürígia lábugiñé lisíadin Búngiu lun jounwen láu ladügüni le áubei magúndan lan, ítara líña giñé lagídaruniña Crístu gürígia lábugiñegiñé asíadiruni ligía, rúleí íbágarí magúmuchaditi joun láu ladügüni lugúndan Búngiu lun loúnwen jawágu.

¹⁹ Ladüga lubeíti lumágaambadi ábanrügü wügüri, ñübintiña sun gürígia lun jafígounjaba lan, ítara méme giñé, ladüga lagáambadi ábanrügü wügüri, gayáraati jayábin sun gürígia lun richágua jamá ligíbugiñé Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figoubei. Láu sun gíbe lan figou ubouágu, weírítimaabei lareíni Búngiu lun lachíbuni sun figou ligía.

²¹ Ítarati queísi gabáfu lán meja figou lun lanügüni ouweni, ítara giñé gabáfuti lareíni Búngiu lun ladügüniña gürígia richágua ligíbugiñé, lúma lun líchugun íbágarí magúmuchaditi joun lídaangiñé Wabúreme Jesucrístu.

6

Jiláñu wáña lun figou, wíñwañu lun weséridun lun Crístu

¹ ¿Cábatí wariñaga? ¿Wasígiruba afígounja lun laráfuduntima Búngiu lídaangiñé lareíni woun?

² ¡Máma lúba! Wagía, jiláadiwa lun figou, ¿ída lubáti gayára lan wasígirun afígounja?

³ ¿Íbídíñeti jun luágu láu lan lídan wamá ában lúma Crístu láu wabásterun, queísigubeirügü jamúga lídaañadiwa lan giñé ában lúma lídan loúnwen, lun mabáfujali lánme figou wawágu?

⁴ Láu wabásterun, queísigubeirügü jamúga bunáwa wamá úara lúma Crístu, áni reideitiwa jiláñu lun figou. Queígubeirügü sarágüda láani Wáguchi Búngiu Crístu lídaangiñé ouweni láu luweírín lubáfu, sarágüda láadiwa giñé lun isérijali lan wabágarí.

⁵ Lugúndun ánjein ñübin wabeí lun lídaanbadiwa lan ában lúma Crístu lídan ában ouweni líbe louñwen, ítara wába gíñe lídan lásaarun lídaangiñe ouweni.

⁶ Subúdi wamúti luágu dáwagua lan binádu meja wagáburí lúma Crístu luágu gurúwa lun lagünrinchawagún lubáfu figoú lé meja wawágubei, lun merédeediwa lan queísi idámuni esériwida lun figoú queísi wayúbudiri.

⁷ Lugúndun le jiláalibeí, furíjali lídaangiñe figoú.

⁸ Ánjein jiláadiwa lubeí lúma Crístu, gayáraati wafíñerun luágu wabágariduba lan gíñe lúma,

⁹ lugúndun subúdi wamúti luágu sará lan Crístu ában weíyaasu lídaangiñe ouweni, moúnwendügüyaali, mabáfujali ouweni luágu.

¹⁰ Dan le louñwenbei Crístu, ába lagúmuchaguagdüni lubáfu figoú lun sun dan, áni ibágari le labágaridubei guetó, lun méme lesériwidun lun Búngiu labágaridei.

¹¹ Jugúya gíñe, rúgua jumá júngua queísi jiláguaaña lun figoú, áni wínwañu lun jesériwidun lun Búngiu, lídan ában lúma Crístu Jesúsu le Wabúreme.

¹² Ligía, mígira jumá lubeí lun gabáfu méme lan figoú juágu, afósuraün lun jadügüni luríban jayúmajan.

¹³ Míchaagua jumá júngua lun figoú lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumeí júgubu lun Búngiu lun layúsuruni lun cátei buíti.

¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadügüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le líchugubei lun Moisés liábin wasálbarun, lídaangiñe werésibiruni lareíni Búngiu, ¿gayáraati lubeíti wabágaridun lídan figoú ladüga líra? ¡Siñáti!

¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati.

¹⁷ Teínqui níña lun Búngiu luágu láu sun lan lidámun jumá meja figoú, guetó jídiña láu ligáburí arúfudajani buíti le jagáambubei, táu sun janígi.

¹⁸ Mámaadün idámuni lun figoú, lidámunjadün Búngiu.

¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara queí meja lidámun jumá sun luwúyeri figoú, guetó lúnti jiábin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéreseguntün meja lun jabágaridun ában ibágari buíti ligíbugiñe Búngiu.

²¹ ¿Ca mejáti cátei buíti lanügübeí buri cátei ligía jun le áubei buri nibúsigari jumá guetó? Ni cáta buíti, féridi rügüñein lanüga jun.

²² Ánjeinti guetó, mámaadün lábugiñe lugúmadin figoú, lidámujadün Búngiu, barütiti cátei le arúmani tun janígi lúma ibágari magúmuchaditi jun.

²³ Lugúndun ouweni lafáyejabeí figoú, ánjeinti edéweejani le líchugubei Búngiu woun, ibágari le magúmuchaditi ladüga lídaañadiwa lan ában lúma Wabúreme Jesucrístu.

7

Ában jémpulu lídaangiñeti maríei

¹ Nidújeñu, jugúya le subúdíjabúbei lun lúrudu, subúdí jumáali luágu dán rügüñein lan wínwangili ában gürígia, ligía lábugiñeñein lan lúrudu.

² Quei jamúga, ában würi to marieitu, rulumutu lúrudu lábun lagúmadijan túmari sun dan le wínwangili lan, ánjein oúwe túmari, bougudijaru luei lúrudu le íchugubarun lábugiñe lagúmadijan túmari.

³ Ánjoun lubeíti agánawa lúma ámu wügüri sun wínwangili lan túmari, tadügüña figou le gíríbei adultériu, ánjein oúwe túmari, gidáaru lábugiñeñe lúrudu ligía, áni gayáraati tamárieidun lúma ámu wügüri, madügüntu adultériu.

⁴ Ítara giñe jugúya, nidújeñu, láu louñwen Crístu, furíjadün lábugiñeñe lagúmadijan lilúrudun Moisés queisi würi to jiláali túmari, ába tagámaridun ámu. Guetó, lánijadün Crístu, le saráalíbei lídaangiñe oúweni, lun gayáraabei lan jesériwidun lun Búngiu le gumúti.

⁵ Lubáragiñe meja werésibiruni Crístu, seríwiti meja lilúrudun Moisés lun lagáguni luríban ayúmajaní wádan, áni ligía cátei le anügübalíwa lídoun oúweni.

⁶ Ánjeinti guetó, jiláadiwa lun lúrudu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubei Sífiri Sándu woun, máma queisi idámuni lun binádu lilúrudun Búngiu le bürüwabei.

Igáburi lánina figou le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúrudu asúbudiragüdübalin figou nun. Ibídíñeti jamúga nun luágu figou lan lawámadirun jamégen ámu ánjein jamúga maríñagunti lúrudu. “Mawámadirabei jamégen ámu.”

⁸ Ladüga méme gumádi le, ába lagáguni igáburi lánina figou le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figou.

⁹ Níjein meja ában dan, lubáragiñe nasúbudiruni laníchigu lilúrudun Búngiu le tímátimaati, ába narítagn luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígon nan, luágu lídaañadina lan úma lun féridi.

¹⁰ Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeirujaja.

¹¹ Lugúndun lárügüdün igáburi lánina figou le nídaanbei lueígiñe lúrudu ligía, ába leyéeraginina lun nadügüni le wuríbabei, ába lanügünina lídoun féridi láu meme lúrudu ligía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti.

¹³ ¿Ligía funásan cátei buíti le anügübalina lídoun féridi? ¡Máma líña! Nifígon anügübalin neféridirun nun, áni ítara líña larúfuduni luágu figou lan, láu cátei le buídubei, le méme lúrudubei, lanügana igáburi lánina figou le nídaanbei lídoun féridi, áni ítara líña larúfuduni lilúrudun Búngiu luágu wuríba lan figou le tímátimaati.

¹⁴ Subúdí wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queisi wügüri garaüwarügüti, alúgurúañu níña queisi idámuni lun lubáfu figou.

15 Úati gunfaráanda náani ca lan susébebei nun, madügün numúti cátei buíti le nabúseerubei nadügün, nadügei cátei le iyéreegubei nun.

16 Ánjein le lubei mabúseerun nubei nadügün ligia nadüga, úraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barúnaani lúrudu quei cátei buíti.

17 Mámaadina lubeiti áu adügübalin cátei wuríbati le nadügübei, igáburi lánina figou le nídaanbei, ligia adügübalin.

18 Subúdi numúti luágu úa lan ni cáta buíti nídan boúgudin luei Búngiu, áu queisi wügüri garaúwarügüti. Buséntina jamúga nadügüni le buídubei, siñáti nadügüni.

19 Madügün numúti cátei buíti le nabúseerubei nadügün, nasígirarüga adügei wuríbati le mabúseerun nubei nadügün.

20 Ánjein lubeiti le lubei cátei le mabúseerun nubei nadügün ligia nadüga, lídan linárün cátei, máma áu le láni Búngiu adügübalin, igáburi lánina figou le nídaangilibe, ligia adügübalin.

21 Niján cátei le asúseredubei nun. dan le busén nan nadügüni le buídubei, wuríbati rügüñein nadárra nídan.

22 Lídan nisáminan, jínsiñeti lilúrudun Búngiu nun,

23 áni aríjatina luágu níjein lan cátei nídan, ageíndaguti lúma nisáminan, cátei ligia, igáburi lánina figou le nídaanbei, le gámabalina adaürüwañu.

24 ¡Fugiábu áu! ¿Cába eséfurana lídaangiñe igáburi lánina figou le nídaanbei, le anügübalina lídoun oúweni?

25 Búngiu gubeirügü, lídaangiñe Wabúreme Jesucrístu. ¡Teínqui níña lun Búngiu! Gunfaráanda numúti lubeiti luágu áu lan láu náni núngua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladüga igáburi lánina figou le nídaanbei, seríwirügütina lun figou queisi lídamun.

8

Wabágari lúma Sífiri Sándu

1 Guetó, gidáwaali jadúnrun güriquia ja lídaanbaña ában lúma Jesúsu.

2 Rúlaali Crístu láni Espíritu woun, áni Espíritu ligia, rúti iséri ibágari woun, furígüda láadiwa lábugiñegiñe lubáfu figou le anügübalíwa lídoun oúweni.

3 Mabáfuti meja lilúrudun Búngiu lun lagídaruníwa lábugiñegiñe lubáfu figou ladüga turíban wanígi, wagía güriquia garaúwarügütiña. Ába ladügüni Búngiu le lásiñerubei lilúrudun adüga láu loúnajani Liraü ubouágun queisi güriquia garaúwarügüti le giñe gayáraati laffígonjan (láu sun, mafígonjan lan). Ába loúnwen Liraü Búngiu, le Jesucrístubei, luágu wafígon, ába lagúmchaguagüdüni lubáfu figou wawágu láu loúnwen.

4 Ladügünbalin Búngiu líra, lun gayáraabei lan wadügüniwa güriquame richáguatiña queisi lagúmadíjan lilúrudun, güriquia ja mabágaridunjañabaña lídan luríban jagúndan, ja abágaridunñabaña guetó queisi lugúndan Sífiri Sándu.

5 Ja abágaridubaña queisi jagúndan queisi güriquia garaúwarügütiña, luágu rügüñein cátei le lánina ubou jarítaqua, ánjaña ja abágaridubaña queisi lugúndan Sífiri Sándu, luágu cátei le lánina siélu jarítaqua.

6 Dan le jabágaridun güriquia queisi jagúndan, marítanguna jagía luágu Búngiu, barü lumútiña lídoun oúweni, ánjeinti dan le jabágaridun queisi lugúndan Sífiri Sándu, barü lumútiña lídoun ibágari tímataaati lúma darángilau.

⁷ Ja arítagubaña luágu cátei le lánina uboú le, láganiñu Búngiu lugúndun mája jáña, áni siña ligía jíchaagun jóungua lábun lilúrudun.

⁸ Ligía, ja lubei abágaridubaña láu jagúndan queísi gürígia garaúwarügütiña, siñáti jadügüni lugúndan Búngiu.

⁹ Ánjeinti jugúya, mabágaridunjadün lídan jugúndan queísi gürígia garaúwarügütiña, jabágariduña lídan ában lúma láni Búngiu Espíritu, queísi aganoúa lubei jídan. Le úabei láni Crístu Espíritu lúma, máma lánigu Crístu.

¹⁰ Ánjein wíwan lubei láni Crístu Espíritu jídan, wíwanboun juwáni lun sun dan ladüga tarúfudúniwa richáguañu ligíbugiñe Búngiu, láu sun loúweba lan júgubu ladüga figoú le lídaanbei uboú le.

¹¹ Ánjein wíwan lubei láni Espíritu jídan, Búngiu méme le ásaaragüdúbalin Jesucrístu lídaangiñe oúweni, líchuguba íbágarí iséri lun júgubu le goúwedadíbei, lídaangiñe láni Espíritu le jídaanbei.

¹² Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaúwarügütiña.

¹³ Lugúndun ánjaün abágaridarügü queísi jugúndan, queísi gürígia garaúwarügütiña, jefédiruba, mídinbadün siélu, ánjein jáfara igáburi lánina figoú le jídaanbei jílagubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejabaña láni Búngiu Espíritu, lirájüñü Búngiu.

¹⁵ Sífiri Sándu le jerésibirubei, máma ában espíritu lánina idámuni lúnya lanúfudedagüdüñun lueí láburujan ligáñi Búngiu juágun, Espíritu le jerésibirubei, ligía le adügübalün lun lirájüñü jumá Búngiu. Ligía gayára lubei wagúaruni Búngiu Wáguchi.

¹⁶ Geféenti láni Búngiu Espíritu woun luágu lirájüñüjadíwa lan Búngiu.

¹⁷ Áni ladüga lirájüñü wamá Búngiu, garíchatiwa gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein súfuri wabei luágu Crístu ya uboúagu, gafánraanbadiwa lídan luweírigan yágüta siélu.

¹⁸ Jarítaguatina luágu ni cáta lan le wasúfurirubei ya uboúagu lúmoun uweírigan le lúnbei wabjini siélu.

¹⁹ Láuñein sarágu ayúmajani lúma eménigini sun uboú le ladügübei Búngiu, agúrabei dan le lúnbei jerésibiruni lirájüñü Búngiu jalágaante.

²⁰ Níjein mégeiti luágu sun uboú, máma jamúga ladüga labúseerun, ladüga ítara líña lan labúseeruni Búngiu,

²¹ láu sun líra, súnwandan níjein lan eménigini luágu leséfuruba lan uboú lídaangiñe asúfuriruni lúma agádeiruni le gádaanbalin lun gafánraanbei lan lídan jaweírigan lirájüñü Búngiu.

²² Subúdi wamúti luágu chülú lan lúmoun dan le, sun uboú le ladügübei Búngiu ayájuaati láu igárigu camá ában würi to agáridutu.

²³ Áni máma rügüñein uboú asúfurira, súfuritiwa gíñe, wagía afíñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítiwa ában oúnwenbin igári, áni agúraba wamúti dan le lúnbei wayábin lun lirájüñüjadíwa lánme Búngiu le tímatimaati, dánme le liséridun wágubu.

²⁴ Ligía lágüda ja wasálbarun. Merésibirun wamágili sun ubuíduni le lúnbei wabjini queísi lirájüñü Búngiu, agúrabajatiwa werésibiruni yágüta siélu. Ánjein

jamúga íbja wamáaliti sun le lúnbei wabjini queisi lirájüñü, mébunaali jamúga wagúrabajan. Magúrabajaantiña gürigia jerésibiruni cátei le íbja jamáalibei.

²⁵ Queíti merésibirun wamágili lubei sun le lúnbei wabjini queisi lirájüñü Búngiu, lúnti wagúrabuni láu gurásu.

²⁶ Ítara méme giñe, íderagua lumútiwa Sífiri Sándu lídan wadébilin. Queísigubeirügü njein dan, siñáti wayúmuragun lun Búngiu queisi lubúdubu. Lídan óra ligia, ába líderaguniwa Sífiri Sándu lun waríñaguni luweírin cátei le wasándirubei tídan wanígi lun Búngiu lídan ában luwúyeri le siñáti lariñawagún láu ñimúrei.

²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu lariñagun wádaangiñe, ába loúnabuniwa Búngiu lugúndun ayúmuruaguati Espiritu queisi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanügün buíti woun, wagía le jínsiñejabúbei lun, wagía le wájali lan lun lánigu wamá queisi laritaguni.

²⁹ Lugúndun ja lasúbudirubaña Búngiu lúmagiñe lubáragiñe ladügüni ubou luágu lánigubaña lan, fánrein lumútiña lun itara jamá queisi Liraü, lun Liraü lan íbugañaü joun sun ja lanúadirubaña lun lirájüñü jamá.

³⁰ Játi lanúadirubaña lúmagiñe binárü, wáti giñe joun, resíbi lumútiña giñe lúmagua queisi gürigia richáguatiña, áni ja lerésibirubaña, rúti giñe ufánrani joun lídan luweírigun queisi lirájüñü.

³¹ ¿Cábati waríñaga luágu buri cátei le? Queisi lueígiñeñein lubei wafúleisein Búngiu, ¿cábati jabáfu wáganiñu wawágu?

³² Mamájaanti Búngiu lun líchuguni Liraü guánarügü lun loúnwen luágu wafúleisein, lubáragiñe líra, ába ledéregeruni lun loúnwen waweígiñe, sun wagía, ¿ida lubáti míchugun láani sun líbiri cátei woun queisi líchuguni Liraü woun?

³³ ¿Cági gayáraabei líchugun jadúnrun ja anúadaja láañabaña Búngiu queisi lánigu? Búngiu arúfudubaliña quei madúnruntiña.

³⁴ ¿Cáteiti gayáraabei lasíadiruniwa lun féridi? Crístu guánarügü ouwebei wawágu, ába lásaarun lídaangiñe ouweni, guetó njein ñun lueígiñe loúnwenren Búngiu Úguchili ayúmuruagua wawágu.

³⁵ ¿Cábati gayára lagídaruniwa lueí línsiñejabu Crístu? ¿Liyáraabadiwa funági asúfuriruni, o lénreengúnga, o eíbaajoúni, o ilámaü, o manáanguni, o pelíguru, o ouweni? ¡Uá!

³⁶ Lariñajare tídan Lerérun Búngiu.

Yaráfatiwa lun woúnwen bueígiñe ságü wéyu,

ítara líña jóuseruniwa wáganiñu queisi mudún anügütiña lun jafarún.

³⁷ Lídan sun cátei le, íbja wamúti luweírin lubáfu Crístu, le jínsiñejabúbei woun, lun wagañeirun lídan sun lénreengúnga.

³⁸ Chóuru numúti lubeíti luágu úa lan ni cáta lun lagídaruniwa lueí línsiñejabu Búngiu—ni ouweni, ni íbágarí, ni ánjeligu, ni máfianu, ni cátei le guetóbei, ni le lúnbei liábin,

³⁹ ni le siélubei, ni le ubouágubei, ní buri ámu cátei le ladügübei Búngiu—siñáti lagídaruniwa lueí línsiñejabu le larúfudubei woun lídan Wabúreme Jesucrístu.

9

Anúadaja láaŋa Búngiu Israelítagu lun lánigu jamá

1 Inárüni le lúnbei nariñaguni guetó jawágu nirásan, áu queísi ában afiñeti luágu Crístu, áni meyéejantina, aríñaga tumúti nanígi nun to úaraguaboun lúma Sífiri Sándu luágu inárüni lan.

2 Weíriti nírun, áni súnwandan níjein lan gáriti tídan nanígi jawágu nirásan.

3 Buséntina jamúga lun gíñe lábugiñe nan líñaragun Búngiu, diseñu lueí Crístu, ánjein jamúga ítara lúba lubeí gayára lan jerésibiruni Jesucrístu queísi jasálbaragüle lun jasálbarun.

4 Linébaanfaangu Israél jagía, áni resíbi lumútiña Búngiu queísi lirájüñü. Reídeítí meja Búngiu jádan láu sun luweirigun áni rúlumuti gíñe darádu buri joun lúma lilúrudun lídaangiñe Moisés. Arúfudati igáburi joun lun jesériwidun lun, ligílisirugu, áni joun lariñaga luágu louñajaba lan ában Asálbaragülei.

5 Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadünamabei lun líñurúniwa líri lun sun dan. Ítaralá.

6 Mámata luágu jamúga reídei lan lerérun Búngiu joun ladügawagun Israél magúnfulirunga, ladúga máma sun Israelítagu lánigu Búngiu le tímatisaati.

7 Máma sun linébaanfaangu Abrahám lirájüñü Búngiu le tímatisaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.”

8 Arúfuda lumúti líra woun luágu úa lan ni ában liraü Búngiu luágurügü lirásan, ja rügüñanu lirájüñü ladúga jafiñerun luágu lerérun, jagía anügübaña queísi lirájüñü ja tímatisaatiña.

9 Lugúndun niján dimúrei le líchugubei Búngiu lun Abrahám. “Niábimba dánme le lachülürün dan ligía, ábame tagáraüdün Sára ában irájü.”

10 Áni máma rügüñein líra, niján ábanya jémpulu luágu lanúadajan Búngiu. Biángubei meja tirájüñü Rebéca ában jáguchi, le binádu wadúje Isáac,

11-13 áni dán meja le magúriajoungiña, madügüngiña gíñe ni cáta ni buíti ni wuríbatí, ába lariñagun Búngiu tun Rebéca. “Lumúsunbei amúleñein le íbugañäü.” Úaraguati gíñe líra lúma le aríñawagúbei tídan Lerérun Búngiu. “Jínsiñeti meja Jacób nun, ánjein Esaú, iyéreeguti nun.” Ítara líña gufrümawa lan lírícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebéresenga ligía ca lan jadügübei.

14 ¿Cábati wariñaga? ¿Wariñaguba luágu múaran lan Búngiu? ¿Sifiátí!

15 Lugúndun lariñajare lun Moisés. “Gareínibadana lun le nabúseerun, gudémejabu áume lun le únti nabúseera.”

16 Ítara líña lubeítí, máma lídaañein wabúseerún o wáfaagun, lugúdemejabu Búngiu woun, lídaañein lugúndan.

17 Tídan Lerérun Búngiu, bürüwañu líña dimúrei le lariñagubei lun urúei Ejíptona. “Nadügünbálíbu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.”

18 Gudémejabuti lubeítí Búngiu lun le labúseerun gudémejabu lan, derégúdaloún lanígi le únti labúseera ledéreragüdünnun.

19 Baríñaguba lubeítí nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladügün cátei bouguditi lueí lugúndan Búngiu?”

²⁰ Wel, ¿cátabuñadíbugi lun balégejan lúma Búngiu? ¿Laríñaguba funági souúdienu lun le adúgübalin. “¿Cáme badügana ítara?”

²¹ Garíchatu le adáagubei souúdienu lun ladügüni le labúseerun láu lubúñe souúdienu, gayáraati ladügün ában souúdienu le diseguati layúsurun, lúma ában le ayúsurúti lun furúmieguaugü cátei lídaangiñe ában méme ubúñe.

²² Ítara méme líña, gabáfuti Búngiu jawágu gürígia, aráanseñu líña lun larúfuduni luweírín ligáñi jawágu gürígia ja gadúnabaña jagünrinchawagún. Áfaaga lumúti jaríban láu sarágu gurásu dari gueto

²³ lúnrgü gayára lan larúfuduni luweírín luweírigin woun, wagía le únbaña gudémejabu lan, ja giñe laráanserubaña lúmagiñe binárú lun gafánraanbadiwa lan lídan luweírigin.

²⁴ Wáti Búngiu woun, jíbiri jádaangiñe jurú, jíbiri jádaangiñe ja mámabaña jurú,

²⁵ queísi lariñagun Búngiu tídan lilíburun Oséas.

Já meja mámabaña nánigu, nariñaguba joun. “Nánigu”, gürígia méja ja mínsiñebaña nun, nariñaguba joun. “Jínsiñetün nun”.

²⁶ Áni lídan méme fulásu le ñí lubei lariñawagúa joun. “Máma nánigu jugúya”, ñíba lariñawagúa joun. “Lirájüñü Búngiu le wínwanbei”.

²⁷ Ánjeinti jawágu Israelítagu, ja méme juríubaña, lariñajare Isaías. “Láu sun gíbe jamá ladügawagun Israelé quei ságoun láru béya, bíanraürügübaña jádaangiñe erédera lun jasálbarun,

²⁸ lugúndun lagúnfulirubei Búngiu lerérun ligíbuagu ubouú lun lagünrinchaguniña ja magáambadibaña lun, lídan ában igáburi le gumúti, le giñe furéseti.”

²⁹ Queísi méja lariñagun méme Isaías.

Lun jamúga meja mígirun lan Súnti Gabáfu jádaangiñe wadügawagun woun, wayábiña jamúga lun ítara wamá queísi ubúrugú burí Sodóma lúma Gomórra.

Jurú lúma ugánu luáguti Crístu

³⁰ ¿Cábatu wariñaga? Luágu ja lan mámabaña jurú, ja mibíjínbalin lilírudun Búngiu lun jasúbudiruni le buídubei lúma le wuríbabei, jagía anügübaña quei richáguatiña ligíbugiñe Búngiu ladüga jafiñerun luágu.

³¹ Ánjañati ladügawagun Israelé, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilírudun Búngiu, siñá jamuti lúrudu ligía agúnfulira, machúlüntiña lun richáguá jamá ligíbugiñe Búngiu.

³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafiñen, jadúgeirüga láu cátei le guánarügü jadügübei. Ligía jachúgeragunbei luágu Jesucrístu queísi “dübü le achúgeraguágülei”, ladüga siñá lan jafiñerun luágu queísi Jasálbaragüle.

³³ Lariñajare tídan Lerérun Búngiu.

Rútina ában wügüri le queísigubeirügübei dübü le achúgeraguágülei Sión, dübü giñe le eíguadagüdüti gürígia.

Ánjeinti le afiñeruti luágu, maságüríjanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmragun lun Búngiu jawágu Israelítagu, ja méme juríubaña, lun jasálbarun.

² Ariñagatina luágu jafúleisein luágu níjein lan ában oúnwenbun gúnfuli jádan lun Búngiu, máma queísi lariñagun subúdi jagúnfulin.

3 Ibídiñeti joun ída líña lan ligáburi líchuguniña Búngiu gürígia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madúgünga jamei le labúseerubei.

4 Lugúndun Cristu lébejabei lagúnfulirúniwa lilúrudun Moisés, áni adúgati lun sun lan ja afiñebaña luágu, jeréderun richáguañu ligíbugiñe Búngiu.

5 Luágu lerésibiruniña Búngiu gürígia queisi gürígia richáguañiña láu jagúnfuliruni lilúrudun, lariñajare Moisés. “Gürígia ja agúnfulirutiña lúrudu le gumúti, jabágariduba luágu lúrudu.”

6 Luáguti lerésibiruniña Búngiu gürígia queisi richáguañiña ligíbugiñe luágu jafiñen, lariñajare. “Mariñagabá tidan banígi. ¿Cába amúdeira siélun?” — queisigubeirügü barárigüdúñein lan Cristu le Wasálbaragüle siélugiñe.

7 Mariñagabá giñe. “¿Cába arárira le ñijin jabei jiláaña?” — queisigubeirügü bamúdeiragüdúñein lan Cristu jádaangiñe jiláaña ítara. Úati ni cáta lun wadügüni lueidügüya lun wafiñerun luágu.

8 Cáteiti lariñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, niñein giñe ugánu ligía tidan banígi.” Ugánu le, elun?” — queisigubeirügü barárigüdúñein lan Cristu le ligía ugánu le lánina afiñeni luágu Cristu le Wasálbaragüle, le wapúrichijabei.

9 Ánjabu aríñaga láu biyúma luágu Jesúsu lan Babúremebei, afiñe amürü tidan banígi luágu sarágüda láani Búngiu lídaangiñe otúweni, basálbaruba.

10 Láu baffiñerun luágu Jesucristu táu sun banígi, lerésibirabu Búngiu queisi ában gürígia richáguañi ligíbugiñe, láu bíchugun fe luágu láu biyúma, basálbara.

11 Tariñajare Lerérun Búngiu. “Úati ni ában gürígia le afiñeruti luágu Jesucristu lun laságürijan luágu lárigiñe.”

12 Ában jáu juríu jáma ja mámabaña juríu, Wabúreme Jesucristu, ligía jabúremebei sùngubei, áni fuleisei lumútiña sun ja agúarubaña lun lun líderaguniña.

13 Ítara líña quei lariñawagún tidan Lerérun Búngiu. “Sun ja aguáruti líri Wabúreme, jasálbaruba.”

14 ¿Ída lubáti gayára lan jagúaruni lun lasálbaruniña ánjein mafiñerungiña lubei luágu? ¿Ída lúba giñéti gayára lan jafiñerun luágu, ánjein magáambungiña lubei luágu? ¿Ída lubáti gayára lan jagáambun luágu, ánjein uá jabei apúrichijati ugánu luáguti asálbaruni joun?

15 ¿Ída lubáti giñe gayára lan japúrichijan gürígia joun ánjein uá cába lan otúnajaña apúrichija? Queisi lariñawagún tidan Lerérun Búngiu. “¡Ma lubuidun jachúlürün ja anügübalin ugánu luáguti aráandaruni lúma Búngiu, apúrichija jamei ugánu buíti luáguti asálbaruni!”

16 Másutiña gürígia ja agáamba jamáalibei ugánu luáguti asálbaruni ebéresera láu. Queisi lariñaguni Isaiás tidan lilíburun. “Wabúreme, míbetiña afiñerutiña luágu ugánu luáguti asálbaruni le wapúrichijabei.”

17 Ítara líña lubeíti, lídaangiñe jagáambuni gürígia ugánu luáguti Cristu gayára lan jafiñerun luágu.

18 Ába nariñagun. ¿Magáambun jamúba giñéti gayára lan jafiñerti funásan ugánu luáguti asálbaruni? ¡Agáamba jamúti! Tariñajare Lerérun Búngiu.

Agaambúaali jamálali lídan sun fulásu,
chülüjali jerérun lídoun lagúmujóun larígei ubóu.

19 Ába naríñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáli, lugúndun lídan furúmiñeti cátei lariñajare Búngiu liyúmulugugiñe Moisés.

Naméendidagüdübadün jadüga ában rása ja máma náni, nagáñidagüdübadün jadüga ában rása ja ibídiñegidina joun.

20 Ariñagati giñe Búngiu liyúmulugugiñe Isaías.

Darí jamutina ja máluajaanbalina, arúfudaguatina núngua joun ja málügüdajánbaña nuágu.

21 Ábaya lariñagun jawágu Israelítagu. “Sun wéyu náu agúaja joun güriquia magáambaditiña, mabuídun.”

11

Israelítagu ja sálbabaña

1 Ariñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín.

2 Barü lumútiña Búngiu Israel-ítagu queísi lánigu lumagiñe meja binarü, guetó, mamájaanti joun. ¿Magáambun jumúti le tariñagubei Lerérún Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Lariñaga.

3 “Nabúreme, áfaragua jamá profétagu jilágubei, güriñgua jamei buri báni latárü, áu rügáli erédera jádaangiñe bánigu, áni buséntiña giñe jáfarunina jilágubei.”

4 Ába lariñagun Búngiu lun. “Anuádajaadina sédü mílu wügüriña nubárua ja májuduragúngiñabaña ligíbugiñe liyáwa búngiu le Baal.”

5 Ítara méme giñe lídoun buri wéyu le, reídeijaña átiri jádaangiñe juríu ja anúadaja láañabaña Búngiu láu lareíni.

6 Anjeinti láu lubei lareíni Búngiu lanúadiraña, mámaali láu cátei le liyáraati güriquia guánarügü adüga, lugúndun lun jamúga itara líña lan, mámaali jamúga areíni lareíni Búngiu.

7 Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei afiñeni luágu Búngiu, ába lígiriñiña Búngiu táu tidere janígi.

8 Queísi tariñagun Lerérún Búngiu. “Adüga lumútiña Búngiu lun deré lan jachügü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülü lúmoun dan le.”

9 Ariñagati David.

Garábagua lámuga jefédujan lun sádarame, lun jáburujan tídoun, lun jasúfurirun.

10 Darú lámuga jágu, maríjin jamámuga, sebúga lámuga giñe janágan lágugiñe janügün lun sun dan.

Jasálbarun ja mámabaña juríu

11 Nálügüdajaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Cristu, jayábin ja mámabaña juríu lun jabíjubei lan asálbaruni, lun jáyeijabaña lan Israelítagu.

12 Ánjeinti seríwi lubeí dúru le jadügübei juríu buítme lun ubouú, áni ánjein buíti lubeí lanügübei jeféridirun joun ja mámabaña juríu, ¡sarágume buídutimaabei lan dánme le jasálbarun sun juríu!

13 Níjein giñe ában cátei lun naríñaguni jun, jugúya le mámabei juríu. Quei loúnajañadina lan Búngiu apúrichija luágu Crístu joun ja mámabaña juríu, weíriti nubéresen láu nuwádigimari,

14 lun gayára lan jabúseerun nirásan jáyeijanün, lun giñe jasálbarun.

15 Ánjein ladüga lubeí lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe ouweni.

16 Ánjein derégewa tubeí furúmiñetu fein to adügütu tídaangiñe fulúwaaru añóundawagutu lun Búngiu, derégewatu giñe sun fulúwaaru ñóunwaguatu to ídaangiñeboun tiábin fein tugúya. Ánjein giñe derégewa lubeí tilagüle ában tídibu wéwe lun Búngiu, derégewañu líña giñe tilímun.

17 Añájein jádaangiñe juríu, queísi tilímun olívo tímatimaati, chaünwatiña, gidáwatiña jagánaguagiñe lumútuniña Búngiu ladüga mafiñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jiábin lun gabára jumá lídan tilagüle lúma lídan tibágari olívo, resíbi jugúyame labínirun Búngiu, queísi lumútuniña.

18 Marítagua jumátia luágu buídutimá jumá lueí límu le ñígubeibei méja. Ánjaün arítagua luágu buídutima jumá, jarítagua jumá luágu máma lan jugúya ágüdajabalin ílagülaú, luágu ílagülaú lan ágüdajabalún.

19 Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.”

20 Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun mafiñen jamá luágu Wasálbaragüle, jugúya, gabára jubei ladüga jafiñen luágu. Manáangua jumá lubeíti júngua, duárirügü jumá.

21 Lugúndun ánjein úa lubeí ferúduna laniña Búngiu juríu já meja lanúadajabaña lun lánigu jamá, úabei giñe ferúduna lánün, jugúya le mámabei juríu, ánjaün ñúbin lun mafiñen jumá.

22 Aríja jumei lubeíti luweírin lareídun Búngiu, derégüdati giñe. Derégüdati joun ja mafiñebaña, areídati joun ja afíñebaña. Lúnti jasígirun lídan lareíni láu sun jafiñen luágu, ánjein madügün jumá ítara, jagídarúba giñe.

23 Ánjaña ñúbin juríu lun jafiñerun luágu Crístu, jíchugúyaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña járigoún.

24 Jugúya le mámabei juríu, chaünwatün tueígiñe ában olívo to áraabuna, ába jíchugún tuágun olívo to buitu, gúbume ladügúwa joun juríu ja tilímunbaña olívo buitu ja tímatimaatiña, jíchugúyaba járigoún tuágun olívo to ñígiñe lubei jagídarúba, naríñaguña luágu lachúlürüba lan wéyu lun jerésibiruni juríu jasálbaragüle.

Jasálbarun Israelítaga le lagúmujoún

25 Nidújeñu, buséntina lun jasúbudiruni cátei le luáguti laráansejan Búngiu, lé meja arámudaguabei, lun mapántajan jumá luágu chu lan jáu lídan le jálügüdagun júngua luágu buri cátei le. luágu deréragüda láaru lan Búngiu janígi Israelítaga murúsun lun Jasálbaragüle darírügü dánme le gumújali jerésibiruni ja mámabaña juríu Crístu.

26 Dánme le lasúseredun líra, ábame jasálbarun sun Israelítagu, ja méme juríu, lugúndun tariñajare Lerérun Búngiu.

Liábinba Asálbaragülei Sióngiñe, ábame lagídarun wuríbani jádaangiñe juríu.

27 Nijánba nidáradun jáma, dánme le nagídaruni jafígoun.

28 Luágu ugánu le luáguti asálbaruni, barüwatiña juríu queísi láganiñu Búngiu luágu jufúlesein, láu sun líra, jínsiñegiña lun Búngiu lugúndun anúadaja lumútiña binádu jagübürigu juríu.

29 Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña.

30 Jugúya, magáambaditün meja lun Búngiu, guetó, láu jamájarun juríu jagáambuni, ába gudémejabu lan Búngiu jun.

31 Magáambaditiña juríu lun Búngiu guetó, ánjein líra, lúnrügü gudémejabu lan Búngiu joun queísi gudémejabu lan jun.

32 Ígira lumútiña Búngiu súngubei lun magáambun jamáni, lun gayáraabei lan gudémejabu lan joun.

33 ¡Uweírín lareídun Búngiu, lúma lichú láu! Siñáti wasúbudiruni larítagun, siñá gunfaráanda wamáni lémeri.

34 ¿Cági gunfaráandabalin larítagun Búngiu? ¿Cági arúfudajabei lun?

35 ¿Cági gürígia rújalibei som cátei lun Búngiu furúmiñe lun lerésibirun som cátei fáyeitime lárigiñe?

36 Úati ni ában, lúmagiñe Búngiu liábin sun cátei, ligía giñe ágüdjabalin sun cátei, áni lúngua giñe ladúgei. ¡Uweíríguni lun Búngiu lun sun dan! Ítaralá.

12

Ibágari le derégewati lun Búngiu

1 Amúriajatina lubeíti júma, nidújeñu, lun jedéregeragun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadügüni lugúndun weírini lareíni woun.

2 Jebé jabágaridun queísi lirájüñü ubou le, lubáragiñe líra, sáansi jumei ligáburu jisáminan, sáansi lámuga giñe ligáburu jabágaridun. Ítara lúba jiábin lun jasúbudiruni le lugúndaanbei Búngiu jun—le buídubei, le uáraguabei.

3 Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jádaangiñe aritaguti luougua weíri sügü láu le ligiabei. Lubáragiñe líra, cáda ában lúnti lasúbudiragun lúngua, según affñeni le rúlaalíbei Búngiu lun.

4 Lugúndun ítara quei gíbe lán buri umégeguni luágu ábanrügü úgubu, áni máma ában méme lifisiute sun umégeguni ligía,

5 Ítara wáña giñe, wagía affñetiña, láu sun gíbe wamá, ában rügüñadiwa úgubu lídan ában lúma Crístu, áni íderaguatiwa woúngua wádaangua queísi lumégegun ában méme úgubu.

6 Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubei Búngiu ubáfu woun lun ladímurejan wayúmulugugiñe, lúnti wadügüni segun affñeni le wádaanbei,

⁷ Ánjein rújali lubei ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani.

⁸ Le gíchigaditi dűgűdaguaű joun ámu, lúnti líchaagun lúngua lun ladűgűni. Le edéweejati, lúnti magúrabun lan láguyun lun, le ábutibe, lúnti lagűmadijan láu sarágu duári, le íderaguti gudémetiña, lúnti ladűgűni láu ugűndani.

Ligáburi jabágaridun lánigu Crístu

⁹ Jínsiñe jamá jidűjeñu lueigiñe Jesucrístu jun láu ínsiñeni le inárűniti. Iyéreegulá wuríbani jun, falájumei le buídubei.

¹⁰ Lúnti jínsiñegua jumá jűmagua queisi idűjeñu. Furése jumá lun jiñúrágűdűni jíri jidűjeñu.

¹¹ Mamágualigu jumá lídan luwádigimari Wabűreme, seríwi jumei táu sun janígi.

¹² Abágarida jumá gűndaafűni láu eménigini le juágubei, gagűraasun jumá dan le jasúfurirun, ayűmuragua lun Búngiu, eteíngirei, sűnwandan.

¹³ Íderagua jumáña afiñetiña lídan jemégeirun, resíbi jumáña ja bisídabalűn láu ugűndani.

¹⁴ Aműriaja jumá labínirun Búngiu jawágun ja oűserutűn wuríba, aműriaja jumá abíniruni joun, máma wuríbani.

¹⁵ Gűnda jumá jáma ja gűndaabaña, jayájua jáma ja ayájubaña.

¹⁶ Abágarida jumá lídan úraguni jűmawagua. Manáangua jumá jűngua, gamádagua jumá jáma ja gudémebaña. Marítagua jumá juoűgua queisi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadűgűni le buídubei jagűbugiñe sűngubei.

¹⁸ Adűga jumei sun le juáraati lun jabágaridun lídan dan jáma sűngubei.

¹⁹ Nidűjeñu jínsiñetiña nun, mágyugűda jumei wuríbani, ígira jumei lun Búngiu lan afáyeigűda luágu. Taríñajare Lerérun Búngiu. “Áu lúnbei nafáyeigűdűniña gűrígia luágu jaríban, líña Jabűreme.”

²⁰ Ariñagati giñe Búngiu. “Ánjein lámá lubei bágani, rűba eígini lun, ánjein mágűrabu lubei, rűba dűna lun, lugűndun láu badűgűni líra, lebeluruba busíganu lun luágu luríban loűserunibu.”

²¹ Mígiraguagűdabá bűngua lun lagañeirunibu wuríbani lun báguyugűdűn wuríbani luágu wuríbani, lubáragiñe líra, gáñibeí wuríbani láu buídu le badűgűbei.

13

¹ Lúnti jíchaagun sűngubei jűngua lábun jalúrudun gumádimatiña, lugűndun ítara líña laráansejan Búngiu lun ñibeí lan lűrudu, áni gumádimatiña ja lídaanbaña jabára, labűseerun Búngiu añajein lubei ñi.

² Gűrígia lubeíti le awűgűrijoútí lun gumádi, múaraanti láu le laríñagubei Búngiu, áni ja awűgűrijoútíña ítara, gadúnruntiña luágu líra áni jafáyeiruba luágu.

³ Máma lúnñanu jíchugun gumádimatiña anűfudei joun ja adűgűbalin le buídubei, aná joun ja adűgűbalin le wuríbabei. ¿Buséntibu babágaridun manűfudeiga luei lűrudu? Buídulá boűserun, ábame buídu ban lurűma lűrudu,

⁴ lugűndun lesériwiduña lun Búngiu luágu bufűleisein. Ánjein wuríba boűserun, lúnti janűfude ban, ladűga máma luágu ni cáta gabáfu lan lűrudu lun lafáyeijagűdűn luágu dúru, quei lesériwiduña lubei lun Búngiu lun lafáyeijagűdűn luágu dúru.

⁵ Ligía lúnti lubeí úragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítangun.

⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

⁷ Ru jumeíme le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cátei líbe líra, fáyei jumeí le lúnti jafáyeiruni luágu cátei le ñúbinbei jun bougudigiñe luei jageíra. Gagáambadi jumá joun gumádimatiña, ru jugúyame inébesei joun queísi lubúdubu.

⁸ Máni jumá dúweiti ni ca úma, lueídügüya lidúweitina ínshiñeni le jadúweirubei júmagua. Le jínsiñejabuti lun gürígia líledi, adúga láali sun le lubeíbei lilúrudun Búngiu láu ladügüni líra.

⁹ Tariñajare Lerérun Búngiu. “Magámaridabá gürígia maríeitiña, máfarajabá, míwerujabá, mariñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queísi bínsiñegua búngua.”

¹⁰ Le jínsiñejabúbei, madügünti wuríbati lun ni ában, ánjawa lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburu wabágaridun lugúndun wabágariduña lídoun lagúmujóun dan. Dánjali lun wagágudun lídaangiñe idábagu, lugúndun yaráfatimaajali óra lun lagíribudun Wasálbaragüle ubouágun sügü láu dán meja le wafíñerunbei luágu ugánu luáguti asálbaruni.

¹² Belújali áriebu buídu, yaráfalaí larúgadun, ligía lúnti lubeí wígiruni wadügüni cátei wuríbati le adügúbei lábugiñe lubúriga, lun wadáurrunun wadáuragun queísi súdaara ja lábugiñetiña larúgounga.

¹³ Eíbuga wamá queísi lubúdubu ítara queísi gürígia ja buídubaña, úouga ni cáta luágu jagáburu lun jarámudagun luei jaríjin gürígia. Mabágarida wamá lídan bacháruaü, lúma buri lanárime fédu, ni lídan salúfuri lúma iwíyeni, ni lídan gáganiguaü lúma gimúgaü.

¹⁴ Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagúburi ayúmajani.

14

Madímurejabá luágu bidúje lueigiñe Jesucrístu

¹ Ánjein débili lubeí ában gürígia lídan lafiñen, resíbi jumeí, mariñagunga ni cáta lun luágu cátei le machoúrrunbei luágu.

² Queí buri, añájein derégüdati jafiñen, jarítaguatiña luágu gayára lan jeígin afiñetiña furúmieguaügü cátei áni jeréderuba jarúmañu ligíbugiñe Búngiu. Añájein jíbiri, débilitiña lídan jafiñen, meígintiña úwi.

³ Le eígiti furúmieguaügü cátei, mouñ lumuti ünabu lan lanügüni le meíginbalin, le gíñe májabei leígin furúmieguaügü cátei, mouñ lumuti gíñe ladímurejan luágu le eígbalin, lugúndun resíbi láali Búngiu gürígia ligía queísi lánigu.

⁴ ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdüni buídu.

⁵ Nijánya ában jémpulu. Añájein gürígia weíríti janügüni ában wéyu lueí ámu wéyu, añájein jíbiri, afíñetiña luágu ában lan lábu sun wéyu. Cáda ában lúnti lachoururuni le uágubei larítagua.

⁶ Le areídubei som wéyu, ladügüñein lun líchugun inébesi lun Búngiu. Le eígibeí furúmieguarügü cátei, leígini lun líchugun inébesi lun Búngiu, lugúndun rúti eteingiruni lun Búngiu luágu eígini ligía. Le meiginbei úwi ladúga liloúguan lafiñen, lun líchugun inébesi lun Búngiu ladúgei, rúti gíñe eteingiruni lun Búngiu luágu cátei le gayáraabei leígin según lafiñen.

⁷ Naríñagubalin líra lugúndun úa lan ni ában wádaangiñe abágariduti lun guánarügü, úa ni ában ouweti lun guánarügü.

⁸ Ánjawa abágarida, wabágariduña lun wadügüni lugúndan Búngiu, ánjawa ouwe, wounweña según lugúndan Búngiu. Ítara líña lubeíti, dándu lídan ibágarí queísi lídan ouweni, láni Crístu wagía.

⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banúgei quei ni cáta? Búngiu rügüñein lun lagúseragüdün, áni sun wagía, waráramaba ligíbugiñe lun wagúserun,

¹¹ queísi taríñagun Lerérun Búngiu.

Inárüñiti ítara quei gabágarí nan, líña laríñagun Búngiu, luágu jájuduraguba lan sun gürígia nigíbugiñe,

áni jasúbudirubadina súngubei ligíbugiñe guríriguaü.

¹² Cáda lubeíti ában wádaangiñe, lagúseruba luóuga lúma Búngiu.

Machúgeraguagüdabei bidúje

¹³ Ligía, mouñ lubei wadímurejan jawágu wadújeñu lueígiñe Jesucrístu. Lubáragiñe líra, derébugulá jarítangun lun madügün jumá ni cáta le gayáraati lachúgeraguagüdüni jíbiri, o láburugüdüni lan lídoun figoú.

¹⁴ Subúdi numúti luágu úa lan ni cáta le leígibeí gürígia lun lawíyeduni ligíbugiñe Búngiu, áni chouuru numúti líra, áu queísi afíñeti luágu Jesucrístu. Láu sun líra, ánjein jarítagua lubei ában gürígia luágu marúman lan ában cátei, marúmaanti lun, áni figoú lun lun leígini.

¹⁵ Ánjeinti bañáwurija lafiñen bidúje láu cátei le beígibeí, mámaali bagáburiduña láu ínsiñejabuni. Madúgabá lun lefériDIRUN ában gürígia le ueígiñebeí loúwe Crístu, ladúgarügü beígin ítaga cátei.

¹⁶ Míchiga jumá lubeíti lúgaaru lun ladímurejoún wuríba luágu cátei le gayáraabei jadügüni queísi afíñetiña luágu Crístu.

¹⁷ Larúeijan Búngiu máma cátei luáguti le eigíbeí o atúbeí, luáguti ában ibágarí le lánina ísuruni, darángilaü lúma ugúndani le líchugubeí Sífiri Sándu woun.

¹⁸ Le esériwiduti lun Crístu lídan igáburi le, gúndaati Búngiu láu, áni buíti gíñe jarúma gürígia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wideragun wámagua lun wawáanserun lídan cátei le lánina Búngiu.

²⁰ Magürinchaguabeí luwádigimari Búngiu lídan libágarí ában gürígia láu cátei le beígibeí. Inárüni luágu jarúma lan sun eígini ligíbugiñe Búngiu, le wuríbabeí, lun leígin cátei le áburugüdütiña ámu gürígia lídoun figoú.

21 Buíti lun meígin ban úwi, matún bínu, madügün ni cáta le achúgeraguagüdüti bidúje, o láburugüdüni lan lídoun figoú, o ledébiliragüdüni lan laffiñen.

22 Afiñeni le buágubei, lúnti buágu guánarügü lan ligíbugiñe Búngiu. ¡Gúndaati gürígia le gayáraabei lariñagun luágu buídu lan cátei le ladügübei, masándiragunga ligía lúngua láu dúru!

23 Ánjeinti le eígebei ában cátei láu machoúrui luágu buídu lan leígini queísi afiñeti luágu Crístu, gadúnrunti ladüga leígini, lugúndun meígin lumúti láu afiñeni. Sun le wadügübei, ánjava arítagua luágu fágua lan moun láani wadügüni, figoú woun.

15

Gúndaagüdadá gürígia bíledi, máma amürü guánarügü

1 Wagía le jerebei lídan waffiñen, lúnti gagúraasun wamá jabá ja louguagiñabaña afiñe, lúnti warítangun luágu le buídubei joun, mámarügü luágu wíchugun ugúndani woúniwagua.

2 Cáda ában wádaangiñe, lúnti lagúndaaraguagüdüni gürígia líledi láu le buídubei lun gürígia ligía, lúma láu le gayáraati lagánwoundagüdüni laffiñen.

3 Ni Crístu, míchugunti ugúndani lúniwagua, lubáragiñe líra, suséreti le abürüjóbubei tidan Lerérun Búngiu lun. “Núguchi, áburujati janábajan ja anábubalibu nuágun.”

4 Sun le ariñawagübei tidan Lerérun Búngiu lúmagiñe binárü, lun larúfudajoún woun labürüjoúa, bürüwati meja dimúrei buri ligía lun wanügün gurásu lúma dügüdaguaü lídaangiñe, gayára lámuga weménigiduntima luágu Búngiu.

5 Búngiu le íchugubei gurásu lúma dügüdaguaü, íderagualaún lun jabágaridun lídan dan jáma jibirigu, queísi ladügüni Jesucrístu.

6 Ítara lúba, sun lan wagía lídan ában, láu ábanrügü umálali, wíchuguba uweírighi lun Búngiu, le Lúguchi Wabúreme Jesucrístu.

Agáambatiña ja mámabaña juríu luágu Wasálbaragüle

7 Resíbigua jumá lubeíti júniwagua quei giñe lerésibiruniwa Crístu, lun liñurúniwa líri Búngiu.

8 Le nariñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugübei joun binádu wagübürigu, lun larúfudún luágu gúnfuli láani Búngiu lerérun.

9 Liábinbei giñe lun jíchuguba lan ja mámabaña juríu uweírighi lun Búngiu luágu lareídun, quei taríñaguni Lerérun Búngiu.

Ligía níchuguba lubei uweírighi bun jagánaguagiñe ja mámabaña juríu, nerémujaba giñe luágu buweírighi.

10 Taríñajare giñe Lerérun Búngiu.

Gúnda jumá, jugúya le mámabei juríu, úara jáma ja lánigubaña Búngiu.

11 Taríñajare giñe.

Rújuma sun ja mámabaña juríu inébesi lun Búngiu, adímureja jamá sun gürígia luágu luweírighi.

12 Laríñajare giñe Isaías tidan Lerérun Búngiu.

Liábiba ában ladügawagun Isaí, le lúnbei lagúmadiruniña ja mámabaña juríu. Jagía, jeménigiduba luágu.

13 Búngiu, le íchugubalin eménigini woun, buíngüdaláun láu ugúndani lúma darángiláú lídan jafiñerun luágu, lun buíñu jumá láu eménigini, láu lubáfu Sífiri Sándu.

14 Nidújeñu, chóuruguatina núngua luágu buin jíña lan láu areíduni lúma subúdi luágu wafiñen luágu Crístu, luágu giñe gíchigadi jumá dimúrei buíti joun jíborigu.

15 Ídan gárada to, abúrújaadina jun láu sun furáangu luágu buri cátei le lun mabúlieidun jumáni. Nadügüñein luágu wadágimanu le rúlaalíbei Búngiu nun láu lareíni,

16 lun nesériwidun lun Jesucrístu jagánagua ja mámabaña juríu. Seríwi le nadügübei, napúrichijani ugánu lúmagiñeti Búngiu luágu Wasálbaragüle lun nanügübaña lan ja mámabaña juríu lun Búngiu, lun lerésibiruniña queísi gürígia ja jarúmaaru janígi láu luwádigimaridun Sífiri Sándu jádan.

17 Ítara líña lubeíti, áu queísi ában afiñeti luágu Jesucrístu, gébunati gúnda nan lídan nesériwidun lun Búngiu,

18 luágu rügüñein buri cátei le ladügübei Crístu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun,

19 luweírin buri seíni lúma buri miláguru le nadügübei láu lubáfu Sífiri Sándu nidan, lun lanügüniña ja mámabaña juríu lúmoun. Láu igáburi le, jóustagüda náali lapúrichijoún ugánu luáguti asálbaruni lídaangiñe Crístu, lúmagiñe Jerusaléngiñe dari lóubawagun Ilírico.

20 Ítara líña áfaaguaadina lan lun napúrichijani ugánu luáguti Wasálbaragüle le ní lumuti magaambúngili lan líri Crístu. Mabúseeruntina nuwádigimaridun lun Crístu lídan fulásu le ní lumuti chülüjali lan ámu láu ugánu luágu, nubáragiñe,

21 lubáragiñe líra, súnwandan busén nan nagúnfuliruni dimúrei lébei le taríñagubei Lerérun Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

22 Ladúga nesériwiduña lan lun Crístu lídan ámu fulásu, siñágili lubeí nídin bisídaun, láu sun gíbeeli lan weíyaasu nabúseerun nadügüni.

23 Guetóti, quei gumúnaali lan nuwádigimari lueígiñe oubáü le, áni quei lúmagiñe lan binárü nabúseera nídin aríjaun,

24 agúrabatina násügürün bisídaun dánme le nídin Espáña. Lárigiñeme aríja náadun lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun.

25 Anjein guetó, neíbuga Jerusalén, barüina cátei joun wadújeñu lueígiñe Jesucrístu ní.

26 Lugúndun wadújeñu ja Macedóniabaña jáma ja Acáyabaña jarítaguaaña jóundarun seínsu jádaangua lun jóúnajani joun idújeñu gudémetiña ja Jerusalénbaña.

27 Jarítaguaaña luágu buídu lan lun jadügüni cátei le, áni richátíña, lugúndun dúwei jamúti joun le tímatimaati, lugúndun ítara quei jafánreinraguni afiñetiña ja juríu jarísin le lánina siélu jáma ja mámabaña juríu, lúnti giñéti jíderaguniña afiñetiña ja mámabaña juríu afiñetiña ja juríu luágu jemégeirun ya ubótagu.

28 Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naúnme dánme le násügürün.

29 Chóuru numúti luágu dan lánme nachülürün júmoun, nachülürüba lan buin láu abíniruni lúmagiñe Crístu.

30 Nidújeñu, ayúmuraguatina jun luágu jínsiñejabu lun Wabúreme Jesucrístu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu.

31 Amúriaja jumá lúma Búngiu lun leséfurunina jaweí maffiñetiña ja Judéabaña, lun giñe buídu lan lerésibirúniwa íderawaguni le nanügübei joun wadújeñu ja Jerusalénbaña,

32 lun gúndaabadina lan dánme le nachülürün júmoun eméraagua murúsun, ánjein ligía lubei lugúndaabei Búngiu.

33 Júmalá Búngiu le ichugubei darángilau. Ítaralá.

16

Mábugaü lun cáda ában

1 Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligílisi to Cencréaboun, jun.

2 Dánme le tachülürün júmoun, resíbi jumoún buídu lídan líri Wabúreme, queísi lúnti lan ladügün jádan idújeñu lídan afiñeni. Íderagua jumoúnme lídan furúmieguarügü cátei le temégeirun, lugúndun tugúya, sarágujaña tíderagun, íderagua táadina giñe.

3 Mábuga níña tun Priscíla, lúma lun Aquíla ja nidújeñu lídan nesériwidun lun Jesucrístu.

4 Jagía, rújamuti jabágari guánarügü lídoun lénreengúnga lun jasálbaruni nibágari, teínqui níña lubeíti joun, áni mámarügü áu, sun giñe wadújeñu ja tilana jalígilisin ja mámabaña juríu, rújamuti jeteingirun joun luágu líra.

5 Mábuga níña giñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmiñebei afiñeruti luágu Crístu ubúrgu Acáya.

6 Mábuga níña tun María to ñadágimeinjáruboun sarágu jagánagua, jugúya Rómana.

7 Mábuga níña joun nupaísanu Andrónico lúma Junías já meja níbirigubaña furísunrugu, buíti jadímurejan láni Crístu apóstolugu jawágu, jagía giñe afiñerubaña luágu Crístu nubáragiñe.

8 Mábuga níña lun Amplías, numáda jínsiñeti nun queísi lánigu Crístu.

9 Mábuga níña lun Urbáno, woúba lídan wawádigimari luágu Jesucrístu, lúma lun Estáquis, numáda le jínsiñebei nun.

10 Mábuga níña lun Apéles, le arúfuda láalibei lafiñen luágu Crístu sarágu weíyaasu, mábuga níña giñe joun tilana lúban Aristóbulo.

11 Mábuga níña lun nupaísanu Herodión lúma joun tilana lúban Narcíso ja afiñebaña luágu Wabúreme.

12 Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma giñe tun wadúje Pérsida to jínsiñeboun woun, to adúgaaruboun sarágu lídan líri Crístu.

13 Mábuga níña lun Rúfo, wügüri le buídubei igáburi le tímatisaati ligíbugiñe Crístu, mábuga níña giñe tun lúguchu, to giñe ítarajaruboun quei ában úguchuru nun.

14 Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámabaña.

15 Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígiñe Crístu ja jámabaña.

16 Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun tílana lilígilisin Crístu jun.

17 Nidújeñu, ayúmuraguatina jun lun jaríjiniña cátaña lan ja afánreinraguagüdübaña gürígia, ru jagía achúgeraguágülei lun jafiñen. Múaraanti le jadügübei lúma le arúfudajóübei jun. Dise jumá jawei gürígia jagía,

18 lugúndun gürígia jagía, mesériwiduntiña lun Wabúreme Jesucrístu, jóungua guánarügü jesériwida. Jeyéedañati gürígia ja únabugutiña láu buri liñúlun lúma lubuídun lagaambún jerérun.

19 Subúdi jamúti sun gürígia luágu ñúdün jumá láu le lubeíbei Búngiu, ligía gúnda nubei, buséntina gíñe lun furése jumá lun jadügüni le buídubei, máma lun le wuríbabei.

20 Búngiu le íchugubalin darángilaü, lagáñeiragüdübadün luágu Máfia, furése. Binílaün Wabúreme Jesucrístu.

21 Mábuga líña Timotéo jun, le nouba lídan wadágimanu, mábuga jáña gíñe Lúcio, Jasón lúma Sosípater, ja nupaísanu, jun.

22 (Áu, Tércio, le abürüjabarun gárada to, mábuga níña gíñe jun, nidújeñu lueígiñe Wabúreme.)

23 Mábuga líña Gáyo jun. Naganouña tídan lúban to gíñe lafúrederúboun joun sun tílana ligílisi. Mábuga líña gíñe Erásto jun, le ágüdjabalin liseínsun fulásu, lúma gíñe wadúje Cuárto.

24 Binílaün Wabúreme Jesucrístu sun jugúya. Ítaralá.

Rúwama uweíriguni lun Búngiu

25 Guetóti, rúwama inébesi lun Búngiu, le gayáraabei ladügünün lúntima derégüdagü jumá lídan jafiñen, según ugánu luáguti asálbaruni le napúrichijabei, lúma arúfudajani luágu Jesucrístu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun ubou, láu sun abürüja jamá meja profétagu luágu.

26 Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafiñerun luágu, gagáambadi jagiame lun Búngiu.

27 ¡Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesucrístu, lun sun dan! Ítaralá.

FURÚMIÑETU LIGÁRADAN PÁBLO JOUN CORÍNTONA

Labürüjan Páblo joun tilana liglisi Corínto

¹ Áu Páblo, wáladina Búngiu láu lugúndan lun ábanbadina la lání Jesucrístu apóstolu, le méme gíribei ában le loúnajan. Nabürüjañoun gárada to, úara lúma wadúje Sóstenes, jun,

² jugúya le wadújeñu lueigiñe Jesucrístu ja tilanabaña lilígilisin Búngiu to ubúruguboun Corínto, ja lánigubaña Búngiu ladúga lídaañadün lan ában lúma Jesucrístu. Wájali Búngiu jun lun jedéregeragun júngua lun le gumúti, queísi wájali lan joun sun ja agúarubalin líri Wabúreme Jesucrístu lídan sun fulásu lun jedéregeragun joúngua lun. Jesucrístu Jabúremebei, ligía gíñe Wabúremebei.

³ Resíbi jumeí abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Abíniruni le wánibei lídaangiñe Jesucrístu

⁴ Súnwandan neteíngiruni Búngiu juágu, luágu abíniruni le rúlaalíbei jun láu lareíni, lídaangiñe Jesucrístu.

⁵ Ladúga lídaañadün lan ában lúma Crístu, rújali Búngiu sun luwúyeri irísini le lánina siélu jun, rújali ában oúnwenbun subúdi jun luóúgua, lun gayáraabei lan jadímurejan luágu láu ában lichú áu.

⁶ Ítara líña geféen jumá luágu inárüni lan le waríñagubei jun luágu Crístu.

⁷ Láu igáburí le, úati ní cáta jemegeirun lídaangiñe le líchugubei Crístu, sun anjünja lan agúrabajei wéyu le lúnbei lagíribudun Wabúreme Jesucrístu ubouágun.

⁸ Lágüdajabadün Búngiu derégüdagu lídan jafñen darí lúmoun lagúmujoún, lun úa lan ní ában íchuguti jidúnrun luágu ní cáta dánme le liábin Wabúreme Jesucrístu.

⁹ Súnwandan lagúnfuliruni Búngiu lerérun, áni ligía agúarubei jun lun lídan jumá ában lúma Jesucrístu, le Liraü, le Wabúreme.

Fánreinguai jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucrístu, lun júaradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asámaruni lúma ayúmajani.

¹¹ Naríñagunbalin le, nidújeñu, lugúndun aríñagaaña ja jádaangiñebaña lufámilian Cloé luágu njein lán nege múarani jagánagua.

¹² Ámuñegueinarügü lán nege cátei laríñagun cáda ában jádaangiñe, añájein nege jádaangiñe, aríñagatiña. “Áu, lánigu Páblo áu”, jariñaga jíbiri. “Áu, lánigu Apólos áu”, jariñaga jíbiri. “Áu, lánigu Pedro áu”, jariñaga jíbiri. “Áu, lánigu Crístu áu”.

¹³ ¿Cámegi sun le? ¿Fánreinwaguati funági Crístu? ¿Dáwaguatina funági luágu gurúwa luágu jufúleisein? ¿Ódi lídan níri jabásterá?

¹⁴ Teínqui níña lun Búngiu luágu mabásteragüdün nan ní ában jádaangiñe lueídügüya Crispo lúma Gáyo,

¹⁵ Ítara, úati ní ában lun laríñagun luágu lídan lan níri labásterá lun nánigu lan.

16 Narítaguñein guetó luágu badíseigüda náani gíñe Estéfanas jáu sun tílana lúban, marítaguntina ánjein badíseigüda nubei ámu.

17 Moúnajan lumúтина Crístu abásteragüdaja, loúnajañadina apúrichijei ugánu luáguti lasálbaruniña gürígia, máma láu apúrichijani le weíríguburiti, luei lagídarun lídaangiñe laníchigu loúnwen Crístu luágu gurúwa.

Arijúati lubáfu Búngiu lúma lichú láu lídan Crístu

18 Ítara líña ugánu luáguti loúnwen Crístu luágu gurúwa quei libídiouniga áu joun ja lúnbaña jeféridirun, ánjein woun, wagía le lúnbei wasálbarun, subúdi wamúti luágu lídaangiñe lan ugánu luáguti loúnwen Crístu larúfudei Búngiu lubáfu lun lasálbaruniña gürígia.

19 Búrúwati tídan Lerérun Búngiu. Nagürinchagubei lichú áu le lánina uboué, nadügubei jafúrendeí furéndeitiña lun ni cáta me ánjein máma lubei númagiñe líabin.

20 ¿Cáti un ju lan le chúbei áu, o le arúfudajabei, o le lan gasígenejadibalín buri cátei le lánina uboué le? Úati ju lan lun ni cáta, adüga láali Búngiu lichú láu uboué le lun libídiounigame áu.

21 Láu lichú láu, adügati lun masúbudirun jamáni ja lánigubaña uboué láu lichú áu le jawágubei. Láu gíñe lichú láu, ába laráansejan lun lasálbaruniña ja affínebaña luágu lárigiñe jagáambuni ugánu luágu loúnwen Crístu jawágu, láu sun barü jamaani jíbiri gürígia ugánu le quei libídiouniga áu.

22 Busentiña juríu jaríjin miláguru lun jafiñerun luágu Crístu, ja mámabaña juríu, busentiña lun láubei lan lichú áu arúfudajani lun gayáraabei lan jerésibiruni.

23 Ánjein wagía, wapúrichija luágu Crístu le ádarawagúbei luágu gurúwa. Jayábiti juríu, siñáti jerésibiruni ában asálbaragülei le ouwebei láu ában luwúyeri ouweni le busíganudúnati líbe líra, játi mámabaña juríu, janügüni quei libídiouniga áu.

24 Láu sun líra, añájein jádaangiñe juríu jáma ja mámabaña juríu ja agáambubalin lagúarun Búngiu joun lun lánigu jamá. Jagía, gayáraati jaríjini lubáfu Búngiu lídan loúnwen Crístu, lúma lichú láu lun lasálbaruniwa ítara.

25 Joun lirájüñü uboué, libídiouniga áu laráansejan Búngiu, wel, weíríti lichú láu Búngiu sügü láu le chútimaabei áu ubouágu.

26 Nidújeñu, lúnti jasúbudiruni luágu wájali lan Búngiu jun, láu sun míbe jamá jádaangiñe chüti jáu según uboué, áni míbetiña gíñe jádaangiñe weírigitíña, o jádaangiñetiña lan família íñugutiña.

27 Anúadaja láaña Búngiu ja íbídiouguabaña áu según uboué lun líchugun busíganu joun ja chúbaña áu, láu jaríjini luágu ni cáta lan lichú jáu ligíbugiñe Búngiu. Anúadaja láaña gíñe ja lanügübaña uboué quei mabáfutiña lun líchugun busíganu joun ja gabáfubaña, láu jaríjini luágu ni cáta lan jabáfu ligíbugiñe Búngiu.

28 Anúadaja láaña Búngiu ja maweírignubaña ubouágu, ja áubaña mebéresenwa lan, ja ni cátabaña, lun larúfuduni luágu ni cáta lan ja anáangubaña jóungua ubouágu.

29 Úati lubeiti ni ában gayáraati lanáangun lúngua ligíbugiñe Búngiu.

30 Rúláadün Búngiu guánarügü jugúya affíñetiña lídoun ában lúma Jesucrístu. Ladüga cátei líra, íbjatiwa lichú áu lúmagiñe Crístu, gayáraati lerésibiruniwa Búngiu queísi richáguatiña, derégeguañu woúngua lun, sálbañu.

31 Ítara líña lubeíti adüga wameí quei tariñagun Lerérun Búngiu. “Le busénti ladímurejan luágu uweírighuni, adímurejalá luágu luweírín cátei le adüga láalibei Wabüreme Crístu woun.”

2

Ugánu luáguti Crístu le ádarawagübei luágu gurúwa

1 Nidújeñu, dán meja le níninbei lun nadímurejan jun luágu linárün Búngiu, adüga numúti mayúsurunga dimúrei buri íñuguti.

2 Dan lé meja júma nubeí, máluguntina meja napúrichijan luágu ámu cátei lueídügüya luágu Jesucrístu le ádarawagübei luágu gurúwa.

3 Ába narúfudagun núngua jun queísi ában wügüri gudémeguti, adádagareina láu anúfudei luei jamúga níjein lan mégeiti lídan nuwádigimari luágu Wabüreme.

4 Dán meja le nadímurejanbei jun, ába napúrichijani Lerérun Búngiu jun, máluajantina nagáñeirunün láu buri dimúrei le jadímurejan wügüriña chu táu. Lubáragiñe líra, láurügü lubáfu láni Búngiu Espírítu nadímureja jun, ába jasúbudiruni luágu inárüni lan le naríñagubei jun.

5 Ítara líña jafiñerun lídaangiñe lubáfu Búngiu, máma lídaangiñe lichú jáu gürigia.

Arúfudaguati Búngiu lúngua lídaangiñe láni Espírítu

6 Láu sun líra, adímurejatiwa luágu ában luwúyeri lichú áu joun ja weínamujañábaña lídan jafiñen. Anjeinti lichú áu ligía, máma lánina ubou le, máma gíñe jáni ja agúmadijabaña ya ubouágu, ja madíseelibeí ánjañame gumúga.

7 Luágu lichú láu Búngiu wadímureja, le áubei laráanseja lúmagiñe lubáragiñe ladügüni ubou lun lasálbaruniwa lun sun dan, gafánran wamámuga lídan sun luweírighun Crístu. Ligía rügüñein meja asúbudirei aráansejani ligía, guetó, subúdigüda láali woun.

8 Játi gumádimatiña lánina ubou le, siñáti gunfaráanda jamáni laráansejan Búngiu lubá wasálbarun, lugúndun lun jamúga gunfaráanda jamáni, mádaragun jamúti jamúga Crístu luágu gurúwa.

9 Ítara líña queísi tariñaguni Lerérun Búngiu. Maríjiñaja jamágili gürigia cátei buíti lé buri laráansejabei Búngiu joun ja jínsiñejabúbaña lun, magáambuñajagiña gürigia luágu cátei buíti líbeina líra, marítaguntiña ída lúba lan.

10 Ába lasúbudiragüdüni láni Búngiu Espírítu, le méme Sífiri Sándu, luáguti buri sun lubuídun cátei ligía woun, wagía afiñetiña. Aríaja lumúti Sífiri Sándu sun cátei, áni subúdi lumúti lujúlilin-ágei larítagun Búngiu.

11 ¿Ca jádaangiñe gürigia gayáraabei lasúbudiruni ca lan tídaanbei lanígi ában gürigia, lueídügüya espírítu le lídaanbei gürigia ligía? Ítara líña gíñe, láni rügüñein Búngiu Espírítu asúbudirei sun cátei le lánina Búngiu.

12 Wagía afiñetiña, máma ában espírítu le lánina ubou werésibirubei, Sífiri Sándu le ñúbinbei lúmagiñe Búngiu, ligía werésibirubei, lun gunfaráanda wamáni le rúlaalibeí Búngiu woun láu lareíni.

13 Adímurejatiwa luágu lareíni Búngiu láu buri dimúrei le larúfudajabei Sífiri Sándu woun, máma láu buri dimúrei le wafúnrendeirun láu lichú wáu, le jáni

gürigia. Ítara líña, laú lubáfu Sífiri Sándu, wafúnraanguagüdei linárün Búngiu joun gürigia ja ibíjubalin Sífiri Sándu.

14 Gürigia le mibíjbinbalin Sífiri Sándu, májati lun larítangun Búngiu le larúfudajabei láni Búngiu Espiritu jádaangiñe gürigia, lugúndun libídiouniga áu lanügüni, siñá lumuti gunfaráanda, lugúndun cátei lán buri le, láu rügüñein lubáfu Sífiri Sándu gayára lan gunfaráandawa lan.

15 Ánjeinti gürigia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájüñü ubou, siñáti gunfaráanda jamáni cáteiñein lan gürigia le eíbugubei lídan larúgounga le líchugubei Sífiri Sándu.

16 Queísi lariñawagun tídan Lerérun Búngiu. “¿Ca gunfaráanda jamáalibei lisáminan Búngiu? ¿Ca gayáraabei larúfudajan lun Búngiu?” Láu sun líra, wagía affiñetiña, níjein lisáminan Cristu wádan ladüga ibíja wamáali Sífiri Sándu.

3

Luwádigimari Páblo lun Búngiu lídan ában jáma jíbiri

1 Láu sun líra, nidújeñu, dán meja le júmañadina lan, siñáti méja nadímurejan jun queísi joun gürigia ja lagúmadirubaña Sífiri Sándu, adímurejatina meja jun queísi joun gürigia ja míchaagugiñábaña jóungua lábugiñoun lagúmadijan Sífiri Sándu le gumúti—queísi joun irájüñü—luágu buri cátei le luáguti Cristu.

2 Ába níchugun arúfudajani le ménreengunti jun, queísi líchugúniwa úri lun ában irájü le gurágili lewéñegua eígini le deréguati, lugúndun siñágili lan lájuluchun eígini le deréguati. Siñá jumuti meja líla lujúlilin-ágei larítangun Búngiu gunfaráanda, áni chülü lúmoun dan le, siñá meme jumágili,

3 lugúndun gagáburigidün queísi jagáburi lirájüñü ubou. Níjeingua ligía gimúgaü jídan, gáñiguaü, fánreinguaü, máma jígiraguagüdüña júngua lun labúgurunün Sífiri Sándu, áni jadügüñein le jadügübei sun mútu.

4 Lugúndun láu lariñagun ában. “Lánigu Páblo áu”, lariñagaya ában. “Áu lánigu Apólos”, jadügüña queísi gürigia ja lánigu ubou le.

5 ¿Cátanagi? ¿Cáteigi Apólosbei? Esériwidutiñarügü lun Búngiu wagía, ja ídaangiñébaña jíábin affiñera luágu Cristu. Wadágimanu le líchugubei Wabúreme lun cáda ában wádaangiñe, ligía wadügübei.

6 Áu ábunagubalin Lerérun Búngiu queísi nádü tídoun janígi, Apólos áturaguei nádü ligía láu larúfudajan méme jun luágu Cristu. Búngiu aweíridagüdübalin nádü, ligía edérebügüdübalin jaffiñen.

7 Ni lubeíti le ábunagubei, ni le áturagubei, ni cáta jagía, ánjeinti Búngiu, sun cátei ligía, lugúndun ligía aweíridagüdübarun nádü.

8 Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában segün luwúyeri lesériwidun lun.

9 Íbirigu wagía lídan wadágimanu esériwida lun Búngiu, jugúya, ítara jíña quei múta le luwádigimaridubei Búngiu.

Ítara jíña giñe queísi ában múna to lábunaguñounboun Búngiu.

10 Fuleísei láadina Búngiu láu líchugun ubáfu sun nun lun nuwádigimaridun úara lúma. Niábiti queísi ában wügüri le subúsijabúbei lun labunún wagábu buídu—áu le íchugubalin ébuu lun jaffiñen. Ámuti gürigia ábunagubei ligíbuagu ébuu ligía—jagía maésturugu ja arúfudajabaña luágu Jesucristu jun, nárigi. Cáda ában, lúnti goúnigi lan ída líña lan lábunagu ligíbuagu ébuu ligía.

11 Rúaaali ébuu lun jaffiñen, áni siñáti líchugúniwa ámu ébuu. Ébuu ligía, Jesucrístu guánarügü.

12 Gayáraati lábunagun gürígia ligíbuagu ébuu ligía laú cátei gebégiti le siñabei lágudúniwa, queísi gólu, pláta, lúma dúbü gebégiti, o gayáraati lábunagun láu cátei le mebégibe sarágu, le gayáraabei lágudúniwa, quei fuláansu, murísi o mabúru.

13 Lachülürüba wéyu lun louchuni Búngiu jawádigimari sun gürígia ubouágu lun laríjini ída líña lán meja, ánjein gebégi lubeí lúmoun mebégi lan. Louchagubei wawádigimaridun quei láu wátu geméti, aríja lámugei ánjein gayára lubeí lawándun, ánjein gebégi lubeí.

14 Ánjein buídu lubeí wawádigimaridun luágu Búngiu áni madúnamati lun lagünrinchawagúniwa, queísi siñá lan tagünrinchawagúniwa múna to adügütu láu cátei derébuguti, werésibirubei wafáyeiruaa lúmagiñe Búngiu.

15 Ánjein mabuídun lubeí wawádigimaridun luágu Búngiu, lagünrinchawagúba sun wawádigimari, weféridirubei sun cátei, wawánirügüba wasálbara, quei le séfugarügüti lúngua lídaangiñe wátu geméti.

16 ¿Ibídinetísan jun luágu lílígílisin lan Búngiu jugúya, áni agánawa lan Sífiri Sándu jídan?

17 Ánjoun lagünrinchagua ában gürígia lílígílisin Búngiu tugúya, lagünrinchagubei giñe Búngiu gürígia ligía, lugúndun Búngiu jabúremebei tílana lílígílisin, áni jugúya guánarügü tílanabei lígílisi tugúya.

18 Mayéeragua jumá júngua. Le arítaguti luágu sábiu lan según lichú áu le lánina ubou le, lúnti labúleiduni lichú áu ligía, lun lanügúniwa queísi ában íbídougua táu según ubou, gayára lámuga lerésibiruni lichú áu le tímatimaati le líchugubei Búngiu.

19 Lugúndun lichú áu le lánina ubou le, ában libídiouniga áu lun Búngiu. Tariñajare Lerérun Búngiu. “Áburugüda lumútiña Búngiu ja chúbaña áu según ubou le tídoun lisádaraana jabíun guánarügü.”

20 Ariñagatu giñe. “Subúdi lumúti Wabúreme Búngiu luágu mála lan jasáminan sábiugu.”

21 Ligía mouñ lubei lun janáangun júngua luágu arúfudajati le jafálarubei, ladüga gürígia rügüñadiwa sun wagiá, áni rúlaali Búngiu sun cátei jun lun lesériwidun jun.

22 Rúlaadina jun láu sun Apólos lúma Pédro, lun warúfudajan jun. Rúlaali giñe sun cátei le ubouágubei jun lun jayúsuruni. Rúlumuti giñe íbágari lúma ouweni jun. Sun le asúseredubei jun ugúñe lúma sun le lúnbei lasúseredun jun, jáni.

23 Jáni sun cátei ladüga lánigu Crístu jugúya, áni Crístu láni Búngiu.

4

Jawádigimari apóstolugu

1 Lúnti lubeiti janügúniwa queísirügü esériwidutiña lun Crístu, ja íchugúbaña lun jarúfudajani linárün Búngiu lé meja arámudaguabei jun.

2 Le lubeiti íbjiti ában wadágimanu, lúnti ladügüni buídu lun larúfuduni luágu gadüna lan lun leménigidun liyúbudiri luágu.

3 Ánjein luágu noubadina, maweírinti nebéreserun luágu ída líña lan janügüni nesériwidun lun Búngiu, ni jugúya ni furúmieguarügü le ubouáguna. Ni áu guánarügü, siñáti nariñagun ánjein buídu lubeí nesériwidun lun, o ánjein níjein lubeí mégeiti luágu,

⁴ láu sun madúnrun nan luágu ni cáta lurúma narítangun, máma lueígiñe líra lun madúnrunbadina lan, Nabúreme agúseragüdübalina.

⁵ Magúseragüda jumá lubeíti luágu buri cátei lubáragiñe dan, agúra jumá lagríbudun Wabúreme Jesucristu ubouágun lun laságaruni cátei le arámudaguabei lídoun larúgounga. Lasúbudiragüdübei Wabúreme tarítangun cáda ában anígi, ca lan ueígiñe wadúgei sun le adúga wamáalibe. Ábame ladímurejan Búngiu buíti luágu gürígia le buídubei adúga.

⁶ Nidújeñu, adímurejaadina nuouúgua lúma luágu Apólos queísi ában jémpulu jun lun gayáraabei lan jafúnrendeirun lídaangiñe le narítangubei wawouúgua. Le lúnbei jafúnrendeiruni, lun manügün jumá ában gürígia weíri lueí le lúnbei lanügüniwa, queísi bürüwañu lan, lun giñe manáangun lan ni ában lúngua luágu ában arúfudajati le lafálarubei, áni lanügeime le ában quei ni cáta.

⁷ ¿Cági adügübalibu buídu jawei jíbiri? ¿Cági cátei búmabei le mámabei líchugun Búngiu bun? Ánjeinti Búngiu lubeí íchugubalin sun cátei bun, ¿cáti uágu banáangua búngua camá jamuga íbjarügü bumúti le búmabei láu báni búngua?

⁸ Jaganoún camá jamuga rísjadün lídan cátei lánina Búngiu, íbija jumáli sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña lúma Crístu, ígira wagía. ¡Buíti jamúga lun urúeigu jumá le tímataati lun jamúga gafánran wamá lídan jarúeijan!

⁹ Laganouún nun luágu ígira láadiwa lan Búngiu wagía apóstolugu lídan lagúmujouún ubáraü. Ítara wáña queísi gürígia ja siádiwafañabaña lun ouweni, ñübinjadiwa lun ábanbadiwa lan aríawasei lun jariáguniwa sun lílana ubouú, dánda ánjeligu queísi gürígia.

¹⁰ Barúwatiwa queísi íbidiougua táu lueígiñe wesériwidun lun Crístu, sun jarítaguñu jumá juouúgua luágu chu lan jáu lídan cátei lánina Crístu. Según jugúya, wagía débilitiwa, jugúya jéretün. Barü jamutiwa gürígia quei ni cáta, ánjein jugúya, inébetün joun.

¹¹ Chülü lúmoun wéyu le, áfagaadiwa ilámaü, mágürabu, lúma manáanguni, wuribati jóuseruniwa gürígia, mábantiwa,

¹² weíríti wawádigimari láu wájabu lun wágüdaagun woúngua darí lun labúcharun wawágu. Anába jamútiwa gürígia, ába woúnabun láu abíniruni. Eíbaajouátiwa, awánda wamúti.

¹³ Adímurejatiña wuríba wawágu, rútiwa dimúrei buíti joun láu gurásu. Chülü lúmoun wéyu le, ousera jamútiwa camá ífei láni ubouú, quei cátei le mabúseerun jamáli gürígia.

¹⁴ Máma nabürüjañein le jun lun janügün busíganu, nabürüjañein jun lun narúfudajan jun queísi joun nisáanigu jínsiñetiña nun.

¹⁵ Láu sun jamúga añájein lan dísi-mílu maésturugu arúfudajatiña jun luágu Crístu, áu rügüñein júguchi lídan jafiñen luágu, ladúga áu lan anügübalin ugánu jun luágu Wasálbaragüle lun gayáraabei lan jafiñerun luágu.

¹⁶ Amúriajatina lubeíti júma lun jáyeijani nigáburi.

¹⁷ Ligía nouñajaanbalin Timotéo lun líderangunün luágu cátei le. Jínsiñeti nun sarágu, ítara líña queísi ában niraü lídan Jesucristu, gayáraati neménigidun luágu. Larítaguagüdübadün luágu ligáburi nabágaridun queísi afiñeti luágu Crístu, lun jáyeijani. Niján luwúyeri igáburi le narúfudajabei tídan sun ligílisi lídan sun fulásu.

¹⁸ Añájein jídaangiñe, buin jáña láu anáanguni únguaü, jarítaguatiña luágu mídinbadina lan bisídaün ladúga nanúfudei lun nagábigudagun júma.

¹⁹ Buléiguatiña, agúrabatina nídin aríjaün madíse, ánjein busén Wabúreme. Ábameti naríjini ca lan jayáraabei barügua túngua ja adüga lun jesériwidun lun Búngiu, mámarügü le jariñagubei.

²⁰ Lugúndun dan le larúeijan Búngiu tidan wanígi, máma láurügüti dimúrei, níjein lubáfu wádan lun wadügüni lugúndan.

²¹ ¿Cáteiti jímein jubeí. lun nabeichunün dánme le nachülürün, ódi lun nídin aríjaün láu ínsiñeni lúma uálini?

5

Lagúserawagüdüñ ában le adügübei figou

¹ Agaambúaali luágu níjein lan ában jídaangiñe lagámariduñoun lúmari lúguchi. Ában oúnwenbun iwíyei líra, le majouábei lun ni jádan ja ibídiñejabubaña lun Búngiu.

² ¡Áni laú sun líra, anáanguagidün júngua! ¡Lúntirügü jamúga jírudagun luágu líra! Gürígia le adügübalin lanárimé iwíyei le, lúnti labugún jídaangiñe.

³ Láu sun úa nan júma le ñí jubei, anájein júma narítangunrugu, áni darínaali lidúnrun le adügübalin figou le, camá jamuga ñíñadina júma lun nagúseragüdüni.

⁴ Guetó, le lúnbei jadügüni, lun jóúndaragun lídan líri Wabúreme Jesucristu, ñíbadina júma narítangunrugu, ñíbei giñe lubáfu Wabúreme Jesúsu júma.

⁵ Lúnti lubeíti jedéregeruni wügüri ligía lun Máfia láu jaságaruni lídaangiñe jídamurin, lun lagünrinchawagún lúgubu, sálba támuga luwáni dánme le lagíríbudun Wabúreme Jesúsu ubouágun.

⁶ Moún lumuti janáangun júngua luágu le jadügübei. ¿Magáambun jumágili cáte le. résigüda lumútu murúsun ísi sun fulúwaaru to ídounboun líchugúa? Ítara méme giñe, murúsun figou jagánagua gayáraati lagádeirunün súngubei.

⁷ Gídájumei lubeíti sun iwíyei le lánina binádu igáburi le ígirubei jídan, le ítarabei quei ísi le pasáli. Ábame jarúma jumá le tímataati. Ítara júba quei fein to eigíboun lídan fédu le páscua, to adügübon táu fulúwaaru to sún umuti tañoúndawagún, to magánatu ísi. Jarúmaali wadáriragun woúngua ligíbugiñe Búngiu ladüga derége láani Búngiu Cristu lun loúnwen luágu wafígoun quei meja ladágaragüdüniwa mudún lídan fédu le páscua luágu figou.

⁸ Ítara líña lubeíti, queísi sálbaadiwa lan, lúnti wagáburidun ában igáburi jarúmati, falá wameíme inárüni. Igáburi ligia, ítara líña quei fein to magánatu ísi. Moún lumuti wagáburidun queísi meja wagáburidun furúmiñe, moún lumuti wouserun wuríba, ni lun wasígirun láu tiwíye wanígi. Sun igáburi ligía, ítara líña quei ísi pasáli.

⁹ Aríñagatiná meja jun tidan to ában nigáradan luágu moun lan lun jeréderun lídan ában jáma ja abágaridubaña lídan salúfuri.

¹⁰ Máma meja naríñaguña jun lun jadísedun le gumúti jawei sun lirájüññ ubou le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun ubouagugiñe.

¹¹ Le nabúseerubei naríñagun jun, lun meméterun jumá lúmoun ni ában le aríñaguti luágu idújei lan lueígiñe Jesucristu áni salúfuriti, o meménijabuti, o judúguati joun sándu, o marásualuguti, bachárúa o jíweru. Moún lumuti ni lun jeígin lúma idújei le ítarati.

12-13 Mâma áu lúnbei nagúseragüdúniña ja bougudibaña lueí Crístu, Búngiuba agúseragúdaña. Wagía, lúnti wagúseragüdúniña wadújeñu lueígiñe Jesucrístu ánjein jadügúña lubeí wuríbati. Ligia gidájumei lubeí gafígounti le jagánaguagiñe.

6

Wuríbu buri jagíbugiñe agúseragüdútiña ja máma afíñetiña

1 Dan le níjein lan cátei lúnti lariñaajan ában jídaangiñe líri ámu, ¿cági uágu jídin jámoun agúseragüdútiña ja ibidiñebei Crístu joun, lubáragiñe jamúga jídin jámoun lánigu Búngiu?

2 ¿Ódi ibidiñeti jun luágu jagúseragüdúbaña lan lánigu Búngiu lánigu ubou? Ánjeinti jagúseragüdúbaña lubeí lánigu ubou, ¿siñá jumuti buri cátei ñúbüriti le aránsara?

3 ¿Ibidiñeti jun luágu wagúseragüdúbaña lan giñe ánjeligu? ¡Gúbuméti gayára lan wagúseragüdün luágu buri cátei lánina ibágarí le!

4 Ánjein níjein lubeí buri wuríbu jagánagua luágu buri cátei le lánina ibágarí le, ¿cámegi jídin aríñaaja joun ja mafíñebaña luágu Jesucrístu, ja málabei lichú áu le jádaanbei ladüga máma lan lúmagiñeti Búngiu?

5 Naríñaguñein le lun janügün busíganu. ¿Úati funági íbini ában chu táu jídan le gayáraati laráanseruni ában cátei jádan lidújeñu lueígiñe Jesucrístu?

6 ¿Lúnti lídin ában idújei aríñaaja líri lidúje joun agúseragüdútiña ja mafíñetiña luágu Crístu?

7 Láurügü jawúribujan júmagua, ábanjali mabuíduni le gumúti líra. Buítimaati lun jawánduni maríchaü le adügübei jun sügü láu jageíndagun ladüga. Buítimaati lun jígirun lun líwerujoún jueí.

8 Ánjein jugúya, lubáragiñe líra, adúgatün maríchaü, íweruja jugúya, íbini jaweí jidújeñu guánarügü.

9-10 ¿Ibidiñeti jun luágu ja lan adügübaña wuríbani, mafánranbaña lan lídan larúeijan Búngiu? Sun ja agámaridubaña mamárieidunga, ja ájuduragubaña joun sándu, ja agámaridubaña ja maríetiña, ja wügüríña ja agámaridutiña wügüríña jáledi, jíwerutiña, meménjabutiña, bacháruatiña, marásualugutiña, ja anügübalin lání ámu láu jabíbun—sun ja adügübaña wuríbani líbe buri le, siñábei jebélurun lídoun larúeijan Búngiu siélu.

11 Añájein jídaangiñe, ítara jañá meja, ánjein guetó, chibáwaali jífigoun, derégeguaadün júngua lun Búngiu, áni resíbi láadün queísi lánigu ladüga le ladügübei Wabúreme Jesúsú juágu, lúma sun le ladügübei lání Búngiu Espíritu juágu.

Wágubu, ában cátei derégewati lun Búngiu

12 Aríñawagúati. “Gayáraati ladügüni gürígia le labúseerun ladüga.” Inárüni líra, áni máma sun cátei lun buídu lan lanügün. Gayáraati ladügüni gürígia le labúseerun, wel, mouñ lumuti lígiraguagüdün lúngua lun lagúmadiruni layúmajan.

13 Inárüni le aríñawagübei luágu ladügüni lan Búngiu eíginí lun weíginí, adúgaleí warágeirugu lun ladügüni wadágimanu láu weígin. Inárüni, áni lagúmuchaguagüdübei Búngiu biángubei cátei le, mamégeirun wamáalime. Ánjeinti wágubu, madügünti lun wadügün salúfuri láu, ladügün wágubu lun

Crístu, lun ligíaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu.

¹⁴ Ítara quei lásaaragüdüni Búngiu Crístu lídaangiñe ouweni láu sun lúgubu, lásaaragüdübadiwa giñe láu sun wágubu, láu lubáfu.

¹⁵ ¿Ibidiñetisan jun luágu líbiri lan cátei le únbei wagúara lúgubu Crístu cáda ában jídaangiñe? ¿Nanúgeiméti núgubu le líbiribe lúgubu Crístu lun nadügüni líbirime túgubu ában jóru? ¡Madügün nubei!

¹⁶ ¿Ódi ibidiñeti jun luágu dan lan le leméterun ában gürígia túmoun ában jóru, biángubei jagía ñúbintiña lun ítara jabá lan quei ában méme úgubu? Taríñajare Lerérun Búngiu. “Jayábinba biángubei lun ítara jamá quei ábanrügü.”

¹⁷ Ánjein dan le liábin ában gürígia lun lídan lan ában lúma Crístu, ában liábin láni Crístu Espírítu lun ában lan lúma láni gürígia ligía espírítu lun ábanrügü jamá espírítu.

¹⁸ Anúraja jumá lubeíti luei salúfuri. Mítaraanti salúfuri queisi ámu figou, furúmiñegarügü ámu figou le jadüga gürígia, bougudin luei jágubu ladüga dáñu, ánjein le agámariduti mamárieidunga, ladügüña figou luágu lúgubu guánarügü.

¹⁹ ¿Ibidiñeti jun luágu lúban lan Sífiri Sándu wágubu, le líchugubei Búngiu woun lun laganouñ wádan? Máma wagía labúriñabei wágubu, Búngiu labúremebei.

²⁰ Agáñija lumútiwa Búngiu séru lun lánigu wamá. Ligía lúnti lubei wíchugun inébesei lun Búngiu dándu láu wágubu quei láu wáni espírítu lugúndun láni Búngiu biángubei.

7

Dimúrei buri luáguti maríei

¹ Guetó nouñabaali lé buri uágubei jálügüdana tídan jigáradan to jabúrújaboun nun. Inárüni luágu buídu lan lun wügüri lun magámaridun lan,

² quei njein lubei sarágu salúfuri, buítimaati lun lagámaridun wügüri, lun giñe tagámaridun würi, súnwandan láu amárieiduni.

³ Lúnti lagúnfulirun wügüri túma lúmari queisi úmari, lúnti giñe tagúnfulirun würi lúma túmari.

⁴ Máma úmari to würi labúremeboun túgubu guánarügü, láni giñe túmari. Máma giñe úmari le wügüri labúremebei lúgubu guánarügü, táni giñe lúmari.

⁵ Mamájara jumá lun jesériwidagun júniwagua, ánjañ gubeírügü adüga darádu lun mayúsuragun jumá júngua luágu átiri dan lun jíchaagun júngua lúnrügü jayúmuragun lun Búngiu. Lárigiñe líra, lúntiya jayúsuragun júngua, luei lásiñerun jágüdaagun júngua, ábame laffigoungüdünün Máfia láu jeméterun jámoun ámu jawei jámarigu.

⁶ Máma nariñaguña luágu lúnti lan jagámaridun, gayáraarügüti jáluajan úmari lun jamárieidun jáma ánjañ busén.

⁷ Áu, buséntina jamúga lun sun lan gürígia gayára lan jágüdaagun jóungua lun magámaridun jamá queisi áu. Subúdi numúti luágu siñá lan ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸ Ja mámarigiñabaña, jáma ja jíláañabaña úmari, aríñagatina joun luágu buídu lan jamúga lun jeréderun mámariga queisi áu,

⁹ ánjein siñá lubei jágüdaagun jóungua, buíti lun jagámaridun (súnwandan láu amárieiduni) sügü láu lun jeréderun láu ában luweírin ayúmajani le siñábei jawánduni.

10 Ánjaña ja maríeijañabaña, aríñagatina joun lun mígirun táani wúri túmari. Gumádi le, lídan lubúdubu máma nugúmadin, lugúmadin Wabúreme.

11 Láu sun líra, ánjein tígira wúri túmari, lúnti teréderun mámariga, o taráandarun lan lúma túmari. Moún lumuti gíñe lígirunun wügúri lúmari.

12 Joun jíbiri, aríñagatina queísi dimúrei le náni, máma láni Wabúreme, luágu ánjein lan mafiñen tubei lúmari ában le afiñeti luágu Crístu, áni gagúndaantu lun tasígirun agánawa lúma, moún lumuti lafánreinragun túma.

13 Ánjein gíñe mafiñen lubei túmari ában wúri to afiñetu luágu Crístu, áni gagúndaantu lun lasígirun agánawa túma, moún lumuti tafánreinragun lúma.

14 Úmari le mafiñebeí, derégewaali lun Búngiu láu lídaañein lan ában túma lúmari to afiñetu luágu Crístu, úmariti to mafiñetu, derégewaaru gíñe lun Búngiu láu lídaañoun lan ában lúma túmari le afiñebeí luágu Crístu. Lun jamúga máma líña lan, ítara jáña jamúga jisáanigu quei jasáanigu ja mafiñebaña, ítara, derégewaño jáña lun Búngiu.

15 Ánjein busén lubei úmari le mafiñebeí luágu Crístu lun lígirunun lúmari, o wúri to mafiñeboun lun tígiruni túmari, ígiragua jamá. Lídan oubaú líra, moún lumuti jafósuruníña úmarigu ja afiñebaña úmarigu ja mafiñebaña lun jeréderun jáma, lugúndun wájali Búngiu woun lun wabágaridun lídan darángilau.

16 Ában gíñe cátei, ¿cági basúbudirubei, amürü wúri, ánjeindügü gayára lubei basálbaruni búmari láu beréderun lúma? ¿O cági basúbudirubei, amürü wügúri, ánjeindügü gayára lubei basálbarunun búmari láu beréderun túma?

17 Lídan sun luwúyeri, lúnti labágaridun cáda ában quei líchuguni Wabúreme lun, áni quei lubei meja gíñe, dan le lagúarunbei Búngiu lun lun lánigu lan. Ítara líña naríñaguni tídan sun ligílisi.

18 Ánjein agúara Búngiu lun ában gürígia le resibi láalibeí circuncisión, lé meja liseíni lídaradun Búngiu jáma lánigu, lúnti leréderun ítara, ánjein gíñe agúara lun ában le merésibirungili circuncisión, moún lumuti lerésibiruni.

19 Mebéresenwati ánjein resibi lubei circuncisión lúmoun merésibirún lán, le busénwabei, lun lagúnfulirúniwa lugúmadin Búngiu.

20 Cáda gürígia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan.

21 Ánjein meja idámuni bubei dan le lagúarunbei Búngiu bun, madíjeribá luágu líra, ánjeinrügü líñáti gayára lubei báfuridun lídaangiñe idámuni ban, adúgabeí.

22 Lé meja idámunibeí lun labúreme ya ubouágu dan le lagúarúnbei lun lun lafiñerun luágu Crístu, gidáali lueí lubáfu figou lun lesériwidun lun Wabúreme Jesucrístu, ítara méme gíñe, lé meja mámbabei idámuni lun ában gürígia ubouágu dan le lagúarúnbei lun, lidámunjali Crístu, ligíajali Labúreme.

23 Agáñija láadún Búngiu luágu ouñwenbun ebégi, mígira jumá lun janügünün wügúriña lidámunme jagúndan, lidámun jumá lugúndan Búngiu.

24 Ítara líña lubeíti, nidújeñu, madíjeri jumá cátañañadún lan bougudigiñe jibíti, reidei jumá ligíbugiñe Búngiu lídan méme igáburi lé meja gádaanbalún dan le lagúarunbei jun.

25 Jawágu gürígia ja mámarigiñabaña, úati ni ában gumádi núma le jamúga lúmagiñeti Wabúreme, naríñagaali le narítangun, áu queísi ában le gadúnati lun lafiñerúniwa luágu, luágu lareíni Wabúreme le rújalibeí murúsun lídaangiñe lichú láu nun.

²⁶ Lídán narítagun, lúnti leréderun gürígia quei lubei, ladüga buri lidére dan le gádaanbaliwa.

²⁷ Ánjein gámari bubei, málugabá bígiragun, ánjein mámari bubei, málugabá bagámariidun.

²⁸ Ánjabu amárieida, máma figou, ánjoun gíñe amárieida ában irájü, máma gíñe figou, láu sun líra, ñíbei asúfuriruni joun ja gámaribaña, áni buséntina jamüga masúseredun lan líra.

²⁹ Nidújeñu, niján le nabúseerubei naríñagun. Murúsun rügáli dan wabá lun wesériwidun lun Búngiu. Lúmagiñe lubeiti guetó, ja gámaribaña, lúnti jesériwidun lun Búngiu táu sun janígi camá jamuga mámaritiña.

³⁰ Moún lumuti wíhugun dan lun íruni o ugúndani le gádaanbaliwa, o lun umégeguni le wámabei, lun lagídaruníwa luei wadügüni le lúnbei wadügüni quei esériwidutiña lun Búngiu, ladüga louguati dan.

³¹ Esáminara jumá sarágu luágu lubuidun cátei lánina ubou le, le jánibeí lun jayúsruni, ladüga ubou le, le waríjibeí, lagúmuchaña, lúnti jarítagun luágu cátei le magúmuchadibeí.

³² Buséntina lun madíjeri lan jarítagun luágu ni cáta. Dan le mámari lan ában wügüri, larítagun luágu buri cátei le luáguti Búngiu lúma lun lesériwiduni buídu.

³³ Ánjeinti dan le gámarijali, larítagun luágu buri cátei le lánina ibágari le, lúma lun lesériwidunun lúmarí buídu,

³⁴ biánguáñein cátei lun leténirun lun—lun lesériwidun lun Búngiu lúma lun latoúnigirunun lúmarí. Ámuti gíñe touserun würi maríeitu tuei to mámariboun. To mámariboun, tarítagun luágu buri cátei le luáguti Wabúreme Búngiu, lun derégeguñu tan túngua lun Búngiu dándu láu túgubu queisi táu tanígi. Ánjounti to gámariboun, tarítagun luágu buri berésegu lánina ibágari le, lúma lun tesériwidun buídu lun túmari.

³⁵ Naríñaguñein le jun luágu jáni fuleisei, máma naríñaguñein lun mamárieidun jumá. Naríñaguñein lun jabágaridun lídan ában igáburi le buíti, esériwideina lun Wabúreme, derégeguñu júngua lun, marítagungá sarágu luágu cátei lánina ibágari le.

³⁶ Agübürigu ja arítagubaña luágu buídutima lan lun tamárieidun jaraü lugúndun tawéyaaduña lan, áni ánjein buítima lubei líra, lúnti jadügüni le uágubei jarítagua luágu buídu lan—gayáraati jíhugunun lun tadári lun tamárieidun lúma, máma figou líra.

³⁷ Ánjein añájein lubei ámu agübürigu, derégüdaguatiña lídan jarítagun luágu moún lumuti lan lun tamárieidun jaraü, áni memégeiruati lun tíhugüniwa, áni gayáraati jadügüni le jabúseerunbei, buíti jadüga lun míhugun jamánun jaraü lun tamárieidun.

³⁸ Ja lubeiti íhugutu jaraü lun tamárieidun, buíti jadüga, ja míhuguntu, buítimaati jadüga.

³⁹ Würi to maríeitu, lábugiñeñoun leréreejan túmari, lurúma lúrudu, sun wínwangili lan, ánjein ouwe túmari, gayáraati tamárieidun lúma le tabúseerun, afíñeti rügáli ligia luágu Cristu.

⁴⁰ Láu sun líra, buítimaabei dan tun ánjounya mamárieidun. Ligia narítagunbei, áni afíñetina luágu ligia lan gíñe larítagunbei láni Búngiu Espíritu.

8

Eígini buri le adágarawagüdüti joun sándu

1 Guetó nadímureja luágu eígin le adágarawagüdüti joun sándu. Inárüni luágu subúdi wamáni luágutí buri cátei le, queísi jariñaguni, awáansegüda lumútiwa wasúbudin lídan cátei málati, ánjein ínsifeni, awáansegüda lumútiwa lídan lubuídun igáburi.

2 Le arítaguti luágu njein lan lasúbudirun, ibídiñegilirügü líña ni cáta lun queísi lubúdubu.

3 Ánjein le jñsiñejabúbei lun Búngiu, subúdi lumúti Búngiu gürígia ligía queísi lánigu.

4 Luáguti lubeíti leigín eígin le adágarawagüdüti joun sándu, inárüni luágu ni cáta jamá sándu ubouágu, máma jamá búngiugu ladüga subúdi wamúti luágu ában rügüñein lan Búngiu.

5 Añájein mútu ubouágu, jarítaguatiña luágu añájein lan bürübünu búngiugu jáma abüremeigu siélu lúma ubouágu,

6 ánjeinti woun, wagía le afíñebei luágu Crístu, ában rügüñein Búngiu, le Wáguchibei. Ligía adügübalin sun cátei, áni ligía le únbei wesériwida táu sun tarúman wanígi. Ában rügüñein gíñe Wabúreme, le Jesucrístu, le ídaangiñebei ladügüwa sun cátei, áni ligía le ídaangiñebei wibíjei íbágarí magúmchaditi.

7 Másutiña ja afíñebaña luágu Crístu gayára jafíñerun luágu ni cáta jamá sándu, añájein já meja jéchubaña ájuduragua joun sándu, jou jamágili eígin ligía queísi cátei adágarawagüdüti joun búngiugu. Queíti lougua lubeí jafíñen luágu gayára lan jeígin afíñetiña eígin ligía, ába mabuídun lan lasándiraguagüdüniña joungua ligíbugiñe Búngiu láu jeígin eígin ligía.

8 Inárüni le jariñagubei luágu máma lan cátei le weígíbei gayáraagüdübalin lerésibiruníwa Búngiu, mabuíduntimaabadiwa ligíbugiñe Búngiu lueígiñe weígin, maríbaduntima wagiame lueígiñe meígin wáma.

9 Gayáraati jeígin eígin le adágarawagüdüti joun sándu, lúntirügü goúnigi jumá lueí jeíguadagüdüniña jidújeñu lueígiñe Crístu ja louguabaña jafíñen ánjein buídu lubeí lúmoun mabuídun lan.

10 Quei jamúga guetó, amürü le subúdiabúbei luágu gayára lan beígin furúmiegurügü eígin, bañúura eíga lídan ában fulásu le jouñti sándu, laríjabu ában idújei le débiliti laffíñen luágu buri cátei le, ñi, lanügüba gurásu buágu lun gíñe leígin lídaangiñe eígin le, le adágarawagüdüti joun sándu.

11 Ítara, ladüga bisúbudin, féridigüda bumúti bidúje le débilibei lídan laffíñen le gíñe ueígiñebei louwe Crístu.

12 Dan lubeíti le jañáwaríjan jarítagun idújeñu ja débilibaña lídan jafíñen, jadügüña lun jaffgounjan jidújeñu, áni jugúya guánarügü jaffgounjaña gíñe.

13 Ligía, ánjein lubeí náburugüda nidúje lídoun figou ladüga cátei le neígíbei, buítimaati lun meígingüdüya nan úwi lueí nafigounjagüdüni.

9

Lirícha buri ában apóstolu

1 Áu, furáangutina lun nadügüni le nabúseerubei, garíchatina gíñe queísi ában apóstolu, aríja náali Wabúreme Jesúsu, áni jugúya guánarügü asálrubaña lídaangiñe nuwádígimariidun luágu Wabúreme.

2 Fágua manügün jabádina jíbiri queísi apóstolu, ánjeinti jugúya, gásu janügünina queísi apóstolu, lugúndun láu afíñe jumá luágu Crístu, arúfuda lumúti líra luágu inárüni lan luágu ában nan apóstolu.

3 Niján nouñabagübebei joun ja adímurejabaña nuágu.

4 Garíchatina lun nerésibiruni sun le íchugúbei nun lun neígini lúma lun nátuni queísi nafáyeiruaja luágu nuwádigimari luágu jáni fuleísei.

5 Garíchatina gíñe lun namárieidun túma ában wúri to affínetu luágu Crístu, lun gíñe nanúgúnun númagua luágu nuweíyasun quei ladügüni Pédro jáma ja jíbiri apóstolugu, jáma gíñe ja lamúlenu Wabúreme.

6 ¿Ódi jarítaguatün luágu áu rügüñein lan lúma Bernabé marícha lun werésibirun wágüda ja júmagaíñe lun gayára lan wígiruni wawádigimaridun láu wájabu lun wapúrichijani Lerérun Búngiu?

7 Queísigubeirügü, máma súdaara guánarügü afáyeirubalin cátei lé buri layúsurubei, le ábunagubei beíbei, jóuti tídaangiñe, le oúnigirubei bágasu, guráti lídaangiñe míligi le lamíligijabei.

8 Áni marítagua jumátia luágu naríñaguñein lan le queísirügü jarítagun gürígia, lugúndun aríñaga lumúti gíñe lilúrudun Moisés.

9 Laríñajare tídan lilíburuna lúrodu. “Magüraguabei liyúma bágasu le lánina wadágimanu lueí léigin lídaangiñe ílaü le léferejabei.” Máma laríñaguñein Búngiu líra jawágurügü bágasu,

10 lariñaguñein gíñe queísi ában jémpulu woun. Luágu wáni fuleísei labürüdüwa lúrodu le, lugúndun dándu le awoújabalin múa, queísi le éferejabalin líla nádü, lúnti jadügüni láu eménigini luágu jerésibirubei lan jafánran lídaangiñe alúbajani.

11 Queísi bunágua wamáali lubeí Lerérun Búngiu tídan janígi, ¿gíbeti funági larijín jun lun walúbajan murúsun cátei júmagaíñe lun wágüdaagun woúngua?

12 Ánjein garícha jabeí ámu lun líra júmagaíñe, garíchatimáatiwa.

Mayúsu wamúti iríchaü le wawágubei. Lubáragíñe líra, awánda wamáali sun le wemegeirubei lueí lejénreendun jun agáambeí wapúrichijani Lerérun Búngiu, ladüga wamúriajan wágüda ja júmagaíñe.

13 Subúdi jumúti luágu ja lan ñadágimeinbaña ligílisirugu, lídaangiñe le ligílisirugubei jawínwanda. Ja eténirubaña lun latárü le ñi lubei líchugúa adágaragüdüni, jóutiña úwi jádaangiñe anímaalu ja adágarawagüdübaña ñi.

14 Ítara líña gíñe lariñaguni Wabúreme Jesúsü lun ja lan apúrichijabalin ugánu luágu, lun gíñe jádaangiñe lan ja agáambubalin ugánu ligía jawínwanda.

15 Áu, mayúsugidina ni ában lídaangiñe iríchaü le, máma gíñe nabürüjañein le jun lun jíchugun som cátei nun. ¡Jímein numúti nouñwen niláma lubáragíñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

16 Máma cátei lúnti napántajan luágu láu napúrichijani ugánu luáguti asálbaruni jun, lugúndun mósu nadügüni. ¡Fugiábu áu ánjein mapúrichijan nan ugánu le!

17 Lun jamúga mínsiñe lan nun lun napúrichijan, láu sun luwúyeri mósu nadügüni ladüga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeiruajatina,

18 afáyeiruajaü ligía, lun gayára lan napúrichijan luágu Wasálbaragüle, magúburajanga ni cáta, márügüdünganeí nírícha lun nawínwandun lídaangiñe nuwádigimari queísi apúrichijati.

19 Láu sun mábuti nan ouóagu lun nagáambuni, rúguaadina núngua jadámunme súnigubei, lun nagáñeirun sarágu gürígia lun Crístu.

20 Dan le jagánagua nan juríu, ába nadügün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua

lábugiñoun lúruđu ligía lun nagáñeiruniña, láu sun mámañadina lan lábugiñe lúruđu ligía.

²¹ Lun nagáñeiruniña ja mábabaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubei lilúrudun Crístu.

²² Dan le jáma nan ja louguabaña afiñe luágu cátei le gayáraabei jadügüni afiñetiña, madügüntina ni cáta le uágubei jarítagua luágu mabuídun lan ladügüniwa, lun gayára lan nagáñeiruniña. Rúguaadina núngua queisi cáda jawúyeri güriúa lun añájein lan nasálbarun lídan furúmiegurügü luwúyeri.

²³ Nadügüñein sun le lun lasúbudirüniwa ugánu le lánina asálbaruni, lun gafánraanbadina lan lídan buíđu le lanügübei ugánu le.

²⁴ Subúdi jumúti luágu gíbe jamá eíbaagutiña lídan ában eíbaaguni, áni ában rügüñein jádaangiñe agáñeira. Eíbaagua jumá lubeiti lídan ibágari le lídan ában luwúyeri lun gayáraabei lan jagáñeiruni ledéweejan Búngiu jun.

²⁵ Sun ja aráansejabaña lun jebélurun lídoun juráraü, jóuchatiña lun madügün jamá ni cáta le gayáraabei lásiñeragüdüni jájurerun. Áni jadügüni lun jagáñeirun ában rídi le láuti ubánaü. Ánjeinti wagía, wáfaaguña lun wibíjin ában rídi siélu le lúnti ladúrarun lun sun dan.

²⁶ Áu, neíbaaguña lídan ibágari le, rúñunei naríjin luágun ubuíduni le lúnbei líchuguni Búngiu nun, siélu. Mítaraantina queisi ageíndaguti le agáyuajabei garábalirugu,

²⁷ lubáragiñe líra, áfara numúti lugúndan nügubu, fósunei lun lagáambunina, luei lubeigia neféridiruba lan lárigiñe buga arúfudajadina lan joun ámu luágu lubuídun üma lun wachülürün lúmoun Búngiu.

10

Dimúrei luágu ájuduraguni joun sándu

¹ Nidújeñu, buséntina lun narítaguagüdünün luágu le meja asúseredubei joun bináđu wagübürigu lídan le meja lídan jamá fulásu mageírawati, luágu ñiñein lán meja Búngiu lídan ában juánriñu jóugiñe lun loúnigiruniña. Séfuti giñe lanügüniña súnubei dan le jájiñuragunbalin Barána Funáti.

² Ítara líña queisi ában abásteruni joun láu jásügürün labádinaguagiñe barána, lúma juánriñu jóugiñe. Lídaañanu ában lúma Moisés lun jafálaruni ladüga ligía lan abúgurubaliña.

³ Jóutiña giñe sun jagía lídaangiñe ában méme eígini le líchugubei Búngiu joun, siéluigiñe,

⁴ rúati giñe dúna joun súnubei lídaangiñe ában dübü lun játun. Ñiñein Crístu jáma luágu sun jawéyasun lun fuleisei lániña láu dúna lun játun.

⁵ Láu sun líra, madügün jamúti jíbe-ágei lugúndan Búngiu, ába lamágundarun Búngiu jáma. Ligíati jóüwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, quei meja jadügüni.

⁷ Ligía májuduragua jumá lubei joun sándu quei meja jadüga jádaangiñe, queisi tariñaguni Lerérun Búngiu luágu jefédujan joun sándu. “Ába jañúurun güriúa eíga lúma áta, lárigiñe, ába jásaarun eféduja.”

⁸ Moún lumuti wadügün salúfuri quei meja jadüga jádaangiñe, ába larúfuduni Búngiu luágu wuríba lan le jadügübei láu louwegüdüniña mílu güriúa jádaangiñe lídan ában wéyu.

9 Mouñ lumuti giñe wáluajani lében lugúraasun Búngiu woun láu luríban wagáburi, quei jadügüni jádaangiñe, ába jóüwegun láu lágüragüdüniña joun jéwe.

10 Mamágundara jumá giñe lúma Búngiu quei jadüga jádaangiñe, ába loúnajani Búngiu ánjeli lun láfaraguniña jilágubei.

11 Suséreti sun le joun binádu agübürigu, ába labürüdün tídan Lerérun Búngiu queisi jémpulu woun, wagía le wíwanbei lídan lagümüjóun dan le, lun wasúbudiruni buídu luágu mínsiñe lan figoú lun Búngiu.

12 Le lubeíti jarítaguabei luágu derégüdagua lan leíbugun lúma Búngiu, toúnilá, máburujalá lídoun figoú.

13 Oúchwaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigidun luágu Búngiu, mígirunbei lun jibíjin oúchwaguni le jásiñerun awánda. Lubáragiñe líra, dánme líabin oúchwagüni, larúfudubei giñe Búngiu jun ída lúba lan jáfuridun lídaangiñe, ítara lúba gayára lan jawánduni.

14 Ligía lubeíti, nidüjeñu jínsiñetiña nun, mádaragua jumá júngua lídoun cátei le jánina sándu.

15 Nadímurejaña jun queisi joun güriúa gunfaráandatiña, samína jumá júngua ánjein buídu lubei le nariñagubei jun, lúmoun mabuídun lan.

16 Dan le werésibirun, dan le wátun lídaangiñe uníñein le uágubei wíhiga eteingiruni lun Búngiu, arúfuda wamúti luágu lídaañadiwa lan ában lúma Crístu luágu líta le áwiyurubei, dan lé meja loúnwenbei luágu gurúwa wawágu. Dan le weigin tídaangiñe fein to wagúbachaguboun, arúfuda wamúti luágu lídaañadiwa lan ában lúma Crístu luágu lúgubu le ledéregerubei lun oúweni luágu gurúwa ligía.

17 Queisi jou wabei tídaangiñe ában méme fein, arúfuda lumúti líra luágu lídaañadiwa lan ában láu sun gíbe wamá.

18 Aríja jumá lun násiñun le linásiñun Israél. Ja eígibaña lídaangiñe eígini lé buri adágarawagüdüti lun Búngiu luágu latárü, lídaañañu lan ában jámagua, lúma lúma Labúreme latárü.

19 Máma nariñaguña luágu wíwan jamá sándu, mariñaguntina giñe luágu weírgutima lan úwi le adágarawagüdübei joun sügü láu ámu úwi.

20 Le nariñagubei, luágu dan lan le jadágaragüdüni ja ibídiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu.

21 Siñáti játun lídaangiñe licópun Wabúreme Jesucrístu úara lúma játun lídaangiñe jacópun máfianu. Siñáti giñe jeigin luágu lidábulan Wabúreme Jesucrístu úara lúma jeigin luágu jadábulan máfianu.

22 ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági luei Búngiu lun manúfudebadün lan luei ligáñi?

Lúnti jínsiñejabu jamá lánigu Crístu

23 Inárüni le aríñawagübei luágu gayára lan jadügüni güriúa le jabúseerun, láu sun líra, máma sun cátei buíti láburujan. Gayáraati jadügüni güriúa le jabúseerun, láu sun, máma lan sun cátei lun líderaguniña ámu güriúa lun jóüdin jabáruaguóun lúma Crístu.

24 Lúnti warítapun luágu le buídubei joun ámu güriúa, mámarügü lan wa-
woúguoun warítagua.

25 Niján le lúnbei jadügüni luágu úwi. Joujuma lídaangiñe sun cátei le alúgurajoubei mágidirugu, málügüdajanga jugúya ánjein dágüdawa lubei joun sándu lúmoun madágarawagüdün lan,

26 maribadalá jarítangun luágu, gayáraati jeígini, lugúndun láni Wabúreme múa láu sun le lídaanbei.

27 Ánjaün lamísuraja ában güriquia le mafiñeti luágu Crístu lun jídin eíga lúma, gayáraati jídin ánjaün busén. Joujumei le íchugúti jun, málügüdajanga ni cáta, mebéresen jumá ánjein dágüdawa lubei eígini ligía joun sándu furúmiñe, lúmoun madágaragüdünwa lan.

28 Ánjein aríñawagua jun luágu dágüdawaali lan eígini ligía joun sándu, meíga jumei, luei jadügün dáñu lun le aríñagubalin jun, luei gíñe laríbadun larítangun.

29 Nadímurejañatia luágu larítangun le ában, máma luágu barítangun.

Gayáraati jamúga funa laríñangun mútu. “¿Cásan uágu lúnti lubei lafálaruni ában güriquia le larítangun ámu?”

30 Ánjein gayára lubei níchugun eteíngiruni lun Búngiu luágu le neígibei, ¿cábago uágu jadímureja nuágu lueígiñe neígini?”

31 Ánjaün lubeiti eíga o áta o jadügün furúmiegurügü cátei, adúga jumei súngubei lídan ában luwúyeri le íchugubei inébesei lun Búngiu.

32 Míchiga jumá lébuna eíguaduni lun ni ában, ni joun juríu, ni joun ja mámabaña juríu, ni joun ja lánigu Búngiu.

33 Áu, jóuchatina lun nagúndaaragüdüniña súngubei lídan sun cátei, máma rügüñein nuóúga narítagua, jarítaguatina gíñe jawágo jíbiri lun gayáraabei lan jayábin lun jafiñerun luágu Jesucrístu lun jasálbarun.

11

1 Áyeija jumei nigáburi queísi náyeijani ligáburi Crístu.

Würíña lídan jóundaragun afiñetiña

2 Nidújeñu, gúndaatina jáu luágu súnwandan lan jarítangun nuágu, lúma luágu falá jumaní arúfudajani le níchugubei jun.

3 Guetó, níjein ámu arúfudajani le nabúseerubei lun gunfaráanda jumáni, luágu Crístu lan lichügüdinabei cáda wügüri, wügüri tichügüdina lúmari, itara quei Búngiu lan lichügüdinabei Crístu.

4 Nibúsigarídünati lun ladáuragun ában wügüri láu lábulugu dan le layúmuragun lun Búngiu, eteíngirei lídan jadámurin afiñetiña, o dan lan le laríñangun ugánu le ladímurejan Búngiu liyúmulugugiñe wügüri ligía, ladúga láu líra, larúfuduñein luágu níjein lan ában wügüri weirigutimaati lanügüni luei lídan adamurini ligía, áni Crístu rügüñein weirigu jádan sun wügüriña.

5 Nibúsigarídünati gíñe lun madáuragun tan würi láu tábulugu dan le tayúmuragun lun Búngiu, eteíngirei lídan jadámurin afiñetiña, o dan lan le ladímurejan Búngiu tiyúmulugugiñe, ladúga láu líra tarúfuduñein tamájarun lun tanügüni wügüri weirigu sügü táu, wuríbatí líra, queísigubeirügü jamúga lasarún tídiburi queísi wügüri.

6 Ánjoun madáuragun ában würi láu tábulugu, buítimaati lun tásaruni sun tídiburi, áni ánjein busíganudüna lubei tíbuguni würi tídiburi o tásaruni lan tábulugu, darúguatá láu tábulugu.

7 Moún lumuti ladáuragun wügüri láu lábulugu lídan jadámurin afiñetiña lugúndun liyáwa Búngiu ligía, áni arúfuda lumúti luweirigun Búngiu. Ánjounti würi, arúfuda tumúti luweirigun wügüri,

8 lugúndun dan le ladügünbalin Búngiu wügüri, máma tídaangiñe würi ladügei, würi ladügüboun lídaangiñe wügüri.

9 Adüga lumútu Búngiu würi lun wügüri, máma wügüri tun würi.

10 Ligía lúnti lubei tadáuragun würi láu tábulugu lídan jadámurin affñetiña queísi líseini derégüdaguau lábugiñe lagúmadijan wügüri, luma lun jagúndaarun ánjeligu láu tagúfurumadun.

11 Láu sun líra, lídan wabágari queísi affñetiña, mégei lumútu wügüri würi, mégei tumúti giñe würi wügüri.

12 Queísi inárüni lubei luágu lídaangiñe lan wügüri tadügüwa würi, ítara líña giñe inárüni lan luágu würi lan íchugubalin wügüri ubouágu, áni sun cátei lúmagiñe Búngiu líabin.

13 Ítara líña lubeiti, samína jumá júngua ánjein buídu lubei lun tayúmuragun würi lun Búngiu lídan adámurini madáuragunga láu tábulugu.

14 Jéchutiwa wagía gürigia lun warítagun luágu busíganu lan lun migínagu lan lídiburi wügüri.

15 Ánjoun würi, ában uwéndeni tun lun migínagu lan tídiburi, ligía líchugúnbei ídiburi migínaguti tun lun tadáuragun láu tábulugu.

16 Ánjein níjein lubei busénti lasígejan luágu cátei le, lúnti lasúbudiruni luágu ni lan wagía, ni já buri jíbiri tílana lílígílisin Búngiu masúbudiruntiwa ámu igáburi luei líra.

Luríban jagáburi affñetiña dan le jeígin luágu lidábulan Wabúreme Jesucrístu

17 Nabürüja jun guetó luágu ában cátei le siñábei nariñagun luágu buídu lan jadügüni, lugúndun genége lumúti luágu adüga lán buri jóundaragun dáñu jun lubáragiñe jamúga ladügün buíti.

18 Furúmiñeti cátei, aríñawagúati nun luágu dan lan le jóundaragun, níjein lan fánreinguaü jídan, áni affñetina luágu níjein lan inárüni lídan le aríñawagúbei.

19 ¡Fágua lúnti ñi lan fánreinguaü jídan lun lasúbudirúniwa cátaña lan affñetiñabaña ja tímatisaatiña!

20 Láu buri fánreinguaü le, dan le jóundaragun lun jeígin luágu lidábulan Wabúreme Jesucrístu, siñáti jeígin láu ában igáburi le íchugubei inébesei lun,

21 lugúndun dan le lachülürün óra lun jeígin, meígintün nege lídan ában. Lubáragiñe líra, cáda ában, ába loufudajan eígei eígini le lanügübei. Ja siñábei janügün gíbetei, ába jeréderun láu jaláma. Jayábitei jídaangiñe, ába játun sarágu dari lun jabácharuadun.

22 ¿Mábantün funági lun jeígin luma lun játun ñi? Láu igáburi le, barü jumutiña tílana lílígílisin Búngiu quei ni cáta, rújumaña ja úabei ni cáta jáma lídoun busíganu. ¿Cábagi nariñaga jun luágu líra? ¿Lúnti nagúndaarun jáu? ¡Luágu líra siñáti!

Adíneruni le arítaguagülei luágu louñwen Wabúreme

23 Lúmagiñe guánarügü Wabúreme Jesucrístu nerésibirei igáburi le warítaguagülei luágu louñwen, lé meja níchugubei jun. Queísi le nubei bei jun, luágo le lan árie bu le lalúgurünbei Wabúreme, ába lanügün feín lújaburugu,

24 lásun líchugun eténgiruni lun Búngiu tuágu, ába lagúbachagunun lun lafánreinragunun jádan lánigu, ába lariñagun. “Jóujuma, núgubu le, le nederegerubei luágu jufúleisein. Adüga meme jumei cátei le, jarítaguagüleme nuágu.”

²⁵ Ítara gíñe, lásun jeígin, ába lanügüni cópu táu diweín lújaburugu, ába lariñagun. “Cópu le táu diweín to, liseíni iséri lidáradun Búngiu júma, le achoúrurúabei láu níta le lúnbei láwiyurun lidaangiñe núgubu juágu. Ságüme játuni, adüga jumeí lun jarítangun nuágun.”

²⁶ Ítara líña lubeíti, daríme le lagíribudun Wabúreme ubouágun, ságüme jeígin fein, gurá jugúya diweín to jarítaguagüle luágu Jesúsu, jarúfuduñein luáguti louñwen Jesúsu wawágu.

Ligáburi leigín eígini le arítaguagülei luágu Jesúsu

²⁷ Furúmieguarügü le eígitu fein tugúya, guráoun diweín to láni Wabúreme Jesucrístu lídan ában igáburi le míchuti inébesi lun Búngiu, ladügüña figouú ladüga líchuguña lan minébesi lun lúgubu Wabúreme lúma líta.

²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun.

²⁹ Lugúndun ánjein erésibira marítangunga luágu laníchigu lánina lúgubu Wabúreme, labeíchubei Búngiu.

³⁰ Ligía añájein lubeí sarágu jídaangiñe, sánditiña, débilitiña, jilágua jíbiri.

³¹ Ánjawa jamúga asúbudiragua woúngua buídu lubáragiñe werésibirun, mabeíchun lumútiwa jamúga Wabúreme ítara.

³² Dan le labeíchuniwa Wabúreme, ladügüñein líra lun wasúbudiragun woúngua, gayára lámuga wasáansiraguni wagáburi lueí weféridirunme úara jáma lirájüñü ubouú.

³³ Ítara líña lubeíti nidújeñu, dan le jóúndaragun lun jerésibirun, agúrabagua jumá júngua.

³⁴ Ja lamátiña, jóújama jábiñe, mabeíchun lámugaña Búngiu luágu luríban ligáburi jóúndaragun. Lé buri líbiri cátei naráanserubei dánme le nídin aríjain.

12

Ubáfu buri le líchugubei Sífiri Sándu lun cáda affñeti

¹ Nidújeñu, níjein buri cátei nabúseerun lun jasúbudiruni luáguti buri ubáfu le líchugubei Sífiri Sándu lun cáda affñeti luágu Jesucrístu.

² Subúdi jumúti buídu luágu dan lán meja le mámagidün lánigu Crístu, ádajóuatün meja lun jeíbugun jarigi sándu ja mariñagadibaña.

³ Ligía nabúseerunbei nariñagun jun guetó lun gayára lan jasúbudiruni ánjein lubáfu lubeí Sífiri Sándu ádjabálin ában gürígia lun ladímurejan lúmoun lubáfu lan espíritu wuríbati. Siñáti ládajani Sífiri Sándu ában gürígia lun lanábaguni Jesúsu láu lariñagun luágu máma lan Liraü Búngiu, espíritu wuríbati ádjabalin lun ladügüni líra. Áni láu rügüñein lubáfu Sífiri Sándu gayára lan lariñagun ában gürígia luágu Jesúsu lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le affñebeí luágu Jesucrístu, áni ában méme Sífiri Sándu íchugubalin.

⁵ Níjein sarágu luwúyeri ligáburi esériwiduni lun Wabúreme Jesucrístu láu ubáfu buri le líchugubei Sífiri Sándu woun, áni lun méme ában Abúremein wesériwida.

⁶ Lídan gíñe sarágu luwúyeri wayúsurei ubáfu buri le rúaalibeí woun, áni ában méme Búngiu le íderagubaliwa lun wayúsuruni ubáfu ligía.

⁷ Arúfudaguati Sífiri Sándu lúngua wádaangiñe láu ubáfu le líchugubei woun, lun gayára lan wíderaguniña jíbiri affñetiña.

8 Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímurejan láu sarágu subúdi.

9 Jíbiri resíbitiña ában affiñeni weíríti lúmagiñe méme Sífiri Sándu ligía, jíbiri resíbitiña ubáfu lun jareidaguagüdün sánditiña.

10 Añájein resíbitiña ubáfu lun jadügün miláguru, jíbiri resíbitiña ubáfu lun ladímurejan Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubei ádjabalin ában gürígia lun ladímurejan o ámu lan luwúyeri espíritu, jíbiri ibíjatiña ubáfu lun jadímurejan ámuñegueinarügü luwúyeri dimúrei luei jerérun. Añájein ibíjatiña ubáfu lúmagiñe Sífiri Sándu lun jafúnraanguagüdüni le aríñawagúbei lídan buri dimúrei teréncha ligía.

11 Sún buri cátei le, ában méme Sífiri Sándu le ábanrügübei, ligía adügübalin, le afánreinjabalin ámuñegueinarügü ubáfu ligía lun cáda gürígia queísi labúseerun.

Lánigu ában méme úgubu súngubei

12 Gíbeti umégeguni lídan wágubu, áni sun umégeguni ligía ában rügüñein úgubu ladüga. Ítara líña giñe le únbei wagúara lúgubu Crístu, cáda ában affiñeti ában lídaangiñe lumégegun lúgubu Crístu.

13 Sun wagía affiñetiña –juríu, máma juríu, idámuni, máma idámuni, furúmieguarügü le wawúyeribe –láu wabásterun, ába ladügüniwa Sífiri Sándu lun ában wamá jáma sun jíbiri affiñetiña, áni sun wagía, resíbi wamúti méme Sífiri Sándu ligía.

14 Níchiga ában Jémpulu jun luágu wágubu láu sun lumégegun lun jasúbudiruni luágu ítara wáña lan queísi lumégegun lúgubu Crístu. Wágubu, máma rügüñein ában umégeni luágu, gíbeti umégeguni luágu.

15 Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma lueígiñe líra lun mámabei lan líbiri úgubu,

16 ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma lueígiñe líra lun mámabei lan líbiri úgubu.

17 Lun jamúga águu lan sun úgubu, ¿ída líña jamúgagi wagáambun? O lun jamúga arígeirugu lan sun úgubu, ¿ída líña jamúgagi wirímichun?

18 Rúlaali Búngiu cáda lumégegun úgubu le ní lumuti labúseera.

19 Lun jamúga ában rügüñein lan umégeni luágu úgubu, moustarunti jamúga úgubu ligía.

20 Láu sun gíbe lan lumégegun úgubu, ában rügüñein úgubu.

21 Siñáti laríñagun águu lun újabu. “Memégeirun numútibu”, siñáti giñe laríñagun ichügü lun ugúdi. “Memégeirun numútibu.”

22 Lubáragiñe líra, lé buri lumégegun úgubu le laganounbei camá débiliti, ligiatima buri mégeiwabei,

23 lé buri lumégegun úgubu le wanügübei quei ni cáta, ligiatima wadáüraguagüdübei láu uwéndeni. Le buriti líbiri lumégegun wágubu le arámudaguabei, ligiatima wouserunbei láu goúnigi,

24 le madügünwabei lún buri líbiri lumégegun wágubu. Ítara líña laráanseruni Búngiu úgubu lun le lán buri líbiri umégeguni le anügübei quei ni cáta, ligiatima lan weírigu,

25 lun níjein lan ában úarani luágu úgubu lídan le luwádigimaridun sun umégeguni lídan ában, láu ában toúnigi jóuniwagua.

²⁶ Ánjein asúfurira ában lídaangiñe lumégegun úgubu, súfuriti gíñe buri le líbiri, ánjein gíñe ouserúa ában lídaangiñe buídu, ába lagúndaarun lé buri líbiri lídan ában.

²⁷ Ítara méme líña gíñe, lúgubu Crístu jugúya, cáda ában jídaangiñe, lumégegun úgubu ligía.

²⁸ Rújali Búngiu wadágimanu jun tídan lillígilisin lun juwádigimaridun luágu ában queísi luwádigimaridun lumégegun úgubu. Furúmiñetiña, apóstolugu líchuguniña Búngiu lun jesériwidun joun jíbiri affíñetiña, jabíaman, profétagu, jürüwan, arúfudajatiña luágu cátei lání Búngiu, lárigiñe, ja adáagubaña miláguru, lárigiñe, ja areídaguagüdübaña sánditiña, ja ídejabaña, ja láubaña gumádi, jáma ja íbjubaña ubáfu lun jadímurejan dimúrei buri le teréncha.

²⁹ ¿Apóstolugu funági súngubei? ¿Profétagu funági súngubei? ¿Arúfudajatiña súngubei? ¿Ódi sun jagía adáaguatiña miláguru?

³⁰ ¿Gabáfutiña súngubei lun jareídaguagüdün sánditiña? ¿Adímurejatiña súngubei dimúrei buri teréncha? ¿Gayára jamúti súngubei míni lán buri dimúrei ligía aríñaga? Uá.

³¹ Buiti lubeiti lun jáfaagun lun jibjini lubuídun-ágei buri ubáfu lúmagiñe Búngiu, áni níjein ában cátei lun jáfaagun lun jibjini, buitimaati sügü láu sún buri ubáfu ligía, ínsiñeni cátei ligía, narúfudaja jun luágu.

13

Ínsiñeni

¹ Anjawa jamúga gabáfu lun wadímurejani sun luwúyeri dimúrei le adímurejoúbei ubouágu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garánwoun le adaúnjati, o quei lan ában asiedu le areínchuti.

² Ánjein jamúga gayára ladímurejan Búngiu wayúm mulugugiñe, subúdi wameí sún buri lujúllin-ágei inárüni arámudaguati áni níjein sun luwúyeri subúdi wáma, áni weiri ligía wafíñen darí jamúga lun gayára lan wagídaruni ában wúbü lídaangiñe lubára láu affíñeni ligía, sun líra áni mínsiñejabutiwa, ni cáta wagía.

³ Ánjein wíchiga sun le wámabei murúsun murúsun joun gudémetiña darí lagúmunchun, madügünga wameí láu ínsiñejabuni, mesériwinti woun lun ni cáta. Lun jamúga weiri lan wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, málati gíñe woun.

⁴ Le jínsiñejabúbei gagúraasunti, areídati, áni magímugati, mapántati, manáangun ligía lúngua.

⁵ Manárimeguti, máma rügüñein luógu larítagua, magáñidunti, mágyugüdünti wuríbani luágu wuríbani.

⁶ Magúndaarunti láu jafígoun ámu, lagúndaarun dan le janügün gürígia ában úma le richábei.

⁷ Awánda lumúti sun cátei, affíñeti buídu jawágu súngubei, affíñeti luágu gayára lan leménigidun jawágun gürígia lun jarúfuduni lubuídun jagáburi, úati ní cáta lun gayára lan lagídaruni línsiñejabu.

⁸ Lachülürüba dan, dánme le lagíribudun Jesucrístu ubouágun, lun madímurejan lánme Búngiu jayúm mulugugiñe gürígia, madímurejoún ligíame dimúrei buri teréncha, memégeirunwalime gíñe subúdi. Ánjeinti ínsiñeni, leréderuba lun sun dan.

⁹ Guetó, murúsun rügüñein wasúbudirun, murúsun rügüñein giñe wafúraanguagüdüni dimúrei le ladímurejabei Búngiu wayúmulugugiñe.

¹⁰ Ánjeinti dánme le lagíribudun Jesucrístu, wasúbudirubei sun cátei le gumúti. Murúsun ubáfu le wabíjibe guetó, memégeirunwabei, lagúmuchagaba.

¹¹ Dán meja le irájüñügidiwa, quei meja irájüñü wadímureja, quei meja irájüñü wasáminara, quei giñe meja irájüñü warítagua, ánjeinti dan le wügüriñajadiwa, ába wígiruni le jáni irájüñü.

¹² Guetó, loúguati wasúbudirun luágu Búngiu lúma luágu luwádigimari, waríjini camá buri cátei le marijínti buídu tídan ában isúbusein. Lachülürüba wéyu lun waríjini Búngiu furáangu. Guetó, loúguati wasúbudiruni buri cátei, wasúbudirubei Búngiu le gumúti lídanme wéyu ligía queisi lasúbudiruníwa Búngiu guetó.

¹³ Afíñeni, eménigini lúma ínsiñeni ladúraruba lun sun dan, áni ínsiñeni, weíritimaabei lídaangiñe úrúwagubei.

14

Ladímurejóun dimúrei teréncha

¹ Ítara líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá giñe lun líchugun Búngiu ubáfu le líchugubei joun afíñetiña lídaangiñe Sífiri Sándu jun, létima ubáfu lánina ladímurejan Búngiu jayúmulugugiñe gürígia.

² Buítimaati lun jáluajan ladímurejan Búngiu jiyúmulugugiñe sügü láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügüñein asúbudirei líla dimúrei le ladímurejabei. Le laríñagubei, lídaangiñe Sífiri Sándu laríñagei, ánjeinti laníchigu, arámudaguati luei jasúbudin gürígia.

³ Ánjeinti le iyúmulugugiñebei ladímureja Búngiu, adímurejati láu jerérun ja agáambubalin lun lawáanseragüdüniña lídan cátei lánina Búngiu, lun líchugun dügüdaguau joun lúma gurásu.

⁴ Le adímurejati dimúrei teréncha, lúngua rügüñein líderagua lídan leíbugun lúma Búngiu, ánjeinti le iyúmulugugiñebei ladímureja Búngiu, awáansegüda lumútiña lánigu Búngiu lídan jeíbugun lúma.

⁵ Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügü láu ladímurejóun dimúrei teréncha, ánjein gubeírügü aríñawagua ca lan míni lan le aríñawagúbei lídan dimúrei ligía lun gayára lan jawáanserun tílana ligílisi lídan jeíbugun lúma Búngiu.

⁶ Ligía lubeíti nidújeñu, ánjana nñüdün bisídaün, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeírügü giñe adímureja jun lídan werérun luágu cátei le lasúbudiragüdüñ Búngiu woun, o níchugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

⁷ Rúwamei jálagu áfarutiña quei ában jémpulu. ílagu buri ligía, mabágariti, quei buri fídu, gidára, ánjein wásiñera asúbudira furáangu ca lan nóta afarúbei, ibídiñebei woun ca lan urému le wagáambajabei.

⁸ Ánjein mínwirun fídu ában ínwiruni furánguti wuríburugu, úabei ni ában aráanseruti lun lídin ageíndagua.

9 Ligía méme giñe asúseredubei wáma. ánjawa maríñagun dimúrei le gayáraati gunfaráandawa lan, ¿ída lubági lasúbudirúniwa ca lan wariñagubei? ¡Wadímurejaña lun garábali!

10 Gíbeti luwúyerigu dimúrei uboúagu, áni sún buri dimúrei ligía richáti joun ja gunfaráandabalin,

11 ánjein úa lubei gunfaráanda náni dimúrei le áubei ladímurejoúa nun, terénchabadina lun gürígia le adímurejabei nun, áni terénchabei giñe gürígia ligía nun.

12 Ligía, quei weíri lubei jayúmajan lun jibíjin lídaangiñe ubáfu le líchugubei Sífiri Sándu joun afíñetiña, áfaagua jumá jibíjini ubáfu buri le gayáraabei lawáanseragüdüniña tílana ligílisi.

13 Gürígia lubeiti le adímurejati dimúrei teréncha, lúnti lamúriajan lúma Búngiu lun líchugun ubáfu lun lun lafúnraanguagüdüni le laríñagubei lídan dimúrei ligía.

14 Ánjana ayúmuragua lun Búngiu láu dimúrei teréncha, inárüni luágu nayúmuraguña lan láu náni espíritu, líla le naríñagubei, ibídíñeti nun.

15 ¿Cáteiti lúnbei wadügüni? Lídan adámurini gayáraati wayúmuragun láu dimúrei teréncha, lúnti giñe wayúmuragun láu dimúrei le gunfaráandawati. Gayáraati werémujan láu dimúrei teréncha, lúnti giñe werémujan láu dimúrei gunfaráandawati.

16 Ánjein badímurejaña lubei lun Búngiu luágu luweírigun láu dimúrei teréncha, gürígia únabugutiña ja agáambubalibu siñábei júaradun búma, lugúndun úati gunfaráanda jamáni le baríñagubei.

17 Gayáraati ában lan eteíngiruni buíti le bíchugubei lun Búngiu láu dimúrei teréncha, míderagun lumútiña jíbiri gürígia láu líra.

18 Teínqui numúti Búngiu luágu gayára lan nadímurejan dimúrei teréncha sügü jáu sun jugúya,

19 áni jímein numúti naríñagun seíngü dimúrei le gunfaráandawati lídan jóundaragun tílana ligílisi, lun gayára lan jafúnrendeirun númagiñe, lubáragiñe naríñagun díisi-mílu dimúrei teréncha le úati gunfaráanda láni ni ában.

20 Nidújeñu, masáminara jumá quei irájüñü luágu buri cátei le. Ítara jumá quei irájüñü lún buri cátei le wuríbati, ítara jugúyame queisi weínamujaña lídan ligáburí jasáminarun.

21 Laríñajare tídan lílíburun lúruđu. “Nadímurejaba joun lílana fulásu le lídan ámu luwúyeri dimúrei, lúma jayúmulugugiñe teréncha, ni ítara, mebéresenbaña náu, líña laríñagun Jabúreme Búngiu.”

22 Ubáfu lubeiti lun ladímurejoúniwa ámuñegueinarügü dimúrei, seríwiti líseínime lubáfu Búngiu joun ja mafiñebaña, máma joun ja afíñebaña. Ánjeinti ubáfu lun ladímurejan Búngiu jayúmulugugiñe gürígia, seríwiti líseínime lubáfu Búngiu joun afíñetiña luágu Jesucrístu, máma joun ja mafiñebaña.

23 Dan lubeiti le oúndaragua jamá sun tílana ligílisi, ánjein jadímurejaña lubei sun jugúya dimúrei teréncha, ába jebélurun mafiñetiña jánwoun, o gürígia lan ja ibídíñegilibei luágu ubáfu le joun, ¿ma jaríñaguba luágu lúlüjali lan jáu?

24 Ánjein ladímurejaña lubei Búngiu jiyúmulugugiñe, ába lebélorun ában le mafiñeti, ladáriraguba lúngua luágu gafígoun lan dánme le lagáambuni le jariñagubei.

25 Ítara lúba lafúnraangudun cátei arámudaguati le tídaanbei lanígi, ábame lájuduragun íchiga inébesi lun Búngiu, aríñaga ligíame luágu níjein lan Búngiu júma le tímatisaati.

Adüga jumei sun cátei lídan lubúdubu

26 Nidújeñu, niján lubeiti igáburi le lúnbei jóuseruni lídan jidámurin. Dan le jóúndaragun lun jájuduragun lun Búngiu, añajeinbaña jidaangiñe láu urému o aráfudajani, o cátei le lasúbudiragüdün Búngiu jun, o adímurejani lídan dimúrei teréncha, o lafúnraanguagüdüniwa adímurejani ligía, sun líra adüga jumei lun méme jawáanserun tilana ligílisi lídan cátei le luáguti Búngiu.

27 Dan le ladímurejoún lídan dimúrei teréncha, biámarügü jamá gürígia adímureja, o ürüwa, áni ában ábanlá giñe jadímurejan, lúnti giñe níjein lan ában lun lafúnraanguagüdüni le jaríñagubei.

28 Ánjein úa lubei ní ában le gayára lumúti afúnraanguagüda, buítimaati lun madímurejoún lan lídan dimúrei teréncha lídan adámurini, ladímureja cáda ában lúmagua lúma lun Búngiu.

29 Ánjein giñe luáguti lubei ladímurejan Búngiu jayúmulugugiñe gürígia, biámarügü o ürüwa jamá gürígia adímureja, ja jíbiri lun jaríjin ánjein lúmagiñeti lubei Búngiu le aríñawagúbei lúmoun máma lan lúmagiñeti.

30 Ánjein asúbudiragüda Búngiu ában cátei lun ámu gürígia le ñun umúti lun líchuguni lun guríriguaü, lúnti lámánichun le adímurejabei lun líchugun dan lun, lun ladímurejan.

31 Ítara, sun jugúya le iyúmulugugiñebei ladímureja Búngiu, gayáraabei jadímurejan ában ában lun jafúrendeirun súngebui, ragú jugúyame gurásu.

32 Ja iyúmulugugiñebaña ladímureja Búngiu, lúnti jágüdaagun jóungua dari lachülürün jadaani lun jadímurejan,

33 lugúndun Búngiu le íchugubalin ugánu ligía joun, lánina darángilaü, máma lánina chagáguau.

Queisi jagáburi jíbiri wadújeñu lídan wafíñen dan le jadámuridagun,

34 moún lumuti jadímurejan würíña lídan jadámurin afíñetiña lugúndun majóuati lun cátei le. Lúnti gagáambadi jamá queisi laríñaguni lilúrudun Búngiu.

35 Ánjein busén jabei jasúbudirun ában cátei, álügüda jamei jámari jábiñe, lugúndun mabuídunti lariaajoún lun tadímurejan ában würi lídan jadámurin afíñetiña.

36 Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügügidün giñe jugúya erésibirei.

37 Le jarítaguabei luágu gabáfu lan lun ladímurejan Búngiu liyúmulugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucrístu cátei le nabürújabei jun.

38 Ánjein manügün lan ítara, reideilá lídan libídiouniga láu.

39 Ítara líña lubeiti nidújeñu, áfaagua jumá lun gayára lan ladímurejan Búngiu jiyúmulugugiñe, mamájara jumá lun ladímurejoún lídan dimúrei teréncha,

40 adügarüga jumei sun cátei lídan lubúdubu.

1 Guetóti nidújeñu, buséntina lun jarítagun luágu ugánu lé meja apúrichija náalibei jun luágu Jesucrístu le Wasálbaragüle. Niján ugánu ligía le jerésibirubei, le gíñe ídaanbei derégüdagun lan jafiñen.

2 Sálbatün gíñe lun sun dan ladüga jafiñen luágu ugánu le, ánjein jafálara le uágubei napúrichija jun, ánjein gíñe láu lubei jinárün jafiñera.

3 Furúmiñeti cáteí, arúfudaja náali le furéndeí náalibei luágu Wasálbaragüle jun, luágu jilá lan Crístu luágu wafígoun, queísi tariñaguni Lerérun Búngiu luágu lúnti lan lasúseredun.

4 Lárigiñe meja louñwen, ába labunún, ába lásaarun lídaangiñe ouweni luágu lürüwan wéyu queísi tariñaguni Lerérun Búngiu luágu le lúnbei lasúseredun.

5 Ligía larúfudagun lúngua lun Pédro, lárigiñe, ába larúfudagun lúngua joun jíbiri apóstolugu.

6 Lárigiñe, ába larúfudagun lúngua joun sügü jáu seíngü-san afiñetiña ja ouñdarañubaña lídan ában, áni añájeingua sarágu jádaangiñe, winwangiña chülü lúmoun dán le, ja jíbiri, jilágu.

7 Lárigiñe, ában larúfudagun lúngua lun Jacóbo, lárigiñe, joun sun apóstolugu.

8 Agúmujoúni, járigiñe sùngubei, ába gíñe larúfudagun lúngua nun, láu sun ítara niña lan quei ában le agúriajoúti lídan ában igáburi le múaraanti,

9 lugúndun áu lan ni cátatimáabei jádan apóstolugu, madúnatina ni lun nanügün quei apóstolu, lugúndun eíbaaja numútiña méja tílana lilígilisin Búngiu.

10 Áu le áubei guetó lugúndun lareídun Búngiu nun, áni merédeti lareíni nun maságarunga ni cáta buíti nídaangiñe, lubáragiñe líra, ñadágimeinjaadina sügü jáu jíbiri apóstolugu, láu sun máma lan áu ñadágimeinbei, Búngiu le númabei láu lareíni, ligía ñadágimeinbei nídaangiñe.

11 Mebéresentina ca lántima ñadágimeinjañabaña, jagía lan o áu lan, niján ugánu le wapúrichijabei luágu lásaarun Crístu lídaangiñe ouweni, áni niján gíñe uágubei jafiñera.

Jásaarun jiláaña lídaangiñe ouweni

12 Queísi wapúrichijan luágu saráli lan Jesucrístu lídaangiñe ouweni, ába jerésibiruni, ¿ída liñáti añájein lubei jídaangiñe aríñagatiña luágu másaarun jamá jíbiri jiláaña?

13 Ánjein másaarun jabei jíbiri jiláaña, másaarunti lubei gíñe Crístu lídaangiñe ouweni,

14 áni ánjeinti másaarun lubei Crístu lídaangiñe ouweni, málati ugánu le wapúrichijabei luágu asálbaruni, málati gíñe afiñeni le juágubei.

15 Ánjein ítara líña lubei, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu lídaangiñe ouweni, ánjein máma lubei inárüni luágu sará jamá jiláaña, máma gíñe inárüni luágu sarágüda láani Búngiu Crístu lídaangiñe ouweni.

16 Lugúndun ánjein másaarun jabei jiláaña, ni Crístu, másaarunti gíñe lídaangiñe ouweni,

17 áni ánjeinti jiláñugili lubei Crístu, mesériwinti jafiñen lun ni cáta, lídaangidün jifígoun ligíbugiñe Búngiu.

18 Áni ánjein ítara líña lubei, féridiñu jáña gíñe ja ouwegubaña láu jafiñen luágu Crístu.

19 ¡Ánjein lúntirügü lubei ibágari le weménigi luágu Crístu, fugiábu wagía jádaangiñe sùngubei!

20 Le inárünitibei, saráti Crístu lídaangiñe oúweni lúnya labágaridun, ligía furúmiñetibei ásaaruti lídaangiñe oúweni lun mouñwendügüyaali lan, áni ítara lúba jásaarun sun lánigu.

21 Ítara quei lídaangiñe lan ában wügüri lagúmesera oúweni ubouágu, lídaangiñe giñe ában wügüri lagúmesera jásaarun jiláaña.

22 Ítara quei jouwegun sùngubei ladüga lídaangiñe lan Adán jayábin, ítara lubá giñe gabágariya jamá sùngubei lárigiñe oúweni ladüga lánigu jamá Crístu.

23 Lúnti lásaarun cáda ában lídan lídáani. furúmiñeti meja ásaaruti, Crístu, lárigiñeme, dánme le lagíribudun Crístu ubouágun, ligíame jásaarun lánigu lídaangiñe oúweni.

24 Ligíabati liábin lagúmuhagüle sun cátei, ábame lagünrinchaguni Crístu sun líbiri luwúyeri arúejani, ubáfu, lúma érei le ubouágubei, ábame ledéregeruni arúejani lun Búngiu Úguchili.

25 Larúejaba Crístu daríme gáñeigüda láali Búngiu wuríbu lun jawágu sun láganiñu,

26 oúweni, ligíaba lagúmujoún ágani agünrinchawagúti.

27 Rúlaali Búngiu sun cátei lábugiñoun lubáfu Crístu, dan le taríñagun Lerérun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu.

28 Dánmeti le reideijali sun sun cátei lábugiñe lubáfu Crístu, ábame leréderun Crístu, le Liraú Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiurügüba urúei, le Súnti Gabáfu.

29 Añájein jídaangiñe, abásterutiña jewéñegua ja oúwetiña mabásterunga. ¿Cámegi jadügei lira? Ánjein másaarun jabeí jiláaña, ¿cámegi ju lan jabásterun jewéñegua?

30 Ánjein siñá jásaarun jiláaña, málati wapúrichijan súnwandan lúnrügü weibaajoún lueígiñe.

31 Ságü wéyu yaráfa wamá lun wounwen, inárüniti líra nidújeñu, queisi ugúndani le nasándirubei juágu queisi afiñetiña luágu Wabúreme Jesucrístu.

32 Ageíndaguatiña wügüriña ja ítaraña quei anímaalugu janárimetiña ya Éfeso núma, ladüga mínsiñe lan cátei le napúrichijabei joun, ¿cági nagáñeirubei láu líra? Ánjein jamúga inárüni lubei luágu úabei lan ibágari lárigiñe oúweni, richátiña jamúga ja aríñagubaña. “Jouwama, guráwama, lugúndun jarúga wouwegua.”

33 Mayeedúa jumá. Aríñawagúati. “Féridigüda jamúti jagübüri umádagu lubuídun igáburi.” Inárüni líra.

34 Darígua jumá júngua, giríbu jumá lun ában ibágari le surúti, mafígouja jumá. Añájein jídaangiñe, ibídiñeti Búngiu joun. Naríñaguñein le lun janügün busíganu.

Ída lúba ligáburi jásaarun jiláaña

35 Fágua níjeinbei álügüdajati. “¿Ída lúbasan ligáburi jásaarun jiláaña? ¿Cábasan luwúyeri úgubu jawágu?”

36 Libídiouniga láu álügüdajani líra. Dan le labunún ában ílaü, gásu lañáladun lábugiñe múa furúmiñe lubá gayára lan labouchun.

37 Máma nádü le lúnbei lájüchün abunúbei, ílaü abunúbei, furúmieguárügü le luwúyeribei.

38 Lárigiñe labunúniwa, jilá ligía, ába líchuguni Búngiu úgubu le labúseerubei luágu ílaü ligía, ába líchuguni úgubu le lúnbei cáda ílaü.

39 Mára ában lábu sun úgubu, ámu luwúyeri jágubu gürígia, ámu jágubu anímaalu, ámu jágubu dunúru, ámu jágubu úduraü.

40 Níjein giñe buri cátei siéluna queísi wéyu, játi, warúguma, queísigubeirügü níjein lan ubouáguna, ámu lubuídunmeraü buri le siéluna lueí le ubouáguna.

41 Ámu larúni wéyu lueí larúni játi, ámu giñe jarúni warúguma, áni jádaanguanarügü warúguma, ámuñegueinarügü jarúni jawáriuagua.

42 Ítara líña giñe lídan jásaarun jiláaña, ámubei jágubu, labunúa ában úgubu le gañáladaditi, lásaarame le moúnwenjali.

43 Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le jéreti.

44 Labunúa ában úgubu le ídaanbei wabágarida ya ubouágu, lásaarame ában úgubu le ídaanbei wabágarida yágüta siélu. Ánjein íbíja wabei wágubu lánina ubou, wibíjibeí giñe wágubu lánina siélu.

45 Ítara líña tariñagun Lerérun Búngiu. “Adán le furúmiñeti wügüri, ában meja wügüri wíwanti”, ánjeinti Crístu, le gríbeí giñe lagúmujoún Adán, ában espíritu ligía le íchugubei íbágarí.

46 Furúmiñe íbíja wamúti íbágarí le ubouáguna, lárigiñe, ábame wibíjini íbágarí le lánina siélu.

47 Lé meja furúmiñeti wügüri le adügübeí láu múa, ubouáguna meja, libíaman wügüri le Wabúreme Jesucrístu, siéluna.

48 Sun gürígia ubouágu ítara líña jágubu quei lúgubu Adán le adügübeí láu múa, sun lánigu Crístu, jabíjuba jágubu quei lúgubu Crístu, le siélnabeí.

49 Wágubu guetó, líbe lúgubu Adán, le lánina ubou, lachülürüba wéyu lun wibíjin ámu luwúyeri úgubu líbe lúgubu Crístu, le lánina siélu.

50 Le nariñagubei, nidújeñu, luágu siñá lan jebélurun gürígia láu jágubu le ubouáguna lídoun larúeijan Búngiu siélu, lugúndun cátei le goúwedadibeí siñáti gabára lan lídan fulásu le ñi lubei úa lan ouweni.

51 Buséntina lun jasúbudiruni cátei lé meja arámudaguabei le. Mára sun lánigu Crístu lun jóuweguba lan, jasáansirawagüba súngebéi, ánjein wíwangiña lubeí dánme lagribudun Jesúsú o jiláaña lan,

52 Lídan murúsun óra, furése furése quei ában léfegechun lúma lámurudun águu, dánme le lagaambúniwa lumálali fídu, le líseíni lagúmujoún sun cátei. Línwiruba fídu, ábame jásaarun lánigu Crístu ja jiláañabaña lun moúnwendügüyaaña lan, ja moúnwengiñabaña, ábame jasáansirawagún lídan méme óra ligía.

53 Wágubu le wawágubei le gayáraabei lañáladun, lasáansiraguba lídoun ában luwúyeri le siñábei lañáladun, wágubu le goúwedadibeí, lasáansiraguba lídoun le moúwedadibeí.

54 Dánme le sáansiguaali wágubu le goúwedadibeí lídoun le moúwedadibeí, ábamei lagúnfulirun le bürüwañubei tídan Lerérun Búngiu. “Gumúja lubáfu ouweni, féridilá wuríbu.

55 Oúweni, ¿jigeígi bubáfu lun bagúmuchaguagüdúniwa? ¿jigeígi agáñeiruni lé nege lúnbei badügüni?”

56 Figou lébunabeí ouweni, áni binádu lilúrudun Moisés, ligía arúfudubalin woun cátei lan figoubeí lun wayúmajani.

57 Teínqui wáña lun Búngiu luágu lagáñeiragüdúniwa luágu sún buri cátei le, láu lubáfu Wabúreme Jesucrístu.

⁵⁸ Ligia lubeíti nidújeñu jínsiñetiña nun, ítara méme jumá derégüdagu lídan jafñen, meréderagunga, ñadágimein súnwandan, gánwoun gueínarügü lídan luwádigimari Wabúreme, lugúndun subúdi jumúti luágu máma lan luágu ni cáta jadúgei wadágimanu le jadúgübei lídan ában lúma Wabúreme Jesucrístu.

16

Loúndarún seínsu joun idújeñu lueígiñe Jesucrístu

¹ Luágu loúndarún seínsu joun wadújeñu lueígiñe Jesucrístu ja gudémebaña yágüta Jerusalén, adúga jumeí quei narúfudajani tídan sun liglisi loúbawagu Galácia.

² Ságü wéyu dimáasu, cáda ában jídaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachülürün, merédedünme oúndaragua seínsu.

³ Dánmeti le nachülürün, noúnajabaña gürígia ja janúadajabaña ubúругu Jerusalén, ábame níchugun gárada joun lun janúgüni seínsu le joúndarubei joun wadújeñu ja ñíbaña.

⁴ Ánjein giñe lun lubeí nídin, joúdiba núma.

Laráansejan Páblo lubá luweíyasun

⁵ Lídan nuweíyasun, násügürüba loúbawagugiñe Macedónia lun neréderun átiri wéyu ñi, nachülürüba lubeíti ubúругu Corínto lárigiñe.

⁶ Fágua neréderagun júma átiri dan, o násügürüni lan sun juyáabun ñi, gayáraabeiti jíderagunina lídan nuweíyasun léme ñíjin lumúti nídin lárigiñe nebélujan júmoun.

⁷ Mabúseerúntina chülüguarügü nan aríjaün, buséntina neréderagun átiri dan júma, ánjein busén Wabúreme.

⁸ Neréderuba ya ubúругu Éfeso darí luwéyuri Pentecostés,

⁹ lugúndun níjein ában oúnwenbun cháansi nuágu lun nadímurejan luágu Wabúreme Jesucrístu ya, áni buídubei lanügün. Añájein giñe gibetiña gürígia mabúseerúntiña lun nuwádigimaridun luágu Wabúreme ya, ligia siñábei lubei nígiruni Éfeso guetó.

¹⁰ Dánme le lachülürün Timotéo, jóucha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucrístu queisi áu.

¹¹ Manúga jumeí quei ni cáta. Dánme le gumúlaali lidáani júma, jíderagueime lun gayára lan lagíribudun númoun láu ában ugúndani tídan lanígi luágu lubuídun lidáani júma. Nagúrabajañein ya Éfeso jáu sun jíbiri wadújeñu lueígiñe Jesucrístu ja lúnbaña jayábin úara lúma.

¹² Ayúmuraguatina yebe lun Apólos lun lídin jáma jíbiri wadújeñu aríjaün, jénrenguti lídin guetó, lídiba dánme le gayára lan.

Lagúmujoún buri mábugäi

¹³ Ítara méme jumá agágudañu, toúnigiñu lueí cátei le jamúga gayáraabei ladíñurunün lueí lubuídun úma le gádaanbalün, derégüdagu jumá lídan jafñen. Agáburida jumá quei wügüríña ja awáanserubaña lídan le inárünibeí, manúfudeiga, jere jumá, gáñei jumámuga luágu wuríbani.

¹⁴ Sun cátei le jadúgübei, adúga jumeí láu ínsiñejabuni.

¹⁵ Nidújeñu, subúdi jumúti luágu Estéfanas lan jáma sun tílana lúban furúmiñebaña loúbawagua Acáya ígirutiña binádu jagáburi lun jerésibiruni

Crístu, luágu gíñe derégeguaaña lan jóungua lun jesériwidun joun wadújeñu lídan afiñeni lídan furúmieguaarügü cátei le jayáraati.

¹⁶ Buséntina lubeíti lun gíñe jíchaagun júngua joun, lúma joun sun ja ídejabaña, ñadágimein jagía ítara.

¹⁷ Gúndaatina láu jayábin Estéfanos, Fortunáto, lúma Acáico ñájoun. Weíríñajati nisáminan juágu, áni siñáti jíabin sun jugúya,

¹⁸ ába jíchugun wügüríña jagía gurásu nun láu janügün ugánu nun juágu. Afíñetina luágu janügüba lan gíñe gurásu jámagiñe luágu jadímurejan jun nuágu. Lúnti jeteíngiruni Búngiu jawágu gürígia ítaratiña.

¹⁹ Mábuga jáña títana ligílisi buri to louúbawaguboun Ásia jun. Mábuga jáña gíñe Aquila túma Priscila jáma sun ja oúndaragubaña jábiñe jun, queisi afiñetiña luágu Crístu.

²⁰ Mábuga jáña sun idújeñu ja yábaña jun. Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

²¹ Áu Páblo, noúnajañein mábugaü le jun le nabürüjabei láu nújabu lúma nilétüran.

²² Le mínsiñejabuti lun Wabúreme Jesucrístu, reideilá lábugiñe líñaragun Búngiu. ¡Giríbubá furése uboúagun, Wabúreme!

²³ Binílaün Wabúreme Jesucrístu.

²⁴ Oúnaja numúti nínsiñejabu lídan Jesucrístu jun, sun jugúya. Ítaralá.

TIBÍAMAN LIGÁRADAN PÁBLO JOUN CORÍNTONA

Abúsuraguni

¹ Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucrístu, nabürüjañoun gárada to jun, jugúra le tlanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya.

² Resíbi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³ ¡Úati quei Búngiu, le Lúguchibei Wabúreme Jesucrístu! Ligía Wáguchibei le gudémejabubei woun, aráanseñu líña lun líchugun gurásu woun furúmieguarügü óra.

⁴ Rúti gurásu woun lídan sun wasúfurirun, lun giñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun.

⁵ Lugúndun ítara quei luweírín wasúfurirun luágu líri Crístu, ítara giñe werésibirun ában oúnwenbun gurásu lúmagiñe.

⁶ Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun giñe gayára lan jerésibirun gurásu wámagiñe, subúdi jumeime Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu.

⁷ Derégüdati wafíñen juágu luágu jasígiramémeba lan derébuguñu lídan jafíñen, láu sun weíri lan jasúfurirun. Subúsiti woun luágu láu sun lan jasúfurirun luágu líri Crístu queísi wasúfurirun, jerésibiruba lan giñe gurásu lúmagiñe Búngiu queísigubeirügü werésibiruni.

⁸ Nidújeñu, buséntiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti oúchawagúni ligía, darí yebe lun méreediwa lan lun wawánduni láu wáni woúngua. Jarítaguatiwa yebe luágu woúweguba lán meja lubáragiñe wáfuridun nígiñe.

⁹ Sandíguaaadiwa yebe woúngua queísi gürígia ja síadiwaaña lun jóunwen. Wel, lasúseredunbei líra lun wafúnrendeirun lídaangiñe lun weménigidun luágu Búngiu le gabáfubei lun lásaaragüdúniña jiláaña, máma lun wawoúgua lan weménigida.

¹⁰ Séfu lumútiwa Búngiu dán buri meja ligía le yaráfa wabei lun woúnwen, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali weménigi luágu, luágu leséfuramémebadiwa lan,

¹¹ ánjawa jíderagua láu jayúmuragun lun Búngiu wawágu. Áni ánjaña ayúmuragua sarágu gürígia wawágu lun Búngiu, sarágubaña íchugutiña eteingiruni lun Búngiu luágu fuleísei lániwa láu leséfuruníwa.

Ca lan uágu lasáansiraguei Páblo larítagnun luágu luweíyasun ubúrugun Corínto

¹² Níjein ában cátei agúndaaragüdútiwa. Iaríñagnun warítagnun woun luágu gagáburi wamá ában igáburi jarúmati, furáangu, ya uboúagu, jagánaguatima.

Íderagua láadiwa Búngiu láu lareíni lun buídu lan wagáburidun ítara, madügüntiwa ni cátei láu lichú wáu guánarügü.

13 Lídán le wabürüjanbei jun tídan wagáradan, úati ni cáta arámudaguati ñi le jásiñerun alíja o gunfaráanda.

14 Guetó subúdiraüjadün luágu gayára lan jagúndaaragun wáu quei jumáesturungu, chülü lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanme wéyu le lagíribudagüle Jesucrístu uboúagun.

15 Queísi méja affíne nubei luágu gúnda jumá wáu queísi láni Crístu apóstologu jun, jarítaguatina yebe meja nídin aríjaün furúmiñe, lun nagúndaaragüdünün láu bisída nánün bián weíyaasu—

16 jarítagutiná yebe nachülaagun aríjaün lídan nuweíyasun Macedónioun, dan jamúga le nagíribudun Macedóniagiñe, ábaya jamúga nachülaagun aríjaün. Ítara líña jamúga gayára lan jíderagunina lun nasígiruni nuweíyasun Judéoun.

17 Madügün numúti. ¿Jálügüdaguñaasan júngua ca lan ueígiñe madügün nubálin? ¿Masáminarun numúti funásan quei lubúdubu dan lé meja nariñagubei jun luágu nadügübei lan cátei le? ¿Jarítaguatün luágu ítara niña lan queísi lirájüñü uboú ja aríñagubaña ában cátei áni magúnfuliruntiña láu jerérun?

18 Geféenti Búngiu luágu maríñagun wamá ában cátei jun magúnfulirunga wagía láu.

19 Sun wagía—Silváno, Timotéo, áu—apúrichijatiwa jun luágu Jesucrístu, le Liraü Búngiu. Áni mítaraanti Crístu quei gürígia ja aríñagubaña ában cátei áni magúnfuliruntiña láu jerérun, Crístu, súnwandan ladügüni le laríñagubei.

20 Gúnfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadímurejan lúma Búngiu luágu luweírigan, ayúmuragua wagía lun, ába waríñagun “ítaralá” lun warúfuduni waffínerun luágu ladügüwaba lan lídan líri Jesucrístu.

21 Búngiu adügübei lun derégüdagu wamá, wagía júma, lídan waffínen luágu Jesucrístu, ligía anúadajabaliwa lun wesériwidun lun.

22 Rúlaali Sífiri Sándu wádoun lun larúfuduni luágu lánigu wamá. Sífiri Sándu le wádaanbei, ligía queísibeí lasúbudiraja le lúnbei werésibiruni queísi lánigu Búngiu. Queísi ítara líña lubei, ¿gayáraati funásan ítara wamá queísi gürígia ja aríñagubaña ában cátei áni magúnfuliruntiña láu? Siñáti.

23 Mídingidina Corínto aríjaün luágu nuweíyasun ñájoun Macedónioun quei yebe narítaguni lugúndunrügü mabúseerun nan nírudaguagüdünün láu ában ebechuni, geféenti Búngiu luágu líra. Ánjein máma lubei líña, aráansetina lun nouñabun láu nibágari guánarügü.

24 Máma jamúgata wabúseeruña waríñagun jun. “Nijánba jaffínera”, derégüdaguaadün lídan jaffínen, busénrügütiwa wíderagunün lúntima lagánwoundun jagúndaarun.

2

1 Ligía mídynya nubei bisídaün lun nírudaguagüdünün.

2 Lugúndun ¿ída lubásan gayára lan jamúga nagúndaarun lárigiñe níchuguni íruni joun gürígia ja agúndaaraguagüdübalina? Siñáti jamúga.

3 Ligía nabürüjanbei jun ítara, lun gayára lan jaráanseruni cátei le mégeibeí jídaangua lubáragiñe nachülürün júmoun, dánme lámuga nachülürün, mibíjin

námuga íruni júmagiñe, jugúya le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga giñe ugúndani.

⁴ Dán meja le nabürüjanbarun gárada tugúya jun, weíriti meja nidíjerei juágu dari lun nayájun lídan le nabürüjabarun. Máma meja lun nírudaguagüdüñun nabürüjoun jun ítara, nabürüjanun lun jasúbudiruni luweírin nínsiñejabu jun.

Ferú dun lun lé meja afigounjabei

⁵ Le rújalibei íruni láu luríban leménerun, máma rügüñein nun líchiga íruni, rúmuti giñe jun lídan ában luwúyeri. Naríñaganbei “lídan ában luwúyeri” lun maweírin lan naweíridaguagüdüni jun.

⁶ Abeíchuni lé meja jariñagubei lídan jadámurin lun líchugúniwa luágu güriquia ligía, buídurügaali.

⁷ Guetó, lúnti ferúduna jumáni, ru jugúyame gurásu lun lueí ladügün sarágu íruni wuríbati lun.

⁸ Ligía nayúmuraganbei jun lúnya jaráfuduni jínsiñejabu lun.

⁹ Abürüjatina jun luágu cátei le lun giñe nasúbudiruni ánjein aráanse jubéi lun jadügüni le nubeíbei jun.

¹⁰ Guetóti, le únti ferúduna jumá furúmiegurügü cátei, ferúduna nubeí giñe, ánjein giñe níjein lubeí cátei le lúnti ferúduna náni güriquia ligía luágu, ferúduna numúti ligíbugiñe Crístu, jueígiñe.

¹¹ Lídan ában cátei líbe líra, mabúseerúntiwa wíchugun lúgaaru lun Máfia lun lanügün ában güriquia le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítagan Páblo ubúruгу Tróas

¹² Dán meja le nachülürünbei ubúruгу Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádigimaridun luágu Wabúreme.

¹³ Madárangilaanti narítagan lugúndun madári náni wadúje Títo Tróas lun nagáambun lúma juágu. Ligía nayoúragunbei joun wadújeñu ja Tróasbaña, ába nádin loúbawagun Macedónia lun nadúnragun lúma Títo ñi.

Gáñeitiwa láu lubáfu Crístu

¹⁴ Buíti lasálrin sun cátei. Teínqui wamúti Búngiu le anügübaliwa lídoun sun fulásu, amáchareina wagía lábugiñe lagúmadijan Wábuti Jesucrístu, le súnwandanbei lagáñeiragüdüniwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lírimichúniwa líjeme cupáli.

¹⁵ Lugúndun ítara wáña quei cupáli le lágudajabei Crístu lun Búngiu, ñüdüntiwa láu ugánu luáguti Crístu, le queiíbei líjeme cupáli, joun ja lúnbaña jerésibiruni ugánu ligía lun jasálbarun, jáma giñe ja lúnbaña merésibirun jamáni ugánu ligía lun jeféridirun.

¹⁶ Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídaguagüdüti. ¿Cáti gabáfubei lun lasúbudiragüdüni ugánu luáguti Crístu?

¹⁷ Wagía le loúnajabei Crístu, gabáfutiwa, ladúga mítaran wamá queísi arúfudajatiña yeétiña jagánagua, ja asáansiragubalin linárün Búngiu quei jabúseerun lun jarijin cába lan jagáñeira lídaangiñe. Lubáragiñe líra, apúrichija wamúti Lerérun Búngiu quei lubeí, ligíbugiñe Búngiu, wagía queísi loúnajan Búngiu ja lídaanbaña ában lúma Crístu.

3

Ugánu luáguti iséri darádu

¹ Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawouguea? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruníwa, o wamúriajan lan gárada júmagiñetu joun ámu mútu, quei jadúga jíbiri mútu?

² Uá, lugúndun jugúya afiñetiña, ítara jíña queisi ában gárada to adímurejatu luágu lubuídun wawádigimaridun jagánagua, ítara jíña quei ában gárada to búrúwañutu tídan wanígi, to gayáraaboun jalíjanun sun gürígia, asúbudiragüdei cátawa lan.

³ Ítara jíña queisi ában gárada to labürüjan Cristu guánarügü, to wedégeruboun, ában gárada jugúya to abürüjouboun láu lání Búngiu le wíwanbei Espírítu, máma láu tinta, áni tídan janígi ladúgei Espírítu ligía wadágimanu, máma luágu dúbü.

⁴ Gayáraati waríñagun luágu buídu lan wesériwidun lun Cristu ladúga wadügüni jeméniñu luágu Búngiu lun líchuguni ubáfu woun lídaangiñe Jesu-cristu.

⁵ Mabáfutiwa lun ni cáta láu wáni woungua, sun le wayáraabei adúga, lúmagiñe Búngiu liábin.

⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti quei lé meja binádu, lé meja lánina lúruđu búrúwati le lúnbei lagúnfulurúniwa láu, lánina ában ibágari le erésibirúti lúmagiñe Sífiri Sándu. Lúruđu ligía, le lilúrudun Moisés, arúfudarügü lumúti wafígoun ligíbugiñe Búngiu, figou ligía, ouweni lafáyeijabei. Ánjeinti Sífiri Sándu, rúti ibágari joun sun ja ánjabañá lun.

⁷ Lilúrudun Moisés le, abürüjoubati luágu dúbü. Dan le lerésibirubalin lúruđu ligía lúmagiñe Búngiu lun líchuguni joun Israelítagu, ñíñein ában ouwenbun larúgounga lúmagiñeti Búngiu ligíbuagu dari lun siñá lán meja jariáguni gürígia jagía ligíbu Moisés, lugúndun weírítu lámiridun ligíbu. Láu sun líra, ába éñegucheina lan larúgounga ligía murúsun murúsun. Ánjin láu lubei sarágu uweíríguni liábin lúruđu ligía le asiadíjabei gürígia lun ouweni,

⁸ jweírítimaati luweírígoun ugánu le lanügübei Sífiri Sándu woun luágu Wasálbaragüle!

⁹ Ánjin weíri lubei luweírígoun meja lúruđu le esériwidubei lun larúfuduni wadúnrun ligíbugiñe Búngiu woun, jweírítimaati luweírígoun ugánu luágu Wasálbaragüle le adügübaliwa richágua ligíbugiñe Búngiu!

¹⁰ Ni cáta luweírígoun lilúrudun Moisés ligíbugiñe luweírígoun Wasálbaragüle.

¹¹ Ánjeinti weírígoun lubei meja darádu le lúnbei ladúrarun murúsunrügü dan, weírítimaati luweírígoun darádu le lúnbei ladúrarun lun sun dan.

¹² Ladúga níjein lan eménigini le wawágu, luágu siñá lan lefériDIRUNI ugánu luáguti Cristu luweírígoun, wapúrichíjanbei furáangu.

¹³ Madügüntiwa quei meja Moisés, adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ní murúsun.

¹⁴ Derétu janígi Israelítagu jagía lun laníchigu lilúrudun Moisés joun, queisigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to

luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle.

¹⁵ Chülü lúmoun dan le, dan le jalíjanun líburu buri to labürüjaboun Moisés, darúguatu ában bélu láu jachügü luei gunfaráanda jamá.

¹⁶ Ánjeinti dan le lígiruni ában gürígia binádu ligáburi lun leíbugun lúma Crístu, ába tagídarún bélu tugúya luei.

¹⁷ Wabúreme Crístu, ligía Espíritu le íchugubei íbágari. Láu Espíritu ligía (le méme Sífiri Sándu) wádan, sálbatiwa, máfaagunga wagía lun wagúnfulirun láu lilúrudun Moisés.

¹⁸ Ligía sun lubei wagía affñetiña luágu Crístu, gidáwaaru bélu luei wasáminan, subúdi wamúti Crístu furáangu, láu sun luweirigun. Ítara wáña quei ában isúbusein to arúfudubalin luweirigun Wabúreme Crístu, áni láu wasígirun íchigei waritagun luágun, sáansiguagüda lumútiwa láni Espíritu murúsun murúsun lun ítara wamá quei ligía.

4

¹ Máburujalá lubeiti warúna, lugúndun rúlaali Búngiu wadágimanu le lábun waríajaan, láu lareíni.

² Mayúsuruntiwa íbíbuni lun wafñeragüdüniña gürígia luágu Crístu, rúwamuti wanágan luágun cátei le adügübeí arámudaguarügü, le nibúsigarídünabei. Masáansiragun wamei Lerérun Búngiu, inárüni rügüñein waríñaga. Ítara líña jasúbudiruni sun gürígia cátawa lan ligíbugiñe Búngiu.

³ Ánjein mafúraangun lubei werérun luáguti Wasálbaragüle, jóun rügüñein ja lúnbaña jeféridirun mafúraangun lan.

⁴ Quei mafñen jabei luágu werérun, darúlaali Máfia, le lubúngiutebei uboú le, jaríjin lun siñá lan larúgoungadagüdüni ugánu luáguti Crístu le weirigubei, le liyáwabei Búngiu wínwanti, jasáminan.

⁵ Dan le wapúrichijanbei, máma wawougua wapúrichija, luágu Jesucrístu wapúrichija, queisi Wabúreme, waríñagati wawougua luágu esériwidutiñarügü lan wagía jun, luágu wínsiñejabu lun Jesús.

⁶ Lugúndun Búngiu, le méme íchugubalin lámpu siélu lun lagídarúniwa lubúriga, ligía giñe adúnraaguagüdübalin lilámpun tidan wanígi, lun gayáraabei lan wasúbudiruni luweirigun Búngiu le waríjibeí lídan Jesucrístu.

Abágariduni láu eménigi luágu Búngiu

⁷ Larúgounga le wíbújubei luágu luweirigun Búngiu le lídaanbei Crístu, ítara líña quei ában írisini woun. Barü wamuti írisini ligía lídan fugiábu wágubu, le ítarabei quei ában soúdiéru, lun larijiniwa luágu lumagiñe lan Búngiu liábin oúnwenbun ubáfu le wawágubei, máma wámagiñe.

⁸ Ítara, láu sun sífuri wamá sun luwúyeri lénreengúnga, súnwandan larúfudun Búngiu ában úma woun lun wáfuridun lídaangiñe furúmieguarügü lénreengúnga. Níjein dan, weíríti wadíjeri luágu cába lan wadüga, máburujaanti warúna, lugúndun íderagua lániwa Búngiu.

⁹ Eíbaajoúatiwa, mígirun lumútiwa Búngiu joun wáganiñu. Gayáraati jájuchuruniwa, ígira jamáwa múarugu quei jiláaña, siñáti jagúmchaguagüdüniwa.

¹⁰ Le ñilumuti wouúdin, buséntiña wáganiñu jáfaraguniwa jilágubei quei jáfaruni láganiñu Jesúsu jilágubei. Lúnti ítara lúba lan lun gayáraabei lan larijíniwa lubáfu Cristu le wíwanbei wádaangiñe.

¹¹ Wagía, sun awánja lan abágarida, yaráfañu wáña lun wounwen furúmieguarügü wéyu lueígiñe Jesúsu, lun gayára lan larijíniwa libágarí Jesúsu wádaangiñe.

¹² Ítara líña lubeíti, láu yaráfañu wamá lun ouweni lun wíchuguni ugánu jun luágu Wasálbaragüle, resíbi jumúti ibágarí magúmuchaditi.

¹³ Laríñajare Davíd tídan Lerérun Búngiu. “Afiñetina, ligía nadímurejánbei”, ítara giñéti afiñetiwa luágu Búngiu láu méme ligáburí afiñeni le meja luágubei Davíd. Ligía wapúrichijánbei luágu.

¹⁴ Lugúndun subúdi wamúti luágu Búngiu lan le ásaaragüdúbalin Jesúsu lídaangiñe ouweni, lásaaragüdúbalíwa lan giñe lúnya wabágaridun, úara lúma Jesúsu, ábame lanúgúniwa úara júma ligíbugiñoun.

¹⁵ Luágu jáni fuleísei nasúfurirei sun cátei lun gayára lan jagíbedun ja áñarubaña lun lareíni Búngiu joun, gíbe jamámuga giñe íchugutiña eteíngiruni lun luágu lareíni. Ítara lúba iñurúañu lan líri Búngiu.

¹⁶ Ligía máburujan lubeí warúna. Oúwedeina líña wágubu murúsun murúsun, wawáni, tedérebuguduña ságü wéyu.

¹⁷ Ni cáta le wasúfurirubei lídan ibágarí le, lídan le wasáminarun luágu ouñwenbun ugúndani le lúnbei wibíjini yágüta siélu dánme le ñi wamá lúma Cristu lan luweírigan. Maweírinti lídáni wasúfuridun woun ya ubouágu dan le wasáminarun luágu lúntibeí lan dan magúmuchaditi wagúndan siélu.

¹⁸ Marítaguntiwa sarágu luágu cátei lánina ubouú le, ladüga murúsuraü lan dan ladúrarun. Le uágubei wíchigei warítangun, luágu cátei lánina siélu, ladüga cátei ligía, lúnbei sun dan ladúrarun.

5

¹ Subúdi wamúti lubeíti luágu gayára lan wounwen lubáragiñe lagíribudun Jesucristu ubouágun, gayáraati louñwen wágubu quei teíguadun ában múna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan. Úgubume ligía, mámabei lánina ubouú quei ában múna adügütu láu újabu, ábanbei úgubu lánina siélu.

² Buchá wawágu láu úgubu le wawágubei guetó, busétiwa jamúga tadáurawagún wawáni láu iséri wágubu le lánina siélu.

³ Láume iséri úgubu ligía wawágu, mítaranbádiwa quei uwáni to úati úgubu táu.

⁴ Sun awánja lan abágarida láu úgubu le wawágubei, darítiwa mégeiti luágu, sandígua wagía woúngua láu idíjeri. Máma jamúga wabúseeruña wounwen lun weréderun quei uwáni úouga úgubu táu, le wabúseerubei, lun lasáansiragun wágubu le gagúmuchadibeí furése furése lídoun wágubu le magúmuchadibeí, mouñwenga wagía.

⁵ Búngiu aráanserubaliwa lun gabágarí wamá le magúmuchaditi, áni rúlaali Sífiri Sándu woun queísi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjagua lan ubouágu abágarida lídan wágubu, bougudiñadiwa lan tuei wában yágüta siélu, máma lan lúmañadiwa Wabúreme.

⁷ Ya ubouágu, siñáti waríjini Cristu, gayáraarügüti wafiñerun luágu.

8 Gúndaatiwa láu furúmieguarügü cátei le gádaanbaliwa, láu sun jamúga jímein wamáni lun wígiruni íbágari le ya ubouágu lun wouúdin agánawa lúma Wabúreme Jesucrístu siélu.

9 Ligía wáfaagunbei lun wadügüni lugúndan Wabúreme súnwandan, ya wagía yebe ubouágu, yágüta wagía yebe siélu.

10 Lugúndan sun wagía, waráramuba ligíbugiñe Crístu lun werésibiruni cáda ában le lúnbei werésibiruni, según buíti o wuríbati lé meja wadügübei dán meja le ubouágugiwiwa.

Ugánu lánina darángilaii

11 Ligía, quei subúdi wabálin lanúfudewa lueí lagúseragüdüñ Wabúreme, áfaaguatiwa lun wafíñeragüdüñiña sun gürígia. Subúdi láali Búngiu cátawa lan, áni agúrabatina lun gíñe subúdi jumáni.

12 Mára wadímorejañaya buídu wawougua, wíhuguña ában cháansi jun lun jasándiragun júngua gúndaañu wáu, lun gayára lan jóunabuniña arúfudajatiña jagánagua ja apántajabaña luágu lubuídun jarúfudagun jóungua bougudi jabíti, áni tídan janígi mabuíduntiña.

13 Ánjein weíri lubeí wesériwidun lun Búngiu darí lun warijín camá lülúñein wáu, ladüga luweírin wínsiñejabu lun Búngiu lasúsereda. Ánjein genége lubálin luágu wesériwiduña lan lun Búngiu láu ában lidíli ichügü, ladüga luweírin wínsiñejabu jun wadügei.

14 Mósu nesériwidun lun Crístu táu sun nanígi lárígiñe larúfuduni luweírin línsiñejabu woun láu loúnwen lídan wafúlasun sùngubei. Queísigubeirügü jamúga jilá jamá sun gürígia úara lúma dán meja le loúnwenbei.

15 Jiláti Crístu jawágu sùngubei, lun sun lan ja ánjabaña lun jerésibiruni íbágari lídaangiñe, mámaali lámuga joun guánarügü jabágarida, lun jabágaridun lun Crístu le ouwebei jawágu, sará ligía lídaangiñe ouweni.

16 Ligía manügün wabeí ni ában quei janügün lirájüñü ubou gürígia, según bougudi jabíti. Luágu méja ában dan, barú wamuti meja Crístu quei janügüni lirájüñü ubou, mítaranjaali guetó.

17 Le lubeíti lídaanbei ában lúma Crístu, ábanjali gürígia iséri, gumúja sun cátei le lánina binádu ligáburí, labágariduña ában iséri íbágari lúma Crístu.

18 Adüga lumúti Búngiu sun cátei le. Gáganiguatiwa meja lúma ladüga wafígoun, ába loúnajani Crístu lun lachíbuni wafígoun, gayára lámuga gamádagua wamá luma. Rúlumuti wadágimanu ligía woun lun waráandaragüdüñiña sun gürígia lúma.

19 Le naríñagubei, láu loúnwen Crístu lídan wafúlasun, arúfudati Búngiu ában úma woun lun gayára lan lagídarúniwa wadúnrun luágu wafígoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun gürígia.

20 Wayábiña lubeíti queísi wügüríña ja loúnajabaña Crístu, queísigubeirügü jamúga layúmuragun Búngiu guánarügü jun wádaangiñe. Ayúmuraguatiwa lubeíti jun lueigiñe loúbadina Crístu. aráandara jumá lúma Búngiu.

21 Madügüñti Crístu ni ában figou, rúlumuti Búngiu sun lidúnrun wafígoun luágun Crístu lun láu lan lídan wamá ában lúma, lun wachülürün abágaridei íbágari lánina ísuruni le labúseerubei Búngiu lun wabágaridun.

6

¹ Wagía, queísi ñadágimeintiña úara lúma Búngiu, ayúmuraguatiwa jun lun jarúfuduni láu lubuidun jigáburi luágu máma lan luágu ní cáta jerésibirei lareíni Búngiu jun.

² Lariñajare Búngiu tídan Lerérun.

Nagáambubei bagúajan nun lídan nidáani lun fuleiseijabu nan joun gürígia, níderagubadibu lídan nuwéyuri lun nasálbarun gürígia.

Chúlújali lidáani Búngiu lun fuleiseijabu lan joun gürígia, niján buri wéyu le luwéyuribeí Búngiu lun lasálbaruniña gürígia.

³ Áfaaguatiwa lun úaragua lan wagáburi lúma wapúrichijan, lueí jamúga jeréderúniwa gürígia lueí jagáambuniwa. Mabúseerúntiwa jamúga wanügün minébesi lun luwádigimari Búngiu láu wagáburi,

⁴ busénrügütiwa warúfuduni lídan sun cátei luágu esériwidutiña lan lun Búngiu wagía, láu luweírin wagúraasun lun wawánduni asúfuriruni, mégei, lúma lénreengúnga.

⁵ Beíjamaadíwa, dáújamáwa, ínchajouátiña gürígia lun jeíbaajaníwa, jéreti wawádigimari lun Búngiu darí lun wasándirun oúnwenbun lubúcha uágu. Reídeíjadiwa marúmugunga, áfaaga wagía ilámaü.

⁶ Arúfuda wamúti gíñe luágu esériwidutiña lan lun Búngiu wagía láu larúman wabágari, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wádaanbei, láu wínsiñejabu le tímatimaati,

⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuidun ibágari, dándu lun wouáin jabároun wáganiñu quei lun waráramuniña dan le jayábin wabároun.

⁸ Níjein dan ibíjatiwa inébesi, níjein dan anábawaguatiwa. Níjein dan adímurejóati buídu wawágu, níjein dan adímurejóati wuríbati. Níjein dan, ousera jamútiwa quei yéetiña, níjein dan quei wügüríña ja aríñagutiña inárüni.

⁹ Níjein dan, ousera jamútiwa quei ibídiñewatiña, níjein dan quei subúdiwatiña buídu, níjein dan, agúrabañu wáña lan wounwen, awánjagua wínwanlu, ígirati Búngiu lun wasúfurirun, lun wafúnrendeirun lídaangiñe,

¹⁰ mouñwentiwa lídaangiñe asúfuriruni lígia. Láu sun níjein lan cátei lun lírudaguagüdüniwa, níjein gíñe ugúndani lúmagiñe Búngiu tídan wanígi. Láu sun gudéme wamá según ubou, aríñagatiwa joun gürígia luágu irisini inárüni le gayáraabei jadáriruni lídan Jesucristu, láu sun úa lan ní cáta wáma según jarítangun lánigu ubou, ibíja wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírin jínsiñe nun.

¹² Masáansiragúnti wínsiñejabu jun, láu sun afíñetina luágu sáansigua lan jínsiñejabu woun.

¹³ Ayúmuraguatina jun quei layúmuragun ában úguchili joun lirájüñü lun jínsiñejabu jumá woun le gumúti, queísi wínsiñejabu jun.

Aganouáti Búngiu wádan

¹⁴ Magámarida jumá gürígia ja maffíñetiña luágu Crístu, lugúndun janügüba ában ibágari le múaraanti. Mamádaguati ísuruni lúma wuríbani, siñáti gíñe gamádagua lan larúgounga lúma lubúriga.

¹⁵ Siñáti níjein lan úarani lídan Crístu lúma Máfia, siñáti gíñe lúaradun ában afíñeti luágu Crístu lúma ában le maffíñeti.

16 Siñáti gadúnama jamá sándu tídan lúban Búngiu, áni lúban Búngiu le wíwanbei wagía, quei laríñagun Búngiu guánarügü.

Naganouba jagánagua, eíbuga áume jagánagua, áuba Jabúngiute, jagíame nánigu.

17 Ligía giñe laríñagunbei Wabúreme Búngiu.

Furíjuma jagánaguagiñe ja mafíñebaña nuágu, díse jumá jaweí, líña Jabúreme. Mádaragua jumá júngua lídoun le wíyebeli.

Ábame nerésibirunün,

18 ábame ában nan úguchili jun,

jugúyame nirájüñü, líña laríñagun Jabúreme, le Súnti Gabáfu.

7

1 Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbuni sun luwúyeri iwíyeni wawárua, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladüga luweírin inébeseli le wawágubei lun Búngiu.

Lasáansiragun jagáburi Coríntona

2 ¡Rújuma ában ubáraü woun tídan janígi! Madügüngidiwa dáñu lun ni ában, maríbadagüdün wagía ni ában, mayéedagun.

3 Máma nariñaguñein le lun níchugun jidúnrun, lugúndun quei buga nariñaguni jun, tídaañadün nanígi, lídaañadiwa ában ínsiñejabúni le mébejati, lídan yebe íbágari o lídan yebe ouweni.

4 Weíríti nafíñen lúma nugúndan jáu, labádinagua sun le nasúfurirubei, sandítina dügüdaguau, áni buin níña giñe láu ugúndani, jueígiñe.

5 Lúmagiñé meja wachülürün Macedónioun, meméraagúngidiwa, darírügütiwa lénreengúnga lídan sun fulásu geyégua wáu, geyéguati wuríbu wáu, weíríti wadíjeridun juágu.

6 Ánjeinti Búngiu, le íchugubei gurásu joun ja magúraasunbaña, ába líchugun gurásu woun láu lachülürün Títo,

7 áni mámarügü láu lachülürün, lugúndun giñe gagúraasun lan juágu. Aríñagati woun luágu luweírin jabúseerun jaríjiniwa, abájüdagua ligía woun luágu íruni le juágubei luágu le asúseredubei lúma luágu luweírin jabúseerun lun jóudin láu nerérun jun. Ábatima nagúndaarun láu líra.

8 Láu sun jírgua jumá tadüga gárada to nabürüjaboun jun, maságürijaantina luágu, guetó. Aságüríjatiná meja furúmiñe láu nasúbudiruni luágu jírgua jumá tadüga gárada tugúya luágu murúsun dan.

9 Guetó gúndaatina, máma ladüga jírudagun, ladüga sáansiguagüda láni írudaguni ligía jigáburi. Áfaga jumúti íruni ligía lídan ában igáburi le áubei lagúndaara Búngiu, ítara líña lubeíti madügüntiwa ni murúsun dáñu jun.

10 Lugúndun dan le wíchugun üma lun Búngiu lun layúsuruni íruni le wawágubei ladüga luríban wagáburi lun lasáansiraguni wagáburi, barü lumútiwa lídoun asálbaruni le magúmchaditi, maríbaanti íruni ligía woun. Ánjein wanüga íruni ligía queísi janügüni lirájüñü ubou, magáraragunga wagía lun Búngiu, lanügúbadiwa lídoun féridi lun sun dan.

11 Awánda jumúti íruni queísi labúseeruni Búngiu, áni jaríja jumeíti le asúseredubei guetó lídaangiñe jawánduni íruni ligía! Tadüga gárada tugúya, ába jatátirun asáminara buídu cába lan jadüga láu wügüri le afigounjabei jagánagua. Arúfuda jumúti luágu magúndan jumá láu figou le ladügübei, áni gáñitün luágu

busíganu le líchugubei jun, janúfudetün lueí jamuga jabeichúniwa lueígiñe. Ába jabúseerun jarjínina lun nasúbudiruni jínsiñejabu nun. Weíriti jabúseerun lun jadügüni le richábei, lun jabeichuni le adügübalin figoú, adüga jumáali sun le lúnbei jadügüni lun jaráanseruni cátei le. Madúnrunjadün guetó.

¹² Dan lubeiti le nabürüjanbarun meja gárada tugúra jun, mámadügüya jamúga ladüga nasáminaruña lan sarágu luágu gürígia le adügübalin wuríbani, ni luágu le asúfurirubalin lueígiñe, nabürüjanbarun lun geféen júma ligibugíñe Búngiu luágu luweírín jínsiñejabu woun.

¹³ Ligía ragüguaadiwa lubeí woúngua.

Lánwoun sun gurásu le barú wamáalibeí juágu, oúnwenbun wagúndan láu warjini luágu gúnda lan Títo, ideoagua jumáali sun jugúya lun lasándirun darángiláü.

¹⁴ Adímurejatina bugája buíti juágu lun Títo, áni gúnfuli jumúti nerérun juágu. Quei sun lan le aríñaga wamáalibeí jun, inárüni, itara líña giñe inárüni lan le waríñagubei lun Títo, luágu gunda wamá jáu.

¹⁵ Áni weíritimaati jínsiñe lun dan le larítapun luágu jadügüni sun jugúya le lamúriajabei júma, lúma luágu jerésibiruni láu ában inébesei lúma idíjeri lueí jamúga jemegeiruba lan lídan jagúnfulirun láu lerérun.

¹⁶ Gúndaatina láu gayára lan naffínerun juágu le gumúti.

8

Wíchugun joun gudemetiña

¹ Guetó, nidújeñu, buséntina nabájüdagun jun luágu lareíni Búngiu joun tílana sun ligílisi buri to loúbawaguboun Macedónia.

² Láu sun ában lan oúnwenbun oúchwaguni lun jaffíñen lénreengúnga le jadárirubei, gúndaatiña buídu, áni láu sun gudeme jamá, rújaña lídan jíderawagún ja gudemebaña Jerusalén camá jamuga risitiña.

³ Geféentina luágu rújamaali lan sun le jayáraabei láu sun tarúman janígi, ru jagia sügü láu lé yebe jayáraabei.

⁴ Ayúmuraguatiña sarágu woun lun wígiruniña lun jíchuguni jafáran lídan jíderawagúniwa idújeñu lueígiñe Jesucrístu.

⁵ Adügatiña sügü láu lé yebe wagúrabubei jadügün, furúmiñe, ába jedéregeragun joúngua le gumúti lun Wabúreme Jesucrístu, lárigiñe ába jedéregeragun joúngua woun, queísi lugúndan Búngiu.

⁶ Weíriti jabúseerun jíchugun, darí lun wayúmuragun lun Títo lun lagíribudun júmoun lun gayáraabei lan lagúmuchaguagüdüni labúdajoun seínsu lé meja lagúmeserubei jídan.

⁷ Jugúya ubáraübei lídan sun cátei—lídan jaffíñen, lídan jisúbudin luágu Lerérun Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan ínsiñejabuni woun—lúnti lubeiti giñe ubáraü jumá lídan ídejani le.

⁸ Mára naríñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáraabei lan giñe jarúfuduni jínsiñejabu láu jíchugun táu sun janígi quei jagia.

⁹ Jarítagua jumá luágu lareíni Wabúreme Jesucrístu woun. rísiti bugája dan le siélu lan, ába lagúdemedun láu liábin ubouágun ladüga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰ Luágu jáni fuleisei naríñagei narítangun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adüga jumúti giñe táu sun janígi.

¹¹ Guetó lubeíti, ítara méme jumá darí jagúmuchuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le jumatí.

¹² Lugúndun ánjein íchiga ában gürígia sun le liyáaraati según le lúmabei, láu sun lugúndan, gúndaati Búngiu láu, áni resíbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³ Mára lun jáfagun mégei ladüga jíderagun ámu,

¹⁴ le busénwabei, lun ñi lan úarani jídan. Guetó, níjein júma lun jabuínchagüdüni le jemégeirubei ámu, lídaanme ámu dan, níjeinbei jáma lun jabuínchagüdüni le jemégeirubei. Ítara lúba ñi lan úarani,

¹⁵ quei tariñagun Lerérun Búngiu. “Le gíbebei úma, mígiragunti lúma, le míbebei úma, memégeirunti lun.”

Tító jáma líbirigu

¹⁶ Teínqui numúti Búngiu luágu líchuguni ayúmajani méme le líchugubei nídown tídoun lanígi Tító lun líderagunün.

¹⁷ Gúndaati Tító lúnya lídin aríjaün quei namúriajani lúma, áni affíñetina luágu weíri lan labúseerun lúnya laríjinün darí jamúga lun lídin láu láni lúngua maríñagunga áu ni cáta lun.

¹⁸ Úara lúma Tító, wouñajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúruchagun ugánu luágu Wasálbaragüle.

¹⁹ Áni mámarügü líra, anúadaja jamúti giñe tílana buri ligílisi idújei ligía lun ladügün weíyaasu wáma lun líderagun lídan loúndarün seínsu le. Wadügüñein wadágimanu le, le lánina ídejani, lun wíchugun ugúndani lun Búngiu, lun giñe warúfuduni luágu busén jamá affíñetiña lun jíderaguniña jadújeñu ja gudémebaña.

²⁰ Waráanseruñein sun cátei lébei lun míchugun wamá lúgaaru lun ladímurejoün wuríba wawágu lueigiñe loúndarun seínsu le wadügübei.

²¹ Wáfaaguña lun wadügüni sun cátei láu arúmani, mámarügü ligíbugiñe Wabúreme, jagíbugiñe giñe gürígia.

²² Wouñajaña giñe ábanya jádaangiñe wadújeñu lúma Tító lúma le ában. Wügüri le, arúfuda láalibei luweirin labúseerun lesériwidun lun Crístu woun lídan sarágu luwúyeri, guetótima láu oúnwenbun afíñeni le luágubei luágu jíchuguba lan sarágu seínsu láu sun jugúndan.

²³ Le álügüdajati libügürü Tító, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügüdaja jabügürü biáma idújeñu lueigiñe Jesucristu ja lúmabaña, jaríñagame joun luágu joúnajan lan tílana ligílisi buri, luágu jiñúragüdüñein lan líri Crístu láu lubuídun jagáburi.

²⁴ Ítara líña lubeíti, resíbi jumáña láu ában ínsiñeni le tímimaati lun gayáraabei lan jaríjini wügüriña jagía luágu inárüni lan lubuídun werérun juágu, áni lun giñe jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügüriña jagía.

¹ Luágu loúndarún seínsu joun idújeñu lídan affiñeni, memégeirunwati lun nabürüjan jun,

² lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügüjalíbei, áni jíbe-ágei Macedóniana ragújaña giñe dügüdaguau láu jagáambun luágu luweírín jáfaagun luágu ídejani le.

³ Láu sun líra, nouñajaña idújeñu jun nubáragiñe lun jaráanseruni luáguti labúdajoún seínsu, lun mámabei lan iyéeni, buíti le naríñagubei juágu libügürü cátei le, lun abúdajoúali lan sun seínsu lubáragiñe nachülürün jumóun,

⁴ ñúdündügü jañeín jádaangiñe Macedóniana núma, jadáriráunme maráanserunga. Líchuguña jamúga líra busíganu woun, júntima, lárigiñe rúwamaali lan sarágu wafíñen juágu.

⁵ Ligia narítangunbei namúriajan jáma idújeñu ja lun jóudin bisídaün nubáragiñe, lun giñe jíderagunün abuinchagüdei seínsu le uágubei jaríñaga jóundarun. Ítara, aráanseñu lúba seínsu le jóundarubei lun jarúfuduni jareíni, máma quei ában cátei le lúnti wafósurunün luágu.

⁶ Jarítagua jumá luágu cátei le. Le loúguati lábunagun, loúguabei giñe lalúbajan, le gíbete lábunagun, gíbebei giñe lalúbajan.

⁷ Cáda ában jídaangiñe, lúnti líchugun queísi ligáburi larítangun, máma láu magúndani ni ladúga aríñawagúya lan jun lun jíchugun, lugúndun jínsiñejabuti Búngiu lun le íchugubei láu ugúndani.

⁸ Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligíame giñe sarágu júma lun jídejan.

⁹ Tariñajare Lerérun Búngiu luágu gürígia le íchugubei sarágu.

Rújali sarágu joun gudémetiña,

áni reídeiti cátei buíti le ladügübei lun sun dan.

¹⁰ Búngiu, le íchugubalin ílaü lun lábunún, ában lalúbajagüdün sarágu lídaangiñe lun gayára lan weígin buídu, líchuguba giñe jun lun gayáraabei lan jedéweejan sarágu joun gudémetiña queisigubeirügü ílaü le ábunúbei.

Ábame laweírídagüdüni Búngiu murúsun fuleísei le jadügübei joun, darime lun jabíjin oúnwenbun abíniruni lúmagiñe Búngiu queísi ában oúnwenbun alúbajani.

¹¹ Jugúya, jibíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei jóunajani joun wáma, weíríbei jateíngiruni Búngiu.

¹² Lugúndun láu wíchuguni íderawaguni le joun wadújeñu, máma wíchiga rügüñein seínsu le jemégeirun joun, wadügüña giñe lun jíchugun sarágu eteíngiruni lun Búngiu láu líra.

¹³ Jíchuguba uweíríguni lun Búngiu lugúndun arúfuda lumúti ídejani le joun luágu adúga jumáni le lubeíbei Crístu, jíchuguba giñe uweíríguni lun Búngiu luágu íderawaguni le jíchugubei joun lúma joun súngubei.

¹⁴ Ábame jayúmuragun lun Búngiu juágu láu sarágu ínsiñejabuni jun luágu luweírín lareíni Búngiu le larúfudubei jídaangiñe.

¹⁵ ¡Teíngu wáña lun Búngiu, luágu rújali lan ában oúnwenbun cátei woun le siñá wabei adárra dimúrei le buídurügüti ubuídun lun wadímurejan luágu! Cátei ligía, Liraü.

10

Lubáfu Páblo queísi apóstolu

¹⁻² Aríñawagúati luágu gudéme gu nan dan le júma nan, ánjein lan dan le díse nan jueí, derégüda lan nouuserun júma. Áu Páblo, ayúmuraguatina jun láu ában ünabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdünün luágu wuríbatí le jadügübei, dánme le nachülürün júmoun. Sáansi jumeí ligáburi jaríta gu wawágu, jugúya le aríñagubei luágu lun lan waríjin cába lan waságara lídaangiñe wesériwidun lun Crístu. Ánjein madügün jumá, aráansetina lun nagágibudagun júma.

³ Inárüni luágu ubouáguna wamá láu sun jadébilin güri gía ubouáguna, máma queísi wügüríña lánina ubou le wawúrībuja luágu wuríbaní.

⁴ Máma ubouáguna áruma to áuboun wawúrībuja, larúmate Búngiu wayúsurboun lun tagünrinchagun érei.

⁵ Ítara líña lubeíti, láu lubáfu Búngiu güri ngua wamúti sun aríta gu le múaraanbei lúma linárün Búngiu, lúma sun cáteí le abúseerúbei leréderuni lasúbudirúniwa Búngiu. Sun gíñe jasáminan güri gía ubouágu rúwamuti lábugiñoun lubáfu Crístu lun lúaraduba lan láu le lubeíbei.

⁶ Áni lári gíñe jíchaagun júngua le gumúti lábugiñoun lagúmadijan Crístu, aráanseñu wáña lun wasúfuriragüdüniña ja magáambadigiñabaña lun.

⁷ Barü jumuti cáteí quei larijíniwa bougudigiñe libítí. Aríñagatina jun luágu ánjein lan chou rugua lubeí ában güri gía lúngua luágu lánigu lan Crístu, lúnti gíñe lasúbudiruni luágu ítara méme líña lan lánigu wamá gíñe Crístu.

⁸ Fágua jaríta gu luágu néredun murúsun lueí le lubúdubu luágu nubáfu queísi lání Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdünün lídan cáteí lánina Búngiu, máma lun nagünrinchaguni jafiñen, queísi jadügüni arúfudajatiña jagánagua guetó.

⁹ Mabúseerúntina lun jaríta gu luágu náluguña lan nebélaagüdün anúfudei jídoun táu nigáradan.

¹⁰ Aríñagatiña náganiñu luágu abürüja nánun gárada queísi ában güri gía láuti sarágu ubáfu, áni derégüdatí nege nerérun jun tídan, dan le júma nan, débilitiná nege, áni mínsiñegu lán nege ligáburi nadímurejan.

¹¹ Furúmieguarügü le aríñagubalin cáteí le, lúnti gíñe lasúbudiruni luágu ítara lan quei nubeí láu dimúrei díse jueí, ítara núba lan gíñe dánme le júma nan.

¹² Míchaaguntiwa woúngua jámoun ja adímurejabaña buídu jawou gúa, mítaraantiwa quei jagía. Jagía, adúgatiña ában libidiouniga áu láu jamísuraagun jóungua láu guánarügü jamísuraagüle lúma láu jíchaagun jóungua jámagua.

¹³ Wagía, mapántajaanbadiwa luágu wawádigimaridun lun Búngiu lídan ában fulásu le ñilumuti míchugun lan Búngiu úma woun lun wesériwidun lun ñi, queísi jadügüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía ánjarubei lun wachülürün júmoun ubúrugun Corínto.

¹⁴ Ligía mídin wabeí sügü láu le labúseerubei Búngiu wadüga lídan le wáfaagun lun wíderagunün, ladüga wagía anügübalin ugánu luáguti Crístu jun furúmiñe.

¹⁵ Mapántajaan tiwa láu wadágimanu le jadügübei ámu, camá jamuga wadüga. Agúrabarügütiwa lun quei lan lagánwoundun jafiñen, gayáraabei lan wawádigimaritima jagánagua, súnwandan quei lugúndan Búngiu.

16 Lárigiñeme, jarítaguatiwa wadiseduntima lun wapúrichijani ugánu lánina asálbaruni lídan buri fulásu le díseti jueí, le ñí lumuti magáambungiña lan luágu Crístu, lueí wapántajan luágu wadágimanu le jadügübei ámu, camá jamuga wadüga.

17 Le besénti ladímurejan luágu uweíriguni, ladímureja luágu luweírigun Crístu, máma luágu luweírigun guánarü.

18 Lugúndun gürígia le buídubei, máma le adímurejabei buídu luoúgua, le uágubei buídu lan ladímurejan Wabúreme Crístu, ligía buídubei.

11

Páblo jáma yéetiña ja aríñagubaña luágu apóstolugu jamá

1 ¡Buséntina jamúga lun jawánduni libídiouniga náu murúsun! Awánda jumá,

2 lugúndun eméendütina jáu láu ában eméendüni le lúmagiñeti Crístu, lueí jamuga jígiruni Crístu. Áu asúbudiragüdúbalin Crístu jun, ába júaradun lúma, áni le nabúseerübei, lun gayáraabei lan nedégerunün lun quei ában irájü jarúmatu to amárieidutu lúma ábanrügü wügüri.

3 Ítara quei layéedunun Máfia Éva, janúfudetina lueí giñe jígiraguagüdün júngua lun jeyeedún lídan jarítagan, lueí jesériwidun lúnrügü Crístu táu sun tarúman janígi.

4 Naríñagubalin le, ladüga resíbi jumáaña ja ñübintiña adímureja iyéeni jun luágu Crístu, áni bulíeiguatün lueí cátei inárüniti le warúfudajabei jun. Resíbitün giñe ában espíritu láu ugúndani ámu lueí Sífiri Sándu le resíbi jumáalibei láu warúfudajan jun, resíbitün giñe ában ugánu lánina asálbaruni jámagiñe le ámu lueí ugánu lánina asálbaruni le agáamba jumáalibei wámagiñe.

5 ¡Afiñetina luágu múnabun nan sügü jáu súper-apóstolugu ja jafálarubaña!

6 Fágua ibídiouguati láu ligáburi nadímurejan, mabídiounigati láu nisúbudin, áni arúfuda wamáali le jun súnwandan lídan sun le adüga wamáalibei.

7 ¿Ódi wuríbatí nadüga napúrichijani ugánu lánina asálbaruni jun magúburajanga áu ni cáta, ünabudaguagüda núngua ítara lun niñúragunün lídaangiñe binádu jigáburi?

8 Barütina seínsu jámagiñe títana ámu buri ligílisi láu nerésibiruni le jafáyeirubei nun, lun nayúsuruní esériwida jun magúburajanga naün.

9 Áni dan lé meja níjein lan nemégeirun dan le júma nubeí, merédetina quei ijürügu lun ni ában, idújeñu ja ñübinbaña Macedóniagiñe, jagía íchugubalin le nemégeirubei nun. Ítara líña náfaagun lun mámabadina lan ijürügu jun lídan ni cáta, áni ítara méme lúba nadüga.

10 Ítara quei chouuru náni luágu subúdi náni linárün Crístu, ítara líña giñe nasúbudiruni luágu manügübadina lan seínsu lúmagiñe ni ában lídan sun Acáya, lueí jamuga lagídarúniwa lébuna ugúndani le nuágubei, lun gayára lan nesériwidun jun magúburajanga.

11 ¿Cásan uágu nadímureja ítara? ¿Ladüga funásan jimísíñe nun? Subúdi luweírín jínsíñe nun lun Búngiu.

12 Nadüga mémebei le nadügübei lun míchugun nan lúgaaru joun arúfudajatiña jagía ja álujabaña lun gayáraabei lan jaríñagan luágu ítara méme líña lan jesériwidun jun queísi wagía.

13 Máma Crístu oúnajabaliña yéetiña jagía jagánaguouún láu sun jafámurun camá lánigu Crístu apóstolu jagía.

14 Áni máma cátei terénchati le, lugúndun Máfia guánarügü arúfudaguati lúngua quei ánjeli le íchugubalin larúgounga,

15 ligía giñéti jafámurubei ja esériwidubaña lun queísi gürígia ja adügütiña buíti. Wel, lachúlürüba wéyu lun jerésibiruni le jadúnabei luágu wuríbani le jadügübei.

Lasúfurirun Páblo luágu lesériwidun lun Cristu queísi apóstolo

16 Nariñaguñaya jun. Úa la ni ában aritaguti luágu ladüga lan lülü lan náu nadímurejanbei jun ítara, ánjein jarítagua jubálin ítara, ígira jumána lun nadímurejan jun quei ában lülü táu, lun giñe gayára lan napántajan murúsun.

17 Dan le nadímurejan buíti nuouúgua, madímurejaantina láu ában ünabuni quei ligáburí ladímurejan Cristu, nadímurejan quei jadímurejan íbídiouguatiña áu.

18 Queísi japántajan arúfudajatiña jagánagua láu buri cátei le lánina ubou le, napántajaba giñe.

19 ¡Quei lanáremebei lichú jáu, awánda jumútiña lülü táu láu ugúndani!

20 Lugúndun awánda jumútiña ja afósurubalün lun jesériwidun joun, jáma giñe ja aságarubalin le júmati, ja anügübalün jánime, ja ouserubalün quei ni cáta, ja agáyuajabaña jigíbuagun.

21 Láu sun nibúsigari nan lun nariñaguni, ¡weírítí buga wedébilin lun wadügüni cátei líra!

Ánjeinti le uágubei gayára lan janáangun jóungua, gayáraati giñe nanáangun núngua luágu (nadímurejaña méme queísi ában lülü táu).

22 ¿Jarásan Hebréona jagía? Áu sun. ¿Linásíñuna Israél jagía? Áu sun. ¿Linébaanfaangu Abrahám jagía? Linébaanfan giñe áu.

23 ¿Esériwidutiña lun Cristu jagía? Sügútimaatina jáu láu sun nadímurejaña lan queísi ában lülü táu dan le nariñaguni. Ñadágimeinjaadina sügü jáu, beiwaaadina sügü jáu, dáúwaaadina sügü jáu, sarágujali weíyaasu yaráfa nan lun nouñwen.

24 Seíngüjali weíyaasu jabeíchunina juríu láu darándi-néfu beíti.

25 Ürüwa weíyaasu jíchaagun Rómana wéwe nuágu, ában weíyaasu jachüragun juríu dübü nuágu. Ürüwa weíyaasu tabúluchun ugúnein to ídaanboun náfayaja náu, ában weíyaasu sügútina ában áriebu lúma ában wéyu anágü baránaja lárigiñe tabúluchun ugúnein náu.

26 Aweíyasujaadina sarágu luágu luwádigimari Wabúreme, áni luágu buri weíyaasu ligía daríguaadina núngua lídan pelíguru dúnarugu, jádan jíwerutiña, jádan nupáisanu, lúma jádan teréncha. Daríguaadina núngua lídan pelíguru ubúru, áraabu, lúma baránaja, lúma lídan pelíguru jádan gürígia aríñagutiña luágu ídújeñu jamá lueigiñe Jesucristu, le jayéeni.

27 Deréti nuwádigimaridun láu sarágu lénreengúnga, reídeijadina marúmugunga sarágu weíyaasu, súfurijadina ílámáü lúma mágürabu, ayúnaraadina gíbe, súfurijadina lídíliga lúma tilóúgua anáanguní.

28 Bougudi lueí buri cátei le lúma buri ámu cátei, ságü wéyu nasándiruni lijürü nidíjeri jawágu tílana sun ligílisi.

29 Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figou, weírítí nigárigu luágu.

30 Ánjein lúnti lubeí napántajan lun gayáraabei lan jerésibirunina queísi apóstolo, napántajaba láu buri cátei le, le arúfudubalin nidébilin.

³¹ Búngiu, le Lubúngiute áni Lúguchi Wabúreme Jesucrístu, le únbei lúnti lan líchugúniwa uweíríguni lun sun dan, subúdi lumúti luágu inárüni lan naríñagubei.

³² Dán meja le ubúругu nubei Damáscó, ába líchugun gumádimati le esériwidubei lun urúei Aréetas oúnigirutiña luágu buri lubéneri fulásu ligía lun janügünina adáüra.

³³ Ába jaráriragüdünina numádagu lídan ában faníñe lídaangiñe ában funédere láni lubárierun ubúругu, ítara líña neséfurun jájaburugugiñe náganiñu.

12

Labájüdagun Páblo luágu buri cátei le larúfudubei Jesucrístu lun

¹ Magáñeirunti gürígia ni cáta láu ladímurejan buídu luouúgua. Láu sun líra, nabájüdagua jun guetó luágu buri cátei lé meja larúfudubei Jesúsú nun.

² Catóúrusu írúmu guetó lueígiñe nanügüniwa lídoun lürüwan siélu, áu le affíñebei luágu Crístu. Ibídiñeti nun ánjein láu sun lubei núgubu nídin, lúmoun máma lan láu, Búngiu asúbudirubalin.

³ Subúdi numúti luágu barüwa nan lídoun lürüwan siélu, le méme gírubei paraíso, ibídiñeti nun ánjein láu sun lubei núgubu o máma lan láu sun núgubu, Búngiu rügüñein asúbudirei.

⁴ Ñi siélu, arúfudati Búngiu cátei nun lé buri uágubei siñá lan nadímurejan ni ca un ladüga arámudaguati buri cátei ligía luei jasúbudin gürígia.

⁵ Gayáraati jamúga napántajan luágu narjini buri cátei líra, láu sun líra, siñáti napántajan nuouúgua, nadímurejanrügü luágu luweírín mabáfu nan nurúmawagua.

⁶ Láu sun ánjana lan jamúga busén nadímurejan buídu nuouúgua, máma jamúga libídiouniga áu líra, lugúndun inárüni lan jamúga le naríñagubei luágu le asúseredubei nun. Madügün nubei lun úa lan ni ában anügütina weiri sügü láu larjínina o sügü lan láu le lagáambubei naríñagan.

⁷ Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámabei lan lúba, ába líchugun ában sándi nuágu camá jamuga ában jíyu charúñu nuágu, liábin quei ában lumégen Máfia lun lasúfuriragüdünina.

⁸ Ürüwaali weíyaasu namúriajan lúma Nabúreme Crístu lun lagídaruni sándi ligía nuei,

⁹ lariñaga Nabúreme nun. “Anájein búma láu nínsiñejabu, áni buídurügüti líra lun bawánduni sun asúfuriruni, buítimaati larijín nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu.

¹⁰ Ligía nagúndaarúnbei láu débili, anabúni, mégei, eíbaaóuni, lúma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weírítimaabei nasándiruni lubáfu Crístu nuágu.

Lidíjeri Páblo jawágu tllana ligílisi Coríntona

¹¹ Ábanjadina lülü táu láu nadímurejan buíti nuouúgua, áni jugúya adügagüdúbalin nun, lugúndun jugúya yebe lúnbei jadímurejan buídu nuágu, máma áu. Múnabuntina sügü jáu súper-apóstolugu ja jafálarubaña, láu sun ni cáta nan.

¹² Lídaan wadágimanu le nadügübei láu sarágu gurásu jagánagua, arúfudúati láu seíni lúma miláguru weíriti le nadügübei luágu ában lan apóstolu tímatimaati áu.

¹³ Mouserun numútün ünabu jawei tilana tibiri ligílisi, ánjein gubeírügü láu lubei meréde nan quei ában ijürügu jun. ¡Ferúduna jumána luágu líra!

¹⁴ Guetó aráanseedina lun nídín bisídaün lürüwan weíyaasu, áni mámabagina ában ijürügu jun. Máma náluguñein le júmabei, jugúya nálugubei lun jedéregeragun júngua le gumúti lun Crístu. Ítara jíña nun queísi isáanigu, áni agübüriugu lúnbaña joúndarun seínsu jabá jasáanigu, máma isáanigu jabá agübüriugu.

¹⁵ Nagástarubei le nómabei láu ugúndani juágu, daríme lun níchaagun núngua le gumúti luágu jufúleisein lun gayáraabei lan jeíbugun buídu lúma Crístu, láu sun genéje láni luágu dántima lan le jínsiñe jumá nun, mínsiñetimaatina jun.

¹⁶ Añájein, láu sun subúdi jamáni luágu meréde nan quei ában ijürügu jun, aríñagatiña luágu barü nan seínsu júmágiñe lídaan ámu luwúyeri láu íbíbuni.

¹⁷ ¿Ayéeda numútün funági láu ában jádaangiñe güriágu ja noúnajabaña jun lun lanügüni seínsu júmágiñe nubá?

¹⁸ Amúriajatina lúma Títo lun lídín bisídaün, oúnaja áu ában idújei lúma. ¿Yéegua lumútün funági Títo? ¿Ma ában láu woúserun wagía biángubei, áni ában méme Sífiri Sándu abúgurubalíwa?

¹⁹ Fágua jarítaguatün luágu weséfuraguña lan woúngua jigíbugiñe, máma líña. Lubáragiñe líra, wadímurejaña ligíbugiñe Búngiu queísi lánigu Crístu. Sun le aríñaga wamáalibeí, waríñaguñein lúnrügu jawáanserun lídaan jeíbugun lúma Búngiu, nidújeñu jínsiñetiña nun.

²⁰ Nidíjeritina lueí dan lánme nídín aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgaü, lúma igáñi tídan janígi, láu jáfaagun lun jawáanserun láu júnabudagüdüniña jidújeñu lueígiñe Jesucrístu, láu marásualugu, agúseragüdüña jidújeñu, láu pántaü, lúma lídan chagáguau.

²¹ Nidíjeritina lueí lídan lánme nídinya bisídaün, lanügagüdüniña Nubúngiute busígana jáu, lueí giñe nayájun jawágu sarágu jídaangiñe ja afígounjañabaña lúmágiñe binárü áni mígirun jamágili iwíyei, salúfuri, lúma buri ámu luwúyeri wuríbani.

13

Ewéridijani lúma lagúmujoün buri mábugaü

¹ Nijánme lürüwan weíyaasu nídín bisídaün. Dánme le nachülürün júmoun, lagúseragüdüwaba cáda ában le gadúnrunti ánjein añájein lubei bíama o ürüwa geféentiña luágu lidúnrun.

² Luágu meja libíaman nuweíyasun júmoun, wéridi numútiña meja ja adágubaña wuríbani lun jasáansiraguni jagáburi. Láu sun díse nan jueí guetó, nariñaguñaya joun sun ja asígirubaña adágua wuríbani, luágu dánme lan nídín bisídaün lürüwan weíyaasu, nasúfuriragüdübaña lan láu ában érei weíriti.

³ Narúfudubeiti jun luágu adímureja lan Crístu nídaangiñe. Áni medébilinti Crístu lídan ligáburi louuserunün, arúfudarügü lumúti luweirin lubáfu jagánagua.

⁴ Inárüni luágu jílá lan luágu gurúwa queísi débiliti, ába labágaridun láu lubáfu Búngiu. Débilitiwa giñe queísi ligía dán meja le laganóunbei ya ubóuagu,

áni quei sará lan Crístu lídaangiñe ouweni láu sun lubáfu Búngiu luágu, wachülürüba júmoun láu sun lubáfu Búngiu wawágu ladüga lídaañadiwa lan ában lúma Crístu.

⁵ Jouchagua jumá júngua lun jaríjini ánjein lánigu jubeí Crístu le tímatimaati, jouchagua jumá júngua, mouchagua jumána. ¿Ibidiñeti jun luágu níjein lan Crístu jídan ánjein afiñe jubeí le tímatimaati luágu?

⁶ Agúrabatina jasúbudiruni luágu afiñe wamá luágu Crístu le tímatimaati, áni níjein lan agánawa wádan láu sun lubáfu,

⁷ ladüga mabúseerun wamá warúfuduni wabáfu quei apóstolugu láu wasúfuriragüdünün luágu luríban jigáburi. Busénrügütiwa lun buídu lan jeibugun lúma Búngiu láu sun jamúga ígirúa wamá marúfudunga wabáfu quei apóstolugu.

⁸ Dan rügüñein múaran lan lagáburidun gürígia lúma linárün Búngiu, labúseerúa larúfudúniwa nubáfu queísi apóstolu lun nasúfuriragüdüni gürígia luágu lifígoun, dan le buídu lan jouđin lúma Búngiu, mabúseerúnwati narúfuduni nubáfu láu abeichuni.

⁹ Gúndaatina lun naganóun quei mabáfuti ánjein buídu lubeí jigáburi, áni wayúmuraguamémeba lun jiábin lun jabuídurun le gumúti.

¹⁰ Nabürüjañoun gárada to jun lubáragiñe nídin aríjaün, lun gayáraabei lan jasáansiruni jigáburi lubáragiñe nachülürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdünün. Lugúndun rúlumuti Búngiu ubáfu nun queísi apóstolu lun nawáanseragüdünün lídan jeibugun lúma, máma lun neréderunün lueí.

¹¹ Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburi, ragüjuma dügüdaguaü, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu.

¹² Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua.

¹³ Mábuga jáña sun wadújeñu lídan afiñeni jun.

¹⁴ Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labürüjan Páblo joun tлана liglisi buri to Galáciaboun

¹ Anája áu Páblo, le láni Jesucrístu apóstolu. Máma güriúa anúadirubalina lun apóstolu nan, máma giñe güriúa oúnajabalina apúrichija luágu, Jesucrístu guánarügü lúma Wáguchi Búngiu le ásaaragüdübalin lídaangiñe ouweni, jagía oúnajabalina quei apóstolu.

² Áu jáma sun wadújeñu luegiñe Jesucrístu ja númabaña ya, wabürüjañoun gárada to jun, jugúya le tлана sun liglisi to Galáciaboun.

³ Binílaün Wáguchi Búngiu lúma Wabúreme Jesucrístu, ibíja jumá giñe darángilaü jámagiñe.

⁴ Rulumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina ubou le, queisi labúseeruni Búngiu.

⁵ ¡Uweiriguni lun Búngiu lun súnwandan! Ítaralá.

Ában rügüñein luwúyeri ligáburi wasálbarun

⁶ ¡Weiriti nanígi láu lufúresen jígiruni Búngiu le agúarubei jun lun lánigu jumá luágu le ladügübei Crístu juágu, láu luweirin línsiñejabu! Furéseti jasáansiruni jafiñerun afálara ámu arúfudajani lún nege jadáriruni jasálbarun lídaangiñe,

⁷ iyéeni arúfudajani ligía. Chülüjaña wügüriña jagánaguouún, ja buséntiña jañáwurijani jarítangun lun jafálarun ában úma le maríchati —ámu luei jafiñerunrügü luágu Jesucrístu lun jasálbarun.

⁸ Wel, furúmieguarügü güriúa le ñübinbei adímureja jun luágu ámu luwúyeri asálbaruni luei le arúfudaja wamáalibeí jun, cáteíñein lan güriúa ligía, jreideilá lábugiñe líñaragun Búngiu lun sun dan, áu yebe, ában yebe ánjeli siélugiñe!

⁹ Ariñaga náali meja áni naríñagayaali guetó. Ánjein ñübin ában güriúa arúfudaja ámu luwúyeri ligáburi asálbaruni lídaangiñe figou jun luei le resibi jumáalibeí, jreideilá lábugiñe líñaragun Búngiu!

¹⁰ Dan le naríñaguni le, ¿náluguña neréderun buídu jagíbugiñe güriúa, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe güriúa? Lun jamúga ligía lan nabúseerúbei, mámaadina jamúga ában eseríwiduti lun Crístu.

Ligáburi lachülürün Páblo lun ábanbei lan láni Jesúsu apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe güriúa líabin,

¹² máma lúmagiñe ni ában güriúa nibíjei, máma giñe larúfudajan ni ában güriúa nun, Jesucrístu guánarügü asúbudiragüdübalin nun.

¹³ Agáamba jumáli ida líña lán meja nigáburi dán meja le gúnfuligidina lúma Búngiu láu luwúyeri jagúnfulirun juríu, subúdi jumáli ida líña lán meja lanárime neibaajaniña tлана lilígilisin Búngiu, áfaagua áu lun nagúmuchaguagüdüniña.

¹⁴ Lídan ligáburi jagúnfulirun juríu lúma Búngiu, furésetina meja sügü jáu sarágu jádaangiñe nupaísanun ja madíseguati jagüriajouún núma, ladüga derégüdatimáatina meja lídan nagúnfulirun láu jagáburi binádu nagübürigu.

¹⁵ Ánjeinti Búngiu, anúadira láadina méja lubáragiñe nagüriajoun lun nesériwidun lun, ába lagúarun nun luágu luweírin línsiñejabu lun lánibadina lan.

¹⁶ Lídan lidáani, ligía lugúndaanbei Búngiu lun lasúbudiragüdüni Liraü nun lun gayáaraabei lan napúrichijani lubuidun ugánu joun ja mámabaña juríu luágu ligía lan Wasálbaragülebei. Láriñe nasúbudiruni Jesucrístu, mídintina álügüdüja ni ca úma,

¹⁷ mídin áu Jerusalén aríjaña ja apóstolubaña nubáragiñe, lubáragiñe líra, ába nídin furése loúbawagun Arábia. Láriñe, ábaya nagíribudun ubúrugun Damáscu.

¹⁸ Darí ürüwa irúmu láriñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma.

¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsu.

²⁰ Ninárün jáu ligíbugiñe Búngiu luágu inárüni lan le nabürüjabei jun.

²¹ Láriñe líra, ába nídin loúbawagun Siria lúma Cilícia.

²² Ja wadújeñu lueígiñe Crístu ja tídaanbaña lílígílisin Crístu to loúbawaguboun Judéa, maríjin jamágininá meja lídan dan ligía,

²³ agáambarügütiña lariñawagún. “Wügüri lé meja eíbaajaliwa, lapúrichijañein ugánu le lánina afiñeni luágu Crístu queísi Wasálbaragüle guetó, áni ligía lé meja busénbei lagünrinchaguni wafiñen luágu Crístu.”

²⁴ Ába jáchugun uweírugini lun Búngiu luágu lasáansiraguni nigáburi ítara.

Resíbi jamúti íjbiri apóstolugu Páblo

2

¹ Catoúrusu irúmu láriñe, ábaya nídin Jerusalén úara lúma Bernabé, barú numuti gíñe Títo númagua.

² Nídinbei ñi ladüga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu afiñetiña, ába nabájüdaguni joun ída líña lan narúfudajan joun ja mámabaña juríu luágu wasálbarun, nadügünbalin líra lun gayára lan jánjarun lun le narúfudajabei, lueí leréderun le adüga náalibeí lúma le nadügübei quei ni cáta.

³ Resíbi jamúti, áni ní Títo, le nouíbabei, mafósurun jamúti lun lerésibirun circuncisión, láu sun máma lan juríu.

⁴ Inárüni luágu añájein lan eyéejatiña luágu idújeñu jamá lueígiñe Jesucrístu, ádaragutiña jóungua wagánaguouñ arámudaguarügü, buséntiña lun líchugúniwa gumádi luágu lúnti lan lerésibiruni Títo circuncisión ánjein busén lubeí lun láni lan Búngiu. Belútiña yéetiña jagía quei aríaaatiña lun jaríjini ída líña lan wagáburi bougudi lueí lílúrudun Moisés lídan woúndaragun lúma Jesucrístu, buséntiña jamúga lúnya wayábin lun idámunime lun lúrudu ligía.

⁵ Mígiraguagüdüntiwa woúngua joun ladüga busén wamá lun ñi méme lan inárüni le lánina ugánu luáguti asálbaruni júma, jugüya le mámabei juríu, meméterunga ámu buri cátei lánwoun le lúnbei jadügüni lun jasálbarun lueídügüya lun jafiñerun luágu Jesucrístu.

⁶ Ja asúbudirúbaña queísi ábutigu—láu sun, mebérese nan láu cátañañanu lan ladüga magúseragüdünti Búngiu luágu cátei le genégerügüti—míchuguntiña ábutigu jagía ní ában iséri luwúyeri arúfudajani nun lun níchuguni jun lánwoun le napúrichijabei.

⁷ Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijoun ugánu luáguti asálbaruni joun ja mámabaña

juríu nun, ítara quei buga líchuguni wadágimanu lun Pédro lun lapúrichijani ugánu méme ligía joun juríu.

⁸ Aríja jamáali luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan gíñe ñadágimeinbei nídaangiñe quei apóstolu jádan ja mámabaña juríu.

⁹ Queisi subúdi jamáni Jacóbo, Pédro lúma Juan, ja anügübaña quei weírigitimaatiña, luágu Búngiu lan fuleiseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu gíñe gúnda jamá lun wouúdin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu.

¹⁰ Amúrijarügütiña wáma lun warítangun jawágu gudémetiña, áni nijánti cátei le nouchubei nadügün láu sarágu gouñigi.

Ladeínjan Páblo lun Pédro ubúru gu Antioquía

¹¹ Dan le lídinbei Pédro ubúru gu Antioquía, ába nadeínjan lun ligíbuagun, lugúndun mabuúdin lan le ladügübei.

¹² Furúmiñe meja, jóuti meja affíñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lílúrudun Moisés). Ánjeinti lárigiñe jachülürün gürígia louñajan Jacóbo, ligía lagúmeserun Pédro adíse da jaweí ja mámabaña juríu, ába meíginjali lan jáma ladüga lanúfude lueí le gayáraabei jariñagun ja afíñebaña luágu lúnti lan jerésibiruni wügüriña circuncisión lun jasálbarun, lun gíñe meígin jamá juríu lídan ában jáma ja mámabaña juríu.

¹³ Játi jíbiri juríu ja affíñebaña luágu Crístu, ába júaradun lúma Pédro lídan cátei mabuúduñti le ladügübei, ába gíñe júaradun Bernabé jáma lídan cátei ligía.

¹⁴ Dan le nariñinbei luágu meíbugun jamá úara lúma inárüni le larúfudajabei ugánu luáguti asálbaruni (luágu man lan asálbaruni ni cátei lúma lílúrudun Moisés), ába nariñagun lun Pédro ligíbugiñe sun adámurini. “Amürü le juríu, berédera abágarida quei ja mámabaña juríu, mabágariduntibu quei juríu. ¿Ída líñáti babúseerúnbei bafósuruniña ja mámabaña juríu lun jabágaridun quei juríu?”

Sálbawatiña juríu, queisigubeirügü sun gürígia, luágurügü jafiñen luágu Jesu-crístu

¹⁵ Ába nasígirun aríñaga joun.

—Juríu wagía lúmagiñe wagüriajouñ, aríñagatiwa luágu mafígoun wamá, luágu mitaran wamá quei ja mámabaña juríu ja agüriajoubaña bougudi lueí lílúrudun Búngiu.

¹⁶ Láu sun líra, subúdi wamúti luágu úabei lan ni ában eréderuti richágu ligíbugiñe Búngiu luágu ladügüni le lubeíbei lílúrudun Moisés, láurügübei lafíñerun luágu Jesucrístu lerédera richágu ligíbugiñe Búngiu. Ligía gíñe lébubei wafíñerun luágu Jesucrístu, wagía le juríubei, lun gayáraabei lan weréderun richágu ligíbugiñe Búngiu lídaangiñe affíñeni le, máma lídaangiñe wadügüni le lubeíbei lílúrudun Moisés, lugúndun úabei ni ában eréderuti richágu ligíbugiñe Búngiu lueígiñe ladügüni le lubeíbei lílúrudun Moisés.

¹⁷ Ítara líña lubeíti, quei wáluajan weréderun richágu ligíbugiñe Búngiu lídaangiñerügü Jesucrístu, ába wariñin luágu gafígoun méme wamá queisi ja mámabaña juríu ladüga wabágariduña lan gíñe guetó bougudi lueí lílúrudun Moisés, ¿gayáraati wariñagun lueígiñe líra luágu Crístu lan gafígoungüdúbaliwa? ¡Ni cátei líbe líra!

18 Lubáragiñe líra, lun jamúga wagíribudun lun weménigidun luágu wagúnfulirun lúma lilúrudun Moisés lun wasálbaran lárigiñe weménigidun luágurügü wafiñerun luágu Cristu, warúfuduñein luágu magúnfulirun wamá lúma linárün laníchigu lúrudu ligía, áni gaffigountiwa.

19 Áu, queiğubeirügü jiláadina lan lun lilúrudun Moisés, lúrudu méme ligía ouwedagüdübadina lun, lun gayára lan nabágaridun lun Búngiu.

20 Rúguatina núngua quei jiláadina lun figou, dáwaguañu luágu gurúwa lúma Cristu. Mámaadina lubeiti áu méme abágaridubei nídaangua, Cristu abágaridubei nídan. Ibágarí le nabágaridubei lídan nügubu, nabágariduñein láu sun nafiñen luágu Liraü Búngiu le jínsiñejabúbei nun, ába ledéregeragun lúngua lun loúnwen nuágu.

21 Mabúseerúntina lubei namájarun lun lareíni Búngiu láu nagíribudun lún buri igáburi lánina lilúrudun Moisés, lugúndun lun jamúga gayára lan leréderun gürígia richágu ligíbugiñe Búngiu láu lagúnfulirun lúma lúrudu ligía, úati jamúga ju lan loúnwen Cristu.

Lúrudu ódi afiñeni

3

1 ¡Jugúya Galáciana, magáambaditün giñe! ¿Ca abíñaragubadün lun magáambun jubei lan ugánu le inárünibeí libügürü wasálbaran? Lídan meja wapúrichijan jun, arúfuda wamúti laníchigu loúnwen Cristu luágu lugúruwan jun, furáangu.

2 Aríñaga jumei cátei le nun. ¿Lueiğiñe jagúnfulirun lúma lilúrudun Moisés jerésibirei Sífiri Sándu ódi lueiğiñe jafiñerun luágu le jagáambubei luágu Cristu?

3 ¿Ída líña ítara lubei jumágaambadi? Gumésetün eíbuga lúma Cristu láu lubáfu Sífiri Sándu, ¿guetó jarítaguatün funági luágu buítimaabeí lan jeíbugun lun jígiruni Sífiri Sándu lun jagúnfulirun lúma jagáburi juríu?

4 ¿Marúfudajaangili sun le jasúfurirubei jun? ¡Arúfudajaali lámuga jun!

5 Dan le líchuguni Búngiu láni Espíritu jun, adüga ligía miláguru jagánagua, ¿cásan uágu ladügei líra? Máma lugúndun adüga jumáni le lubeibeí lilúrudun Moisés ladügei, ladügünbalin lugúndun afiñe jumá luágu le jagáambubei luágu Liraü.

6 Jarítagua jumá luágu Abrahám. Rúlumuti meja sun lafiñen luágu Búngiu, luágu lafiñen, ába lerésibiruni Búngiu queisi ában wügüri richáguati.

7 Ligía lubeiti jugúya, lúnti jasúbudiruni luágu ja lan afiñebaña, jagía lan linébaanfaanbaña Abrahám tímatisaatiña.

8 Queisi subúdi láni Búngiu lubáramegiwa luágu ñíbaña lan jádaangiñe ja mámaña juríu lun jayábiba lan lun jeréderun richágu ligíbugiñe láu jafiñerun luágu Jesucristu, ába laríñaguni ugánu buíti lun Abrahám lubáramegiwa, queisi bürúwañu lan tídan lilíburun. “Jabínirúaba sun gürígia uboúagu bídaangiñe.”

9 Ítara líña lubeiti, ja afiñebaña, biníwatiña úara lúma Abrahám le afiñerubei luágu Búngiu.

10 Ja afiñerubaña luágu jasálbaruba lan láu jagúnfulirun lúma lilúrudun Moisés, bulíeiguatiña, lábugiñeñanu líñaragun Búngiu, lugúndun tariñajare Lerérun Búngiu. “Sun ja magúnfulirunbalin sun le bürúwañubei tídan lilíburun nilúrudun le níchugubei lídaangiñe Moisés, lábugiñeñanu níñaragun.”

11 Furáanguti lubeiti luágu úa lan ni ában eréderuti richágu ligíbugiñe Búngiu luágu ladügüni le laríñagubei lilúrudun Moisés, lugúndun tariñajare Lerérun

Búngiu. “Láu lafiñerun gürigia luágu Búngiu lerédera richágu ligíbugiñe, ibíjaleíme ibágari magúmuchaditi.”

12 Ánjein lilúrudun Moisés máma cátei lánina afiñeni, lánina cátei le adügüwarügüti ladüga laríñajare lúrudu ligía. “Láu rügüñein jamúga lagúnfulirun gürigia láu sun igáburi lánina lúrudu le, libíjei ibágari magúmuchaditi.”

13 Wagía queísi gürigia garaüwarügütiña, mabáfutiwa lun wagúnfuliruni sun lúrudu ligía. Ába laséfuruniwa Cristu lidaangiñe líñaragun Búngiu lé lúnbei yebe láburuhan wawágun lueigiñe magúnfulirun wamáni sun lilúrudun Búngiu le líchugubei woun lidaangiñe Moisés. Barü lumuti Cristu líñaragun Búngiu luougua wewéñagua lídan le loúnwenbei luágu gurúwa, lugúndun tariñajare Lerérun Búngiu. “Íñarawagüti sun le ádarawagüti luágu gurúwa.”

14 Adüga lumúti loúnwen Cristu lun liábinba lan abíniruni le uágubei laríñaga Búngiu lun Abrahám, lidaangiñe Jesucristu joun giñe ja mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu wafiñen.

Lilúrudun Moisés, lúma lerérun Búngiu lun Abrahám

15 Nidújeñu, níchiga ában jémpulu jun lidaangiñeti jabágari gürigia. Dan le ladügün wügüri ában darádu, ába laseíniruni, úati ní ában lun gayára lan lagúluuduni ní lun líchugun ní cátei lánwoun.

16 Ítara líña giñe, rúlumuti meja Búngiu lerérun lun Abrahám lúma lun linébaanfan. Mariñaguntu Lerérun Búngiu “binébaanfaangu”, camá jamuga jawáguti sarágu gürigia, tariñajare “lun binébaanfan”. Laníchigu líra, “ábanrügü gürigia”, le Cristu.

17 Niján le naríñagubei. Adügati Búngiu ában darádu lúma Abrahám, ába lachoúruruni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun gürigia. Ligía darádu lubei lé meja ladügübei Búngiu lúma Abrahám siñáti lagúluudúniwa láu ában lúrudu le ñübinbei gádürü-san darándi irúmu lárigiñe, lun lígiruni lerérun Búngiu lun Abrahám mebégiga.

18 Lun jamúga lidaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibeí cátei ligía madügünga ní cátei lun lagañeiruni.

19 ¿Cáti un ju lan lilúrudun Moisés ánjein siñá lubei lasálbaruniwa? Ñübinti lúrudu ligía sarágu irúmu lárigiñe lidáradun Búngiu lúma Abrahám lun larúfuduni jafigoun gürigia joun, lúntirügü ladúrarun darí liábin linébaanfan Abrahám, le Cristu, le giñe úmabei ladügüwa darádu ligía. Rúlumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun gürigia.

20 Ánjeinti dán meja le ladügübalin Búngiu lidáradun lúma Abrahám lun labíniruniña sun gürigia lídan, mayúsurunti ánjeligu, mayúsurun ligía gürigia, ligía adügübalin sun cátei.

Ca lan uágu níjein lubei lilúrudun Moisés

21 ¿Laríñaguña funági le luágu múaradun lan lerérun Búngiu lúma lilúrudun le líchugubei lidaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúnfulirun láu, gayáraati jamúga jayábin gürigia lun jeréderun richágu ligíbugiñe Búngiu láu jagúnfuliruni le lubeibeí lúrudu ligía.

²² Lídaan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe Moisés, queísi lariñagun Búngiu tídan Lerérun. “Sun gürígia lábugiñeñanu lubáfu figou.” Ítara líña lun lídaangiñerügü lan afiñeni luágu Jesucristu gayára lan jáfuridun gürígia lábugiñegiñe lubáfu figou lun jeréderun richágu ligíbugiñe Búngiu láu jafiñen luágu Jesucristu, queísi meja lariñagun Búngiu lun Abrahám.

²³ Lubáragiñebei liábin Crístu lun gayáraabei lan wafiñerun luágu lun wasálbarun, lábugiñeñadiwa buga lubáfu lúrudu agúrabaja liábin.

²⁴ Ába lubeíti lanügüniwa lilúrudun Moisés lánime camá jamuga irájüñü wagía lun latoúnigiruniwa lueí wuríbani darí liábin Crístu lun dánme lan wafiñerun luágu, gayáraajálme weréderun richágu ligíbugiñe Búngiu.

²⁵ Guetóti, quei chülüjali lubeí Crístu, mámaadiwa lábugiñe loúnigirun lilúrudun Moisés.

²⁶ Guetóti lirájüñü Búngiu sun jugúya luágu jafiñen luágu Crístu, lídaañadün ában lúma.

²⁷ Sun jugúya le belújalibeí lídoun ában lúma Crístu láu jabásterun, ibíjaadün ában igáburi líbe ligáburi Crístu.

²⁸ Mámaali cátei lánina lun juríu jumá o máma jumá juríu, o idámuni o máma idámuni, wügüri o würi, ladüga láu lídaañadün lan ában lúma Crístu Jesús, sun jugúya ábanrügüñadün.

²⁹ Ánjein lánigu jubeí Crístu, linébaanfaangu Abrahám jugúya, jerésibirubei le uágubei lariñaga Búngiu lun Abrahám queí jalágaante.

4

¹ Niján cátei le nabúseerúbei naríñagun. Dan le loúnwen ában úguchili áni ñúraügili liraü le lúnbei lerésibiruni alágan, mabuíduntimaati dan lun irájü ligía sügü jáu lumúsuniña lúguchi, láu sun ligía lan labúremebei alágan, ladüga siñágili lan layúsuruni.

² Añájein gürígia oúnigiruti, aríja jagía láu lalágaante darí lachülürün dan le líridubei lúguchi lun lerésibiruni.

³ Ítara líña lasúseredun wáma. Lubáragiñebei liábin Crístu ubouágun, lábugiñeñadiwa meja lúrudu lúma buri igáburi le mámabei lúnti ladúrurun lun sun dan.

⁴ Dan le lagúnfulirunbei dan, ába loúnajani Búngiu Liraü, le agúriajoubei tídaangiñe ában würi, ába liábin quei juríu lábugiñe lilúrudun Moisés.

⁵ Liábinbei itara lun laságaruniwa lábugiñegiñe lúrudu ligía, lun lerésibiruniwa Búngiu queísi lirájüñü.

⁶ Lúnti larúfuduni Búngiu luágu lirájüñüjadiwa lan, ába loúnajani láni Liraü Espíritu, le méme Sífiri Sándu, tídoun wanígi, áni agúajati Espíritu ligía wádaangiñe lun Búngiu. “¡Núguchi!”

⁷ Lirájüñü lubeíti Búngiu wagía, mámaadiwa idámuni, áni ladüga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le búidubei joun ja afiñebaña

⁸ Dán meja le ibídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei.

⁹ Ánjein guetó, láu subúdi jumáali lan Búngiu, —lídan lirícha cátei, láu subúdi láadün lan Búngiu —jída lubáyanan gayára lan jaríttagun lúnya jíchaagun júngua

queísi idámuni lábugiñoun lúrudu lúma buri igáburi le mabáfubei lun ladügün ni cáta jun?

¹⁰ Adáaguatün buri fédu ítaga wéyu, ítaga játi, ítaga dan, ítaga irúmu queísi laríñaguni lilúrudun Moisés lun jeréderun richágu ligibugiñe Búngiu, lídan jarítangun.

¹¹ Janúfudetina lueí masériwidun lan wadágimanu le nadügübei jagánagua lun ni cáta.

¹² Nidújeñu, ayúmuraguatina jun lun jarítangun queísi áu luágu buri cátei le, ladüga furíjadina lun mámaadina lan lábugiñe lilúrudun Moisés queísi meja mámañadün lan lábugiñe lúrudu ligía. Madügüntün ni ában wuríbani nun lídan meja júma nan,

¹³ quei subúdi jumáni, ladüga meja ában sándi le nuágubei gayára lubei neréderun júma furúmiñeti dan lun napúrichijani ugánu lánina asálbaruni jun.

¹⁴ Sándi ligía lé meja nuágubei, ában meja ouchúni nun, münabunti janügünina luágu líra. Lubáragiñe líra, ába jerésibirunina queísi ában láni Búngiu ánjeli, camá jamuga Jesucristu guánarügü áu.

¹⁵ ¿Ca susérebei lun ugúndani lé meja jasándirubei náu? Gayáraati naríñagun luágu jáni fuleisei luágu ánjein lan jamúga meja lúnti, jaságaruñein lan jamúga jágu lun jíchuguni nun.

¹⁶ Guetó, ¿jáganijadina funági lueígiñerügü naríñaguni inárüni jun?

¹⁷ Weíriti juwámaan joun mútu ja, mabuídunti jarítangun jubá. Le jabúseerubei, lun jadísedagüdüñun waweí lun ában lánme jawámaadun jun.

¹⁸ Buítí lun juwámadirun joun ámu, ñi áu yebe júma o úaadina lan júma, ánjein láu lubeí lubuídun arítaguni ladügüwa.

¹⁹ Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asúfurira daríme lun jarúfuduni luágu níjein lan Cristu jídan.

²⁰ ¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

²¹ Jugúya le busénbei jíchaagun júngua lábugiñoun lilúrudun Moisés, aríñaga jumeí cátei le nun. ¿magáambun jumágili le laríñagubei lilúrudun Moisés?

²² Laríñajare luágu garájüñü lán meja Abraham bián irájüñü, ában táu lidámun, le ában táu lúmari to ában würi to máma idámuni.

²³ Le tiraü idámuni, ítara líña lagüriajoún quei jagüriajoún sun irájüñü, ánjein le tiraü to máma idámuni, lagüriajoún lun lagúnfuliruba lan le uágubei laríñaga Búngiu lun Abraham.

²⁴ Ítara líña cátei le queísi ában jémpulu. Bián würiña ja, ítara jáña queísi bián darádu le ladügübei Búngiu. Adügati ában darádu lúma Moisés dan le líchugunbalin lilúrudun lun luágu wübü Sinaí. Darádu ligía, ítara líña queísi Agár ladüga sun lan gürígia ja lábugiñebaña lúrudu ligía idámuni lun jagúnfulirun lúma, queísi idámuni jamá sun tirájüñü Agár.

²⁵ Wübü le Sinaí lídaañein fulásu le gíríbei Arábia (le ñi lubei jagánoua ladügawagun tiraü Agár). Agár liyáwaboun wübü ligía lúma lúrudu le íchugübei ñi. Ubúругu le Jerusalén le guetóbei, ítara líña quei wübü Sinaí lídan dan le sügüjalíbei, ladüga ubúругu ligía jáu sun lílana, ítara jáña quei idámuni lun igáburi lánina lilúrudun Moisés.

²⁶ Ánjeinti Jerusalén le siélubei, máma lánina idámuni queísi máma lan idámuni lúmari Abrahám, áni lirájüñü Jerusalén le siélubei wagía.

²⁷ Taríñajare Lerérun Búngiu.

Gúndaaguabá, würi maraüjeitu, amürü to maraüboun, wáguabá láu ugúndani, amürü to ibídiñebei agáriduni bun, lugúndun amürü to áuboun mebéresenwa lan, gíbetimaabaña birájüñü sügü táu würi to garaüboun láu búmari.

²⁸ Nidújeñu, queísigubeirügü Isáac lan irájü le líchugubei Búngiu lun Abrahám lun lagúnfulirun láu lerérun lun, wagía afíñetiña ladúgawagunbaña Abrahám ja uágubaña lariñaga Búngiu lun.

²⁹ Ítara queí meja dan ligía, isáani le agüriajoúbei lídan ában igáburi queí furúmieguarügü agüriajoúni eibaaja lumúti meja isáani le agüriajoúbei láu lubáfu Sífiri Sándu, ítara líña gíñe lasúseredun guetó—ja lábugiñebaña lilúrudun Moisés eibaaja jamútiña ja mámabaña lábugiñe lúrudu ligía.

³⁰ ¿Cáteisan taríñagunbei Lerérun Búngiu? Taríñajare. “Bugáboun idámuni láu sun tiraü, lugúndun siñáti gafánran lan tiraü idámuni lídan alágan lúma tiraü to mámaboun idámuni.”

³¹ Nidújeñu, mítaraantiwa lubeíti queí tirájüñü idámuni, ítara wáña queí tirájüñü würi to mámaboun idámuni.

5

Míchaaguaya jumá júngua idámunime

¹ Furígüda láadiwa Crístu lídaangiñe idámuni wamá lun lúrudu buri lúma igáburigu. Reídei jumá lubeíti le ñi lubei líchugaün Crístu, míchaaguaya jumá júngua idámunime.

² Agáamba jumána. Áu páblo aríñagatina jun luágu ánjaün lan íchaagua júngua lábugiñoün igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun.

³ Nariñagayaali lun furúmieguarügü wügüri le resíbinbalin circuncisión luágu lúnti lan ladügüni sun líbiri le lubeíbei lilúrudun Moisés lun gayáraabei lan leréderun richágu ligíbugiñe Búngiu.

⁴ Jugúya le jarítaguabei luágu richágu jumá ligíbugiñe Búngiu láu jagúnfulirun lúma lilúrudun Moisés, ígira jumáli Crístu, díseedün lueí asálbaruni le láurügüti lareñi Búngiu.

⁵ Wagía, láu lubáfu Sífiri Sándu lúma láu wafíñen luágu Jesucrístu, jeménigitiwa luágu weréderuba lan richágu ligíbugiñe Búngiu.

⁶ Ánjein lídaañadiwa lubeí ában lúma Crístu Jesúsú, málati werésibiruni circuncisión lúmoun merésibirun wamáni. Le busénwabei, lun afíñe wamá luágu Jesucrístu lúma lun warúfuduni afíñeni le wawágubei láu wínsiñejabu joun gürígia wáledi.

⁷ Buíti meja jeíbugun lúma Crístu, ¿ca ígiragüdúbalin lagaambúniwa inárüni jun?

⁸ Máma Búngiu le agúarubei jun adügúbalin líra.

⁹ Mabúlieida jumei luágu furése lan lawáraüdagun arúfudajani le maríchati lun lagünrinchaguni jafíñen sarágu gürígia queísigubeirügü résigüda lánun murúsun ísi sun to añóundawaguboun láu.

¹⁰ Neménigiduña luágu Wabúreme Crístu lúnya lasáminaragüdünün queisi áu luágu buri cátei le. Áni cáteifein lan gürígia le añáwurijabei jun, labeichubei Búngiu.

¹¹ Aríñagatiña arúfudajatiña yéetiña jagía luágu apúrichija nan luágu lúnti lan jerésibirun wügüríña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeibaajana meme juríu? Lun jamúga napúrichijani circuncisión, maríbaanti jamúga lábúrujan dimúrei luáguti louñwen Crístu luágu gurúwa joun.

¹² Ánjeinti jawágu ja abúseerúbaña jádaruni jídoun luágu lúnti lan jerésibiruni circuncisión, igúndaatina jamúga lun jíbunun jawárua gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábúgíñeñe igáburi lánina lilúrudun Moisés, manúga jumeirügü liñáti líra lun lébume gayára lan jasígiruni ugúndani buri le lánina ubouú le. Lubáragíñe líra, seríwíguja jumá júniwagua láu ínsiñejabuni le jídaanbei jubáruagua,

¹⁴ lugúndun láu jagúñfulirun lúma lúrudu le aríñagubei. “Jínsiñelá gürígia bíledi bun queisi bísiñegua búngua”, gúñfulijadün láu sun lilúrudun Moisés.

¹⁵ Goúnigi jumá, ánjaün ageíndagua júmagua, jagúmuchaguagüdüba júniwagua.

Ugúndani le lánina ubouú, lúma eíbuguni lúma Sífiri Sándu

¹⁶ Niján cátei le naríñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina ubouú.

¹⁷ Ugúndani le lánina ubouú máma lúmagíñeñe Sífiri Sándu, áni Sífiri Sándu, máma lúmagíñeñe ugúndani le lánina ubouú. Gáganiguati ában lúma le ában, ligía lásiñerunbei jadügüni jugúya cátei le jabúseerúbei yebe jadügün.

¹⁸ Ánjein Sífiri Sándu lubei abúgurubadün, mámaadün gíñe lábúgíñe lilúrudun Moisés.

¹⁹ Ménreengúnti laríjiniwa cátei lán buri cátei le jadügübei ja afálarubalin ugúndani lánina ubouú. Gámariguatiña jámagua mamárieidunga, adáaguatiña buri cátei wíyeti, úati nibúsigari jamá láu jasálufurin,

²⁰ judúguatiña joun sándu, abíñaraja jagía. Níjein iyéreejabuni jádan, gáganiguau, lúma eméendüni. Ménreengúnti jagáñidun, jawouúgua rügüñe in jarítagua súnwandan, fánreinguagüda jamúti adámurini.

²¹ Gimúgatiña, gáfarajadi, gátadi, weínamu jeigin, adúga jagía ámu buri cátei lenéje líra. Naríñaguñe in jun quei naríñaguni lubáramegiwa luágu ja lan adügübalin cátei le, mebélurunbaña lídoun larúejan Búngiu.

²² Niján buri igáburi le líchugubei Sífiri Sándu. Ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni,

²³ manáanguní únguaü, ragúguauü únguaü. Úaraguati buri igáburi le lúma furúmieguaügü lúrudu.

²⁴ Ja lánigubaña Crístu, dágua jamáali sun luwámaan cátei le lánina ubouú le joun luágu lugúruwan Crístu.

²⁵ Ítara quei wabágaridun lídaangíñe Sífiri Sándu, lúnti gíñe wígirun lun labúguruniwa Sífiri Sándu lídan le wadügübei.

²⁶ Moún lumuti wanáangun woúngua, añáwurijatiwa joun wíbirigu ítara, rúti gíñe gimúgaü wadaangua.

¹ Nidújeñu, ánjaün aríja luágu áburujaali lan ában jídaangiñe lídoun figoú, jugúya le eíbugubei lúma Sífiri Sándu lúnti jíderaguni lun lagídarun lídaangiñe figoú ligía, adúga jumei láu mawefriguni. Lúnti gíñe goúnigigua jumá júngua luei gíñe jáburujan lídoun figoú queisi ligía.

² Ídaragua jumá júmawagua lun jawánduni jijürügu, ítara lúba jagúnfulirun lúma lilúrudun Crístu, le lánina ínsiñejabuni.

³ Lúnti wíderaguniña wíbirigu lugúndun ánjein anáangua gürígia lúngua áni ni cáta ligía, leyéedaguña lúngua.

⁴ Cáda ában gürígia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarü lúngua, máma ámu,

⁵ lugúndun sun gürígia geféenbaña lun Búngiu jawoúgua, máma jawágu ámu.

⁶ Le únbei larúfudajoíta Lerérun Búngiu lúnti lafánreinjani sun luwúyeri íbíjini lúma le arúfudajabei lun.

⁷ Mayéedagua jumá júngua, siñáti jéjerajan láu Búngiu. Le lábunagubei gürígia, ligíaba gíñe lalúbaja.

⁸ Ánjein ábunagua ában gürígia cátei le íchugubei ugúndani le lánina uboú lun, le méme lábunagubei, íchuguba ában alúbajani le lánina féridi lun. Ánjein ábunagua ában gürígia cátei le íchugubei ugúndani lun Sífiri Sándu, íchuguba Sífiri Sándu ában alúbajani le lánina íbágarí magúmchaditi lun.

⁹ Moún lumuti lubeíti labúchadun wawágu adúgei cátei le buídubei, lugúndun ánjawa ítara méme adúgei, walúbajaba buíti dánme le lachülürün dan lun werésibiruni.

¹⁰ Ligía, adúga wamei lubei le buídubei joun súngubei ságü gayára lan, jóuntima wadújeñu lueígiñe Crístu.

Ewéridijani lúma lagúmujoún ayóuraguni

¹¹ Aríja jumá luweínamu létera le áubei nabürüja jun guetó láu nújabu guánarügü.

¹² Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadügüñein lúnrügü jeréderun buídu jagíbugiñe juríu, lun meíbaajoúniwa jamá lueígiñe jamúga jariñagun luágu lídaangiñe rügüñein lan loúnwen Crístu wasálbara.

¹³ Ni ja íchaagubaña jóungua lábugiñoun igáburi le lánina circuncisión, madügün jamúti sun le laríñagubei lilúrudun Moisés, busénrügütiña lun jerésibiruni jugúya circuncisión lun gayára lan japántajan luágu jafósurunün lun jíbíjini circuncisión.

¹⁴ Ánjeinti áu, mabúseerúntina napántajan ni ca uágu, ában rügüñein cátei uágti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jílaaña líña cátei le lánina uboú nun áni jílaaña níña gíñe lun cátei le lánina uboú!

¹⁵ Lun Búngiu, ni cáta ánjein íbíja wabálin circuncisión lúmoun mibíjin wamáni, le busénwabei, lun iséri wamá gürígia.

¹⁶ Sun ja abágaridubaña ítara, jagía lánigubaña Búngiu le tímatimaati, resíbi jamá lubeíti darángilaü lúma gudémejabu lúmagiñe.

¹⁷ Lúmagiñe dan le ugüñe, mabúseerúntina lun nibíjin lénreengúnga ni ca úmagiñe. Arúfuda lumúti lárígi burí bíti le nuágubei luágu ában nan esériwiduti lun Nabúreme Jesúsu.

¹⁸ Nidújeñu, binílaün Wabúreme Jesucrístu, sun jugúya. Ítaralá.

LIGÁRADAN PÁBLO JOUN ÉFESONA

Labürüjan Páblo joun títana ligílisi to Éfesoboun

¹ Anája áu Páblo, le lání Jesucrístu apóstolu láu lugúndan Búngiu, nabürüjañoun gárada to jun, jugúya le lánigubei Búngiu ja afiñebaña luágu Crístu Jesúsú lídan ubúrgu le Éfeso.

² Binílaün Wáguchi Búngiu lúma Wabúreme Jesucrístu, ibíja jumá gíñe darángilau jámagiñe.

Abíniruni le wánibei lugúndun lídan wamá ában lúma Jesucrístu

³ Rúwama uweíriguni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu.

⁴ Lubáragiñebeí meja ladügüni Búngiu ubou, anúadira lumútiwa lun lánigubadiwa lan láu le lúnbei ladügüni Crístu wawágu, lun weréderun madúnrunga ligíbugiñe, derégegüñu woúngua lun.

⁵ Fánrein lumútiwa lúmagiñe binárü, láu línsiñejabu, lun lerésibiruniwa queísi lirájüñü lídaangiñe Jesucrístu, ladüga ligía lan lugúndaanbei woun.

⁶ Ligía súnwandan lubeí wíchugun uweíriguni lun Búngiu luágu luweírín lareíni le áubei labínirawa dan le lídan wamá ában lúma Liraü le jínsiñebeí lun.

⁷ Láu luweírín lareíni Búngiu, sálba láadiwa láu líta Liraü le áwiyurubei wawágu dan le loúnwenbei luágu gurúwa, ferúdnaleí wafígoun.

⁸ Arúfuda láali Búngiu lareíni woun le tímatimaati láu líchugun sun luwúyeri subúdi lúma gunfaráandaü woun,

⁹ subúdigüda láali layúmajan lé meja arámudaguabei woun, o arítaguni lan le lasáminarubei ladügün.

¹⁰ Según arítaguni le, le lúnbei lagúnfulirun quei lubúdubu dánme le lachülürün lidáani, ladúnraguagüdübei Búngiu sun cátei lábugiñe lagúmadijan Crístu, dándu lé buri siélubei quei le ubouágubei.

¹¹ Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adügübalin sun cátei quei labúseeruni.

¹² Anúadira lumútiwa lun wabágaridun, wagiá le afiñebeí luágu Crístu furúmiñe, lun líñurúniwa líri Búngiu luágu luweírigin.

¹³ Jugúya gíñe, dan le jagáambunbalin ugánu le lánina inárüni—ugánu le anügübalin asálbaruni jun—ába jafiñerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei laríñaga, jun.

¹⁴ Sífiri Sándu ligía ában líchoúrún Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni lasálbaruniwa, wagiá le lánigubei, lun líñurúniwa líri luágu luweírigin.

Lamúriajan Páblo lúma Búngiu lun líchugun subúdi joun afiñetiña

¹⁵ Ligía dan le lubei nagaáambunbei luágu afiñeni le jídaanbei luágu Wabúreme Jesúsú, lúma luágu ínsiñejabuni le juágubei joun sun ja lánigubaña Búngiu,

¹⁶ másuti neteíngiruni Búngiu juágu dan le narítagun juágu lídan nayúmuragun lun.

17 Amúriajatina lúma Lubúngiute Wabúreme Jesucrístu, Úguchili Weíriguti, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun gíñe jasúbudirunitima Búngiu buídu.

18 Amúriajatina lúma Búngiu lun larúgoungadagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun jasúbudiruni ída líña lan luweírigun lúma lirísín alágan le líchugubei Búngiu joun lánigu.

19 Amúriajatina gíñe lúma lun lasúbudiragüdüni jun ída líña lan luweírín lubáfu le mébejabei le ñadágimeinbei wádan, wagía le afíñebei luágu.

20 Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe ouweni, ába lañúuragüdüni lueígiñe loúnwenren yágüta siélu.

21 Rúlumuti lougiñe sun gumádi, ubáfu, érei lúma arúejani lé buri siélubei, lúma lougiñe sun le gayáraabei lirisidún, dándu lídan dan le queísi lídan le lúnbei liábin.

22 Rúlumuti sun cátei lábun lubáfu Crístu, rúlei gíñe Crístu guánarügü lun ligíaba lan ichügüdinaü joun sun gürígia ja lánigubaña, ja gíribaña lilígíisin.

23 Gürígia jagía, ja méme lúgububaña Crístu, buin jáña láu libágari Crístu (láu lubáfu lání Espírítu), áni Crístu guánarügü adügübalin sun catei áni ágüdjaleí.

2

Sálbaadiwa láu lareíni Búngiu

1 Rújali Búngiu íbágari magúmchaditi jun úara lúma Crístu le lásaaragüdübei lídaangiñe ouweni, láu sún meja jiláñugidún lan lun cátei le luáguti Búngiu, lurúma wuríbani lúma figou buri le gádaanbalún.

2 Lídan meja dan ligía, falá jumuti lání ubou le jémpulu, adügei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu.

3 Ítara líña meja gíñe wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi gürígia garaúwarügütiña. Ligía lúnti lubei yebe láburuan lanárime ligáñi Búngiu wawágun queísi ja jíbiri.

4 Weírítu lugúdemejabu Búngiu,

5 ába larúfuduni luweírín línshiñejabu woun láu sún meja jiláñugidiwa lan lun cátei le luáguti Búngiu lurúma wafígoun. Ába ladáruni lubéneri íbágari magúmchaditi woun láu lásaaragüdüni Crístu lídaangiñe ouweni. Sálbatiwa lubeíti láu lareíni Búngiu.

6 Sarágüda lumútiwa gíñe Búngiu lídaangiñe ouweni lánina figou láu lásaaragüdüni Crístu lídaangiñe ouweni, ába líchuguni wabára woun lúma Crístu yágüta siélu, lúma uweíriguni lánina ubáraü ligía.

7 Ladügünbalin líra lun larúfuduni luweírín wínsiñe lun lúma lareíni woun lídan Crístu Jesúsu lídounme dan le lúnbei liábin.

8 Sálbawádiwa luágu lareíni Búngiu, luágu wafíñen luágu. Máma jamúga ában cátei le wagía guánarügübei adügübalin, Búngiu íchugubalin wasálbarun woun.

9 Máma lídaangiñeti cátei le jamúga ladüga mútu, lun úa lan ni ában apántajati lueígiñe.

10 Lugúndun Búngiu adügübaliwa, iséri gürígia wagía lídan Crístu Jesúsu lun wadügün cátei buíti, quei larítaguni lúmagiñe binárü.

Waráandarun lúma Búngiu lídaangiñe Crístu

¹¹ Jarítagua jumá lubeíti luágu ída jíña lán meja furúmiñe. Máma meja lídaangiñetün jarásan juríu, ligía lébubei gürígia ja juríu, ja erésibirubalin circuncisióñ, ába jagúarunún, “gürígia ja merésibirubalin circuncisióñ”, o gürígia ja mámabaña lánigu Búngiu.

¹² Lídan meja dan ligía, ibídiñegili meja Crístu jun, mámagidün meja lílana linásiñun Israél, ja lumútuniñabaña Búngiu, boúgudiñadün meja lueí lidáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduná meja ubouágu meménigiga, ibídiñega Búngiu le inárütibeí jun.

¹³ Ánjeinti guetó, quei lídaañadün lan ában lúma Crístu Jesúsú, jugúya meja le dísebei lueí Búngiu, guetó yaráfaadün lun, láu loúnwen Crístu.

¹⁴ Barü laadiwa Crístu lídoun aráandaruni, ladüga adüga láaña juríu jáma ja mámabaña juríu lun ában méme jamá mútu, güríngua lumúti gáganiguaú lé meja afánreinragubaliña.

¹⁵ Gumúguagüda lumúti cátei le lilúrudun Moisés láu sún buri gumádi lánina lúru luágu ligía láu loúnwen, adügeina láña juríu jáma ja mámabaña juríu lun ában mémebaña lan lídan. Ítara líña ladügüni aráandaruni wádaangua.

¹⁶ Láu loúnwen Crístu luágu gurúwa, ába lagúmuchaguagüdüni wuríbu lé meja jádaanbei juríu jáma ja mámabaña juríu, ába laráandaragüdüniña biángubei lúma Búngiu, adügeina láña biángubei lun ábanrügü lan mútu—lumútuniña Búngiu jagía.

¹⁷ Nñubinti Crístu, ába lapúrichijani ugánu buíti luáguti aráandaruni lúma Búngiu joun sun gürígia, dándu jun, jugúya le mámabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu.

¹⁸ Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme Espíritu, le Sífiri Sándu.

¹⁹ Ligía mámaadün lubeí teréncha lun larúeijan Búngiu, lílanaadün larúeijan quei sun ja lánigubaña. Lufámiliangu Búngiu jugúya.

²⁰ Sun wagía afiñetiña, dándu juríu quei máma juríu, ítara wáña quei ában ligilisi to ligíbuaguboun wagábu le jábunubei apóstolugu jáma profétagu. Cátei lé buri jarúfudajabei, ligía wagábubei, Jesucrístu meme ligía dübü le weírigutimaabei lídan ébuu ligía.

²¹ Luágu ébuu ligía le Crístubei tiñúrawagua múna tugúya (wagía afiñetiña), aráanseñu sun tumégegün buídu darí lun tiábin lun ában tan ligilisi to derégewatu lun Crístu, to gíñe lídaantu ában lúma. Ítara wáña wagía le afiñebeí luágu Crístu.

²² Ítara líña lubeíti, jugúya gíñe le mámabei juríu, lídaañadün ában lúma Crístu, oúndaragatün jáma súngubei ja jíbiri lun wayábin sun wagía lun ítara wamá quei ában múna to ñí lubei lagánawa Búngiu láu lání Espíritu.

3

Luwádigimari Páblo lun lapúrichijan luágu Crístu joun ja mámabaña juríu

¹ Ligía lébubei nayúmuragun, áu Páblo, lun Búngiu juágu. Daúwañu níña lueígiñe luwádigimari Crístu le adüga náalibeí jagánagua, jugúya le mámabei juríu.

² Mósú subúdi jumáali lan luágu rúlaali lan Búngiu wadágimanu le nun láu lareíni, luágu jáni fuleísei.

³ Queisi nabürüjan jun, adüga lumúti meja Búngiu ában aráansejani juágu, jugúya le mámabei juríu, arámudaguati aráansejani ligía, ába lasúbudiragüdüni nun.

⁴ Láu jalíjani le nabürüjabei, jasúbudirubei luágu gunfaráanda náni laráansejan Búngiu luágu Crístu, lé meja ligiarügübei asúbudirei.

⁵ Masúbudirawagüdünti aráansejani ligía lun ni ában lídan meja dan le sügüjalíbei, ánjeinti guetó, láu lubáfu Sífiri Sándu, arúfuda láali Búngiu joun láni apóstolugu jáma profétagu ja derégeguabaña jóungua lun le gumúti.

⁶ Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña giñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu.

⁷ Fuleisei láadina Búngiu láu líchugunina lun napúrichijani ugánu ligía láu lubáfu, laú sun madúna náni yebe fuleisei ligía.

⁸ Ünabutimaatina sügü láu le ünabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírín jarísín lídan Crístu le mébejabei.

⁹ Rúlaadina Búngiu, le adügübalín sun cátei, lun nafúraanguagüdüni joun sun güriága ída líña lan lanügün aráansejani ligía lé meja arámudaguabei fulásu.

¹⁰ Arámudaguati meja aráansejani ligía lun guetó lan gayára lan jayábin sun láni Búngiu ánjeligu ja arúejabaña siélu lun jasúbudiruni líchú láu Búngiu lídan sun luwúyerigu jádaangiñe afíñetiña, ja lílígílisinbaña Crístu.

¹¹ Úraguati sun le lúma larítágun Búngiu le larítáguabei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu.

¹² Lídaangiñe Crístu, gayáraati wayárafadun lun Búngiu láu eménigini le líchugubei wafíñen luágu Jesucrístu woun.

¹³ Ligía nayúmragunbei jun lun máburujan lan jarüna lueígiñe le nasúfurirubei juágu, lugúndun weírírügüti cátei líra jun.

Línsiñejabu Crístu

¹⁴ Ligía lubeíti lébubei nájuduragun ligíbugiñe Lúguchi Wabúreme Jesucrístu,

¹⁵ le Jáguhibei sun lufámilian Búngiu ubouágu lúma siélu.

¹⁶ Amúriajatina lúma Búngiu lun líchugun érei lúma ubáfu jun según luweírín ubáfu le lúmabei, lun jídin jubáruaguóun láu Sífiri Sándu le jídaanbei.

¹⁷ Amúriajatina giñe lúma lun jíchugun fulásu tídan janígi lun laganóun Crístu ñi, láu sun jafíñen luágu,

¹⁸ lun giñe láu lan ában ínsiñeni weíríti, derégüdagu jídan, gayára lan gunfaráanda jumáni lítulen, limígífen, lujúlilin lúma líñun línsiñejabu Crístu buídu, jáma sun jíbiri afíñetiña.

¹⁹ Amúriajatina lubeíti lun jasúbudiruni ínsiñejabuni le, le weírítimaabei lueí sun le wayáraabei asúbudira, lun lúma jumá Búngiu le gumúti.

²⁰ Guetóti, iñurúalá líri Búngiu le gabáfubei lun ladügün gíbe sügü láu le wamúriajabei o le lan wasáminarubei, láu lubáfu le ñadágimeinbei wádan.

²¹ ¡Arijúalá luweírígun Búngiu lídaangiñe sun le ladügübei jádan lánigu lúma lídan Crístu Jesúsu luágu sun sígulu lúma sun dan! Ítaralá.

1 Ladüga sun le adüga lálalibe Búngiu jun, ligía namúriajabei júma, áu le adaürübei lueígiñe luwádigimari Crístu, lun jóuseragun júngua quei lúnti lan jadügüni ja únbaña wájali lan Búngiu lun lánigu jamá quei lagúarun jun.

2 Ünabugu jumá, jínsiñejabu, gagúraasun jumá, areída jugúyame joun jíbiri.

3 Jóucha jumá lun lídan jumá ában súnwandan láu lídejan Sífiri Sándu, eíbuga jumá lídan darángilaü júmagua, ítara lúba lídaanbadün lan ában súnwandan.

4 Lúnti wanáangun woúngua lídan ában, lúma jáma jíbiri lánigu Búngiu ladüga lumégegungun lan ában méme úgubu le gírubei lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eménigini luágu walágaante lídaangiñe.

5 Ligía méme Abúremein Wabúreme sùngubei, ligía méme wafíñen luágu Jesucrístu, badíseitiwa sun wagía lídan líri Abúremein ligía.

6 Ában rügüñein Búngiu Jáguchi sùngubei, jóúgiñeñein sùngubei, ñadágimeinti jáu sùngubei, áni níjein jádan sùngubei.

7 Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában wádaangiñe, woun.

8 Ligía laríñawagunbei tídan Lerérun Búngiu luágu Crístu.

Múdeiti siéluun barüina láña adaürütiña lúmagua, ába buri líchugun ubáfu joun gürígia.

9 ¿Cáti míni lan “múdeiti”? Míni lan luágu rarí lan furúmiñe lídoun ubaráü buri le ünabutumáabei ubouágu.

10 Crístu le arárirubei lun ubouágun, ligía méme gíñe le amúdeirubei lídoun líñun-ágei siélu láu sun luweírigan lun labuínchagüdüni sùngubei láu guánarügü.

11 Ába líchugun ubáfu lun cáda ában jádaangiñe affíñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmulugugiñe, jíbiri lun jóudin apúrichijeí ugánu buíti lánina asálbaruni joun ja magáambun jamágilibe ugánu ligía, jíbiri lun jafádirijan lúma lun jarúfudajani Lerérun Búngiu.

12 Ítara líña laráanseruniña lánigu lun gayáraabei lan jesériwiduni buídu,

13 lun jedérebudagüdüniña jíbiri lídan Crístu daríme wachülürün sun wagía lun lídan wamá ában lídan wafíñen luágu Jesucrístu, le Liraü Búngiu, lúma lídan lisúbudinwa. Ítara lúba gürígia wamá weínamujaña lídan weíbugun lúma Crístu, ítara lúba wagáburidun queisi lagáburidun Crístu.

14 Mítaraanjádiwame quei irájüñü lun ménreengun lan wasáansijan lun ladúurujaniwa ligáralin furúmieguarügü iséri luwúyeri arúfudajani lun wáburujan lídoun jayéeni gürígia bíbutiña ja abúseerúbaña janügüniwa lídoun üma le maríchabei.

15 Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichügüdünaübei joun sun lánigu ja gíribaña lúgubu.

16 Sun wagía le lúgubu Crístu, úraguatiwa lídan ában lábugiñe lagúmadijan Crístu, cáda ában wádaangiñe gayáraati wíderaguniña ja wíbirigu. Ítara lúba gayára lan wawáanserun sùngubei lídan weíbugun lúma Crístu, awáanse wagíame lídan ínsiñeni.

17 Niján lubeíti cátei le naríñagubei jun lídan líri Wabúreme. lun jebé lan jabágaridun quei ja ibídiñejabubaña lun Búngiu, ja abágaridubaña úaragua lúma jasáminan le málabei.

18 Darúgu líña láu jasáminan, úati ibágari le ñübinbei lúmagiñe Búngiu jádan lugúndun ibídiñeti ni cáta joun lurúma tidére janígi.

19 Féridi jamáali jabúsigari, derégeguaaña jóungua lun wuríbani, adúgatiña sun luwúyeri iwíyei láu ugúndani.

20 Ánjeinti jugúya, máma líña jafúnrendeirun lúmagiñe Crístu,

21 ladüga inárüni lan luágu agáamba jumá luágu Crístu, arúfudajoúati inárüni lé meja larúfudajabei, jun.

22 Ánjeinti luágu binádu ligáburi jabágaridun, arúfudajoúati jun lun jígiruni binádu meja jigáburi le mabuídunjalibei láu jagúnfulirun lúma luríban ayúmajani le gayéraguadibei,

23 arúfudajoúati jun lun iséri jumá lídan jáni espíritu lúma lídan jisáminan,

24 lun iséri lan jigáburi, buíduñu, jarúmañu le gumúti queísi ligáburi Búngiu.

25 Ligía jebé lubei jayéjejan, adímureja jumeí inárüni jáma jibirigu lugúndun lánigu ában méme úgubu sun jugúya, le lúgubu Crístu.

26 Moún lumuti jagáñidun le lánina afígoujani, moún lumuti giñe jáldün sarágu dan arítagua luágu cátei le agáñidagüdúbalün—

27 míchiga jumá lúgaaru lun Máfia ítara.

28 Le jíwerubei, jebé líwerujan, luwádígimarida láu ában arúmani lun lagúriaragun lúngua, lun giñe gayára lan líderaguniña ja gudémebaña.

29 Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, ibíja jagíame abíniruni lídaangiñe jerérun.

30 Majírudaguagüda jumeí Sífiri Sándu, lugúndun níjein Sífiri Sándu jídan lun jasúbudirúniwa queísi lánigu Búngiu daríme lachülürün wéyu lun jasálbarun le gumúti.

31 Ígira jumeí sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani.

32 Buídu jumá, gudémejabu jugúyame júmagua, ferúdnagua jumá júmagua ítara quei ferúduna lánün Búngiu lídan Crístu.

5

Ída lúba lan ligáburi jabágaridun lirájüñü Búngiu

1 Quei lirájüñü jubei Búngiu ja jínsiñetiña lun, jóucha jumá lun ítara lan jigáburi quei ligáburi.

2 Jínsiñegua jumá júniwagua ítara quei wínsiñedun lun Crístu, ába ledéregaragun lúngua wawágu queísi ában mudún le adágarawagüdüti lun Búngiu. Ítara líña línsiñejabu Crístu woun queísi cupáli le buíti líjeme, le águdajoúbei lun Búngiu, resíbi lumúti láu ugúndani.

3 Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyei, ni luweínamu águu.

4 Mawíyelá jíyúma, maríñagun jugúyame libídiouniga áu, ni dimúrei málati, ladüga mabuidunti buri cátei le. Lubáragiñe jadímurejan cátei líbeina líra, yúsu jumeí jíyúma lun jíchugun eteíngiruni lun Búngiu.

5 Subúdi jumúti luágu le lan agámariduti mamárieidunga, o ladügün lán buri cátei wíyeti, o labágaridun lídan luweínamu águu—le queísigubeirügübei

lanügüni irisini lisándunme –siñáti gafánran lan lídan jarúeijan Crístu lúma Búngiu.

⁶ Mayéedagualaün ni ában láu lagübüri buri dimúrei, lugúndun ladüga buri cátei wuríbatí le, lábúruja lanárime ligáñi Búngiu jawágun ja magáambadibaña lun.

⁷ Dírei jumá jaweí jíbe gürígia jára.

⁸ Lídaañadün meja lubúriga, ánjein guetó, quei lídaañadün lan ában lúma Wabúreme, lídaañadün larúgounga. Ítara líña lubeíti agáburida jumá queisi gürígia ja eíbugubaña lídan larúgounga.

⁹ Gürígia jagía, areídatiña, surúti jabágari, jínsiñeti inárüni joun.

¹⁰ Joucha jumá jafúnrendeiruni ca lan jínsiñebeí lun Wabúreme.

¹¹ Mádanlaün buri cátei málati le jadügübei ja lánigubaña lubúriga, sagárügü jumeí lídoun larúgounga láu lubuídun jigáburí.

¹² Rúti busíganu íbini lun ladímurejoúniwa luágu buri cátei le jadügübei arámudaguarügü,

¹³ dan le larúfuduni larúgounga luágu wuríba lan jagáburí, ába jasúbudiruni luágu inárüni lan, gayáraati jayábin ja lídaanbaña lubúriga lun lídoun larúgounga.

¹⁴ Ligía laríñawagúnbei.

Agáguduabá, bugúya le arúmugubei, sarába jádaangiñe jiláaña, ábame larúgoungadágüdün Crístu báu.

¹⁵ Touñigi jumá lubeíti buídu ída líña lan jouuserun. Mabágarida jumá quei ibídiougu táu, jabágarida quei chu táu.

¹⁶ Yúsu jumeí jidáani lídan cátei buíti, lugúndun níjein sarágu wuríbani lídoun buri dan le.

¹⁷ Ligía mabídiouniga lubeí jáu, joucha jumá gunfaráanda jumáni ca lan lugúndaanbei Wabúreme.

¹⁸ Mabácharuada jumá, lugúndun barü lumútiña líra gürígia lídoun féridi, lubáragiñe líra, buínjuma láu Sífiri Sándu.

¹⁹ Adímureja jumá júmagua luágu luweírigan Búngiu, erémuja jumá luágu, jerémuja táu sun janígi lun Wabúreme.

²⁰ Rújuma eteíngiruni lun Búngiu Úguchili súnwandan luágu sun cátei lídan líri Wabúreme Jesucrístu.

Igáburí le lúnbei wagáburiduni jáma ja wábiñebaña

²¹ Derégegua jumá júniwagua, ítara lúba jarúfuduni linében Crístu jun.

²² Lúnti derégeguñu tan würi túngua lun túmari quei lun Wabúreme Jesucrístu,

²³ lugúndun wügüri tichügüdinabei lúmari ítara quei Crístu lan tichügüdinabei liligilisin. Crístu giñe Jasálbaragülebei gürígia ja giribaña liligilisin, ja méme giñe giribaña lúgubu Crístu.

²⁴ Ítara quei jagáambadi afíñetiña lun Crístu, ítara líña giñe lúnti lan gagáambadi jamá würiña joun jámarigu lídan sun cátei.

²⁵ Jínsiñetá lúmari wügüri lun quei luweírigan Crístu, wagía le liligilisin, ába líchuguni libágari wawágu.

²⁶ Ladügünbalin líra lun larúmadagüdüníwa lídaangiñe le binádubei láu wabásterun lúma giñe láu lerérun,

²⁷ lun larúfuduniwa ligíbugiñe queísi ában würi to ayárafaduboun lun túmari —buídumeraütu, jarúmañu, aráanseñu, ni cáta mégeiti tuágu, ában würi derégüdaguatú, úraguatú.

²⁸ Ítara líña lúnti lan tínsiñedun lúmari wügüri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladüga ábanjali lan láu jágubu.

²⁹ Úati gürígia mebéresenti láu lúgubu guánarügü, jóügüdarügü lumúti, toúngileí. Ítara líña giñe ladüga Crístu tun lilígilisin,

³⁰ ladüga lúgubu tan, áni wagía líbiri úgubu ligía, ábanjadiwa lúma.

³¹ Lariñajare tídan Lerérún Búngiu. “Ligía lígirubei lubeí wügüri lúguchi túma lúguchu lun lamárieidun túma lúmari, ábame jayábin jagía biángubei lun camá jamá ábanrügü.”

³² Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúaradagun Crístu jáma lánigu ja gíribaña lilígilisin.

³³ Lariñaguña giñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun giñe inébe lan túmari würi tun.

6

¹ Isáanigu, le lúnbei jadügüni queísi afíñetiña lun gagáambadi jumá joun jagübürigu, lugúndun ligía richábei.

² Niján ában gumádi weíríti lídaangiñe ligúmadin Búngiu le anügübei buíti woun láu wagúnfuliruni. “Inébelá búguchi túma búguchu bun lun buídu lan dan bun,

³ gabágari amúrúme migífe ya ubouágu.”

⁴ Jugúya agübürigu, magáñidagüda jumáña jisáanigu, agüriajarügü jumáña buídu lun gagáambadi jamá, arúfudajeina joun lun jafíñerun luágu Wabúreme.

⁵ Músu, gagáambadi jumá joun jiyúbudirigu ya ubouágu láu inébesi, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida.

⁶ Seríwi jumáña buídu, mámarügü dan le aríagu jáña lan jun lun jeréderun buídu jáma, seríwi jumáña buídu súnwandan quei esériwidutiña lun Crístu, adúgeina lugúndan Búngiu táu sun janígi.

⁷ Adüga jumeí juwádigimari láu ugúndani, camá jamuga lun Wabúreme jadúgei máma joun gürígia,

⁸ ladüga subúdi jumáli luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buíti le ladügübei.

⁹ Jugúya iyúbudirigu, buídulá giñe jóuseruniña jumúsuniña, masíadira jumáña. Jarítagua jumá luágu dándu lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanügüniña Búngiu sun gürígia.

Cátei lé buri áubei wageíndagua lúma Máfia

¹⁰ Guetóti nidújeñu, jére jumá lídaañu ában lúma Wabúreme, láu lére le gabáfubei.

¹¹ Daújumoun sun daúguaü to líchuguboun Búngiu joun sun lánigu lun derégüdagú jumá lueí leyéedagunün Máfia.

¹² Lugúndun máma jáma gürígia ja láutiña ügürügü lúma ábuu wageíndagua, jáma buri espíritugu gabáfutiña ja lánina wuríbani yágüta íñu lúma jáma

espíritugu ja gáambaña gumádi, lúruđu lúma érei luágu buri cátei lánina lubúriga lídan ubou le wageíndagua.

¹³ Ligía ragújumoun lubeí sun daúguaü to líchuguboun Búngiu jun lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagu.

¹⁴ Derégüdagu jumá lubeíti, daúgu táu láni Búngiu daúguaü queísi ában lisúdaaran. Daúgua jumá láu inárüni queísi láu ában béliiti le gürágu umúti buíđu luágu jiránaagua, areidúañu láu ísuruni quei láu cátei le adáuragubei láu laníguagu súdaara.

¹⁵ Aráanseñu jumá lun japúrichijani ugánu luágu Wasálbaragüle, le íchuguti darángilaü, queísi laráanserun súdaara dan le ladáürunun lisábadun.

¹⁶ Lougiñe sun cátei, barújumei jafiñen quei lárügüdüni súdaara cátei láuti gürábu ligíbugiñe, lun jaráramunun sun gimára durünguatu to lachüüjaboun Máfia juágun.

¹⁷ Barújumei jeménigidun luágu jasálbarun quei ladáüruni súdaara lubúnidin lun latoúnigiruni lábulugu, barú jumeíme Lerérun Búngiu quei efein to líchuguboun Sífiri Sándu jun.

¹⁸ Adüga jumei sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarúna, ayúmuragua jumá jawágu sun ja lánigubaña Búngiu.

¹⁹ Ayúmuragua jumá giñe nuágu lun líchugun Búngiu dimúrei nun dan le nadímurejan, lun giñe nadímurejan láu manúfudei lun nasúbudiragüdüni ugánu luagu gayára lan giñe jasálbarun ja mámabaña juríu queísi ja juriubaña.

²⁰ Oúnaja láadina Búngiu lun napúrichijani ugánu le, le ueígiñebeí nadaürüwa guetó. Ayúmuragua jumá lun napúrichijani ugánu le láu manúfudei, queísi lubúdbu.

Lagúmujoún buri mábugaü

²¹ Tíquico, wadúje jínsiñeti woun, le íderagubaliwa buíđu lídan luwádigimari Wabúreme, ligíaba íchiga ugánu jun nuágu lúma luágu le nadügübei.

²² Ligía nouñajaanbalin jun lun lariñaguni jun ída wáña lan, lun líchugun gurásu jun.

²³ Rúlá Búngiu Úguchili lúma Wabúreme Jesucrístu darángilaü lúma ínsiñeni láu afiñeni jun, wadújeñu lueígiñe Jesucrístu,

²⁴ biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.

LIGÁRADAN PÁBLO JOUN FILÍPOSNA

Labürüjan Páblo furísunrugugiñe joun títana liglisi to Filíposboun

¹ Anája áu Páblo lúma Timotéo, esériwidutiña wagía lun Jesucrístu, wabürüjañoun gárada to jun, sun jugúya fádirigu jáma esériwidutiña ligliserugu ja ubúrugubaña Filípos, jáma jíbiri lánigu Búngiu ja lídaañabaña giñe ában lúma Crístu Jesúsu.

² Binílaün Wáguchi Búngiu lúma Wabúreme Jesucrístu, ibíja jumá giñe darángiläu jámagiñe.

Layúmuragun Páblo jawágu afiñetiña

³ Ságu narítagnun juágu neteíngiruni Nubúngiute.

⁴ Súnwandan nayúmuragun lun Búngiu juágu láu ugúndani,

⁵ Láu narítagnun luágu luweírín jíderagunina abúrchaguagúdei ugánu le lánina asálbaruni lúmagiñe wéyu le jagáambubalin chülü lúmoun wéyu le ugúñebei.

⁶ Choúru numúti luágu Búngiu lan le agúmeserubei adúgei lubuídun luwádigimari jídan, lasígira mémeba lan adúgei daríme wéyu le liábingüle Jesucrístu.

⁷ Richáti lun narítagnun juágu ítara lugúndun weíríti jínsiñe nun, lugúndun giñe gafánran jumá lídan abiniruni le nánibeí dan le furísunrugúñadina lan luágu nesériwidun lun Crístu, o dan lan le naráramun ligíbugiñe lúruđu lun nadímurejan lueígiñe loúbadina ugánu le lánina asálbaruni lun nachoúruruni joun luágu inárüni lan.

⁸ Subúdi lumúti Búngiu luágu weíri lan nálugun juágu lugúndun jínsiñetün nun queísigubeirügü jínsiñe jumá lun Jesucrístu.

⁹ Amúriajatina lídan nayúmuragun lun Búngiu juágu lúntima laweírídun jínsiñejabu láu sarágu subúdi lúma gunfaráandaü lídan sun cátei,

¹⁰ lun gayára lan janúadajani cátei le buídubei súnwandan. Ítara lúba jabágaridun ában ibágari jarúmati, madúnrun jumámuga dánme liábin Crístu.

¹¹ Amúriajatina lúma Búngiu lun buin jumá láu lubuídun igáburi, láu lubáfu Jesucrístu le jídaanbei, lun lichugúniwa uweíriginí lun Búngiu luágu.

Crístu ibágaribeí nun

¹² Nidújeñu, buséntina jasúbudiruni luágu cátei lán buri le suséreelibeí nun, ñübinjali lídan linárün lun líderagun lídan lapúrichijoún ugánu le lánina asálbaruni.

¹³ Subúdi jamúti lubeíti sun tisúdaraana lúban urúei jáma sun ja jíbiri luágu nadaürüña lan lueígiñe nesériwidun lun Crístu.

¹⁴ Játi jíbiri idújeñu, láu jaríjin luágu nadaürüña lan lueígiñe napúrichijani ugánu luágu Crístu, ragújaña anígi lun japúrichijani méme ugánu ligía manúfudeiga, láutima afiñeni luágu Crístu.

¹⁵ Inárüni luágu añájein lan adímurejatiña luágu Crístu ladüga jagímugan, busén jagía janügüniña güriágia jánigume. Ánjaña jíbiri, japúrichijan luágu Crístu láu lubuídun arítagnuni.

¹⁶ Güriágia jagía, luágu ínisiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürüña lan.

17 Ánjaña ja jíbiri, máma láu janárün japúrichija, lun jarijíniwa weírigu jadúgei, lúma lun jíchugun líbe samínaü nun guetó le nadaürüña lan.

18 Wel, úati cátei luágu líra, lídan sun luwúyeri, láu yebe janárün o máma lan láu, luágu Crístu jadímureja, áni gundaatina luágu líra.

Áni nagúndaarúba gíñe,

19 lugúndun subúdi numúti luágu buídubei lan nasáírun lídan sun cátei le, ladúga jayúmuragun lun Búngiu nuágu lúma ladúga líderagunina láni Jesucrístu Espíritu.

20 Cátei le nabúseerúbei lúma le nagúrabubei, lun madúgün nan ni cáta lun jamúga nanúgün busíganu luágu, gayáaarügü lámuga nadímurejan manúfudeiga, aríjua mémetima lámuga luweírigan Crístu nuágu guetó quei súnwandan, wínwañu áu yebe, jiláñu áu yebe.

21 Lugúndun ánjana abágarida méme, lúnba Crístu nabágarida, ánjana ouwe, buítimaabei nun lugúndun lúmounbadina Crístu.

22 Ánjein gayára lubei nasígirun ñadágimein luágu láni nabúreme Crístu fuleísei láu nasígirun abágarida, ibídiñeti nun ca lan buítimaabei, ánjein lun lubei nasígirun wínwañu ódi lun nouñwen.

23 Jénreenguti nun lun nanúadajan lídan bián cátei le. lídan ában oubaü, buséntina jamúga nouñwen lun nídin erédera lúma Crístu, lugúndun buítimaati jamúga líra nun,

24 lídan le ában oubaü, buítimaati jun lun nasígirun abágarida.

25 Áni quei choúru náni cátei le, subúdi numúti luágu nerédera mémeba lan júma lun níderagunün lun jasígirun jubáruaguóun, lun gíñe jagúndaaruntima lídan jafiñen.

26 Ítara lúba jiñúragüdüni líri Crístu Jesúsú luágu lagíribudagüdünina júmoun.

27 Joúcha jumá lun úaragua lan ligáburi jabágaridun lúma larúfudajan Crístu. Ítara lúba, ánjana ñüdüñ aríjaün o ánjein díseñu níña lubei juei lun agáambarügü nan juágu, gayára lámuga nasúbudiruni luágu derégüdagu meme jíña lan áni lídaañadün lan gíñe ában, áfaagua súngubei lídan ában lun labúruchagun afiñeni luágu Jesucrístu queísi Wasálbaragüle,

28 mígiraguagüdünga júngua lun janúfudedagun jawei jáganiñu. Ladúga jáganiñu lan gürígia jagía, arúfuda lumúti líra furáangu luágu jóúdiña lan lídoun gürínguau, arúfuda lumúti gíñe jasálbaran jugúya le afiñebei, áni lúmagiñe Búngiu líabin cátei le.

29 Ladúga Crístu, gayáraati mámarügü lun jafiñerun luágu, gayáraati gíñe jasúfurirun lueígíñe.

30 Jugúya núma, lídaañadiwa ában méme áfaaguni. Aríja jumáali meja ída líña lan náfaagun, guetó agáambatün luágu ída líña méme lan náfaagun.

2

Lünabugun Crístu lúma luweírigan

1 ¿Sandítüñsan dügüdaguau ladúga lídaañadün lan ában lúma Crístu? ¿Barúttüñsan gurásu luágu línsiñejabu jun? ¿Eíbugatüñsan sun jugúya lúma Sífiri Sándu? ¿Subúdi jumúñsan lugúdemejabu Crístu jun lúma lareídun? Afiñetina luágu ítara líña lan.

2 Ligía lébubei namúriajan júma lun jaganouñ lídan úarani lúma ínsiñejabuni júmawagua, lun ában lan jarítangun, ában lan gíñe jáfaagun luágu buri cátei le láni Crístu. Láu jabágaridun ítara, buin lúba nugúndan jáu.

³ Madüga jumá ni cáta juoúguarügü lun janügüniwa weíri, ni luágu pántaü, adüga jumei cátei láu ünabuguni. Buídulá janügüniña ámu güriá juei guánarügü.

⁴ Mámarrügüla cátei le buídubei jun jáluaja, áluaja jumei gíñe le buídubei joun ámu.

⁵ Ítaramemelá ligáburu jasáminarun quei meja ligáburu lasáminarun Crístu Jesúsu.

⁶ Láu sún meja Búngiu Irájü lan ligía, málugunti lárügüdüni lirícha quei Búngiu.

⁷ Lubáragíñe líra, ába lígiruni le lánibei, ába ladügün quei músu láu lagüriajoún quei wügüri.

⁸ Dánti le ítarajali quei wügüri, ába lünabudaguagüdüntima lúngua, áni ladüga lagáambadi, ába loúnwen luágu gurúwa láu sun nibúsigarídüna lan oúweni luágu gurúwa.

⁹ Ligía líchugunbalin Búngiu líñun-ágei uweíríguni lun lúma íri le weírígutimaabei lídaangiñe súngubei,

¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsu, lun jájuduragun lun,

¹¹ lun gíñe jasúburiruni súngubei, aríñaga jagíame luágu Jesucrístu lan Wabúremebei, lun líñurún líri Búngiu Úguchili.

Ítara jáña lánigu Crístu quei larúgunga uboúagu

¹² Ítara líña lubeiti nidújeñu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Eíbuga meme jumá jubáruaguoún lídan lémeri Crístu láu ünabuguni lúma ínèbesei lun Búngiu daríme jebélurun siélun.

¹³ Búngiu íchugubalin lubuídun ayúmajani jun lun jeíbugun lúma, íderagualaün lun jadügüni quei labúseeruni.

¹⁴ Adüga jumei sun cátei láu ugúndani, masígenejaanga,

¹⁵ madárirúniwa lámuga dúru juágu, ni mégeiti, lirájüñü jumámuga Búngiu jarúmatíña jagánagua güriá wuribatíña, magáambaditíña lun Búngiu. Jugúya, jarúgungadagüdatün jagánagua güriá jagía quei warúguma lídan ában fulásu búrigati,

¹⁶ íchigeina ugánu luáguti íbágari magúmuchaditi joun. Láu jigáburidun ítara, gúndaabadina juágu dánme le lachúlürün wéyu le liábingüle Jesucrístu, láu nasúburiruni luágu máma lan luágu ni cáta nuwádigimarida jagánagua.

¹⁷ Íbini lun lan níchuguni nibágari guánarügü lun loústarun jafiñen, le queísibeí ában edéweejani buíti lun Búngiu, gúndaabadina úara júma luágu lubuídun wedéweejan lun Búngiu.

¹⁸ Lun jamúga lasúseredun ítara lun noúnwen luágu nesériwidun lun Crístu, lúnti gíñe jagúndaarun úara núma.

Timotéo lúma Epafrodító

¹⁹ Ánjein busén lubei Wabúreme Jesucrístu, noúnajabei Timotéo aríjaün madíse, lun gayáraabei lan nagúndaarun dánme le lagríbudun láu ugánu nun juágu.

²⁰ Úati ámu núma le asáminaruti quei áu, le áfaaguti lun buídu lan lídin jun,

²¹ súngubei jawoúgua rügüñein jarítaqua, mebèreseguntiña láu le labúseerubei Crístu Jesúsu.

²² Ánjeinti Timotéo, subúditi ligáburi jun, ída líña lan lesériwidun núma lídan lapúrichijoún ugánu le lánina asálbaruni queísi ában isáani le íderaguti lúguchi.

²³ Agúrabatina lubeíti noúnajani aríjaün lárigiñeme nasúbudiruni ánjein náfuriduba lubei furísunrugugiñe,

²⁴ láu sun affiñe nan luágu niján lan lugúndaanbei Búngiu, lun nídin aríjaün núnga madíse.

²⁵ Genége lumúti giñe nun luágu lúnti lan noúnajani nibíri Epafrodító lárigoún júmoun. Quei jasúbudirun, ligía nouíbabei lídan luwádigidimari Crístu lúma lídan áfaaguni, le joúnajabei jugúya guánarügü nun lun leténirun lun le nemégeirubei.

²⁶ Weíríti labúseerun laríjinün áni gíbeti larítagun ladüga jagáambun luágu lasándirun.

²⁷ Inárüni luágu sándi lán meja, yaráfa lun loúnwen, ába gudémejabu lan Búngiu lun lúma nun lun mabíjin nan íruni lánwoun le núagubei, ába lareídaguagüdüni.

²⁸ Ligiatima nabúseerúnbei noúnajani lun jagúndaarun láu jaríjini.

²⁹ Resibi jumeí láu sun ugúndani queísi idújei lueigiñe Wabúreme Jesucrístu, áni jínsiñe jagíame sun ja ítarabaña quei ligía jun súnwandan,

³⁰ quei chülü lubei yaráfa lun loúnwen ladüga lesériwidun lun Crístu. Deréguati lúngua, mebéresegunga cába lan asúsereda lun, lun lesériwidun nun, cátei le jásiñerubei adüga lugúndun díseñu jíña lan nueí.

3

Üma le inárüti lun weréderun richágu ligíbugiñe Búngiu

¹ Lagúmujoún cátei, nidújeñu, gúnda jumá lídan Wabúreme. Mabúchati nuágu abürüjei le abürüja náalibeí jun, lugúndun buíti jun.

² Cátei ligía, lun toúnigigua jumá júngua jawei ja ítarabaña ouserun quei oúnli, ja adügübalin le wuríbabei, ja íbagubalin úgubu.

³ Ariñagatiña yeétiña jagía luágu lúnti lan jerésibiruni wügüriña circuncisión lun lánigu jamá Búngiu, iyéeni líra. Lirájüñü Búngiu le tímatimaati wagía le agúnfulirubei lúma láu lubáfu lání Espíritu le wádaanbei, wagía le gúndaabei láu lánigu wamá Crístu Jesúsu áni míchu wamúti weménigi luágu cátei bougudinti lueí lun wasálbarun.

⁴ Lun jamúga gayára lan wasálbarun luágu cátañañadiwa lan bougudin lueí Jesucrístu, garíchatina jamúga lun neménigidun luágu buri cátei ligía, úati jamúga ní ában garíchati nuei lun leménigidun luágu buri cátei ligía.

⁵ Wídü wéyu lueigiñe nagüriajoún, ligía nerésibiruni circuncisión lugúndun jarásan israelítagu áu, jádaangiñetina lufámilian Benjamín, hebréo áu lúmagiñe nagüriajoún, hebréogu giñe nagübürigu. Fariséo meja áu lídan ligáburi gunfaráanda náni jalúrudun juríu,

⁶ janárimeti meja neméendün darí neíbaajaniña affiñetiña luágu Jesucrístu. Luáguti lísurun íbágari según jalúrudun juríu, úati meja ní ában lun gayára lan laríñagun ní cáta nuágu.

⁷ Ánjeinti guetó, sún buri meja cátei le, lé meja weírítibeí cátei nun, barü numuti quei ní cáta lun gayáraabei lan nasígiruni Crístu.

⁸ Sügü láu líra, sun cátei le gayáraabei jamúga níjein lan núma, rúnumuti quei ní cáta ligíbugiñe oúnwenbun agáñeiruni le luágubei nasúbudiruni Wabúreme

Crístu Jesúsu. Féridi náali sún buri cátei le ladüga nasúbudiruni Crístu, áni barú numuti sun le quei ífei lun nagáñeiruni Crístu,

⁹ lun nadáriragun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúnfulirun lúma lilúrudun, lugúndun barúlaadina Búngiu richágu ligíbugiñe láu nafíñerun luágu Jesúsu. Richáguau lígía ában cátei le lídaangiñeti affíñeni, máma adügüni.

¹⁰ Le nabúseerúbei, lun nasúbudiruni Crístu buídu buídu, lun nasándiruni lubáfu meme Búngiu le ásaaragüdúbalin Jesúsu lídaangiñe ouweni nuougua, lúma lun nasúfurirun luágu queísi lasúfurirun nuágu,

¹¹ lun ítara nan quei lígía lídan louñwen láu eménigini luágu násaaruba lan lídaangiñe ouweni quei lígía.

Áfaaguni lun lachülürün lídoun lébeja

¹² Máma nariñaguña luágu chülújadina lan lúmoun lébeja lídan sun cátei le, mariñaguntina giñe luágu buídujali lan nigáburi lídan sun cátei, le nadügübei, nubáruaguouñadina méme lun ítarabadina lan queísi meja labúseerun Crístu lun ítarabadina lan dán meja le lasálbarúnbalina.

¹³ Nidújeñu, mariñaguntina luágu ibíja náali lan sun cátei le, le nadügübei, nabúlieiduni sun le eréderubei árigi lun náfaagun lun nártügüdüni le nigíbugiñebei,

¹⁴ lun nachülürün lúmoun lébeja eíbaaguni ligíbuagu ubouú le, lun nagáñiruni le lúnbei líchuguni Búngiu siélu joun sun ja lídaanbaña ában lúma Crístu Jesúsu.

¹⁵ Sun wagía le weínamujalibeí lídan wafíñen, lúnti wasáminarun ítara. Ánjaün asáminara lídan ámu luwúyeri lídan som cátei, larúfudubei giñe Búngiu cátei le jun.

¹⁶ Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalibeí.

¹⁷ Nidújeñu, amúriajatina júma lun ában lan jarítangun lun jafálaruni náni jémpulu, aríja jumáña giñe ja abágaridubaña según jémpulu le wíchugubei jun.

¹⁸ Aríñaga náali jun sarágu weíyaasu áni nariñagayaali jun láu águiraú, luágu añájein lan sarágu ja aríñagatiña luágu affíñe jamá luágu Crístu, abágaridutiña queísi láganiñu Crístu le ouwebei lun larúmadagüdüniwa.

¹⁹ Lídaanme lagúmujoún dan, gürínguabei cátei joun—jasúfuriruba luágu jafígoun lun sun dan. Lé buri cátei le wámaabei joun, lígía jabúngiutebei, apántajatiña láu buri cátei le jamúga lúnbei nibúsigari jamá láu. Luágu rügüñein buri cátei ubouáguna jarítagua.

²⁰ Ánjein wagía, siéluna wagía, áni wagúrabuña líabín Wabúreme Jesucrístu le Wasálbaragüle siélugiñe.

²¹ Lídaanme wéyu lígía, lasáansirubei wágubu le emégeirubei sarágu lun ítara lan quei lúgubu, le úabei lemégeirun. Áni ladügübei láu méme ubáfu le luágubei lun líchuguni sun cátei lábugiñe lagúmadijan.

4

Gúnda jumá súnwandan lídan Wabúreme

¹ Ligíati nidújeñu jínsiñetiña nun, ítara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeirujaja luágu nesériwidun lun Crístu.

² Ayúmuraguatina tun Evódia túma Síntique lun jebélurun lídoun úarani queisi idújeñu lueígiñe Crístu.

³ Ánjein bun, nouba buíti lídan wadágimanu, amúriajatina búma lun híderaguniña ítunu ja lun gamádagua jamá, lugúndun áfaaguatiña noubagiñe lídan lapúrichijoún ugánu le lánina asálbaruni, úara lúma Cleménte jáma buri jíbiri ja ñadágimeinbaña meja núma. Búrúwaali jíri sun jagía tidan lílburuna íbágarí magúmchaditi.

⁴ Gúnda jumá súnwandan ladüga lídaañadün ában lúma Wabúreme. Aríñagaya numúti. ¡Gúnda jumá!

⁵ Subúdiwa jumá quei gürígia areídatiña ladüga madíseeli liábin Crístu.

⁶ Magíbedalá jarítangun luágu ni cáta, aríñagarügü jumei sun cátei lun Búngiu súnwandan dan le jayúmuragun lun, amúriaja jumá lúma, mabúlieidagunga lun jíchugun eteíngiruni lun.

⁷ Ábamei líchuguni Búngiu lídarangilan jun, darángilaü le, weírítimaabei lubáfu lun lagídarun jídíjeri sügü láu jubáfu lun jarítangun cátei le lúnbei jadügüni, áni darángilaü ligía, loúnigiruboun janígi lúma sun jisáminan lueí idíjeri lídan le jeménigidun luágu Búngiu lídaangiñe Crístu Jesúsu.

Samína jumá luágu le buídubei

⁸ Lagúmujoún cátei nidújeñu, samína jumá luágu sun le inárütibeí, sun le gadúnabei inébeséi, sun le richábei, sun le jarúmabei, sun le gúndaawabei láu, sun le uágubei buídu lan ladímurejoúa. Samína jumá luágu sun le buídubei lúma sun le gadúnabei uweírugini.

⁹ Falájumei sun le arúfuda náalibeí jun lúma sun le resíbi jumáalibeí númagiñe. Gúnfuli jumá láu le naríñagubei jun, áyeija jumei nigáburi. Ábame júma lan Búngiu láu lídarangilan le líchugubei.

Jedéweejan Filíposna seínsu lun Páblo

¹⁰ Oúnwenbun nugúndan lídan Wabúreme luágu jarítaguayaadün lan nuágu. Maríñaguntina luágu bullei jumáadina lán yebe, madárirügü jíñáalin ligáburi ída lúba lan líderagunina.

¹¹ Mabúseerúntina jamúga jarítangun luágu nadímurejañein lan lueígiñe nemégeirun, lugúndun furéndeijadina lun gúndaañu nan láu le númati,

¹² subúdi numúti labágaridúniwa lídan gudémein, subúdineí giñe gámawa lan gíbe. Furéndeijadina lawandúniwa furúmieguarügü igáburi, ílamaü yebe o quimúle, níjein lan darí lun lígiragún o úa lan ni cáta.

¹³ Úati cátei jénreenguti nun ladüga lídaañadina ában lúma Crístu le íchugubei ubáfu nun.

¹⁴ Láu sun líra, buíti jadüga láu jíderagunina lídan lénreengúnga nun.

¹⁵ Queisi giñe jasúbudiruni, jugúya Filíposna, lárigiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügüñadün tílana ligílisi oúnaja seínsu nun quei atéíngiragülei luágu nesériwidun jun.

¹⁶ Sun meja anájagua lan ubúrgu Tesalónica, oúnajatün edéweejani nun, mámarügü ában weíyaasu, lun le nemégeirubei.

¹⁷ Máma jamúga nasáminarun lun gubeirügü nibíjin som cátei, le nabúseerúbei, lúntima lagánwoundun le lúnbei jíbíjini lúmagiñe Búngiu.

¹⁸ Áu, resíbi náali súnugubei lúma sügü láu lé yebe lúnbei nerésibiruni, láu le joúnajabei nun lúma Epafrodító ígiraguaali núma. Le joúnajabei nun, ítara líña

quei líjeme cupáli le águdajoúti lun Búngiu, ában edéweejani le lerésibirubei láu ugúndani.

¹⁹ Líchugubei lubeíti Nubúngiute sun le jemégeirubei jun queísi buri luweírigun lírisin, lídaangiñe Crístu Jesúsú.

²⁰ ¡Uweíriguni lun Wáguchi Búngiu lun sun dan!

Lagúmujóin buri mábugäi

²¹ Rújumei numábugäi lídan líri Jesucrístu joun sun ja lánigubaña Búngiu. Mábuga jáña wadújeñu lueígiñe Jesucrístu ja yábaña núma jun.

²² Sun ja yábaña Róma ja lánigu Búngiu, játima tílana lúban urúei, mábuga jáña gíñe jun.

²³ Binílaün Wabúreme Jesucrístu sun jugúya. Ítaralá.

LIGÁRADAN PÁBLO JOUN COLÓASNA

Labürüjan Páblo joun tílana liglisi to Colósasboun

1 Anája áu Páblo, le ában láni Jesucrístu apóstolu láu lugúndan Búngiu.

2 Úara lúma Timotéo le wadúje luegiñe Jesucrístu nabürüjañoun gárada to jun, jugúya le lánigu Búngiu ja gúnfulibaña lúma Crístu le uágubei jafiñera, ja ubúrugubaña Colósas. Binílaün Wáguchi Búngiu, ibíja jumá giñe darángilaü lúmagiñe.

Layúmuragun Páblo jawágu afñetiña lun Búngiu

3 Súnwandan weteíngiruni Búngiu, le Lúguchi Wabúreme Jesucrístu, dan le wayúmuragun lun juágu.

4 Agáambaadiwa luágu jafiñen luágu Crístu Jesús lúma luágu jínsiñejabu joun sun ja lánigubaña Búngiu,

5 ladüga eménigini le juágubei luágu le areidúañubei jubá siélu. Chülütün árügüdei eménigini le lárigiñe jagáambuni ugánu le inárütibeí, ugánu le luáguti asálbaruni.

6 Ugánu méme le, lé meja apúrichijóubei jun, labúruchaguña lídan sun uboú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejóun luágu línsiñejabu Búngiu, ába jasúbudiruni luágu inárüti lan ínsiñejabuni le.

7 Ligía cátei le larúfudajabei Epáfras jun, le ñadágimeinjalibeí wáma. Jínsiñeti woun, subúdi wamúti luágu gayára lán meja weménigidun luágu lun lesériwiduni Crístu buídu jagánagua wawéñegua.

8 Barújali ugánu woun juágu lúma luágu jínsiñejabu le rúlaalíbeí Búngiu jun.

9 Ligía lúmagiñe lubeí wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei láni Espíritu jun.

10 Ítara lúba gayára lan jagáburidun queísi lúnti lan jagáburidun lánigu Wabúreme, adügei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun giñe jasúbudirunitima Búngiu.

11 Amúriajatiwa lúma lun léredagüdüñün láu luweirín lubáfu lun gayára lan jawánduni sun cátei láu sarágu gurásu lúma ugúndani,

12 lun giñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbeí líchuguni joun lánigu lídaanme larúeijan le lánina larúgounga.

13 Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraü le jínsiñebeí lun,

14 le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

15 Wáguchi Búngiu le siñábeí jaríjini gürígia, ába liábin uboúagun lídan ában luwúyeri le gayáraati jaríjini gürígia lídan Liraü le Jesucrístu, le weirígutimaabei lídaangiñe sun cátei le níjeinbeí.

16 Lídaangiñe Crístu ladügei Búngiu sun cátei le siélurugubei lúma le uboúagubei, dándu buri cátei le marijínbeí quei le arijúabei. Lídaangiñe Crístu

ladügei arúejjani, gumádi, lúrudu buri lúma buri ubáfu le jáni ánjeligu, áni lun giñe Crístu ladügüwa.

¹⁷ Lubáragiñebei sun cátei, níjeinjali meja Crístu, áni láu lubáfu, níjein lubeí sun cátei lídan lubára.

¹⁸ Louígiñe sun líra, Crístu jachügüdinabei lánigu, ja gíribaña lúgubu, ja giñe gíribaña lilígílisin. Ligía le íchugubei íbágari lun úgubu ligía, ligía furúmiñebei ásaara lídaangiñe ouweni lun mouñwendügüyaali lan, lun ligía lan láu furúmiñeti ubáraü lídan sun cátei.

¹⁹ Ítara líña labúseeruni Búngiu lun níjeinbei lan sun le ligíabei lídan Crístu.

²⁰ Lídaangiñe Crístu, ába laráandaragüdüni Búngiu sun ubouú dayárugubei lúmagua, dándu buri cátei le ubouágubei quei lé buri siélubei, ladügüni aráandaruni ligía láu louñwen Crístu luágu gurúwa.

²¹ Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladüga buri cátei wuríbati le jadügübei.

²² Ánjeinti guetó, aráandaragüda láadün Búngiu lúmagua láu louñwen Crístu lun larúfudunün jarúmañu, madúrunga, queisi lánigu ligíbugiñe.

²³ Ítara méme lúba giñe ánjaün asígira derégüdagu lídan jafiñen, ragüñu buídu luágu Crístu, migirunga jumeí eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijoubei lídan sun ubouú, le giñe napúrichijabei, áu Páblo.

Rúlumuti Búngiu Páblo lun lesériwidun joun tĺana buri ligĺisi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loustaragüdüniwa le lúngilibei lasúfuriruni Crístu jawágu lánigu, jawágu lilígílisin ja lúgubu.

²⁵ Nübinjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le láni Búngiu jun quei lubúdubu.

²⁶ Ugánu ligía, cátei lé meja arámudañu lubei Búngiu lúmagiñe sarágu dan, áni guetó subúdigüda láali joun lánigu.

²⁷ Joun lánigu Búngiu labúseera lasúbudiragüdüni luweírín irísini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu níjein lan Crístu jídan, juríu yebe, máma yebe juríu, áni ligía le idaanbei jíchigei jeménigini luágu uweíríguni le lúnbei jibíjini siélu.

²⁸ Luágu Crístu wapúrichija, aríñagatiwa joun sun gürígia lun jarügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu.

²⁹ Ligía nuwádígimaridunbei, áfaagueina láu sun érei lúma ubáfu le líchugubei Crístu nun.

2

¹ Buséntina lubeíti lun jasúbudiruni luágu luweírín lidíjari narítágun juágu, lúma jawágu afíñetiña ja Laodicéabaña, lúma jawágu sun jíbiriagu afíñetiña ja maríjin jamáginabaña.

² Weíríti nayúmájan lun gagúraasun jumá tídan janígi, lun lídan jumá ában láu línsiñejabu Crístu juágu joun jíbiriagu, lun gunfaráanda jumáni linárün Búngiu buídu buídu lun derégüdagu jumá lídan le uágubei jafiñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü.

³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibei ában oúnwenbun irisini woun.

⁴ Naríñaguñein buri cátei le jun lun mayéedun lánün ni ában láu buri dimúrei buíduburiti.

⁵ Láu sun úa nan jigíbugiñe lun gayára lan jamúga jarijinina, anájein júma lídan espíritu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jafiñen luágu Crístu.

⁶ Ligía, ítara queísi jerésibiruni Wabúreme Jesucrístu láu sun jafiñen luágu, lúnti ítara lan jabágaridun lídan ában lúma,

⁷ lun ragüñu lan jibágari luágu lídan le jídin jubáruaguóun lúma, derégüdagu lídan jafiñen ítara queísi larúfudajóuniwa jun, láu eteíngiruni lun Búngiu súnwandan.

Iséri ibágari lídan Crístu

⁸ Toúnigi jumá, mígiraguagüda jumá júngua joun ja busénbaña jayéjean láu buri arúfudajani málati. Máma lúmagiñeti Crístu cátei le jarúfudajabei, lúmagiñeti jagáburí binádu mútu lúma buri ligáburí jarítapun gürígia lánina uboú le luágu cátei.

⁹ Níjein sun le Búngiubei lídan Crístu,

¹⁰ áni jugúya, buin jíña láu Búngiu lugúndun lídaañadün ában lúma Crístu. Jéreti Crístu luei sun lúrudu lúma ubáfu le uboúagubei lúma le siélubei.

¹¹ Láu giñe lídaañadün lan ában lúma Crístu, queísigubeirügü resíbi jumáli lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jibíjubei, máma le adügübeí láu bíti luágu úgubu, jáni circuncisión, láu jasálbarun lídaangiñe figoú le áubei jíábin uboúagun. Níján luwúyeribeí ladügüniwa Crístu lun lánigu wamá Búngiu.

¹² Láu jabásterün, arúfuda jumúti luágu bunáwa jumá lúma Crístu lun ibágari le binádubei, sarátun giñe lúma lun ibágari le iséribei ladüga jafiñerun luágu lubáfu Búngiu le ásaaragüdübalin lídaangiñe oúweni.

¹³ Luágu meja ában dan, jíláñu jíña meja lun cátei lánina Búngiu ladüga jíffigoun, ladüga giñe jabágaridüña lan queísi gürígia boúguditiña luei lílúrudun Búngiu, agúñfulireina lúma sun luríban layúmajan júra. Ánjeinti guetó, rújali Búngiu iséri ibágari jun úara lúma Crístu.

¹⁴ Láu loúnwen Crístu, ferúduna láali Búngiu sun wáffigoun, ába lagúmchaguagüdüni Búngiu lílúrudun Moisés lúma buri sun gumádi le lánina lúrudu ligía le áubei mabáfu wamá lun wagúñfulirun, queígubeirügü jamúga dágua láni Búngiu lúrudu ligía luágu lugúruwan Crístu.

¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbatí, ába lúnabudagüdüniña ligíbugiñe guríriguaü, ába lanügüniña quei adaürütiña lun.

Áluaja jumeí buri cátei le lánina siélu

¹⁶ Úa la ni ában añáwaríjati jarítapun luágu buri arúfudajani lánina cátei le lúnbei jeígini o le lan lúnbei játuni lun jagúñfulirun lúma Búngiu, o luágu lán buri fédu le jarítaguagüle luágu iséri írúmu, lúma iséri játi, o luágu lan wéyu le eméraaguagülei.

¹⁷ Sún buri cátei le, lúntirügü lagúñfulirúniwa lúma darí meja liábin Crístu uboúagun, liyáwa rügüñein le lúnbei liábin, Crístu ligía linárünbei.

¹⁸ Mígiraguagüda jumá júngua joun ja afámurubaña quei ünabugutiña, ja ájuduragubaña joun ánjeligu, lun janügüni jagáñirun jueí. Weíríti jadímurejan

luágu nege buri cátei le ayáwadaguti joun, ába buri janáangun joúngua luágu ligáburu jasáminan, le jáni gürígia.

¹⁹ Mاماñanu lídan ában lúma Crístu, le ichügüdinaü joun sun lánigu ja gíribaña lúgubu, le ágüdajabalin úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu.

²⁰ Jugúya, ígira jumáli binádu jigáburu, queísi lídaanjadün lan ában lúma Crístu, gidáadün lídaangiñe ligáburu jarítangun gürígia luágu buri cátei. ¿Cáti uágu jabágaridunbei camá jamuga lánigugidün ubou,

²¹ íchaagua júngua lun ligáburu ubou lun jagúnfulirun lúma Búngiu queí buri jamúga lúru le aríñagubei. “Magúurabei le, meígabei líra, márügüdadei cátei ligía”?

²² Sún buri gumádi le, luáguti buri cátei le gagúmuchaditi láu layúsurún, áni máma ámu cátei lueí gumádi buri lúma arúfudajani le jáni gürígia.

²³ Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma ünabuni lun lagúnfulirúniwa láu, áni deréti líra woun. Láu sun líra, mabáfuti lúru buri ligía lun lídejan luágu luríban jayúmajan gürígia.

3

¹ Queísiti jabágariduña lan ában ibágari iséri ladüga lídaanjadün lan ában lúma Crístu, áluaja jumeí buri cátei le lánina siélu, le ní lubei Crístu ñun lueígiñe loúnwenren Búngiu.

² Samína jumá luágu buri cátei le lánina siélu, máma luágu buri le lánina ubou.

³ Jilátün lúma Crístu lun ubou le, guetó, níjein jibágari le tímatisaati lúma Crístu le yágütabei siélu lúma Búngiu.

⁴ Dánme lagírribudun Crístu, le úmabei lídan wamá ában, wachülaaguba giñe lúma, ábame gafánran wamá lídan luweírigun.

Binádu ibágari lúma iséri ibágari

⁵ Ígira jumeí sun le jigáburubei le láninabei ubou le. Úa la ni ában jidaangiñe agámariduti mamárieidunga, madügün jugúyame cátei wíyeti, mafálara jumeí luríban ayúmajani, mawéinamulá jágu luágu cátei le máma jáni, le méme ájuduraguni joun sándu.

⁶ Lueígiñe buri cátei le, láburujan lanárimé ligáñi Búngiu jawágun ja madügünbaña gásu láu.

⁷ Jugúya, adüga buri jumúti meja cátei le lídan meja binádu jibágari,

⁸ ánjeinti guetó, ígira jumeí sún buri cátei le. igáñi, iyéreejabuni, wuríbani, anábajani, lúma buri dimúrei wíyeti.

⁹ Maríñaga jumá iyéeni jumagua queí ígira jumáli lan binádu jigáburu lúma lé buri meja jadügübei.

¹⁰ Iséríjali jigáburu le isérideinábei queí méme ligáburu Búngiu guánarügü le adügübalin, daríme jasúbudiruni Búngiu buídu buídu.

¹¹ Iséri ibágari ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machülaaguntiña, idámuni, máma idámuni, Crístu, ligía sun cáteibe, áni níjein giñe jádan sun lánigu láu láni Espíritu.

12 Jínsiñetün lun Búngiu, anúadaja láadün lun lánigume. Ítara líña lubeíti, abágarida jumá queísi lánigu, láu gudémejabu, areíduni, manáanguni únguau, gagáambadi, lúma gagúraasuni.

13 Gagúraasun jumá jubáruagua, ferúdunagua jugúyame júmawagua, ítara quei ferúduna lánün Crístu, ítalará giñe jadúga.

14 Lougiñe sun cátei, jínsiñejabu jumá, ligía cátei le íchugubalin sun cátei lídan ában, áni jóustagüdaleí lubuídun jigáburí.

15 Abúguraleí lidárangilan Búngiu sun le jadügübei, ladúga ligía lagúarunbei Búngiu jun lun ábanrügü jumá úgubu, abágarideina láu darángilaü. Geteingiradi jumá giñe.

16 Buíngüdalóun láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jerémuja luágu luweírigin Búngiu láu eteingiruni lun tídan janígi.

17 Furúmieguarügü cátei le jadúga o le lan jaríñagun, adúga jumeí lídan ában luwúyeri le íchuguti inébesei lun Wabúreme Jesucrístu, eteingireina Búngiu Úguchili lídaangiñe Jesucrístu.

Igáburí le lúnbei wagáburiduni jáma ja wábiñebaña

18 Wúriña, gagáambadi jumá joun júmarigu, ligía cátei buíti le lúnbei jadügüni queísi afíñetiña luágu Wabúreme Crístu.

19 Wügüriña, jínsiñe jamá júmarigu jun, magáñida jumá jáma.

20 Isáanigu, agáamba jumáña jagúbürigu lídan sun cátei, ladúga ligía jínsiñebei lun Búngiu.

21 Agúbürigu, másügüragualá jagúmadiruniña jisáanigu, ragü jáñein magúraasuni.

22 Esériwidutiña, gagáambadi jumá joun jiyúbudirigu lídan sun cátei, mámarügü dan le ariagu jáña lan jun lun jeréderun buídu jagíbugiñe, adúga jumeí súnwandan táu sun janígi ladúga luweírín linében Búngiu jun.

23 Furúmieguarügü cátei le jadúga, adúga jumeí láu ugúndani, camá jamuga jadügüñein lun Wabúreme Crístu máma joun gürígia.

24 Subúdi jumáli luágu líchugubei lan Búngiu alágan jun queísi jafáyeiruaja, ladúga lun Wabúreme Crístu le Jabúreme le tímátimaati jesériwida.

25 Ánjeinti le adügüti wuríbati, lerésibirubei lafáyeiruaja wuríbati le ladügübei, áni ában láu lanügüniña Búngiu sun gürígia.

4

1 Iyúbudirigu, lúnti buídu lan jigáburí jáma jumúsuniña, ousera jumáña láu úarani lúma íríchaü, jarítagua jumá luágu níjein lan giñe ában Jabúreme yágüta siélu.

2 Ítara méme jumá ayúmuragua lun Búngiu sarágu, agáguduañu, eteingireinei Búngiu.

3 Ayúmuragua jumá giñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu, juríu yebe, máma yebe juríu. Lueigiñe napúrichijani cátei le, nadaürüwa.

4 Ayúmuragua jumá lun nasúbudiragüdüni furáangu quei lubúdubi.

5 Buídulá jóuserun jáma ja mafíñebaña, yúsu jumeí jidáani lídan cátei le buídubei.

⁶ Lúnti gúndaawa lan láu jiyáanu súnwandan, lúnti gíñe semé lan, lúnti gíñe jasúbudiruni ída lúba lan jóunabuniña gürígia.

Lagúmujoín buri mábugaü

⁷ Lariñaguba wadúje Tiquico nuágu jun. Jínsiñeti wügüri ligía woun sarágu, ligía ában ídejati buíti le gíñe esériwidubei lun Wabúreme Crístu núma.

⁸ Ligía nouñajaanbalin jun lun lariñagun jun ída wáña lan, lun gíñe líchugun gurásu jun.

⁹ Níngira gíñe Onésimo lúma, wadúje úraguati le jínsiñebeí woun, le ju-páisanun. Jagíaba abájúdagua jun luágu sun le asúseredubei ya.

¹⁰ Mábuga líña Aristárco le nouba furísunrugu jun, mábuga líña gíñe Márcos le lidúje Bernabé jun. Aríñawagúaaali jun luágu Márcos, ánjein nñüdün aríjaün, resíbi jumeí buídu.

¹¹ Mábuga líña gíñe Jesúsu, le gíñe gíribei Jústo, jun. Jagía rügüñanu jádaangiñe juríu afiñetiña ja ñadágimeinjánaña núma luágu larúejan Búngiu, áni jayábin nun quei ában ouñwenbun dűgűdaguaü.

¹² Mábuga líña Epáfras le jupaisanun, le esériwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégűdagu jumá lídan jafiñen áni derégeguñu júngua buídu buídu lun jadűgűni lugűndan Búngiu.

¹³ Geféentina luágu jarítagua lan Epáfras juágu, lúma gíñe jawágu ja ubúrugubaña Laodicéa lúma Hierápolis.

¹⁴ Mábuga líña Lúcas, le wasúrussian, le jínsiñebeí woun, jun, lúma gíñe Démas.

¹⁵ Mábuga níña joun idújeñu lueígiñe Crístu ja ubúrugubaña Laodicéa. Rújuma gíñe mábugaü tun Nínfas lúma joun sunagun juágu lídan layúmuragun lun Búngiu lun derégűdagu jumá lídan jafiñen áni derégeguñu júngua buídu buídu lun jadűgűni lugűndan Búngiu. afiñetiña ja ouñdaragubaña túbiñe lun jájuduragun lun Búngiu.

¹⁶ Lásunme jalíjanun gárada to júmagua, jóunajounme lun jalíjanun tílana ligílisi Laodicéa, alíja jumouñme gíñe gárada to achűlűrűboun jun Laodicéagiñe to nabűrűjaboun.

¹⁷ Aríñaga jumá lun Arquípo lun ladűgűni wadágimanu le rúlaalíbei Wabúreme Crístu lun, buídu.

¹⁸ Niján numábugaü le nabűrűjabei jun láu nújabu guánarű—áu Páblo. Jarítagua jumá luágu nadaűrűña lan. Binílaün Búngiu. Ítaralá.

FURÚMIÑETU LIGÁRADAN PÁBLO JOUN TESALÓNICANA

Labürüjan Páblo jáma líbirigu joun tílana liglisi to ubúruguboun Tesalónica

¹ Áu Páblo lúma Silváno láu Timotéo, wabürüjañoun gárada to jun, jugúya tílana liglisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumeí abíniruni lúma darángilau jámagiñe.

Jémpulu lánina afñeni lé meja jarúfudubei Tesalónicana

² Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu.

³ Jarítaguatiwa ligíbugiñe Wáguchi luágu lubuídun jesériwidun lun Jesucrístu ladüga jafñen luágu, lúma lubuídun jóuseruniña wánigu ladüga buin tíña lan janígi láu ínsiñejabuni, lúma lubuídun jawánduni sun asúfuriruni ladüga jeménigidun luágu Wabúreme Jesucrístu le ídaangiñebei lan jachülüra siélun.

⁴ Nidújeñu, jínsiñetün lun Búngiu, áni subúdi wamúti luágu anúadaja láadün lan.

⁵ Lugúndun dán meja le wapúrichijanbalin ugánu luáguti asálbaruni jun, merésibirun jumúti queisirügü dimúrei, ñadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúrui le tímatimaati luágu inárüni lan. Subúdi jumúti lubuídun wóuserun jagánagua, lun ábanbadiwa lan jémpulu buíti jun.

⁶ Ába jáyeijani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barü lan jerésibiruni Crístu asúfuriruni jun.

⁷ Ítara líña jíábin lun ábanbadün lan jémpulu joun sun afñetiña ja loúbawagubaña Macedónia lúma Acáya.

⁸ Burúguaali ugánu luágu Wabúreme Jesucrístu júmagiñe, mámarügü loúbawagu Macedónia lúma Acáya, burúguaali lídan sun fulásu, áni subúdiwaali luágu afñeni le jibíjubei luágu Búngiu lídan sun fulásu. Memégeirunwati wabájüdagun luágu jafñen joun gürígia,

⁹ lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruniwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibe.

¹⁰ Abájüdaguatiña gíñe juágu luágu jagúrabajañein lan lagíribudun Liraü Búngiu siélugiñe —Jesúsu le lásaaragüdübei Búngiu lídaangiñe óuweni, le asálbarubáliwa luei lanárime afáyeiruajaü luágu figou le lúnbei líábin.

2

Luwádigimari Páblo Tesalónica

¹ Jugúya guánarügü, nidújeñu, subúdi jumúti luágu máma lán meja luágu ni cáta wóudin aríjaün.

² Queísi jasúbudiruni, wuríbati meja jóuseruniwa gürígia ja Filíposbaña, ába wayábin júmoun ladügarügü líchugun Búngiu anígi woun lun wadügüni. Ába

wapúrichijani ugánu le lánina asálbaruni jun, mebéresenga wagía láu le lúnbei wasúfuriruni jámagiñe gürígia ja mísiñejabúbaña lun ugánu ligía.

³Máma wapúrichijaña ladúga jamúga bulieiguaü, queísi jariñaguni wáganiñu, ni láu luríban aritaguni, ni lun wayéedagunün.

⁴Lubáragiñe líra, aríja lumúti Búngiu luágu buídu wamá, ába líchuguniwa lun wapúrichijani ugánu le lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaaguntiwa lun gúnda jamá gürígia wáma, wáfaagun lun gúnda lan Búngiu wáma, le asúbudirubarun wanígi.

⁵Queísi jasúbudiruni, siñati laríñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le.

⁶Máluajantiwa lun wibíjin uweíríguni jámagiñe ámu gürígia, ni júmagiñe, láu sun gayára lan jamúga wasándiragüdüni lijürü wagúmadíjan queísi láni Crístu apóstologu.

⁷Lubáragiñe líra, ouserarügü wamútün láu ában uálini queísi ában úguchuru to agüríajabaliña tirájüñü, oúnigira táña.

⁸Weíríti jínsiñe woun dari lun máma rügüñein lan jamúga láni Búngiu ugánu wabúseera wíchugun jun, buséntiwa jamúga wíchuguni wabágari guánarügü jun, le luweírín jínsiñe woun.

⁹Nidújeñu, jarítagua jumúti ligáburí wawádigimari lúma ligáburí wáfaagun lun wawínwandun. Nadágimeintiwa meja wéyuagu áriebu lun mámabadiwa lan ijürügu lun ni ában jídaangiñe, sun awánja lan apúrichijei láni Búngiu ugánu jun.

¹⁰Geféentün, geféenti gíñe Búngiu luágu reidei wamá meja láu ában igáburí le jarúmati áni surú jídan, jugúya le afiñebei, míchugunga wagía lúgaaru lun ni ában lun líchugun wadúnrun.

¹¹Subúdi jumúti gíñe ída líña lan wíchugun gurásu jun lúma derégüdaguaü lun jafiñen, cáda ában jídaangiñe, quei ladúga ában úguchili joun lirájüñü.

¹²Ariñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúeíjan lúma luweírigin.

¹³Ligía, súnwandan lubei weteíngiruni Búngiu, lugúndun dán meja le jagáambunbalin láni Búngiu ugánu le wapúrichijabei jun, resíbi jumúti queísi ugánu láni Búngiu, máma queísi ugánu jáni wügüríña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le afiñebei.

¹⁴Nidújeñu, dan le jeíbaajanbalún jupaísanun, suséreti jun quei méme le asúseredubei joun tílana buri ligílisi to Judéaboun, ja lánigu Búngiu lídaangiñe Jesucrístu, eibaaja jamútiña gíñe juríu ja japaísanun.

¹⁵Juríu, jagía áfarubalin Wabúreme Jesúsu jilágubei, áfaragua jamáña profétagu, áni bugá jamutiwa gíñe bougudin luei jageíra. Magúndaanti Búngiu jáu, jáganiñu gíñe sun gürígia.

¹⁶Dan le wabúseerun wadímurejan joun ja mámabaña juríu lun gíñe jasálbarun, májatiña yebe juríu lun wadügüni. Láu igáburí le, gánwoungugüda jamúti jaffigoun. Ánjeinti guetó, liábindügürüga lanárime ligáñi Búngiu jawágun.

Busényati Páblo lídin aríjaña Tesalónicana

¹⁷Nidújeñu, murúsun dan larígiñe wígirunün (láu sun ajúnja méme lan tídan wanígi) oúnwenbun wabúseerun wouódinya aríjañu.

¹⁸Jóuchatiwá yebe wouódin, áu Páblo, sarágu weíyaasu yebe nouchun nídin, áni ságü nouchun nadügüni, mígirun lumútina Máfia.

¹⁹ Ladüga jugúya guánarü íchugubalin ugúndani woun, jugúyaba arúfudei lubuídun wesériwidun lun Wabúreme Jesucrístu le uágubei gayára lan wemenigidun lun werésibiruni wafáyeiruaja dánme le lagríbudun, áni jugúyaba wagúndaaragüle dánme le jaráramun ligíbugiñe.

²⁰ Jugúya lébunabei wagúndan, áni rújadün lébuna wadímurejan buíti joun ámu juágu.

3

¹ Dán meja le siñá wamaali awánda masúbudirunga ída líña lan sun cátei júma, ába warítapun luágu buídutima lan lun weréderun Aténas, áu lúma Silváno,

² lúma lun lídin wadúje Timotéo, le ában esériwiduti lun Búngiu lídan lapúrichijoún ugánu luágu Crístu le Wasálbaragüle, aríjaün. Oúnaja wamúti jumoun lun líderagunün arárama buídu lídan jafiñen, ru ligía gurásu jun,

³ lun úa lan ni ában eiguaduti larúna lueígiñe buri lénreengúnga le lasúfurirubei luágu lafiñerun luágu Crístu. Jugúya guánarügü subúdi jumúti luágu lúnti lan wagúrabajani asúfuriruni líbe le.

⁴ Dán meja le awánjagua lan júma, aríñagatiwa meja jun luágu lúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni.

⁵ Ligía lébubei dán meja le siñánaali lan awánda, ába nouñajan álügüdaja ída jíña lan lídan jafiñen, ladüga nanúfude lueí jamuga línchajanün Máfia lun jígiruni jafiñen luágu Crístu, ába jamúga liábin wawádigimari jídan lun ni cátime.

⁶ Guetó, giríbulaji Timotéo Tesalónicagiñe, áni barúti ugánu buíti woun luágu jafiñen lúma jínsiñejabu. Lariñajare woun luágu jarítagua jumá wawágu láu insiñeni súnwandan, luágu giñe luweírin jabúseerun jaríjiniwa, ítara giñe quei busén wamá waríjinün.

⁷ Ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó.

⁸ Ítara líña quei iséri ibágari woun wasúbudiruni luágu derégüdagu jíña lan lúma Búngiu.

⁹ ¿Ída lubá funasan wíchugun eteíngiruni buídurügüti lun Búngiu juágu, lúma luágu sarágu ugúndani le rújumaalíbei woun?

¹⁰ Wéyuagu, áriebru, wayúmuragun lun Búngiu lun gayáraaya lan waríjinün, gúnfuli lámuga le mégeíbei lídan jafiñen.

¹¹ Buséntiwa lun líderaguniwa Wáguchi Búngiu lúma Wabúreme Jesucrístu lun gayára lan wouídin aríjaün,

¹² lun giñe laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun.

¹³ Derégeguagüda lámugaün Wabúreme Búngiu júngua lun le gumúti, madúnrunga jugúyame ligíbugiñe dánme liábin Wabúreme Jesúsu jáu sun lánigu.

4

Igáburi le áubei lagúndaara Búngiu

¹ Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

² Jarítaguatün luágu arúfudajani le wíchugubei jun láu lugúmadin Wabúreme Jesúsu.

³ Le labúseerúbei Búngiu, lun jabágaridun derégeguañu júngua lun, lun úa lan ni ában agámariduti mamárieidunga,

⁴ lun cáda lan ában lálujanun lúmari lau lubuídun arítaguni queísi labúseeruni Búngiu, lídan lubúdubu,

⁵ máma láu luríban ayúmajani quei jadúgüni gürígia ja ibídiñejabubaña lun Búngiu.

⁶ Úa la ni ában adúgüti wuríbani lun lidúje láu lagámaridunun lúmari, jéreti labeíchuni Búngiu le adúgüti cátei le, queísi waríñaguni jun.

⁷ Máma lun wabágaridun lídan iwíyeni lagúara Búngiu woun lun lánigu wamá, busénti lun wabágaridun derégeguañu woúngua lun.

⁸ Ítara líña lubeíti, le amájaruti lerésibiruni arúfudajani le, máma lun ni ában wügüri lamájara, lun Búngiu lamájara, Búngiu le íchugubalin Sífiri Sándu woun.

⁹ Luágu jínsiñejabu joun lánigu Búngiu, úati ni cáta lun nabürüjani jun lugúndun arúfudajaali Búngiu guánarügü jun lun jínsiñegua jumá,

¹⁰ áni ítara líña jadúgüni joun sun jidújeñu lueígiñe Jesucrístu ja lídaanbaña sun ubúrugu Macedónia. Láu sun líra, nidújeñu, ayúmuraguatiwa jun lúntima lagánwoundun jínsiñejabu.

¹¹ Joúcha jumá jabágaridun darángilañu, beréseguñu lídan le lúnbei jadúgüni. Ñadágimein jumá lun janúriragun júngua, quei waríñaguni jun,

¹² inébe jumámuga joun ja mafiñebaña luágu Jesucrístu, úa lámuga gíñe jemégeirun.

Liábin Crístu

¹³ Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, luei jajírudagun quei ja meménigidunbaña luágu níjein lan ában ibágari lárigiñe ouweni.

¹⁴ Ítara quei afiñe wamá luágu jilá lan Jesúsu áni sará ligía lídaangiñe ouweni, ítara líña gíñe afiñe wamá luágu lásaaragüdübaña lan Búngiu ja ouwegubaña afiñeñu luágu Jesúsu.

¹⁵ Ligía waríñagunbei jun queísi larúfudajan Wabúreme Jesúsu, luágu wagía lánme le wínwangilibeí dánme liábin, mámaba wagía ñúdün jabáragiñe ja jiláguañabaña.

¹⁶ Dánme le arárireina lan Wabúreme Jesúsu siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lífidun Búngiu. Gürígiameiti ja ouwegubaña afiñeñu luágu Crístu, jagiaba ásaara furúmiñe.

¹⁷ Lárigiñeme, ábame wásaarun, wagía afiñetiña ja wínwangiñabaña, ábame wanügüniwa úara jáma lídoun juánriñu lun wadúnragun lúma Wabúreme Jesúsu garábalirugu. Ábameiti weréderun lúma Wabúreme Jesúsu lun sun dan.

¹⁸ Ligíati rújuma lubeí garásu júngua láu dimúrei buri le.

5

¹ Ánjeinti luágu cába lan dan lasúsereda buri cátei le, nidújeñu, mabúseerúnwati nabürüjan jun.

² Subúdi jumáli buídu buídu luágu lachülürüba lan wéyu ligía dánme magúrabúniwa lan, queísi liábin ában íwerujati árieibu.

³ Dánme añája lan gürígia aríñaga. “Lídaañein dan sun cátei áni úati mégeiti”, ligíame liábin gürínguaü jawágun sódini quei liábin agáriduni tun würi dageinatu, siñábeiti jeséfurun.

⁴ Ánjeinti jugúya, nidújeñu ja afiñebaña luágu Jesucrístu, máma lídaañadün lubúriga luágu cátei lánina Búngiu lun lárügüdünün luwéyuri liábin Crístu quei lárügüdün ában jíweruti.

⁵ Lídaañadün larúgunga sun jugúya, máma wagía lánina áriebu lúma lubúriga.

⁶ Ligía moún lubei lun maráanserun wamá quei ja mafiñebaña luágu Jesucrístu, lúnti deréñuma wamá lubá lagíribudun, lídan wagíame lubuídun wachügü.

⁷ Ja arúmugubaña, áriebu jarúmuga, ja abácharuadubaña, áriebu jabácharuada.

⁸ Ánjein wagía le lánina wéyuagu, lúnti lídan wamá lubuídun wachügü. Lúnti wadáuragun woúngua láu afiñeni queisi ladáuragun súdaara láu laníguagu lun loúnigiruni. Lúnti gíñe jeménigi wamá luágu wasálbarun le ítarabei quei bunídi le áubei ladáurei súdaara lábulugu lun loúnigiruni.

⁹ Máma lun labeichuniwa Búngiu lanúadajawa, lun wibíjini asálbaruni lídaangiñe Wabúreme Jesucrístu lanúadajawa.

¹⁰ Jiláti Jesucrístu wawágu lun wabágaridun úara lúma, wínwañu wagía yebe, jiláñu yebe wéyume le liábin.

¹¹ Ligía rúmeme jumá lubei gurásu lúma érei júniwagua ítara quei jadügüni guetó.

Laríñaguni Páblo joun afiñetiña ída lúba lan jagáburidun

¹² Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja gagía jun lídan líri Crístu.

¹³ Lúnti jínsiñe jamá jun sarágu luágu wadágimanu le jadügübei. Abágarida jumá lídan dan jáma jíbirigu.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jíderaguniña ja débilibaña lídan jafiñen, lun gíñe gagúraasun jumá jabá súngebui.

¹⁵ Úa la ní ában afáyeiruti wuríbani luágu wuríbani. Joucharügü jumá jadügün buíti jagánagua, lúma joun sun gürígia.

¹⁶ Gúnda jumá súnwandan.

¹⁷ Ayúmuragua júma lun Búngiu sun dan.

¹⁸ Teínqui jumei luágu sun le asúsereduti —buíti, wuríbati, niján le labúseerúbei Búngiu júmagiñe, queisi afiñetiña luágu Jesucrístu.

¹⁹ Merédera jumei luwádigimari Sífiri Sándu tídan janígi.

²⁰ Mamájara jumá lun dímuerei le laríñagubei Búngiu jayúmulugugiñe jídujeñu luegiñe Jesucrístu.

²¹ Joucha jumei sun arúfudajani aríja jumeíme ánjein lúmagiñeti lubei Búngiu, ábame jeréderun lau le inárüñibe.

²² Dise jumá luei sun luwúyeri wuríbani.

²³ Búngiu guánarügü, le íchugubei darángilaü, derégeguagüdalaün júngua lun le gumúti, areída loume juwáni, janígi luma júgubu dayáru, jarúmañu, lubá liábin Wabúreme Jesucrístu.

²⁴ Úraguati Búngiu le agúarubei jun lun lánigu jumá, lagúmuchubei ladügüni sun cátei buíti le jídan.

Lagúmujuún buri mábugaü lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatina jun láu lugúmadin Wabúreme, lun jalíjanun gárada to joun sun wadújeñu lueígiñe Jesucrístu.

²⁸ Binílaün Wabúreme Jesucrístu. Ítaralá.

TIBÍAMAN **LIGÁRADAN PÁBLO JOUN** **TESALÓNICANA**

Labürüjan Páblo jáma líbirigu joun títana ligílisi to Tesalónicaboun

¹ Áu Páblo lúma Silváno láu Timotéo, wabürüjañoun gárada to jun, jugúya títana ligílisi to ubúruguboun Tesalónica ja lánigubaña Wáguchi Búngiu lúma Wabúreme Jesucrístu.

² Resíbi jumei abíniruni lúma darángilaü jámagiñe.

Lagúseragüdübaña Búngiu gafígountiña dánme liábin Crístu

³ Nidújeñu, teínqui wamúti Búngiu súnwandan juágu, queisi lúnti lan wadügüni, lugúndun laweíriduña jaffiñen sarágu, áni ínsiñeni le jídaanbei jubáruagua aweírideinatima líña súnwandan.

⁴ Adímurejatiwa buíti juágu tídan buri líligilisin Búngiu, luágu gurásu lúma afiñeni le jarúfudubei lídan sun eíbaajoúni lúma idíjeri buri le jasúfurirubei lueígiñe Crístu.

⁵ Arúfuda lumúti lubuídun jawándun luágu úaragua lan Búngiu lídan ligáburi lagúseragüÜn, láu lanügünün quei garíchatíña lun jebélurun lídoun larúeijan, le uágubei jasúfurira.

⁶ Ladüga giñe úaragua lan Búngiu, lachülürüba wéyu lun lasúfuriragüdüniña ja asúfuriragüdübalün,

⁷ lúma giñe lun líchugun eméraaguni jun, jugúya le asúfurirubei ítara quei wagía, lídaanme wéyu le lúnbei lachülaagun Wabúreme Jesúsú siéluigiñe lídan wátu geméti jáu lání ánjeligu ja gabáfubaña.

⁸ Liábinba lun labeíchuniña ja masúbudirunbalin Búngiu, madügün jagía gásu láu ugánu luáguti asálbaruni le wabíjibe lídaangiñe Wabúreme Jesúsú.

⁹ Agünrinchawagúni le magúmuchaditi, ligíaba jabeichúagüle, jabugúba díse luei laríjin Búngiu lúma luweírigun lúma lubáfu.

¹⁰ Dánme le liábin Crístu, larijúba luweírigun jádan lánigu, ábame laweíridun janígi sun ja afiñeñabaña luágu, áni jugúya, jádaanbadün gürígia jagía queisi afiñeedün lan luágu le waríñagubei jun luágu.

¹¹ Ligía lébubei súnwandan lan wayúmuragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmuruaguatiwa giñe lun Búngiu lun lagúnfulirun sun jayúmajan lun buídu lan jigáburi, láu lubáfu, lúma buri sun wadágimanu le jadügübei ladüga jaffiñen.

¹² Láu igáburi le, líchugúba uweíriguni lun líri Wabúreme Jesúsú lídan jibágari, ábame líchugún uweíriguni jun luágu lareidun Wabúngiute lúma Wabúreme Jesucrístu.

2

Le lúnbei lasúseredun lubáragiñe lagíribudun Jesucrístu ubouágun

¹ Guetóti, nidújeñu, libügürü liábin Wabúreme Jesucrístu, dánme liábin oúndaraguawa lúma,

² amúriajatiwa júma lun masáansirun jumáni ligáburi jarítangun ítara uménrengun, masústaran jugúyame luágu ní ában ugánu, o dímuírei buri le

uáguti laríñawagua luágu lúmagiñeti lan Búngiu, ni tuágu gárada to uáguboun jariñaga luágu wámagiñetu lan, to aríñaguboun luágu chülújali lan luwéyuri Wabúreme lun lagíribudun ubouágun.

³ Mígiraguáda jumá júngua lun jeyeedúniwa ítara. Lugúndun lubáragiñeme lachülürün wéyu ligía, njeinbei awúríbujani lúma Búngiu, lachülaaguba giñe lágani Cristu, le lunbei lagürrinchawagún.

⁴ Ligía láganibei Búngiu, liñúraguba lúngua luágu sun cátei le luáguti Búngiu, lachülürüba giñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵ ¿Marítangun jumútisan luágu aríñagañaja náni méja buri cátei le jun dán meja le anájeingua lan júma?

⁶ Subúdi jumúti giñe ída líña lán meja nadímurejan luágu ában ubáfu le lúnbei leréderuni liábin lágani Cristu lubáragiñe lidáani.

⁷ Luwádígimariña wuríbani guetó, arámudagu, áni lúnti lagídarúniwa le eréderubalin lágani Cristu ligía lubáragiñe gayára lan láfuridun lídoun larúgounga.

⁸ Ligíaba larijóuniwa, áni lagürrinchagubei Wabúreme Jesúsu ágani ligía láu ában dimúrei, lúma láu luweírigan le áubei liábin.

⁹ Ladügaba Máfia liábin lágani Cristu ligía, lachülürüba láu sarágu ubáfu, ladügüba buri miláguru yéeti lun layéedaguniña gürígia.

¹⁰ Layúsuruba sun luwúyeri wuríbani lun layéejaniña ja lídaanbaña üma lun gürínguaü, quei mája jabei lun jerésibiruni inárüni luáguti Cristu lun jasálbarun.

¹¹ Ligía líchugunbáliña Búngiu lídoun bulíeiguaü lun jeyeedúniwa lúma lun jafíñerun luágu iyéeni,

¹² lun jasiadirúniwa lun máfiougati sun ja májabaña jafíñerun luágu Cristu, jínsiñerügü ligía wuríbani joun.

Anúadajoútiña lun jasálbarun

¹³ Ánjein jugúya, wadújeñu jínsiñetiña lun Cristu, súnwandan teínqui wamúti Búngiu juágu lugúndun anúdaja lumútün lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma inárüni luágu wasálbarun lídaangiñe Jesucristu, le uágubei jafíñera.

¹⁴ Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírigan Wabúreme Jesucristu.

¹⁵ Ítara líña lubeíti nidújeñu, derégúdagu meme jumá, mabúlieidagun jugúyame luei buri arúfudajani le rúwamaalíbei jun láu dimúrei lúma táu gárada.

¹⁶ Wabúreme guánarügü Jesucristu lúma Wáguchi Búngiu, le arúfuda lálalíbei línsiñejabu woun láu lareidun,

¹⁷ ru ligía ámalijouni le magúmchaditi woun lúma ában eménigini buíti, rúla dügüdaguaü tun janígi, derégúdaguagüda laünme lun jariñaguni lúma lun jadügüni sun le buídubei.

3

Amúriajati Páblo jáma lun jayúmuragun lun Búngiu luágu

¹ Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resiwiwa ligiame láu ugúndani queísi lasúseredun jagánagua.

² Ayúmuragua jumá giñe lun gayára lan weséfurun jawei wügüriña wuríbatiña, lugúndun máma sun gürígia ubouágu afíñetiña luágu Cristu.

³ Ánjeinti Búngiu, gayáraati wafíñerun luágu, luágu lagúnfuliruba lan láu lerérun, lárügüdübadün derégüdagu, goúnigilaünme tueí lisáaran Máfia.

⁴ Jeménigitiwa luágu Wabúreme Búngiu luágu adúga jumáni le waríñagubei jun áni luágu jadúga mémebei lan.

⁵ Íderagualaün Búngiu lun jasándiruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádigimaridun

⁶ Nidújeñu, aríñagatina jun lídan líri Wabúreme Jesucrístu lun jadísedun lueí furúmiegurügü jídaangiñe le májati luwádigimaridun, le mabágaridunti úaragua lúma arúfudajani le jibíjubei wámagiñe.

⁷ Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua.

⁸ Meigin wamúti jeigin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebu, lun mámabadiwa lan ában ijürügu lun ni ában jídaangiñe.

⁹ Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni.

¹⁰ Dán meja le júma wamá, rúwamuti meja gumádi le jun. “Le májabei luwádigimaridun, meígalá.”

¹¹ Agáambatiwa luágu añájein lan jídaangiñe májatiña jawádigimaridun, jerédera madügünga ni cáta, eténira lun le moún lubei jeténirun lun.

¹² Waríñaguña joún buri gürígia jagía láu lugúmadin Wabúreme Jesucrístu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adúga buíti.

¹⁴ Ánjein ñi ában le madügünti gásu láu le waríñagubei tídan gárada to, aríja jumeí cátei lan, memétera jumá lúmoun, barü lámuga busíganu.

¹⁵ Manúga jumeí quei ágani, erérarügü jumá lun queísi idújei.

Lagúmujoún abíniruni

¹⁶ Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷ Áu Páblo, nabürüjañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan oúnajabarun gárada to.

¹⁸ Binílaün Wabúreme Jesucrístu sun jugúya. Ítaralá.

FURÚMIÑETU LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucrístu apóstolu áu, noúnajoún láu lugúmadin Búngiu le Wasálbaragüle lúma Wabúreme Jesucrístu, le uágubei weménigida lun webélurun siélun.

² Nabürüjañoun gárada to bun, Timotéo, niraü le tímatimaati lídan wafñien luágu Jesucrístu. Resíbibeí abíniruni, gudémejabu lúma darángiläü lúmagiñe Wáguchi Búngiu lúma lúmagiñe Jesucrístu le Wabúreme.

Ewéridijani lueí arúfudajani le maríchabei

³ Quei meja nayúmragun bun dán meja le nídinbei Macedónia, reídeimemebá ubúrugu Éfeso lun baríñagun joun itaga gürígia lun marúfudajan jamá cátei le maríchabei,

⁴ meténi jagíame lún buri úraga le magúmchaditi jawágu jenébaanfaangu binádu mútu. Cátei buri le, barürügüti sigénei le málati, ani míderagun lumútiña gürígia lun jesériwiduni Búngiu láu jafñierun luágu.

⁵ Le lúnbei barúfudajani joun afñietiña jagía, lun jínsiñegua jamá jámagua lugúndun jarúmaaru tan janígi, míchujali jarítagun dúru jawágu, áni buídujali jafñierun.

⁶ Añájein, adíreirutíña lueí buri cátei le, ába jíchaagun joúngua lídoun buri sigénei málati.

⁷ Buséntiña buri lun arúfudajatiña jamá lídan lúrudu le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabei luágu lúrudu ligía láu sarágu afñieni.

⁸ Subúdi wamúti luágu buídu lan lúrudu, yúsuwarúgaali ligía quei lubúdubun.

⁹ Lúnti lasúbudirúniwa luágu máma lan joun ja adügübalin le buídubei ladügüwa lúrudu, lúrudu joúnti ja wuríbabaña, ja magáambadibaña, ja mebéresenbaña láu Búngiu, ja gafígonbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña,

¹⁰ joun ja agámaridubaña mamárieidunga o ja agámaridubaña wügüríña jáledigu, joun ja íwerujabaña gürígia, joun ja yéebaña, jáma ja áfiñurubaña luágu iyéeni. Joúnti gíñe sun ja adügübaña ámu cátei múaradunti láu arúfudajani jarúmati.

¹¹ Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibeí gürígia, apúrichija.

Eteñgiruni luágu lugúdemejabu Búngiu

¹² Teíngui numúti Wabúreme Jesucrístu, le íchugubei ubáfu nun lun wadágimanu le, luágu lanügünina queísi ában wügüri derégüdagwati, lúma luágu líchugunina lun nesériwidun lun.

¹³ Adüga láali sun cátei lé buri nun láu sún meja anábagua náni, eíbaaja numútiña meja ja afálarubalin, adüga numúti meja sun le nuáraati lun nagúmchaguagüdüni jafñien. Ába gudéme nan lun Búngiu lugúndun mámagidina meja afñieti luágu Jesucrístu áni ibídiñeti meja nun ca lan nadügubei.

¹⁴ Ligía luweírinbei nasándiruni labínirunina Búngiu, úara lúma affíñeni lúma ínsiñejabuni le gíñe wawágubei luágu lídaañadiwa lan ában lúma Jesucrístu.

¹⁵ Inárüni cátei le, le tímatimaati, áni lúnti jafíñerun súngubei luágu inárüni lan. luágu “líabin lan Jesucrístu ubouágun lun lasálbaruniña gafígountiña”, áu furúmiñeti jádaangiñe.

¹⁶ Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gafígountiña. Ítara líña niábin lun ábanbadina lan jémpulu joun ja lúnbaña jafíñerun luágu, lun jabjini ibágarí magúmuchaditi.

¹⁷ ¡Ligía rúwama lubei uweíríguni lúma inébesei lun Búngiu le Warúeitebei lun sun dan, súnwandan, le moúwedadíbei, siñá ligía larijiniwa, le Búngiu le ábanrügüti, le sábiu! Ítaralá.

¹⁸ Timotéo, niraü, rúnumuti gumádi le bun lun bageíndaguni luwúribun Búngiu buídu, quei meja laríñaguni Búngiu jayúmulugugiñe wadújeñu lueígiñe Jesucrístu bun, ragúñubei inárüni lánina asálbaruni, adúgeina le basúbudirubei lun richá lan.

¹⁹ Añájein gürígia, féridi jamúti jafíñen ladúga madügün jamá gásu láu le jasúbudirubei luágu richá lan.

²⁰ Ítara líña lasúseredun lun Himenéo lúma Alejandro ja nedéregerebaña lun Máfia lun jafúnrendeirun lun manábagun jamáni Búngiu.

2

Arúfudajani libügürü ayúmuraguni lun Búngiu

¹ Furúmiñeti cátei, amúriajatina lun ladügüniwa ayúmuraguni lun Búngiu jawágu sun gürígia.

² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágarí darángilati, le derégewati lun Búngiu, le gíñe inébewati lídan sun luwúyeri.

³ Buíti cátei le, gúndaati gíñe Búngiu le Wasálbaragüle láu,

⁴ le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun.

⁵ Ában rügüñein Búngiu, ában rügüñein gíñe gayára ladímurejan waweígiñe ligíbugiñe Búngiu, wügüri le Jesucristubei.

⁶ Derégeguati Jesucrístu lúnga lun louñwen lun lafáyeiruni lebégi jasálbarun sun gürígia, ában lasúbudirawagüdüni cátei le lídan lidáani.

⁷ Lun cátei le, louñajana Búngiu lun narúfudajan joun ja mámabaña jurú libügürü inárüni le, lun gayára lan jafíñerun luágu Crístu queísi Jasálbaragüle. Áu, queísi ában affíñeti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmuragun wügüriña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu.

⁹ Manárimelá tuwéndegun jadáüragun würiña, lun máma lan láu amúriguni janárimeguti jaráanseragua jóungua, ni láu gólu, pérlas, o daüguaü séruburitu,

¹⁰ lun láu lan lubuídun igáburi jadáuragua jóungua quei lúnti lan jadügün würiña ja derégeguañabaña jóungua lun Búngiu.

¹¹ Lúnti maní jamá würiña dan le larúfudajoúniwa joun, lúnti jerésibiruni arúfudajani ligía láu ában ünabuni.

12 Májatina lun tarúfudajan würi lídan jadámurin affiñetiña, ni lun tagúmadiruni würi wügüri, lúnti teréderun maníñu.

13 Lugúndun Adán ladügübei Búngiu furúmiñe, lárigiñe, ladügoun Éva.

14 Máma giñe Adán leyéedubei Máfia, würi ayeedúaboun, áni láu tayeedúniwa, ába táburujan lídoun figou.

15 Láu sun líra, jasálbaruba würiña láu jagúnfulirun láu le lúnbei jagúnfuliruni queísi úguchuru, ánjein ítara méme jafiñerun luágu Crístu, arúfuda jagía ísiñejabuni lúma arúmani láu igáburi buiti.

3

Ligáburi ída lúba lan jóuserun fádorigu

1 Inárüni cátei le. Ánjein abúseera ában gürigia lun fádiribe lan, ában wadágimanu buíti labúseerúbei ladügün.

2 Lun fádiribe lan ában gürigia, lúnti labágaridun ában íbágarí le míchuti lúgaaru lun ladeinjouñiwa lun. Lúnti túmari lan ábanrügü würi, lúnti giñe lanügün ában íbágarí sériuti, buíti lichügü, inébeba. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan,

3 moún lumuti gátadi lan, manígi wuríbu, mabúseerun ligíame seínsu le marúmaanti lagáñeiruñiwa. Lubáragiñe líra, lúnti areída lan, dilí ligíame, manígi ligíame seínsu.

4 Lúnti gayára láníña tílana lúban agúmadira buídu, lun giñe ladügün lun gagáambadi jamá lirájüñü, inébejabu.

5 Lugúndun ánjein magúmadirun lubáliña wügüri tílana lúban, çída lubági gayára lan laríjin jáu tílana lilígilisin Búngiu?

6 Moún lumuti lubeíti fádiri lan ában iséri affiñeruti lueí lanáangun lúngua sarágu luágu lubára, ábame lábaturujan lábugiñoun íñarawaguni le gádaanbalin Máfia.

7 Lúnti buídu lan ligáburi, lúnti giñe inébe lan joun ja mafiñebaña lueí ladímurejoún wuríba luágu, ábame lábaturujan tídoun lisá daran Máfia lun lagünrinchawagúniwa lubuídun líri.

Ligáburi ída lúba lan jóuserun ja esériwidubaña ligílisirugu

8 Ja giñe esériwidubaña ligílisirugu lúnti wügüriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun.

9 Lúnti jarúgüdüni inárüni lánina affiñeni le arúfuda lálalibe Búngiu woun, buídu, lun giñe jarúma tan janígi.

10 Lúnti jouchún, lárigiñeme, ánjein úa lubeí mégeiti luágu lubuídun jagáburi, ligíaba gayára lan jesériwidun ligílisirugu.

11 Würiña ja esériwidubaña ligílisirugu, lúnti giñe inébeba jamá, moún lumuti marásualugu jamá, lúnti sériu jamá, derégüda lídan sun cátei.

12 Ában esériwiduti ligílisirugu, lúnti túmari lan ábanrügü würi, lúnti giñe lagúmadiruniña lirájüñü buídu jáu sun tílana lúban.

13 Lugúndun esériwidutiña ligílisirugu ja adügübalin jawádigimari buídu, buídubei ladímurejoñiwa jawágu, áni ragútimaatiña anígi lun jadímurejan luágu jafiñen luágu Jesucrístu.

14 Agúrabatina nídin aríjbu madíse,

15 nabürüjani buri cátei le bun lun ánjana lan adárasaragua, lun subúdi báni ída líña lan lun louserun gürigia jádan lufámilian Búngiu, to lilígilisinboun Búngiu

le wínwanbei lun sun dan. Lilígilisin Búngiu ágüdajabalin linárün, toúnightei inárüni ligía buídu.

¹⁶ Siñáti lasigenerúniwa luágu weírigu lan Wasálbaragüle Jesucrístu, le subúdigüda láalibeí woun.

Arúfudaguati Búngiu lúngua queísi gürígia lídan Jesucrístu, arúfudaleí Sífiri Sándu luágu úaragua lan Jesucrístu.

Aríja jameí ánjeligu.

Apúrichijouáti luágu joun lílana sun fulásu,

afiñewa luágu lídan sun fulásu,

resíbiwa ligía siélu.

4

Ja lúnbaña jígiruni jafiñen

¹ Furánguti lariñaguni Sífiri Sándu luágu lídoun lánme lagúmujouñ dan, añájeinbaña lan gürígia ígiruti jafiñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu.

² Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu sùti.

³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eígini moún lumuti leigín, láu sun ladüga lan Búngiu eígini buri ligía lun jeígini ja afiñebaña jáma ja subúdibalin inárüni, láu ateíngiruni lun Búngiu luágu.

⁴ Sun cátei le ladügübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adüga láalibeí, teínqui wameíme luágu.

⁵ Lugúndun láu wamúriajan lúma Búngiu lun labíniruni sun weígin, ñübinti lun labuídurun láu lerérun, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágüdajouba buwáni láu buri dimúrei le lánina wafiñen, lúma arúfudajani buíti le falábaalibeí.

⁷ Meféridirabeí bidáani asígeneja luágu buri libídiegun úraga le ni cáta ti ligíbugiñe Búngiu, lubáragiñe líra, áfaaguabá lun bagúnfulirun lúma Búngiu.

⁸ Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu, lugúndun barúti cátei buíti woun lídan ibágari le lúma lídan ibágari le lúnbei wabíjini.

⁹ Inárüni cátei le, áni lúnti jafiñerun súngubeí luágu.

¹⁰ Ligía lébubeí wawádigimaridun, súfuri wagía anabúni, lugúndun rúwamaali lan weménigi luágu Búngiu le wínwanbei, le aráansejaalibeí asálbaruni joun sun gürígia, áni ja afiñebaña luágu, jerésibirubeí asálbaruni ligía.

¹¹ Ligía buri cátei lúnbei barúfudajani lun jagúnfulirun gürígia láu.

¹² Sériulá bigáburi lun manügüniwa ban quei ni cáta lueígiñe ññraügídibu lan, lubáragiñe líra, lúnti ában ban jémpulu buíti joun ja afiñebaña, lídan ligáburi badímurejan lúma boúserun, lídan ínsiñejabuni, lídan bafiñen luágu Búngiu, lúma lídan larúma bibágari.

¹³ Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachülürün.

14 Yúsubei ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

15 Deréeguabá búngua lún buri cátei le, lun gayára lan larijiniwa bawáanserun lídan cátei láni Búngiu.

16 Góuniguabá búngua, lúma láu le barúfudajabei, ítaramemebá derégüdagu lídan sun cátei. Ánjein badúga ítara, basálbaruba, sálba jagíame giñe ja agáambubalibu.

5

Ída lúba lan ligáburu louserun Timotéo jáma afñetiña

1 Madeínjabá lun ában weíriei mútu, lubáragiñe líra, adímurejabá lun camá jamuga lun búguchi, oúsera báñame wügüríña ñübürigiña queísi bamúlenu.

2 Oúsera báña weíyaaña würíña quei bouserunun búguchu, oúsera báñame würíña irájüñü quei bítunu, láu lubuidun aritaguni.

3 Íderagua báña würíña ja jiláañabaña úmari, ja arijúabei luágu mégei jamá iderúni.

4 Ánjein garájüñü tubei ában würi to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámiliana lúma lun jáguyugüdüni ínsiñejabuni le jadúweirubei joun jagübürigu, lugúndun buíti cátei le, gúndaati giñe Búngiu láu.

5 Würi to jiláali túmari, to eréderuboun tábugua le tímatimaati, rútumuti teménigi luágu Búngiu, merédeti giñe tayúmuragun lun Búngiu áriebu, wéyuagu.

6 Ánjounti to edéregeraguboun túngua lun ugúndani lánina uboué le, jiláñu tíña lun cátei lánina Búngiu láu sun winwangiru lan.

7 Aríñagabei buri giñe cátei le joun, úa lámuga ni cáta lun ladeinjoún joun luágu.

8 Le marítagunti jawágu lánigu, játima lidújeñu, magúnfulinjali lúma laffñen, wuribatimáatiti sügü láu ában gürígia le maffñeti.

9 Lun labürüdüniwa tíri würi to jiláalibei túmari tídan gárada lánina íderawagúni, to rügúboun njeinjali lúmagiñe ürúwa-wein irúmu táu, lun giñe ábanrügügilí lán meja túmari.

10 Lúnti tasúbudirúniwa luágu buíti le tadügübei quei buri jamúga ánjein meja agüríaja tubáliña tirájüñü buidu, ánjein buidu lubei touserun jáma ja achülürübaña túbiñe, ánjein seriwi tubáliña idújeñu lueigiñe Cristu manáangunga túngua, ánjein íderagua tubáliña ja asúfurirubaña, o ánjein adúga tubei furúmieguarügü ámu cátei buíti.

11 Würíña ja jiláaña úmari ja ñübürigiña, mabürüdabei jíri tídan gárada, lugúndun lachülürüba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamárieidun.

12 Ábameti jadímurejan gürígia jawágu ladúga jadúraaguni jadáradun lúma Búngiu le lánina jesériwidun lúnrügü súnwandan.

13 Ába jayábin lun jamáguualigudun, mámarügü jamáguualigudun, ába giñe marásualugu jamá, eméteja lídun sun cátei, adímureja cátei le moún lumuti.

14 Ligía nabúseerúnbeí lun jamárieidunya ja ñübürigiñabaña, lun garájüñü jamá, lun jóunigirunun jában, lun míchugun jamá lúgaaru joun ja maffñebaña lun jadímurejan wuríba jawágu.

15 Añájein würíña, ígira jamáali Búngiu, ába jafálaruni Máfia.

¹⁶ Ánjein añájein jabeí würiña ja jiláalibei jámari jádan lufámilian ában affiñeti würi o wügüri, lúnti líderaguniña, mígirun ligiame lun ában jamá ijürügu tun ligilisi, itara lúba gayára lan jíderaguniña tilana liglisi würiña ja busénbaña jíderawagún.

¹⁷ Fádirigu ja lábugiñeñounboun jaríaajan ligilisi, ja adügübalin jawádigimari buídu, lúnti inébewa jamá sarágu, játima gaffisiutebalin apúrichijani lúma arúfudajani.

¹⁸ Taríñajare Lerérun Búngiu. “Magüragua jumeí liyúma jilügün bágasu le lánina wadágimanu lueí lásiñerun leigin lídaangiñe tubúñe fulúwaaaru le uágubei ladügüragua lun lagídaruni túra.” Aríñagatu giñe. “Garíchatí ñadágimeinti lun libíjin lafáyeiruaja.”

¹⁹ Madügabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidúnrun.

²⁰ Anjaña ja asígirubaña lídan figou, lúnti badeínjan joun jagíbugiñe sun affiñetiña lun janúfudedun súngubei lueí jafígounjan.

²¹ Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janügüniwa sun gürígia.

²² Míchigabádügabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidá ní ában queísi fádiri tídan liglisi lídan loufudagun, lúnti batúriajani ligáburí buídu lueidügü gaffígoun lan, larijwameti camá gúndaatibu láu lifígoun. Dísebá lueí sun le wuríbabei.

²³ Queí súnwandan lan gári lan burágeirugu, mátabá dúnarügü, gurába giñe murúsun diweín.

²⁴ Lídan le báluajaniña wügüriña lun jesériwiduni Búngiu ligilisirugu, jarítaguabá luágu añájein lan gürígia arijúati jafígoun furáangu lubáragiñe jagúserun, añájein giñe, marijinti jafígoun dari lárigiñe.

²⁵ Ítara méme líña giñe, cátei buíti le jadügübei gürígia, arijúati furáangu, áni íbini marijín lan, siñáti leréderun arámudagu lun sun dan.

6

¹ Affiñetiña ja músubaña, lúnti weíri lan jinében jayúbudirigu joun, lun madímurejóun lan wuríba luágu líri Búngiu, ní luágu cátei le warúfudajabei.

² Ánjein añájein lubeí esériwidutiña gayúbudiritiña affiñetiña, mouñ lumuñti lougua lan jinében joun ladügarügü jadújeñu jamá lueígiñe Crístu. Lubáragiñe líra, lúnti jesériwiduniña buídutima, lugúndun ja erésibirubalin lubuídun jesériwidun, affiñetiña, idújeñu giñe jínsiñegutiña. Arúfudajabei cátei le, apúrichijabeíme.

Arúfudajani maríchatí lúma irísini inárüñiti

³ Ánjein arúfudaja ában gürígia cátei maríchatí áni múaraanti lúma larúma arúfudajani le láni Wabúreme Jesucrístu le íderagubaliwa agúnfulira lúma Búngiu,

⁴ ában barügua túngua gürígia ligía, le íbídiñeti ní cáta lun. Ganígiti lasígenejan luágu buri dímuerei, lídaangiñeti asígenejani le liábin buri gimúgaü, gáñiguaü, anábajani, mafiñeni joun gürígia,

⁵ lúma buri wuríbu magúmuchaditi. Jíbiri gürígia ja, wuríbati jasáminan, íbídiñejabutiña lun inárüni, jarítaguatiña luágu lébuna lan lagáñeirun irisini agúnfuliruni lúma Búngiu. Dísebá jaweí gürígia ja itarabaña.

⁶ Inárüni luágu ában lan óunwenbun irísini agúnfuliruni lúma Búngiu lun le gufúrumabei láu le lúmabei.

⁷ Manügúntiwa ni cáta wámagua ñájoun uboúagun, siñábei gñe wanügün ni cáta yágiñe,

⁸ ánjein geigin wabei, ganáangun, lúnti gufúruma wamá láu líra.

⁹ Ánjaña ja busénbaña jarísidun, mawándun jamúti óuchawagúni, ába jáburujan tídoun lisádaraana sarágu lagúburi ayúmajani le málati, le ásiñeragüdúbei güriquia jebélurun siélun, ába jóudin máfiougatin.

¹⁰ Línsiñegu seínsu ligía lílagülebei sun luwúyeri wuríbani, áni añájein sarágu güriquia ladüga jóuchun jabjjin seínsu, ába jigiruni jafñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le lání afñeni

¹¹ Ánjabuti amürü, Timotéo, queísi ában ban wügüri derégeñuti lun Búngiu, anúrjabá lueí buri cátei le. Barüba ában ibágari le lánina ísuruni, le lánina gúnfuli lúma Búngiu, le lánina afñeni, le lánina ínsiñeni, le lánina gagúraasuni lúma areíduni.

¹² Afaaguabá buídu luágu lání wafñen fuleísei, ábame bagáñeiruni ibágari le magúmchaditi, lun líra lagúara Búngiu bun dán meja le barúfudunbalin jagíbugiñe sarágu güriquia luágu aráanseñu bíña lan lun bafálaruni Crístu.

¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gñe geféenbei luágu le inárünibeí ligíbugiñe Piláto,

¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjóua bun, darí liábin Wabúreme Jesucrístu.

¹⁵ Dánme lachülürün dan ligía, le lanúadajabei Búngiu, lagíribuduba Crístu uboúagun, Búngiu rügüñein weírigu, Súnti Gabáfu, Jarúeite urúeigu, Jabúreme abúremeinigu.

¹⁶ Ligía rügüñein móuwedadi, le abágaridubei lídan larúgounga le ñjjin lubeí mayárafadun lan ni ában. Maríjin lágili ni ában güriquia Búngiu, siñáti gñe larijiniwa. ;Rúalá uweírighuni lun, arúfudualá lubáfu lun sun dan! Ítaralá.

¹⁷ Ja gámabaña irísini lánina uboú le, aríñagabá joun lun manáangun jamá jóungua luágu, míchugun jameíme jeménigi luágu irísini ligía, lugúndun machoúrunti, lun jíchuguni jeménigi luágu Búngiu, le wínwanbei, áni rúleí sun cátei woun gíbe lun wagúndaarun luágu.

¹⁸ Aríñagabá joun lun jadügüni le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun jafánreinruni le jámabei.

¹⁹ Ítara lúba jóundaragun irísini jóungua siélu le adúrurubei lun sun dan, ítara lúba jabjijini ibágari tímatimaati le magúmchaditi.

Lagúmujóun dimúrei lun Timotéo tídan gárada to

²⁰ Timotéo, toúnigibeí le íchugúbei lábugiñe baríaajan. Magáambabá dimúrei buri le lánina lisúbudin uboú, ni sigénei le lánina cátei le giridügúbei subúdi,

²¹ añájein jádaangiñe ja afálarubalin luwúyeri subúdi le, ígira jamáali jafñen.

Bini lábu Búngiu. Ítaralá.

TIBÍAMAN LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucrístu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucrístu.

² Nabürüjañoun gárada to bun, Timotéo le nanügubei queísi niraü le jínsiñebei nun, resibibá abíniruni, gudémejabu, lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Adímurejani luágu Crístu

³ Dan le nayúmuragun lun Búngiu buágu ságü nayúmuragun áriebu lúma wéyuagu, teínqui numúti Búngiu le únbei nesériwida láu tarúma nanígi quei jadügüni binádu nagübürigu.

⁴ Súnwandan narítagan luágu bayájun dán meja le nígirunibu, buséntina jamúga naríjinibu lun nabuínchun láu ugúndani.

⁵ Jarítaguatina luágu afíñeni inárüniti le buágubei, Lóida to bagütü, túma Euníce to búguchu, jagía meja gawágubalin afíñeni le furúmiñe, áni choúru numúti luágu níjein lan gíñe buágu.

⁶ Ligía naríñaganbei bun lun bayúsuruní méme ubáfu le líchugubei Búngiu bun dán meja le níchugunbalin nújabu bábulugu.

⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadügüni furúmieguarügü cátei, ínsiñeni, lúma ubáfu lun wasáminarun buídu líchugubei woun.

⁸ Mabúsigaribá lubeíti lun bapúrichijani le larúfudajabei Crístu, mabúsigaribá gíñe náu, áu le adaürübei lueígiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawáunduni.

⁹ Sálba lumútiwa Búngiu, wa ligía woun lun wanügün ában ibágari le derégewati lun, máma jamúga lueígiñe níjein lan cátei buíti wadüga, ladüga ítara líña lan laráanseruni lubáragiñe ladügüni uboú lun larúfuduni lareídun lúma línsiñejabun woun lídaangiñe Jesucrístu.

¹⁰ Guetó larúfudei ínsiñeni le láu loúnajani Jesucrístu le Wasálbaragüle lun lagúnrinchaguni lubáfu oúweni, ru ligía ubáfu woun lun wibíjini ibágari magúmuchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, oúnaja lána quei apóstolu lun narúfudajan joun ja mámabaña juríu.

¹² Ligía nasúfurirunbalin sun cátei le. Láu sun líra, úati nibúsigari nan, lugúndun subúdiiti nun ca lan uágu níhigei naffíñen, áni choúru numúti luágu gabáfu lan lun loúnigiruni le líchugubei lábugiñe naríajaan daríme lachülürün wéyu ligía lun lagíribudun Crístu uboúagün.

¹³ Mígirabeí luwúyeri arúfudajani jarúmati le níchugubei bun, abágaridabá láu bafíñen luágu Crístu, arúfudeina ínsiñeni joun súnugubei ladüga lídaañadiwa ában lúma Jesucrístu.

¹⁴ Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun baríajaan lun madarúniwa lan iyéeni lídoun.

¹⁵ Queísi basúbudiruni, ígira jamáadina sun affiñetiña Ásiana nábugua, níjein Figélo jádan, lúma Hermógenes.

¹⁶ Gudémejabulá Búngiu joun lufámilian Onesíforo, lugúndun barújeiti gurásu nun sarágu weíyaasu, úati gíñe nibúsigari lan láu nadaürüña lan,

¹⁷ lubáragiñe líra, dan le liábinbei ubúругu Róma, merédeti láluajanina dari ladárirunina.

¹⁸ Dari lámugei lugúdemejabu Búngiu lídaanme wéyu ligía le lagríbudagüle Wabúreme Crístu ubouágun. Subúsiti gíñe bun buídu ída líña lan líderaguniwa ubúругu Éfeso.

2

Ában lisúdaaran Jesucrístu buíti

¹ Ánjeinti amürü, niraü, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu.

² Le cátei lánina wafiñen le agáamba báalibeí nariñagun jagíbugiñe sarágu gefeéntiña arúfudajabeí joun wügüríña ja affiñewati jawágu, ja gayáarati jarúfudajani joun ámu.

³ Awándabeí lubeíti súfuri quei ában lisúdaaran Jesucrístu buíti.

⁴ Úati súdeara le esériwiduti ádaraguti lúngua lídoun ámu cátei lueí le lánina súdeara, lugúndun gásu leréderun dayáругu lábugiñe lerénjan lugúmandan.

⁵ Ítara líña gíñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu.

⁶ Le ábunagubei, garíchati lun ligía lan furúmiñe íbíjei lufánran lídaangiñe alúbajani.

⁷ Samínabá luágu ürüwa jémpulu le, ábame gunfaráandagüda láni Wabúreme súngubei bun.

⁸ Jarítaguabá luágu Jesucrístu. ligía ában gürígia wáledi, jádan linébaanfaangu urúei David, áni sarágüda lumúti Búngiu lídaangiñe ouweni.

⁹ Niján ugánu le lánina asálbaruni le napúrichijabeí, áni lueígiñe napúrichijani, awándatina asúfuriruni dari lun nagürawagún láu güríngüri camá ában gürígia wuríbati áu. Siñáti leréderúniwa labúruchagun láni Búngiu ugánu,

¹⁰ ligía nawándunbalin sun cátei, luágu jáni ja anúadaja láñabaña Búngiu fuleísei, lun gíñe jayábin lun jabíjini asálbaruni lúma uweíríguni magúmuchaditi siélu ladüga lídan jamá ában lúma Jesucrístu.

¹¹ Inárüni cátei le.

Ánjein jláadiwa lubeí lúma Crístu, wabágariduba gíñe lúma,

¹² ánjawa awánda súfuri lueígiñe, gafánraanbadiwa lídan larúejan.

¹³ Ánjawa múaran, ligía úaramemebei, lugúndun ítara líña ligáburí Búngiu.

Ában ñadágimeinti buíti

¹⁴ Jarítaguagüdebeí cátei le joun ja affiñebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuídun buríti sigénei le lun ni cáta, añáwuríjarügü lumútiña ja agáambajabaña.

¹⁵ Jouchabeí sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurubalin ugánu lánina inárüni quei lubúdubu.

¹⁶ Dísebá lueí dimúrei buri málati le lánina ubou le, lugúndun ja adímurejabaña ítara, jóúdimamaña lídoun wuríbani,

¹⁷ ábame labúrchagun jarúfudajan quei cánser. Niján le susébebe lun Himenéó lúma Filéto,

¹⁸ ígira jamáali inárüni, jariñaga luágu sügüjali lan lidáani ásaaruni lídaangiñe ouweni, jagünrinchaguñeiti jafiñen sarágu güriúa ítara.

¹⁹ Wagía afiñetiña, wagía lilígilisin Búngiu láu ébuu derégüdati le rúlaalíbe Búngiu, siñáti lánjingichúniwa. Búrúwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadisedun luei wuríbani.”

²⁰ Tídan ában múna weírítu, máma rügüñein umégeni gólu o pláta ñi, níjein giñe le láuti fuláansu lúma láuti múa, níjein lúnti luweírín-ágei ayúsuruni, níjein lúnti furúmieguaügü yúsu.

²¹ Lun lúnti lan ában ayúsuruni weíríguti ában güriúa le deréguati lúngua lun Búngiu, ju ligía lun, lúnti jarúma lan libágari, díse ligía luei sun le wíyebei, ítara lúba ju lan lun furúmieguaügü wadágimanu buíti.

²² Anúrjabá lubeíti luei jayúmajan wügüriña ñübürigiña, barüba ában ibágari le lánina ísuruni, afiñeni, ínsiñejabuni, lúma darángilaü, úara jáma sun ja agúarubalin Wabúreme Crístu táu anígi jarúmatu lun líderaguniña.

²³ Madügabá gásu láu sigénei málati, subúdi báali luágu barü lan líra wuríbu.

²⁴ Moún lumuti gádan láni wuríbu ában esériwiduti lun Crístu, lubáragiñe líra, lúnti buídu lan jáma sun güriúa.

²⁵ Lúnti ában lan arúfudajati buíti ligía, lúnti gagúraasun lan jáma ja múradúntiña lúma, lúnti larúfuduni joun táu anígi únabugutu luágu marícha jamá, ladúga gayára lan lasáansiruni Búngiu ligáburi jasáminarun lun gayáraabei lan jánjarun lun le inárünibe.

²⁶ Gayáraati jadáriragun jóungua lun jeséfurun tídaangiñe sádara to gádaanbaliña lurúma Máfia lun ladügüni labúseerun jáu.

3

Ída jába lan güriúa lídoun búrime lagúmujoún wéyu

¹ Lúnti giñe basúbudiruni luágu liábin buríba lan wéyu jénreenguti lídounme lagúmujoún dan.

² Jóungua rügübei buri güriúa jabúseera buíti, jínsiñe seínsu joun, pánta jagía, barúgua jóungua. Jadímurejaba wuríba luágu Búngiu, magáambun jabáña jagübüri, meteíngiradibaña, minébeme cátei lánina Búngiu joun.

³ Mínsiñejabubaña joun jarájüñü, magúdemejabu, marásualugubaña, siñábei jarügüdagun jóungua, janárimebaña, láganibaña sun le buídubei.

⁴ Jalúgurubaña jamádagu, jadügüba buri cátei mabuídunti mebéresenga jagía cába lan asúsereda lárigiñe, janárimebebei janáangun jóungua, jáluajabei jagúndan guánarügü lubáragiñe jamúga jáluajani Búngiu.

⁵ Jafámuruba camá gúnfulitiña lúma Búngiu áni larijúba luágu iyéeni lan láu ligáburi jabágaridun.

Meméterabá jámoun jíbe güriúa ja.

⁶ Jádan buri güriúa ja, añájein já buri ebélurubaña jábiñoun mútu ayéedaña wúrífia ja débilitiña, já buri buínbaña láu figou lúma láu sun luwúyeri ayúmajani.

⁷ Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni.

⁸ Ítara quei jawügürjoun Jánes lúma Jámbres, ja gabíñarajadibaña, lun Moisés, ítara líña giñe jawügürjoun wügüríña ja lun inárüni. Wügüríña buri ja, wuríbati jasáminan, garábaguaaña luágun wafiñen.

⁹ Mawáanserunbaña sarágu, ladüga geféenbei sun ubou luágu ibídiougua lan jáu, quei lasúseredun joun bián jagüra ja awügürjoiubaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰ Ánjein amürü, falábaali narúfudajan buídu lúma ligáburí nagáburidun.

¹¹ Subúdi báali narítangun lúma nafiñen, aríja báali nugúraasun lúma nísifejabu, lúma ída líña lan nawánduni eibaajoüni lúma súfuri lúma líbiri lénreengun le nasúfurirubei lídan buri fulásu quei buri ubúругu Antioquía, Icónio lúma Lístra. Subúsi giñe bun ída líña lan leséfurunina Wabúreme Búngiu lídaangiñe buri sun cátei le.

¹² Inárüni luágu jeibaajoüba lan sun ja busénbaña jabágaridun derégeguañu joúngua lun Jesucrístu.

¹³ Ánjaña ja wuríbabaña jáma ja gayéejadibaña, jaríbadatimaaba, ítara mémejaba ayéeja lúma ayeedúa.

¹⁴ Ánjein amürü, ítaramemebá derégüdagu lídan le bafúnrendeirubei, le uágubei afíñeedibu lan. Subúdi bumúti luágu inárüni lan le bafúnrendeirubei ladüga gayára lan bafiñerun jawágu ja arúfudajabalin bun.

¹⁵ Subúdi bumúti Lerérun Búngiu lúmagiñe ñúraügídi bu. Tídan Lerérun Búngiu, ladárirúa sun lichú áu le busénwabei lun gayára lan jasálbarun güri-gia, láu jafiñerun luágu Jesucrístu.

¹⁶ Sun le bürüwañubei tídan Lerérun Búngiu, Búngiu guánarügü íchugubalin jarítangunrugun wügüríña lun jabürüdüni. Jútu líburu tugúya lun tarúfuduni le inárünibeí lúma giñe lun tarúfuduni le maríchabei, adügatu lun jígiruni güri-gia cátei le mabuídunbei luágu le buídubei, arúfudajatu joun güri-gia lun jabágaridun surúñu.

¹⁷ Líburu tugúya, jemégenboun güri-gia ja esériwidubaña lun Búngiu lun jadügüni sun luwúyeri wadágimanu le lúnbei jadügüni lun.

4

¹ Ligíbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wínwangiña jáma jiláguaaña, nariñaguña bun lun bapúrichijani Lerérun Búngiu,

² aráanseñubá lun bapúrichijani, busén jagía güri-gia jagáambuni, mabúseerun. Afíñegüda báña, adeínjabá, eréra amürüme, arúfudajabá joun láu gurásu.

³ Lugúndun lachülürüba dan dánme le mawándun jamáni güri-gia arúfudajani jarúmati, lubáragiñeme líra, jáluajabei arúfudajani le gúnfulibeí lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerübei jagáambun joun.

⁴ Jíchugubei janágan luágun inárüni, ábame jadügün gásu láu sun luwúyeri úraga.

⁵ Ánjein amürü, buídulá bisáminan súnwandan, awándabei asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwádigimari.

⁶ Áu, sandíguatina núngua luágu nadügüñein lan lagúmujoún le nuáraati lun Búngiu, yaráfali lórate nouñwen.

⁷ Ageíndagua náali luwúribun Crístu buídu, eíbaguaadina chülüt lúmoun lébeja, adüga náali sun le rúlaalíbei Búngiu nun lun nadügüni, areída náali arúfudajani le lánina wafíñen jarúmañu.

⁸ Guetó, lagúrabuñadina nafáyeiruaja le lebégi ában íbágari le lánina ísuruni, afáyeiruajaü le lúnbei líchuguni Nabúreme nun, le agúseragüdüti le úaraguabei, lídaanme wéyu ligía. Áni mámarügüba nun líchigei afáyeiruajaü ligía, líchugubei giñe joun sun ja agúrabajabaalin liábin láu ínsiñejabuni lun.

⁹ Jouchabá biábin aríjana furése.

¹⁰ Ígira láadina Démas, jínsiñetimaati cátei le lánina ubouú le lun, ñüdünjati ubúrugun Tesalónica. Ñüdünja Crescénate louúbawagun Galácia, ñüdün Títo louúbawagun Dalmácia.

¹¹ Lúcas rügüñein núma ya. Áluajabei Márcos, banügeime búmagua, gayáraabei líderagunina lídan wadágimanu.

¹² Oúnaja nan Tíquico ubúrugun Éfeso.

¹³ Dánme biábin, banügonme cápa to nígiruboun lúbiñe Cárpo yágüta Tróas nun, barúbounme giñe buri líburu, nigáradan burítima.

¹⁴ Adügaali Alejádro, le ñadágimeinbei gürábu, sarágu wuríbani nun, lafáyeirubei Búngiu quei ligáburi cátei le ladügübei.

¹⁵ Touñigiguabá búngua lueí, lugúndun garábaguaali luágun ugánu le wapúrichijabei.

¹⁶ Dan le furúmiñeti nadímurejan nueígiñegua ligíbugiñe lúrudu, úati ni ában íderagutina, ígira jamútina súnugubei. Agúrabatina lun mabájüdüñ láni Búngiu cátei le joun.

¹⁷ Láu sun líra, íderagua lumútina Wabúreme Jesucrístu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagüdanef joun sun gürígia ja mámbaña juríu. Ítara líña leséfurunina Nabúreme lueí yebe ouweni,

¹⁸ áni leséfurubadina lueí sun wuríbani, areída láname lubá larúeijan siélu. ¡Rúalá uweírighuni lun súnwandan! Ítaralá.

Lagúmujuún buri mábugaü lúma abíniruni

¹⁹ Mábugaü tun Prísca lúma lun Aquíla lúma joun lufámilian Onesíforo.

²⁰ Reídeija Erásto ubúrugun Corínto, ígira numúti Trófimo láu sándi Miléto.

²¹ Jouchabá biábin lubáragiñe laríbougadun. Mábuga líña Eubúlo bun, Pudénte, Líno, Cláudia jáma sun wadújeñu lueígiñe Jesucrístu.

²² Búma lámuga Wabúreme Jesucrístu, biní laúnme Búngiu sun jugúya ja alíjibarun gárada to. Ítaralá.

LIGÁRADAN PÁBLO LUN TÍTO

Labürüjan Páblo lun Títo

1 Áu Páblo, le abürüjabarun gárada to, ában esériwiduti lun Búngiu áu, ában giñe láni Jesucrístu apóstolu. Oúnaja lumútina lúntima nichugun dűgűdaguaű lun jafiñen ja anúadaja láñabaña Búngiu quei lánigu, lun giñe gayáraabei lan jasűbudiruni inárűni lánina wafiñen, gayára lámuga jabágaridun ában ibágari derégewati lun.

2 Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayéjanbei, aríñaga lumúti luágu lichugubei lan ibágari magűmuchaditi le woun lűmagiñe lubáragiñe ladűgűni ubou.

3 Guetóti, queisi chűlűjali lan dan, subűdigűda láali ugánu lánina asálbaruni woun, ábati loúnajanina Búngiu le Wasálbaragűle, lun napűrichijani ugánu ligía.

4 Nabürűjañoun gárada to bun, Títo, le nanűgűbei queisi niraű le timatimaati, lídán ában wafiñerun luágu Crístu. Ayűmajatina lun bibűjin abíniruni lúma darángilaű lűmagiñe Wáguchi Búngiu, lúma lűmagiñe Wabűreme Jesucrístu le Wasálbaragűle.

Luwádigimari Títo luágu ubouju Créta

5 Lébubei nígirunibu luágu ubouju le gírubei Créta, lun baráanseruni le mégeigilibei lun laráanserűn, lúma lun bíchugun fádirigu lídán ságű fulásu queisi nariñaguni bun.

6 Ában fádiri lűnti labágaridun buídu, úa lámuga ni cáta uáguti lererúa lun. Lűnti ábanrűgű tan lűmari, lűnti affiñe jamá lirájűñű luágu Crístu, gagáambadi, lun giñe buídu lan jouserun lirájűñű luei gayára lan lichugűniwa jadűnrun.

7 Lábugiñeñein laríaajan fádiri luwádigimari Búngiu, ligía lűnti lubei labágaridun ában ibágari le úaraguati. Lűnti derégeguañu lan lűngua joun ámu, maríbanme lijéniute, mouñ lumuti gátadi lan, manígi ligiame wurību, mínsiñelá seínsu lun sarágu.

8 Lubáragiñe líra, lűnti aráanseñu lan súnwandan lun lerésibirun bisídatiña lűbiñe, lűnti ában lan wűgűri le jínsiñejabuti lun le buídubei, lun buídu lan lichűgű, buídume louseruniña sun gűrígía, derégeguañu lűngua lun Búngiu, láu ubáfu lun lárűgűdagun lűngua.

9 Lűnti lárűgűdűn luágu ugánu inárűniti le uágubei gayára lan weménigidun, le arűfudajoubei lun, lun gayára lan lichugun dűgűdaguaű joun ámu láu arűfudajani le richábei, lun giñe lafiñeragűdűniña ja asígenerubalin.

10 Lugűndun añájein sarágu magáambaditiña, jádaantima jarásan juríu, ja arűfudajabaña libídiouniga áu, ayéeda jamáña gűrígía.

11 Lűnti ladaurűniwa jayűma ja, ladűga chagáguagűdatiña sarágu família láu jarűfudajani le mouñ lubei, lun jagáñeirun seínsu láu múarani.

12 Ariñagati meja ában chu táu Crétana, le ñi bubei guetó, jawágu lupaísanun. “Gűrígía Crétana, súnwandan yé jama, machűlaaguntíña, jalíluatiña, magűali.”

13 Ani inárűni laríñagubei. Ligía lubefti, badeínja joun jere, lun jouđin láu arűfudajani le richábei luágu wafiñen,

14 lun giñe mebéresen jamá láu buri úraga le jadáagun juríu, ni láu le jariñagubei gűrígía, játima íchugubalin janágan luágun inárűni.

¹⁵ Queísi laríñawagúniwa, jarúmati sun cátei joun ja jarúmabaña anígi, ánjein joun gürígia ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, wíyetu gíñe janígi.

¹⁶ Aríñagatiña luágu subúdi lan Búngiu joun, láu buri cátei le jadügübei, arúfuda jamúti luágu ibidiñe lan Búngiu joun, lugúndun mínsiñejabutiña, magáambaditiña, mayáraatiña lun jadügüni le buídubei.

2

Arúfudajani inárüni rúti ibágari buíti

¹ Ánjeinti amürü, Títo, lúnti barúfudajani luwúyeri igáburi le lúnbei jagáburiduni afiñetiña luágu Crístu, ában ibágari le úraguabei lúma inárüni le lúmagiñebei Búngiu.

² Lúnti mátun jamá wügüríña weíyaaña mútu, inébewa jagíame, buídu jachügü, derégüdagu lídan jafiñen luágu Crístu, buin láu ínsiñejabuni lúma gurásu.

³ Würíña gíñe ja weíyaaña, lúnti gíñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun lúma jerérun,

⁴ lun jarúfudajan joun würíña ñübürigiña jawei lun jínsiñe jamá jámari joun, jínsiñe jarájüñü joun,

⁵ lun buídu lan jachügü, jarúma jagía, aráanseja jagía jábiñe, areída jagía, gágáambadi jagíame lúma jámari. Lúnti ítara lan jabágari würíña, lun úa jamá ní ában adímurejatiña wuríba luágu ugánu le láni Búngiu luágu asálbaruni láu afiñeruni luágu Jesucrístu.

⁶ Arúfudajabá joun wügüríña irájüñü lun buídu lan jachügü,

⁷ rúba ában jémpulu buíti joun lídan sun cátei. Arúfudajabei lérügü inárünibei joun láu ában igáburi derégüdati,

⁸ adímurejeina láu ában igáburi magádieta le uáguti lásiñera ladárirun mégeiti. Ítara lúba janügüba báganiñu busíganu luágu luríban jóuserun áni siñábei jadímurejan wuríba buágu.

⁹ Aríñagabá joun eseríwidutiña lun gágáambadi jamá joun jayúbudirigü lídan sun cátei, moúnabagun jamáñame, lun buídu lan jeseríwidun joun,

¹⁰ lun míwerujan jamá, lun jarúma lan jagáburi le gumúti jáma jayúbudirigü lun larijiniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabei cátei le, Títo, lugúndun arúfuda láali Búngiu lareídun woun, le ídaangiñebei gayára lan jasálbarun sun gürígia lídaangiñe luríban jagáburi.

¹² Arúfudaja láali Búngiu woun láu lareídun lun wígiruni wuríbani lúma ayúmajani lánina ubou, lun wabágaridun ában ibágari le buíti ligíbuagu ubou le, ragúguañu woúngua, derégeguañu woúngua lun Búngiu.

¹³ Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuidun cátei le uágubei laríñaga Búngiu—lagíribudun Wabúngiute, Wasálbaragüle Jesucrístu ubouágun láu sun luweírigun.

¹⁴ Deréguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdüniwa le gumúti, lun láni wamá, aráanseñu lun wadügüni le buídubei.

¹⁵ Ligía buri cátei le lúnbei barúfudajani, íchigeina dügüdaguaü, arérejeina láu sun ubáfu. Míchigabá lúgaaru lun banügüniwa quei ni cáta.

3

Cátei lé buri lúnbei jadügüni afiñetiña

¹ Jarítaguagüda báña afiñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadügün furúmieguarügü cátei buíti,

² lun madímurejan jamá wuríba luágu ni ában, lun dilí lan jóuserun, areída jagíame, lun únabugu jamá lídan jóuserúniwa sun güriía.

³ Lugúndun wagía afiñetiña, ibídiouguati meja güñe wáu, magáambadi wagía meja lun Búngiu, barútiwa meja ában úma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adüga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun.

⁴ Ánjeinti dan le larúfudunbalin Búngiu Wasálbaragüle lareíni lúma línsiñejabu joun güriía,

⁵ ába lasálbaruníwa, máma jamúga ladüga wadügün som cátei buíti, ladüga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queisi labúseerun.

⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesu-crístu, lun wámabei lan láu sun luweiirin lubáfu.

⁷ Láu larícharaguagüdüniwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu siélu.

⁸ Inárüni cátei le.

Buséntina lun barúfudajani buri cátei le láu ában éregu, lun ja lan afiñebaña luágu Búngiu, lun súnwandan lan jíchaagun jóungua lun jadügüni cátei le buídubei. Buíti cátei le, áni buíti lanügün joun sun güriía.

⁹ Dísebá lueí sigénei buri le málati, úraga buri jawáguti binádu mútu, fáreinguaü buri, lúma buri wuríbu lueígiñe lilúrudun Moisés. Sún buri cátei líra, manügünti buíti lun ni ában.

¹⁰ Ánjein ní lubei ában tílana ligílisi le adügübalin fáreinguaü, ererabá lun ában o bián weíyaasu, ánjein madügün gásu báu, ígirabei lúngua.

¹¹ Subúdi báali luágu ígira láali lan wügüri ligía úma le surúbei láu luwúyeri labágaridun.

¹² Dánme nouñajani Artémas o Tíquico lan lun lárügüdüni bubára ñi, buséntina biábin aríjana Nicópolis lugúndun ñíba násügürei lidáani luríbouga.

¹³ Íderaguabei Zénas, le subúdiabúbei lun lúrudu, lúma Apólos lídan sun le buáraati, rúbeíme le jemegeirubei joun lun jasígiruni jaweíyasun.

¹⁴ Furéndeí jamá güñe sun wánigu lun jadügüni cátei le buídubei, ídeja jagíame dan le mégeiwa lan, ju lámuga jabágari lídan Crístu.

Mábugaü

¹⁵ Mábuga jáña sun ja númabaña bun, mábuga wáña joun ja jínsiñejabúbaña woun queisi idújeñu lueígiñe Crístu. Binílaün Búngiu sun jugúya ja alíjabarun gárada to. Ítaralá.

LIGÁRADAN PÁBLO LUN FILEMÓN

Labürüjan Páblo lun Filemón

¹ Áu Páblo, le nadaürüñabei lueígiñe napúrichijan luágu Jesucrístu, nabürüjañoun gárada to, úara lúma Timotéo, le wadúje lueígiñe Crístu, bun, Filemón, le weíríbei ínsiñe woun, le gíñe woúba lídan wadágimanu.

² Gárada to, joúntu gíñe tílana ligílisi ja oúndaragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwadígimari Crístu.

³ Resíbi jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Línsiñejabu Filemón lúma lafiñen

⁴ Teínqui numúti Búngiu súnwandan lídan le narítagun buágu lídan nayúmuragun lun,

⁵ lugúndun agáambaadina luágu ínsiñejabuni lúma afíñeni le buágubei lun Jesúsu lúma joun sun ja lánigubaña Búngiu.

⁶ Amúriajatina lúma Búngiu lun ja lan afíñeñabaña luágu Crístu ladüga bafiñen, lun jayábin lun gunfaráanda jamáni sun abíniruni le wabíjibeí lúmagiñe Jesucrístu, buídu.

⁷ Nidúje, oúnwenbun nugúndan lúma dügüdaguau le nídaanbei luágu bínsiñejabu, lugúndun darángilajaru janígi ja afíñebaña luágu Crístu, bugúndun.

Lamúriajan Páblo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun nariñaguni le lúnbei badügüni bun,

⁹ jímeín numúti ayúmuraguarügü nan bun luágu ínsiñejabuni le wádaanguabei woúniwagua. Áu Páblo, weíyaadina, guetó nadaürüña lueígiñe napúrichijan luágu Jesucrístu.

¹⁰ Amúriajatina ában fuleísei búma lun Onésimo, le ítarajalíbei queísi niraü lídan Jesucrístu lárígiñe lerésibiruni Crístu láu nadímurejan lúma ya furísunrugu.

¹¹ Lídan meja dan le sügüjalíbei, ában meja idámuni moúnti Onésimo bun, ánjeinti guetó, debégiti bun queísi nun.

¹² Noúnajañein bun lárigoún, resíbibeí lubeíti láu ugúndani lugúndun láu noúnajani bun, queígubeirügü jamúga noúnajañoun lan nanígi, le luweírín línsiñe nun.

¹³ Gúndaatina jamúga lun leréderun núma ya, lún jamuga lesériwidun nun bewéñegua, sun anája lan adaürüwa lueígiñe napúrichijani ugánu le lánina asábaruni.

¹⁴ Mabúseerúntina nadügün ni cáta magúndaga amürü láu, lun máma lan láuti afósuruni fuleísei le badügübei nun láu jamúga bígiruni núma, lun láuti lan bugúndan guánarügü.

¹⁵ Fágua lanúrunbei Onésimo bueí luágu átiri dan lun búmabei lan guetó lun sun dan,

¹⁶ guetó mámarügü queísi ában idámuni, queísi cátei buítimaati lueí idámuni —queísi ában idújei jínsiñeguti. Weíríti línsiñe nun, lúnti jínsiñetima lan bun, mámarügü queísi wügüri, queísi gíñe ában idújei lueígiñe Crístu.

¹⁷ Ánjein lubeíti barü bubáline queísi ában bouba lídan wesériwidun lun Crístu, resíbibeí queísigubeirügü jamúga áu lan berésibirubei.

¹⁸ Ánjein adügaali lubeí dáñu bun, o ánjein dúwei lubálibu, agúburaja bána.

¹⁹ Áu Páblo, nabürüjañein murúsun cátei le láu nújabu lúma nilétüran. nafáyeirubei bun, láu sun, gayára lan jamúga narítaguagüdünibu luágu dúweigua ban gíñe búngua nun lugúndun áu lan asúbudiragüdübalin Wasálbaragüle bun.

²⁰ Ánja, nidúje, adügabei fuleísei le nun queísi affiñeti luágu Crístu, ámalijaboún nanígi queísi idújei lueígiñe Crístu.

²¹ Nabürüjaña bun lugúndun choúru nan luágu bagáambadi, áni subúditu nun luágu badügüba lan sügü láu le uágubei namúriaia búma.

²² Aráansejabá gíñe ubáraü nubá, lugúndun agúrabatina luágu lídan lánme loúnabuni Búngiu jayúmuragun lun náfuridun furísunrugugiñe, lánjaruba lun nídin arijaün.

Mábugaü lúma lagúmujotún abíniruni

²³ Mábuga líña Epáfras bun, le nouba furísunrugu lueígiñe lapúrichijan luágu Jesucrístu,

²⁴ mábuga líña gíñe Márcos bun, Aristárco, Démas, lúma Lúcas, ja ñadágimeinbaña úara núma.

²⁵ Binílaün Wabúreme Jesucrístu. Ítaralá.

GÁRADA JOUN JA ADÍMUREJABALIN HEBRÉO

Adímurejaali Búngiu lídaangiñe Liraü

¹ Lídan meja dan le sügüjalibei, adímurejati meja Búngiu joun binádu wagübürigu sarágu weíyaasu lúma lídan sarágu luwúyeri, jádaangiñe profétagu,

² guetó, lídoun buri lagúmujoún dan le, adímurejaali woun lídaangiñe Liraü. Lídaangiñe Liraü le, ladügei uboú, áni rúlaali sun cátei lun.

³ Arúfuda lumúti Liraü Búngiu luweírigin Lúguchi luóúgua, ligía méme Búngiubei, ligía ágüdajabalin sun cátei láu lerérun le gabáfubei. Lárigiñe lachíbuni wafígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraü Búngiu sügü jáu ánjeligu

⁴ Nñubinjali Liraü Búngiu lun weírigubei lan jaweí ánjeligu, resíbijali ában ubáraü iñugutimaati jaweí queísi lalágaante queísi Liraü Búngiu.

⁵ Mariñagunti Búngiu ni ában weíyaasu lun ni ában ánjeli.

Niraü amürü,
rúnaali ubáraü le bun ugúñe,
maríñagun ligía luágu ni ában ánjeli.

Áuba Búguchi,
amürüme nisáani.

⁶ Ánjeinti dán meja le loúnajaabalin Liraü le ábanrügüti uboúagun, aríñagati. Judúgua jamá sun náni ánjeligu lun.

⁷ Lariñaga jawágu ánjeligu.

Adúgatina lun ítara jamá náni ánjeligu camá garábali,
adúga áu lun ítara jamá camá wátu geméti,
oúnagüleigu jagía ja esériwidubadina.

⁸ Ánjeinti lun Liraü aríñagati Búngiu ítara.

Búngiu, lúntibei súnwandan bañúurun luágu bála lun barúeijan,
láu ában úraguni bagúmadija.

⁹ Jínsiñeti le richáguabei bun, iyéreeguti le wuríbabei bun,
ligía níchugunbei, áu le Bubúngiute, gíbetima ugúndani bídoun sügü jáu bíbirigu.

¹⁰ Áriñagati gíñe.

Amürü le Abúremein, lídan lagúmeseja, adúga bumúti uboú,
láu bújabu badügei siélu.

¹¹ Lagúmuchuba siélu lúma uboú, ánjein amürü, beréderuba lun sun dan.

Liábiba siélu lúma uboú lun laweíyadun quei anáanguni,

¹² babáruchagubaña quei ában daúguaü,
jasáansirúaba quei anáanguni.

Ánjein amürü, ában mémebadibu, magúmuchunbei bíbágarí.

¹³ Mariñagunti Búngiu ni ában weíyaasu lun ni ában ánjeli.

Ñurúba lueígiñe noúnwenren darí lun nagáñeiragüdümbu jawágu báganiñu,
ru náñame bújaburugun.

¹⁴ Sun ánjeligu, espíritugu esériwidutiña lun Búngiu jagía, oúnajoútiña lun jideraguniña ja lúnbaña jerésibiruni asálbaruni lídaangiñe jafígoun.

2

Lúnti woúnigiruni wasálbarun

¹ Queí itara líña lubeí luweírigin Liraü Búngiu, lúnti lubeí weténiruntima lun ugánu le agáamba wamáalibei luágu, lun madíreirun wamá lueí úma.

² Chourúati lilúrudun Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adúraagubalin, madügün jagía gásu láu, áburujati ligáñi Búngiu jawágun láu íríchaü.

³ Gúbuméti wafáyeija luágu wafígoun ánjein moúnigirun wamá oúnwenbun asálbaruni le resíbi wamáalibei lúmagiñe Jesucrístu le Wasálbaragüle. Wabúreme Jesucrístu guánarügü adímurejabei luágu asálbaruni le furúmiñe, lárigiñe, ja agáambubalin, ában jástügüragüdüni woun láu ában achoúruruni luágu inárüni lan.

⁴ Núrügüda láali gíñe Búngiu ugánu ligía woun láu buri seíni lúma sarágu buri miláguru lúma láu Sífiri Sándu le líchugubei woun láu amúñegueinarügü luwúyeri ubáfu queísi labúseeruni.

Jesucrístu quei libíriña

⁵ Míchugun lumúti Búngiu ubou líte le uágubei wadímureja lábun jagúmadijan ánjeligu,

⁶ lubáragiñe líra, lariñajare tídan Lerérun.

Búngiu, ¿cáteiñeinsan wügüri lun barítaguba lan luágu?

¿Cáteiñein wügüri gouwedaditi badíjeridunbei láu?

⁷ Rúbumuti ünabu jaweí ánjeligu luágu murúsun dan,

daúguagüda bumúti láu uweírigin lúma inébesi, ru amürü ubáfu lun luágu sun cátei le badügübei,

⁸ rúbumuti sun cátei lábugiñoun lagúmadijan.

Dan lubeíti le líchuguni Búngiu sun cátei lábugiñoun lagúmadijan gürígia, mígirunti ni cáta lun mámabei lan lábugiñe. Láu sun líra, aríja wamúti luágu mámagili lan sun cátei ñüdünti láu le lubeíbei wügüri.

⁹ Ánjeinti lídan Jesucrístu, aríja wamúti lagúnfulirun sun dimúrei le, ligía meja ában gürígia le líchugubei Búngiu ünabu jaweí ánjeligu luágu murúsun dan. Láu luweírin línsiñejabu Búngiu woun, ánjati lun loúnwen Crístu jawágu sun gürígia, áni guetóti, daúgu líña láu uweírigin luágu ouweni le lasúfurirubei.

¹⁰ Lun cátei njein lun Búngiu, áni lídaangiñeti gíñe, áni buséti Búngiu lun gafánran jamá sun lirájüñü lídan luweírigin. Ligía lúnti lubeí buga lasúfurirun Liraü Búngiu, le Jesucrístu, queísi ában gürígia lun ligíaba lan ában asálbaragüle gumúti láu asúfuriruni.

¹¹ Ja edéregerúabaña jarúma lun Búngiu lúma Liraü le edéregerubaliña ítara, sun jagía ában meme Úguchili—Búngiu.

¹² Ligía úa lubeí nibúsigari lan Liraü Búngiu lun lagúaruniña lamúlenu jáma lítunu dan le lariñagun lun Búngiu, queísi bürúwañu lan tídan Lerérun Búngiu.

Nadímurejaba buágu joun namúlenu jáma nítunu, nerémujaba luágu buweírigin lagánagua adámurini.

¹³ Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

14 Ja jasáanigu ában família, ában meme jítaü jagía, ítara giñe, wügüri meja giñe garaüwarügüti Jesúsu, lun meja gayáraabei lan louñwen, gayára lámuga lagünrinchaguni lubáfu Máfia le idaangiñebei liábin ouweni joun güriquia.

15 Ítara líña gidá lumuti Jesucrístu janúfude güriquia, já meja aganoúbaña quei idámuni lun anúfudei luei ouweni.

16 Masálaragunti Crístu queisi ánjeli lun líderaguniña ánjeligu, salíti queisi wügüri garaüwarügüti lun líderaguniña güriquia líledi, ja linébaanfaangu Abrahám, ja lúnbaña jafiñerun luágu.

17 Lúnti líra, gásu meja ítara lúba lan queisi libíriña, lun liábinba lan lun ábanbei lan fádiri íñutimaati, le úraguati, láu gudémejabu joun güriquia, lun giñe lachíbuni jafígoun güriquia láu ledéregeragun lúngua luágu gurúwa.

18 Áni queíti sáfuri lan, áni ouchagualeí Máfia, guetó gayáraati giñe líderaguniwa lídan le wouchawagún.

Weírigutimaati Jesúsu luei Moisés

3

1 Ítara líña lubeíti, nidújeñu deréeguetiña jóungua lun Búngiu, quei jádaangiñetün lan ja únbaña wájali lan Búngiu lun jaganouñ lúma siélu, téni jumá buídu lun Crístu le louñajabei Búngiu, le giñe fádiri íñutimaati le lánina afiñeni le wawágubei.

2 Úraguati Jesúsu lúma Búngiu lídan sun wadágimanu le únbei lanúadirei, queisi meja giñe úragua lan Moisés lídan sun lesériwidun jádan lufámilian Búngiu.

3 Gadúnatimaati Jesúsu uweíriguni sügü láu Moisés ítara quei resíbitima lan le adügübei ában múna uweíriguni sügü táu múna to ladügüboun.

4 Sun múna adügarügü lumútu som güriquia, áni Búngiu adügübalin sun cátei le njeinbei.

5 Ítara líñáti, úraguati meja Moisés lídan lesériwidun jádan lufámilian Búngiu queisi ában esériwiduti lun Búngiu, wadágimanu lé meja ladügübei, ában liyáwa inárüni le lúnbei lasúbudiragüdüniwa lídan dan le lúnbei liábin.

6 Ánjeinti Crístu, úraguati queisi isáani jádan lufámilian Búngiu, áni jádaangiñetiwa família jagía ánjawa derégüdagu méme, ánjawa giñe afiñe darí lúmoun wouñwen, gúndaañu lídan eménigini le wawágubei.

Eméraguni joun lumútuniña Búngiu

7 Ligía lubeíti, lúnti wagáambuni le laríñagubei Sífiri Sándu tidan Lerérun Búngiu.

Ánjein jagáamba le laríñagubei Búngiu ugúñe,

8 medéreratá janígi quei meja tedérerun janígi magáambaditiña ja ouchagubalin Búngiu lídan fulásu mageírawati.

9 Lídan bián-wein irúmu le jáubei ñi, jóuchagua jamútina binádu jagübürigu lídan fulásu ligía, líña Búngiu, láu sun aríja jamáni buri cátei le nadügübei.

10 Ligía nagáñidunbei jáma güriquia jagía, ába naríñagun. “Súnwandan charárañu jamá tidan janígi, májatiña jafálaruni úma le narúfudubei joun.”

11 Ligía nagáñidunbei jáma,

ába náfiñurun luágu mebelubaña lan lídoun fulásu lé yebe aráanse náalibei jabá lun jeméraagun ñi.

¹² Nidújeñu, toúnigi jumá lueí tedérerun janígi lun jadisedun lueí Búngiu le wíwanbei láu mafiñerun jumá luágu.

¹³ Lubáragiñe líra, rújuma gurásu júniwagua ságü wéyu, sun níjangua lan dan. Tóunigi jumá lueí leyéedagunñi figou, edéreragúdonme janígi,

¹⁴ lugúndun ánjawa ítara méme derégúdagú dari wóunwen lídan affiñeni le wawágubei lúmagiñe furúmiñeti, gafánraanbadiwa lúma Crístu.

¹⁵ Níjangua dimúrei le, le giñe wóunbei, wagía le wíwanbei lídoun buri dan le.

Ánjein jagáamba le laríñagubei Búngiu guetó, medéreratá janígi quei jagúra ja magáambadibaña lun Búngiu.

¹⁶ ¿Cátañati agáambubalin lumálali Búngiu, lárigiñe, ába jagáñidagúdüni láu luríban jagáburi? Sun ja laságarubaña Moisés Ejiptogiñe.

¹⁷ ¿Cáti úma lagáñida Búngiu bián-wein irúmu? Jáma ja affigounjabaña, ja ouwegubaña lídan fulásu mageírawati, ába ligirúniwa jábu ñi.

¹⁸ ¿Cáti un láfiñura Búngiu luágu mebelubaña lan lídoun fulásu lé yebe aráanse láalibei joun lun jeméraagun ñi? Joun ja adúraagubalin le lubeíbei.

¹⁹ Ítara líña lubeíti, goúnigi jumá lun jafiñerun meme dari lúmoun jóunwen, lugúndun ladúga mafiñeni le jawágubei binádu wagúbürigu, siñá lubeí meja jebélurun lídoun fulásu le aráanse láalibei yebe Búngiu jabá.

4

¹ Guetó lubeíti níjeingua béna júnren woun lun gayára lan webélurun lídoun eméraaguni le aráanse láalibei Búngiu woun siélu, lúnti goúnigi wamá, siñádügü líñeín lebelurun ában wádaangiñe, dánme lachúlürün óra lun wóunwen.

² Lugúndun apúrichijoáli giñe ugánu luáguti asálbaruni woun queísigubeirügü joun binádu wagúbürigu, mesériwinti lun ní cáta joun jagáambuni ugánu ligía lugúndun agáamba jamúti, mafiñerunga luágu.

³ Ánjeinti wagía le affiñelibeí, wagíaba ebélura lídoun eméraaguni le, le uágubei laríñaga Búngiu.

Ligía nagáñidunbei jáma,

ába náfiñurun joun luágu mebelubaña lan lídoun fulásu le aráanse náalibei yebe jabá lun jeméraagun.

Ítara líña lerérun Búngiu jawágu binádu wagúbürigu. Aráanserúati fulásu lánina eméraaguni joun lúmagiñe wéyu le lagúmuchuni Búngiu ladúgüni ubou,

⁴ queísi labürüdúniwa tídan Lerérun Búngiu luágu lisédün wéyu.

Ába leméraagun Búngiu lídaangiñe sun luwádigimari luágu lisédün wéyu.

⁵ Aríñawagúaya ligía tídan Lerérun tugúya ítara.

Mebelubaña lídoun fulásu le aráanse náalibei yebe jabá lun jeméraagun.

⁶ Láu dimúrei buri le, subúdi wamúti luágu aráanserúañu lan fulásu lánina eméraaguni jabá gürígia, ja binádu wagúbürigu, ja furúmiñebaña agáambeí ugánu lánina asálbaruni, mebelutiña ladúga mafiñeni le jawágubei lun Búngiu.

⁷ Ligía laráanserunbei Búngiu ámu dan lun gayáraabei lan jebélurun iséri gürígia lídoun jeméraagun, lugúndun adímurejati Búngiu lídaangiñe lé meja laríñagubei David sarágu dan lárigiñe, tídan Lerérun Búngiu.

Ugúñe, láu jagáambuni le laríñagubei Búngiu, medéreratá janígi lun.

⁸ Lun jamúga fulásu lan lé meja ñjin lubei lanúgaña Josué Israelítagu fulásubei lánina eméraaguni le uágubei ladímureja Búngiu, madímurejaanyati jamúga Búngiu sarágu írúmu lárigiñe jebélurun Israelítagu lídoun jageíra luágu “ugúñe lan dan” lun jagáambuni Búngiu, gayára lámuga jebélurun lídoun jeméraagun.

⁹ Ítara líña lubeíti, njeingua ában eméraaguni le gumúti joun lánigu Búngiu, ¹⁰ lugúndun le ebéluruti eméraagua lúma Búngiu siélu, eméraaguati luei luwádigimari itara quei leméraagun meja Búngiu luei luwádigimari lárigiñe ladügüni ubouí.

¹¹ Lúnti lubeíti wafiñerun le tímatisaati luágu Jesucrístu lun gayára lan webélurun lídoun eméraaguni siélu, faládügü liñálin ában wádaangiñe jáni já meja mafíñerunbaña jémpulu, ábame leféridirun.

¹² Lugúndun mítaraantu Lerérun Búngiu queisi ában cátei le jiláalibei, lubáragiñe líra, gabáfuti lun lasáansiraguni wagáburi. Belútu tídoun wanígi queisi ában efeín to biángua tamána, belú tugúya chülü tímoun wawáni lúma wáni espíritu. Furáangugüda tumúti sun warítagnun lúma sun wayúmajan, arúfuda tugúya cátañañadiwa lan.

¹³ Úati ni ában gürígia le ladügübei Búngiu lun gayára lan larámudagnun luei laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádiríñebei le tímatisaati

¹⁴ Jesúsu le Liraü Búngiu, ligía wafádiríñebei le tímatisaati, le belújalibei siélun lun laráramun ligíbugiñe Búngiu abúyeija luágu wafúleisein. Ligía lunti lubei derégüdagu méme wamá lídan ligáburi wafiñen.

¹⁵ Gayáraati gudémejabu lan Jesucrístu le wafádiríñebei woun luágu wadébilin, lugúndun ligía guánarügü súfuriti sun luwúyeri ouchwaguni quei wagía, mafígounjaanti.

¹⁶ Ligía lúnti lubei wayárafadun lun Búngiu le jínsiñejabúbei woun, láu affíñeni, lun gudémejabu lan woun, íderagua lówame láu lareíni lídan wemégeirun.

5

¹ Según wagáburi, wagía juríu, ságü ában fádiri le íñutimáabei anúadajoúati wádaangiñe lun ligíaba lan wachügüdüna ligíbugiñe Búngiu, lun giñe líchuguni edéweejani lun Búngiu lueigiñe joubadina gürígia, lúma adágaragüdüni luágu lifígoun lúma luágu jafígoun jíbiri gürígia.

² Quei débili lan fádiri guánarügü quei furúmiegurügü gürígia, gayáraati gudémejabu lan joun gafígountiña jáma acháragadutiña,

³ áni ladüga lidébilin guánarügü queisi furúmiegurügü gürígia, gásu giñe ladágaragüdüni luágu lifígoun guánarügü queígubeirügü luágu jafígoun jíbiri gürígia.

⁴ Siñátí ladáagnun ában gürígia lúngua fádirime le íñutimaabei láu láni lúngua, Búngiu anúadirubalin, rúleí ubáraü le lun queisi meja lasúseredun lun Aarón lé meja furúmiñeti fádiri le íñutimaabei.

⁵ Ítara líña lasúseredun lúma Crístu, máma ligía íchaagubei lúngua fádirime íñutimaati láu láni lúngua, Búngiu íchugubalin ubáraü weírigitu le lun quei buga laríñaguni lun.

Niraü amürü, rúnaali ubáraü le bun ugúñe.

⁶ Aríñagati giñe tídan méme líburu to Lerérun Búngiu. Fádiri amürü lun sun dan,

le líbe Melquisedéc.

⁷ Dán meja le laganounbei Crístu ya ubouágu, ayúmuraguati meja láu umálali jéreti lúma sarágu águiraü lun Búngiu le gabáfubei lun leséfuruni lídaangiñe otúweni le lúnbei lasúfurirun. Ába lagáambuni Búngiu ladüga derégegüñu líña lan Crístu lúngua lun lugúndan Búngiu.

⁸ Láu sun Liraü lan Búngiu Crístu, chülüti dan lun larúfuduni lagáambadi láu lawánduni asúfuriruni.

⁹ Núbinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñüdüntiña láu le lubeíbei.

¹⁰ Ába lanügüni Búngiu Crístu quei fádiri íñutimaati líbe Melquisedéc.

Wuríbani le líchugubei lígirúniwa afiñeni

¹¹ Gíbeti lúnti waríñaguni jun luágu Crístu lúma Melquisedéc, jénrenguti larinawagún furáangu, lugúndun siñá lan gunfaráanda jumáni.

¹² Sügüjali sarágu dan lúmagiñe jasálbarun, lúnti jamúga gayáraajali lan jarúfudajani Lerérun Búngiu joun ámu, áni busén mémegidún narúfudajaniya buri cátei létima ménreengúnbei lídaangiñe Lerérun Búngiu jun. Irájüñügídun lídan jafiñen, queisi irájüñü ja gásabaña játun míligi lubáragiñe jamúga jeigin eíginí le dügüdati.

¹³ Afiñetiña ja buséngiñabaña larúfudajoúniwa cátei létima ménreengúnbei tídaangiñe Lerérun Búngiu joun, ítara jáña quei irájüñü ja gurágiña —úagili gunfaráanda jamáni Lerérun Búngiu buídu.

¹⁴ Ja weínamujañabaña lídan jafiñen, subúditi Lerérun Búngiu joun buídu, subúdi jameí arúfudajani le buídubei lúmoun le mabuídunbei.

6

¹ Queímoun méme lubeíti wabáruaguóun lídan wasúbudin luágu Lerérun Búngiu, ígira wamámugei arúfudajani le ménreengúnbei libügürü Crístu lun watúriajani lujúlilin-ágei. Marítagua wamá luágurügü lébu wafiñen, quei buri ligirún binádu igáburi le málati, lúma buri afiñeni luágu Búngiu,

² arúfudajani luágu badísei, líchugúniwa újabu jábulugu afiñetiña, jásaarun jiláaña lídaangiñe otúweni, lúma lagúmujoún lagúseragüdüniña Búngiu gürígia,

³ queímoun wabáruaguóun lídan wasúbudiruni lujúlilin-ágei Lerérun Búngiu, láu lubáfu wawágu.

⁴ Gürígia ja resíbi jamáalíbei larúgounga ában weíyaasu, resíbi jameí Crístu queisi jasálbaragüle, resíbi jameí gíñe Sífiri Sándu,

⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya ubouágu—

⁶ ánjein jíchiga janágun luágun Crístu lárigiñe sun cátei líra, ába jagíribudun járgoún lídoun binádu jagáburi, siñáalime jaságüríjan, siñáalime gíñe lánigu jamá Crístu. Lun jamúga jíchuguni janágun luágun Liraü Búngiu lárigiñe jafiñerun luágu, queísigubeirügü jamúga jádaraguñeinya lan luágu gurúwa, jéjerajaña gíñe láu jagíbugiñe gürígia.

⁷ Gürígia ja eíbugubaña buídu lúma Crístu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buíti joun ja ñadágimeinbalin, ladüga binílaali lán buga Búngiu múa ligía.

⁸ Gürígia ja íchugubaña janágun luágun Crístu, ítara jáña quei múa le ñí lumuti lájücha jíyu lúma lagübüri jíduru, úati ju lan lun ni cáta. Láburujaba lábun línaragun Búngiu, ábame lagudún.

Eménigini le adügübei lun derégüdagu wamá

⁹ Láu sun wadímujan itara, nidújeñu jínsiñetiña nun, affñetiwa luágu itara júba lan queí múa le íchugubei inádiri buíti, áni jibíjubei sun abíniruni le ñübinbei woun luágu wasálbarun.

¹⁰ Lugúndun úraguati Búngiu, áni mabúlieidun lubei le adüga jumáalibei, lúma ínsiñejabuni le arúfuda jumáalibei lun láu jíderaguniña jidújeñu luágu affñeni, cátei le anjünjaguabei adügei.

¹¹ Buséntiwa lun itara méme lan cáda ában jídaangiñe, arúfudei affñeni le dari lúmoun jóunwen, lun gayáraabei lan jibíjini le jagúrabubei—lun jebélurun siélun.

¹² Mabúseerúntiwa lun jamáguualigudun lídan cátei le láni Búngiu, busénrügütiwa lun jáyejani jagáburi já meja affñebaña buídu buídu luágu Búngiu, awánda Jamei sun asúfuriruni luágu, ába jerésibiruni le uágubei lariñaga Búngiu luágu líchugubei lan jun.

¹³ Dán meja le lariñagubei Búngiu lun Abrahám luágu labínirubei lan, fiñúti luágu guánarügü líri ladüga úa lan ámu weírigutimáati luei lun láfiñurun luágu,

¹⁴ ába lariñagun. “Nabínirubadibu sarágu, níchuguba giñe sarágu adügawaguni bun.”

¹⁵ Agúrabajati Abrahám láu gurásu, ába lerésibiruni le uágubei lariñaga Búngiu lun.

¹⁶ Dan le jáfiñurun gürígia, luágu ában le weírigutimáati jawei jáfiñura, áni chouúrujaña ligiati ában cátei láu fiñún, úaali ámu cátei lun lariñawagún.

¹⁷ Ligía lachouúrurunbalin Búngiu lerérun láu fiñún, lugúndun busén lan larúfuduni furáangu woun, wagía le lúnbei werésibiruni lalágaante Abrahám, láuga lagúnfulirubei lan lerérun luágu wasálbarun, masáansirunga ní cáta lídaangiñe.

¹⁸ Rúlaali Búngiu lerérun woun, rúlei láfiñurun luágu, bián cátei ligía, gayáraati weménigidun luágu, ladüga siña lan leyéjean Búngiu. Áni láu cátei ligía, sun ja ñübinbaña lun Búngiu lun jasálbarun, gayáraati janügün gurásu, gayáraati jasúbudiruni le tímatisaati luágu jasálbaruba lan áni jebéluruba siélun.

¹⁹ Ágüdaja lumútu eménigini le wawáni derégüdagu, chouúruñu, queisi lágüdajanun oúnguru ugúnein derégüdagu. Chouúruwañu líña eménigiruni le wabíjibe buídu buídu, ragüñu líña luágu Búngiu lídan fulásu sándutimáati siélu,

²⁰ le ñijin lubei lebelúra Jesúsu ában weíyaasu wawágu lun ladáraruni úma wabá. Níjein ñi guetó afádirija wawágu ligíbugiñe Búngiu queisi ában fádiri íñutimáati le líbe Melquisedéc.

7

Jesúsu fádiri líbe Melquisedéc

¹ Melquisedéc le, urúei lídan meja fulásu le gíribei Sálem, lufádirinein giñe Búngiu le íñutimáabei. Dan le lagíribudunbei Abrahám wuríburugugiñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni,

² ába líchuguni Abrahám ában lídaangiñe cáda díisi lídaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” quei mejati lurúeite lubei Sálem, áni “darángilau” míni lan Sálem, itara líña lubeiti “lurúeite darángilau” Melquisedécbei.

³ Ibídiñewati ca lan lagübürigubaña, ibídiñeti gíñe ca lan linébaanfaangubaña, ibídiñewati ni cáta libügürü lagüríajouñ ni libügürü louñwen, liyáwa Liraü Búngiu ligía, ában fádiri lun sun dan.

⁴ Aríja jumeiti luágu weírigu lán meja Melquisedéc. Abrahám guánarügü lé meja binádu wadúje, rúlumuti ában lídaangiñe cáda díisi lun lídaangiñe le lagídarubei jawei urúeigu lídan wuríbu.

⁵ Según lilúrudun Moisés, fádirigu ja linébaanfaangu Leví lúnti jagúburajani ában lídaangiñe cáda díisi jamagiñe gürígia lídaangiñe sun cátei, láu sun jadújeñu jamá, linébaanfaangu Abrahám jáledi.

⁶ Ánjeinti Melquisedéc, láu sun máma lan linébaanfan Leví, agúburaja lumúti ában lídíisin cátei lueí Abrahám, lé buga erésibirubalin dí múrei lúmagiñe Búngiu. Ítara líña labíniruni Melquisedéc Abrahám,

⁷ Áni síñáti lasígeneruni ni ában luágu weírigitima lan le abínijabei sügü láu le abínirúabei.

⁸ Ya wádan, fádirigu ja erésibirubalin cáda lídíisin cátei, wügüríña goúwedaditiña, ánjeinti luágu Melquisedéc, tadímurejan Lerérún Búngiu luágu quei luágu ában le wíñwangíli.

⁹ Áni gayáraati lariñawagún luágu Leví jáu sun fádirigu ja linébaanfaangu ja agúburajabalin cáda lídíisin cátei guetó, luágu fáyei jamáni gíñe lun Melquisedéc lídan óra le lafáyeirunbalin Abrahám lun,

¹⁰ lugúndun lídan ában oubaü, barü lumutiña buga Abrahám linébaanfaangu ja magüríajoungíñabaña lídan lúgubu dan le láfuridunbei Melquisedéc lubároun.

¹¹ Jádaangiñe fádirigu ja linébaanfaangu Leví jerésibirei Israelítagu lilúrudun Moisés, áni Aaron furúmiñetibeí jafádirin. Gürígia ja afálarubalin lúrudu ligía, lun jamúga gayára lan jasálbarun le tímátimaati lueígiñe, memégeirunwali jamúga lachúlaagun ámuya fádiri, máma líbe Aaron, líbe Melquisedéc.

¹² Lugúndun dan le liábin fádiri lídaangiñe ámu adúgawaguni, sáansiwati gíñe lúrudu lé buga lábugiñebei lafádiríja.

¹³ Wabúreme Jesucrístu, queísi fádiri lídaangiñe ámu adúgawaguni queísi Melquisedéc, sáansiguati gíñe lúrudu le lábugiñebei lafádiríja. Tariñajare Lerérún Búngiu luágu lídaangiñeti lan ámu liraü Israel lueí Leví liábin Crístu—ában adúgawaguni le úagilibeí ni ában jádaangiñe afádiríjati.

¹⁴ Lugúndun subúdiwati buídu luágu jádaangiñe lan linébaanfaangu Judá liábin Wabúreme Jesucrístu, áni mariñagunti Moisés ni cáta jawágu adúgawaguni ja dan le ladímurejaanbei jawágu fádirigu.

¹⁵ Áni furáangutimáati le dan le liábin Jesucrístu lun lafádiríjan queísi Melquisedéc,

¹⁶ máma láu ában lúrudu le aríñagubei cába lan ídaangiñe adúgawaguni liábin, liábin lun fádiribeí lan lugúndun gabáfu lan lun labágaridun lun sun dan.

¹⁷ Niján le lariñagubei Búngiu luágu Jesucrístu.

Ában fádiri amürü lun súnwandan,
le líbe Melquisedéc.

¹⁸ Gumúguati lubeiti binádu gumádi le lilúrudunbei Moisés, le lábugiñebei jafádiríjan Levítagu, lugúndun nírein lan mégeiti luágu,

¹⁹ mabáfuti lúrudu ligía lun lasálbaruniña gürígia lídaangiñe jafígoun. Lewéñeguati, níjein ában iséri aráanseruni le buítimaati, le ídaangiñebei gayára lan wayárafadun lun Búngiu.

²⁰ Áni láu ában fiñún ladügei Búngiu aráanseruni le lun Jesúsuba lan wafádiriñe.

²¹ Ja jíbiri fádirigu, máfiñurunwati dan le líchugunbei jafúlasun joun, ánjeinti luágu Jesúsu, le láubei fiñún líchugúa lufúlasun lun, laríñajare tídan Lerérún Búngiu.

Áu Búngiu le Abúremeinbei, fiñújadina bun, masáansiragun nubei narítangun.

“Ában fádiri amürü lun súnwandan, le líbe Melquisedéc.”

²² Ligía Jesúsu lubei achoúrurubei ában darádu buítimaati luei le furúmiñeti.

²³ Já meja jíbiri fádirigu, chülútiña agíbedagua lugúndun quei ába lán buri jounwen, siñáti jasígirun,

²⁴ ánjeinti Jesúsu, quei moúnwen lan, másügürünbei lifísiute quei si fádiri lúmoun ámu.

²⁵ Ligía gayára lubei lasálbaruniña ja ayárafadubaña lun Búngiu lídaangiñe le timatimaati lun súnwandan, lugúndun gabágariti súnwandan lun layúmuragun lun Búngiu jawágu.

²⁶ Jesúsu lubeiti fádiribeí íñutimáati le wabúseerúbei. Jarúma ligía, úati wuríbani lídan, ni figou, máma ligía ában jáma gafígountiña, iñurúa ligía íñutima luei sun cátei siélu lun lañúurun lúma Búngiu.

²⁷ Mítaraanti quei jíbiri fádirigu íñutimaatiña ja gásubei jáfarun anímaalu lun jadágaragüdüniña quei sacrificísiu ságü wéyu, furúmiñe luágu jafígoun guánarügü, lárigiñe luágu jafígoun jíbiri güriña. Lubáragiñe líra, adüga lumúti Jesúsu sacrificísiu ábanrügü weíyaasu dan le líchaagunbei lúngua lun loúnwen luágu jafígoun güriña.

²⁸ Wügüriña ja debilibañe, jagía líchugubaña lilúrudun Moisés quei si fádirigu, ánjeinti lárigiñe lidáani lúrudu, ába láfiñurun Búngiu luágu Liraü lun ladügüni fádirime, le buídubei adügün le gumúti lun súnwandan.

Jesúsu búyei lun ában iséri darádu

8

¹ Le buítimaabei lídaangiñe sun le wariñagubei, luágu ítara líña lan wafádirin le íñutimaabei, áni ñurújali lueigiñe loúnwenren Búngiu siélu,

² áni lesériwiduña quei si fádiri lídan fulásu le sándutimáabei le ladügübei Wabúreme Búngiu yágüta siélu, máma fulásu le sándutimáabei le jadügübei güriña ya ubouágu.

³ Sun fádiri íñutimaati líchugúniwa lun líchugun edéweejani lúma adágaragüdüni lun Búngiu, ligía gásu lubei giñe níjein lan som cátei lúnti ladágaragüdüni Jesucrístu lun Búngiu.

⁴ Lun jamúga yáñein lan Jesucrístu ubouágu, mámañein jamúga fádiri, lugúndun añájeingua fádirigu adágaragüdütiña le uágubei laríñaga lilúrudun Moisés.

⁵ Fádirigu ja, jadügüni jawádigimari láu buri cátei le liyáwarügüti lé buri siélubei. Subúdi wamúti luágu iyáwaü lan, lugúndun le lubábei ladügünun Moisés lúban Búngiu, ába laríñagun Búngiu lun. “Adügabeitia sun cátei quei si iyáwaü to narúfuduboun bun luágu wübü.”

⁶ Weiriguti lafádirijan Jesucrístu sügü láu jafádirijan fádirigu ubouágu, queisigubeirügü buítima lan darádu le uágubei labúyeija lúma Búngiu luágu jáni güriña fuleisei ubouágu, áni buítimaati cátei le líchugubei iséri darádu ligía.

⁷ Lugúndun lun jamúga meja buídu lan furúmiñeti darádu le gumúti, le ladügübei Búngiu jáma binádu wagübürigu lídaangiñe Moisés, memégeirúnwati jamúga ábanya libiaman darádu.

⁸ Magúndaati buga Búngiu laú furúmiñeti darádu ladüga mabáfu jamá binádu wagübürigu lun jagúnfulirun lúma darádu ligía. Ába laríñagun tídan Lerérun.

Laríñajare Jabúreme Búngiu. Lachülürüba wéyu lun nadügün iséri darádu jáma buri linásiñun Judá lúma Israél.

⁹ Mítaraanbei quei darádu le nadügübei jáma binádu jagübürigu le wéyu le nárügüdünbalin jájabu lun naságaruniña Ejiptogiñe, magúnfulirun jamúti meja nidáradun ligía, ligíati nígirunbáliña joúngua, líña laríñagun Búngiu.

¹⁰ Niján darádu le lúnbei nadügüni jáma linásiñun Israél lárigiñeme buri wéyu ligía, líña laríñagun Jabúreme.

Níchugubei nugúmadin lídoun jarítangun, ábame nabürújani tídan janígi.

Áubati Jabúngiute, jagíame nánigu.

¹¹ Memégeirúnwabei lun larúfudajoúniwa nuágu, mariñagunbei wügüri ni lun lidúje ni lun libíri lun jasúbudiruni Búngiu le Jabúremebei,

lugúndun jasúbudirubadina súngubei,

lúmagiñe le ñúraütimaabei darí lúmoun le weírítimaabei jádaangiñe.

¹² Ferúduna nubei wuríbani le jadügübei, nabúleidubei jafígoun lun sun dan.

¹³ Adímurejaali ligía Búngiu luágu ában iséri darádu, rúlaalrügü líña le furúmiñeti quei binádu, áni cátei le binádujalibei, mayúsurunwadügüyaali.

9

Lúban Búngiu to ubouáguna túma Lúban Búngiu to siéluna

¹ Lídan meja le furúmiñeti darádu le ladügübei Búngiu jáma binádu wagübürigu, rúlumuti meja gumádi joun ída lúba lan jájuduragun lun, ñíñoun gíñe ában múna to sándouboun ya ubouágu to lúbanoun Búngiu.

² Ítara líña ligáburi taráanserún múna tugúya. Múnada, ñíñein bián rúmu, lídan furúmiñeti rúmu le gíribei Fulásu Sándu, ñíñein lébu sanúdelu lúma dábula le ñí tubei fein to biníwaboun.

³ Níñoun ában bélu labádinagua bián rúmu ligía, Fulásu le Sándutimáabei líribei libíaman rúmu.

⁴ Lídan rúmu ligía, ñíñein ában latárü gólu lun lágudajoún cupáli ñi, túma bágüsi to lánina darádu, gólu sun touba. Turágerigu bágüsi tugúya, ñíñein ában ágeidinaü gólu le gádaanbalin eígini le gíribei maná, ñíñein gíñe luwénwen Aarón le ájúchagubei, lúma dübü le uágubei labürüjoá díisi gumádi le líchugubei Búngiu lun Moisés.

⁵ Tougiñe bágüsi tugúya, ñíñoun jayáwa querubínes, ja queísigubeirügübaña ánjeligu, arúfuda jamúti querubínes jagía luágu ñíñein lan Búngiu lídan fulásu ligía. Darúguatiña táu bágüsi tugúya, le ñí lubei ferúdnawa lan figoú, láu jarúna. Mabúseerúntiwa wadímorejan sarágu luágu buri cátei le guetó.

⁶ Aráanseñu líña buri cátei ítara, belútiña fádirigu lídoun Fulásu le Sándubei ságü wéyu lun jafádirijan.

7 Ánjeinti lídoun Fulásu le Sándutimáabei, fádiri rügüñein íñutimáati ebélura ñijn ában weíyaasu lídan irúmu, áni dan le lebéllurun, gásu lanügün játa anímaalu lun ladágaragüdün luágu lifígoun guánarügÜ lúma luágu jafígoun gürígia.

8 Láu cátei le, larúfudajaña Sífiri Sándu woun luágu sun lan seríwigili lan Fulásu le Sándubei lúma buri sun igáburi le adügübei ñi, madárarúngili úma lídoun Fulásu Sándutimáati.

9 Sun igáburi lé meja adügüwabei lábugiñe binádu lidáradun Búngiu, liyáwa iséri lidáradun Búngiu wáma le seríwigilibeí lídan dan le. Cátei lé buri meja íchugübei lun Búngiu, lúma cátei le adágarawagüdüwabei lun lábugiñe binádu darádu, siñáti meja larúmadagüdünun jawáni ja agúnfulirubaña lúma Búngiu ítara.

10 Lúrudu buri lánina binádu darádu luágu jagúnfulirun lúma Búngiu, luáguti eígini le lúnbei jeígin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun dari lasáansiruni Búngiu sun cátei láu liábin Crístu.

11 Láu liábin Crístu, guetó ligía fádiri íñutimáabei luágu iséri darádu le íchugubei ubuíduni woun sügü láu le binádubei. Lúban Búngiu le ñí lubei lafádirija, buítimaatu sügü táu tó meja ubouáguboun. úati mégeiti tuágu, ladüga máma jadüga gürígia múna to siéluboun, to uáguboun nadímureja.

12 Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ñübürigiña luágu jafígoun gürígia, dagágüda lumúti líta guánarügü. Láu ábanrügü lebéllurun, ligía íbijaali asálbaruni magúmchaditi woun.

13 Inárüni luágu lábugiñe lan binádu darádu, gabáfuti meja játa bágasu jáma gábara, lúma jabáligin bágasu ñübürigiña, lé buri áturawagübei jawágun ja marúmanbaña, lun ledégeruniña lúma lun larúmadagüdüniña bougudigiñe jabíti ligíbugiñe Búngiu.

14 Áni ánjein ítara líña lubei, igúbumégia gabáfutima lan líta Crístu! Lídaangiñe Sífiri Sándu le magúmchadibeí, rúguati Crístu lúngua lun Búngiu quei ában adágaragüdüni luágu wafígoun le úati dáseiti luágu, áni jarúmagüda lumútu líta wawáni, gidá lumútiwa lídaangiñe lidíjeri arítaguni luágu wagúnfulirun lúma binádu darádu, adüga lumútiwa lun wabúseerun wesériwidun lun Búngiu le wínwanbei.

15 Ligía Jesucrístu lubei búyeibeí lun ában iséri darádu le adüga lálalibeí Búngiu wáma. Louñwenbei Crístu lun ferúdnawa lan figou le adügübei lábugiñe binádu darádu, lun giñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei luágu líchugubei lan queisi alágan.

16 Lugúndun dan le líchugun ában gürígia lújabu árigi tuágu ában gárada luágu alágan, mabáfutu gárada tugúya dari lun lasúbudirúniwa luágu jilálali lan gürígia ligía.

17 Mebégitu gárada tugúya dan le wíngwángili gürígia ligía, dari dan le jiláali.

18 Ligía giñe láu lubei léserun jítaü ladügüwa furúmiñeti lidáradun Búngiu jáma lumútuniña.

19 Subúdigüda lumúti Moisés sun lugúmadina lúrudu joun sun gürígia, larigiñe, ába lanügün gamísa funátu lúma lílímun isópo, ába ladüduragüdüni lídan dúna lúma játa bágasu ñübürigiña jáma gábara, ába labájichagunun lílíburuna lúrudu jáma giñe sun gürígia.

20 Ábati laríñagun joun. “Níjan jítaü le achoururubalin lidáradun Búngiu júma.”

²¹ Bajjúga lumútu gíñe Moisés Lúban Búngiu lúma sún buri cátei le ayúsurubei lídan jájuduragun lun.

²² Según lúrudu ligía, jarúmagüdüwati sun líbe-ágei cátei láu jítaü, áni úati ferúduwana lan figoú ánjein úa láwiwurun jítaü.

Lachíbuni loúnwen Crístu wafígoun

²³ Busénwati lubei mejati ladágaragüdüniwa játa anímaalu lun larúmadawagüdüni buri cátei le, sun líra, iyáwaü rügüñein lun cátei le inárüniti le siélubei, le ñi tubei Lúban Búngiu tímatisaatu, áni busénwati ladágaragüdüniwa jítaü le buídutimaati sügü láu játa anímaalu luágu cátei lánina siélu.

²⁴ Mebéluti Crístu tídoun Lúban Búngiu tugúra to jadüga wügüriña ya uboúagu, to meja tiyáwarügübon Lúban Búngiu to tímatisaatu siélu, siélun méme lebélura, le ñi lubei larúfudagua lúngua guetó ligíbugiñe Búngiu lun lafádirijan luágu wafúleisein.

²⁵ Belúti fádiri íñutimaati le juríu lídoun Fulásu Sándutimaati ában weíyaasu lídan írúmu lun ladágaragüdüni jítaü le máma líta, ánjeinti Crístu, míchaagunti lúngua quei adágaragüdüni sarágu weíyaasu lun lachíbuni figoú.

²⁶ Lun jamúga ítara líña lan, gásu jamúga loúnwen sarágu weíyaasu lúmagiñe ladügün uboú. Masúsereduntí ítara, lubáragiñe líra, dan le lagúnfulirúña lán buri dan, chülüguaali Crístu ábanrügü weíyaasu, íchaagueina lúngua lun lagídaruni figoú.

²⁷ Ítara quei sun lan güriquia lúnti lan jóunwen ábanrügü weíyaasu, lárigiñeme ábame jagúserawagüdüni,

²⁸ Ítara líña gíñe íchaagun Crístu lúngua ábanrügü weíyaasu lun lagídaruni jafígoun güriquia. Lachülürüba wéyu lun lagíríbudun Crístu uboúagun, mámaalime lun lagídaruni figoú liábin, liábinba lun lanügüniña sun ja agúrabubalin liábin siélun lun jabíjini sun cátei lánina jasálbarun.

10

¹ Lilúrudun Moisés liyáwa rügüñein méja buri cátei buíti lé meja lúnbei lanügüni Crístu joun güriquia, le lásíñerubei lúrudu íchiga joun. Ja lubeíti ayárafadubaña lun Búngiu lídaangiñe játa anímaalu le adágaragüdüwabei lun Búngiu según lilúrudun Moisés, lé buri adágaragüdüwabei ságü írúmu, siñáti meja jadáriruni jabuídurun le gumúti ítara.

² Lun jamúga gayára lan labuíduragüdüniña lúrudu le gumúti ligíbugiñe Búngiu, ába jamúga madügünjali lan adágaragüdüni buri le, lugúndun ja adügübalin, láu jamúga jarúmadun ában weíyaasu lídaangiñe jafígoun lun súnwandan, masándiragunjaña jamúga jóungua láu dúru luágu figoú.

³ Seríwiti adágaragüdüni buri le lun larítaguagüdüniña luágun jafígoun ságü írúmu,

⁴ quei siñá lubei lagídaruni játa bágasu lúma játa gábara figoú.

⁵ Ligía laríñagunbei Crístu lun Búngiu dan le lebélurunbei uboúagun.

Mabúseerüntibu ában úgubu nun lun nedéregeruni bun,

⁶ Magúndaantibu láu buri jagudún anímaalu luágu latárü bun, ní buri láu adágaragüdüni lun ladáuragun figoú.

⁷ Ábati naríñagun. “Ñübinjadina uboúagun lun nadügüni bugúndan, Nubúngiute,

ítara queísi бүрүwаñu líña lan nuágu tídan Berérun.”

⁸ Furúmiñe, lariñaga luágu mabúseerun lan Búngiu, magúndan ligía, láu adágaragüdüni, ni jáu anímaalu íchugúti lun, ni anímaalu gudáwati luágu latárü, ni adágaragüdüni lun ladáuruni figóu, láu sun lán buri cátei le uágubei lariñaga Búngiu lídaangiñe Moisés joun gürígia lun jadügüni.

⁹ Lariñaga Cristu lárigiñe. “Ñübinjadina lun nadügüni bugúndan, Búngiu.” Laníchigu lira, ñübinjali Cristu ubouágun lun lagúmchaguagüdüni igáburi le ladágaragüdüniwa anímaalu, lun líchaagun lúngua lewéñegua.

¹⁰ Ligía lugúndanbei Búngiu, lun larúmadagüdüniwa ligíbugiñe láu loúnwen Jesucristu ában weíyaasu lun sun dan luágu wafígoun.

¹¹ Sun fádirigu juríu, ságü wéyu jadügüni buri ában méme adágaragüdüni, láu sun siñá lan lagídaruni adágaragüdüni ligía figóu.

¹² Ánjeinti Jesucristu, ában rügüñein weíyaasu líchaagun lúngua luágu figóu lun sun dan, ábati lagíribudun siélun, ába lañúurun lueígiñe loúnwenren Búngiu.

¹³ Níjein ñi guetó agúrabaja líchuguniña Búngiu láganiñu lábugiñoun lubáfu.

¹⁴ Láu loúnwen ábanrügü weíyaasu, ába labuiduragüdüniña lánigu Búngiu, le gumúti, lun sun dan.

¹⁵ Choúru lumúti giñe Sífiri Sándu cátei méme ligía woun, lugúndun lariñaga le lariñagunbei Búngiu.

¹⁶ Darádu le lúnbei nadügüni jáma lárigiñeme buri wéyu ligía, ítara lúba, líña lariñagun Búngiu.

Níchugubei nugúmadin tídoun janígi,

ábame nabürüdüni jarítangunrugu.

¹⁷ Lárigiñe lariñaga.

Marítagundügüyaadináme luágu jafígoun ni luágu wuríbati buri le jadügübei.

¹⁸ Dan lubeiti le ferúdnawaali figóu lun sun dan, memégeirunwali ámu adágaragüdüni luágu figóu.

Lúnti wayárafadun lun Búngiu

¹⁹⁻²⁰ Ligía lubeiti nidújeñu, láu loúnwen Cristu luágu wafígoun, gayáraajali wayábin ligíbugiñe Búngiu manúfudeiga. Úaarú bélu lun teréderuniwa luei webélurun lídoun Fulásu le Sándutimáabei, le ñi lubei Búngiu, gidá lumutu Cristu bélu tugúya láu loúnwen. Junrénti ában iséri úma woun lúmoun Búngiu, ában úma le anügübalíwa lídoun íbágarí magúmchaditi.

²¹ Jesúsu wafádiriñebei íñutimaati tídan Lúban Búngiu siélu,

²² ligía lúnti lubei wayárafadun lun Búngiu láu tarúma wanígi, lúma láu sun wafiñen derégüdagu luágu. Jarúmagüda láaru wanígi lun masándiragun wamá woúngua láu dúru luágu figóu lárigiñe lachibúniwa, badísejadiwa láu dúna jarúmati.

²³ Ítara méme wamá derégüdagu lídan wafiñen, masáansiragúnga, lugúndun gayára lan weménigidun luágu Búngiu lun lagúnfuliruni lerérun lun líchuguni íbágarí magúmchaditi woun.

²⁴ Lúnti giñe wáfaagun wíderaguniña wíbirigu lun jínsiñejabu jamá, lúma lun jadügüni le buídubei.

²⁵ Mouñ lumuti wafálaruni jémpulu jáni ja jéhubaña lun mídin jamá lídan wadámuridagun, wagía afíñetiña, le lúnbei wadügüni, lun wíchugun gurásu joun wíbirigu, guetótima láu aríja wamáni luágu yaráfaali lan luwéyuri Wabúreme Jesucristu lun lagíribudun ubouágun.

²⁶ Lugúndun ánjawa afígounja láu wíhuguni wanágan luágu Crístu lárígíñe wasúbudiruni luágu ligía rügüñein lan agídarei figóu, úaali ámu luwúyeri lun wasálbarun lídaangiñe wafígoun.

²⁷ Ában rügáli cátei lun wagúrabajani, lun lagúseragüdúniwa Búngiu láu ában lanárime igáñi, ábame wagúnrichawagún jáu sun jíbiri láganiñu Búngiu lídan wátu geméti.

²⁸ Dan le ladúraaguni ában gürígia lilúrudun Moisés, áni añájein biáma o úrúwa geféentiña luágu, ába laríñagun lilúrudun Moisés luágu lúnti lan loúnwen gürígia ligía, magúdemejabuti lúrudu lun.

²⁹ Weiritimaati súfuri le jadúnabei ja mebéresenbaña láu Liraü Búngiu, mebéresen jagía láu líta, anába jameí Sífiri Sándu le jínsiñejabubei joun. Líta Jesucrístu, ligía achóururubalin lidáradun Búngiu wáma, le adügúbaliwa jarúma ligíbugiñe.

³⁰ Subúdi wamúti ligáburu Wabúreme Búngiu le aríñagubei. “Áu le lúnbei labeichaguniña gürígia, áu le lúnbei lafáyeigüdúniña luágu jafígoun.” Aríñagati gíñe. “Nagúseragüdúbaña numútuniña.”

³¹ ¡Fugiábu gürígia le uágunti láburuja ligáñi Búngiu le wínwanbei lun sun dan!

³² Jaritagua jumá luágu buri wéyu le sügüjalibeí dán meja le jerésibirubalin larúgouna luágu Jesucrístu. Weiriti meja jasúfurirun lídoun meja dan ligía, áni awánda jumúti sun cátei láu gurásu.

³³ Añájein jídaangiñe, anabúatiña, ouserúa jagía wuríba ligíbugiñe guríriguauí ladüga jeíbugun lúma Crístu, jíbiri, súfuritiña ladüga gamádagua jamá jáma ja wuríbabaña ouserúniwa.

³⁴ Gudémejabutün meja joun ja furísunrugubaña, ásta láu ugúndani ígiraguagúdatün júngua lun lagídarún le júmabei jueí, subúdiñu jumeín luágu njein lan cátei júma siélu le buítimaati, le siñábei lagídarún jueí.

³⁵ Guetóti, meféridira jumeín lubeíti jeménigi luágu Búngiu, lugúndun jerésibiruba lan ában oúnwenbun afáyeiragülei siélu.

³⁶ Gagúraasun jumá, lun lárígíñeme lan jawánduni asúfuriruni queísi labúseerun Búngiu, gayára lámuga jerésibiruni le lúnbei líchuguni Búngiu jun, siélu.

³⁷ Taríñajare Lerérun Búngiu luágu lagíribudun Crístu ubouágoun.

Málüjali ánjein ñúbin le lúnbei liábin, madárasarunbei sarágu dan.

³⁸ Le nerésibirubei queísi richáguati nigíbugiñe, labágariduba láu lafiñerun nuágu, líña laríñagun Búngiu.

Ánjein leféridira lafiñen, magúndaanbadina lúma.

³⁹ Wagía, mítaraanbádiwa queí gürígia ja eféridirubalin jafiñen luágu Búngiu, ába jeféridirun, wasígiruba láu sun wafiñen luágu daríme woúnwen, belú támuga wawáni siélun.

Luáguti afiñeni

11

¹ ¿Cáteigi afiñenibeí? Afiñeni, achóururúni le gumúti luágu wabíjibeí lan le wagúrabubei, lúma wachóururuni le gumúti luágu nírein lán buri cátei láu sun marijin wamáni.

² Niján luwúyeribeí meja jafiñen jádaangiñe binádu wagúbürigu luágu Búngiu, ába lagúndaarun jáma.

³ Láu wafíñen, wasúbudirei luágu Búngiu lan adügübalin ubouú láurügü lerérun, le lubeíti ubouú le waríjubei guetó, máma lídaangiñe cátei lé meja arijúabei ladügüwa.

⁴ Láu lafiñen Abél, dagágüda lumúti le labúseerúbei Búngiu sügü láu le ladágaragüdübei Cain, ligia lerésibirunbalin Búngiu queisi richáguati, ába lerésibiruni ladágaragüdün lun. Láu sun lubeíti jilá lan Abél, nijángua luwúyeri lafiñen queisi jémpulu woun.

⁵ Láu lafiñen Enóc, lanügüwa siélun mouñwenga, áni madárirúnwati lúgubu lugúndun barü lani meja Búngiu. Áni taríñajare Lerérun Búngiu luágu, luágu lubáragiñebei lán meja lanügün Enóc, gúndan lan Búngiu láu ya ubouágu.

⁶ Ánjeinti wagía, siñáti gúndan lan Búngiu wáu ánjein mafiñen wabeí luágu, lugúndun lun wayárafadun lun, gásu wafíñerun luágu níjein lan áni líchuguba jafáyeiruája ja áluajabalin.

⁷ Láu lafiñen Noé, dan le lawísarunbalin Búngiu luágu ladágaruba lan ában ouñwenbun gúnran, láu sun maríjiñajagili lan gúnran, ába ladügüni le lubeíbei Búngiu, ába ládaragun ában ouñwenbun ugúnein lun lasálbarun jáu lufámilian. Arúfuda lumúti lafiñen Noé ouñwenbun mafiñeni le jawágubei jíbiri gürígia ubouágu. Ába lanügüni Búngiu Noé queisi ában wügüri richáguati lúma, luágu lafiñen.

⁸ Láu lafiñen Abrahám, dan le lagúarunbei Búngiu lun lun lígiruni lageíra lun lídin lídoun ámu fulásu le lúnbei láni lan, ába ladügüni le lubeíbei Búngiu, ába láfuridun lageíragiñe, ibídiñounga lun jalíñounbei lan.

⁹ Ába laganouñ lídan iséri fulásu ligía, láu sun teréncha lan ñi, ladüga lafiñen luágu lerérun Búngiu lun luágu líchugubei lan fulásu ligía lun. Laganouá tidan muna adügütu láu jára anímaalu, ligía méme giñe jadügübei Isáac, le liraü, lúma Jacob, le libári, ladüga jalágaante lan fulásu ligía lúmagiñe Búngiu.

¹⁰ Adüga lumúti Abrahám sun líra ladüga agúrabaja lan lebélorun lídoun lubúidun ubúrgu siélu le ladügübei Búngiu, le adúraruabei lun sun dan.

¹¹ Láu giñe tafiñen Sára, láu sun meja weíyaaru tan lun tagáraüdü, resíbi tumúti ubáfu lúmagiñe Búngiu lun tagáraüdü, garaütu ában irájü ladüga tafiñerun luágu lagúnfulirubei lan Búngiu le laríñagubei.

¹² Láu sun lubeíti weíyaali lan Abrahám lun garaü lan, ñúbinti lun ganébaanfaangubei lan sarágu, quei warúguma ja siélubaña, quei giñe lágu buri ságon le lárubei béya le siñábei labájüdü.

¹³ Jiláguatiña Abrahám jáma lirájüñü láu jafiñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei liábin, lagúnfuliruba lan Búngiu láu lerérun, ába jagúndaaragun luágu. Subúdi jamúti luágu máma lan jageíra ubouú le, jayábin rügüña ebéluja queisi teréncha ya.

¹⁴ Gürígia ja arítagubaña ítara, arúfuda jamúti luágu jáluaja mémeña lan ában ageíraü lun jageírame.

¹⁵ Lun jamúga fulásu lan le ñígiñe lubeí jáfurida ageíraübei le jáluajabei, gayáraayati jamúga jagíribudun járigoún ñíjin.

¹⁶ Ában buga ageíraü buítimaati jabúseerúbei, ageíraü le siélubei. Ladüga níjein lan jarítagun luágu cátei le lánina siélu, ligía úa lubeí nibúsigari lan Búngiu lun Jabúngiutebei lan, ába laráanserun ában fulásu joun siélu.

17 Dán meja le louchagunbalin Búngiu Abrahám láu laríñagun lun lun láfaruni liraũ le Isáac jilágubei lun ladágaragüdüni lun, afiñe mémeti luágu Búngiu, rúguatí yebe lúngua lun ledéregeruni liraũ le ábanrügüti,

18 Láu sun aríñagaali lán buga Búngiu lun luágu sarágubaña lan linébaanfaangu lidaangiñe Isáac.

19 Subúdirügü liñáali Abrahám luágu gabáfu lan Búngiu ásta lun lásaaragüdüni Isáac lidaangiñe ouweni, áni itagaratüyebe ladügüni Búngiu láu líchuguni Isáac lárigoún lun Abrahám lubáragiñe yebe láfaruni.

20 Afiñeti Isáac luágu ladügübei lán Búngiu le laríñagubei, ába laríñagun joun lirájüñü ja Jacób lúma Esaú luágu labínirubaña lan Búngiu lídan dan le lúnbei liábin.

21 Láu lafiñen Jacób, dán meja le louwe lan, biní lumuti cáda ában jádaangiñe lirájüñü José, ába ladímurejan luágu luweírigun Búngiu, ragüñu luágu lígiri lubádun.

22 Láu lafiñen José, lubáragiñe louñwen, aríñagati luágu jáfuriduba lan Israelítagu Ejiptogiñe, aríñaga ligía lun janügüni lábu jáma dánme le jígiri fulásu ligía.

23 Láu jafiñen lagübürigu Moisés, dan le lagüriajouñbei, ába jarámuduni luágu ürüwa játi, ladüga jaríjin luágu buídumeraũ lan, janúfudetiña luei lúruđu le líchugubei urúei lun jañáradawagüdüniwa wügüriña irájüñü.

24 Láu lafiñen Moisés, dan le wügürjali, májati lun lanügüniwa queisi tiraũ liraũ lurúeite Ejipto,

25 jímein lumúti lasúfurirun jáma lánigu Búngiu lubáragiñe laganouñ buidu tidan lúban urúei, to lánina figou. Subúdi lumúti luágu madúra lan luwúyeri ugúndani ligía sarágu dan.

26 Rísitimaati lasándiragun lúngua láu lasúfurirun ünabuni lueígiñe Crístu le lúnbei liábin, sügü láu laganouñ lídan sun lirísin Ejipto, lugúndun luágu afáyeiruañü le lúnbei líchuguni Búngiu lun, líchigei larítagun.

27 Láu lafiñen Moisés luágu Búngiu, ába lígiri Ejipto, manúfudeiga luei ligáñi urúei, reídeiti derégüdagu lídan larítagun camá jamuga aríagu líña lun Búngiu le maríjinbei.

28 Láu lafiñen Moisés ladügei fédu le gíribei páscua, ába louñajan abájichaguei tubéneri jában Israelítagu láu jítaũ lun dánme lan le lásügürün ánjele le lánina ouweni, máfarun lámuga ni ában jaraũ Israelítagu le íbugañü.

29 Ladüga jafiñen Israelítagu luágu Búngiu, ába ladügün Búngiu üma joun lidaangiñe dúna le gíribei Barána Funáti, lun gayára lan jásügürün eíbugeina camá jamuga múa le mábeiti. Dánti le jabúseerúnbei Ejiptona lun gíñe jásügürün quei jagía, ába ladáuragun dúna jáu, ába jañáradagun.

30 Láu jafiñen Israelítagu luágu Búngiu, ába jamácharun geyégua láu lubárierun ubúruđu Jericó ságü bináafin luágu sédu wéyu, ába leíguadun louba lubárierun ubúruđu ligía.

31 Afiñetu Raháb, tó meja jóru, luágu Búngiu, ába tarámuduniña Israelítagu aríajatiña túbiñe. Ladüga cátei le, máfarúnwatu lídan le jáfarawagün magáambaditiña lun Búngiu lídan fulásu ligía.

32 ¿Cába ámu cátei nariñaga? Louguabei dan nun lun nabürüjan luágu Gedeón, Bárac, Sansón, Jefe, David, Samuél luma jawágu profétagu.

33 Láu jafiñen, siríguatiña buri fulásu, agúmadija jagía buidu, íderagua lumútiña Búngiu queisi laríñaguni joun. Darú lumuti Búngiu jayúma liñún jawei,

³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jéredun ja mérebaña, ñúbintiña lun gabáfubaña lan wuríburugu, ába jásiiragúniña jáganiñu.

³⁵ Níñanu wúriña ásaaragüdúwatiña jadújeñu lídaangiñe ouweni joun.

Añajein giñe jíbiri, jiláguatiña lídan luweirin asúfuriruni ladúga jamájan jíchuguni janágan luágun Búngiu lun jamúga gayáraabei lan jígirawagüdúniwa. Jímein jamúti jáfarawagún jilágubei luágu líri Búngiu lun gayáraabei lan jásiígürün lídaangiñe ouweni lídoun ában íbágarí le buídutimaati siélu.

³⁶ Jíbiri, áfagatiña léjerajóun jáu, abeichúni, agúrurawagúni láu güríngüri, lúma adaürüni furísunrugu.

³⁷ Áfarawagúatiña láu dübü, asíarajouátiña jamídan jámagua, ouchwagúatiña lun jígiruni Búngiu, áfarawagúatiña táu efeín, anúrjatiña jábiñegiñe, ába jeréderun eíbugañajádügü, darúgu jóugua láurügü jára mudún lúma jára gábara, fugiábugu, láu idíjeri, ouserúa wuríba.

³⁸ Gürígia buri jagía ja ní lubei ubou madúna lumútiña, eíbugañajádügü jáña buga lídan buri fulásu mageírawati, áraabu, lídan buri lílúlun dübü weínamuti lúma lídan buri júyu le múaruguti.

³⁹ Sun jagía, láu sun buídu lan afiñeni le jawágubei ligíbugiñe Búngiu, merésibirun jamúti lé buga uágubei laríñaga Búngiu luágu líchugubei lan joun lumútuniña, ladúga machülü lan Wasálbaragüle ubouágun lídan jadáni,

⁴⁰ labúseerun Búngiu lun lídaanrügüba lan ában wáma jayábin lun jerésibiruni abíniruni le líchugubei Cristu joun lánigu.

12

Rúwamei waríjin luágun Jesúsu

¹ Ítara líña meja jagáburidun sun jíbe gürígia jagía lídan dan le sügüjalíbe, láu jafiñen luágu Búngiu. Ában jémpulu jagía woun lun ítara méme lan wagáburi. Íbágarí le, queísigubeirügü ában eíbaaguni, gidáwamei sun le erédejabaliwa wawárua, lúma figou le agúruragubaliwa, adúga wamei eíbaaguni le wabáragiñebei láu gurásu, láu sun wafiñen luágu Jesucristu.

² Rúwamei waríjin luágun Jesúsu, le ídaangiñebei líabin wafiñen, le giñe abuíduragüdúbalin wafiñen le gumúti. Súfuriti Jesúsu luágu gurúwa, mebéresenga ligía láu nibúsigarídúna lan luwúyeri ouweni ligía, lugúndun subúdi lání luágu lásun lánme lasúfurirun, lagúndaaruba lan, ába lañúurun lueígiñe louñwenren Búngiu.

³ Lídan le jóuchawagúniwa, samína jumá lubeíti luágu lání Jesúsu jémpulu, luágu lawánduni sarágu súfuri jámagiñe gafígountiña, ligía mabúchadalá lubei juágu, máburujan ligíame jarúna.

⁴ Machülügídün lúmoun ouweni lídan jageíndagun lúma figou quei ligía.

⁵ ¿Bulíei jumásan dimúrei le líchugubei Búngiu jun queísi lirájüñü? Láriñajare tidan Lerérun.

Niraü, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburi, máburujan ligíame barúna dan le ladeínjan bun.

⁶ Lugúndun arúfudajati Búngiu joun ja jínsiñebaña lun, beílumutiña giñe ja lerésibirubaña queísi lirájüñü.

⁷ Áfaga jumei abeichúni lúmagiñe Búngiu, lugúndun louseruñadün queísi lirájüñü. ¿Níjein funági isáni mabeichun lumúti lúguchi?

8 Ánjaün mabeichun lan Búngiu, queísi labeíchuniña sun lisáanigu, mámarügü jíña lisáanigu ja tímátimaatiña, bástadi jugúya.

9 Dán meja le ñübürigidiwa, beíjamutiwa meja wagübürigu, áni inébetiña meja woun. Lúntimaati wagáambuni Wáguchi le siélubei, lun gabágarabiadiwa lan.

10 Jabeíchuniwa meja wagübürigu ya ubouágu lúnrgü murúsun ibágari le, lun jagüriajaníwa buídu según jabáfu, ánjeinti Búngiu, lun waságarun buíti lídaangiñe labeichúniwa, labeíchawa lun ladügüniwa lun buídu wamá ítara quei buídu lan.

11 Inárüni luágu úa lan abeichúni áuti wagúndaara lídan le werésibiruni, gárirügüti woun, ánjeinti ja afürendeirubaña lídaangiñe abeichúni, íbįjatiña ában ibágari lánina ísuruni lúma darángilaü lídaangiñe abeichúni ligía, lárigiñe.

Mamájara wamá lun Búngiu

12 Rújuma lubeíti iséri érei lun jarüna le bucháalibei uágu lárigi asúfuriruni, lúma lún buri jigáchürügü le débílijalibei,

13 áluaja jumei úma le surúbei. Mígira jumá lébuna chugéguau lídan úma luei jeíguadun ja débíligiñabaña lídan jafíñen, íderaguarügü jumáña lun jóudin jabáruaguóun lídan jafíñen.

14 Jóucha jumá lun lídan jumá darángilaü jáma sun gürígia, abágarideina ában ibágari le jarúmati, lugúndun le wíyebei igáburi, siñábei lachülürün lúmoun Búngiu.

15 Touñigi jumá luei níjein lan ában jídaangiñe meíbugunti buídu lúma Búngiu, ábame leféridiragüdüni jafíñen jíbiri queísi ladügüni jíduru gífiti le abíñaragubalin sun le agúurubei luágu.

16 Úa la ni ában jídaangiñe agámariduti mamárieidunga, míchugun ligíame mebéreseni luágu cátei le lánina Búngiu. Ligía cátei le meja ladügübei Esaú, ába lalúguruni lirícha queísi íbugañaü luágu ában asíedu eíginí.

17 Subúsi jun luágu lárigiñe lán buga ladügüni, buséngili yebe lerésibiruni labínirun lúguchi queísi íbugañaü, mabíjin láali, siñáali lasáansiraguni lúguchi le adüga láalibei láu sun layájuañan Esaú láu igárigu.

18 Jugúya, mayárafaduntün lun cátei le gayáraabei jasándiruni queísi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wübü le Sión, le durúngubei láu wátu geméti, le ñí lubei níjein lán meja lubúriga lúma luríbouga,

19 magáambun jumúti gíñe lamúri fidu lúma lumálali Búngiu le adímurejabei joun. Ja agáambubalin umálali ligía, ayúmuraguatiña lun jebé lan ladímurejan joun.

20 Jadügünbalin líra lugúndun luweírín janúfude luei lagúmadijan Búngiu, ladüga laríñajare. “Le íchuguti lugúdi luágu wübü, afarúalá jílagubei láu dúbü o táu lan ában efeín, íbini ában lan anímaalu”, ladüga fulásu ligía, níjein Búngiu ñí.

21 Weíríti lanúfunejabu cátei le jaríjubei, darí lun laríñagan Moisés guánarügü. “Nadádagaruña láu anúfudei.”

22 Ánjein jugúya, lábugiñe iséri darádu, ñübinjadün lun cátei weíríti sügü láu le únbei jayábin já buga lábugiñebaña binádu darádu. Yaráfaadün lun wübü Sión le siélubei, ílanaadün lubúrugute Búngiu le wínwanbei, le ában Jerusalén le siélubei, le ñí lubei jagánawa sun ánjeligu, ja ájuduragubaña lun jíchugun uweíríguni lun Búngiu.

²³ Lídaañadün jadámurin lirájüñü Búngiu ja bürüwañubaña íri siélu. Lun Búngiu le agúseragüdübaña sun gürígia jayárafada, lídaañadün ában jáma ja ouwegubaña ja buídubaña igáburi ubouagu, áni buíngüda lumúti Búngiu lubuídun jagáburi siélu.

²⁴ Nübinjadün lun Jesúsu, le búyei lun iséri darádu, bajíwaguadün láu líta Jesúsu lun lachibúniwa jiffigon, le ábanbei cátei weírítimaati sügü láu le labúseerübei líta Abél—lun lagúseragüdüniwa Caín luágu láfaruni Abél jilágubei.

²⁵ Ligía mamájara jumá lubeí jagáambuni Búngiu. Meséfujaña ligía meja Israelítagu ja mebésenbaña láu Búngiu, dán buri meja lerérunbei joun lídaangiñe Moisés, le ábanbei lílana ubouú, gúbume siñá lan weséfurun ánjein wíchiga wanágan luágun Búngiu lídan le ladímurejan woun lídaangiñe Liraú, le lílana siélu.

²⁶ Jíngígüda lumúti meja lumálali Búngiu ubouú lídan dan ligíra, ánjeinti guetó laríñajare. “Nánjingichagüdübeiya mámarügü ubouú, ásta gíñe siélu.”

²⁷ Dan le laríñagun “nánjingichagüdübeiya”, míni lan luágu lagídarüba lán buri cátei le márügüdünbei luágu ébuu derébuguti, ábame leréderun le siñábei lánjingichúniwa.

²⁸ Arúejani le líchugubei Búngiu woun siñáti lánjingichún. Rúwama lubeíti eteingiruni lun Búngiu luágu líra, judúgua wamá lun láu inébesi lúma gúnfuli queísi labúseerun,

²⁹ lugúndun lagúmchaguagüdübei Wabúngiute sun cátei le mabuídunti queísi lagúmchaguagüdün wátu geméti cátei.

13

Ída líba lan wagúndaaragüdüni Búngiu

¹ Jínsiñegua méme jumá júmagua queísi idújeñu lueígiñe Jesucrístu.

² Mabúleida jumeí lun jebélaagüdüniña achülürütiña júbiñoun láu ugúndani. Sarágu jáña gürígia, rújaña ubáraú joun ánjeligu láu jadügüni cátei le, ibídiñoun joun.

³ Jarítagua jumá jawágu adaürütiña, queísigubeirügü jamúga gíñe jadaürüña lan jáma. Jarítagua jumá jawágu ja ouserúabaña wuriba, quei njein lan gíñe ában úgubu juágu le gayáraati lasúfurirun.

⁴ Buíti cátei lun jagámaridun, áni lúnti júmagua jumá darí lun jounwen. Ja asáansijatiña jámari lagúseragüdübaña Búngiu, lagúseragüdübaña gíñe ja adügübaña salúfuri.

⁵ Míchiga jumeí jínsiñejabu luágun seínsu, gúnda jumá láu le júmati, lugúndun líchugubei Búngiu le jemégeirubei jun. Aríñagaali. “Natoúnigirubadibu, mígirun nábume.”

⁶ Gayáraati lubeíti waríñagun láu afíñeni.

Nabúreme Búngiu íderagubalina, manúfudebadina.

Siñáti jadügün gürígia ni cáta náu ánjeingubeirügü busén Búngiu.

⁷ Jarítagua jumá jawágun ja arúfudajañabaña jun, ja apúrichijabalin ugánu lání Búngiu jun, samína jumá luágu buíti le nübinjalibeí lídaangiñe jabágari, falájumei jémpulu le lání jafiñen.

⁸ Masáansiragunti ligáburi Jesucrístu, ligía meme gúñaarü, ugúñe, lúma súnwandan.

⁹ Mafálara jumá arúfudajani le ámuñegueinarügüti lueí le larúfudajabei Jesúsu. Resibítá wawáni érei lúmagiñe línsiñejabu Búngiu, siñáti terésibirun wawáni ni

cáta lúmagiñe lúruđu buri luáguti eíginí. Igáburi ligía, miábinti lun ladügüba lan buíti joun ja afálarubalin.

¹⁰ Wagía affiñetiña luágu Crístu, ibíjatiwa giñe ában latárü, le gurúwabei le uágubei louwe Crístu luágu wafígoun. Ja asígirubaña láu bináđu jagáburi juríu, siñáti gafánran jamá lídan le líchugubei louñwen Crístu.

¹¹ Jafádirin juríu le íñutimaabei belügüđa lumúti játa anímaalu lídoun Fulásu Sándutimaati quei adágaragüdüni luágu figou, jágubu anímaalugu jagía, bougudi luei ubúruđu lágudúa.

¹² Ítara líña giñe jílati Jesúsu bougudi luei ubúruđu lun lachíbuni wafígoun láu líta guánarügü.

¹³ Queímoun lubeíti lun Jesúsu, bougudin luei fulásu, bougudin luei bináđu igáburi, asúfurireína ünabuni luágu líri queísi lasúfuririn wawágu.

¹⁴ Lídan ubouú le, úati ní ában fulásu wáma le adúraruti lun sun dan, wáluajañein ubúruđu le lúnbei ñíjinbadiwa lan lárigiñe ibágari le.

¹⁵ Ligía lúnti lubei wíchugun eteíngiruni lun Búngiu súnwandan lídaangiñe Jesucrístu le wafádiriñebei. Eteíngiruni ligía, ligía luwúyeribeí adágaragüdüni le labúseerübei Búngiu wámagiñe. ¡Rúwama lubeiti uweíriginí lun láu wayúma!

¹⁶ Mabúlieida jumá jadügüni le buídubei, lúma lun jafánreinruni júmati jádan ja mabíjinbaña, lugúndun níjan buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía oúnigirubarun juwáni, áni quei jasúbudiruni, gásu jagúserun ligíbugiñe Búngiu luágu jatouñigirunün. Joucha jumá lun medéreragüdün jumáni jawádigimari, lugúndun mabuídunbei jamúga giñe líra jun.

¹⁸ Ayúmuragua jumá lun Búngiu wawágu, choúru wamúti luágu darángilañu líña lan warítangun quei busén wabei buíđu lan wouserun lídan sun cátei.

¹⁹ Amúriajatina júma lun jayúmuragun lun Búngiu lúnya gayáraabei lan nídin aríjaün madíse.

Abíniruni buri lúma lagúmujoún buri mábugüi

²⁰ Ayúmuraguatina lun Búngiu, le íchugubalin darángilaü, le giñe ásaraagüdübalin Wabúreme Jesucrístu lídaangiñe ouweni, lun líchuginí lun ubáfu le busénwabei jun, lun jadügüni lugúndan. Wabúreme Jesucrístu ában le atouñigiruti lumútuniña buíđu queísi ában atouñigiruti mudún. Ítara líña ladüga líta, le achoúrurubalin lídaradun Búngiu, le adúrarubei lun sun dan, wáma.

²¹ Ayúmuraguatina giñe lun Búngiu lun luwádigimaridun jídan, lídaangiñe Jesucrístu, lun gayáraabei lan jíchugun ugúndaní lun. ¡Uweíriginí lun Crístu lun sun dan! Ítaralá.

²² Nidújeñu, ayúmuraguatina jun lun jerésibiruni dimúrei le abúrüja náalibeí jun tidan murúsun gáradá to.

²³ Níjan ában ugánu jun— ¡furíjali wadúje Timotéo furísunrugugiñe! Anjein ñübin yájoun, nanügübei númagua dánme le nídin aríjaün.

²⁴ Mábuga níña joun sun tábutigu lígílisi lúma joun sun jíbiri wadújeñu lídan wafíñen. Mábuga jáña wadújeñu ja Itáliano jun.

²⁵ Binílaün Búngiu sun jugúya, ítaralá.

LIGÁRADAN SANTIÁGO

Labüríjan Santiágo joun tílana ligílisi buri ja chagágubaña

¹ Áu Santiágo, eseriwiduti lun Búngiu lúma lun Wabúreme Jesucrístu áu, mábuga niña joun ja jadügawagubaña dúusu lirájüñü Israél ja chagágubaña lídan sun ubouú.

Subúdi le nübinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguaügü oúchawagúni.

³ Subúdi jumáali luágu dan lan le louchawagún jafiñen, furéndeitimaatün gagúraasuni.

⁴ Ítara líña lubeíti, maríbadalá jarítangun lueígiñe jóuchawagún, lubáragiñe líra, ígira jumeí oúchawagúni ligía lun líchugun lánwoun jugúraasun, lun loustarun lubuídun jigáburi, úouga mégeiti luágu.

⁵ Dan le ibídiñe lan jun cába lan jadüga lídan ában lénreengunga, amúriaja jumá lúma Búngiu, ábame lasúbudiragüdüni jun cába lan jadüga. Rúlumuti Búngiu subúdi le jamúriajan lánigu lúma joun, quei jamúriajani, mariñagunga ni cáta joun luágu.

⁶ Lúnti jamúriajan láu afíñeni luágu líchugubei lan Búngiu le jemégeirubei jun, máma láu liloúguan afíñeni, le lougua tafiñen, ítara líña quei ában lugúdi barána le lanügübei garábali lueígiñe ában oúbaü lun luágun ámu.

⁷ Gürígia le medéraguagüdünti lafiñen, marítugalá luágu libíjuba lan ni cáta lúmagiñe Wabúreme.

⁸ Lugúndun gürígia le afíñe líñabei, mafiñen, siñáti lasígirun ában igáburi le derégüdaguati luágu ni cáta.

⁹ Idújei le gudémebei, majírudalá luágu, gúndaalá luágu írisini le siélubei lubá.

¹⁰ Léti idújei le rísibei, manáangualá lúngua luágu, gúndaalá luágu larúfuduni Búngiu lun luágu mebégi lan lírisin lun ni cáta lídan cátei le lánina siélu. Lugúndun ítara líña rísiti quei lufúlurin jíduru, le siñábei ladúrarun.

¹¹ Dan le láfuridun wéyu, ába lásüdün sarágu, ába lásatürün jíduru, ába leíguadun lufúlurin, ába lagúmuchun lubuídunmeräü. Ítara lúba giñe rísiti. lachülürüba wéyu lun louñwen, ábame lígiruni sun láfaagun luágu seinsu.

Oúchawagúni lúma adúndejoúni lun wuríbani

¹² Gúndaati gürígia le awándubalin oúchawagúni láu gurásu, lugúndun dánme le láfuridun láu buídu, libíjubei íbágari magúmuchaditi le uágubei laríñaga Búngiu luágu líchugubei lan joun ja jínsiñejabúbaña lun, queísi ában afáyeirujaü, queísi ában rídi.

¹³ Dan le lebélorun lun ában gürígia lun ladügün cátei wuríbati, marítugalá luágu Búngiu lan ádarubalin cátei ligía lídoun, lugúndun mebéluti lídoun Búngiu lun ladügün wuríbani, máda lumúti giñe jádoun gürígia lun jadügüni.

¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladügün le wuríbabei.

¹⁵ Lídaangiñe buri luríban ayúmajani le, liábin figouú, ában íbágari lánina figouú barüti ouweni.

¹⁶ Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani.

¹⁷ Lubáragiñe líra, sun buíti le íchugúbei woun, le úabei mégeiti luágu, lúmagiñe Búngiu le adügübalin lilámpuna siélu liábin. Búngiu súnwandan ligía méme lan, úati saánsiguaü lídan quei lilámpuna siélu le gabúlubudadíbei.

¹⁸ Ligía lugúndaabei lun ladügüniwa lirájüñüme láu wafíñerun luágu lerérun le inárüñibeí, lun itara wamá quei furümiñeti alúbajani le íchugúti lun Búngiu lídaangiñe buri cátei le ladügübei.

Ligáburí agúnfuliruni lúma Búngiu le áubei lagúndaara

¹⁹ Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun,

²⁰ lugúndun güriía le gáñibeí, madügün lumúti le áubei lagúndaara Búngiu.

²¹ Ígira jumeí lubeíti sun iwíyeni lúma luríban igáburí le jídaangilibeí, resíbi jumeí ugánu le bunáwaalibeí tídan janígi láu ünabuni, lugúndun gabáfuti ugánu ligía lun lasálbarunun juwáni.

²² Adüga jumeí le taríñagubei Lerérun Búngiu, máma lun agáambarügü jumáni. Ánjein jarítagua jubeí luágu buídurügü lan lúnrügü jagáambuni Lerérun Búngiu, jeyéedaguña júngua.

²³ Le agáambarügübalin, madügün lumúti le lubeíbei, ítara líña quei ában güriía le aríagubei lúngua tídan ában isúbusein.

²⁴ Aríja lumúti ída líña lan, áni quei lídin, ítara labúlieiduni ída líña lán buga.

²⁵ Ánjeinti güriía le jéchubei atúriajeí Lerérun Búngiu le úabei mégeiti lídan, áni furáangugüda láwa lueígiñe figoú, mabúlieidun lubeí le lubeíbei, adüga lumúti le laríñagubei Lerérun Búngiu áni gúndaati le tímataimati.

²⁶ Güriía le jarítagubei luágu gúnfuli lan lúma Búngiu áni siñá lumutu liñéñe erédera, leyéedaguña lúngua áni úati ju lan ligáburí lagúnfulirun lun ni cáta.

²⁷ Niján agúnfuliruni le jarúmabei, le áubei lagúndaara Wáguchi Búngiu. lun wíderaguniña magübürigujaaña jáma wúrífña ja jiláaña úmari lídan jadíjeri, lúma lun madáseirun wamá láu buri cátei wuríbati le lání uboú le.

2

Lúnti ában lan láu janügün sun güriía

¹ Nidújeñu, queisi jugúya lan güriía ja afíñebaña luágu Wabúreme Jesucrístu le weírígubei, moún lumuti ámu lan janügün ában güriía jaweí jíbiri.

² Queí buri jamúga, lun jamúga lebélorun ában wügüri lídoun jadámurin láu bágü gólu túma anáanguní finutu, belú ligía gíñe ában gudémeti táu anáanguní juchécheeru,

³ ánjaün eténira lun le finubei anáangun buídu, lun jaríñagun lun. “Ñurúba ya lídan ubáraü buíti”, jaríñaga lun le gudémebei. “Amürü, reídeibá rára, o ñurúba ya múarugu”,

⁴ janügüña ában güriía ámu lueí le ában, áni jagúseragüdüña láu luríban arítaguni.

⁵ Nidújeñu jínsiñetiña nun, agáamba jumeí cátei le. anúadaja láaña Búngiu ja gudémebaña lídan uboú le lun risi jamá lídan jafíñen, lun gíñe jerésibiruni arúejjani le uágubei laríñaga Búngiu joun ja jínsiñejabúbaña lun luágu líchugubei lan joun queisi jalágaante.

⁶ Ánjeinti jugúya, rújumutiña gudémetiña lídoun busíganu. ¿Máma funági rísitiña ja wuríbabei jóuserunün, áni barújamaün adúruujeina ligíbugiñoun lúrudu?

⁷ ¿Máma jagía adímurejabaña wuríba luágu líri Crístu, le inébebei jun, le únbei jedéregeragua júngua?

⁸ Ánjein inárüni lubei luágu gúnfuli jumáni líñun-ágei lúrudu queísi tariñaguni Lerérun Búngiu. “Jínsiñelá gürígia bíledi bun quei bínsiñegua búngua”, buíti jadúga.

⁹ Ánjein máma lubei ában láu janügüniña sun gürígia, jadügüña figóu, dürügua jumúti lilúrudun Búngiu.

¹⁰ Lugúndun ánjein agúnfulira ában gürígia láu sun lúrudu, ígira lagúnfulirun ában lídaangiñe, gadúnrunti luágu ladúraaguni sun lugúmadin lúrudu.

¹¹ Lugúndun Búngiu méme le aríñagubei. “Madúgabá salúfuri”, aríñagati giñe. “Máfarajabá.” Ánjein lubeiti madügün gürígia salúfuri, áni áfarajati, mídinti láu le lubei lúrudu.

¹² Jugúya, lúnti jadímurejan, agáburida jugúyame queísi lúntiña jagúserawagüdüñ lúu lúrudu le furáangugüdüdabaliwa luei lubáfu figóu.

¹³ Ja magúdemejabubaña joun ámu, magúdemejabubei giñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáni agúseruni.

Afiñeni lúma wadágimanu

¹⁴ Nidújeñu, ¿cásan ju lan laríñagun gürígia luágu afiñe lan luágu Crístu ánjein madügün ni cáta lun larúfuduni? ¿Gayáraati funági lasálbaruni afiñeni ligía?

¹⁵ Quei jamúga guetó, níjein ában idújei wügüri o würi emégeiruti anáanguni lúma eíginí,

¹⁶ lariñaga ában jídaangiñe lun. “Buídulá lídin bun, darúguabá bougua, jou amürüme,” áni míchu lumúti le lemégeirubei lun, ¿cági ju lan líra?

¹⁷ Ítara líña lasúseredun lúma afiñeni. ánjein marúfudun jamá gürígia láu cátei le jadügübei, afiñeni lábugarügü, ítara líña quei ában cátei jiláali.

¹⁸ Fágua níjeinbei aríñaguti. “Amürü afiñetibu, áu adúga numúti le buídubei.” Áu Santiágo aríñagatina lun idújei ligía. “Arúfudabeíti bafiñen nun bougudin luei buíti le badügübei, narúfudeime nafiñen bun láu buíti le nadügübei.”

¹⁹ Afiñetibu luágu ában rügüñein lan Búngiu, buíti badúga, afiñetiña giñe máfianu luágu líra, adádagara jagía láu anúfudei luei.

²⁰ ¿Májatibu bafiñerun, ibídiougua táu amürü le, luágu jiláñu líña lan lafiñen gürígia ánjein marúfudun lan láu le ladügübei?

²¹ Resibi lumúti Búngiu Abrahám, le binádu wáguchi, queísi richáguati ligíbugiñe luágu le ladügübei dan le lánjarun lún yebe láfaruni Isáac le líraü jilágubei queísi adágaragüdüni lun Búngiu.

²² Aríja báali luágu arúfuda lání Abrahám lafiñen láu cátei le ladügübei, áni ñübinti lafiñen lun dayáruubei lan láu cátei le ladügübei.

²³ Ítara líña lagúnfulirun le bürüwañubei tídan Lerérun Búngiu. “Afiñeti Abrahám luágu Búngiu, áni luágu lafiñen, ába lerésibiruni Búngiu queísi wügüri richáguati ligíbugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáli lubeiti, luágu resibi lání giñe Búngiu wügüri luágu buíti le ladügübei, úara lúma lafiñen, áni mámarügü luágu lafiñen.

²⁵ Ligía méme meja asúseredubei tun Raháb, to jóru lídan dan le sügüjalibei. resibi lumútu Búngiu queísi richáguatu ligíbugiñe dán meja le tarúfuduni tafiñen luágu láu cátei le tadügübei –safá tumútiña loúnagülegu Josué, ába tíderaguniña lun jagíribudun lídaangiñe ámu üma.

²⁶ Ítara quei jiláñu líña lan úgubu ánjein úa tubeí uwáni lídan, jiláñu líña giñe jafiñen ánjein marúfudun jumá láu cátei buíti le jadügübei.

3

Lúnti wabúgurunun wañéñe wayúmulugu

¹ Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáli luágu wagía lan le arúfudajabei, derégüdatimaabei lan wagúserawagüdü.

² Sun wagía adügatiwa cátei charáti, ánjein níjein lubeí ában güri-gia madügünti ni murúsun charáti lídan le laríñagubei, ában wügüri buíti le gumúti ligía, le giñe gayáraabei labúguruni sun lúgubu.

³ Dan le wagürüni jayúma anímaalugu lun jagáambuniwa, gayáraati wabúguruni sun jágubu.

⁴ Aríja jumóun buri giñe ugúnein, láu sún buri weínamu tan áni jéreburi garábali le ádajabarun, abúgura lumútu abúguruti láu ában liraüraü simúnu le ñijin lumúti labúseera.

⁵ Ítara líña giñe lasúseredun lúma wayúma, ában cátei ñúraüraüti, áni gayáraati ladügün sarágu buri cátei weínamuti. ¡Láu murúsun wátu geméti, gayáraati lágudün ában oúnwenbun áraabu!

⁶ Ítara líña wayúma quei ában wátu geméti. Gayáraati wadügün sarágu wuríbani láu, gayáraati lagádeiruni sun le wagíabei. Gayáraati líchuguniwa lídoun wuríbani lídan sun wabágari, Máfia guánarü lébunabei sun le.

⁷ Gayáraati lagídaruni wügüri jagáñi sun jawúyeri anímaalugu gáñitiña –dunúru, jéwe, jáma anímaalugu baránajana—áni adüga láali.

⁸ Úati ni ában lun gayára lan lagídaruni ligáñi wayúma. Ában wuríbati ligía le mígiraguagüdübei lúngua, áni buin líña láu peísini le gáfarajati.

⁹ Láu méme wayúma wadímureja buíti luágu Wáguchi Búngiu, láu giñe wíñaraguaña güri-gia ja ladüga Búngiu lenége.

¹⁰ Lídaangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le.

¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti.

¹² ¿Gayáraatisan tagíndun ában tídibu figi fáluma, ódi gayáraati tagíndun tídibu beíbei figi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibei

¹³ Ánjein níjein lubeí ában chu táu jídan, gunfaráanda ligía, arúfudaleí láu lubuídun loúserun, láu ünabugubuni le líchugubei lisúbudin lun.

¹⁴ Ánjein níjein lubeí gimúgaü tídan janígi, áni jadügüni cátei láu jarítangun juágun guánarügü, moún lumúti janáangun júngua luágu jisúbudin, lugúndun iyéni líra.

¹⁵ Máma niján luwúyeri subúdi le ñübinbei lúmagiñe Búngiu, ában subúdi le lánina ubou líra, le lánina jasáminan güri-gia, le láni méme Máfia.

¹⁶ Lugúndun le ní lumuti gimúgaü lúma marítawaguni jawágun ámu, níjein chagáguauñi ní lúma sun luwúyeri wuríbani.

¹⁷ Ánjaña ja gámabalin subúdi le lúmagiñebei Búngiu, furúmiñe níjein ában ibágari jarúmati jawágu, gálumatiña, areídatiña, gagáambaditiña, gudémejabutiña, adüga jamúti le buídubei, ában lábu janügüniña sun gürígia, furáangutiña.

¹⁸ Ja áluajabalin darángilaü, bunáguatiña ílaü lun lalúbajoúniwa ában ibágari le richáguati jádan, lúma jádan ámu.

4

Gamádaguaü lúma ubou

¹ ¿Cá buri ueígiñe jabúseera jawúribujan, lúma jageíndagun? Ladüga buri lagübüri ayúmajani le jídaanbei súnwandan.

² Buséntün som cátei, queíti siñá jumani íbija, ába jáfarajan. Gimúgatün luágu som cátei, queíti siñá jumani íbija, ába jageíndagun. Mibíjin jumúti le jabúseerúbei lugúndun mamúriajan jumáni lúma Búngiu.

³ Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagübüri jugúndan.

⁴ ¿Gürígia múraantiña! ¿Íbidiñetísan jun luágu ánjein lan gamádagua jubei lúma ubou, jáganiñein lan Búngiu?

⁵ ¿Jarítaguatünsan luágu mála lan le tariñagubei Lerérun Búngiu luágu buri cátei le? ¿Jarítaguatün funági luágu Espíritu lan le lagánawagüdubei Búngiu wádan ában lan espíritu le lánina gimúgaü? Uá.

⁶ Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jilágubei. Tariñajare Lerérun Búngiu. “Rúlumuti Búngiu lanágan jawágun ja barúguabaña joúngua, áni íderagua lumútiña ja únabugubaña, láu lareíni.”

⁷ Rúgua jumá júngua lábugiñoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí.

⁸ Yaráfa jumá lun Búngiu, ábame gíñe layárafadun jun. Jugúya le busénbei jesériwidun lun Búngiu lúma lun ubou, gafíngonjadün, ítara líña lubeíti, jarúmagüda jumeí jigáburí túma gíñe janígi.

⁹ Lídan le jayárafadun lun Búngiu, aságüríja jumá luágu jifígon láu águiraü. Gáritá janígi luágu luríban jigáburí lúma Búngiu, sáansigualá jugúndan lun íruni luágu jifígon.

¹⁰ Ünabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹ Nidújeñu, madímureja jumá wuríba jawágu jíbirigu. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilúrudun Cristu le aríñagubei luágu moun láni ladügüniwa, áni ladáriruña mégeiti luágu. Ánjein jadüga líra lubáragiñe jadügüni le lubeíbei lúrudu, jichaaguña júngua queísi agúseragüdüti.

¹² Ában rügüñein agúseragüdüti, le íchugubalin lúrudu ligía, le Crístubei méme, lérügü gabáfubei lun lasálbajan o lun lagünrinchagun. Ánjein bugúya, ¿cátabuñadíbugi lun badárirun lidúnrun ámu?

Machouúrurunalá luágu jarúga

13 Guetó, agáamba jumeí cátei le, jugúya le aríñagubei. “Ugúñe o jarúga wouídiba lídan itaga fulásu, ábame webélujan ñi ában irúmu, wawádigimaribei waseínsun lun wabíjin lánwoun.”

14 ¿Ída liñásan jasúbusiruni cába lan asúsereda jarúga? ¿Cáteiñeigi jibágari? Ítara liña quei jeméreedu le asálrágubei luágu murúsun dan, lárigiñe ába lagúmuchagun.

15 Aríñagarügütün jamúga. “Ánjein busén Búngiu, wabágariduba, ábame wadügüni le o líra.”

16 Ánjeinti jugúya, jadímurejan láu pántaü luágu cátei le jarítagubei lun jadügüni, áni sun pántaü le, mabuídunti.

17 Afíñetina luágu ánja jumá lun sun le, wel, le subúdiwabubei lun ladügün buíti áni madügün lumúti, ladügüña figou.

5

Ewéridijani joun rísitiña

1 ¡Agáamba jumeí cátei le, jugúya rísitiña le wuríbabei igáburí! Chülüjali óra lun jayájuajan, wágua jugúyame luágu buri lamíselu le lúnbei jasúfuriruni.

2 Ñaláli buri jirísín, jou jamáaru jamútiri janáangun to fínuboun.

3 Gájüjali jigólun lúma jáni pláta, áni láu cátei méme le, arijúati jarügüren, ábame jagúnrinchawagún lueigiñe camá jamuga láu wátu geméti. Oúndaraguaadün sarágu irisini lídoun buri lagúmujoún dan le.

4 ¿Ánti fáyeiti le míchu jubei joun ja ñadágimeinbalin jichári? Ánjein jamúga gayáraati, lagúajaña jamúga fáyeiti ligía luágu jidúnrun, agáamba láali Búngiu jamúriajan ñadágimeintiña jagía juágu.

5 Rúguaadün júngua lun ában ibágarí lánina wéndeí lúma ugúndani ya ubouágu, ibíja jumáli sun le jabúseerúbei quei jadíbunedagüdúniwa animaa lu lubá jáfarun, yaráfaali giñe jagúnrinchawagún sun jugúya.

6 Rújadün jadúnrun ja madúnrunbaña, áfaragua jumáña jilágubei, madügünga jagía ni cáta le lébuna jáfaraguniña.

Gurásu lúma ayúmuraguni lun Búngiu

7 Ligía lubeíti, nidújeñu, gagúraasun jumá daríme liábin Wabúreme Jesús. Ábunaguti le agúrabubei ladügün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun.

8 Gagúraasun jumá giñe, máburujan ligíame jarúna, lugúndun madíseeli liábin Wabúreme.

9 Nidújeñu, mequéjera jumá jawágu jidújeñu lueigiñe Jesucrístu, magúserawagüdün jumámuga, yaráfaali lidáani Búngiu lun lagúseragüdün.

10 Nidújeñu, barü jumaña profétagu já meja adímurejabaña lídan líri Wabúreme queisi ában jémpulu lánina gurásu luágu asúfuriruni.

11 Wagía, barü wamutiña ja awándubalin asúfuriruni queisi gürígia gúndaatiña. Agáambaadün luágu lugúraasun Job, áni subúdi jumáli giñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

12 Lougiñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoúruruni jerérun. Dánme le jariñagun “ánja”, lun ánja lan, dánme giñe le jariñagun “uá”, lun giñe uá lan, míchugun lámuga Búngiu jidúnrun.

13 Ánjein lasúfuriruña lubeí ában jídaangiñe, lúnti layúmuragun lun Búngiu.

14 Ánjein sándiñein lubeí, lúnti lagúarun joun tábutigu ligílisi lun jayúmuragun lun Búngiu luágu, lúma lun jájurudaguni láu áili lídan líri Wabúreme.

15 Dánmeti le jayúmuragun láu afiñeni, ábame lareídagun sánditi, áni ánjein gíñe afigounjaali lubeí, ferúdunawabei lifígoun.

16 Ligía, gúfese jumeí lubeí jifígoun joun jidújeñu lueígiñe Jesucrístu, áni ayúmuragua jugúyame jawágu lun jareídagun. Weíriri lubáfu ayúmuraguni lun Búngiu le ladügübei gürígia le buíti táu sun lanígi.

17 Proféta Elías ában meja wügüri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga ürüwa-irúmu-dimí.

18 Lárigiñe, dánya le layúmuragun, ábaya lájuyun júya, ábaya tájüchün sun inádirigu ubouágu.

19 Nidújeñu, ánjein egéyeda ában jídaangiñe lueí üma le richábei, liábin ámu lun lagíribudagüdüni,

20 subúdi jumeí luágu furúmieguarügü lan agíribudagüdüti le afigounjabei lídaangiñe luríban lémeri, lasálbaruboun lan luwáni afigounjati ligía lueí tídin máfiougati, áni ferúdunagüdaleíme sarágu lifígoun gürígia lé yebe acháragadubei.

FURÚMIÑETU LIGÁRADAN PÉDRO

Labürüjan Pédro joun afiñetiña ja chagágubaña boúgudi luei jageira

¹ Áu Pédro, ában láni Jesucristu apóstolu áu, nabürüjañoun gárada to jun, jugúya lánigu Búngiu ja chagágubaña boúgudi luei jageira loúbawagu Pónto, Galácia, Capadócia, Ásia, lúma Bitínia.

² Nidújeñu, anúadaja láadün Búngiu Úguchili lúmagiñe meja binárü lun lánigu jumá, áni subúdi lumúti meja luágu lachülürüba lan ában wéyu lun ítara lúba lan, ladüga ligía lan lugúndaanbei. Ligía larúmadagüdañajañoun lubei Sífiri Sándu janígi láu líta Jesucristu, adügalaün lun gagaámbadi jumá. Ibíja jumá lubeiti sarágu abíniruni lúma darángilau lúmagiñe Búngiu.

Loúchwagúba jafiñen, ábame liábin buíti lídaangiñe

³ Rúwama uweírighuni lun Búngiu, le Lúguchibei Wabúreme Jesucristu, luágu luweírín lugúdemejabu woun. Rújali iséri ibágarí woun queísi lirájüñü láu lásaaragüdüni Cristu lídaangiñe oúweni lúnya labágaridun.

⁴ Queísi lirájüñü wabei, gayáraati weménigidun le gumúti luágu wabíjubei lan ubuíduni le aráanse láalibei wabá, gayáraati weménigidun luágu werésibirubei lan alágan le areídañu lubei Búngiu wabá, siélu—ában alágan le lúnbei ladúrurun lun sun dan, le siñábei ladáseirun, le siñábei leféridiruni lubuídun.

⁵ Goúnigi lumútiwa Búngiu láu lubáfu lugúndun afiñe wamá luágu, lun gayáraabei lan wabíjini asálbaruni lídaangiñe asúfuriruni lánina ubou le, le aráanseñu lubei wabá lárighiñeme lagúmunchun ubou.

⁶ Ligía lébubei buin jíña lan láu ugúndani, láu sun lúnti lán funa jasúfurirun sarágu oúchwagúni luágu murúsun dan.

⁷ Lúnti jasúfuriruni oúchwagúni ladüga ítara líña lan jafiñen quei gólu—lúnti louchúniwa láu wátu geméti lun laríjiniwa ca lan luwúyeribei. Afiñeni le awánduti oúchwagúni ligía, buíti sügü láu gólu, lugúndun gagúmuchaditi gólu. Láu lubeiti jawánduni loúchwagún jafiñen, ladímurejaba Jesucristu buíti juágu dánme le lagíríbudun ubouágun, jibíjuba giñe uweírighuni lúma inébesi lúmagiñe.

⁸ Jinsiñeti Jesucristu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában oúnwenbun ugúndani le siñá jumuti aríñaga láu dimúrei.

⁹ Ladüga méme luweírín jafiñen luágu Cristu, jerésibiruñein tasálbarun juwáni.

¹⁰ Lídan meja dan le sügüjalibei, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe.

¹¹ Subúdigüda lumútija láni Cristu Espírítu joun wügüriña jagía le lúnbei lasúfuriruni Cristu lubáramegiwa, lúma uweírighuni le lúnbei liábin lárighiñe. Jagiati, ábaja jóuchun jasúbudiruni cátei lan gürígia ligía, lúma ídaba lan lasúsereda cátei le, le uágubei laríñaga Sífiri Sándu le jádaanbei joun.

¹² Ába lasúbudiragüdüni Búngiu joun luágu mámaba lan lídan jadáani lagúnfulirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija gürígia jun lídoun buri dan

le, láu lubáfu Sífiri Sándu le ñúbinbei siéluigiñe. Ásta ánjeligu, buséntiña jamúga giñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³ Quei jagúrabajañein lubei jerésibiruni jalágaante siélu, gidájumei samínaü málati jarítangunrugugiñe, lubáragiñe líra, derégüdagulá jarítangun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucrístu ubouágun.

¹⁴ Queísi isáanigu gagáambaditiña, mabágarida jumá quei meja ligáburí jabágaridun lubáragiñe meja jasúbudiruni Búngiu.

¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei.

¹⁶ Tariñajare Lerérun Búngiu. “Jarúma jumá, lugúndun áu, jarúmatina.”

¹⁷ Queíti janügüni Búngiu quei Júguchi, Búngiu le ábanbei lábu ligáburí lagúseragüdüni jagáburí sun gürígia, lúnti júaradun lúma láu ában goúnigi sun dan le lúnbei jabágariduni ya ubouágu.

¹⁸ Sálba láadün Búngiu lídaangiñe lagübüri ibágari lé meja jafúnrendeirubei jámagiñe binádu jagübürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi buri gólu o pláta,

¹⁹ Láu líta Crístu le gebégibeí sügü láu sun cátei lafáyeirúa. Derégewati Crístu lun loúnwen luágu wafígoun quei ában mudún le buídubei lídan sun luwúyeri, sálba wamámuga.

²⁰ Lúmagiñe lubáragiñe buga ladügüni Búngiu ubouá, ába laráanserun lun Crístuba lan Wasálbaragüle, luágu lubeíti wafúleisein lachúlaagua Crístu lídoun lagúmujoún dan le, lun lasálbaruníwa.

²¹ Lídaangiñe Crístu, ába jiyábin lun jafíñerun luágu Búngiu le ásaaragüdúbalin Crístu lídaangiñe ouweni, ru ligía uweíriginí lun, ítara líña jiyábin lun jafíñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu lueígiñe Jesucrístu jun le tímatimaati. Lúnti lubeíti jínsiñegua jumá júngua láu sun tarúman janígi, lúma láu sun jére,

²³ lugúndun iséri gürígia jugúya. Mámaadün jasáanigu agübürigu ja goúwedaditiña, lirájüññjadün Búngiu láu jagáambuni lerérun le íchugubei ibágari, le giñe adúrarubei lun sun dan.

²⁴ Tariñajare Lerérun Búngiu.

Ítara jáña sun gürígia quei jíduru, líabin jaweírigin quei lufúlurin jíduru.

Dan le lásaurün jíduru, ába láburujan lufúlurin,

²⁵ ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2

¹ Ligía, queísi lirájüññjadün lubei Búngiu, ígira jumei lubeíti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu.

² Ítara quei jabúseeruni irájüññ figígíña míligi jarúmati lun gayáraabei lan jaweínamudun, ítara lá giñe busén jumá lun jatúriajani Lerérun Búngiu buídu lun gayáraabei lan ledérebugudun jafíñen luágu Crístu.

³ Subúdijadün murúsun luáguti luweírin lubuídun loúseruníwa Crístu, lúnti líchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴ Ayárafajouá jumá lubeíti lun Crístu le gabágaribeí. Rútiña gürígia mebéreseni luágu, ánjeinti lun Búngiu, ítara líña Crístu quei ában dübü le gebégiti sarágu, le lanúadirunbei lun ligiaba lan ébuu tun lilígilisin, áni sun ja afiñebaña luágu Crístu, jagía lilígilisinbaña Búngiu.

⁵ Ítara líña lubeíti, ígiraguagüda jumá júngua lun Crístu le rúlaalíbei íbágari magúmchaditi jun, lun tadügüniwa ában témpulu buítu lun Búngiu jídaangiñe, lun giñe ítara jumá quei fádírigu ja derégeguatiña jóungua lun Búngiu, ja íchugubalin cátei le áubei lagúndaara lun, lídaangiñe Jesucrístu.

⁶ Ligía giñe tariñagunbei Lerérun Búngiu.

Nouñajañein Crístu lun ligiaba lan dübü le weírigutimaabei tuágu nilígilisin lídan fulásu le giríbei Sión.

Áni ja afiñerutiña luágu, buídubei lídin joun.

⁷ Weiriti lebégi Crístu jun, jugúya le afiñebeí luágu, ánjeinti joun ja mafiñebaña, mebégiti quei dübü le únbei jamájara ábunagutiña. Láu sun líra, gúnfulijali le tariñagubei Lerérun Búngiu.

Dübü le únbei jamájara ábunagutiña,

ñübinja lun ligiaba lan furúmiñeti lídan bunáguau.

⁸ Joun ja mafiñebaña luágu Crístu, gúnfuliti giñe le aríñawagúbei.

Ában dübü achúgeraguágülei ligía, le eíguadagüdüti gürígia.

Ja madügünbaña gásu láu ugánu lánina asálbaruni lídaangiñe Crístu, chugéguatiña luágu, fériditiña giñe lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le afiñebeí luágu Crístu, ában familia anúadajouátiña jugúya, fádírigu ja esériwidutiña lun urúei le Búngiu, gürígia lánigu Búngiu ja derégeguaaña jóungua lun. Ítara líña cátei le, lun jadímurejan luágu buri cátei buíti le ladügübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu.

¹⁰ Mibjintün meja ában abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹ Nidújeñu jínsiñetiña nun, jugúya queísi teréncha lídan ubou le, aganoútiña bougudi lueí jageíra, ayúmuraguátina jun lun mígiraguagüdün jumá júngua lun lagübüri buri ayúmajani le ageíndagubei túma juwáni.

¹² Buídulá jóuserun jádan ja íbidiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadügübei, ábame jíchugun uweíriguni lun Búngiu dánme lachülürün wéyu lun lagúseragüdün.

¹³ Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya ubouágu. Gúnfuli jumá lúma lugúmadin urúei, quei ligía lántima íñubei ufúlasun,

¹⁴ gúnfuli jumá giñe lúma jagúmadin gumádimatiña ja loúnajabaña lun jafáyeiragüdüniña ja múaradúnbaña lúma lúruu, lúma lun jíchugun uweíriguni joun ja adügübaña buíti.

15 Busénti Búngiu lun jadügüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

16 Queísi lirájüñü jumá Búngiu, oúsera jumá queísi güriúa ja mámabaña idámuni lun ni ában güriúa, máma lueigiñe líra lun jadügüni le wuríabei, lubáragiñe líra, abágarida jumá queísi lidámun Búngiu.

17 Inébe jamá sun güriúa jun queísi lubúdubu, jínsiñe jamá jidújeñu lueigiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

18 Umúsuniña, inébe jamá jiyúbudirigu jun queísi lubúdubu, mámarügü ja buídubaña júma, ásta giñe ja wuríbabaña.

19 Lugúndun labínirubei Búngiu güriúa le awándubei asúfuriruni le mébunati láu laritagun luágu Búngiu.

20 Ánjaün adüga cátei wuríbati, jafáyeira luágu, málati gagúraasun jumá luágu líra, ánjaün asúfurira lueigiñe jadügün cátei buíti, ába jawánduni láu gurásu, buíti líra ligíbugiñe Búngiu.

21 Lun luwúyeri igáburi le lagúara Búngiu juágu, quei sáfuri lubei Crístu juágu láu gurásu, íchiga ában jémpulu jun lun jafálaruni.

22 Madügünti Crístu ni ában figou, meyéeragun ligía güriúa ni ában weíyaasu.

23 Dan le janábuni, moúnabunti láu anábajani, dan le jasúfuriragüdüni, masiadirun lumútiña, lubáragiñe líra, derégegarügüti lúngua lun Búngiu le agúseragüdübei lau ísuruni.

24 Barü lumuti Crístu guánarügü wafígoun luouúa luágu gurúwa lun weréderun quei jiláñu lun figou, lun wabágaridun ában ibágari le lánina ísuruni. Buleíseiwati lun wareídagun.

25 Ítara jíña meja quei mudún ja féridijaña, ánjein guetó, ñübinjadün lun Crístu le oúnigirubalün queísi jóuniri mudún, toúnigiloñu juwáni.

3

Ligáburi jabágaridun maríeitiña

1 Ítara giñe jugúya wúriña gámaritiña, derégegua jumá júngua joun júmarigu, lun ánjein lan mánjagiña lubei lun ugánu lánina asálbaruni, gayára lámuga jayábin lun jafiñerun luágu Crístu, maríñagunga jugúya ni cáta joun luágu asálbaruni,

2 láurügü jaríjini lubuídun jóuseruniña láu inébesi luma larúman igáburi.

3 Mámala láu buri cátei bouguditi jibíti jewéndeda, quei buri lanárime arouraguni, arígeilaü luma buri bángüli le gólu, anáanguni wéndegutu,

4 tídaanlá janígi jewéndeda, le ábanbei ubuíduni le meféridirawadibei. Ában igáburi bímeti, darángila, ligía cátei gebégibe sarágu ligíbugiñe Búngiu.

5 Ítara liñá meja ligáburi jewéndedun wúriña já meja derégeguañabaña jóungua lun Búngiu lídan meja dan le sügüjalibe. Jeménigitiña meja luágu Búngiu, derégegua jagía jóungua joun jámarigu.

6 Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadüga le buídubei, manúfudeiga luei ni cáta.

7 Jugúya giñe wügüriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueigiñe mére tántima wúri, lugúndun giñe rúlaani Búngiu ibágari méme magúmuchaditi le líchugubei jun láu lareíni, joun.

Adüga jumeí itara, úa lámuga ni cáta lun leréderunün lueí jayúmuragun lun Búngiu.

Ja asúfurubaña lueígiñe jadügüni le buídubei

⁸ Abágarida jumá sun jugúya lídan úarani lúma láu gudémejabu jídaangua, jínsiñegua jugúyame júngua queísi idújeñu lueígiñe Jesucrístu. Areída jumá, únabu ligíame janáangun júngua.

⁹ Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun taríñajare Lerérun Búngiu.

¹⁰ Le busénti labágaridun ában ibágarí buíti, lúma giñe ában ibágarí lánina ugúndani,

lúnti louñigiruni liyúma lueí ladímurejan wuríbani, maríñagun ligíame iyéeni.

¹¹ Lúnti ladisedun lueí wuríbani lun ladügüni buíti,

láluajani darángilaü lun labágariduni súnwandan.

¹² Lúnti itara lan ligáburi, ladüga touñigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adügübaña wuríbati, magúndaati Búngiu jáu.

¹³ ¿Cábagi gayára ladügün wuríbati jun, ánjaün íchaagua júngua lun jadügüni buíti súnwandan?

¹⁴ Ani íbini jasúfurirun ladüga lísurun jibágarí, gúnda jumá ladüga fuleíseiwa jumá lídan le jasúfurirun luágu Crístu. Manúfude jumá lueí ni ában, madíjeri ligíame jaritagun.

¹⁵ Derégeguarügü jumá júngua le gumúti lun Crístu quei Jabúreme, aráanseñu jumá súnwandan lun jóunabuniña ja álügüdütün ca lan ueígiñe jeménigida luágu Crístu, láu maweíriguni lúma láu inébesi.

¹⁶ Buidulá jóuserun, darángilañu támuga janígi, lun ja lan adímurejabaña wuriba luágu lubuidun jigáburi queísi afíñetiña luágu Crístu, nibúsigari jamámuga luágu jerérun guánarügü.

¹⁷ Buitimaati lun jasúfurirun lueígiñe jadügün buíti, ánjein itara líña lubeí labúseeruni Búngiu, sügü láu lun jasúfurirun lueígiñe jadügün wuríbati.

¹⁸ Jarítagua jumá luágu luweírin lasúfurirun Crístu dán meja le louñwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanügüniwa lun Búngiu. Áfarúati jilágubei, wínwantu lání Espíritu.

¹⁹ Quei Espíritu, ñüdünti giñe apúrichija joun espíritugu ja lídaanbaña jafúlusun jiláaña.

²⁰ Espíritugu jagía, gürígia ja wínwanbaña lídan meja lidáani Noé, magáambaditiña meja gürígia jagía lun Lerérun Búngiu láu sun arúfuda lání Búngiu luweírin lugúraasun joun lídan le lagúrabajani tagúmuchún árcato ladügúboun Noé. Mánjatiña jagáambuni Búngiu, ába jasálbarun wídürügü gürígia lídaangiñe luweírin gúnran ligía.

²¹ Dúna ligía, itara líña quei lidúnarina badísei guetó, le ídaangiñebeí wantügüwa lun wasálbarun. Máma lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu wafíñerun luágu Crístu, luágu giñe sálbaadiwa lan láu lásaarun Crístu lídaangiñe ouweni lúnya labágaridun.

²² Múdeiti Crístu siélun, áni níjein guetó ñun lueígiñe loúnwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

4

Wesériwidun láu ubáfu le líchugubei Crístu woun

¹ Ligía, ítara quei sáfuri lubei Crístu ya ubouágu wawágu, lúnti giñe aráanseñu wamá lun wasúfurirun láu gurásu luágu.

² Le sáfurijalibe luágu Crístu, ígira láali figou lun labágariduni líbiri libágarí queisi lugúndan Búngiu, máma lun líchugun ugúndani lun lagúburi ayúmajani.

³ Lidan meja dan le sùgùjalibe, adúga jumúti meja luríban buri cátei le jínsiñebei joun ja ibídiñejabubaña lun Búngiu, jaganouña meja lídan ibágarí nibúsigarídunati, gúnfulitún meja lúma luríban jayúmajan, abácharuada, adáagua fédu, átagua sarágu, ájuduragua joun sándu, le mouñbei ladügúniwa. Buídurúgaali dan le abágarida jumáalibe ítara.

⁴ Guetó, weíriti janígi já meja jumádagubaña láu mafála jumáaña lan lídan lagúburi ibágarí le, ligía jadímurejanbei wuríba juágu.

⁵ Ánjeinti jagía, jagúfeseruba ligíbugiñe Búngiu, le aráanseñubei lun lagúseragúdüniña winwangiña jáma jiláguaaña, madise.

⁶ Ligía apúrichijoua lubei meja luáguti asálbaruni joun ja jiláguañábaña guetó, lun gayáraabei lan gabágarí tan jawáni láu libágarí Búngiu, láu sun jilá lan jágubu queisi lasúseredun joun sun gürígia.

⁷ Yaráfaali lagúmuchun ubou, ligía lúnti lubei aráanseñu jumá, ragúgua jugúyame júngua, derégegua jugúyame júngua lun ayúmuraguni lun Búngiu.

⁸ Lougiñe sun cátei, níjeinlá sarágu ínsiñeni jídan joun jíbirigu, lugúndun ánjaün jínsiñejabu, ferúduna jubei jafígoun ámu juágu, láu sun gibe lan.

⁹ Resíbi jumáña gürígia júbiñe láu sun jugúndan.

¹⁰ Rújali Búngiu ában ubáfu lun ságü afiñeti luágu Crístu, ítara líña lubeiti, seríwi jumá joun jíbirigu láu ubáfu le rúlaalíbei Búngiu jun, queisi oúniri buítiña lánina ubáfu buri le líchugubei Búngiu.

¹¹ Le gabáfubei lun lapúrichijan, lúnti ladügúni queisi ában le adímurejati dimúrei lúmagiñe Búngiu. Le esériwiduti, adúgaleí láu sun érei le líchugubei Búngiu lun. Sun cátei le jadügúbei, adúga jumei lídan ában igáburi le lúnti líchugúniwa uweírighuni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweírighuni lun sun dan. Ítaralá.

Wasúfurirun queisi lánigu Crístu

¹² Nidújeñu jínsiñetiña nun, maweíridalá janígi láu buri lidíjeri ouchwagúni le jibíjubei, camá jamuga ába cátei ámuti asúseredubei jun.

¹³ Lubáragiñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu ubouágun láu sun luweírighun.

¹⁴ Fuleíseiwatún ánjaün anabúa lueígiñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weírighubei, jídan.

¹⁵ Ánjein asúfurira ában jidaangiñe, lun máma lan lueígiñe láfarajan, o lueígiñe lan líwerujan, ni lueígiñe ladúraaguni líbiri lúrudu, ni lueígiñe leméterun lídoun cátei le miábinti lun, mídin.

¹⁶ Ánjeinti asúfurira mútu lueígiñe lánigu lan Crístu, mouñ lumuti lanügün busiganu, lúnti líchugun eteíngiruni lun Búngiu luágu lánigu lan Crístu.

17 Chülüjali dan lun lagúmeserun luweírin asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubeí asúfuriruni ítara wámagiñe, weíritimaabei jasúfurirun ja mánjabaña jerésibiruni lerérun Búngiu.

18 Ánjeinti jénreengu lubeí jasálbarun ja buídubaña, ¿cábagi asúsereda joun ja wuribabaña, jáma ja gaffigounbaña?

19 Ja lubeíti asúfurirubaña queísi labúseeruni Búngiu, lúnti ítara méme jamá adúgei le buídubei, derége jamouñme jawáni lújaburugun Búngiu le adügübaliña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afiñetiña

1 Níchuguñein nerérun jun, jugúya ja ábutigubaña lídan jadámurin afiñetiña, queísi ábuti lan giñe áu quei jugúya, áni geféentina giñe luágu lasúfurirun Crístu, áni gabábadina giñe quei jugúya lídan uweiriguni le lúnbei liábin.

2 Toúnigi jumáña lirájüñü Búngiu ja lábugiñebaña jaríaajan queísi jóunigiruniña jóuniri mudún mudún. Adüga jumeí láu ugúndani queísi labúseeruni Búngiu, máma ladüga jafósuruña lan, adüga jumeí ladüga busén jumá jesériwidun lun Búngiu, máma ladüga línsiñegu seínsu.

3 Mousera jumá camá jamuga jabúriña ja lábugiñebaña jaríaajan jugúya, jóucharügü jumá lun ában jumá jémpulu buíti joun.

4 Ítara lúba, dánmeti le liábin Jesucrístu, le jóuniri mudún le tímatimaati, jibíjuba ában uweiriguni le weiriguti le ladúraruba lun sun dan, le mítaarañbei quei rídi le láuti ubánaü le gásaurati.

5 Jugúya gürigia ñübürigiña, rúgua jumá júngua lábun jagúmadin weíyaaña mútu. Lúnti jesériwidagun súnqubei jóunigua láu manáanguni únguaü, lugúndun tariñajare Lerérun Búngiu.

Magúndaanti Búngiu jáu ja barüguabaña jóungua, áni íderagua lumútiña ja manáangunbaña jóungua, láu lareíni.

6 Rúgua jumá lubeíti júngua únabu lábugiñe lújabu Búngiu le gabáfubei, lun gayára lan líchuguni uweiriguni jun dánme le lachülürün dan ligía.

7 Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

8 Agáguduañu jumá, ragúguañu jumá júngua, lugúndun eíbugañajádügü líña Máfia le jágani queísi líñún gáñiti áluaja cába lan lagúnrinchagua.

9 Mígiraguagüda jumá júngua lun, derégüdagu jumá lídan jafiñen, subúdiñu jumeí luágu ligía méme lan giñe jasúfurirubei jidújeñu lueígiñe Crístu lídan sun fulásu.

10 Lárigiñeme súfurijadün lan luágu murúsun dan, ladügübadün Búngiu lun úa lan mégeiti luágu lubuídun jigáburu, derégüdagu lídan jafiñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le giñe agúarubei woun lun gafánran wamá lídan luweirigun le magúmchadibeí, lídan ában lúma Jesucrístu.

11 Ligía le Súnti Gabáfu lun súnwandan. Ítaralá.

Lagúmujóun buri mábugaü

12 Noúnajañoun tiraúraü gárada to jun lúma Silváno, le nanügübei queísi ában idújei úraguati, lun níchugun dügüdaguáü lun jafiñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan

línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³ Mábuga jáña affiñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraü.

¹⁴ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

TIBÍAMAN LIGÁRADAN PÉDRO

Labürüjan Pédro joun affñetiña

¹ Áu Simón Pédro, ában eseríwiduti lun Jesucristu áu, ában gíñe lání apóstolu. Nabürüjañoun gárada to jun, jugúya le ñübinjalibeí lun gafánran jumá lídan luweírín asálbaruni le wabíjubeí lídaangiñe Wasálbaragüle Jesucristu, le méme Wabúngiute, lugúndun úaragua lan.

² Ibíja jumá sarágu abíniruni lúma darángilaü lueígiñe jasúbudiruni Wáguchi Búngiu lúma Wabúreme Jesús.

Igáburí le lúnbeí jóuseruni affñetiña

³ Rúlaali Búngiu sun le wemegeirubeí woun lun wabágaridun lúma lun weseríwidun lun, láu lasúbudiragüdüni Jesucristu le agúarubeí woun lun gafánran wamá lúdan luweírigin lúma lubuídun cátei le ladügübeí.

⁴ Gúnfuliti Búngiu láu lerérün, lídaangiñe Jesucristu, láu lichuguni le buídutimaabeí lúma le weírítimaabeí woun. Láu líra, gabáfu wamá lun wanúrajan lueí lagübüri ayúmajani lánina ubou le, ibíja wamámugeí ligáburí Búngiu wádan.

⁵ Ligía lúnti lubeí jáfaagun lun jíchugun lubuídun igáburí lánwoun jaffñen,

⁶ subúdi luágu Búngiu lánwoun lubuídun jigáburí, ragüguaü únguaü lánwoun jisúbudin luágu Búngiu, gurásu lánwoun ragüguaü únguaü, edéregeraguni únguaü lun Búngiu lánwoun gurásu,

⁷ areíduni lánwoun edéregeraguni únguaü lun Búngiu, ínsñejabuni lánwoun areíduni.

⁸ Ánjein níjein burí lubeí igáburí líra jídan le tímatimaati, mámabeí luágu ní cáta jisúbudin luágu Cristu, áni lichuguba jibágari sarágu cátei buíti lun Cristu.

⁹ Ánjeinti le mítaraanbeí ligáburí, ítara líña queísi ában maríjinti o ában lan madíse taríjin, bulíeilá luágu chibáwaali lan binádu lifígon.

¹⁰ Ligía lubeíti nidújeñu, queí wájali lubeí Búngiu jun, anúadajalaün lun lánigu jumá, áfaagua jumá lun lájüchün burí cátei le jídan, ánjein jadüga ítara, máburujabadün lídoun féridi.

¹¹ Ítara lúba úa lan ní cáta ásiñeragüdüti jebélurun lídoun larúeijan Wabúreme Wasálbaragüle Jesucristu, le magúmuchadibeí.

¹² Ligía narítaguagüda mémebadün lubeí luágu, láu sun subúdi jumáli lan, áni jeíbuguña lan lídan inárüni ligía.

¹³ Láu sun líra, sun wínwangidina lan, affñetina luágu buídu lan lun nagúaruni jarítangun lun luwúyeri íbágari le lúnbeí jabágariduni queísi lánigu Cristu.

¹⁴ Subúdigüda láali Wabúreme Jesucristu nun luágu yaráfaali lan wéyu lun nouñwen,

¹⁵ ítara líña lubeíti, nadügübeí nuáraati lun íbini lánme lárigiñe jíládina lan, lun súnwandan lan jarítangun luágu burí cátei le.

Já burí aríjubalin luweírigin Crístu

¹⁶ Arúfudajani le wíchugubeí jun luágu lagíribudun Wabúreme Jesucristu ubouágun láu sun luweírín lubáfu máma meja úraga, aríja wamúti meja luweírigin láu wágu.

¹⁷ Aríja wamúti dan le líchugunbei Búngiu Úguchili inébesi lúma uweíríguni lun, ába laríñagun lumálali Búngiu lun lídaangiñe uweíríguni lánina siélu. “Niraũ le jínsiñebei nun le, le áubei oúnwenbun lan nugúndan.”

¹⁸ Agáamba wamúti ladímurejan Búngiu ítara luágu Wabúreme Jesucrístu dán meja níñadiwa lan lúma Wabúreme luágu wübü le biníwabei.

¹⁹ Níjein gíñe ában cátei choúrutimaati wáma luágu liábin Wasálbaragüle ubouágun—ligía ugánu le jabürújabei profétagu. Buíti jadüga lun jatúriajani jerérun wügüríña jagía, ladüga líchuguba lan larúgounga tun janígi queísi ában lámpu le adúnraaguti lídan ában fulásu le búrigati. Lesériwiduba jerérun woun ítara daríme dan le lagíríbudun Crístu ubouágun, le ítara lúbabei queísi larúgadun dan le táfuridun warúguma to lánina bináafin—wasúbudirubei sun cátei lídaanme dan ligía.

²⁰ Lougíñe sun cátei, lúnti jasúbudiruni luágu úa lan ni ában gayáraati ladáriruni laníchigu cátei le búrü jamaalíbei profétagu láu láni lúngua. Busénwati lubáfu Sífiri Sándu lun gunfaráandawa lan,

²¹ Iugúndun madímurejaantiña meja wügüríña jagía láu jáni jóungua. Jagía, queí meja wügüríña jabei deréguatiña jóungua lun Búngiu, dimúrei buri lúmagíñeti Búngiu jadímurejabei Iugúndun Sífiri Sándu lan adúndejabaliña.

2

Ja arúfudajabaña iyéeni

¹ Añájein meja yéetiña jádan warásan ja aríñagubaña luágu profétagu jamá, ítara lúba gíñe añájeinbaña lan jídan, jádaruba iyéeni lagánagua arúfudajani le inárúníbei lun lagádeiruni jafíñen. Jarúfudubeiti yéetiña jagía láu Iuwúyeri jabágaridun luágu máma lan Crístu Jabúremebei, láu sun jilá lan Crístu lun lasálbaruniña. Láu cátei líra, janügüba agünrichaguni furése joun guánarügü.

² Gibeebaña afálarutiña lídan Iiwíye jémeri, áni ladímurejóuba wuríba luágu úma le inárúníbei jadüga.

³ Láu línsiñe seínsu joun, jaságaruba seínsu jueí láu jarúfudajan le málabei, le núbínbei lídaangiñerügü jachügü, choúruti luágu jagúseragüdúwaba lan luágu Iuríban jadüga, yaráfati jeféridirun queísi Iaráanserúniwa jabá lúmagíñe binárü.

⁴ Úati ferúduna láníña Búngiu ánjeligu já meja afígounjabaña, ába Iachágaraguniña máfiougatin, ába lígiruniña adaürúwa lídan Iubúriga ñi agúrabajei wéyu lánina Iagúseragüdúniña.

⁵ Úati gíñe ferúduna láníña Búngiu mútu wuríbatíña já meja aganoúbaña ubouágu lídan Iidáani Noé. Ába Iounajani gúnran jawágu gürígia jagía, Noé rügüñein le apúrichijabei joun gafígountiña lun Iasáansiruni jagáburi, jámaya sédú gürígia Iánwoun asálbara.

⁶ Darí lumuti gíñe meja jadúnrun gürígia ja aganoúbaña ubúru Iugú Sodóma lúma Gomórra. Ába Iáguduni fulásu buri ligía darí lun Iadaágun balígime, lun Iarúfudajan joun gürígia wuríbatíña ja Iúnbaña Iayábin Iarígíñe ca lan Iafáyiejabei figou.

⁷ Séfu lumúti meja Lot, ában meja wügürí buíti, le weíríbei Iidíjeri luágu Iiwíye jagáburi gürígia wuríbatíña lídan fulásu ligía.

⁸ Ságuja wéyu Iasúfurirun wügürí buíti ligía tídan Ianígi láu Iaríjini lúma Iagáambuni cátei buri wuríbati le Iadügübei.

⁹ Sun le, ában jémpulu luágu ligáburi lasálbaruniña Búngiu ja derégeguabaña jóungua lun lueí ouchwagúni, ígira láña ja wuribabaña lábugiñe asúfuriruni lubá jasiadirúniwa lun sun dan lídaanme wéyu lánina agúserawagúdúni.

¹⁰ Lasúfuriragúdátimabaña Búngiu ja afálarubalin liwíye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagánaguabaña, barüguatiña jóungua, mebéresentiña láu ni cáta, marúfudun jagía inébesei joun ja weírigubaña, anábarügü jamáña.

¹¹ Ánjañati ánjeligu, láu sun jéretima jamá, gabáfu jagía sügü jáu arúfudajatiña jagía, michuguntiña jadúnrun ánjeligu wuribatíña ligíbugiñe Búngiu, láu anabúni.

¹² Ánjaña arúfudajatiña ja, ítara jáña queísi anímaalugu úati gunfaráanda jamá, jagüríajóun lun járügüdün lun jafarún. Adímurejatiña wuríba luágu buri cátei le úati gunfaráanda jamáni, jóüweguba queísi jóüwegun anímaalugu,

¹³ asúfurireina lueígiñe jasúfuriragúdün ámu. Nibúsigarídünati jabágaridun, adáagua jamúti lagübüri jayúmajan lídan larúgounga, ligíbugiñe laríjin sun ubou, darí lun júaradagun júma lídan jufédun queísi jamúga gürígia buítíña, wíyeti jabágari.

¹⁴ Siñáti jaríjin ában würi lun úa lan suámei jamánun, mabúchati jawágu adáagua figou. Acháwaja jamútiña débilitiña lídoun figou, bíbutiña luágu meménijabuni. Chouruti luágu jagúnrinchagúba lan.

¹⁵ Féridiña jáña, lugúndun jígiruni úma le surúbei. Falá jamuti láni proféta Baláam, le liraü Beór, jémpulu, lé meja álugubei lagáñeirun seínsu láu ladügüni le wuríbabei.

¹⁶ Ábati ladeínan ában burígü maríñagaditi lun luágu lifígoun, adímureja ligía lun láu jamálali gürígia, ába mígirun láni lun lasígirun láu lilülün láu.

¹⁷ Ítara jáña arúfudajatiña yéetiña ja queísi w-élu mábeiti, queísi buri juánriñu le lanügün garábali, siádiwaaña lun jásügürün sun dan lídan luweírin-ágei lubúriga máfiougati.

¹⁸ Lugúndun aríñagatiña dimúrei buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adúga jameí furúmiegurügü iwíyei le jabúseerúbei. Ítara líña jacháwajaniña ja sun líñabei jaséfurun lídaangiñe binádu luwúyeri jabágaridun lánina bulieiguaü, lun jagíribudun jarigoún lídoun liwíye ibágari.

¹⁹ Ariñagatiña joun jánigu luágu jabágariduba lan ában ibágari le ní lumuti gayára lan jadügüni le jabúseerun, ánjeinti jagía guánarügü idámuniñanu lun Máfia, lugúndun sun gürígia lidámufein cátei le árügütübalin.

²⁰ Ja subúdi jamáalíbei Wabúreme Jesucrístu le Wasálbaragüle, ani séfujaña lídaangiñe iwíyei le lánina ubou le, ánjañaya áburuja lídoun buri cátei le lúnya lárügüdúniña, wuríbatimaabei le lúnbei gádan lániña sügü láu meja furúmiñe.

²¹ Buítimaati jamúga meja joun lun masúbudirungubei jamáni úma le surúbei, sügü láu lárigiñe lan jasúbudiruni, ába jígiruni lerérun Búngiu joun.

²² Jawágu lagúnfulira linárün dimúrei le. “Léchun ouñli lun leíginiya lewérajan, léchun búiruju le sun liñábei lágoun jarúmati, lúnya lágoun lídan gubégubeti.”

3

1 Nidújeñu jínsiñetiña nun, nuján tibíaman gárada nabürüjan jun. Tídan biángubei gárada, jóuchatina lun narítaguagüdünün luágu arúfudajani inárúni le furéndeí jumáalibeí, lun gayáraabei lan jasáminarun buídu luágu.

2 Jarítagua jumá luágu buri cátei lé meja jaríñagubei profétagu, lúma luágu lugúmadin Wabúreme Jesucrístu le Wasálbaragüle, lé meja warúfudajabei wagía apóstolugu jun.

3 Lídaangiñe sún buri cátei le waríñagubei, rútima jumeí le jarítagunrugun. luágu lídoun lánme lagúmujoún dan, añájeinbaña gürígia éjerajatiña láu buri cátei luáguti Búngiu, jabágariduba queísi laríñaguni luríban jayúmajan joun,

4 ábame jaríñagun. “¿Másan jaríñajare luágu liábinyaba lan Crístu ubouágun? ¿Jalíñañeinsan? Lúmagiñe jówegun furúmiñetiña affñetiña luágu Jesucrístu, ítara mémegili sun cátei queí meja lúmagiñe ladügünbei ubou.”

5 Mabúseeruntiña jasúbudiruni luágu ladügüni Búngiu sun cátei lídan lídáani lun ladügüniwa. Adúga lumúti meja siélu lúma ubou lúmagiñe binárü láu lugúmadin, adúgaleí múa lídaangiñe dúna, geyégu líña giñe múa ligía láu dúna.

6 Ába lachülürün dan lun lagünrinchaguni Búngiu ubou meja ligía láu lidúnarina gúnran.

7 Ánjeinti siélu lúma múa le guetóbei, lareíduñein Búngiu lubáme wéyu dánme le lagúseragüdün. Lídaanme wéyu ligía, lágudubei Búngiu siélu lúma ubou le gumúti láu lugúmadin. Ja madügünbaña gásu láu Búngiu, jágudúba lídan wátu ligía.

8 Mabúlieida jumeí giñe, nidújeñu jínsiñetiña nun, luágu ítara líña lan ában wéyu ligíbugiñe Búngiu queí mílu irúmu, mílu irúmu queí ában wéyu.

9 Máma jamúgatiña lugúndun ladárasarun lagúnfulirun Búngiu láu lerérün, queísi jarítagan sarágu, gagúraasunrügüti jabá gürígia lugúndun mabúseerúnti lun leféri-dirun ni ában jádaangiñe, labúseerun lun jaságüríjan sun gürígia lídaangiñe jafígoun, gayára lámuga jasálbarun.

10 Lachülürüba wéyu ligía lun lagíribudun Wabúreme Jesucrístu ubouágun dánme le magúrábúniwa lan, queísi lachülürün jíweruti áriebu. Ábanmeti lagúmuhagun siélu láu ában lanárime ireíni, rürüguagüdaleíme wátu geméti sun cátei le ñibeí—játi, warúguma, wéyu—gudáme ubou láu sun cátei le lídaanbei.

11 Queísiti lagünrinchaguba lan sun cátei ítara, lúnti lubeíti jarúma lan jabágaridun, derégeguañu júngua lun Búngiu le gumúti,

12 agúrabañu jumeí lachülürün luwéyuri Búngiu, adúgañu jumeí le juáraati lun jóufudajani. Lídaanme wéyu ligía, lagünrinchaguba siélu láu wátu geméti, ábame larürüdagun sun cátei.

13 Ánjeinti wagía, agúraba wamúti iséri siélu lúma iséri ubou le uágubei laríñaga Búngiu woun, sun cátei ñi, úraguabei, áni buídubei giñe.

14 Ligía lubeíti, nidújeñu jínsiñetiña nun, sun anjünja lan agúrabajéi buri cátei le, jóucha jumá lun ladárirunün Búngiu lídan úraguni ligíbugiñe, jarúmañu, úouga mégeiti juágu.

15 Subúdi jumeítia luágu lagúrabaja rügüña lan Wabúreme Jesucrístu jasálbarun gürígia lubá lagíribudun ubouágun. Ítara líña giñe labürüjan wadúje Páblo le jínsiñebeí woun sarágu, jun, láu subúdi le líchugubei Búngiu lun.

16 Adímurejati tídan sún buri ligáradan luágu buri cátei le, láu sun nújein buri lan tídaangiñe, jénreenguti gunfaráandawa tan. Játi ibídouguabaña áu jáma ja louguabaña affíne, garábaguati laníchigu labürüjan Páblo según jagía, ítara queí

jadüga tún buri tíbiri líburu to Lerérun Búngiu. Jeféridiruba lun sun dan ladüga cátei le.

¹⁷ Ligía lubeíti, nidújeñu jínsiñetiña nun, queísi subúdi jumáli lubeí buri cátei le lubáramegiwa, toúnigigua jumá júngua lueí jeyéedunün gürígia wuríbatiña, ígiragüdei arúfudajani le inárüñiti luáguti Búngiu jun.

¹⁸ Joúcha jumá lúntima jasúbudiruni Wabúreme Jesucrístu le Wasálbaragüle, awáanse jugúyame lídan línsiñejabu. ¡Uweíriguni lun, guetó lúma súnwandañ! Ítaralá.

FURÚMIÑETU LIGÁRADAN APÓSTOLU JUAN

Dimúrei le lánina ibágari

¹ Wabürüjaña jun luágu Búngiu Irájü lé buga níjeinjalibei dan le lagúmeserunbei sun cátei. Ába liabin Búngiu Irájü ubouágun queísi ában gürígia, aríja wamúti láu wágu, agáamba wamei ladímurejan. Aríja wamúti sun le ladügübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gírubei “Dimúrei”.

² Ába liábin ubouágun, quei nubeíbei jun, aríja wamúti, geféen wagía luágu, áni guetó wabürüjaña jun luágu. Níñein Búngiu Irájü lúma Búngiu Úguchili lúmagiñe furúmiñeti dan, ába liábin ubouágun queísi gürígia lun gayáraabei lan wasúbudiruni.

³ Wafúraanguagüdúñein lubeíti jun le aríja wamáalibei ladügün, lúma le agáamba wamáalibei laráñagun, lun gayáraabei lan jafíñerun le tímatimaati, lídan jumámuga ában wáma lídan cátei lébei, lídaañadünme gíñe ában lúma Búngiu Úguchili lúma Jesucrístu le Búngiu Irájü, queísi wagía.

⁴ Ítara lúba dayárubei lan wagúndan, sun wagía.

Ítara líña Búngiu queísi lámpu

⁵ Niján ugánu le larúfudajabei Crístu woun, le gíñe wíchugubei jun guetó. luágu ítara líña lan Búngiu queísi ában lámpu, mánti ni cáta lúma lubúriga.

⁶ Ánjawa aríñaga luágu lídaañadiwa lan ában lúma áni madügün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában lúma, lugúndun múaran lan wagáburi lúma linárün.

⁷ Ánjein úaragua lubei wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

⁸ Ánjawa aríñaga luágu mafígoun wamá, weyéedaguña woúngua, maríchatí le waríñagubei.

⁹ Ánjein wagúfesera wafígoun, gayáraabei weménigidun luágu Búngiu luágu ladügübei lan le úaraguabei –ferúduna lubei wafígoun, jarúmagüda lówame lídaangiñe sun wuríbani.

¹⁰ Ánjawa aríñaga luágu madügüngidiwa lan figou, wadügüñein Búngiu camá yéeti, áni merésibirun wamágili lerérun tídan wanígi.

2

Adímurejati Crístu lueígiñe wafúleisein ligíbugiñein Búngiu

¹ Nirájüñü, nabürüjañein buri cátei le jun lun mafígounjan jumá. Láu sun líra, ánjawa afigounja, ladímurejaba Wabúreme Jesucrístu lueígiñe wafúleisein ligíbugiñe Wáguchi Búngiu, ladúga ligía rügüñein richágua ligíbugiñe Búngiu.

² Lídaangiñe Jesucrístu ferúdunawa lan wafígoun, áni mámarügü wafígoun, ferúdunawati gíñe jafígoun sun ja afíñebaña luágu.

³ Ánjein wagúnfulira lugúmadin Búngiu, wasúbudirubei luágu chülújadiwa lan asúbudirei Búngiu.

⁴ Ánjein aríñaga ában gürígia. “Subúdi numúti Búngiu”, áni magúñfulirunti táu lugúmadin, yéeti gürígia ligía, ibídiñegili Búngiu lun.

⁵ Ánjeinti gürígia le adügübalin le lubeíbei Búngiu, chülüjali Búngiu ínsiñeda lun buídu buídu, ítara líña wasúbudiruni luágu lídaañadiwa lan ában lúma.

⁶ Le aríñaguti luágu lídaañein lan ában lúma Búngiu, lúnti labágaridun quei meja labágaridun Jesucrístu ya ubouágu.

Le iséri gumádi

⁷ Nidújeñu, mámatia iséri gumádi le nabürüjabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úaragua lúma ugánu ligía.

⁸ Guetó narítaguaügüdüñadün luágu gumádi le lagúarubei Jesucrístu iséri gumádi, áni gumádi ligía, lun jínsiñegua wamá wouñiwagua. Ítara líña meja labágaridun Jesucrístu, jabágariduña giñe ítara lugúndun jeibuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun.

¹⁰ Le jínsiñejabuti joun lidújeñu lueigiñe Jesucrístu, lídaañein larúgounga, subúdiiti Crístu lun, áni úati ní cáta lun láburügüdüni lídoun figoú.

¹¹ Ánjeinti le iyéreejabuti lun lidúje, ítara líña queísi gürígia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

¹² Nirájüñü, nabürüjaña jun lugúndun ferúduna láali Búngiu jifígoun ladüga Crístu.

¹³ Agübürigu, nabürüjaña jun lugúndun subúdi jumáali lan Jesucrístu lé meja njeinjalíbei lúmagiñe furúmiñeti dan. Nübürigiña, nabürüjaña jun lugúndun gáñei jumáali lan wuríbu luágu Máfia.

Nabürüjanbei jun, nirájüñü, lugúndun subúdi jumáali lan Búngiu Úguchili.

¹⁴ Nabürüjaña jun, agübürigu, lugúndun subúdi jumáali lan Jesucrístu lé meja njeinjalíbei lúmagiñe furúmiñeti dan. Nabürüjanbei jun, nübürigiña, lugúndun jere jumá, áni resibi jumáali lerérun Búngiu tídan janígi, lugúndun giñe gáñei jumáali lan wuríbu luágu Máfia.

¹⁵ Mínsiñedalá ligáburi uboú jun, ní buri cátei le lánina uboú. Siñáti lajínsiñedun cátei lánina uboú jun, jínsiñeme Búngiu jun,

¹⁶ lugúndun úati ní cáta lídaangíñe cátei le líchugubei uboú nübinti lúmagiñe Búngiu, lúmagiñe guánarügü uboú líabin. Luríban jayúmajan gürígia, ayúmajani lun jabíjini cátei le jaríjibe le uágubei jarítagua luágu buídu lan, lúma pántaü luágu cátei le jabíjibe, ligía buri cátei le líchugubei uboú.

¹⁷ Áni uboú, agúmuçheina líña láu buri sun luríban ayúmajani le lídaanbei, ánjeinti le adügüti lugúndan Búngiu, labágariduba lun sun dan.

Inárüni lúma iyéeni

¹⁸ Nirájüñü, chülüjali lagúmujoún dan. Agáambaadün luágu iníte lan Lágni Crístu, quei chülüguaaña lubeí sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le.

¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun larijiniwa furáangu luágu máma lan wánigu le tímatimaati.

²⁰ Ánjeinti jugúya, rúlaali Crístu Sífiri Sándu jun, áni subúditün sun jugúya lun.

²¹ Nabürüjanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ni murúsun arúfudajani múaraanti lídaangiñe inárüni.

²² Ja arúfudajabalin le múaraanbei, ja aríñagubaña luágu máma lan Jesúsu Crístubei le louñajabei Búngiu ubouágun lun lasálbaruniña gürígia, jagía láganiña Crístu, maffñetiña ni luágu Búngiu Úguchili, ni luágu Búngiu Irájü.

²³ Sun ja májabaña lun jasúbudiruni Jesúsu queísi Búngiu Irájü, ibídiñegili Búngiu Úguchili joun, ja aríñagubaña luágu Jesúsu lan Búngiu Irájü, subúdi gíñe Búngiu Úguchili joun.

²⁴ Ligía, areída jumei lubei ugánu le jagáambubei lúmagiñe furúmiñeti, tidan janígi. Ánjein jadüga ítara, jeréderuba gíñe lídan ában lúma Búngiu Irájü lúma lúma Búngiu Úguchili,

²⁵ jerésibiruba gíñe ibágari le magúmuchaditi, queísi laríñaguni Jesúsu woun.

²⁶ Ligía nerérunbei jun jawágu láganiñu Crístu jagía já yebe busénbaña jayédagunün.

²⁷ Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

²⁸ Ítara líña lubeíti, nirájüñü, ítara méme júma lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu wawágu ligíbugiñe.

²⁹ Queísi subúdi jumáni luágu richágua lan Crístu lídan sun cátei, lúnti gíñe jasúbudiruni luágu lirájüñü lan Búngiu sun ja richáguabaña ligíbugiñe.

3

Lirájüñü Búngiu

¹ Arija jumá luweirin wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siñá jabáliwa lánigu ubou gunfaráanda lugúndun ibídiñeti meja Jesucrístu joun lídan linárün cátei dán meja le ya lan ubouágu.

² Nidújeñu jínsiñetiña nun, lirájüñüjadiwa Búngiu guetó, áni marúfudúngili woun cátabadiwa lan lídaanme lagúmujoün, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubei.

³ Áni sun le agúrababálin buri cátei le, jarúmagüda lumúti ligáburi ítara quei jarúma lan ligáburi Crístu.

⁴ Ánjeinti sun le afígounjabei, dürügua lumúti lilúrudun Búngiu, lugúndun luágu cátei figóubei ladúraawagún lilúrudun Búngiu.

⁵ Subúdi jumáli luágu lun lan lagídaruni Jesucrístu wafígoun liábin ubouágun, luágu gíñe úa lan ni murúsun figou luágu.

⁶ Sun lubeíti le lídaanbei ában lúma, máma lídaañein figou, áni sun le lídaanbei figou, maríjin lágili Jesucrístu, masúbudirun lágili gíñe.

⁷ Nirájüñü, mayédagawa jumá, ában gürígia richáguati ligíbugiñe Búngiu adüga lumúti le richábei, queísi richágua lan Jesucrístu.

⁸ Ánjeinti le eíbugubei lídan figou, lánigu Máfia, lugúndun afígoujati Máfia lúmagiñe furúmiñeti dan, ába liábin Liraü Búngiu lun lagünrinchaguni luwádigimari Máfia.

⁹ Úati ni ában le liraüti Búngiu asígiruti lídan figou, lugúndun níjein íbágarí le líchugubei Búngiu lun lídan, siñáti lasígirun lídan figou lugúndun liraü lan Búngiu.

¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madügünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

Jínsiñe jamá wíbirigu woun

¹¹ Niján ugánu le jagáambubei lúmagiñe furúmiñeti dan. lun jínsiñegua wamá wámagua.

¹² Moún lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuriba lán meja le ladügübei Caín, áni buíti le ladügübei lamúlen, ligía lagímugajanbei.

¹³ Nidújeñu, maweírdalá janígi ánjaün eyéreeguda joun lánigu ubou.

¹⁴ Wagía, ítara wáña meja queisi jiláaña, guetó íbjaadiwa íbágarí magúmchaditi, áni subúdi wamúti líra lugúndun jínsiñetiña wadújeñu lueígiñe Jesucrístu woun. Le mínsiñejabuti lun lidúje, jiláñu mémegili.

¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágarí lan le magúmchaditi.

¹⁶ Subúdi wamúti cátei lan ísiñenibei. luágu líchuguni Jesucrístu libágarí wawágu. Lúnti giñéti wánjarun lun wíchuguni wabágarí jawágu wíbirigu.

¹⁷ Ánjein níjein lubei lúma ában gürígia lun lawínwandun, áni laríja luágu níjein lan lemégeirun lidúje áni míderagun lumúti, ¿ída lubági níjein lan ínsiñeni tídan lanígi lun Búngiu?

¹⁸ Nirájüñü, moún lumuti wayumárurügü lan wínsiñejabu, lúnti ában lan ínsiñejabuni le gumúti, lun larijín lídan cátei le wadügübei.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá affíñeni le inárüntibeí, gayáraabei giñe wasúbudiruni luágu buídu lan weréderun ligíbugiñe Búngiu.

²⁰ Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun.

²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu,

²² luágu líchugubei lan sun le wamúriajabei lúma woun, lugúndun gúnfuljjadiwa láu lugúmadin áni adúga wamáali le áubei lagúndaara.

²³ Lugúmadin Búngiu, lun wafíñerun luágu Jesucrístu le Liraü, lun giñe jínsiñegua wamá wámagua queisi meja laríñaguni Jesúsu woun.

²⁴ Ja agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbei woun.

4

Láni Búngiu Espíritu lúma láni lágani Crístu espíritu

¹ Nidújeñu jínsiñetiña nun, maffíñera jumá joun sun ja aríñagubaña luágu Búngiu lan adímurejabei jayúmulugugiñe, jóucha jumáña lun jaríjini ánjein Sífiri Sándu lubei le jádaanbei o máma lan ligía. Lugúndun labuínchuña ubou

jáu yéetiña ja aríñagubaña luágu Búngiu lan adímurejabei jayúmugugiñe áni jayéeni.

² Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatisaati liábin Crístu ubouágun, níjein Sífiri Sándu lídan áni láu lubáfu Sífiri Sándu ladímureja.

³ Ánjeinti le aríñaguti luágu iyéeni lan, luágu mayábin lan Crístu ubouágun queisi gürígia, úati Sífiri Sándu lídan, espíritu le láganibe Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, níjeinjali ubouágu.

⁴ Nirájüñü, lánigu Búngiu jugúya, gáñei jumáña yéetiña jagía ja busénbaña jagáraguagüdünün lueí arúfudajani le inárüntibe, gáñei jumáña lugúndun gabáfutimaati Sífiri Sándu le jídaanbei sügú láu lání Máfia espíritu le jádaanbei.

⁵ Lánigu ubouú jagía, lánina ubouú cátei le jarúfudajabei, ligía lébubei jagáambuniña ja giñe lánigubaña ubouú.

⁶ Ánjein wagía, lánigu Búngiu wagía. Le subúdjabubei lun Búngiu, agáamba lumútiwa, le mámabei lánigu Búngiu, májati lagáambuniwa. Ítara líña lubeíti gayáraati wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburi Búngiu lun larúfuduni ínsiñejabuni

⁷ Nidújeñü jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabubei, liraú Búngiu, áni subúdiiti giñe Búngiu lun.

⁸ Le mínsiñejabuti, ibídiñegili Búngiu lun, lugúndun ligáburi Búngiu lun larúfuduni ínsiñejabuni.

⁹ Arúfuda lumúti Búngiu wínsiñe lun láu louñajani Liraú le ábanrügüti ubouágun lun louñwen, lun gabágari wamá lídaangiñe.

¹⁰ Niján ínsiñenibe. máma luágu wagía lan jínsiñejabubei lun Búngiu, luágu ligía lan jínsiñejabubei woun, ába louñajani Liraú le ábanrügüti lun louñwen, lun lébuname ferúdunawa lan wafígoun.

¹¹ Nidújeñü jínsiñetiña nun, ánjein jínsiñeediwa lubeí lun Búngiu ítara, lúnti giñe jínsiñegua wamá wámagua.

¹² Úagili ní ában aríjiti Búngiu, láu sun líra, ánjawa jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu.

¹³ Rúlaali Búngiu Sífiri Sándu woun lun lachoúrurun luágu lídaañadiwa lan, áni wádaañein lan giñe.

¹⁴ Wagía guánarügü aríja wamáali Liraú Búngiu, aríñaga wameí luágu lun lan lasálbaruniwa louñajei Búngiu ubouágun.

¹⁵ Furúmiegurügü le afíñerubei luágu Liraú lan Búngiu Jesús, labágariduña lídan Búngiu, áni labágariduña giñe Búngiu lídan.

¹⁶ Ítara líña wayábin asúbudirei luma afíñera luágu jínsiñe wamá lun Búngiu. Ligáburi Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña giñe Búngiu lídan.

¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüdüniña Búngiu sun gürígia ladüga wagáburiduña lan ya ubouágu queisi Jesucrístu.

18 Ánjein jínsiñe Búngiu woun le gumúti, manúfudebadíwa luágu le lúnbei ladügüni woun, láu luweírin línsiñe Búngiu woun, gidáti sun anúfudei waweí. Ánjein janúfude wabei lueí Búngiu, ladüga wagúrabaña lan láburujan ligáñi wawágun. Ligía, ánjein janúfude lubeí ában gürígia, machülügilirügü líña Búngiu ínsiñeda lun le tímatimaati.

19 Wagía, jínsiñeti Búngiu woun lugúndun wínsiñedun lun furúmiñe.

20 Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei gíñe jínsiñe lan Búngiu lun, le maríjin lubeí.

21 Rúlaali Crístu gumádi le woun. le jínsiñejabuti lun Búngiu, lúnti gíñe jínsiñe lan libíri lun.

5

Wagáñeiruni wuríbu lúma ubouú

1 Sun ja afiñebaña luágu Jesúsu lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña gíñe joun lirájüñü Wáguchi Búngiu.

2 Subúdi wamúti luágu dan lan le jínsiñe lan Búngiu woun áni adüga wameí le lubeíbei, jínsiñe jamá gíñe lirájüñü Búngiu woun.

3 Ladügüniwa le lubeíbei Búngiu, ligía ínsiñejabunibei lun, áni majürüti lugúmadin,

4 lugúndun sun le liraübei Búngiu, mabáfuti cátei lánina ubouú luágu. Wafiñen, ligía cátei le íchigubei ubáfu woun lun wagáñeirun luágu cátei lánina ubouú.

5 Le afiñebei luágu Jesúsu lan Liraübei Búngiu, ligía rügüñein gayára lagáñeirun luágu cátei lánina ubouú.

Geféenwa lan luágu Liraü Búngiu

6 Jesucrístu ligía ñübinbei láu bián seíni luágu ligía lan Liraübei Búngiu. bián seíni ligía, dúna le lánina labásterun, lúma jítaü le lánina loúnwen. Mámargüü láu dúna, láu dúna lúma jítaü. Áni Sífiri Sándu guánarügü geféenti luágu cátei le, ligía arúfudubalin sun inárüni woun.

7 Añájein ürüwa geféentiña luágu cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía,

8 njein gíñe ürüwa cátei geféenti múarugu luágu Jesúsu lan Liraübei Búngiu. Sífiri Sándu, dúna le lánina labásterun Jesúsu, lúma jítaü le lánina loúnwen.

9 Resibi wamúti le jaríñagubei wügüríña, gúbuméti lúnti lan werésibiruni le laríñagubei Búngiu guánarügü luágu Liraü lan Jesucrístu.

10 Le afiñeti luágu cátei le, choúru lumúti tídan lanígi luágu inárüni lan, le mafíñebei, adüga lumúti Búngiu camá yéeti, lugúndun mafíñen lan luágu le laríñagubei Búngiu luágu Liraü.

11 Le laríñagubei Búngiu, luágu rújali lan ibágari magúmchaditi woun, áni lídaangiñe lan Liraü líabin ibágari ligía.

12 Le njeinbei Liraü Búngiu lúma, njein gíñe ibágari le lúma, ánjeinti le úabei Liraü Búngiu lúma, úati gíñe ibágari le lúma.

Lagúmujoún buri lerérun Juan tídan gárada to

13 Nabürüjañein cátei le jun, jugúya le afiñebei luágu Liraü Búngiu, lun jasúbudiruni luágu gabágari jumá le magúmchaditi.

¹⁴ Jeménigitiwa luágu Búngiu, lugúndun subúdi wamúti luágu ánjawa lan amúriaja furúmieguarügü cátei queísi labúseerun, lagáambubadiwa.

¹⁵ Áni ítara quei wasúbudiruni luágu agáamba láni Búngiu wayúmuragun, subúdi wamúti gíñe luágu loúnabubadiwa lan.

¹⁶ Ánjein aríja ában gürígia luágu ladügüña lan ában libíri ában figou le mámabei lúnti lanügüni lídoun féridi lun sun dan, lúnti layúmuragun lun Búngiu, ábame íchugun Búngiu ibágari lun gürígia ligía. Níjein figou anügüti gürígia lídoun féridi magúmuchaditi, málati lun layúmurawagúniwa lun Búngiu luágu figou ligía.

¹⁷ Sun wuríbani figou, máma sun figou lun lanügüni gürígia lídoun féridi magúmuchaditi.

¹⁸ Subúdi wamúti luágu gürígia lan le anügübalin Búngiu queísi Lúguchi, meíbugunti lídan figou, lugúndun toúnigi lumúti Liraü Búngiu, siñáti ladügün Máfia ni cáta lun.

¹⁹ Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña ubou.

²⁰ Subúdi wamúti gíñe luágu ñübinjali lan Liraü Búngiu ubouágun, áni rújali lan gunfaráandaü woun lun wasúbudiruni Búngiu le tímatimaati. Wabágariduña le tímatimaati lídan ában lúma Búngiu, queísi lídaañadiwa lan ában lúma Liraü, le Jesucrístubei. Ligía Búngiubei le tímatimaati, ligía gíñe le íchugubei ibágari le magúmuchaditi woun.

²¹ Nirájüñü, mafálara jumáña búngiugu ja mámabaña Búngiu. Ítaralá.

TIBÍAMAN LIGÁRADAN APÓSTOLU JUAN

Inárüni lúma ínsiñeni

¹ Au le weírei mútu, nabürüjañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun giñe ja afálarubalin Crístu, jínsiñetün giñe joun sarágu.

² Jínsiñetün woun ladüga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi.

³ Búngiu Úguchili, lúma Wabúreme Jesucrístu le Liraü Úguchili, jabínirubadün, jíchugubei jagúdemejabu lúma jadárangilan jun lídan jabúruchaguagüdüni larúfudajan Crístu lúma ínsiñejabuni.

⁴ Oúnwenbun nugúndan láu nadárirun jádaangiñe birájüñü abágarida queísi lubúdubun, ítara queísi laríñagun Wáguchi Búngiu woun lun wabágaridun.

⁵ Guetóti nítu, ayúmuragutina bun lun jínsiñegua wamá wámagua. Máma gumádi iséri le nabürüjabei bun, ligía méme le wámabei lúmagiñe furúmiñeti dan, dan le wagáambubei luágu Crístu.

⁶ Míni lan ínsiñeni, lun wabágaridun según lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷ Añájein sarágu ayéejatiña ubouágu ja maffiñebaña luágu quei lan güriquia tímatimaati liábin Jesucrístu ubouágun. Le ítarabei, ligía le yéebey, le láganibey Crístu.

⁸ Duári jumá jawei, lueí jeféridiruni le ñübinbey jun lídaangiñe juwádigimari luágu Crístu, resibi jumeíme fáyeiti le gumúti luágu, siélu.

⁹ Furúmieguarügü le oufudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, ánjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma.

¹⁰ Ánjein achülüra ában güriquia júmoun máma láu arúfudajani le, merésibira jumeí júbiñe, mabúsurun jugúyame lun,

¹¹ lugúndun le abúsuruti lun, gádan lumúti giñe wuríbani le ladügübei.

Lagúmujoín buri dimúrei

¹² Níjein sarágu cátei lúnti naríñaguni jun, mabúseerúntina abürüjarügü náni jun, agúrabatina nídin aríjaün lun nayánujan júma, lun lagúnfulirun wagúndan.

¹³ Mábuga jáña tirájüñü bamúlelua bun, to giñe lanúadiruboun Búngiu. Ítaralá.

TÜRÜWAN LIGÁRADAN APÓSTOLU JUAN

Buíti ladímurejoún luágu wüğüri le gírubei Gáyo

¹ Áu le weírrei mútu, nabürüjañoun gárada to bun, numáda Gáyo, le jínsiñebei nun le gumúti.

² Numáda jínsiñeti nun, nayúmragun lun Búngiu lun buídu lan lídin sun cátei bun, lun giñe magádie ban itara queisi buídu lan lídin bun lídan beíbugun lúma Crístu.

³ Oúnwenbun nagúndaarun dan le jayábinbei jádaangiñe wadújeñu lueígiñe Jesucrístu, ába jabájúdagun nun luágu bugúnfulin quei babágariduña lubei úragu lúma larúfudajan Crístu.

⁴ Úati ámu cátei agúndaaraguadútina queisi dan le nagáambun luágu jabágariduña lan nirájüñü lídan úarani lúma larúfudajan Crístu.

⁵ Numáda jínsiñeti nun, buíti boúserun lídan esériwiduni le badügübei joun wadújeñu lueígiñe Jesucrístu, joúntima ja lílana ámu fulásu.

⁶ Abájúdaguatiña ligíbugiñe adámurini le yábei luágu bínsiñejabu joun. Adügabei fuleisei le. Ideragua báña láu le jemégeirubei lun jasígiruni jaweíyasun lídan ában igáburu le áuti lagúndaara Búngiu.

⁷ Furítiña lun jesériwidun lun Crístu, merésibiruntiña ni cáta jámangiñe ja ibídiñejabubaña lun Búngiu.

⁸ Ligía lúnti lubei weténirun joun, lun wíderaguniña lídan lapúrichijoún lerérun Búngiu.

Luríban louúserun Diótfrefes

⁹ Abürüjatina buga ában gárada joun tílana ligílisi, májati Diótfrefes lídin láu le wabeíbei lugúndun busénti ábuti lan jádan súnwandan.

¹⁰ Ánjana lubeíti ñüdün, neréruba lun luágu le ladügübei, adáagua marásualugu lúma iyéeni wawágu. Bougudin lueí líra, merésibirun lumútiña wadújeñu ja achülürütiña, áni mája ligía lun jerésibiruniña ámu, ja erésibirutiña, ába labúguniña lídaangiñe adámurini le táni ligílisi.

¹¹ Numáda jínsiñeti nun, mafálarabeí jémpulu wuríbati le, adügamemebei le buídubei. Le adügüti buíti, lánigu Búngiu, ánjein le adügüti wuríbati, ibídiñegili Búngiu lun.

Lubuúndun láni Demétrio jémpulu

¹² Buíti jadímurejan súngubei luágu Demétrio, áni inárüni luágu buídu lan ligáburu. Geféentiwa giñe luágu cátei le, áni subúdi jumúti luágu inárüni lan le waríñagubei.

Lagúmujoún buri dimúrei

¹³ Gíbeti yebe lúnti naríñaguni bun, mabúseerúntina abürüjarügü náni,

¹⁴ lugúndun agúrabatina naríjinibu madíse, ábameti wayánujan.

¹⁵ Darángilabá. Mábuga jáña umádagu yána bun, rúbei wamábugaü lun cáda ában jádaangiñe wamádagu ja ñíbaña.

LIGÁRADAN JÚDAS

Labürüjan Júdas joun ja únbaña wájali lan Búngiu lun lánigu jamá

¹ Áu Júdas, esériwiduti lun Crístu áu, áni lamúlen giñe Jacóbo, nabürüjañoun gárada to joun ja únbaña wájali lan Búngiu lun lánigu jamá, ja jinsiñebaña lun, ja areídañu lubáña Jesucrístu séfuñu luei buri cátei lánina ubou le.

² Resíbi jumá sarágu gudemejabu, darángilaü, lúma ínsiñeni lúmagiñe Búngiu.

Ja arúfudajabaña iyéeni

³ Nidújeñu jínsiñetiña nun, weírjali nabúseerun nabürüjan jun luágu asálbaruni le wabíjibeí, dándu jugúya queísi áu, guetó sandíguatina núngua luágu lúnti lan nabürüjan jun lun nayúmragun jun lun jáfaagun luágu afiñeni le lederegerubei Búngiu ában weíyaasu lun sun dan joun lánigu.

⁴ Nariñagubalin le jun lugúndun añajein lan arúfudajatiña yeétiña ádaragutiña jóungua jagánaguóun. Gürígia buri jagía, arúfuda táña Lerérun Búngiu lúmagiñe binárün luágu lúnti lan jasúfuriruni lafáyeiragüle jaríban, buídu. Wügüríña wuribatiña jagía, minébenti Búngiu joun, arúfudaja jagía luágu gayára lan jadügün gürígia furúmieguarügü cátei mabuídunti, mabeíchun lubáña lan Búngiu lueígiñe, ladüga luweírín lareíni, ayéedagua jagía giñe luágu Jesucrístu, Wabúreme le ligiarügüti, le únbei wesériwida.

⁵ Láu sun subúdi jumáali lan, buséntina narítaguagüdünün luágu láu lan sun sagá láníña meja Búngiu lumútuniña Israelítagu Ejíptogiñe, lárigiñe, ába lagúmchaguagüdúniña ja maffiñerunbaña jádan.

⁶ Ánjeligu ja mareídunbalin jabára, ígirarügü jameí jábiñe siélu lun jagábaraagun luágun Búngiu, añajein adaürüwañu lurúma Búngiu, gürágu lídan lubúriga láu güríngüri magúmchaditi, agúrabajei oúnwenbun wéyu le lánina agúseruni.

⁷ Ja lílana buri ubúrugu Sodóma luma Gomórra, lúma fulásu buri le yaráfabeí lun, ába jagábaraagun luágun Búngiu queísigubeirügü ánjeligu ja, ába jíchaagun jóungua lun salúfuri, ába jígiraguagüdün jóungua lun sun luwúyeri wuribani darí lun lagámaridun wügüri wügüri líledi, würi würi tíledi. Ába lagúmchaguagüdúniña Búngiu láu wátu geméti. Reídeitiña queísi ewéridiruni joun sun gürígia, arúfudei ligáburi ída lúba lan lafáyeijan Búngiu luágu figóu.

⁸ Ánjeinti láu sun jémpulu líra, wügüríña buri giñe ja jagánaguabaña, láu jafálaruni arúfudajani le maríchabeí, wíyedaguatiña jóungua, májatiña lun lugúmadin Búngiu, anába jamaña ubáfu buri ja íñugutimaabaña.

⁹ Ánjeinti arcánjel méme Miguél, dan le lasígenejanbei lúma Máfia lueígiñe lúgubu Moisés, mouchunti lun líñaragun láu anabúni, aríñagarügüti lun. “Ébecha lábu Wabúreme Búngiu.”

¹⁰ Ánjaña wügüríña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luáguerügü jasándiruni queísi jasúbudiruni anímaalu jóuga gunfaráanda jamá, ligía buri cátei le jadügübei, ába janügün gürínguau jawóguoún láu jóuserun.

¹¹ ¡Fugíabugu jagía! Falá jamaali láni Caín jémpulu, arúfudajatiña iyéeni quei Baláam lun jagáñeirun seínsu, áni magáambaditiña, féridi jagía queísi Coré le ouwebei luágu lumágaambadin lun lerérun Búngiu.

¹² Nibúsigaridünatiña lídan buri jufédun le lánina jínsiñegua júmagua, le ñí lubei jeíga, gurá jagía láu ugúndani, minébenejábuga. Ítara jáña queísi jóuniri mudún ja jóunguarügübei jóunigiragua. Ítara jáña queísi juánriñu magánati dúna le lanügübei garábali, tidibu wéwe to magínduntu lídan tidáni, ítara jáña queísi tidibu wéwe to ájulutu láu sun títágule, úaali ju jamá.

¹³ Ítara jáña queí lanárime buri lugúdi barána, arúfudei jagáburigu le nibúsigaridünati queí jacútaü. Ítara jáña queí warúguma buri ja féridi jamáali jémeri, íñarawagúaaña lun jeréderun lídan líwurín-ágei lubúriga lun sun dan.

¹⁴ Enóç giñe le jasédün gürígia lárigiñe Adán, adímurejaali dimúrei lúmagiñe Búngiu jawágu arúfudajatiña yéetiña ja dan le laríñagunbei. “Aríja numúti Nabúreme liábin jáma sarágu mílu jádaangiñe láni ánjeligu

¹⁵ lun lagúseragüdüniña sun ja wuríbabaña luágu sun wuríbani le adúga jamáalibeí, lúma luágu buri dimúrei deréti le aríñaga jamáalibeí luágu. Lasíadirubaña sun gafigountiña jagía luágu le jadügübei.”

¹⁶ Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadügübei ámu, lún rügüñein jagúñfulirun lúma lagübüri jayúmajan jabúseera. Aríñagatiña dimúrei buri íñuguti, adímureja jagía buíti jawágu buri gürígia lúnrügü jaságarun cátei buíti jóungua jádaangiñe.

Lererún joun afiñetiña

¹⁷ Jugúyati nidújeñu jínsiñetiña nun, jarítagua jumá luágu le laríñagubei Jesucrístu jádaangiñe láni apóstolugu luágu buri cátei le lúnbei lasúseredun.

¹⁸ Jaríñajare. “Lídoun burime lagúmujóun dan, añájeinbaña gürígia éjerajatiña láu buri cátei le láni Búngiu, agánawa jagíame úaragua lúma jagúndan le wíyebéi.”

¹⁹ Jadúga buri ja, níjein lubei fánreinguaü, falá jamuti jagúndan le lánina ubou, úati Sífiri Sándu jádan.

²⁰ Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabeí. Ayúmuragua jumá lun Búngiu láu lubáfu Sífiri Sándu.

²¹ Mabúlieida jumeí luágu jínsiñe jumá lun Búngiu, agúraba jumeí wéyu le lúnbei líchuguni Wabúreme Jesucrístu íbágarí magúmchaditi woun láu lugúdemejabu.

²² Afiñegüda jumáña ja louguabaña afíñe.

²³ Sálba jumáña jíbiriigu camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafigountiña jun, láu sun, goúnigi jumá lueí jadügüni wuríbani le jadügübei, iyéeregulá jaríban jun queísi gamísa wíyetu, lueí giñe jeíguadun lídoun luríban úma queí jagía.

Lagúmujóun buri ladímurejóun luágu luweírigan Búngiu

²⁴⁻²⁵ Búngiu le ábanrügübei, le sábiubei, le Wasálbaragüle lídaangiñe Wabúreme Jesucrístu, gabáfuti lun loúnigirunün lueí jeíguadun lídoun figou, lun giñe larúfudunün jarúmañu, buin láu ugúndani ligíbugiñe, le weírigubei. Rúwalá íñuguni lun, lúma uweíriguni, ubáfu lúma gumádi lídaangiñe Wabúreme Jesucrístu, méja, guetó, lúma súnwandan. Ítaralá.

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucristu

¹ Niján buri cátei le larúfudubei Búngiu lun Jesucristu lun lasúbudiragüdüni joun lánigu cátei lé buri lúnbei lasúseredun madíse. Subúdigüda láali Jesucristu cátei le lun Juan le esériwidubei lun, láu loúnajani láni ánjeli lúmoun lun larúfuduni lun.

² Ariñaga láali Juan inárüni luágu sun le larijubei, geféenti luágu láni Búngiu ugánu lúma luágu le aríñaga láalibei Jesucristu.

³ Gúndaatiña gürígia ja alíjabalín jáma ja agáambubalin laliijóun ugánu le, le erésibirúabei lúmagiñe Búngiu, adüga jagía gásu láu cátei le bürüwañubei ya, ladüga yaráfaali dan lun lasúseredun.

Labürüjan Juan joun títana sédügubei liglisi

⁴ Áu Juan, nabürüjaña joun títana sédü liglisi to Ásiaboun. Resíbi jumá abíniruni lúma darángilaü lúmagiñe Búngiu le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame sun dan. Resíbi jumá giñe abíniruni lúma darángilaü jámagiñe sédü espírituja ja ligbugiñebaña lála,

⁵ lúma lúmagiñe Jesucristu le aríñagubalin cátei le inárüti, le furúmiñebeí ásaaruti lidaangiñe otúweni áni gabáfu ligía jawágu urúeigu ja ubouágubaña. Jínsiñetiwa lun Cristu, áni chibá laadiwa lidaangiñe wafígoun láu líta,

⁶ adüga láadiwa urúeigumé lúma fádirigumé lun wesériwidun lun Lubúngiute, le méme Lúguchibeí. ¡Rúalá uweírugini lúma ubáfu lun, lun súnwandan! Ítaralá.

⁷ ¡Aríja jumá, líabinba Cristu juánriñurugu, jaríjubei sun gürígia ásta giñe ja áfarubalin! Jayájuba sun gürígia ja ubouágubaña dánme le jaríjini luágu wuríbani le adüga jamáalibeí. Ítara lúba.

⁸ “Áu lagúmesejabeí sun cátei, áu lagúmchagülebei, quei létüra ‘A’ lúma ‘Z’”, líña lariñagun Búngiu le Sünti Gabáfu, le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame sun dan.

Layáwadagun Cristu lun Juan

⁹ Áu Juan, jidúje luegiñe Jesucristu áu, gafánraantina júma lídan larúeijan Búngiu, súfurijadina úara júma luágu Cristu, resíbijadina giñe gurásu lúmagiñe Cristu. Réfdeitina adaürüwa luágu uboúju le gírubei Pátmos luegiñe napúrichijani Lerérin Búngiu, lúma luegiñe napúrichijan luágu Jesucristu.

¹⁰ Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanáangiñe quei lumálali fídu,

¹¹ lariñaga umálali ligía nun.

—Áu furúmiñebeí lúma agúmujóuni, quei létüra ‘A’ lúma ‘Z’. Abürüjabeí sun le barijubei, ábame bouñajanun gárada tugúya joun títana sédü liglisi to loúbawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodjéa.

¹² Ába nagáragun lun naríjin ca lan adímurejabeí nun, ába naríjin sédü lébu sanúdelu gólu,

¹³ labádinagua sédü lébu sanúdelu ligía ába naríjin ában camá jamuga Wügüri Garaüwarügüti—le Jesucristubeí—táu ában anáanguni chÜlütü luágun lugúdi, lúma ában béliiti gólu yaráfa lun laníguagu.

14 Jarúti lídiburi quei líyu mudún, quei móuru, ítara líña lágu quei wátu geméti.

15 Miríti lugúdi quei brónse le íríchawagúaaali, le dáwaali lídoun órno, reínti lumálali quei lireín leíbaagun sarágu dúna.

16 Níñanu sédú warúguma lídan lújabu le loúnwenren, níñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásúdün láu sun lére.

17 Dan naríjnbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmuchaja.

18 Áu le wínwanbei, jilátina, guetó wínwantina lun sun dan. Níjein ligélen ouweni núma, lúma ligélen fulásu le ní jabei jiláguaaña.

19 Abürújabei lubeíti le baríjubei, le guetóbei lúma le lúnbei liábin.

20 Níján laníchigubei jawáguti sédú warúguma ja baríjubaña lídan nújabu le noúnwenren, lúma sédú lébu sanúdelu gólu. sédú warúguma, jagía sédú jóuniri tílana sédú ligílsi, sédúti lébu sanúdelu, jagía sédú ligílsi.

2

Ugánu joun tílana sédú ligílsi. Ugánu joun tílana ligílsi Éfeso

1 ‘Babürüja lun jóuniri tílana ligílsi to Éfesoboun, baríñagame lun lun laríñagun joun gürígia jagía. “Ítara líña nariñagun, áu le jáubei sédú warúguma lídan nújabu le noúnwenren, le giñe eibugubei labádinagua sédú lébu sanúdelu le gólu.

2 Subúdi numúti sun le jadügübei, subúdi numúti lidére juwádigimari lúma jagúraasun, áni subúdi numúti luágu siña lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá.

3 Gagúraasunjadün, áni súfuri jugúya sarágu lídan juwádigimari nuágu, mabúcharunga juágu.

4 Láu sun líra, níjein ában cátei jadüga magúndaantina láu. maweírinjali nínsiñe jun quei meja furúmiñe.

5 Ligía lubeíti, jaritagua jumá ída jíña lán meja, sáansi jumeí jigáburi, adüga jumeí cátei lé meja jadügübei furúmiñe. Ánjein madügün jumá ítara, níninba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana níligílsin, ánjein gubeírügü jasáansira jigáburi, ligíaba madügün náni ítara.

6 Láu sun líra, luáguñein jáni fuleísei, liyéreegun cátei lé buri jarúfudajabei nícoláitagu jun lúma buri cátei le jadügübei, le giñe iyéreegubei nun.

7 Le garígeirugubei lun lagáambun, agáambaleí le laríñagubei Sífiri Sándu joun tílana buri ligílsi. Ja ásiragúbalin wuríbani, neíngagütübaña lídaangiñe lin tídibu wéwe to lánina íbágari, to lufúlasunruguboun Búngiu.”

Ugánu joun tílana ligílsi to Esmírnaboun

8 ‘Babürüja lun jóuniri tílana ligílsi to Esmírnaboun, baríñagame lun lun laríñaguni joun gürígia jagía. “Ítara líña nariñagun, áu le furúmiñeti lúma agúmujóuni, lé meja ouwebei áni wínwanyaali.

9 Subúdi numúti sun le jadügübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti giñe luágu adímureja

jamá ja aríñagubaña luágu juríu jamá wuríbatu juágu, máma ámu cátei jagía lueidügüya lánigu jamá Máfia.

10 Manúfude jumá luei le lúnbei jasúfuriruni, ládaraguba Máfia fiú jídaangiñe furisunrugun lun louchawagúniwa jafiñen sun jugüya, áni jasúfuriruba sarágu luágu díisi wéyu. Derégüdagu jumá lídan jafiñen nuágu darí jounwen, ábame níchuguni íbágarí magúmuchaditi jun, jafáyeiruájame.

11 Le garígeirugubei lun lagáambun, agáambalei le laríñagubei Sífiri Sándu jóun buri tílana ligílisi. Ja ásiiragúbalin wuríbani, másügürünbaña lídaangiñe libíaman óuweni."

Ugánu joun tílana ligílisi to Pérgamoboun

12 "Babürüja lun jóuniri tílana ligílisi to Pérgamoboun, bariñagame lun lun lariñagun joun gürígia jagía. "Ítara líña nariñagun, áu le gámabarun efein to gágiriboun, to biánguaboun amána.

13 Subúdi numúti sun le jadügübei, subúdi numúti giñe luágu Máfia lántima gabáfubei jádan gürígia ja ñí lubei jagánawa, áni láu sun líra, númamemeñadün. Mígirun jumágili jafiñen nuágu, ni íbini lídan dan le láfarúnbei Antipás le geféenbei buíti nuágu ñi lídan fulásu le ñí jubei, le ñí lubei lagúmadija Máfia.

14 Láu sun líra, níjein buri cátei jadüga, magúndaantina láu. luágu añájein lan fiú gürígia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun lafigoungüdüniña Israelítagu láu jeígin eígin le adágarawagüdüti joun sándu, lúma láu jabágaridun lídan salúfuri.

15 Ítara méme giñe, añájein ja májabaña jígiruni cátei lé buri jarúfudajabei nicoláitagu júma ñi, cátei le iyéeregubei nun.

16 Ligía, sáansi jumei lubei jigáburí, ánjein madügün jumá ítara, nídiba juágu madíse, ábame nageíndagun jáma gürígia ja adügübalin cátei buri le, táu efein to áfuriduboun niyúmulugugiñe.

17 Le garígeirugubei lun lagáambun, agáambalei le laríñagubei Sífiri Sándu jóun buri tílana ligílisi. Le ásiiraguti luágu wuríbani, neígagüdüba lídaangiñe maná le arámudúañubei lun lun lichugun érei tun luwáni, ábame níchugun ában dübü jarúti lun láu ában íri iséri búruwaña luágu le íbídíñeti ni ca un lueidügüya lun le erésibirubalin."

Ugánu joun tílana ligílisi to Tiatíraboun

18 "Babürüja lun jóuniri tílana ligílisi to Tiatíraboun, bariñagame lun lun lariñagun joun gürígia jagía. "Ítara líña nariñagun, áu le Liraü Búngiu, le ítarabei águu quei wátu geméti, liábin lugúdi quei brónse le írichawagúaali.

19 Subúdi numúti sun le jadügübei, subúdi numúti jísiñejabu, jafiñen, jesériwidun láu jugúraasun, subúdi numúti giñe luágu jadügüña lan cátei buíti guetó luei meja furúmiñe.

20 Láu sun líra, níjein ában cátei jadüga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña gürígia láu tarúfudajan joun nánigu lun jaganóun lídan salúfuri lúma lun jeígin eígin le adágarawagüdüti joun sándu.

21 Rújadina dan tun lun tasáansiruni tigáburí, májagiru tígiruni tisálufurin.

22 Ninárün jáu luágu náburugüdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadáagubei,

²³ ábame náfaraguniña tirájüñü jilágubei, ítara lúba jasúbudiruni sun nánigu luágu subúdi náni lében aríttaguni lúma tében anígi, ábame nafáyeiruni cára ában jidaangiñe según le ladügübei.

²⁴ Ja jíbiri ja Tiatírabaña, ja mafálarubalin arúfudajani ligía, machülügiña giñe asúbudirei le únbei jagúara lujúlilin láni Máfia cátei le arámudaguabei, míchubadina ámu anügüni jawágu.

²⁵ Ragüjumei lubuídun jigáburí dari niábin.

²⁶ Ja ásiiragúbalin wuríbani, adúga méme jameíme le nabúseerúbei ladügün dari lun jóunwen, níchuguba ubáfu joun luágu buri fulásu,

²⁷ ítara quei líchugun Núguchi Búngiu ubáfu nun. Ábame jedéraagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi soudíeru le láuti múa.

²⁸ Níchuguboun giñe warúguma to lánina bináafin joun.

²⁹ Le garígeirugubei lun lagáambun, agáambaleí le laríñagubei Sífiri Sándu jóun buri tílana ligílisi.”

3

Ugánu joun tílana ligílisi to Sárdisboun

¹ ‘Babürüja lun jóuniri tílana ligílisi to Sárdisboun, baríñagame lun lun laríñagun joun. “Ítara líña naríñagun, áu le jáubei sédü espíritu láni Búngiu jáma sédü warúguma. Subúdi numúti sun le jadügübei, subúdi numúti luágu jiláñu jiña lan lún buri cátei le nuáguti, láu sun aríñawagúa lan luágu wíwan jumá.

² Agágudúa jumá, rújuma érei lún buri cátei le níjeinguabei, lubáragiñe lotúnwen, aríja náali luágu múaran lan le jadügübei ligíbugiñe Búngiu.

³ Jarítagua jumeí lubeíti le arúfudajoúbei jun, falájumei, sáansi jumeíme jigáburí. Anjaün magágudun, nídiba juágu quei liábin ában jíweruti ibídiñoun óra jun.

⁴ Láu sun líra, añájein fiú gürígia jagánagua ñi Sárdis ja múaradungiñábaña lúma wuríbani, jagía jeíbuguba núma táu anáanguni jarútu ladúga yúuti joun.

⁵ Ja ásiiragúbalin wuríbani, jadáuraguba anáanguni jarútu, áni magídarun nubei jíri tídaangiñe líburu to gáubalin jíri ja lúnbaña jabíjini ibágari magúmuhaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe láni ánjeligu.

⁶ Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ugánu joun tílana ligílisi to Filadéfiaboun

⁷ ‘Babürüja lun jóuniri tílana ligílisi to Filadéfiaboun baríñagame lun lun laríñagun joun. “Ítara líña naríñagun, áu le sándubei, le giñe inárünibeí, le gámabalin ligélen urúei David, le úabei ni ában gayáraati ladáuruni le nánjunrenchubei, siña lánjunrenchuni ni ában le nadáurubei.

⁸ Subúdi numúti sun le jadügübei. Rújadina ában béna júnren jigíbugiñe le lásíñerun ni ában adáura, ladúga láu sun loúgua lan jére, adúgaadün gásu láu nugúmadin, áni meyéeraguntün luágu nánigu jumá.

⁹ Aríja jumá, nadügüba lun jayábin lánigu Máfia ja yéebaña, ja aríñagubaña luágu juríu jamá áni mabágariduntiña queísi lánigu Búngiu,

ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jínsiñetiña nun, ninárün jáu.

¹⁰ Areída jumáali nugúmadin lun gagúraasun jumá, ligía nareídubadün lubei luei lidáani ouchwagúni le lúnbei liábin luágu sun ubouú lun jouchúniwa sun ja ubouágubaña.

¹¹ Madísebei niábin, mígira jumei ni ában lun lagídaruni jaffiñen nuágu, meferídirun jumámuga ni cátei lídaangiñe le lúnbei nichuguni jun.

¹² Ja ásiiragúbalin wuríbani, nichugubaña quei wagábu tidan Lúban Nubúngiute, máfuridundügüyaañame ñígiñe, ábame nabürüdüni líri Nubúngiute jawágu lun lasúbudirúniwa luágu lánigu jamá, lúma líri ubúrugú le láni Nubúngiute, le iséri Jerusalén le ñübinbei siéluigiñe lúmagiñe Nubúngiute, nabürüdübei giñe iséri níri jawágu.

¹³ Le garígeiruguti lun lagáambun, agáambalei le laríñagubei Sífiri Sándu jóun buri tílana ligílisi.”

Ugánu joun tílana ligílisi to Laodicéaboun

¹⁴ ‘Babürüja lun jóuniri tílana ligílisi to Laodicéaboun, bariñagame lun lun lariñagun joun. “Ítara líña nariñagun, áu le inárünibeí, le gaféenbei buídu, le aríñagubalin inárüni, le idaangiñebei liábin sun cátei le ladügübei Búngiu.

¹⁵ Subúdi numúti sun le jadügübei, subúdi numúti luágu madíli jumá lídan jesériwidun nun, másü jugúya. ¡Dilígubejjadün jamúga o sűjuma!

¹⁶ Quei bachárügü jubei, madílitün, másü, newérejabadün niyúmulugugiñe.

¹⁷ Aríñagatün luágu risi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu jíña.

¹⁸ Ligía nichugunbei dimúrei jun lun jagáñijan gólu le afínujóaali láu wátu geméti númagiñe, lun risi jumá le tímatimaati, lun giñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin.

¹⁹ Ébecha numútiña ja jínsiñebaña nun láu idérei, arúfudaja áu joun. Lúnti lubeiti sériu jumá, sáansi jumeíme jigáburi.

²⁰ Anája bénabu, nagúajaña, le agáambuti numálali, ába lánjunrenchuni béna nubá, nebéluruba lúmoun, ábame neigin lúma, jou ligíame núma.

²¹ Ja ásiiragúbalin wuríbani, nichuguba ubáraú joun númagua luágu nála le lála urúei, ítara quei násiiraguni wuríbani, ába nañúurun lúma Núguchi luágu lála.

²² Le garígeiruguti lun lagáambun, agáambalei le laríñagubei Sífiri Sándu joun tílana buri ligílisi.”

4

Ájuduraguni lun Búngiu, siélu

¹ Lárigiñe sun cátei le, ába naríjin ában béna júnren siélu, liábinti umálali le ítarabei quei lumálali fídu, lé buga adímurejabei nun, ába lariñagun nun.

—Weinba ñájoun, narúfudaali cátei lé buri lúnbei lasúseredun lárigiñe buri le bun.

² Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu.

³ Ítara líña camá ában dübü miríti, le jáspe o cornalína, ñiñoun ában jerémuuru geyégu láu jalaú ligía, mirítu quei ában dübü le esmerálda.

⁴ Geyégu láu lála urúei ligía aríjayatina ában wein-gádürü lála urúei, ñíñanu wein-gádürü gürígia ja weírigutiña ñun luágu, táu jadáuragun jarútu lúma ridi gólu jábulugu.

⁵ Lueígiñe lála Búngiu ligía áfurijati labríjanouga lúma wayújururu, ligíbugiñe lála, ñíñein sédú lámpu geméñu, jagía sédú láni Búngiu Espíritugu.

⁶ Ñíñein giñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégua láu lála Búngiu, ñíñanu gádürü cátaña gabágaritiña buin láu águu, dándu jagíbugiñe quei janágangiñe.

⁷ Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügüri, le jürüwan, ítara líña ligíbu quei ligíbu ában wügüri, le jagádürün, ítara líña quei ában ágila ájamajatu.

⁸ Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebu jáu agúaraja.

Sánderu, sándu, sándu,

Wabúreme Búngiu, le Súnti Gabáfu,

le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame sun dan.

⁹ Ságüti jíchugun cátaña gabágaritiña ja inébesi lúma eteíngiruni lun Búngiu le ñúnbei luágu lála, le gabágaribeí lun sun dan,

¹⁰ ábaja jájuduragun wein-gádürü weíyaaña mútu jagía ligíbugiñe, ába jaráfuduni jínsiñejabu lun Búngiu le gabágaribeí lun sun dan, ába jíchuguni jarídin ligíbugiñe, ába jagúarajan.

¹¹ Wabúreme, Wabúngiute, garíchatibu lun berésibiruni uweíriguni, inébesi, lúma ubáfu,

ladúga Amürü adügübalin sun cátei,

láu bugúndan badúgei, láu giñe bugúndan níjein lubeí sun le níjeinbei.

5

Líburu lúma Mudún

¹ Ábati naríjin ában líburu lújaburugu Búngiu le ñúnbei luágu lála, abürüjoúatu líburu tugúya turágerirugu lúma tigíbuagu, darúatu láu sédú séyu.

² Ába naríjin ában ánjeli gabáfuti, ába lálügüdjagan láu umálali reínti.

—¿Ca garíchabei lun ladáranunun líburu lúma lun lajeíridunun tiséyun?

³ Úati ni ában garíchatu lun ladáranunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchatu.

⁴ Ába nayájun sarágu ladúga úa lan ni ában garíchatu lun ladáranunun líburu tugúya, ni lun lalíjanun, ni íbini lun laríjinun.

⁵ Ábati laríñagun ában jádaangiñe weíyaaña mútu nun.

—Jebé bayájun, ladúga Jesucrístu, le “liñún” le jádaangiñebei ladügawagun Judá, le linébaanfan urúei Davíd, sirígua láali wuríbani lun gayára lan ladáranunun líburu lúma lun lajeíriduni sédú tiséyun.

⁶ Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúaaali. Sédúñein ligáanchun, sédú lágu, águu buri ligía, láni Búngiu sédú Espíritugu ja óunajoúbaña lídoun sun ubou.

7 Ñübinti Mudún ligía, le Jesucristubei, ába lanügünun líburu tugúya lújaburugugiñe Búngiu.

8 Dan le lárügüdünbarun líburu, ába jájuduragun gádürü cátaña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ñíñoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu.

9 Niján urému iséri le jerémujabei.

Garíchatibu lun banügünun líburu, lun bajeíridunun tiséyun, ladüga áfarúa ban, ába bagáñijaniña gürígia lídaangiñe sun rása, sun luwúyeri dimúrei, fulásu lúma néchaani.

10 Adüga báña urúeigumé jáma fádiringumé lun jesériwidun lun Wabúngiute, lúma lun jagúmadijan ubouágu.

11 Lídan le naríagun, ába nagáambuni jamálali sarágu ánjeligu geyégu láu lála lúma geyégu jáu cátaña gabágaritiña jagía, jáma weíyaaña mútu jagía. Níñanu míñun míñun ánjeligu,

12 jariñaga láu umálali jéreti.

Yúuti ubáfu lúma irisini, subúdi lúma érei, uweírighuni lúma inébesi, lúma eteíngiruni lun Jesucristu, Mudún le áfarúbei.

13 Agáamba numúti giñe jariñaguni sun cátei le ladügübei Búngiu siélu, le múarugubei, le lábugiñebei múa, lúma le baránajabei, lúma sun cátei lé buri lídaanbei.

Rúalá eteíngiruni, inébesi, uweírighuni, lúma ubáfu lun Búngiu le ñúnbei luágu lála, lúma lun Mudún, lun sun dan.

14 Ába jariñagun gádürü cátaña gabágaritiña jagía.

—¡Ítaralá!

Ába jájuduragun wein-gádürü weíyaaña mútu jagía ligíbugiñe le gabágaribei lun sun dan.

6

To sédú séyu

1 Ábati naríjin dan le lajeíridünbarun Mudún furúmiñetu tídaangiñe sédú séyu tugúya, ába nagáambun lariñagun ában jádaangiñe cátaña gabágaritiña jagía láu ában umálali camá lumálali wayújururu.

—¡Jigábu baríja!

2 Ába naríjin ában gabáyu jarúti, le waríñubei luágu, ñíñoun ában arco lújaburugu to áuboun lageíndagua. Rúati ában rídi lánina ásiiraguni lun ladüga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

3 Dan lajeíridunbarun Mudún tibíaman séyu, ába nagáambun lariñagun jabíaman cátaña gabágaritiña jagía.

—¡Jigábu baríja!

4 Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü ubouáguigiñe, lúma lun láfaraguágüdüniña wügüríña jámagua jílágubei, ába tíchugún ában oúnwenbun efeín lun.

5 Dan lajeíridúnbarun Mudún tūrūwan séyu, ába nagáambun laríñagun jūrūwan cátaña gabágaritiña jagía.

—jigábu baríja!

Ába naríjin ában gabáyu wuríti, ñíñein ában baláansu lújaburugu le waríñubei luágu.

6 Ába nagáambun laríñagun ában umálali jamídaanguágiñe cátaña gabágaritiña jagía.

—Ábanrügülá kíló tūrígú luága lebégi ában wéyu wadágimanu, ūrūwa kíló sebáda ligía méme ebégi, áni toúnigi jumeíme aili lúma bínu buídu.

7 Dan lajeíridúnbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—jigábu baríja!

8 Ába naríjin ában gabáyu amariyu, le waríñubei luágu, ouweni líribei, lárígi lárígi liábin jafúlasun jiláaña. Ába libíjin ubáfu luágu ligádürün murúsun lídaangiñe ubouú lun láfarajan láu wuríbu, láu ilámaü, láu sándi, lúma jáu anímaalugu janárimetiña ja ubouágubaña.

9 Dan lajeíridúnbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérun Búngiu, lúma luágu jadímurejan buíti luágu Jesucrístu, lábugiñeñanu latárü.

10 Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragúdaña ja mísiñejabúbaña bun ubouágu, luágu woúnwen? ¿Ídamésan bafáyeigúdaña luágu jáfaruníwa jilágubei?

11 Ába jabíjin anáanguni jarútu, ába laríñawagún joun lun jeméraagun luágu murúsun dan darí jóustarun jabíríña lídan eseríwiduni lun Crístu ja lúngiñabaña jáfarawagúniwa quei jagía.

12 Lídan le naríjinbei, ába lajeíridunun Mudún tísísin séyu, ába ladágarun ában ounwenbun járabaganáli. Ába láuridun wéyu quei lúdu, ába láfunadun játi camá jítaü,

13 ába jeíguadun warúguma ja siélubaña lun múarugun quei táburujan mángu tueígiñe tídíbu dan le lánjingichunun garábali.

14 Ába lagúmuchagun siélu quei ában gárada dan le tabáruchawagún, ába ladíñuragunga sun wúbü lúma ubouju lídaangiñe jabára.

15 Ába jarámudagun urúeigu ja lánina ubouú lídan júyu lúma buri labádinagua dúbü le luágubei wúbü, úara jáma ja weírígubaña, gurúnelugu, rísitiña, gabáfutiña, jáma sun idámuni, jáma wügüríña ja mabúremetiña.

16 Jaríñagati lun wúbü lúma lun dúbü.

—Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárimé ligáñi Mudún.

17 Chülújali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelítagu

7

1 Lárígiñe sun cátei le, ába naríjin gádürü ánjelígu rára luágu gádürü larígei ubouú, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídíbu wéwe.

² Aríjatina gíñe ábanya ánjeli ñübinti lueígiñe oubáü le ñígiñe lubeí láfuara wéyu láu liséyun Búngiu le wíwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadügün wuríbani lun múa lúma barána.

³ —Madüga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-wein-gádürü mílu jádaangiñe linébaanfaangu Israél.

⁵ Dúusu míluñanu jádaangiñe ladügawagun Judá,
dúusu mílu jádaangiñe ladügawagun Rubén,
dúusu mílu jádaangiñe ladügawagun Gad,

⁶ dúusu mílu jádaangiñe ladügawagun Áser,
dúusu mílu jádaangiñe ladügawagun Neftalí,
dúusu mílu jádaangiñe ladügawagun Manasés,

⁷ dúusu mílu jádaangiñe ladügawagun Simeón,
dúusu mílu jádaangiñe ladügawagun Leví,
dúusu mílu jádaangiñe ladügawagun Isacár,

⁸ dúusu mílu jádaangiñe ladügawagun Zabulón,
dúusu mílu jádaangiñe ladügawagun José,
jáma dúusu mílu jádaangiñe ladügawagun Benjamín.

Sarágu gürígia jarútu jaddüragun

⁹ Lárigiñe cátei le, ába naríjin sarágu gürígia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña gürígia jagía darí lun siñá lan jabájüdün, jarútu jadáüragun táu tubána fáluma jájaburugu.

¹⁰ Ába jagúarajan sun jagía láu umálali jéreti, ába jaríñagun.
Weíríti Búngiu, le ñúnbei luágu lála,
weíríti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun,

¹² ába jaríñagun.

¡Ítaralá! Rúalá uweírigu, lichú áu, eteíngiruni,
inébesei, ubáfu lúma érei
lun Wabúngiute lun sun dan. Ítaralá.

¹³ Ábati lálügüdünina ában jádaangiñe weíyaaña mútu jagía.

—¿Cátañasan ja, ja jarúbaña adáüragun? ¿Jalágiñésan jayábin?

¹⁴ Nariñaga lun.

—Amürü jamúga aríñagei nun.

Lariñaga nun.

—Ja súfurijañaña sarágu ja, ja chibá jamaalíbei jafígoun láu líta Mudún, jarúmagüda jamouñ janígi láu.

¹⁵ Ligía ligíbugiñeñanu lubeí lála Búngiu esériwida lun, wéyuagu áriebu tídan lúban to siéluboun, louñgírubaña Búngiu láu leréderun jáma.

¹⁶ Máfagun jáñame ilámaü, ni mágürabu, másürün láñame wéyu, mañáurijan láñame lárrouga,

17 ladüga loúnigirubaña lan Mudún le lubádubei lála Búngiu, ábame lanügüniña lárún dúna le íchugubei íbágari magúmuchaditi, ábame larágajani Búngiu sun águiräü lueígiñe jágu.

8

Tisédün séyu lúma lágei cupáli le gólu

1 Dan lajeiridúnbarun Mudún tisédün séyu to tuáguboun líburu, ába ñi lan maníguäu siélu queí buri luágu dimí óra.

2 Ába naríjiniña sédü ánjeligu ja rárabaña ligíbugiñe Búngiu, ába líchugúniwa sédü fidu joun.

3 Lárigiñe, ábaya liábin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún bürübün cupáli lun, lun ladágaragüdüni úara lúma jayúmuragun sun ja lánigu Búngiu ligíbuagu latárü gólu le ligíbugiñebeí lála Búngiu.

4 Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu.

5 Ábati lanügüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachürüni luágun ubou, ába lagaambún wayújururu, ireíni, labírijaníga, lúma ában jarábaganáli.

Lé buri fidu

6 Ábati jaráanserun sédü ánjeligu ja láubaña sédü fidu lun jínwiruni.

7 Ába línwiruni furúmiñeti ánjeli lífidun, ába lasálriragun lúbara júya le deréguati lúma wátu geméti, láu giñe jítaü, ába lachágarúniwa luágun ubou. Ába lágudun lürüwan murúsun lídaangiñe ubou, ígirúati bián murúsun mágudúnti, gudáwati giñe lürüwan murúsun lídaangiñe buri tídi bu wéwe lúma jíduru.

8 Ába línwiruni jabíaman ánjeli lífidun, ába lachágarúniwa ában cátei camá jamuga ában oúnwenbun wübü durúnguati baránajoun, ába lasálriragun lürüwan murúsun lídaangiñe barána jítaüme.

9 Jiláguatiña sun úduraü ja lídaanbaña barána le asálriragubei lun jítaüme, gürínguatu giñe sun ugúnein to ñíboun lídan barána ligía.

10 Ába línwiruni jürüwan ánjeli lífidun, ába teíguadun ában oúnwenbun warúguma siélu giñe, durúngu queí ában tóchi. Táburuja luágun lürüwan murúsun lídaangiñe dúna lúma líseesen dúna.

11 Igífi tíribei warúguma tugúya, ába lagífidun lürüwan dúna, ába jóúwegun sarágu gürígia ladüga lagífidun dúna ligía.

12 Ába línwiruni jagádürün ánjeli lífidun, ába lagürinchagun lürüwan murúsun lídaangiñe líbiri wéyu, láu sun játi, jáma warúguma. Le oúbaü le agürinchagubei jawágu, ába labúridun, marúgoungadunti wéyuagu ni árie bu.

13 Lárigiñe, ába naríjin ában dunúru weíríti ájamaja lamídaangua siélu, aríñageina ligía láu umáleri jéreti.

—¡Fugiábugume ja aganoubaña ubouágu luágu ürüwa lanárimeníga lé buri lúnbei láburuja jawágun dánme jínwiruni ja jíbiri ürüwa ánjeligu jáfíndun!

9

1 Ába línwiruni jaseíngün ánjeli lífidun, ába naríjin ában warúguma eíguadutu siélu giñe lun múarugun, ába líchugún ligélen júyu le mébejabei tun.

² Ába tánjunrenchuni júyu ligía, ába láfuridun gumúlali ñígiñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali.

³ Lídaangiñe gumúlali ligía ába jachúlaagun chigángaru, ába jájamajani sun uboú, ába jabíjin chigángaru jagía ubáfu líbe jabáfu águru ja uboúagubaña.

⁴ Ába laríñawagún joun lun madügün jamá wuríbani lun jíduru le uboúagubei, ni lún buri nádü, ni lun tídibu wéwe, lueídügü joun gürígia ja úabei líseíni Búngiu jeréberugu.

⁵ Majoúati lun jáfaraguniña chigángaru jagía gürígia, lueídügü lun jásjuniña gürígia luágu seíngü játi, ítara líñati ligári jásjün quei jásjün águru.

⁶ Lídaanme buri wéyu ligía, jáluajabei gürígia oúweni, madárijabei, busén jagía yebéme jóüwegun, ladíseduba oúweni jaweí.

⁷ Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában ridi le gólu, ítara líña jagíbu quei ligíbu wügüri.

⁸ Ítara líña jádiburi quei jádiburi würiña, liábin jári, quei lári liñún.

⁹ Darúgu líña jágubu láu ában cátei camá gürábu, ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu.

¹⁰ Gálitiña quei jáli águru le gágiriti. Ñíñein ubáfu luágu jáli lun jadügün wuríbani joun gürígia luágu seíngü játi.

¹¹ Ñíñein ában jábuti chigángaru jagía, le ánjeli le láni júyu le mébejabei. Abadón líribei ánjeli ligía lídan hebréo, lídan güriégu, Apolión o Agünrinchaguti.

¹² Sügüja furúmiñeti lanárimeníga, mégeigili bián.

¹³ Ába línwiruni jasísín ánjeli lífidun, ába nagáambun ában umálali lídaangiñe gádürü larígei latárü gólu le ligíbugiñebei Búngiu.

¹⁴ Ába laríñagun umálali ligía lun jasísín ánjeli le láubei fídu.

—Farára baña gádürü ánjeligu ja güráñubaña láru oúnwenbun dúna le Eufrátes.

¹⁵ Ába jáfaragadún gádürü ánjeligu jagía lun jáfaragun ában jádaangiñe cáda ürüwa gürígia jílagubei, ladüga aráanserúaña lubá óra ligía, wéyu ligía, játi ligía, lúma írúmu ligía.

¹⁶ Ába nagáambuni átiriñanu lan jasúdaaranigu ja luágutiña gabáyu. bián-san míñun.

¹⁷ Ítara líña ligáburu jayáwadagun gabáyu jagía jáma ja waríñubaña jawágu nun. Ñíñein ában cátei janíguagu, funáti licólorun, dúnguti, lúma amariyu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma súfuru jayúmulugugiñe.

¹⁸ Ába láfaraguniña ürüwa wuríbani le áfuridubei jayúmulugugiñe gabáyu jagía ában jádaangiñe cáda ürüwa gürígia jílagubei, ürüwa wuríbani ligía. wátu geméti, gumúlali, lúma súfuru.

¹⁹ Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu giñe jadüga wuríbani.

²⁰ Ja jíbiri gürígia ja moúwegunbaña láu wuríbani le, mígirun meme jamúti jadáguni cátei lé buri meja jadügübei, mígirun jamei jájuduragun joun espíritugu wuríbatiña lúma joun sándu ja gólu, pláta, brónse, dübü, wéwe—ja siñáti jaríjin, ni jagáambun, ni jeíbugun.

²¹ Mígirun jamei jáfarajan, jabíñarajan, jasálufurijan, lúma jíwérujan.

10

Ánjeli táu tiraïraü líburu

¹ Ábati naríjin ábanya ánjeli gabáfuti, ába larárirun siélugiñe lídan juánriñu táu ában jerémuru lougiñe lichügü. Miríti ligíbu quei wéyu, liábin lúruna camá durúngu líña.

² Níñoun ában tiraüraü líburu junréngu lújaburugu. Ába líchuguni lugúdi le louñwenren lougiñe barána, le lubaüna lougiñe múa.

³ Ábati lagúaragun láu umálali jéreti quei ában liñún dan le lówoujan, dánti le lagúaragunbei, ába lagaambúniwa ladürügüdün sédü wayújururu.

⁴ Lárigiñe ladürügüdün sédü wayújururu ligía, ába yebe nabürüjaali lan le laríñagubei, ába nagáambun laríñagun ában umálali nun siélugiñe.

—Maríñagabei le laríñagubei sédü wayújururu, mabürüjabei gíñe.

⁵ Ánjeli bugáti le naríjubei lougiñe barána lúma lougiñe múa, ába liñúruni lújabu le louñwenren siéluñ,

⁶ ába láfiñurun luágu le gabágaribei lun sun dan, le adügübalin ubouú láu sun siélu, barána lúma sun cátei le lídaanbei, ába laríñagun.

—Úadügüyaáli darásaü.

⁷ Dánme le lachülürün dan lun lagúmeserun jasédün ánjeli ínwirei lifídun, gúnfuljalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siélugiñe, ába laríñagun nun.

—Beiþa, banügounme tiraüraü líburu to daráguboun, to lújaburuguboun ánjeli le rárabei lougiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jóuboun, bímebei basándirunun biyúmulugu, tagífidame burágeirugu.

¹⁰ Ába nanügünun tiraüraü líburu tugúya lújaburugugiñe ánjeli ligía, ába neíginun, bímeti nasándirunun niyúmulugu camá síruudu, lárigiñe neíginun, ába tagífidun nurágeirugu.

¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

11

Ja bián geféentiña

¹ Ábati lichugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi.

² Mamísurajabei бүрүрү le bougudibei tibíti ligílisi ladüga derégewaali joun ja terénchabaña lun Búngiu, ja lúnbaña jagünrinchaguni ubúru le sándubei luágu bián-wein-bián játi.

³ Ábame nouñajan bián geféentiña lun jadímurejan nuágu luágu mílu bián-san ürüwa-wein wéyu, táu jadáüragun lúdu.

⁴ Bián geféentiña jagía, jagía gayáwabalin bián tídibu wéwe to olívo lúma bián lébu sanúdelu le ligíbugiñebei Búngiu, le Labúremebei sun ubouú.

⁵ Ánjein ñi abúseerúti ladügün wuríbani joun, ába jígiragüdüñ wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguarügü le buséti ladügün wuríbani joun.

⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña giñe lun jadügüni dúna jítañme, lun giñe jasúfuriragüdüni ubou láu sun luwúyeri wuríbani, ságü jabúseerun.

⁷ Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeféridiruni wuríbu, ábame láfaruniña jílagubei.

⁸ Ábame jeréderun riwágu lídan lémeri oúnwenbun ubúru gu le Jerusalén le ñi lubei ládarawagúa Jesúsu luágu gurúwa, fulásu meme le, camá Sodóma lúma Ejípto.

⁹ Ábame jariaguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu úrúwa wéyu dimí, mígirunbaña lun jábunún.

¹⁰ Ábame jagúndaaragun ja ubouagubaña láu jóuwegun, daríme lun jedéweegun cátei jámagua, le jagúndan, ladüga berése jamá meja bián lánigu Búngiu jagía joun.

¹¹ Ába naríjin, áu Juan, luágu lárigiñe lan úrúwa wéyu dimí ligía, ába láguyuaguadüniña Búngiu, ábaya jásaarun, áni sun ja aríjubaliña, weíriti janúfudedagun.

¹² Ába jagáambun bián geféentiña jagía ában umálali jéreti siélugiñe le aríñagubei.

—Weínjuma ñájoun siélun.

Ába jamúdeirun siélun lídan ában juánriñu, aríagu jáganiñu joun.

¹³ Lídan óra ligía, ába ladágarun ában oúnwenbun járabaganáli, ába tagúluludun ában muna tídaangiñe ságü díisi to ubúruguboun, ába jóuwegun sédü mílu gürígia ladüga járabaganáli ligía. Ja jíbiri gürígia, ába jichugun inébesi lun Búngiu le siélubei ladüga luweirin janúfude.

¹⁴ Sügüja libíaman lanárimeniga, madísebei le ában.

Le lisédün fidu

¹⁵ Ába línwiruni jasédün ánjeli lífidun, ába lagaambúniwa laríñagun umálali buri jéreti siélugiñe.

Chülújali lidáani Wabúreme Búngiu lúma lidáni Crístu lun jarúeijan lídan sun ubou, áni jarúeijaba sun dan.

¹⁶ Ábati jélemuchunga weín-gádürü gürígia ja weírígutiña, ja ñúnbaña luágu jála le lala urúei, láu jagíbu múarugu, ába jájuduragun lun Búngiu.

¹⁷ Ába jariñagun.

Teínqui wáña bun, Wabúreme Búngiu, amürü le Súnti Gabáfu,

amürü le wínwanbei lúmagiñe lubáragiñe furúmiñeti dan, wínwan amürü guetó, wínwan amúrúme sun dan.

Teínqui wamútibu ladüga ragúbaali lan oúnwenbun bubáfu. áni guméseedibu arúeija.

¹⁸ Gáñiburija néchaanigu,

chülüja wéyu lun babeíjan,
 chülüja giñe dan lun bagúseragüdüniña jiláguaaña,
 ábame bíchuguni jafáyeirua ja báni profétagu joun,
 jáma jíbiri ja derégeguabaña jóungua bun, jáma sun jawúyerigu gürija ja
 íchubaña inébesi lun bíri.

Chülüja óra lun bagünrinchaguniña ja agünrinchagubalin ubouú.

¹⁹ Ábati tánjunrenchun lúban Búngiu to siéluboun, ába tarijin gáfu to lágei lidáradun Búngiu jáma lumútoniña ñi tídan lúban. Ába ñi lan labírijaniña, ireíni, wayújururu, ában járabaganáli, lúma lábburujan lúbara júya deréguati le weínamuti.

12

Würi lúma anímaalu le dragón

¹ Ábati lasálriragun ában oúnwenbun seíni siélu. ában würi darúgu líña wéyu táu camá jamuga ában dínugu, láu játi lábugiñe tugúdi, lúma ában ridi jáu dúusu warúguma tábulugu.

² Würi tugúya dageínañoun, tagúaraja láu igári le lánina agáriduni, ladüga súfuritu lun tagüriajan.

³ Ábaya lasálriragun ábaya seíni siélu. ában oúnwenbun anímaalu le dragón funáti, sédüñein lábulugu, dísi ligáanchun, lúma ában ridi luágu cáda lábulugu.

⁴ Ába ladúrugudun dragón ligía ában jádaangiñe ságü ürúwa warúguma láu líli, ába lajúnruniña múarugun. Ába laráramun dragón ligía tigíbugiñe würi to lúnboun tagüriajan, lun leígini tiraú dánme le tagüriajan.

⁵ Ába tagüriajan würi tugúya ában wügüri irájü le lúnbei ledéraagüdün lagúmadijan lídan sun fulásu queísi láu ában murúsun gürábu. Ába lagídarúniwa tiraú tueí, ába lanügüniwa lun Búngiu luágun lála.

⁶ Ába tanúrajan würi tugúya lídoun fulásu mageírawati le ñi lubei aráanseeli lan Búngiu ubáraú tubá, lun toúnigirúniwa ñi luágu mílu bián-san ürúwa-wein wéyu.

⁷ Lárigiñe, ába ñi lan ában wuríbu siélu, ñi lubei lageíndagua árcanjel Miguél jáu láni ánjeligu lúma dragón. Ageíndaguati dragón jáu láni ánjeligu,

⁸ ába jeféridiruni wuríbu, ába mabáraaña lan siélu.

⁹ Ába lubeiti laságarún oúnwenbun dragón, le binádu jéwe ligira le giríbei Máfia, o Satanási, le ayéejabalin sun ubouú, siélugiñe. Ligía jáu sun láni ánjeligu, ába jachágarún múarugun.

¹⁰ Ábati nagáambun laríñagun ában umálali jéreti siélugiñe.

—Gáñei láali Búngiu Máfia láu luweírin lubáfu. Chülüjali asálbaruni joun gürija ubouúgun, chülüjali larúeijan Búngiu lúma lagúmadijan Crístu, ladüga sagáwaali le íchugubei jadúnrun wadújeñu luegiñe Jesucrístu, le íchigañajábei jadúnrun wéyuagu, áriebu ligíbugiñe Wabúngiute.

¹¹ Siríguja jamáli láu loúnwen Mudún, le Jesucrístubei, lúma láu jíchugun fe luágu láni Búngiu ugánu luágu asálbaragülei, manúfudeduntiña lueí jeféridiruni jabágarí, aráanseñu rügütiña lun jóunwen.

¹² Gúndaala lubeiti siélu, gúnda jumá jugúya le aganoubei ñi. ¡Áni fugiábugu ja aganoubaña ubouúgun, lúma baránaja! Nüdünja Máfia júmoun láu oúnwenbun igáni, ladüga subúdi lumúti luágu murúsun rügáali lan lidáni.

¹³ Dánti laríjinbei dragón luágu fiwaali lan ubouúgun, ába leíbaajanun würi tó buga agüriajaboun.

¹⁴ Ába líchugún bián larúna dunúru le weínamuti tun würi tugúya lun gayára lan tájamarun lídoun fulásu mageírawati díse luei dragón ligía, le ñiba lubei toúñigirúa luágu úrúwa írúmu dimí.

¹⁵ Ába lewéran dragón ligía sarágu duna liyúmulugugiñe lun lañáradaguagüdünun würi tugúya.

¹⁶ Ába líderagunun múa würi tugúya, ába lánjunrenchun múa, ába lachúrui sun duna le lígiragüdübei dragón liyúmulugugiñe.

¹⁷⁻¹⁸ Gáñitimaati dragón túma würi tugúya, ába lídin ageíndagua jáma tirájüñü ja ñüdúbaña láu le lubeibei Búngiu, falájamei ugánu le láni Jesucrístu.

13

Ja mónsturu

¹ Ába naráramun láru béya, ába naríjin lamúdeirun ában mónsturu baránajagiñe, sédüñein lálbulugu, dísi ligáanchun. Ñíñein ridi luágu cáda ligáanchun lúma ában íri le áubei lanábaguei Búngiu luágu cáda lálbulugu.

² Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma líñún. Ába líchuguni dragón lubáfu lúma lála lun, lúma sarágu ubáfu lun lagúmadijan.

³ Ñíñein ában chaúnti luágu ában lídaangiñe lálbulugu mónsturu ligía, weírui lún yebe láfaruni jílagubei, ába lareídagun lichaúntin. Weírui janígi sun gürígia láu mónsturu ligía.

⁴ Ába jájuduragun lun dragón luágu líchugun gumádi lun mónsturu, ába giñe jájuduragun lun mónsturu, ába jaríñagun.

–Úati ni ában quei mónsturu le, ¿cába gayára láfaruni?

⁵ Ígirúati giñe mónsturu ligía lun ladímurejan dimúrei buíti luoúgua lúma lun lanábaguni Búngiu, lúma lun lagúmadijan luágu bián-wein-bián játi.

⁶ Ába ladügün ítara, adímurejati wuríbati luágu Búngiu, anábalei líri, lúban, jáma ja siélubaña.

⁷ Ígirúati giñe lun lageíndagun jáma lánigu Búngiu dari lásiiragúniña, ába líchugúniwa ubáfu lun jawágu sun rása, fulásu, luvwúyerigu dimúrei lúma néchaani.

⁸ Ába jájuduragun sun ja aganoúbaña uboúagu lun mónsturu ligía, ja úabaña jíri búrúwañu lúmagiñe ladügün uboú tídan líburu to lánina íbágari, to lúmaboun Jesucrístu, le Mudún le oúwebei.

⁹ Le garígeiruguti lun lagáambun, agáambalá.

¹⁰ Ja adáürútiña ámu, jadáürawagúba giñe, ja áfarajatiña táu efeín, jáfarawagúba giñe táu efeín. Ligía busén jabeí lánigu Búngiu gurásu lúma afíñeni.

¹¹ Lárigiñe, ábaya naríjin ábanya mónsturu lamúdeirun múarugugiñe. Ñíñein bián gánchu luágu camá ligáanchun mudún, áni ítara líña ladímurejan camá ában dragón.

¹² Ñíñein sun ubáfu le láni furúmiñeti mónsturu lúma lun ladügüni cátei lueígiñe loúbadina furúmiñeti mónsturu. Ába ladügün lun jájuduragun sun gürígia ja uboúagubaña lun furúmiñeti mónsturu, le lareídaguagüdübei lueígiñe chaúnti le luágubei.

¹³ Adügati giñe oúnwenbun buri miláguru, áburujagúdati wátu geméti siélugiñe lun múarugun jagíbugiñe gürígia.

¹⁴ Lídaangiñeti miláguru buri le únbei líchugúa ubáfu lun ladügüni lueígiñe loúbadina furúmiñeti mónsturu, ába leyéeduniña ja aganóubaña ubouágu, ába ladügagüdün ában liyáwa mónsturu le gawágubalin chaüti ába lareidagun, joun.

¹⁵ Ába libíjin jabíaman mónsturu ubáfu lun líchugun ibágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun.

¹⁶ Adügati giñe lun sun lan gürigia —weínamujaña, ñübürigiña, rísitiña, gudémetiña, idámuni, máma idámuni—lun labürüdün líri mónsturu luágu jájabu le jóunwenren o luágu lan jerébe.

¹⁷ Úati ni ában gayáraati lagañijan ni cáta ni lalúgurajan ánjein úa líri mónsturu o linúmerun líri luágu.

¹⁸ Buséntitia cátei le lichú áu, le gunfaráandati, atúriajaleí linúmerun mónsturu, le ábanbei quei líri wügüri, áni niján número le asálrubei lídaangiñe lilétürana líri ligia. sísi-san úrúwa-wein-sísi.

14

Jerémujan ja san bián-wein-gádürü mílu

¹ Lárigiñe líra, ába naríjini Jesucrístu, le Mudún, rára lábulugu wübü le Sión, le siélubei. Ñíñanu san bián-wein-gádürü mílu gürigia lúma, ja bürüwañubei líri Mudún lúma líri Lúguchi jeréberugu.

² Lárigiñe, ába nagáambun ában amúri ñübinti siéluigiñe camá lamúri barána, camá giñe ladürügüdün ában wayújururu le jéreti, ítara líña giñe camá jamuga tamúri sarágu gidára.

³ Ába jerémujan gürigia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürigia ja weírigitíña. Úati ni ában gayára lumúti laníchigu lerérun urému ligía gunfaráanda jaweídügüya san bián-wein-gádürü mílu ja asálbarúabaña jádaangiñe ja ubouagubaña—

⁴ Jagía ja mádaragúnbaña jóungua jámoun würiña, reídeitiña jarúmañu, falájamei Mudún le ñíjin lumúti lídin, sálbawatiña jádaangiñe gürigia quei furúmiñeti edéweejani lun Búngiu lúma lun Mudún.

⁵ Madárirúnwati ni murúsun iyéeni luágu jayumáru ladüga jarúmatiña ligíbugiñe Búngiu.

Ugánu buri le jíchubei úrúwa ánjeligu

⁶ Ábati naríjin ábaya ánjeli ájamaja lamídaangua siélu, ñíñein ugánu le magúmchaditi lúma lun lapúrichijani joun ja aganóubaña ubouágu—joun sun néchaanigu, rása, luwúyerigu dimúrei lúma sun fulásu.

⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chülüja dan lun lagúseragüdün. Judüga jumá lun le adügubalin siélu lúma ubou, barána lúma líseesen dúna.

⁸ Ába liábin ábanya ánjeli lárigi, ába laríñagun.

—Jeígua, jeígua Babilónia to weíríguboun, ladüga tabácharuadágüdüni sun néchaani láu bínu le lánina liwíye tayúmajan.

⁹ Ába liábin ábanya jürúwan ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labürüdúniwa líri mónsturu luágu lújabu o leréberugu,

¹⁰ látubei bínu le lánina lanárime ligáñi Búngiu le lúnbei lábुरुjan le gumúti luágun, ábame lasúfurirun láu wátu lúma súfuru ligíbugiñe Jesucrístu lúma jagíbugiñe ánjeligu ja sándubaña.

¹¹ Laweínruba lugúmúlalin wátu le asúfuriragüdúbaliña lun sun dan, úabei eméraaguni ní wéyuagu ní áriebu joun ja ájuduragubaña lun mónsturu lúma tun liyáwa, o ja bürüwañubei líri jawágu.

¹² Ligía lébubei lúnti lan gagúraasun jamá lánigu Búngiu ja ñüdünbaña láu le lubeíbei áni falájamei Jesúsu surúñu, lun ítara meme jamá derégüdagu lídan jafiñen darí lúmoun jóunwen.

¹³ Ábati nagáambun laríñagun ában umálali ñúbinti siélugiñe nun.

—Abürújabeí le. “¡Gúnda jamá ja ouwetiña láu jafiñen luágu Jabúreme Jesucrístu!” Lúmagiñe óra ligía, jeméraaguba lídaangiñe jawádigimari, ábame lídin le jadúgubei úara jáma, líña Sífiri Sándu.

Lalúbajoúniwa múa

¹⁴ Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucrístu, le Wügúri Garaúwarügüti. Níñein ában ridi gólu lábúlu tuma ában alúbagúlei jamánatu lújaburugu.

¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagúle, ladüga chülüja dan lun alúbajani, ladüga funáli nádü.

¹⁶ Ába lásügüragüdünun le ñúnbei luágu juánriñu lalúbagúle múarugugiñe, ába lalúbajan.

¹⁷ Ábayati láfuridun ábaya ánjeli tídaangiñe lúban Búngiu to siéluboun táu giñe lalúbagúle jamánatu.

¹⁸ Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagúle láu umálali jéreti, ába laríñagun lun.

—Dáboun balúbagúle to jamánaboun, alúbajaboún tirésini beíbei to múaruguboun, ladüga funáaru.

¹⁹ Ába lásügüragüdünun ánjeli ligía lalúbagúle múarugugiñe, ába lalúbajanun beíbei to múaruguboun, ába líchugunun lídoun ában ágei weíríti lun taríbichawagúniwa. (Míni lan líra, lanárime abeichúni le lúnbei liábin lúmagiñe Búngiu.)

²⁰ Ába taríbichawagún beíbei bougudi libíti ubúru, ába láfuridun jítaü lídaangiñe tágei chülü lúmoun líñun jafúrenun gabáyu, úrúwa-san kilómetro geyégu.

15

Ánjeligu jáma jagúmujoún sédü ígei

¹ Ába naríjin ábanya ounwenbun seíni siélu, weírigüdati anígi. sédü ánjeligu jáu jagúmujoún sédü ígei, ja áubaña lagúmucha ligáñi Búngiu.

² Aríjatina giñe camá jamuga ában barána le bídiriú láu wátu geméti lídan, níñanu ja agáñeirubaliña luágu mónsturu, tuma liyáwa, lúma luágu linúmerun líri, rára jáña lubádu barána le bídiriú ligía táu gidára to líchuguboun Búngiu joun.

3 Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weíríti áni buíti sun le adúga báalibei,
Wabúreme Búngiu, Súnti Gabáfu,
surúñu líña sun le badügübei, úaragua,
amürü le Lurúeitebei sun néchaani.

4 ¿Cábasan manúfude buei, Wabúngiute?
¿Cábasan madímurejan buíti buágu?

Amürü rügüñadibu maffigounjan,
jayábinba lílana sun fulásu, ábame jájuduragun bun,
ladúga arijúaali luágu buídu lan sun le badügübei.

5 Lárigiñeti sun cátei le, ába naríjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri.

6 Ába jáfuridun sédü ánjeligu ja jáubaña sédü ígei jagía, ñígiñe. Táuñanu janáangun líno to jarúmatu, mirí, liábin jabélitin, gólu luágu janíguagu.

7 Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédü ánjeligu jagía, buin líña cáda cópu láu luweírigin ligáñi Búngiu le gabágaribei lun sun dan.

8 Ába labuínchun fulásu le sándutimaabei láu gumúlali le ñübinbei lídaangiñe luweírigin Búngiu lúma lubáfu. siñátiti lebélorun ni ában ñíjin darí jagúmuchun sédü ígei ja jámabaña sédü ánjeligu jagía.

16

Cópu buri le lágei ligáñi Búngiu

1 Ábati nagáambun laríñagun ában umálali jéreti joun sédü ánjeligu jagía lídaangiñe fulásu le sándutimaabei.

—Jeíba áturei cópu buri láu lanárime ligáñi Búngiu ubouágun.

2 Ába lídin furúmiñeti ánjeli, ába láturuni licópun ubouágun, ába lasálirun gumeín gáriti jawágu sun ja gawágubalin líri mónsturu, judúgua jagía lun.

3 Ába láturuni jabíaman ánjeli licópun baránajoun, ába lasáliragun barána queési játa jiláaña, ába jóúwegun sun cátaña ja gabágaribaña lídan.

4 Ába láturuni jürüwan ánjeli licópun luágun buri dúna lúma líseesen dúna, ába lasáliragun jítaüme.

5 Ába nagáambun laríñagun láni dúna ánjeli.

—Úaraguatibu láu bagúseragüdün ítara, Búngiu sándu, amürü le wínwanbei lúmagiñe lubáragiñe furúmiñeti dan áni wínwan amürü guetó,

6 ladúga jagía, aseíñeigüda jamúti játa profétagu jáma ja derégeguabaña jóungua bun, guetóti gurágüdaadibu jítaü joun, yúuti joun.

7 Agáambatina giñe laríñawagun lueígiñe latárü.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úaraguni.

8 Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gürígia láu lísi,

9 ába jachúrarun súngubei. Láu sun lira, masáansiragunti jagáburi, madímurejan jagía buíti luágu Búngiu, anábagnarügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála mónsturu, ába leréderun larúejan lábugiñe lubúriga. Ába buri jágüragunun gürigia jañéñe láu igári.

¹¹ Ni ítara, masáansiragunti jagáburi lun jígiruni wuríbati léñaja jadügübei, anábaguarügü jameí Búngiu le siélubei luágu jagárigu luma jagúmein.

¹² Ába láturuni jasísin ánjeli licópun luágun oúnwenbun dúna le Eufrátes, ába lamábeidun lun ñi lan úma lun jásügürün urúeigu ja ñúbinbaña lueigiñe oubáu le ñigiñe lubei laboucha wéyu.

¹³ Ábati naríjin jáfuridun ürúwa espíritugu wuríbatiña liyúmulugugiñe dragón, liyúmulugugiñe mónsturu, luma liyúmulugugiñe proféta le yéeebei, ítara jáña espíritugu wuríbatiña jagía quei júa.

¹⁴ Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouagubaña lubá wuríbu le lánina oúnwenbun luwéyuri Búngiu le Súnti Gabáfu.

¹⁵ (“Tóunigi jumátia ladúga sódinibeí niábin quei liábin jíweruti áriebu. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini gürigia le mabúseerun lubeí lun jaríjini luágu,” líña lariñagun Jesucrístu.)

¹⁶ Ábati jóundaraguniña urúeigu lídan fulásu le gíribei Armagedón lídan dimúrei le hebréo.

¹⁷ Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sándutimaabei le siélubei. Lumálali Búngiu ligía, le ñúnbei luágu lála ñi, lariñaga.

—Adügüwaali.

¹⁸ Ába ñi lan labírijaniga, ireíni, luma wayújururu, ába lánjingichun múa láu ában járabaganáli, jéreti sügü láu sun járabaganáli le dagáalibeí lúmagiñe ñi jamá gürigia ligíbuagu ubou.

¹⁹ Ába lafánreinragun ubúругu weíruti le Babilónia lídan ürúwa murúsun, ába buri lagúluludun ubúругu le ubouagubei, ába larítagun Búngiu luágu ubúругu weíruti le Babilónia lun lájuluchagüdüni bínu le lánina abeichúni le loúnajabei lun lídan ligáñi.

²⁰ Sun ubouju luma sun wübü, ába lagúmuchagun.

²¹ Ába giñe láburujan oúnwenbun buri lúbara júya deréguati siéluigiñe jawágun gürigia, jürüburiti chülü lúmoun san líburu, ába janábaguni gürigia Búngiu luágu, ladúga ában lan abeichúni janárimeti.

17

Tasiadirúniwa oúnwenbun jóru

¹ Ábati liábin ában jádaangiñe sédü ánjeligu ja láubaña sédü cópu, ába lariñagun nun.

—Jigábu, narúfudaali tabeichún oúnwenbun jóru to ñúnboun ligíbuagu barána bun.

² Agánawaaña urúeigu ja ubouagubaña lídan salúfuri túma, bachárua jagía ja ubouagubaña láu bínu le lánina tisálufurin.

³ Ába lanügünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában würi waríñu luágu ában mónsturu funáti, bürüwaña líña sun luwúyeri dimúrei le anábaguti Búngiu tuágu, sédüñein lichügü mónsturu le uágubei tañúura, dísi ligáanchun.

4 Würi tugúya, gúchu lúma funáti ticólorunbei tanáangun, liábin tuwénden, gólu, dübü buíduburiti, lúma pérla. Níñein ában cópu gólu tújaburugu buin láu tisálufurin lúma liwíye tadaágun.

5 Bürüwañu líña ában íri teréberugu láu ában aníchigu arámudaguati. Íri le teréberugubei. “Babilónia to weírìboun, jáguchu jóru lúma sun luwúyeri iwíyeni ubouágu.”

6 Ába nasúbudiruni luágu bacháruañoun lan würi tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucrístu. Dan naríjimbalin cátei le, ába laweírìdun nanígi.

7 Ábati laríñagun ánjeli ligía nun.

—¿Cá uágu laweírìda banígi? Nasúbudiragüdaali míni tan würi to bun, láu sun mónsturu le anügübarun, le sédübei ichügü, díisi ligíanchun.

8 Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujoún lóunwen. Ja aganoubaña ubouágu, ja úabei jíri bürüwañu tídan líburu to lánina íbágarì lúmagiñe ladügün ubou, laweírìduba janígi dánme jaríjini mónsturu le meja gabágarìbei áni úaali, ábaya liábin.

9 Níjein cátei ya joun ja gayáraabei gunfaráanda jamáni. Sédü ichügü ligía, míni lan sédü wúbü le uágubei ñun tan würi tugúya,

10 sédü méme ichügü ligía, míni lan gíñe sédü urúeigu. Seíngü jádaangiñe urúeigu jagía, gumújali jarúeijan, ában jádaangiñe, larúeijaña guetó, le ában, miábingili. Dánme liábin jagúmujoún, larúeijaba murúsurügü dan.

11 Le mónsturu le meja gabágarìbei áni úaali guetó, ligía jawídünbei urúeigu, láu sun ligía lan ában jádaangiñe sédü, lárìgiñeme, ábame lídin lídoun lagúmujoún lóunwen.

12 Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu.

13 Ában lábu jarítágun urúeigu jagía, jíchugubei jabáfu lúma jarúeijan lun mónsturu.

14 Jageíndaguba lúma Jesucrístu, láfaragubaña jílagubei, ladüga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagü méme jáña lídan jafíñen luágu, úara lúma.

15 Ába gíñe laríñagun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu díimúrei, lúma néchaani.

16 Áni díisi gánchu le baríjubei luágu mónsturu, le méme díisibei urúeigu, teyéreguduba jóru joun, ábame jígirunun fiwañu, surúsu, jeígubei tügürügü, ábame jágudunun láu wátu geméti.

17 Rúlaali Búngiu tídoun janígi lun jadügüni le labúseerubei láu júaradun lun jedéreguruni jabáfu queísi urúeigu lun jíderaguni mónsturu daríme lagúnfulirun le laríñagubei Búngiu.

18 Würi to baríjúboun, tugúya weírìti ubúruge le agúmadirubaliña lurúeitegu ubou, le gírìbei Babilónia.

18

Teíquadun Babilónia

1 Lárìgiñe sun cátei le, ába naríjin ábanya ánjeli larárìrun síelugiñe láu sarágu ubáfu, ába larúgoundun ubou láu límirin.

² Lagúraguati láu umálali jéreti.

—Gumúgua, gumúgua Babilónia to weíriboun, guetó jábiñejaru máfianu, jarámudaguagüle sun jawúyeri espíritu wuriñatiña, jádibu dunúru wíyetaña queísi wadúbi.

³ Ladüga sun lan néchaanigu bacháruaaña láu bínu le lánina tisálufurin, áni agánawaaña lurúitegu ubou túma lídan tisálufurin, alúgurajatiña buri ja ubouágubaña, rísijaña lídaangiñe luwénden touseragun túngua.

⁴ Ábayati nagáambun laríñagun ábanya umálali ñúbinti síelugiñe.

—Furíjuma Babilóniagiñe, jugúya le nánigu, mafánran jumámuga lídan tífígoun lúma lídan tabeichúniwa.

⁵ Gíbeguaali tífígoun darí lun lachülürün síelu, áni jarítaguaali Búngiu luágu luriban touserun.

⁶ Adüga jumá tun Babilónia quei tadüga joun ámu, fáyei jumoún dóbüli lueí le tadügubei. Rújuma ában uníñein le jéretimaati bián weíyaasu tun sügü láu le tíchugubei joun ámu.

⁷ Súfurigüda jumoún quei méme tedéregagun túngua lun anáanguni únguaü lúma lun agünrinchaguni, ladüga aríñaga tan tídan tanígi. “Ñun nína ya quei ában urúei, máma nugúya ában jíñáru mámaritu, masúfurirubadina gíñe.”

⁸ Ligía liábinba lubeí tabeichún lídan ában meme wéyu —ouweni, íruni, ilámaü—ábame tagudún láu wátu geméti, ladüga gabáfuti Wabúreme Búngiu le asíadirubarun.

⁹ Lurúitegu ubou ja aganóubaña túma lídan salúfuri lúma irisini, jayájuba, gudémegua tugúyame joun dánme jaríjini gumúlali le lánina tagudún.

¹⁰ Ábame jeréderun díse, le janúfudei lueí tabeichún, ábame jaríñagun.

—¡Fugiábu Babilónia, ubúругu le weíribei, Babilónia ubúругu le gabáfubei, lídaanrügü murúsun óra liábin babeichun!

¹¹ Ja alúgurajatiña buri ja ubouágubaña, ayájuatiña gíñe, gudémegua ligía ubúругu ligía joun ladüga úaaña lan cába lan agáñijei ebégidinaü le janáajabei

¹² ebégidinaü lé buri gólu, pláta, dübü buíduburitu, pérlas, gamísa to líno to fínutu, séda, colóru buri gúchu lúma funáti, lúma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, lúma dübü miríti,

¹³ canéla, cátei lé buri jémeti, cupáli, mírra, ibíñei, bínu, aili, fulúwaaru fínutu, lúma túrígu, barútiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoún.

¹⁴ Jaríñaguba lun ubúругu ligía.

—¡Uaarú frúta buri to seméboun búma to jínsiñeñajáboun bun sarágu, féridi báali gíñe sun irisini lúma wénden le búmañajabei, féridiwaali lun sun dan!

¹⁵ Jáñaja alúgurajabálin buri cátei le áni rísijaña lídan ubúругu le, jeréderuba díse le janúfude lueí labeichún, ayájuajeina, aságürijeina.

¹⁶ Ábame jaríñagun.

—¡Fugiábu ubúругu weíríti! Ítara líñá meja quei ában würi táu tadáuragun to líno fínutu túma anáanguni to colóru gúchu lúma funáti, láu tuwénden gólu, dübü buíduburiti lúma pérla.

¹⁷ ¡Lídan murúsun óra gumúja sarágu irisini!

Sún buri tarúne ugúnein, pasajérugu, mádulungu, jáma sun ja ñadágimeinbaña baránaja, díseti jeréderun.

¹⁸ Dánti le jaríjini lugúmulalin lágudun ubúругu, ába jagúragun.

—¿Cásan meja ámu ubúru gu ñíbei quei ouñwenbun ubúru gu le?

¹⁹ Ába jíchaagun múa jábulugu, ayájuaja, aságürija, agúaragua.

—¡Fugiábu Babilónia lé buga weíríbei! Rísijañá yebe sun ja gagúnebaña wapóru baránaja láu lírisin, áni lidaanrügü murúsun óra güriñwagua.

²⁰ Gúnda jumá láu le asúseredubei lun Babilónia, amürü siélu, júma jugúya apóstolugu, jáma profétagu, jáma sun ja lánigu Búngiu, ladüga adügaali Búngiu gúsei jun láu lasiádiruni.

²¹ Ábati liñúrun ában ánjeli gabáfuti ában dübü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdúniwa Babilónia, ubúru gu le weíríbei, marijindügüyáwalime.

²² Magaambúndügüyáwalime tamúri gidára, fídu, bémerirugu, úaaname gíñe ñadágimeintiña bídan ni ca uwúyeri, magaambúnjalime gíñe lamúri dübü le muli bídan.

²³ Madúnraagúnjalime larúgounga lámpu bídan, magaambúndügüyáwalime areñjani le lánina maríei bídan, láu sun gabáfugüda báníña meja bání alúgurajatiña lídan sun ubou, eyéedagua báña sun néchaani láu babíñarajan.

²⁴ Dariwaali játa profétagu, jáma ja lánigu Búngiu, lúma játa sun ja áfarawagúañabaña ubouágu, dariwaali játa sun jagía lídan ubúru gu lé meja Babilónia.

19

¹ Lárígíñe cátei le, ába nagáambuni jamálali sarágu güri-gia, jagúarajan. ¡Alelúya! Weíríti Wabúngiute le Súnti Gabáfu, ligía asálbarubaliña lánigu.

² Agúseragúdati láu úarani lúma ísuruni, siádi láaru ouñwenbun jóru to agádeirubalin ubou láu tisálufurin, águyugüda láali jáfarawagún lánigu tuágu.

³ Ábaya jagúarajan.

—¡Alelúya! Magúmubei lamúdeirun tugúmulalin.

⁴ Játi weín-gádürü güri-gia ja weírígutiña, jáma gádürü cátaña gabágaritiña jagía, ába jélemuchun chülú múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵ Ábati lagaambún laríñagun ában umálali yaráfa lueígiñe lála Búngiu. Rújuma uweíríguni lun Búngiu, sun jugúya ja esériwidubalin, áni inébelá jun, weíyaaña, ñübüri-giña.

Fédu siélu

⁶ Agáambayatina camá jamuga jamálali sarágu güri-gia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadíja.

⁷ Gúndaagua wamá, buñwama láu ugúndani, ru wagíame uweíríguni lun, ladüga chülúja óra lun lídan jamá ában lánigu Jesucristu lúma, le gumúti. Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno finutu, íbágarí le surúti, le jabágarí lánigu Búngiu.

⁹ Ábati laríñagun ánjeli nun.

–Babürüja. “Gúnda jamá ja amísurajoúbaña lídoun fédu le lánina lúaradun Jesucrístu jáma lánigu.”

Ába lariñagun nun.

–Dimúrei buri inárüniti le lariñagun Búngiu le.

¹⁰ Ába nájuduragun ligíbugiñe ánjeli ligía, ába lariñagun nun.

–Madúgabei le, esériwiduti áu lun Búngiu quei amürü jáma bibíriña ja afálarubalin láni Jesúsu ugánu derégüdagüñu, lun Búngiu lun bájuduragun.

Ugánu le lanügübei Jesúsu lídoun larúgounga, ligía lébubei sun le jariñagubei profétagu.

Le aweínjabalin gabáyu jarúti

¹¹ Ábati naríjini siélu junreñu, ába lasálriragun ában gabáyu jarúti, léti aweínjabalin, Gúnfuliti lúma Inárüni, ligía lírabei, ladüga láu ísuruni lagúmadija, láu giñe ísuruni lageíndagua.

¹² Ámirijati lágu camá ligémeri wátu, ñíñein sarágu rídi lábulugu, ñíñein giñe ában íri bürüwañu luágu, ligía rügüñein asúbudirei.

¹³ Anáanguni to luáguboun, feíndiwatu láu jítaü. Lerérun Búngiu lírabei.

¹⁴ Jafálareiti súdaara ja siélubaña táu jadáuragun líno to finutu, jarútu, jarúma, wariñu jagía jawágu gabáyu jarútiña.

¹⁵ Ñíñoun ában efeín jamánatu liyúmulugugiñe lun láchaünguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárime ligáñi Búngiu joun.

¹⁶ Bürüwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

–Jigóugu, oúndaragua jumá lun oúnwenbun ladíneragüdüni Búngiu,

¹⁸ Jou jumámuga jágürügü urúeigu, gumádimatiña, jáma wügüríña ganígitiña, jágürügü gabáyu jáu sun ja aweínjabaliña, jágürügü sun jawúyeri wügüríña dándu ja jóunguatiña quei ja idámuni, dándu ñübürigiña quei weínamujaña.

¹⁹ Ábati naríjini mónsturu jáma lurúeitegu ubou jáu jánigu oúndaragaaña lun jageíndagun lúma le wariñubei luágu gabáyu jarúti jáma lánigu.

²⁰ Ába ladaürün mónsturu úara lúma proféta yéeti le buga adügübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóungua lun labürüdüni líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún wínwañu lídoun lagúnu le láubei wátu geméti lúma súfuru.

²¹ Ja jíbiri, ába jáfarawagún táu efeín to liyúmuluguboun le wariñubei luágu gabáyu, ába jaquímuledun sun dunúru buídu láu jágürügü.

20

Le mílu írúmu

¹ Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwenbun güríngüri lújaburugu.

² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagüraguni luágu mílu írúmu.

³ Ába láguruni lídoun júyu le mébejabei le ñi lubei ladáurei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu írúmu. Lárigiñeme mílu írúmu ligía, lígiragüdüwaba luágu murúsun dan.

⁴ Ába naríjini jála buri ja íbǐjubaña ubáfu lun jagúseragüdüñ, ñun jáña luágu. Aríja numútiña gíñe jawáni já meja adürürübaña ichügü lueígiñe japúrichijani Lerérun Búngiu lúma lueígiñe jadímurejan luágu Jesucrístu, ja májuduragunbaña írún mónsturu ni tun liyáwa, mígirun jagía lun lichugún líri luágu jerébe o luágu lan jarüna. Ába naríjin jásaarun lídaangiñe ouweni lúnya jabágaridun, ába jagúmadijan úara lúma Crístu luágu mílu írúmu.

⁵ Ánjeinti ja jíbiri jiláguaaña, másaaruntiña lídaangiñe ouweni daríme lárigiñe mílu írúmu. Niján furúmiñetibeí ásaaruni lídaangiñe ouweni.

⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe ouweni! Mabáfuti libíaman ouweni jawágu, lubáragiñe líra, fádírígubaña láni Búngiu lúma láni Crístu, ábame jagúmadijan úara lúma Crístu luágu mílu írúmu.

⁷ Dánme sügüjali mílu írúmu ligía, ligíame lígirawagüdüñ Máfia lídaangiñe júyu le mébejabei,

⁸ ábame láfuridun lun layéejaniña néchaanigu lídan sun ubouú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gíbebaña quei liságounte barána, lun wuríbu.

⁹ Ítara líña lubeíti, ába jáfuridun súdaara jagía lídaangiñe sun ubouú, ába jegéyedaguni fulásu le ñi jabei lánigu Búngiu lúma ubúru gu le jínsiñebei lun Búngiu, le Jerusalénbei. Ába loúnajan Búngiu wátu geméti siélugiñe, ába láguduniña gumúgubei.

¹⁰ Máfíati le ayéedubaliña, ába lágurúniwa lídoun lagúnu le láubei wátu geméti lúma súfuru, le ñíjin lubei jágurúa mónsturu lúma proféta yéeti. Jasúfuriruba ñi wéyuagu, áriebu lun sun dan.

Wísiyu ligíbugiñe ouñwenbun jalaü jarúti

¹¹ Ábati naríjin ában ouñwenbun jalaü jarúti, ñíñein Búngiu ñun luágu. Ába lagúmuhagan siélu lúma ubouú ligíbugiñe, ába marijínjali lan.

¹² Ába naríjiniña jiláguaaña, weínamujaña jáma ñübürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina íbágari. Ába jagúserawagüdüñ jiláguaaña luágu buri cátei lé meja jadügübei, según le bürüwañubei tidan líburu buri tugüya.

¹³ Sarátiña sun ja añáradagubaña dúnarugu, sun ja jiláguañaña, ába jásaarun lídaangiñe ouweni, ába jagúserawagüdüñ luágu buri cátei lé meja jadügübei.

¹⁴ Ába lágurúniwa ouweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei ouweni,

¹⁵ ñíjin jagurúa ja úabei jíri tidan líburu to lánina íbágari lun jasúfurirun ñi gumúgua dan.

21

Iséri siélu lúma iséri ubouú

¹ Lárigiñe, ába layáwadagan iséri siélu lúma ában iséri ubouú nun, gumúgua buga furúmiñeti siélu lúma furúmiñeti ubouú áni úaali buga barána.

² Áu Juan, aríja numúti ubúru gu biníwati le iséri Jerusalén, larárirun siélugiñe lúmagiñe Búngiu. Aráanseñu líña quei ában adári dáüguañu lubá tadári.

³ Ába nagáambun laríñagun ában umálali jéreti siéluigiñe.

—Aríjabá, agánawati Búngiu jádan gürígia guetó. Laganoúba jáma, jagíaba lánigu, Búngiu mémeba jáma lun ligía lan Jabúngiute.

⁴ Larágajabei sun jáguira, úaalíme oúweni ni ayájuni ni íruni ni igárigu, ladúga sügüja sún meja cátei le níjeinbei.

⁵ Ábati laríñagun Búngiu.

—Aríjabá, adúga numúti sun cátei isérime.

Aríñagati gíñe.

—Babürüja, ladúga inárüniti dimúrei buri le, áni gayáraati laffíñerún luágu.

⁶ Lárigiñe, ába laríñagun nun.

—Súnja nadügüni sun cátei le. Áu lagúmesejabei sun cátei, áu gíñe lagúmujoúnbei, quei létüra ‘A’ lúma ‘Z’. Le mágürabuti, níchuguba lun lun látun lídaangiñe líseesen dúna le íchugubei íbágari, mafáyeijaanga luágu.

⁷ Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü.

⁸ Ánjañati ja janúfudebaña, ja maffíñebaña, ja iyéreejabúbaña, ja gáfarajadibaña, ja adaágubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le súbai láu wátu geméti lúma sáfuru, le libíamabei oúweni, ligíaba jalágaante.

Iséri Jerusalén

⁹ Ábati liábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucrístu bun.

¹⁰ Ába layáwadaguagdüni Sífiri Sándu ában wübü nun, weíriti, íñu, ába larúfuduni oúnwenbun ubúru gu biníwati le Jerusalén nun, larárirun siéluigiñe lúmagiñe Búngiu.

¹¹ Ámirijati ubúru gu ligía láu larúgounga Búngiu, ítara líña límirin quei límirin ában dübü buídumeraüti, quei dübü le jáspe, jarúgoungati quei bídiriu.

¹² Níñein ában barieru weíriti, íñu, láu dúusu béna geyégu láu ubúru gu ligía, ában ánjeli luágu cáda béna, lúma jíri dúusu türíbu ladúgawagun Israél bürúwañu luágu buri béna.

¹³ Ürüwañein béna lueígiñe le nígiñe lubei laboúcha wéyu, ürüwa lueígiñe nóрте, ürüwa lueígiñe sur lúma ürüwa lueígiñe oúbaü le nígiñe lubei lálüda wéyu.

¹⁴ Barieru ligía, ligíbuaguñein dúusu dübü lidérebuguñein, láu jíri dúusu láni Crístu apóstolugu bürúwañu luágu.

¹⁵ Níñein ában mabúru gólu lúma ánjeli le adímurejabei núma lun lamísurajani ubúru gu, lubéneri, lúma lubárierun.

¹⁶ Ubúru gu ligía, ába lábu lidábuberen lúma limígifen. Ába lamísurajani ánjeli ligía ubúru gu láu lumáburu, bián-mílu bián-san kilómetros luweírín, ába lábu limígifen lúma líñun, lúma lidábuberen.

¹⁷ Lárigiñe, ába lamísurajani barieru, ürüwa-wein-gádürü méetros luweírín según jamísuraagüle gürígia le layúsurubei ánjeli ligía.

¹⁸ Láu dübü le jáspe ladúgüwa barieru ligía, ubúruguti ligía, láuti gólu le tímatamati, miríti queisi bídiriu le jarúmati.

¹⁹ Wéndegüdáwati lébu baríeru ligía láu sun luwúyeri dübü buíduburiti. le furúmiñeti, láu jáspe, le libíaman, láu safíro, le lürüwan, láu ágata, le ligádürün, láu esmerálda,

²⁰ le liseíngün, láu ónise, le lisísín, láu cornalína, le lisédün, láu crisólito, le liwidün, láu berílo, le linéfun, láu topásio, le lidíisin, láu crisoprása, le liúnsun, láu jasínto, léti lidúusun, láu amatísta.

²¹ Dúusugubei béna ligía, dúusu pérlas, cáda béna láu ábanrügü pérla ladügüwa. Léti üma buri láni ubúругu ligía, láuti gólu jarúgoungati quei bídiriu.

²² Marjintina ni ában ligílisi lídan ubúругu lídan, ladüga añájein Wabúreme Búngiu le Súnti Gabáfu lúma Jesucrístu ñi, mabúseerúnwatu ligílisi le ñí jabei.

²³ Memégeirunti ubúругu ligía larúgounga lúmagiñe wéyu ni lúmagiñe játi, ladüga le guánarü larúgounga Búngiu rúti larúgounga lun, léti Jesucrístu, ligía lílámpanbei ubúругu ligía.

²⁴ Jeíbuguba sun néchaanigu ja sálbawañabaña lídan lílámpan ubúругu ligía, ábame janügüni lurúeitegu ubouú jaweírigan ñíjin, lun jíchuguni lun Búngiu.

²⁵ Madáurawangunbei lubéneri wéyuagu, úabei gíñe árieibu ñi.

²⁶ Lanügüba jaweírigan néchaanigu ñíjin, láu sun jarísín,

²⁷ mebélobei ni cáta wíyeti ñíjin, ni le adügüti cátei le wuríbati o gayéeraguati. Ja rügübaña bürüwañubaña íri tídan líburu to lánina íbágari to lúmaboun Jesucrístu, ja gia rügübaña ebélura.

22

¹ Ábati larúfudun ánjeli ligía ában dúna jarúmati nun, le íchugubei íbágari, jarúgoungati quei bídiriu, lídaangiñe lála Búngiu lúma lála Jesucrístu láfurida.

² Ñíñein dúna ligía lamídaangua lémeri ubúругu ligía, áni luágu bián louba dúna ligía ñi laweírída buri tídiru wéwe le íchugubei íbágari, le agíndubei dúusu weíyaasu lídan írúmu. Ságü játi lagíndun, léti lubána, seríwiti lun lagáranijóun joun néchaanigu.

³ Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucrístu lídan ubúругu ligía, ábame jájuduragun lánigu lun.

⁴ Jagágíbudaguba lúma Búngiu, ñíbei gíñe líri jeréberugu.

⁵ Úaalíme árieibu ñi, ja aganoubaña ñi, memégeirunbaña ligémeri lámpu ni ligémeri wéyu, ladüga larúgoungadagüdüba Wabúreme Búngiu jáu, ábame jagúmadijan sun dan.

Madíseeli líabin Jesúsu

⁶ Lárigiñe, ába lariñagun ánjeli ligía nun.

—Inárüniiti dimúrei buri le, áni gayáraati lafíñerúniwa luágu, áni Wabúreme Búngiu méme le íchugubei dimúrei joun profétagu oúnaja láadina lun narúfuduni le lúnbei lasúseredun joun lánigu madíse.

⁷ —¡Aríja jumá! ¡Anáte madíse! líña lariñagun Jesucrístu.

¡Gúndaalá le adügübei gásu láu ugánu le láni Búngiu le bürüwañubei tídan líburu to!

⁸ Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun.

⁹ Ába lariñagun nun.

—Madügabei le, eseríwiduti lun Búngiu áu quei amürü jáma bíbíriña ja profétagu, jáma sun ja adügübaña gásu láu le bürüwañubei tídan líburu to, lun Búngiu lun bájuduragun.

¹⁰ Aríñagati gíñe nun.

—Marámudabei láni Búngiu ugánu le bürüwañubei títan líburu to ladüga yaráfaali dan lun lagúnfulirún.

¹¹ Ígirabei le wuríabei lun lasígirun adáagua wuríbani, le wíyebeyi, lun lasígirun lídan líwíyeyi, ánjeinti le buídubeyi, buídememelá, áni le wügúri le derégeguabei lúngua lun Búngiu, gúnfulimemelá.

¹² —Ánja, madíseeli níabin, líña laríñagun Jesucrístu, áni barü numuti afáyeiruajaü le lúnbeiyi níchuguni lun cáda ában según buri cáteiyi le ladügübeiyi.

¹³ Áu furúmiñetibeyi lúma agúmujoúni, lagúmeseja sun cáteiyi lúma lagúmujoún queiyi létüra 'A' lúma 'Z'.

¹⁴ Gúndaatiña ja achíbubalin jafígoun lun garícha jamá lun jeígin lídaangiñeyi lín tídíbu wéwe le íchubeyi íbágari, gayára lámuga jebélurun lueígiñeyi lubéneriyi ubúrugu.

¹⁵ Ánjaña ja mafíñeradibaña luágu Jesucrístu, ja abíñarajabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba bouguni.

¹⁶ —Áu Jesúsuyi, oúnajajá náali náni ánjeiyi lun lasúbudiragüdüniyi sún buri cáteiyi le joún buri tílana lígílisi. Áu línébaanfán urúeyi Davíd, áu gíñeyi queísi warúguma to lánina bináafin.

¹⁷ Aríñagati Sífiriyi Sándu jáma ja lánigubaña Jesucrístu.

—Jígábu lun Jesucrístu lun basálbarun.

Le gíñeyi agáambubeyi, aríñagalá.

—Jígábu lun Jesucrístu, sálba bámuga.

Le mágürabubeyi, ánjeiyi busén, ñübinlá, gurála lídaangiñeyi dúna le íchugubeyi íbágari, mafáyeijaanga luágu.

¹⁸ Sun ja agáambubalin láni Búngiu ugánu le bürüwañubeiyi títan líburu to, wéridiyi numútiña lueiyi cáteiyi le. le íchugutiyi lánwoun cáteiyi le, lagánwoundagüdübaña Búngiu ígeiyi ja uágubaña labürüjoúya títan líburu to, luágu.

¹⁹ Le gíñeyi agídáruyiyi som cáteiyi lídaangiñeyi láni Búngiu ugánu le bürüwañubeiyi títan líburu to, lagídáruyiyi gíñeyi lufánran lídaangiñeyi lín tídíbu wéwe le íchugubeyi íbágari, lúma lídaangiñeyi ubúrugu sándu lé buri bürüwabeiyi uágu títan líburu to.

²⁰ Le asúbudiragüdübalin buri cáteiyi le, aríñagati.

—Ánja, madíseeli níabin.

Ítaralá. ¡jígábu Wabúreme Jesúsuyi!

²¹ Binílaün Wabúreme Jesucrístu sun jugúya. Ítaralá.